

فَلَسَفَه دَرَسَلَرِي

بَرِيچِي قِيَمِي

رِهبر اتخا دِعماني مَكْتَبِنْدَه صوَك صَنَف اَفنديلَرِيَنه آچِيق بِر لسان اِيلَه
(تَقْرِير ايدَلش اولان دَرَسَلَرَك صوَرَت مَضبوَطَه سِيَدِر . بو بِرِيچِي قِسم)
(— epistémologie يَني - مَبِحث مَعْرِفَت مَسْأَلَتِي وَاوَنلَرَه مَتَعَلَق)
(مَلاحِظَات وَتَنْقِيْدَاتِي شَامِلِدِر .)

Es. No.	1927	129	2.00
Rumiz	A.C.	102	1-102

اَسْبَق اِدَرَنَه مَبْعُوْتِي وَحَالَا قَارائَتَه مَجْلِسِي اَعْضَا سَنَدَن

رِضا تَوْفِيَق

70-184

بِالْجَمْلَه حَقُوْقِي مَحْفُوْظِدِر .

700808

اِسْتَانْبُول — « قَدِر » مَطْبَعَه سِي

۱۳۳۰

(بعضه ایضاحات مقومه .)

۱- ۱۳۳۰ تشرین اولی ، تاریخنده رهبر اتحاد عثمانی نك صوك صنفلرینه فلسفه درسی ویرمکه باشلادم . برسلسله مطرده اوزره تقریر ایتمش اولدوغم درسلی ، شویله بر کتاب شکنده طویلادم . ترتینی قطعاً تغییر وتبیدیل ایتدم . بناءً علیه بوراده موضوع بحث ایدلمش اولان مسائل متنوعه نك شوترتیب ظاهر یسی روابط طبیعی و منطقیه لرینه ده زباده توافق ایدر سانیرم . اویله بر تجربه یایمق ایسته دم که بو کبی مسائل غامضه نك ماهیتنی - بوسبوتون فلسفه یه ییکانه اولانلره بیله - ممکن اولدوغی قدر وضوح و صراحتله آکلاته بیله ییم ؛ و او مسئله لر ذهن متفکرده فصل ، نیچون ، نه وقت ونه کبی شروط والجات تحتنده بیله تولد ایتمش ایسه ، درسلمک موضوعاتی آرمه ندی کی رابطه منطقیه دخی ، مسائل فلسفیه نك صورت تولد ووجهه تکاملنی کوسون او سلسله طبیعییه موازی و محاذی دوشسون . شو صورتله که بن ، بر درسده ، ذهن بشره بالضروره وبالطبع عارض وطاری اولان شبهلرک ماهیتنی ، منشائی شرح وایضاح ایدرکن طلبه ، او شبهلرک بهمه حال تولید ایده بیله جکی مسائلی - آ ز چوق کندی کندینه - دوشونه بیلسین وکله جک بحثک ودرسک ، نه کبی موضوعاته تعلق ایده بیله جکنه دائر بر لمعه الهامه مظهر اولسون .

بوتون معلوما تمزک مبادیسی و اساسلرینی تشکیل ایدن بعض حقایق بدیهیه نك نسبی ویکدیگرینه مضاف بولوندوغنی ویکپاره بر منظومه افکار وجوده کتیردیکنی قبول وتسلیم ایتمه سه یدم ، حتی - حقایق اشایی ادراک خصوصنده کی عجز مزدن طولانی - پک طبیعی و پک ضروری اوله رق ذهنمه مسلط اولان شبهلرک دخی - طبق مبادی علمیه مزکی - یکدیگرندن متولد و بر برینه صیقی صیقی به مربوط ومتعلق اولدوغنی وعینی صورتله بر دیگر (منظومه متسقّه un système coordonné)

تشکیل ایتدیکنی لایقيله بيلمه سەيدم ، بو تجربه يه تشبث ايتزدم ؛ موضوعات فلسفیه یی - لاعلی التین - آیری آیری مسئله لر اولق اوزره تتبع ایدردم . آره لرنده حس ایتدیکم رابطه منطقیه کوره اونلری ترتیه چالیشمازدم .

شو حرکتیم ، اثبات ایدرکه ، بن موضوعات فلسفیه نک پراکنده و رابطه سز بر سوری مسائلدن عبارت اولدوغنه اینا میورم ؛ بالعکس فلسفه نک منظم و آهنگدار بر (منظومه معلومات) اولدوغنی وهله بوکون - تعیرک الک عمومی و فلسفی معاسیله ! - بر (بنیه عضویه *une constitution organique*) مالک بولندوغنی ادعا ایدیورم . اويله یکپاره برجهله افکارکه ، اونک هویت ممتازه سنی تشکیل و حیاتی تمثیل ایدن آهنگ بوزولمادجه عناصر اعتقادیه سنی یکدیگر نردن فک ایتک ممکن اولماز ؛ و مبادی اصلیه سی ایله یعنی الک بسیط و اساسی دستور - لریله قابل توفیق اوله مایان بر فکر و عقیده یی ده قبول ایده مز . ایشته (فلسفه بر بنیه عضویه مالکدر) دیمکدن مقصدم بودر ، و بو بویه در . بویه اولماسه یدی ، عالمک مبدأ و معادی و شونک بونک افکار و اعتقادی حقد ه هر کسک - بی سروین - بیان ایتدیکی و ایده بیهلجکی ملاحظات عنده دخی - معای اصطلاحیسی ایله ! - فلسفه دن صاییلردی ؛ و بالطبع فیلسوف اولق پک قولای اولوردی . حالبوکه اويله اولمادینی محققدر و مسلمدر .

مع مافیه فلسفه ایله بلکه هیچ اوغراشامش کنجلره بو مسائلی اولانجه اهمیتی ایله (و بیکنه نظر لردن دائماً کیزی قالان) روابط متقابله سیله آکلاته بیلیمک خصوصنده بالطبع معروض قاله جف مشکلاتی ده دوشوندیم ؛ بو خصوصده دخی تجارب سابقه واردی . چوق دفعه لر بالذات مناقشات و مباحثاتم ائناسنده تحقیق ایدوب کورم شدم که بر مسئله فلسفیه یی (صرف فلسفی) بر نقطه نظر دن تلقی ایده مدکلری ایچون خیلی معلوماتلی و عقللی آدم لر بیهل ، حقیله آکلایه مامشر و جف القلم اونی رد و یا استخفاف ایتکه یلتمش لردر . بونلر ایچنده علمای متخصصیندن بعض مشهور آدم لر بیهل ذکر اولونه بیلیر . نته کیم بن ده بر چوق امثالنی درس آره سنده ذکر و یا نقل ایتدم . بوکا تاریخ فلسفه ده پک کوزل مثاللر واردر ؛ حسب المناسبه بر قاجنی بو کتابده عرض ایتدم .

طلبه یه وکنجیره عاډ اولان مشکلاته کلنجه ، شبه یوقدرکه اونلرک بو کچی مسائلی تلقیه ، حتی شکل مخصوصی وروابط وعلاتی ایله برابر قاوارامغه بر استعداد، فطریسی اونلی ! اوندن صوکره بعض معلومات خصوصیه ایله بو استعداد، تمیه و تربیه ایدلش اولملی!.. هله معلومات مستحضره اولمازسه کوچ اولور وکچ اولور . واقعا هرکسک وخصوصیه کنجلرک درحال عالم اولماسی لازمکلمز؛ هم بوکون علم اودرجه تفن وتنوع ایتشدرکه تفصیلاتی نامحصوردر وبر آدم نه قدر واسع ودرین برذکایه مالک اولسه بیله بوتون انسانیتک بو گونه قدر کشف ایدوب ضبط وقید آلتنه آلدینی معلومات مطردهنی احاطه ایده مز ؛ معذوردر . بوکا بالفعل امکان یوقدر . اولمانجیه پک لزومده یوقدر . یالکز شو قدر وازکه مقدمات علوم مستحضر اولملی؛ هیچ اولمازسه، فلسفه درسند مثال ویا دلیل اولهرق ذکر ی کچن برحادثه طبیعیه نک ویا برقانونک نه اولدوغنی بیلمه لی و بیلمیورسه بیله حین حاجتده مؤلفات مخصوصده آرانبوب بولونملی در . یعنی تحصیل اعدادی ضررسز اولملی در . اولورسه حکمت طبیعییه کیمیایه ، فیزیولوژییه ، متعلق بولونمق اوزره ذکر ی کچن برقانون یاخود بر حادثه نی طلبه درحال مدونات علمیهده آرار ، وبوله بیلیر . حالوکه بو تربیه علمیه دن محروم قالان برآدم نه قدر ذکی وحتی شاعر ، کاتب ، خطیب ویا - عادی معناسیله ! - معلوماتلی اولسه بیله علوم کتابلرنده بر مسئله آرایوب بوله ماز ؛ بولسه حقیله آکلایه ماز ؛ چونکه او مسئله دیکرلرینه مربوطدر .

برمثال ویرهیم که نه دیمک ایسته دیکم تمامیه آکلایشلین :

فلسفه خواهجه سی، درس ویریرکن حسبالمجبوریه بعض معلومات مسلمیه اشارت ایدرکه اونلر جنس وماهیتلرینه کوره بررعلم مستقلک موضوعاتسنددر . فرضا ، مدرکاتمک طبعتا (افسی Subjectife) اولدوغنی آکلایرکن ضیا وصدای کچی حادثه لری الک موافق مثال اولهرق ذکر ایده بیلیر . او تقدیرده خارجده برماده نک، مثلا اثیرک ویاخود هوانک بالذات اهتزاز ییله ، اوهتزاز ذاتک بزده ضیا وصدای صورتنده محسوس اولسنی پک مهم برکیفیت اولمق اوزره آکلایه سی لازمکلیر . فقط اهتزازات اثیریته نک درجات متفاوته ومعینه سنی

مختلف رنگر صورتندہ حس تلقی ابتد کمزی یگی باشند آ کلامغه واوزون او۔ زادی یہ ایضاحہ مجبور اولورسہ ، فلسفہ بحثی اولدوغی یرده بر اقوب حکمت درسی ویرمکه باشلاملی درکہ بواونک وظیفه سی دکلدر۔ او یالکز بو حادثاتدن فلسفہ نک نہ معنا چیقاردیغنی کوسترمک ایچون حادثات مذکورہ اشارت ایدر وکچر۔ طلبہ او بحثی اونوتمش ایسہ یکی دن تحقیق ایدہ بیلمک ایچون حکمت کتابی قاریشدر منی بیلیر ولسانی دہ آ کلار ویاخود بیلیر و آ کلار اولملی در۔ [کائنات مادیہ نک وجدانہ تجلیسی وسائط ادراک و بناء علیہ عضویتک درجہ کالہ کورہ در۔ اولہ ایسہ شو عالم خارجی بی ، هر جنس متحسس ، کندنجہ برذرلو کورور؛ اوحالہ ادراکمز واشیایہ علممز صرف اضافی در؛] دہ یغہ فلسفہ خواجہ سی بو دعوا یہ دلیل ابراز ایتک مجبوریتندہ درکہ بو مهم حقیقی طلبہ یہ آ کلاتہ بیلین ! حالبوکہ بو ساحہ تفکرده ایراد ایدہ بیله جکی دلائل قویہ نک همان جملہ سی (عمومی فیزیولوژی و تشریح تطبیقی) یہ متعلق معلوماتندر۔ ایشتہ بومعلومات آز جوق مستحضر اولملی ! طلبہ ذاتاً بیلمہ لی کہ بعض حیوانات سفلیہ نک کوزی یوقدر۔ بناء علیہ کورکوسی دہ اولماق لازم کلیر ؛ بعضی سنک پک رشیمی وابتدائی بر حالہ در۔ اعصاب انتہائی سی برلشمہ۔ مشدر ؛ اوحالہ سونوک برایی نقطہ دن عیارت بر کورکوسی اولق لازم کلیر۔ کذلک عدسہ ایله مجهز اولان مکمل کوزلرک خیال اشیا بی خطوط وحدودیلہ عکس ایتدیرمہ سی طبیعی در۔ الی آخرہ !.... بوتون بو شیلر حقندہ عمومی معلومات ایستر۔ هیچ اولمازسہ بونلری تحقیق ایدہ بیله جک بر تربیہ علمیہ ایستر۔ زیرا طلبہ دکل ، فیلسوفلر بیله بایکہ هر کسدن زیادہ بو کبی تحقیقاتہ مجبوردرلر؛ فقط لزومی حس ایتدکاری زمان تحقیق ایدہ بیلیرلر۔ بو ایضاحاتی ویرمکدن مقصدم شودرکہ :

بودرسلردہ بویله بعض واردات علمیہ واردرکہ امثلہ لازمہ اولہ رش تکرر ایدر۔ بن متخصصلر ایچون یازدیغم بر اثرده بویله مثال کتیرمدم۔ یالکز اشارتلہ کچدم۔ لکن مکتب اقتدیلرینہ لایقلہ مسـئله بی آ کلاتہ بیلیمک ایچون بعض ایضاحاتہ کیریشدم کہ - طبعی اعتباریلہ - اونلر فلسفہ مسائلندن صایلماز۔

حتى تكرر ائنه لزوم حس ائنه بنه اخطاراً تكرر ائتم . بونده فائده
ملاحظه ائلم .

اصطلاحات فلسفیه نك حیثیتی قطعاً محافظه ائتمکله برابر ممکن اولدوغی
قدر آچیق بر اسلوب و صریح بر لسان قوللاندیم ؛ حتی درسلی نصل تقریر
ائتم ائسه اوطور وادایی اولدوغی کبی محافظه ائتم . اسلوبك بویه سی ده
جانی اولور .

اكر بو درسلی ، فلسفه حقنده بر ذوق او یاندیریرده طلبه افندیلردن
بعضیلرنده مکمون اولان استعداد فطری یی اظهار و افشایدیسه شو خدمتمدن
بکلدیكم اك بویوك مكافاته نائل اولمش اولورم .

طلبه افندیلر جماعته منسوب اولمایان ارباب مراقه کلنجه ، ظن ائدرم که
شو تقریرلردن اونلرده آ ز چوق مستفید اولورلر . فلسفه حاضره نك باشلیجه
مسائلنی واونلرک منشائی، مذاهب فلسفیه نك ظهورینه سبب محض اولان شك
ویقین دعواسنك اك مهم اختلاف نقطه لرینی ، و بوتون بو مسائل اساسیه نك
صفحات تکاملنی صره سی ایله بومسوده ده بوله بیلیرلر . بوقدری ده ارباب مراق
ایچون کافیدر .

رضاتوفیق



فَلَسِفَه دَرَسَلَرِي

برنجی باب

فلسفه و فیلسوف تعبیر لرینک معناسی و منشائی. — فلسفه نك تعریفات متنوعه سی. —
فلسفه دیدیکمز مشغله ذهنیه نك اسباب ظهرری. جستجوی حقیقت مراقی بر طرفدن
علومی، بر طرفدن ده فلسفه یی تولید ایتمشدر. علوم یاشامق احتیاجندن، فلسفه ثلوم اندیشه سندن
طوغمشدر. بنا علیه هر ایکسی ده حیات و محات مسئله لر یله علاقه داردر. — علم ایله
فلسفه نك فرقی و حدود متقابله سی. علوم شتی ایله روابطی. اساطیر اولین ایله دین ایله ،
اخلاق ایله، صنعت ایله مناسباتی. — فلسفه نك موضوعنه و غایه سنه نسبتله تعریفی. —
فلسفه نك لزوم و حیثیتی. — فلسفه مسائلی. شعباتی. اصولی.

فصل

— ۱ —

اقتدیلر ! . . .

سز کله فلسفه درسی یاپه جغز. امینم که بو درسک اهمیتلی برشی اولدوغنی
و حیاتمزه، سعادت مزه بک یاقیندن علاقه دار بر چوق مسائلی موضوع بحث ایتدیکنی
بیلیرسکمز، و یا خود هیچ اولمازسه ایشیتمش سکزددر. ینه امینم که هر مدنی
ملتك، حتی هر مدنیتک بر فلسفه سی اولدوغنی ده ایشیتمش سکزددر. ای
بیلمه لی سکمز که مدنیت فی الحقیقه بر جمله حقوق و وظائف متقابله اوزرینه
مؤسسدر که اونک ارکان اصلیه سنی تشکیل ایدن هر دستور؛ — اومدنیتی
وجوده کیترن، ادام ایدن، محافظه ایله ین — عقاید مسلمه بناسنک بر رتمل —
دیرکی مثابه سنده در. اونلرک بردانه سی اسکیدی می؟ چورودومی؟.. محققدر که
مدنیت موازنه سنی چوق مدت محافظه ایده مز؛ صارصیلیر. بونلردن بر قاجی
بردن ییقیلیرسه او اساسلره استاد ایدن مدنیت دخی ییقیلیر. تاریخ انسانیتک

شاهد اولدوغی وقوعات عظیمه بزلره بوندن مهم بر حقیقت اوکره تمه مشدر. جاعت انسانیه نك حیات تاریخیه سنده بویوک دورلرک صباح انفلاقی حاضر لایان مدھش وعمومی احتلالره سبب ، منبای اعتقادك صار صیلماسی در . فیلسوفلر نظرندہ او اختلاللرک حیثیت معناسی بودر . واحتمالکہ شو زمانمزدہ اوروپا مدینتی دخی بومعنايه یکی بر مثال عرض ایتک اوزره حاضر لانیور . احتمالکہ یکی بر دور مدینتک عرفه سی ادراک ایدیورز . شو مختصر ملاحظاته باقوبده ظن ایتھییکز که مدینته پک خصوصی ، و صرف عندی بر معنا ویریورم ؛ و (مدینتی وجوده کیترن ، ادامه ومحافظه ایدن قوت بر مجموعه معتقداتدر) دیمکله مدینتی ، اسباب وعواملنه تقدیم ایتک کبی غلیظ بر خطاده بولونویورم. هله هیچ ظن ایتھییکز که کشفیات تجربیه وتطبیقات صناعیه نك تأسیس مدینته واونک ترقی وتکاملنده ندرجه دخل وتأثیری اولمش بولوندوغی بیلیمورم ، یاخود بیلیمه مزلیکدن کلیورم. بالمکس شو اخطار ایتدیکم شروطک جمله سی ده شو آتده خاطر مدده در؛ اولماسه ذکر ایده مزدم . بن بویوک بر قوت وقاعتله اینانیرم که مدینت- اول امرده- کشفیات تجربیه وترقیات صناعیه محصولی در. فقط بوکونکی معنای علویسیله مدینت ، یالکز بوندن عبارت دکلددر . بزه شو دنیاده رفاه سعادت مادیه اسبابنی تأمین ویمکن اولدوغی قدر اکمال ایدن کشفیات علمیه وترقیات صناعیه یی مدینت حقیقیه ایله بر طوتمق ، بر شینک وسائط استحصالیه سی ایله اوشیشی بر طوتمق کبی بویوک وقابا بر یا کاشلق اولور . مثلاً حیاتمزی ادامه ایچون محتاج اولدوغمز غدایی والبسه یی تدارک ایتک ، حتی حیثیت وناموسمزی محافظه ایلک خصوصنده اک معتبر؛ اک قیمتدار بر واسطه اولان پاره یی ، غذا ایله ، البسه ایله ، ناموس ایله بر طوتمق قدرد بویوک بر ضلالت اولور.

شبهه یوق که یاشامقده سعادت ، بر امل ایسه ، حقیقه مسعود اوله بیلیمک ایچون انسان اونو قازانلی ، مال ایدنمش اولمالی در ؛ بونک ایچون ده وسائطه مقتدر بولونمق ضروریدر. فقط -اونوتاملی که- واسطه استحصال، حیاتده مقصود ومطلوب اولان آمال دکلددر.

بناءً عليه يالكز شمندوفرلر، الكتريق ماكنه لرى، بانقه لر، حقيقى برمديت تأسيسنه كافى اولماديني كى، اخلاق، عدالت، حق، خير وشر، حسن وقبح، تعاون وتناصر، رقابت، سعادت، وظيفه ومجبوريت، حميت، مليت، انسانيت ودها امثالى كى كلمات مجردة نك متضمن بولوندوغى عقايد مسلمه وقويه يه-هر هانكى برسيله - شبهه تسلط ايدردہ كائنات وحيات حقندہ پيدايش اولدوغمز جمله اعتقاد نك آهنگ عموميسنى اخلال ايدہ جك قدر ماهيتى تغير ويا افساد ايلرسه بوتون او ماكنه لر وشمندوفر وبانقه لر، حالا موجود اولان مديتى يقيمق ايچون آفات طبعيه دن بيلك كره مدهش وسايط تخريبه دن اولورلر. يعنى عقايد مغويه سى متفسخ، متناقض ومتزلزل اولان بر مديتك اتخارينه، فلسفه سنده كى فساد، سبب اولور؛ كالات ماديہ سى ده واسطه تخريب اولور.

بو ملاحظه وقوعات تاريخيه استاد واوروپانك الك داهى فيلسوفلرىني لهمايده اشهاد ايدہ جكم ايچون صرف شرقى قفاسيله دوشوندوكمه ذاهب اولمالميدر. يالكز وسايط ماديہ نك تكاملى ايله حقيقى برمديت ممكن اوله ميه جفى اثبات ايتك ايچون مثال آرانيرسه، نجه دفعه لر جماعت بشريہ يى زيروزير ايدن ومليونلرجه انسانلر ك خوتنى هدر ايدن دين محارباتى اخطار ايلك كفايت ايدر. انسانيت تاريخنده الك زياده معنادار كورون بوتوع اختلاللر صراحتاً كوستريوركه، انسانلر ك، او كوز عربيه سنده بدل، شمندوفرله كيتكم وراحتسز قولوبه لر بدل، منتظم، ومستحكم بنالردہ يا شايتوب راحت ايتك كى عادى امللردن دهابويوك، دهاعالى وبوسبو-تون مغوى مطالبى وآمالى وارمش؛ وروح بشر ك بومبرم احتياجاتى، ترقيات مدينه ده وسايط ماديہ وعوامل طبعيه دن دها مهم بر رول اوينا يورمش! مساواتاً دكلسه بيله عموماً فطرت بشريه ده مركوز بولونان بوتمايلات مغويه نك توليد، حتى ابداع ايتديكى نيات ومقاصدى - جمهور ناسدن وعادى آدملردن - انكار ايتسه ك بيله حكى يوقدر، ملاحظات واقعه مك قيمت ذاتيه سنى ده كيشد ير مزم. واقعا بوكيفتى انكار ايتك بويوك بر حقسنلق وصريح بر ضاللت اولوردى. زيرا بوكونكى كتله انسانيت افرادنده دكل، آنزوبولوزى وسوسبولوزى علملرينك موضوع بحث وتبع ايتديكى الك وحشى قبايل خلقندہ بيله بويله برطاقم اعتقادات

وآمال معنویه اولدوغی محققدر. حتی او قبائلک حیات اجتماعیسنه بالخاصه بو اعتقادات و بوآمال معنویه نك حاکم و ناظم اوله کلدیکیدی ده محققدر. بو بویله اولقله برابر بو کیفیت مهمه نك حقیقتی و عمومیتی انکار ایتسه ک بیله باس یوقدر، چونکه جماعات بشریه یی اداره ایدن مستثنا آدملرده بوکی اعتقاد و آمالک موجود اولماسی، دعوامی اثباته کافیدر. حتی مدنی معنای مادیس ايله تعلق ایتسه ک بیله ماهیتی تحلیل ایدنجه ینه عینی نتیجه فکریه پیوسته اولورز.

بوگون اک عادی واک زیاده مسلم اولان حقیقتلردن بری ده بودرکه مدنی بر جماعتک، افرادی آردسندگی معاملات حسن اداره و تنظیم و آرده و قوعی ملحوظ و ممکن اولان او یغونسزلقلره، موازنه سرلکلره، حقسزلقلره تعلق ایدن مسائی حل و دعوالری تحکیم ایچون بر حکومت اولق شرطدر. اونسر مدنی اوله ماز و اوله مامشدر. کذلک برده حیات مملکتی اداره ایدن جریان تجاری یی موازنه اوزره طوته بیلیمک ایچون مثلاً بانقلر ودها بر چوق مؤسسه لر الزمدر. بونلر اولما دقجه ده اولماز. حتی تحقیقات کوستریورکه بو سیستم، بو اصوللر و بو مؤسسه لر او جریان تجاری نك تکاملی نتیجه سیدر و تقسیم اعمال سیبیله کندیلکلرندن تولد ایتشلر و صوکره صوکره کیتدجه تکمل ایتشلردر.

شیمدی، کتله اجتماعی نك صرف تشکلات و تکملات عضویه سنه عا ئد اولق اوزره انتخاب ایتش اولدوغم شومادی مثاللر حضورنده دوشونمز می یزکه حکومت لفظ نك متضمن اولدوغی افکار مختلفه، بر عقیده قویه شکلن آله بیلیمک ایچون بر طاقم معین دستورلره مستند اولق لازم کلیر. کذلک، معاملات بین البشریه ده موازنه اجتماعی یی محافظه یعنی حقوق متقابله یی صیانت ایده بیلیمک ایچون لابد اولان احکام اعتقادیه طبقی ده مینکی مثاله اولدوغی کی بهمه حال بر طاقم معین دستورلره استناد ایتک کرکدر. بونک کی بانقه نك و سائر مؤسسات متماثلنک بریستی، بر طاقم اصول و قواعدی اولق دخی - عینی سیبیله - ضروریدر. البته دوشونورز؛ دوشونمکه حاجت یوق، چونکه بونلر معلوم و مسلم شیلردر. هندسه متعارف لری نه قدر قناعت بخش ایسه بو دیدیکم شیلرده قناعت الهام ایتکده اونلردن آشاغی قالماز.

فقط ینه دوشونه لم ؛ اوزون اوزادی یه سـویلدیکم بو شیلردن نه معنا چیقور ؟.. بونی برکله ایله ادا ایتمکه چالیشه لم :

مثلا جماعت بشریه نك موازنه سی تأمین ایده بیلیمك ، افرادی آرده سننده حقوق متقابله حدودنی کوزتمك ایچون بر طاقم احکام اعتقادی لازمدر ؛ اولرده معین دستورلره استناد ایتلی در !... نه دیمك ؟... فلسفه حقوق دیمك دگلی ؟ بونك باشقه معناسی یوق ! باشقه اسمی ده یوق !... چونکه بو خصوصی مسئله لرله بالخاصه مشغول اولان فلسفه حقوقدر .

انسانیتده هانکی مؤسسه معنویه ومادییه تی تحقیق ایدرسه کز اونك اساسلرنده بر طاقم عقایدی ناطق دستورلر بولورسکزرکه ، اولرک هم آهنگ اولان هیئت مجموعه سی او مؤسسه نك فلسفه خصوصیه سی تشکیل ایدر . حیات شخصییه واجتماعیه ایله طوغرودن طوغرویه علاقہ سی اولان مسائل ووقوعاتك جمله سی حقنده بوملاحظه م قابل تطبیقدر . اوانسان ، اوجاعت ایستدیکی قدر وحشی ویا مدنی اولسون ؛ حکمی یوقدر . الویریرکه انسان اولسون !.. واو حیثیتله براحتیاجی ، براعتقادی اولسون !... هم ساده بوسهر معنویاتده دکل ، طبیعت جامده ده بیله الک بسیط وعادی بر حادثیه بیله معقول بر صورتده تعریف ایتمکه مجبورز وایلریده کوره جکزرکه ، بو ، ظن اولوندوغی قدر قولای برشی دکلدر ویا لکزر معلومات تجربیه ایله اولماز . زیرا معنایی ویرن بز ؛ طبیعت آنجق اشارت ویریر . فلسفه بویله عمومی وشامل بر نقطه نظرندن تاقی ایدیانجه ، اونك حیات واجتیاجات انسانیه ایله پک صبقی بر علاقہ سی اولدوغی تظاهر ایدیور . فلسفه یی ، عقاید ، صنعت شعر کبی حیات شخصییه واجتماعیه نك برنجی درجه ده لوازمندن عد ایدنلر ، ایشه اونی بو حیثیت ایله تاقی وملاحظه ایله . یئلردر ؛ بویا کلش برطرز تاقی دکلدر .

لکن بزم ، درس اوله رق الفت ایده جکمز فلسفه - تعبیر اصطلاحیسنه کوره - ده نظری ، ده عمومی ودها مجرد بر طاقم مسائل اصلیه نك ساحه تبیی در . بز ، فلسفه اداره ، فلسفه حقوق ، فلسفه اجتماعیه ، فلسفه ریاضیه ویا اخلاقیه الخ الخ کبی خصوصی فلسفه لرله مشغول اولمایه جغز . بوتون بوفلسفیات خصوصییه نك

نقطه تعلفنده پیدا اولان مسائل عمومیه و مشترکینی تتبع ایده جکیز و بر ترتیب مخصوص اوزره کیده جکیز. هله اول امرده معلومات بشریه نك مستند اولدینی اساسلرک قوت و قیمتی، (افاده یقین ایتک) امر مهمنده درجه و ثوق و حیثیتی تحقیق ایده جکیز. بو تحقیقات ایله علممیزک حدودینی و معلوماتمیزک ماهیتی - ممکن اولدوغی قدر - آکلامش اوله جفز؛ و آنجق اوزمان حقیقی خیالندن، ممکن محالندن فرق ایده بیلیمک ایچون لازم اولان قابلیت تمیزک معیار محیی حقیقه اله ایتش بولونه جفز. شو تقدیرده دخی کندیمیزه مقصد اقصای حیات اولمق اوزره برامل، و اوکا امنیتله واصل و نائل اولمق ایچون برده دستور عمل تفین ایده بیله جکیز.

شو مطالعات مقدمه شیمدیلک کافیدر. آرتق طوغرودن طوغروه مقصد مزه کیریشه بیلیرز.

- ۲ -

§ افندیلر !

اولا فلسفه و فیلسوف تعبیرلرینک منشائی تحقیق ایده لم بونده فائده واردر. اسکیلر کیمه فیلسوف ونه کبی معلوماته فلسفه دیمشله؛ صوکره بو تعبیرک معنایی نه قدر نصل نیچین ده کیشمش، بونی ا کلارز، بوا کلایشمزله فلسفه یی دها ای تعریفه الویریشلی بر زمینه نقل بحث ایتش اولورز.

بیلیرسکیز که بو تعبیرلر یونانی در (*φύλος*) محب، دوست، (*σοφία*) دخی حکمت دیمکدر، (فیلو سوفی یا) تعیری عربلر - خیلی زمان صوکره - عیناً آلمشله و [مسئله، جرزه و زننده] فلسفه شکلنه قویه رق آز چوق تعریب ایتشلردر. بوکی کله اقتباساتی، ظن ایدرم، مشهور خلیفه عباس المأمون زماننده آثار یونانیه دن بعضلرینک ترجمه سنه تشبث ایدلدیکی زمانلرده واقع اولمشدر. بونک کبی فیلسوف تعیری ده کاه (فلسف)، کاهی ده [عنکبوت و زننده] فیلسوف شکلنده قوللانمش و بوضو ک شکلنده معتبر اولوب قالمشدر.

بوکله اصطلاحیه نك منشأی وسبب اشتهاری حقنده (- رومالی - چیچهرون
Cicero) [*] بر حکایه نقل ایدیورواونی (ههراقلیده س بوندیقوس Hér aclides
Ponticus) ك روایتنه عطف ایلور . شویله كه :

(فیثاغوراس Pythagorass) نام حکیم یونانی - كه میلاددن تقریباً بش
بیحی عصر اول ایثالیا سواحل غریبه سنده کائن بر کوچوك مستملكه یونانیه ده
بك مهم بر مدرسه فلسفیه تأسیس واوراده مدت مدیده تعلیم حکمت ایتمشی
- ، كونك برنده (پهلوپونس) یعنی شیمدیکی یونانستانك (موره) شبه
جزیره سنه كلیش واوراده (فلیوس Phlius) شهرنده مسافر اولش ایتمش .
او زمانلر او قطعه نك حاكی اولان (لهئون Léon) نام ذات ایله واقع اولان
محاضرده فیثاغوراسنك بلاغته، احاطه علمیه وكمالات فکریه سنه حیران اولان
(لهئون) ، فیثاغوراسه صورمش : هانکی صنعه حصر اشتغال و صرف عمر
ایتمش اولدوغنی آ کلامق ایسته مش .

حکیم ، شو جوانی ویرمش :

[حیات بشر ، یونانیلر ك بر آرایه كلوب كمال دبده ایله اجرا ایتدكلی
اولمییاد او یونلرینه بکزر . اوپانییره كلنلردن بر قسیمی ریاضت بدنیه وپهلوانلق
مسابقه سنه کیرمك وبرتاج ظفر قازانلق شرفی ایچون کلیر . دها بویوك بر قسیمی ده
كار ومنفعت عشقنك الجاسیله، اوراده آلوب صاتمق وپاره قازانلق ایچون کلیر .
بونلر آره سنده ذكاوتلریله حریته محبتلریله ممتاز برقاق کشی ده بولونوركه ،
اونلر نه شرف ایچون نده كار وكسب ایچون دكل ، بالخاصه وقوعاتی تماشا
وتبع ایتك ونه اولدوغنی ونه صورتله اولدوغنی كوروب آ کلامق ایچون اورایه
كلشلدرد . ایشته طبق بونك كی ، بزلر ، بوتون انسانلر - همان بر باشقه عالمه
انتقال ایتك اوزره شو حیات صحنه سنه کیره رز . ایچمزدن بعضلری شرف
آرقه سنده ، دیگر بر قسیمی ده ثروت آرقه سنده قوشارلر ، بو مقاصد ومطالبه

[*] مشهور خطیب دركه عینی زمانده فلسفه یله مشغول بر متفكر ایدی یونان قدیم
فلسوفلرینك بر چوق فكرلرینی اثرلرنده نقل وتنقید ایتكله تاریخ فلسفه یه عظیم خدمتی
سیق ایتمشدر .

قارشی لاقید اولان برقاچ کشتی ده واردر که اشیانک طبیعتی و حقیقتی تفحص ایتکه حصر نفس ایشلردر. محب حکمت دیدیکم بودرلو آدملردر و فیلسوفک معناسی ده ایشه بودر. [*]

دیمش. بو حکایه (دیوژن لائرتیوس Diogenes Laërtius) ده دخی واردر . [*] فقط بوروایتک بر ماصالدن عبارت اولمادیغی اثبات ایدمک الله قوی بر دلیل یوقدر . بونکله برابر مسئله نک حد ذاتنده او قدر اهمیتی یوقدر؛ یالکیز شوقدر وار که ابتداری فیلسوفلره یونان قدیمده (Οἱ σοφοί) یعنی حکما (les sages) دنیلیر ایکن، نصل اولوبده (محب حکمت) معناسنه (فیلسوفوس) دنیلیمک عادت اولمش ونه سببله ، نیچین بوتعیر محویتپرورانه اوتکنه ترجیح ایدمش ، بونی آ کلامق ، اولدقجه موجب مراق برشی در . تاریخ فلسفه یه عائد تحقیقاتده صلاحیت کامله سی مسلم اولان (فیلسوف انگلیزی سرویلیم هاملتن Sir W. Hamilton) ، یوقاریده کی معروضاتی تفصیلاتیه بسط ایتدکن صوکره ده معقول بر فرضیه بیان ایدیور ؛ ظن ایلور که بو تعبیری ابتدا ترجیح و قبول ایدن - هیچ اولمازسه تعمیم وتشهیر ایدن - مشهور سقراط اولمشدر . چونکه بو تعبیر (ابوالمورخین هرهودوت Hérodotès) ده وار و (حکیم واضع قانون سولون Solon) حقنده قوللا نلشدر ؛ دیمک که سقراطدن اولدر .

هاملتن دییور که ، سقراط زماننده بر چوق جریمه لی شارلاطانلر پیدا اولمش و کندیلرینه (سوفیست) (οἱ σοφισταί) یعنی سوفسطائی لر عنوانی ویرمشلردی . سقراط مدت عمرنده بونلرله اوغراشمشدی . پک محتملدر و پک

[*] بو فیلسوف سیسام آله سنده طوغمش و میلاددن (۵۶۰) - نه اول شهرتشار اولمشدی . افلاطون بوتاریخدن (یوز اوتوز) سنه صوکره تولد ایتشدی . عالم اسلامده نامیه پک معروف اولان بو فیلسوف قدما نک اک بویوک متفکرین و ریاضیونندندر . کرات جدولی بوتک ایجادیدر . آناری اولوب اولمادینی معلوم دکلدر . فقط بعض افکاری منقول و مضبوطدر .

[**] دیوژن لائرتیوس ، فیلسوفلرک ترجمه حالی یازمشدر . بو اثر بو خصوصده همان یکانه مأخذ مندر .

طبیعی در که کندیلرینی حکیم اولقی اوزره علمه اعلان ایدن وبو سایه‌ده کلیتلی. پاره قازانان بو آدمک غرورینی استخفاف ایتک واونلری خلق نظرنده کولونج بردر که یه دوشورمک ایچون سقراط - محویت کوسترمک صورتیه! - کندینه یالکز (محب حکمت) دیمکله قناعت ایتیش اولسون! ذاتاً بوتعبیراتک بالخاصه سقراط مدرسه‌سنده واونک شاگردلری آره‌سنده شایع اولمش بولونماسی‌ده بو ظنی تأیید ایدر. بو تعبیر، سقراط زماننده [معلومات بشریه‌نک طبقات علیاسی ایله الفت] ایدنلره تخصیص ایدلمش ایکن، براز صوکره [علم، وجودک مبادی واسبابی تحقیق] ایدن علمه علمه اولدی. فقط برمدت صوکره ینه اک اسکی معناسی ایله تلقی اولونورق (حکمت) مرادفی اولدی وبناء‌علیه سقراطک اوکا افاضه ایتیش اولدینی معنایی (فیلسوف) کله‌سی ضایع ایتدی. ایشته بوخصوصده واقع اولان اک طوغروسی تحقیقاتی، هاملتن دن سزه خلاصه نقل ایتدم.

شیمدی فلسفه‌نی نصل تعریف ایتشلر... اوکا باقهلم!

— ۳ —

معلومدر که برعلم برقاج نقطه نظر دن تعریف ایدیه‌بیلیر. مثلاً موضوعنه نظراً تعریفی باشقه، غایه‌سنه کوره باشقه اوله‌بیلیر. حتی اهمیت مخصوصه‌سنه باقه‌رق دخی تعریف ایدیه‌بیلیر. موضوعی و غایه‌سی مختلف حیثیتلرله تلقی اولونمغه مستمد و بوده اختلاف نظره مساعد ایسه، او نسبتده - عینی علم ایچون - عرض اولونیه‌جک تعریفات تعدد وتنوع ایدر. ایشته فلسفه حقنده کی تعریفات متدده و متنوعه بو احتمالله بر مثال اوله کلشدر. فی الحقیقه، هر فیلسوف صاحب مسلك، فلسفه‌نک موضوعنی‌ده، غایه‌سنی‌ده، فائده‌سنی‌ده اهمیتینی‌ده کندی نقطه نظرندن تلقی ایتیش و اوکا کوره تعریف ایلشدر. واقعا بوتعریفاتک جمله‌سنده، حتی آز چوق عندی وکیفی اولانلرنده بیلله، اساساً مشارکت معنا واردر. بونلرندن اک‌مشم‌ورلرینی شیمدی کوزدن یکیره‌جکم؛ کوره‌جکزه که هیچ‌بری اساساً یا کلش اولماقله برابر، همان

جمله سی ده - فلسفه عمومی نهك برچوق موضوعاتی دائرة تعريف خارجنده بر اقدیغندن - برچوق وجهله ناقصدر. قابا بر مثال ایله بوقصوری اكلاتهیم: فرضاً برما كنهی تعريف ایدركن، اقسام مهمه سی واونلك وظائفی منحصرأ تعريف ایتك كهی كه، یا كلش اولماقوله برابر ناقص بر تعريفدر. فضله اوله رق بو خصوصی تعريفاتك اك مهم واساسلی قصوری ده مجهولی، ینه مجهول ایله اكلاتهغه چالشمه سیدر. مثلاً (Schelling شه لینگ)ك: [فلسفه عینیت ولاعینیت مسائلنی تحقیق ایدن علمدر.] دیه سی كهی. (فلسفه) تعیرندن، چوق كشیلر - هیچ اولمازسه - يك مهم بر معنا اكلار، فقط اونی تعريف ایچون ایراد اولونان (عینیت identité) لفظندن برشی اكلایه بیلمك ایچون، خلی معلومات فلسفیه مالک اولمی و علی الخصوص (شه لینگ)ك فلسفه سی ایجه بیلمه لی در. بناءً علیه ایضاح ماهیتی مطلوب اولان مجهول برشیتی، اوندن دهامهم ومجهول برشيله اكلاتمق ایسته مك تعريفك اك اساسلی شرطنه منافی برطور وحركتدر اونك ایچون صوك دور فیلسوفلرینك ویردیكی بوكی خصوصی تعريفات هرکی نمون ایدمه دیكی ایچون تعیم ایله مه مش وینه اسكی یونان اساتذه فلسفه سنك عمومی تعريفاتی حالا مقبول ومعتبر بولونمشدر.

یونان قیدمه مشهور ومعتبر اولان (فلسفه تعريفاری) آلتی درلودر. بونلك برنجیسی ایله ایكنجیسی، فلسفه یی موضوعه كوره تعريف ایدر. یعنی (فلسفه نه دن بحث ایدر؟ نه كهی مسائل ایله مشغول اولور؟) سوائته جواب ویریر. اوچونجیسی ایله دردنجیسی غایه نظراً تعريف ایدر. یعنی (فلسفه نه ایچون اوکی موضوعاتله اودرلو مسئله لرله اوغراشیر؟) سوائته جواب ویریر. بشنجیسی اهمیتته، یعنی حیثیاً علوم سائره به تقدیمی اسبابنه عطفأ بر تعريفدر. آلتنجیسی، بالذات تعیرك یعنی (فلسفه) كلمه سنك الهام وافهام ایتدیكی معنادر. یعنی (فلسفه) لفظنی معنای لغویسی ایله تلقی ایدوب: (فلسفه، محبت حكمت وجستجوی حقیقتدر.) دیمكدر، وبوصورتله ده نظر اعتباره آلتوب (φιλία) (σοφίας) دیه ایضاح اولونمشدر.

تعريفات معتبره مشهوره نك برنجیسی، [وارانی، حد ذاتنده اولدوغی كی

بیلدك! [جمله سیله تلخیص اولونان تعریفدر. اصل یونانی سی γνῶσις τῶν
[ὄντων ἢ ὄντα] دستوری در که فرانسیزجه عیناً ترجمه ایدیلدرك La connais-
sance de l'être en tant qu'être] صورتنده کتب فلسفیه ده ضبط و قید
اولونمشدر . بو تعریف عربلرجه ده يك مقبول و معتبر اولمش و [علم الوجود
بما هو موجود] دیه عیناً ترجمه ایدلشددر .

ایکنجیسی: [الله و انسانه متعلق اولان شیلرک علمی در؛] جمله سیله ادا اولونور.
اصل یونانیسی: [γνῶσις Θεῶν καὶ ἀνθρωπίνων πραγμάτων] در.
براز یوقا ریده اسمی کچن رومالی متفکر دن خطیب معروف (چیچرون) بو
تعریفی ترجیح ایتمش و عیناً قبول ایدرک لاتینجیه نقل ایلشددر ، بو تعریف
اساساً (رواقیون les stoiciens) ده نیلن فرقه فلاسفه نك منحصرأ مظهر
قبول و تصویبی اولمشدی . فقط بوتون اسلافک و تاریخ فلسفه نك روایتنه
باقیایرسه موضوع فلسفیه نسبتله واقع اولان بو تعریفلرک ایکنجیسی ده اک اول
مشهور (فیثاغور) ویرمش و هرکس قبول ایتمشددر .

شواو چونجی و دردنجی دستورلر افلاطونک در؛ و فلسفه بی انجق (غایه but)
سنه نظراً تعریف ایدر .

[فلسفه ، موتی تأمل ایتمکدر .] یعنی ثلومی دوشونمک و عاقبت و آخرت
مسائلنی تحقیق ایلمکدر : [μελέτη θανάτου] یعنی [ثلوم دوشونجیه سی]
ترکیبی طوغردن طوغرویه فلسفه تعریفی اولمق اوزره عرض ایدلمش بر فکر
دکدر . ؛ فقط افلاطونک آثار مهمه سندن برنده : [ثلوم دوشونجیه سی ! ..
ایشته اک طوغرو فلسفه بودر باشقه سی دکدر !] جمله سی کیچور . اورادن
آلتمش و بر چوق فیلسوفلرک اعتقادینه موافق بولونمشدر . دقت ایدیلیرسه ،
يك درین معنالری متضمن بر تعریفدر ؛ اهمیتسز بر سوز ظن ایدلمه ملی در .
(ثلوم) انسانلر ایچون اک بویوک معمارد . ده نیله بیلیرکه بوتون مسائل لدنیه
و مابعد الطبیعه بو ثلوم معمارنک حقیقتنی دوشونمک دن تولد ایتمشددر : فصل
اولویورده بر آنده حیات دیدیکمز بو فعالیت طور و ویرییور ؛ ادراک ، عقل
و شعور ، حسیات ، الحاصل وجدان دیدیکمز او شخصیت مغنویه دخی بر لحظه ده

سرّ اولوب کیدیور؟ .. امید، امل، خرص، محبت، نفرت، هرشی هرشی
هیچ اولویور؟ .. اگر حقیقتاً ئولومله هرشی هیچ اولویورسه حیات دیدیکمز
بو معنادار وارلق نهدر؟ .. اگر هرشی الی الابد هیچ اوله جقسه بزم بونجه
آرزولریمز، امللریمز، امیدلریمز و بونلر ایچون دیدینه مز هب بوشدر؛ انسانیت
مدنیت، عدالت، حتی حقیقت بوشدر؛ هبسی یالان در او حالده کرچک اولان
شی نهدر؟ .. حقیقت، حیاته می در؟ .. ئولومک ماوراسنده می یعنی مزار
قپوسندن اونده می در؟ .. برآخرت و از میدر؟ .. یوقی در؟ .. هرشی صحیحاً
بوش، و حیاتمز هدر ایسه. بزه بو امللر، بو امیدلر و بو میلان نهدن کلیور؟ ..
نصل؟ و نیچون کلیور؟ .. روح دیدیکمز معما نهدر که اونک درین قرا کلقلرندن
بومسئله لر ظهور ایدیور. ئولوم دیدیکمز دیگر معما نهدر که بوتون بوتجلیات
و جدانیه یی قهر نایاب ظلمت و مهیمیده مضمه محل ایدیور، هیچ ایدوب
یتیریور؟ ..

ایشته، ئولومک نه اولدیفنی دوشونمکدن بومهم مسئله لک جمله سی تولداید
وبری دیگرلرینی تولید ایتدیکی ایچون یکدیگریله صیقی صیقی به علاقه دار بر
فهرست وجوده کلیر که فلسفه و الهیاتک و بقیق و لوژینک بالجمله موضوعاتی شاملدر.
بشنجی تعریف ارسطونکدر و فلسفه نک بالخاصه حیثیت و اهمیتنه نظراً
ترتیب ایدمشدرد چونکه استاد یونانی : [τέχνη τεχνῶν καὶ ἐπιστήμη]
[ἐπιστήμῳν] دیمشدر که [صنعتلرک صنعتی، علومک علمی] یعنی اعلاسی
دیمکدر. بوده حکمای عرب عندنده مشهور و معتبر بر تعریفدر. حتی ارسطو
(الهیات) قسمی حکمتک سائر مباحثدن حیثیجه یوکسک طومشدی. حکمای
اسلام، طبق اونک کبی تلقی ایتمش و (علم الهی) به، (علم اعلا) دیمشدر.
نصیرالدین محمد طوسی، جلال الدین محمد دوانی، امام غزالی ودها بویه بر چوق
بویوک اسلام حکمائی دخی (الهیات théologie) نی فلسفه نک لک یوکسک
قسمی عد ایتمشلر و اوکا (علم اعلا) دیمشدر. ینه قینالی زاده علی افندی
بونک سببی شو وجهله ایضاح ایدیور :

[.... چون اشرف مبحوث عنه، آنده « یعنی الهیانه ! » ذات آله دائم

وقائدمر ، اكا علم الہی وعلم اعلا ديمك دخی مناسب وملایمدر . [دیبـور
وآكلاشیلور كه شو وجهله تسمیه سنه سبب اونده موضوع بحث اولان مسئله نك
مسائل سائردهن اشرف واعلا اولماسیدر . حیثیت موضوعنه كوره تعریف
دیدیمك بودر .

ایشته فلسفه تعریفده اك زیاده مشهور وعموماً معتبر اولانلری بونلر بدر .
فقط تعریفات بوقدردن عبارت دكلدر . اسكى - كمای اطبانك ده بوخصوصده
برتعریفی واردر : اسكى طیبیلر ، (طبابت فلسفه اجسامدر . *ιατρική ἐστὶ*
φιλοσοφία σωμάτων) ؛ (فلسفه طبابت ارواحدر . *ιατρική ψυχῶν*
دیمشله . فقط ، آكلا یورسكز كه بوبر (تعریف دوری) دره
ایضاح ایدیلوب آكلا شلمه سی ملتزم اولان ایکی مجهولی بربریه تعریف ایتمكه
جالیشیور كه مقبول دكلدر . چونكه ایکیسی ده مجهول قایلر و ذهن برندن دیکرینه
— الی غیرالهایه — انتقال وینه رجوع ایتمكه مجبور اولور ، وچوق برشی
آكلا یه ماز .

اخلاق علائی ده بوده وار؛ علی افندی (حکمت عملیه *Philosophie pratique*)
تعبیریه تفسیر ایتدیکی (علم اخلاق *la science de la morale, L'ethique*) ك
اهمیت وفائده سندن بحث ایتدیکی صیره ده ؛ اودستوری آز چوق تعدیل ایله :
[. . . . علم اخلاق ، طب روحانی در ؛ نیته کیم صنعت طب ، علم
جسمانیدر .] دیبور . علی افندی بزجه مشهور اولدوغی ایچون ا کثر اونی
اشهاد ایدیورم ؛ یوقسه شرق حکما سندن يك چوق مثاللر ایراد ایده بیلیردم .
ینه افلاطونك يك قیصه و بك مهم برتعریفی ده وار كه مقبول زمعتبردر و بك
چوق فیلسوفلر طرفندن قبول واوزون اوزادی یه تفسیر اولونمشدر؛ افلاطون
بر یرده : فلسفه ، (اك بویوك موسیقی در .) یعنی آهنگدر دیبور . *μεγίστη*
μουσική] ترکیندن نه معنا مراد ایتدیکی ده آكلاتیور : (روحك قوه
عاقله ، قوه غضبیه وقوه شهوانیه سی آره سنده تأسیس موازنه وتأمین آهنگ
ایتمكدر) دیبور . کندیسنك قوللانیدی (*λόγος, θυμός, ἐπιθυμία*)
تعبیرلری بزم لسان فلسفیمزه چوقدن انتقال ایتش و شیمدیجك عرض ایتدیكم

وجهله (قوة عاقله، غضبيه وشهوانيه) كله لری اصطلاحات مشهوره دن اولمشدر. بولكله لك معناسی زمانمز لسانيله ادا ایدرسهك (معقولات واختراصات ومشتبهات آرسنده موازنه و آهنگی محافظه ایتك) فلسفهك فائده عملیه سنه نظراً تعریفی اولور؛ بوفكر شرقرده او قدر تحكم ایتمشدر كه بوتون اسکی اخلاق كتابلرنده تأثیرات صریحه سی كورولور. اسلام فیلسوفلری اخلاقك هر نوعنده اعتدالی (یعنی آهنگ و موازنه یی!) (فضیلت vertu) عد ایدرلر؛ افراطی، تقریطی (ردیلت vice) صایارلر. مثلاً (سخاوت) فضیلتدر؛ چونكه تقریطی (بخل) در؛ افراطی (سفاقت) در. سخاوت بوايكي سنك آرسنده اعتدال نقطه سی تمثیل ایدر كه موازنه حسیاتدن ایلری كلیر. زیرا قینالی زادهك تعریفنجه: (هر فضیلت حاق و وسط و نهایت اعتدالدر كه اصلاً جانب افراط و تقریطه مائل اولمه!) [*] ایشه اخلاق ناصری ده، اخلاق جلالی ده و بوتون اسکی اخلاق كتابلرنده هپ بومعیاری، هپ بوترتیبی كورورسكز كه افلاطونك تاتی ایتدیكي معنا ایه (موسیقی یعنی آهنگ) تعبیريك نه درجه لرده افكار حكمایه تحكم ایتش اولدیغنی اثبات ایدر.

اونك ایچون بوقیصه تعریفنجه سائر امثالك جمله سندن زیاده جامع الكلمدر. فضله اوله رق (فلسفه) دیدیكمز اندیشه معنویه و مشغله ذهنیهك طبیعی و ضروری اولان سبب و جدانیسی ده كوستریور. كندی واراعمزی و شخصیت معنویه مزك عاقبتی دوشونمك مجبوریتمدن فلسفهك نصل تولد ایتش اولدیغنی عادتا ابراز ایدیور. صوك دورك اك بوبوك آلمان فیلسوفلرندن (شوپنهاؤور Schopen-hauer) بو نقطه مهمه یی پك صریح و پك بلیغ برصورتده تشریح ایتمشدر. بوخصوصه کی ملاحظاتی همان عیناً بورایه نقل ایدیورم:

«عقلك، یعنی وجدان انسانك ظهوری ایه ایللك دفعه اوله رق (طبیعت) ده فكر حكمت اویانیور و نظر تأمله معروض بولونویور. وجدان بشر كندی آتارینه قارشى حیرت ایدیور و كندی ماهیتك نصل شی اولدوغنی كندی

[*] (حاق وسط) تعبیری دائرةك اصل اورطه یرینی كوسترن نقطه در كه عینی دائره ده ایکی دانه اولق احتمالی یوقدر.

کندندن صورو یور . ئولومه ایلك دفعه اوله رق - شعورتام ایله - یا قلاشنجه و بناء علیه موجودیت مغزیه سنک سکتته موت ایله بر حده ایروب فنا پذیر اوله جفته قناعت حاصل ایدنجه ، بوتون بوجهد حیانت فائده سزلیکی بیهوده لکی نظر تأملنده آ ز چوق بداهت کسب ایدیور . اووقت حیرت و مصراقی بستیون آرتیور . انسانک ، مابعدالطبیعاته احتیاجی ، ایشه بو حیرتن ، بواندیشه دن طوغمشدر ؛ و بو حالت ، انسانه مخصوصدر . انسان بر حیوان مابعدالطبیعی در . [۱]! افلاطونی ، قانت ایله برابر اک بویوک اسناد اتخاذا یتمش اولان (شوپنهاووه در) بومسئله ده تماماً استاد یونانی نک فکرینه انباع ایتمش در . افلاطون ، فلسفه نک اندیشه موت و حیرتن طوغدیغی اک اول سویلشدر .

عثمانی ملتک شاعر داهی سی عبدالحق حامد ، عینی زمانده درین بر متهم کرددر . واصولنه توفیقاً فلسفی اثرلر یازمامشده ، یک مهم بعض حقایق فلسفیه یی معجز و موجز برلسان بیان ایله برایکی مصراعک حوصله افاده سنه صیقشدیره بیلمشدر . افلاطون و شوپنهاووه رک تعریف ایتدیکی شو حقیقت وجدانیه یی ایکی کوزل مصراع ایله بردستور صورتنده عرض ایتمشدر :

(بزی ئولومدر ایدره سرشکسته میریت !)

(او اولماسه اوله مازکین دمردک امطانی) [۲]

دیور . حامدک (ئولو) و (مقبر) نامنده کی اثرلری - که ادبیات عثمانیه ده ، جداً حکیمانه شعرلرک اک کوزل واک عالی نمونه لریدر - دقتله مطالعه اولونورسه آ کلاسیلیرک اونلرده کی ملاحظات فلسفیه ، آنجق (ئولوم) دیدیکمز معمای مده شه نک الهام ایتدیکی اندیشه دن طوغمشدر ، حتی بو رساله لرک اسملری بیله بونی اثبات ایدر .

کورولویور که افلاطونک صرف (انفسی subjectif) اولان او تعریف

[۳] یعنی مابعدالطبیعات تعبیرنک متضمن اولدوغی مسائی دوشونمکه فطرتاً مستعد اولان بر حیوان (که جانلی مخلوق) دیمکدر . مشهور اثرینک برنجی کتابنک برنجی بابنه باقیکر . (**) (ئولو) نامنده کی منظومه فیلسوفانه سندن بریت در .

ایکی کلمه دن عبارت بر ترکیب اولسنه رغماً يك درین و بك شامل بردستوردر .
 بزده ارباب تصوف بوسایق نظری کمال اهمیت وجدیتله تاقی ایتش و فلسفه‌ی
 هپ بواندیشه‌یه بنا ایتشدرد . حتی اوندن استخراج ایتشدرد .
 دردنجی تعریف، (قدرت بشریتدیکی قدر اللهه تقرب ایتشدرد) جمله‌سیله
 ادا ایدلمشدرد . [ὁμοίωσις Θεῷ κατὰ τὸ δυνατόν ἀνθρώπῳ] بوده
 افلاطونکدر . بونده شایان دقت اولان نقطه (قدرت بشریتدیکی قدر)
 قیدیدرکه انسانك علم مطلق ایچون قابلیت اولهمیه‌جنی حقنده بر اعتقادی
 متضمن در . [*]

فلاسفه اسلام عنندنه بوتعریف دخی مشهوردر ؛ حتی بومهم قید [علی
 قدر الاستطاعة البشريه] سوزلریله عیناً ترجمه ایدلمشدرد . چوق اسلام فیلسوفلری
 برنجی تعریفه بو قیدی درج ایدرک آ ز چوق معدل فقط اساساً طوغری
 واولدقجه کوزل بر (دستور تعریفی) ویرمشلردر .

سلیمان قانونی دورینك اك ممتاز متفكرين علماسندن عثمانلی مؤلفین مشهور
 رسندن قینالی زاده علی افندی ، (اخلاق علائی) نام اثرنده حکمتی یعنی
 فلسفه‌ی شویله تعریف ایدیور :

[۰] اصل یونانی سنده (اوی‌توسیس ὁμοίωσις) لفظنك معنای لغویسی (بکزه‌مك)
 دیکدر . واللهه تقرب سببیه خلق الله ايله متخلق بولنه‌رق واصل مرتبه کمال اولق
 معناسنه کنایه‌لی برافاده‌درکه بزده صوفیه تماماً بواعقاده‌در . یعنی حکمنك (فاشده) سی
 صوفیه اعتقادنجه‌ده بودر : [تقرب الى الله وتخلق بخلق الله !]
 تاریخ فلسفه‌جه معلوم اولدوغی اوزره ارسطو واپکا اتباع ایدن اکثر قرون وسطا
 فیلسوفلری انسانده ایکی‌درلو عقل تصور ایدرلردی ؛ برینه (عقل فعال intellect actif)
 دیکرینه‌ده (عقل منفعل intellect passif) دیرلردی . برنجیسی طبیعتی اعتباریه
 نورانی والهی فرض اولونور وایکنجیسی اداره ایدر ظن ایدیلیردی ؛ فقط بوتون بو
 فکره ذاهب اولان فیلسوفرك اعتقادنجه فلسفه‌نك غایه‌سی کمال معنوی ایدی ؛ بو کمال
 معنوی دخی عقل فمالك اللهه وصول ویا اتصال ایتسیله ممکن عد ایدیلیردی . ایتمه شو
 حاشیه‌نك مذ-وب اولموغی فسفه تعریفی بواعقاده‌ك الهامیه ترتیب اولونمشدرد . عالم اسلامك
 شبهه‌سز اك بویوك فیلسوفی ابوعلى الحسین ابن سینا تماماً بو فکرده اولدوغی کبی کشور
 اسلامك اقصای غربنده یاشایان « ابوبکر ابن طفیل » دخی عیناً بواعقاده ایدی .

[حکمت ، موجودات خارجیه نفس الامرده نه حالده ایسه اونلری احوال اوزره بیلمکدر ؛ ولکن طاقت بشریه وفا ایتدجه و قدرت انسانیه ده ممکن اولدوغنی قدر !] دییورکه حکمای عربک : [علم الشئ بما هو علیه علی قدر الاستطاعة البشريه] دیدیکینک عیناً ترجمه سیدر .

معنایه افلاطونک اوایکی کتباتک تعریفدن بوسبوتون باشقه برمعنا دها چیقارلمش و اوده فلسفه حقنده برتعریف دیگر اولمشدر . اونیده ایضاح ایدیم :

معلومدرکه کائناتده کوردو کمر اشیا و حادثات یک متنوع و متخالف الجنس در ؛ و نا محصوردر : صایلمقله بیتمز و تحدید اولونه ماز . حتی یک نظرده قارمه قاریشیق و بر برینه بکزه من برچوق شیلر ، برچوق حادثات و وقوعات ادراک ایدرزکه بونلرک جمله سنه بردن (طبیعت Nature) ده نیلیر . سطحی بر نظرله باقینجه اونده بر آهنگ و انتظامده کورده میز . لکن یواش یواش تجربه من آرتوب ، مشاهده ده کرکی کبی ملکه حاصل اولونجه ، بز ، بویکدیگرینه بکزه مین برسوری شیلر آره سنده برمناسبت اولدوغنی تحقیق ایدرز ؛ بر مشابته اساسیه کوروروز و بونقطه نظر دن برچوق شیلری صنف صنف ترتیب ایدرزکه بوکا (تصنیف Classification) ده نیر و (مشاهده Observation) دن صوکره ممکن اولور . عینی زمانده بو عملیه ذهنیه موازی اوله رق بر ترتیب دخی یاپارز : جزئیات اموری بر (مبدأ کلی principe universel) آلتیه آلیرز ؛ و صوکره بو مبدأ کلی ایله اونک تحتنده مندرج بولونان کفه جزئیاتی احاطه و بیان ایدرز ، حتی بو آرز چوق مهم برتعریف بیله صایلییر . نه دیمک ایسته دیکمی بر مثال عادی ایله آکلاتیم :

فرضا ، انسان هنوز یک کوچوچوک بر چوچوق ایکن برچوق اشیا و حیوانات کورورکه بر برینه بکزه من . مثلاً جاداتدن برچوق شیلر ، نباتاتدن درلو درلو اوتلر ، اغاچلر ، حیواناتدن ده مختلف نوعلر کورور . فقط بونلر طبیعتده بویله آیری آیری ، طاقم طاقم دیزلمش اوله رق نظر دقته معروض دکدر . قارما قاریشیق در . حتی برچوقلری بالاراده متحرک اولدوغنی ایچون

هیچ بریده الی نهایت طورماز . خلاصه طبیعتده بویه برترتیب یوقدر . او صرف انفسی برشیدر ؛ یعنی اونى بز نظرى اوله رق صرف ذهنمزده یاپارز . ددین سویلديکم کبی ، بوتون بوکوردوگمز شیلر آره سنده بروجهله یاخود بر جوق وجهله مشابہت بولورز ؛ بومشابهت علاقہ سنی معیار اتحاد ایدرک ذهنمزده هر شیشی طاقم طاقم آیریر (تصنیف) ایدرز . مثلاً اول امرده کندى کندینه قیمیلدایه مایان شیلری - بوکیفیتلرندن طولای - سائرلرندن آیریر بر صنف عد ایدرز واونلره جمادات دیرز . نشوونمایه قابلیتى اولوبده طویغوسی اولیان شیلری دخی - بوکیفیت مشترک لرینه بناء - بر صنف عدايدرك آیریجه ملاحظه ایدرز . اوندن سوکره بالاراده حرکت ایدن وطویغویه مالک اولان موجودات عضویه یی آیری ربویوک صنفه درج ایدرز . بوقدرلده قلمایز . فرضا بر حیوانات صنفی ایچنده داخل اولان ربویوک ، برباق ، برقوش ، برکله بک ، بر اینک آره سنده بویوک فرقلر کورورز . بوتون بوجانلی شیلرک نه صورتله وهانکی نقطه ده بربرلرینه بکزه دیکنى تحقیق ایدرز . کورورز که بعضیلرینک برجهله عظمیه سی وار برطاقم کیکلری وار ؛ بعضیسینک قبوقلری وار فقط کیکلری یوق ؛ شوفرکه کوره براینکنجی تقسیم ده یاپاراق قبوقلى حیوانلردن ، ذوالفقراى آیریرز . بوسوک صنفده بولونان افراد مختلفه اره سنده بک مهم فرقلر مشاهده ایدرز : مثلاً طاووق ایله اینک جمله عظمیه به مالک اولمقله برابر اینکک عملری واردر . طاووقده اوپله برشی یوقدر . بری طوغورور ، دیکری بمورطلارکه مهم برفرق اساسیدر . اوحالده اینک وامثالی حیواناته (عملی لر = ذات الثدایا) دیه رک دیکرلرندن آیریرز والی آخره ...!

بو بویه اولدوغی کبی حادثاتی ده عین صورتله بربرینه قیاس ایدرک طبقی بویه تصنیف ایدرز وایکی حادثه آره سنده کشف ایده بیلدیکمز (رابطه نایته) قانون طبیعی تسمیه ایتدیکمز (اطراد uniformité) درکه بونلر حقتده نه قدر جوق کشفیاته موفق اولورساق ، قارغه شالقدن عبارت کوردوگمز شو عالمک برنظام وآهنک عمومی اوزره قائم اولدوغنه دائر حاصل ایده جکمز قناعت اودرجه قوت بولور .

صوکره : اشیای مادییهی تصنیف و برصنفی دیگر برصنف واسعک دائره شموله درج ایتدیگمز کی ، حادثاتی تدقیق و قوانین طبیعیهی تحقیق ایدرکن دخی طبقی اوپله یاپارز . جزئیات اموری برقانون جزئییه ربط ایدرز . و بوکی قوانین جزئییهی دهها واسع ودها شمولی برقانون کلی نك دائره احاطه سنه درج ایدرز . بوو تیره منظمه اوزره ندقدر ایلزی کیتمک ممکن ایسه اوقدر کیده رز . تا که اک عمومی واک کنیش بر (مبدأ کلی principe universel) کشف ایده بیله لم ده بوتون بونا محدود حادثاتی اونکله - تعبیر معذور کورولسون ! برچیرپی ده تعریف ایده بیله لم !... و بو صورتله او (مبدأ کلی) بوتون بو هرچ و مرصع علمک ، هم محور قیامی ، همده قانون آهنکی و سبب انتظامی اولسون !... بو (تعمیم généralisation) عملیه بیله نه یابمش اولویورز ؟...

شو عالم کثرتده بر مبدأ وحدت آریورز دکلی ؟... ارادیغمزی بولور سهق سطحی بر نظره قارشی بر قارغه شالق دن عبارت کورون شوکؤناده کی آهنک اطرا دی یعنی فلاطونک تعبیر معنسادار نجه او (اک بویوک موسیقی) بی ذهناً ادراک ایتش اوله جغز دکلی ؟...

ایشته بوده فلسفه ده بر مهم غایه در ؛ حتی اوپله علوی و شاعرانه بر غایه در که اوکؤا فیثاغور کی ، افلاطون کی ، بن سینا کی ، خیام کی ، مولانا کی ، گه نه کی هم پک بویوک فیلسوف ، هم پک بویوک شاعر اولان برقاج داهی بختیار ایریشه بیلمشدر . [۴] بناء علیه بو غایه به نظر آده فلسفه بی تعریف ایدنلر چوق اولمشدر . حتی (کثرتده وحدت) تعریفی فیثاغوره عطف اولوندوغنه کوره پک اسکی در ، و حکمای صوفیه بونی ده اهمیتله قبول ایتمشدر ؛ چونکه (وحدت وجود Pantheisme) فلسفه سنه کوره اک موافق دوشن تعریف بو اوله بیلیر . شیمدی بوتون بو تفصیلاتی تلخیص ایدر سهم : (فلسفه توحید معلومات

[۴] قرون وسطا ده اروپا فیلسوفلر ندن پک چوغی بو نقطه نظری قبول ایتش و افلاطونک تعبیر مشهوری (harmonia mundi) شکلنده لایتنجه به ترجمه ایتشلر در که (موسیق عالم) دیکدر . ونه کوزل ، نه شاعرانه ، همده نه طوغرو برتر کبدر !... افلاطون : (بو آهنکی عالم وجدانده تأسیس ایتک حکمتدر) دیشدی . صوکره او موسیقی عالم خارجی ده آریوب بولانلر آفاقه تشمیل ایتش اولدیلر .

دیمکدر (دستوری چیقار . بوده (جزئیات اموری احکام کلیه ضمنه صره سیله درج ایتک واونلرک جمله سنی ده برمبدأ اصلی به باغلامقله اولور .)

ایشته بوده پک مهم برتعریفدر : زیرا هم علومک ، هم فلسفه نک ، همده ذهن بشرک تکاملنده بر (وتیره تعمیم *procédé de généralisation*) اوزره جریان ایدن (سیر طبیعی *marche naturelle*) بی کوستریور ، همده ذهن بشرک عالم کثرتده بالضروره بر (مبدأ وحدت) آرادیفنی کوستریور . (مابعدالطبیعیون *métaphysiciens*) ک (وجود مطلق *l'être absolu*) و (علت اولی *cause première*) دیدیکی ، (صوفیه *les mystiques*) نک (حقیقه الحقایق *la vérité des vérités*) تسمیه ایتدیکی وارلق هپ بو(مبدأ وحدت) درکه حکمای الهیون وکتب مقدسه اونی (الله) لفظه مقدسه سیله تجیل ایدر وپوتون انسانلر دخی بواسمه طانیر واک بویوک مسائل تکوینی اونک قدرت کلیه سنه عطف ایله تفسیر و تعریف ایدر . فحول حکمادن پک چوق کیمسه لر بالخاصه بونقطه نظرندن فلسفه بی تعریف ایتشلردر .

زمانمزک اعظم دهاتندن وصاحب مسلك فیلسوفلرندن متوفی (هربرت اسپنسر *Herbert spencer*) ، (مبادئ اولی *les premiers principes*) نام کتابنک ایکنجی بابنده فلسفه نک تعریفنه برقاچ مقاله حصر ایتش ونتیجده فکر مخصوصی شووجهله تلخیص ایله مشدر : (توحید معلومات *unification des connaissances*) فلسفه نک غایه سیدر . علوم متنوعه ومختلفه - موضوع بختلری اولان صنوف حادثانه کوره - قسماً توحید معلومات ایدرلر . فلسفه بوعلومک آری آری عرض ایتدیکی معلومات مرتبه وکلیه بی ، تکرار ترکیب ایدرک ، (اک عمومی واک کلی بر مرتبه *connaissance du plus haut*) (*degrès de généralité*) ایرر . دیمشدرکه ، (فلسفه یقینیه *philosophie positive*) مسلکنک مؤسسی اولان (اوغوست قونت *Auguste comte*) دخی عیناً بو فکرده ایدی ؛ فقط مابعدالطبیعیات مباحثندن خوشلانمهدینی ایچون بواعتقادینی اصولی دائره سنده بسط ایتهمشدی .

اسلاف عثمانیه نک بلکه اک بویوک تحریری ، اک معلوماتلی آدمی اولان

(حاجی خلیفه کاتب چلبی) بوتعریفک - اعتقاد بجه ! - اک کوزل دستوری ویرمش ؛ و : [هر کثرتہ جانب وحدتدن دخول ، واحاطہ کلیات ایله ضبط اصول ایتمکدر ؛] دیمشدر .

بوجهلده اصول لفظی (مبادئ principles) معناسنه قوللانش و یوقاریده تفصیلاً اکلادینغ و جهله کثرتده جهت وحدت کوزده تهرک و مشابہت اساسیه بولهرق حادثات عالمی کلیاتی ایله یعنی قوانین عمومیه سی ایله احاطه ایدوب (ذهناً قاورایوب ؛) مبادئ اساسیه یی ضبط وقید ایتمکدر؛ دیمک ایسته مشدر . فی الحقیقه علوم و فلسفه قطعاً بوسیاق نظره کوره واقع اولان تتبعاتدن طوغمش وینه اوسایه ده مرتب و منتظم معلومات شککنده ضبط وقید آلتنه البته بیلیمشدر . عوام ناسک محدود و مختصر ، پراکنده و پربشان اولان (دیرمه چاتمہ) معلوماتی ایله ، برعالمک معلومات مرتبه سی ، بر فیلسوفک منتظم ، عمومی و شامل بیلکیسی آره سندہ اک مهم و اساسی فرق ایشته بودر . فیلسوفلرک اصطلاحنדה بودیرمه چاتمہ معلومات عامیانه یه (connaissance non organisée) دیرلر . مرتب و جانی بر عضویت کبی یکپاره اولقله برابر ترتیبی اولاننده (connaissance organisée) دیرلر . شوتقدیرجه فلسفه یی (organisation des connaissances) یه تعریف ایتمک یا کلش اولماز .

شیمدی یه قدر عرض ایتمش اولدوغم شوتعریفلر ؛ عمومی در ؛ بونلرک هربری فلسفه نیک بر نقطه نظر دن تقدیر ایدلرکنه کوره ویرلشدر . وهیج بری یا کلش دکل - اولجه دیدیکم کبی - ناقصدر ؛ فقط ذکی بر آدم برندن دیکرینی استخراج ایدیلیر . مثلاً (عالم کثرتده بر مبدأ وحدت ارامق) نه ایچوندر ؟ دیه دوشوندو کمر زمان اکلارزکه حادثات نامعدوده نیک اصلاتی بیلیمک یعنی دائماً تبدل ایتمکده اولان بو وارقلرک قدیم و مستدیم اولان جوهر اصلیه سی کشف ایتمک و اوسایه ده بوتجولاتی ، تعریفه چاره بولمق ایچوندر . او حالده بوتون بوده کیشکلنکره سبب اولان شیئی آریسورز دیمکدر . بو اویله بر سبب اولمق کرکدرکه مستقل و مطلق اولسون ، یعنی اونک فوقده بر سبب دیکر تصور اولونه ماسین! .. هر شیک ایلک سببی آنجق او اولسون! ... بویله دوشونتجه

بوتون موجوداتك (علت اولی cause première) سنی مراد ایتش اولورز .
 هرشيك (مسبب الاسبابی la cause des causes) تعقل ایتش اولورز .
 كائناتده - تحقیقات علمییه من آرتدقجه - نظر مزده منكششف اولان آهنگ
 عمومی بی ده بوسه یزده درخاطر ایدنجه ، بوانتظام وتریتی ، گور برتصادفك
 اثری کی تاقی ایدمه یز . او آهنگ حیرتبخشایی بهمه حال برسبیه وبویله برمبدأ
 مطلقه ، بویله بر علت اولایه عطف ایتدکه مجبور اولورز . صوكره بزه بو آهنگ ،
 (صنع تکیون œuvre de la création) ده بر (غایه but) کی کورونور .
 بویله کورونونجه علت اولانك عاقل وکامل اولمسی ده اقتضا ایدر . باشقه درلو
 دوشونه یز ؛ چونکه اوتقدیرده او آهنگ تکیونی اثر تصادف اولق اوزره
 تاقی ایتدکه کمز لازمکلیز ؛ بر او چونجی احتمال یوقدر . حالبوکه بونظام عالمی
 تصادفه حمل ایدمه یز حکمزی دهمین سوبیلدم ایدی . عالمده بویله بر انتظام
 اولدوغنی انکار ایدرسه ك ، اوباشقه !.. نته کیم انکار ایدنلر اولمشدر . انکار
 ایدیلیرسه بوتون بوملاحظات ییقیلیر ؛ چونکه او آهنگ عالم اعتقادی اوزرینه
 مبنی در . فقط او وقتده باشقه مشکلات فکریه قارشوسنده بولونورز که حلی
 هیچ قولای دکدر . هله بو کونکی ترقیات علمییه نظراً نظام عالمی قبول
 ایتمهك برانکار عنادی اولور .

بو دوشونجه مزله نه کی بر نتیجه یه پیوسته اولدق؟.. برده اونی دوشونلم :
 (کثرتده برمبدأ وحدت) و (آهنگ عمومی) تعییرلرینك دلاتیلله ذهنمز
 بر ضرورت منطقیه تابع اوله رق برسلسله افکار تعقیب ایتدی ونتیجه ده
 (علت اولی cause première) ایله (علت غاییه cause finale) مسئله لرینه
 کلدی طایاندی . بوتون موجودات ممکنه بوایکی علت آره سنده محصور
 قالدیمی ایچون فلسفه یی (علت اولی و علت غاییه علمیدر) دیه دخی تعریف
 ایدمیلیرز . ذهنمز بونتیجه یه ایصال ایچون دلالت ایدن دیگر ایکی تعریفه
 شوصوك تعریفمز منافی دوشمز . کرچه شکل افاده اعتباریله بوسبوتون باشقه
 برشی ایسه ده !...

ایسته سزه بر مثال اولسون دیه عرض ایتدیکم شو محاکات نظریه و اوسلسله

افكارك بالنتيجه توليد ايدىكى (دستور تعريفى formule de definition) ، حقيقتاً ك مشهورلرندن برىدر وارسطونىكدر ؛ حتى ارسطو شوئم ياپديغ محاكمهك هان عيىنى يايه رق بوتعريفى بولوب چيقارمش وبوده سائرلرندن زياده معتبر اولمشدر . بوكون بيله مكتبلرده تدريس ايديلن فلسفه كتابلرنده مقبول اولان تعريف بودر .

بويه برملاحظه يه كيريشمكدن وتفصيل بحث ايتكدن يكانه مقصدم سزه شو كيفيت مهمه يي عرض ايتكدر كه ، فلسفه حقنده نقلأ عرض ايتديكم تعريفات مختلفه و متعدديه باقوبده :

(فلسفه نه عجائب شى !.. اربابى بيله تعريفنده اتفاق ايدميور . آ كلا . شيليور كه موضوعك نه اولدوغنى حالا فيلسوفلر بيله آ كلايه مامش !...)
ديمه بيكز . واقعا فلسفه ايله اوغراشامش آدملىر ، حتى محدودال نظر بعض متخصص عالمر بيله واردر كه بويه عجله برحكم ويرمشلردر . حتى فيلسوفلردن برقاچ كشى بيله واردر كه بويه برملاحظه دن چكنمه مشلردر . مثلاً زمانمز متفكرينندن (Jouffroy) فلسفه حقنده شويله بر فكر بيان ايتمشدر :

(فلسفه اويله برمعلمدر كه موضوع فكريسى هنوز ثابت اوله مامشدر . اولمش اولسه يدي فيلسوفلر ك عددى قدر فلسفه اولمازدى . ردانه و بردرلوا لوردى . برچوق حكمت طبعيه ، برچوق هيئت اولدوغنى كورميورز . زيرا علومك هر برينك موضوع فكريسى معين در .) دييور .

بو ملاحظه هيچ طوغرو دكلدر . هم برقاچ وجهله ياكلشدر . اولافيلسوفلر ك عددى قدر فلسفه يوقدر . فلسفه ده اساساً معدود برطاقم مذهبلىر اوله بيلير . نته كيم اونلر ك تصنيف طبعيسىنى (سربيليام هاملتن) يامشدر ويقينده كوره جكز . فقط بو دعوايه دليل اولمق اوزره ك اول (Jouffroy) يي مثال كتيره بيليرم ؛ چونكه كنديسى (روحيون spiritualistes) لردن برمفلسوف اولدوغنى حالده كندينه خاص برمفلسفه سى يوقدر .

ثانياً ، تعريفده تخالف نظر واصولده تنوع ، (موضوع فكري) نك مطلقاً نامعين اولماسندن ناشى دكلدر : هر هانكى برموضوعك مختلف مختلف نقاط

نظردن تلقی و تتبع ایدیه بیلکه مستعد اولماسنددر . یعنی ساده و بسیط برشی اولمایوب قاریشیق مسئله لردن مرکب بولونماسنددر . ماهیت انسانییه قابلیت مختلفه سنه کوره باشقه باشقه نقاط نظردن مطالعه ایدنلره ، (تعریف انسان) تکلیف ایدلسه منطق اربابی (حیوان ناطق animal raisonnable) دیر . بر دیگر (an, sociable حیوان اجتماعی) ، بر باشقه سی (حیوان مدنی an, politique) بر دیگر ده (حیوان اقتصادی an, économique) دیر . نته کیم شوپنهاووه درخی حیوان مابعد الطبیعیات (an, métaphysique) دیمشدی . بو تعریفلر بئم علی العجله اویدوریو یردیکم شیلر دکلدرد . ذاتاً مشهوردر ؛ وهسی ده بر نقطه نظره کوره اک طوغرو تعریفدر . حالبوکه موضوع بردر و معیندر . لکن بوراده موضوع انسان ، دکل انسانک بر قابلیت خصوصیه سیدر دیه جکسکیز وارسین اولسون . ! فقط انسانی ، بویله قابلیت خصوصیه سنه کوره آیری آیری تتبع و تعریف ایتمیوبده هویت مشخصه و کلیه سیله تتبع ایده جک اولسه یدق ، نه یابه جق و فصل تعریف ایده جکدک ؟ . . بو ، جای سؤالدر . بو تعریفات جزئییه نك برنی اهامال ایده بیله جکمی ایدک ؟ اووقت یابه جغمز تعریف من وجه ناقص قالیردی ! جمله سنی بر دستور عمومی به درج ایده بیلیری ایدک ؟ . . او وقت تعریف اولماز تفصیل اولوردی ! ایشته علوم متنوعه ایله فلسفه عینی وضعیده در . موضوع هپسی ایچون بردر ، هم اوقدر معیندر که دها زیاده اوله ماز : جمله سنک تتبع ایدیکمی شی برتک کله ایله ادا ایدیه بیلیر : (وارلق !) . هپسی ده وارلق عالمی تتبع ایدیور . لکن علوم یالکیز وارلق (تظاهرات manifestations) قسمی تحقیقه قویولمش ، تقسیم اعمال ایتمشدر . هر بری کاشانک بر صنف حادثاتی خصوصی بر نقطه نظردن تجربه ساحه سنده تدقیق ایدیور . فلسفه بویله دکل ، جمله سنک تبعاتی بر نظر شامل و عمومی ایله احاطه ایدیور . مسئله یی اونلر کی تجربه ساحه سنده دکل ، اونک فوقده بولونان بر منطقه نظریه ده مطالعه ایدیور . اونک ایچون تک وقیصه بر دستور ایله ماهیت موضوعی تعریف ایتک ممکن دکلدرد . لکن ذکر ایتش اولدیغم تعریفات مختلفه شکلاً هر نه قدر متخالف و متنوع ایسه لرده اساساً

اوله صمیمی رابطه لرله یکدیگرینه علاقه داردرلرکه برینی تحلیل ایتمکه اوندن دیگرلرینی بن منطقاً استخراج ایده بیلیرم. ده مینکی مثالده افلاطونک تعریفاندن ارسطونک تعریفی چیقاردیغم کبی .

صوکره (Jouffroy) نك بر ملاحظه می دها وارکه قطعياً زمانمرك روح علمنه واقف اولمادیغنی کوستریبور: بوفیلسوف عینی علمك ایکی نوعی اوله میه جغنی ادعا ایدیور وبونی موضوعك قطعیا معین اولمسنه عطف ایدیور . حالبوکه دنیانك اك بویوك دهاته ریاضیونندن اولان (Poincaré) بالمله علومه آنجق اضافی برقیمت ویریور ؛ حتی اك قطعی اولانلرینه بیله ! چونکه :

[نامعدود (جبر) علماری ، درلو درلو هندسه لر ومنطقلر اوله بیلیر ؛]
 دیور . (اضافیت علم بشر بحثده) (بوانقاره) نك بو مهم سوزینی تکرار
 اخطار ایده جکم . بناء علیه فلسفه ده تعریفات خصوصیه یی برر دستور مطلق
 کبی قبول ایتمه مکه برابر مطلقا یا کلشده عد ایتمه ملی !.. بونلرک بر چوقلرینی
 ذکر ایتدم ؛ فقط مثال اوله رق بعضلرینی دها عرض ایدوب بواوزونجه بحثه
 نهایت ویره جکم :
 شو تعریفلرده باقملم :

[فلسفه ، اسباب ایله مسبباتی تعریف ایتمک علمی در .] [هوبس Hobbes]
 [فلسفه (علل کافیّه raisons suffisantes) علمی در] [لایبنیچ Leibnitz]
 [اشیای ممکنه یی - ممکنات اولمق حیثیتله بیلیمک در] [وولف Woolf]
 [مبادی اولادن ، بدیهی اوله رق استدلال اولونان شیلر علمیدر .]
 [ده قارت Descartes]
 [حقایق محسوسه ومجرده (vérités sensibles et abstraites) علمیدر .]
 [قوندیلیاق Condilliac] [*]

[*] فرانسز فیلسوفلردن قوندیلیاق (L'abbé Etienne Bonot de Con.)
 (۱۷۱۵) سنه میلادیه سنده (grenoble) شهرنده طوغمش و (۱۷۸۰) ده وفات
 ایتشدی. سلك رسمیمی اعتباریله پاپاسدی . مذهب فلسفیدی اعتباریله (sensualiste)
 حسیونندره فلسفه حقنده شو تعریفی ، اسکیلردن اسکندریه لی (clement) ککنه پک
 بکزرکه شودر : [η δὲ τῶν φιλοσόφων πραγματεία περί τε τὰ νοήματα καὶ τὰ ὑποκείμενα καταγίνεται .]

[عقل بشرک غایات ضروریه سیله بالجمله معلوماتک ر ابطه لرینی تحقیق و تعیین ایتمک علمی در .] [قانت Kant]
 [وجود مطلق علمی در .] بو تعریف ایله بوندن صوکره کی [شه‌لینگ Schelling] کدر .

[حقیقت محسوسه ایله حقیقت لدنیه نك عینیت مطلقه سنی اثبات ایتمک علمی در .] الی آخره !!

شیمدی شو مختصر تعریفلرک هیچ بری شکل و صورت اعتباریله دیکر لرینک عینی دکل ؛ حتی بعضلری دخی یکدیگرینه اساساً ضد کورونویور . عجبا بونلرک هانکیسی طوغرو ، هانکیسی یا کلش ؟ ! . بکا صورارسه کز ، کمال جسارته ادا ایده بیلیم که هر بری ده من جهة طوغرو و هیچ بری مطلقاً یا کلش دکل !! حتی بر برینه ضد اولانلری بیله ... چونکه هر بری صاحبک فلسفه حقنده کی اعتقاد ذاتیسه موافق ... نیچون ؟ . فلسفه تعریفلری فیلسوفلرک اعتقادات اساسیه سندن آرز چوق متأثر درلرده اونک ایچون ... !

مثلاً ، [حادثات نامعدوده و متنوعه نك ضمننده و یا خود ماوراسنده بر (وجود مطلق) آرامق] تعریفی ، (اضافیون relativistes) قبول ایده مز . ایتدکلری تقدیرده اعتقادات فلسفیه لرینی انکار ایلش اولورلر . کذلک ؛ بر (مبدأ واحد آرامق) تعریفی (pluralisme) فلسفه جدیده سی قطعاً رد ایدر چونکه بومذهبک مابه الامتیازی بر (مبدأ واحدی) قبول ایتمه مک و (حادثاتک بر اصلی دکل بر چوق اصللری اولدوغنی ادا ایتمک) در . بناء علیه او تعریفی واونک متضمن اولدوغنی اعتقادی قبول ایتمه مکدن بوفلسفه جدیده طوغمشدر . (monisme pluralisme) ، بر برینه تماماً و اساساً ضید ایکی فلسفه در ؛ نصل ایسترسکزر که ایکسی ده عینی صورته فلسفه یی تعریف ایتسینلر ؟ ! ... [ای ی ! . بومتناقص اعتقاداتک البته بریسی بریسی طوغرودر ، ضدی باطلدر ، اوطوغرو اولانی هانکیسی ایسه اوننی بیلدیر ؛ اووقت اوته کی تعریف ، متضمن اولدیی عقیده باطله ایله برابر مضمحل اولور کیدر . آنجق طوغروسق مقبول اولور ؛ زده اوننی قبول ایدرز !]

دیه جکسکز ! فقط اصل مختلف فیہ اولان مسئله ایشته اوراده در . زیرا حقایق اشیایه متعلق اولان بو مختلف نظریات و فرضیاتدن هر هانکی برینک قطعاً طوغر و دیکر لرینک ده یا کلش اولدوغی تحقیق و تبیین ایده بیلیمش اولسه ایدی ، فلسفه نك ظهورینه سبب اولان واونك باشلیجه موضوع بحثی تشکیل ایدن (معما) حل ایدلمش اولوردی . و بناءً علیه فلسفه یه حتی علومه حاجت قالماسدی ! (سر تکوینی *le mystère de la création*) کشف و حل ایتیش بولونوردق . حالبوکه حالا اونك بحثی صد دنده یز . اومسئله یی حل ایتک ایچون موضوعی نه ویروب چویریوز . وینه اونك ایچوندرکه فلسفه وار ؛ علوم وار ! اوایله اولونجه سر وجود و بحث تکوینه دائر ترتیب ایدلمش بولونان فرضیات مختلفه نك برینی دیکرینه مطلقاً ترجیح ایده میوز . چونکه (مسئله موضوعه ، *question posée*) ماهیتی و طبیعی اعتباریه (*transcendantale*) در ؛ یعنی حس و تجربه نك ، عقل و منطق فوقنده در ایشته بالخاصه بوندن طولای درکه الله و سبیلله ترجیح اوله بیله جک ، بر قوی سند یوقدر . اولسه اولسه هر تعریفك - کندی نقطه نظر نجه - متضمن بولوندوغی فرضیه خصوصیه یه توافقی - ینه کندنجه معتبر - بر مقیاس اوله بیلیر . اوایله اولدوغی تقدیرده دخی بونوع فرضیات تعدد ایده بیلیر .

ذاتاً ده بویه اولمشدر . اگر فلسفه نك موضوع خاصی تشکیل ایدن (امهات مسائل *questions mères*) (علوم صحیحه ثابته *sciences exactes et positives*) مسائلی کی تجربه ایله حل ممکن شیلردن اولسه ایدی ، ایش ر درجه یه قدر قولایلا شیردی . حالبوکه صحیحاً هر درلو تجربه نك فوقنده در . حتی شونی اخطاره لزوم کوروروم که حکمت و کیمیا کی علوم صحیحه و قطعی ده بیله ، حالا تحقیقات تجربه نك دائره امکانه ادحال ایدیه مین بعض خصوصی مسئله لر واردر ، واونلر حقنده لافل ایکی متناقض فرضیه واردر . بری دیکرینه مطلقاً ترجیح ایدیه من . براز ایلریده فصل مخصوصنده بونلردن مثال کیرتمک مجبور اوله جفم ، کوره جکسکز ! . . .

او حالده بوتعریفات مختلفه نك قیمت و حیثیتلری تقدیر ایده جکمز زمان ،

فلسفه‌ی هانکی نقطه نظر دن تاقی ایتمش اولدقلرینه باقه جغز و آنجق او نقطه نظری شایان تنقید کوره جکیز . یوقسه هر هانکی بر نقطه نظر تصویب ایدیلرسه اوکا توافق ایدن تعریف نسبتاً طوغرودر ، نسبتاًده معتبردر . هم هر کیم اولورسه اولسون ، فلسفه‌نک موضوعات اسالیه‌سنی عینی صورته تاقی ایدن متفکرلر ، فلسفه‌ی ده همان عیناً تعریف ایتشلردر . بوده اثبات ایدرکه تعریفات ایله موضوعات آره‌سنده - نقطه‌نظره کوره بر رابطه منطقیه وارددر . سزه بر مثال ویره‌یم وهیچ بربرینی طانیجه‌مش ، بربرینک اسمنی ایشتمه‌مش ایکی آدم ذکر ایدیم‌که فلسفه‌ی عینی صورتده تعریف ایتشلردر .

الك صوك عرض ایتدیكم حکما میاننده مشهور ددقارتک‌ده بر تعریف وار ، بو ذات

[فلسفه ، - مبادی* اولادن بداه* استدلال اولونان - حقایق علمی‌در .]
 دیمشدی . بونک آجیق برافاده ایله تفسیری شودر :

[جزئیات امور ، نامحصور و غیر ثابت شیلر اولدوغی ایچون فلسفه اونلرله بالخاصه مشغول اولماز فقط ، بعض مبادی* اولی واردرکه اونلر عقل صرفک حقایق ضروریه‌سنددر . ایشه فلسفه بونلرک ماهیتی تحقیق ایدر و بونلردن ، بدی بر صورتده استدلال اولونان حقایق سائر ایله مشغول اولور .] دیمکدر .

قینالی زاده ، فیلسوف شهر (خواجه نصیرالدین طوسی) دن اقتباساً عینی فکری عرض ایدیور ، بالجمله امورک « البته برمبدادن ناشی و بر مقتضی دن صادر اولدوغی » ، وقابل تبدل و تغیر اولان حادثات نامحصوره‌نک « تفصیل جهندن (!!) اقسام حکمتدن خارج ، بولوندوغی - خواجه نصیره عطفاً - ذکر و اخطار ایتدکدن صوکرده او بویوک فیلسوفک ، بو ملاحظاتی حقی کوسترمک ایچون دلیل کتیریور ؛ و :

[زیرا روش حکیم و نظر فیلسوف قضایای عقل صرف تبعه مفسوردر .]
 دیورکه کوزلدر ددقارتک‌ده تماماً فکری بودر ؛ حتی (عقل صرف Raison pure) فلسفه تنقیدی‌سنی تأسیس ایدن (قانت Kant) دخی باشقه اعتقادده دکادر .
 بری شرقی ایرانی ، بری غربی فرانسز اولان بوابکی فیلسوف داهی -

آرد لرنده کی اوج عصرلق زمان و طوسن، اسوج نورو جه قدر مسافه و مکان فرقه رغماً - عینی مسئله ده تماماً عینی صورته بیان فکر ایله مشلر ؛ چونکه موضوع مسئله بی عینی نقطه نظر دن تلقی ایشلر. بومثال ودها بر چوق امثالی اثبات ایدر که بوتون بو تعریفلر من جهت طوغر ودر. حتی تعریفات جزئییه، فلسفه نك موضوعی تشکیل ایدن مسائلك (موزائیک Mosaïque) لری کی در. اونلرك هپسی بردن کوزدن کچیریرسهك ، فلسفه بی - ماهیتی اعتباریله - دها ای احاطه ایش اولورز . بنده اونك ایچون بو بحثی اوزاتم و بعض حقمن اعتراضاته جواب ویرمك ایسته دم. فقط ظن ایتیه کی که هر تعریفی بکشیورم ! بالعکس ، بنده مذهب فلسفی مه ، نقطه نظرمه توافق ایتیه یس لری وار که بنجه مقبول اوله ماز. حتی طرفدارانه ترتیب ایدلمش اولانلری ده وار ؛ مثلاً ریاضی شهر (دالامبر Dalember) :

[ما بعد الطبیعیاتك غایه سی افکار منرك صورت تولد و تکیوتی تحقیق ایتك و اونلرك جمله سنك ده حواسمزدن وارد اولدوغنی اثبات ایتمکدر .] (*) دیمشدر که اصل ما بعد الطبیعیات مباحثنده مختلف فیہ اولان بر مسئله غامضه بی - بر حقیقت مسأله کی - تلقی ایدیور ویا لکنز بالتجربه اثباتی قالمش کی کوستریور. حالبو که اصل موضوع مناقشه ارلان مسئله لردن مهم بردانه سی ده بودر . یوقاریدن بری ذکر ایتدیکم مثاللرك بك چوغنده عینی نقطه ضعیفه کوروله بیایر .

فلسفه نك تعریفات حقیقه، سزه، لزومی قدر معلومات وایضاحات ویردم؛ شیمدی موضوع بحثی تدقیق ایچون بر باشقه فصله کچه بیایر . ذاتاً بر علمك اك طوغر و تعریفی موضوعنه وائی تشکیل ایدن مسائل مخصوصه یه کوره اوله جفی جهته بو تعریفات فصلی ، شیمدی آچاقمنز بحثه مدخل صایلیر ؛ چونکه کله جك فصلك موضوعی ایجه تفهیم ایش و ذهناری حاضر لامش اولویور.

(*) La métaphysique a pour but d'examiner la génération de nos idées, et de prouver qu'elles viennent toutes de nos sensations. « Elements de philosophie P. 143. »

- ۳ -

افدیله ! . .

کچن درسده عرض ایتمش اولدوغم تعریفات متنوعه دن ، فلسفه حقنده البت بر فکر حاصل ایتمشکزددر . بو فکر ، بر از مهم اولسه بیله ، فلسفه موضوعاتنک نه کی مسائله تعلق ایتدیکنی آ ز چوق صراحتله کوستره بیلیر . فقط بن بونی ده لایقيله ایضاح ایده حکم که ملاحظه ماهیتده شبهه یه ذره قدر محل قالماسین . بو بابک صوک ایکی فصلنی منحصرأ بو بحثک مناقشه سنه تخصیص ایتدم . مع مافیه او حده کلزدن اول ، تحقیق ایتکه مجبور بولندوغمز بعض مسئله لر ده وار که اونلرک طبیعتنه نه قدر انفاذ نظر ایده بیلیرسه ک فلسفه نک موضوعی ده او قدر ای تعیین ایتمش اولورز . اونک ایچون فلسفه دیدیکمز بو مشغله ذهیه نک اسبابی حقنده ده بر از قونوشلم ؛ چونکه بو خصوصده دخی بر چوق متفکرین بیان مطالعه ایشلردر .

صوک عصرک الک مقتدر خواجه لرندن وصاحب مسالک فیلسوفلرندن (سر ویلیام هاملتن Sir W. Hamilton) [*] ویردیکی درسلرده بو بحثی ای دن ای قورجالامش واسلاف حکمانک افکارینی ده طوپلایوب عرض ایتشدز . فلسفه نک باشلیجه اسبابندن اولق اوزره هاملتن اول حیات ذهیه مزی ؛

[*] sir William Hamilton سر ویلیام هاملتن (سقوجیا فیلسوفلرینک بلکه الک مشهوریدر . (۱۷۸۸) ده (گلاسکو glasgow) ده دوغمش (۱۸۵۶) ده (ئدینبره ری Edimburgh) ده وفات ایتشدز . کندیسی اوقسفورد دارالفنوننده تحصیل ایتمش . ابتدا طبیب و صوکره آووقات اولق ایسته مش . فقط ایستدیی کی بو مسلک لرده موفق اولامایجه فلسفه اخلاق درس لری ویرمک اوزره (ئدینبره ری) دار الفنوننده مشهور (بروون Th. Brown) ک وفاتی حسیله منحل قالان موقعی اشغال ایتشدز و ثولونجه یه قدر فلسفه درسی اوقوتشدز . مابعد الطبیعیونک الک بوکلرندن صابیلیر . هله تبعات اعتباریله هرکه فائق ایدی اسلافدن هرکسک اثرینی کمال دقتله تبیع ایتشدی . خواجه اولارق غایت مهم برنفوذ و تأثیر کوسترمش وانکلتره ده فلسفیا تی احیا ایده جک قدر مابعد الطبیعیاته رواج ویرمشدر .

صوکره عقلمزك، توحيد نظره وهر شیده برسبب آرامنه میل فطریسفی ذکر ایدیور ؛ اوندن صوکرده ینه فطرت انسانییه خاص اولان حیرتی، (اسباب معاونه Causes auxiliares) دن اوله رق تاقی ایلور . بو فکرلر منحصرأ هاملتنک کندی زاده ملاحظاتی دکادر . اک بویوک فیلسوفلر بو خصوصده بویله دوشونملر و بو نقطه لرده اتفاق ایتشلردر .

فی الحقیقه فلسفه دیدیکمز مشغله ذهنیه، حیات مغنویه مزك ایجابات طبعیه سندنر . نشوونما ایتک ، یارق و یرمک ، چیچک آچاق ، نصل بر آغاچک تجلیات حیاتیه سندن ایسه ، دوشونمک دوشونجه لرینی ترتیب وتنسیق ایتمک ده بزم حیات مغنویه مزك بر جلوه سیدر . اونک ایچون (سرویلیام هاملتن) دیورکه : « فلسفه نک اسبابی ، بنیه مغنویتمزك عناصر اصلیه سنده مندجدر . بز علم وادراک قابلیتیه یارادلمشزدر ، بناء علیه او قابلیتی استعمال ایتک میل طبعیه سی ایله یارادلمشزدر . انسان ، نصل یاشیورسه اوله جه دخی تفلسف ایدر . ای ویا فنا تفلسف ایده بیلیر ؛ لکن همه حل تفلسف ایدر . »

طوغرودر ؛ مادام که قابلیت حس وادراک ایله متخلق بولونویورز واک اوافق وسیله لرله تفکر ایلویورز، نیچون حس وادراک وتفکر، حیات مغنویه مزك تجلیات طبعیه سندن اولسونده بوتون بو تجلیاتک نتیجه ضروریه سندن عبارت بولونان تفلسف اوله اولماسین ؟ .. طبعی درکه اوده اوله در ! . . . مادام که عقامز وار ، مدرکاتمزی اونکله تنظیم ایدوب هر شیئه بر معنا ویریورز ؛ مادام که تسلسل حادثاتده برعلاقه سببیت بولیورز و بو سایه جریان وقوعاتی معقول بر صورت اوزره تعریف ایتدیکمزه قناعت حاصل ایدیورز ؛ نیچون یالکزی ایکی وقعیه بر برینه ربط ایتمکه قالم ؟ .. نهن بو ساحه مشاهده تجربه شخصییه مز آردقجه - علی طریق القیاس - تمم نظر وتشمیل حکم ایتیم ؟ .. بو وادیده ذهنمه سد چکچک بر معما پیدا اولمادقجه نهن شو حد اوزره ویا بو حد اوزره توقف ایده طورلم ؟ حتی ، بر حده واروب توقف ایتسه ک بیه ، فلسفه دن باشقه نه یاییش اولورز ؟ . تفلسف ایتک بودرلو

دوشونجه لر ترتيب ايتك دكلده نهدر؟. اوندن صوكره: باشمه چارپان بر آغاچك نه اولدوغنی آكلامق وحقنده (بر فكر حاصل ايتك!) ايچون، حواسمه مراجعت ايديشم واونك في الحقيقه بر آغاچ اولدوغنی بالتجربه وبالتحقيق كوروب آكلایشم (بیم کبی حس وعقل صاحبی بر وجود ایچون) بك طیبی برشی اولدوند، آغاچك ماهیت و حقیقتی آكلامق وحقنده دها درین (بر فكر حاصل ايتك) مجبوری ایله دوشونوشم نهدن - عینی صورته - بك طیبی اولماسین؟. فعالیت ذهنیه مك اقتضای غریزیندن اولان بوتون بوتون تحسس، البته حیات اثریدر. بن ثولش اولسم بيلمم ذره قدر حس ایده بيلمی ایدم؟. ایدمه نجه، بيلمم ذره قدر تفكر ایده بيلمی ایدم؟. شبهه یوقدر كه بنده تجلی ایدن بوقابلیات معنویه مك جمله سی ده محضاً اثر حیاتدر. فعالیت حیاتیه مك اك عالی، و صرف معنوی اشكالی در. ایشله یین بر ماكنه، فصل الكتریق، ضیا، حرکت، الحاصل بر قوت اظهار ایدیورسه، برایش یاییورسه، نشو ایدن بر چیچك فصل رایحه نشر ایدیورسه؛ یاشایان، فعالیتده بولونان بردماغ ده اویله جه تفكر ایدیور؛ دیمكدر. دوشونمك واو دوشونجه لری ترتیب وتعمیم ايتك فعالیت ذهنیه مك اثریدر. فعالیت ذهنیه ديمك دخی آنجق حیات معنویه دیمكدر.

(فلسفه عمومییه مدخل) اولق اوزره یازمش وبرقاچ آی اول باصديرمغه باشلامش اولدوغم بر اثرده بوبحی لایقيله ايضاح ايتمشم. [*] فعالیت ذهنیه مك معمار حضورنده دخی بوسبوتون توقف ايتیوب دوام ایلدكینی وانسان ثوله دكبه سكونت بولمادیغنی نظر دفته عرض ايتك ایچون شویله دیمشم:

[*] اون اون ایکی سنه دنبری بر اثر فلسفی وجوده كتریمك ایچون اوغراشمش وترتینه موفق اولمشم. كندی فلسفه ی اوراده كمال صراحتله بسط وتفهیم ايتكه جالمدم. فقط بعضی دوستلرمك التماسی اوزرینه اوکا بر (مدخل) یازمغه قرار ویردم؛ بو اثرمك دها ای اكلاشیله بيلمه سی ایچون بویله بر مقدمه یه لزوم اولدوغنه، بنی اقتناع ایتدیلر؛ او صورته واو سببله یازمش اولان بو مدخل (بیله کی) مجموعه سنده منتظماً نشر ایلده كه باشلامدی. مجموعه موقتاً تعطیل نشریات ایتدیکی ایچون اویله جه قالدی. كتاب ایله برابر طبع اولونمهی مقرر در.

«شایان دقتدر که نیجه بیک سنه لردن بری بو وادیده [*] اجرا ایدیله کلن تدقیقات، دائماً منفی نتیجه لر ویرمش اولدینی حایده، انسان بو موفقیت سز لکنندن هیچ بر وقت مأیوس اولمامشدر. اویله کورونویور !! اویله طاورانیور !!... تاریخ مدنیت بوکا شاهددر. بوغریبه نك بعض اسبابی وار؛ فقط اعتقاد بحکام مهم سبی شودر که حیات - اک طوغرو مناسبله - بر (فعالیت متماده) در ایستر قسری، ایستر طبیعی، ایستر سه ارادی اولسون.»

«بو فعالیت طبیعی، همه حال بر نقطه تعلق ایستور؛ و بولویور؛ حتی اونی ایجاد ایدیور. انسان، اک اهمیت سز وسیله لرله اعمال فکر ایلر. دانا طوغروسی، حیات ذهنیه نك فیض غریزی سی بو درلو فعالیتی مستلزمدر. ذهنی، دوشونجه یی بالذات طوغورور، وجوده کتیر بر. حسیات و افکار، فعالیت ذهنیه نك ثمرات طبیعیه سیدر. بایک اونک بچوندر که انسان دوشونمکدن، دوشونمکده تحری حقیقتدن فارغ اوله بور؛ ولوکه بو حقیقت، حد ذاتنده بر خیالمدن عبارت اولسون !! . مدرکات حسیه و (معطیات تجربیه données de l'expérience) اوزربنه بنا اولونان محاکمات فکریه، حدود منطقیه و ارنجه بیله بر جای قرار، بر موقف قناعت بوله میور؛ ولوکه اوندن اونه سی برده تلی اوچوروم اولسون !! . حاکموکه (بنیه عضویت constitution organique) مز فطرت انسانیه مز، فکر مزك ساحه جولانی قطعیاً تعیین و تحدید ایتشد. بو بویله اولمله برابر او حدود قطعیه یی آشمق، و فیضان حالنده بولونان بر نهر کی - لانیق طع ایلریله یوب یا ناغندن طاشمق، عقل مزك میل طبیعی سی اقتضاسنددر. الخ الخ !! .

اوت !! . بویله در بویله اولدوغی مسلمدر. چونکه انسان اولوبده طبیعت حضورنده دوشونمک ممکن دکدر. بناءً علیه فلسفه نك برنجی سبی نه در؟ . دیه سؤال اولوتجه، [دوشونمک و تفلسف ایتکه استعداد مزدر. بوده فعالیت عقلیه یعنی حیات ذهنیه مزك بر جلوه سی، بر اثر طبیعی سیدر.] دیه جکز. واقعا بو (tautologie) [**] اولور؛ یعنی سوآلی عیناً تکرارورد ایتکه جواب ویرمک

[*] یعنی (حقایق اشایی کشف ایتک وادیونده) دیمکدر. بوجهلر ماقبله مضافدر.

[**] بو تعبیر منطقی نك اصلی یونانی در. (τὸν = عینی شی)، (λόγος سوز)

اولور اما نه یاهم؟!.. بوکا باشقه بر جواب معقول یوقدر. زیرا کیفیت بدیهی در. بودرلو سواللرک جمله سنه هپ بویه جواب ویریه بیلور، باشقه درلوسی بوسبوتون نا معقول اولویور. مثلاً حالا یاشامه مزک سببی نه در؟. ده نیلدیکی زمان، (حالا یاشامه قابلیت زدر ا) دیمکدن طوغرو بر جواب اولماز. هر نه قدر بوجواب سوالی عیناً رد ایتمکدن عبارت اولسه ده ینه اک طوغروسی در.

بناءً علیه بونی بویه قبول ایده جکیز، وفلسفه نک ایلک واک طیبی سببی عد ایلیه جکیز. چونکه وقوعی ادراک ایتمکده اولدیغمز بر حالدر؛ وبو حال بالذات بدیهی در: ولیل واثبات ایسته مز.

بوندن ماعدا ایکی سبب دها کوستریلیور که بریسی هر درلو وقوعات بر علت موجب (cause efficiente) یه ربط ایتک، یعنی حادثات آره سنده علاقه سببیت آراقده مجبوریت زدر. دیکری دخی کثرت وقوعات حضورنده سبب دوشونورکن وحدت نظره میلمز در.

بزجه یک طبیعی اولان شو ایکی درلو میلانی بر درجه یه قدر تعریف ایده بیلیر. بن ظن ایدرم که هر شینه بر سبب تصور ایدیشمز واونی عالم خار-جیده آرایشمز، ارادتمزدن نشأت ایتش قوی بر اعتقاد قدیمدر. بز، هر نه یاپارسه ق، ارادتمزله یایدیغمز ایچون کندیمزی، افعال واجرا آتمزده یکانه عامل مؤثر بیلیر. حقیقت حالده بو اعتقاد مزک طوغرو اولوب اولمادیغنی بوراده تدقیق ایده جک دکم؛ فقط یری کله جکدر. یالکنز شیمدی شو نقطه مهمه یی نظر دفتکزه عرض ایتک ایسترم که صرف (انفسی subjectif) بر فکر اولان (سببیت اعتقادی) بزم ارادتمزدن طوغمشدر. بز کندیمزه قیاساً عالم خارجی حقنده حکم ایتشمز؛ وطبیعتده مشاهده ایتدیگمز وقوعاتده، حس ایلدیگمز رابطه تسلسی (سببیت causalité) اوله رق تاقی ایده گلشسز. یعنی هر درلو

دیمکدر؛ یعنی عینی شیئی سوبلک معناسنه کلیر. اصطلاحده: (بیپوده، فائده مز تکرار). دیرلر که هیچ سؤاله جواب ویرمز؛ تعریف ایتک ایستدیکی شیئی هیچ تعریف ایتش اولماز. بناءً علیه مردوددر. فقط بذاته بدیهی اولوبده تعریفه چالشدیغمز شیلرده هپ بو خطایه مجبوراً دوشرز.

اجرا آتمزده کندی ارادتمزی نصل سبب محض بیلورسهق، کائنات خارجه ده بلا انقطاع حصوله کان حادثانه دخی، اویله جه بر سبب آرامش، واونی توالی وقوعانده بولمش. اورابطه تسلسله، سببیت معناسی ویرمش. بونی هر زمانده وهر مکانه بویله کورمش اولدوغمز ایچون، بو عندی اعتقادمز، کیم بیلیر نیجه بیک عصر لر ذهنمه تحکم ایدرک بر (مبدأ بدیهی *principe évident*) اولمق حیثیتی احراز ایتمش وخارجده حادثاتک متسلسلاً جریانی هر ثانیه، هر آن مشاهده ایده کلدیکمز ایچون تجارب ذاتیه مز دخی دائماً (سببیت) اعتقادینه قوت ویرمشدر. آرتق هیچ برشی کوره میورزکه اوکا دیگر برشی سبب اولمش بولونماسین؛ حتی هیچ برشی دوشونه میورزکه سببیز اوله بیلیمسی امکاتی تصور ایده بیلیمک قابل اولسون! بو دوشونجه مزی تحقیقات تجربیه دخی هر زمان اثبات ایده کلشدر. بوتون کشفیات علمیه - باقیله! - حادثات طبیعی نک اسبابی آرامق مراق جلیسیله وجوده کلشدر [*] نظام عالمک محور جریانی، خارجده (اطراد و آهنگ *uniformité et harmonie*) ایسه، او اطراد و آهنگک ذهنمه تولد ایتدیکی (عقیده قیمه)، سببیت حقنده جلی اولان قناعتمزدر. سببیه مقارن و محتاج اولمایان هیچ بر وقعه، هیچ برشی تصور ایده مییشمز بوندن ایلری کلیور؛ و طبیعتده توالی حادثاتک بدایت و نهایتی تعیین ایده مدیکمز ایچون، ذهنمز جزئیات اموری تتبع ایدرکن بالضروره تسلسل اسباب جریانه قایلوب نامتناهی به قدر کیدیور. نامتناهی به اصل اولویور دیمک ایسته میورم!.. چونکه اگر حقیقتاً برنامناهی وارسه، اونی ادراک ایتک بزم کی [متناهی بر زمان ظرفنده طوغوب یاشایان و تونل] انسانلر

[*] ایلریده کوره جکرکه بو (سببیت فکر و اعتقادی) هم علومک، هم ده فلسفه نک وجودینه باعث اولمشدر، حتی (سببیت مبدأ *principe de causalité*) فی شبهه دوشور. مک، مابعد الطبیعیاتی تمدن ییقمق دیمکدر. زیرا مابعد الطبیعیاتک آزادینی وجود مطلق، بوتون شو عالم حادثاتی برسببه اسناد ایتک مجبورت منطقیه سیله دوشونولمشدر. سببیت عندی و انفسی بر فکر، بر ظن ایسه وجود مطلق صرف، و هووم بر مفهوم اولوب قالیر. بونک بحثی کله جکدر و او وقت لایقیه مسئله مناقشه ایدیه جکدر.

ایچون ممکن دکلدر. یالکیز شونی سویلک ایستیورم که ذهن بشر، (برحادنهک همه حال برسبی اولماسی لازمکه چکنه اعتقادی حسبله) تحقیق وقوعاته مجبور اولونجه هر هانکی بر وقعهک (علت قریبه cause prochaine) سنی کشف ایتمکه تشفی* مراف ایلیه میور. چونکه، کورویور که سبب اولق اوزره کشف اییدیکی شی حقهده عینی (متعارفه axiome)، عینی صورته قابل تطبیق دره. یعنی او یکی کشف اییدیکی شیک ده همه حال برسبی اولماسی لازمکلر. او یله اولونجه بر آدیم ایلری کیده مه مش اولدوغنی اذعان ایدر؛ چونکه ایکنجی آدیمده (دور و تسلسل cercle vicieux) کردانه دوشمش اولدوغنی آکلار و بوتحققاتنده نه قدر ایلری کیتسه، زنجیر وقوعاته و بناء علیه سلسله اسبابه نهایت تصور ایده میه چکندن عاقبت طورور. ایشته شو طور دینی نقطه، شو موقف استراحت، (نامتاهی) دیدیکمز شیر. فقط آلدانیهلم، اوزم کندی یورغونلغمزه ویردیکمز بر اسمدر. بو اسمک، خارجهده سیاسی واری یوقی؟ اصل مسئله اوراده در. ایشته مابعدالطبیعاتک اصل موضوع بحثه، (سببیت) دلالتیه - باقیکنز! - نصل کلدک!... بو مختصر ملاحظاتمدن آکلار سکنز که انسانده (تعقل ratiocination) قابلیتی، عالم خارجی نک شئوناتنده ذهنه منکشف اولان نظام و اطراده بر معنا ویرمش وانسان، کندی ارادته قیاساً ملاحظه ایدرک خارجهده بر سبب آرامش و توالی حادثانده بر سلسله اسباب بولمش و بو تسلسل ذهنی بالضروره نامتاهی به کورتورمشدر.

کورویور سکنز که شو عالم حادثاتک ضمنتده و یا خود ماوراسنده آردیغمز و آرامق مجبوریتدن قورتوله مدیغمز (مسبب الاسباب la cause des causes) هپ بو اعتقاد قویمیزک الجآت حکمنه اتباع ایدیشمزدن ایلری گلشدر. و - خاصه* بنم فکرجه - ارادت ذاتیه مزکده بو خصوصده هر شیدن زیاده دخلی اولمشدر. چونکه محققدر که سببیت فکری صرف انفسی بر شیر؛ بر عقیده مخصوصه در. و سبب، بالذات خارجهده مستقلاً موجود بر (شی* objet) دکلدر. خارجهده کوروب تحقیق ایده بیسلیدیکمز آنجق حادثاتک (زنجیره مه کدیشی enchainem ent) در. بز، بوکا معنا ویروب سببیت دیوروز؛ و کندی

افعال مزه کندی ارادتمزی سبب یعنی عامل موجب بیلد بکمز ایچون متسلسلاً کیدن حادثات خارجییه حقننده بویه دوشونمکه و بویه دیمکه طبعاً متایل و حتی مجبور بولونیورز .

شیمدی ، تحقیق اسبابده حادثات جرئیه دائره سی آناهز سهق ، تجربه ساحه سندن چیقماش اولورز ؛ و بو تقدیرده هر زمان سلسله اسبابی بالفعل تعقیب و بالتجربه قونترول ایده بیلیرز . تحقیقاتمزی بو زمین متین اوزره یورو-تورسهك (علم science) یامش اولورز . فقط ، ایك اوجنی قاجیرده ، تجربه ساحه سندن اوزاقلاشورق قونترولی ممکن اولمایان یرلرده سبب آراسهق (فلسفه ، دها طوفرویی مابعدالطبیعیات) یامش اولورز .

ایشته ، صوك حاشیهده : [سببیت اعتقادی هم علمی ، همده فلسفه یی اقتضا ایتدیر مشدر] دیمکدن مقصدم بوایدی .

بومسئله یی لایقهلایلریده مناقشه و تدقیق ایده جکم . شیمدیلک بواعقادمزك فلسفه ایله علم ایله نه مناسبتی اولدوغنی ادراك ایتمه کز کافی در . ایدنجهده - امینمکه - بوندن اولکی بابیه ارجاع نظر ایدم جکسکمز واوراده کی تعریفات مشهوره میاننده (Hobbes هوبس) ک کفی بکنه جکسکمز در . فی الحقیقه بوانکلیز فیلسوفی فلسفه تعریفنده : « اسباب ایله مسبباتی تعریف ایتک علمی در ؛ » دیمشدی . [*] فقط شیمدی یه قدر سوبلدکارمی نظر دفته آلیرده اییجه دوشونورسه کز

[*] دور اخیرك اك بویوك فیلسوفلرندن بری اولان بو ذات (۱۵۸۸) سنئه میلادیه سننده (مومس بری Malmes bury) شهرنده دوشمش و (۱۶۷۰) ده وفات ایتشدی . انکلیز متفکرینك اك بویوکارندن در . اوقسفورد (Oxford) دارالفنوننده تحصیل ایتش و بالخاصه ارسطوی وسقولاستیق فلسفه سی تدقیق ایتشدی . صوکره (دیورن شهر Devonshire) دوقه سنك صربی سی اولمش و بوآدمله فرانسه یه ایتالیا یه و (ساووا savoie) یه سیاحت ایتشدر . او ائشاده زمانك اك بویوك متفکرینی طانیش و (باقن Bacon) ، (غالیله) ، (gassandi غاصاندی) ، (دکارت) ، (هاروی Harvey) کی اعظم فلاسفه و مشاهیر علما ایله صبیحی دوست اولمشدی . حکمت سیاست ایله جوق اوغراشمش و دائماً کبار زادگانك صربی مشاوری بولونمشدی . قرال ایکنجی شارل طلبه سندن بری ایدی و کندیسنه ثولونجیه قدر معاش تخصیص ایتشدی .

لایق‌بله آکلار وتسلیم ایدرسککزکه (هوبس) ک بو تعریفی علوم ایله فلسفه‌یی آیرمایه‌رق احاطه ایدر؛ حتی علومه دعا زیاده یاقیشیر بر تعریفدر. چونکه فلسفه اسباب‌عادیه ایله مشغول اولماز. مثلاً بعضاً یاغ‌مور، بعضاً قار یاغ‌مه‌سنک، کاه‌شیم‌شک چاقه‌سنک، کاهی‌ده ییلدیرم دوشمه‌سنک اسبابی آرام‌قله اوغراشماز. بومشغله، علومک وظیفه‌سنی تشکیل ایدر. بر (مبدأ کلی *principe universel*) بر (علت اولی *cause première*) وارمی؟ یوقی؟.. فلسفه اونی آرار و بو مسئله اصلیه‌یه متفرع و بناءً علیه عینی جنس‌دن اولان مسائل مجردیه‌یی حل ایتکله اوغراشیر. حتی زمانزده رواج بولان (فلسفه تدرییه *Philosophie empirique*) بیله ساحه تجریه‌دن چیقما‌قله برابر، آنجق اک عمومی واک کلی مبادی علمییه‌یی تحقیق ایدر؛ و اونلرله شئونات نامحصوره‌یی و امور متبدله‌یی تعریفه چالیشیر. خلاصه فلسفه تجریه‌بیله اسباب جزئییه‌یی اهمال ایدرک یالکیز کلیاته نظر ایلر. علوم ایله حیثیتاً فرقی‌ده اصل بو نقطه‌ده ظاهردر.

اوله اولونجه پک قولای آکلارسککزکه (هوبس) ک تعریفی اساساً یا کلش اولما‌قله برابر لزومی قدر صریح و معین دکادر. فلسفه یاقیشدیغ‌دن زیاده علمک حیثیته موافق دوشر بر تعریفدر. او حالده ارسطونک مشهور اولان تعریفی ترجیه مجبور اولورسککز؛ چونکه استاد اول، حکیم یونانی، بالخاصه فلسفه موضوعنک اک مهم نقطه‌لری ابراز ایدیور: (*τὰ πρῶτα αἰτία* = *les causes premières*) یعنی (عال اولی) دیور. (*τὰς ἀρχάς* = *les principes* = *les archées*) یعنی (مبادی) تعبیری‌ده دستور تعریف‌سنه علاوتاً درج ایلور. اونک ایچون درکه ایکی بیک اوچوز سنه‌دنبری [*] (مابعدالطبیعیات) حقنده بوندن ای تعریف بولونه‌مامشدر.

[*] (ارسطو *Aristote*) ، دنیاده معروف اولان بوتون فیلسوفلرک بلکه اک مشهوریدر. انسانیت، افکار و آثاریه ایکی بیک سنه بلافاصله تسلطن و تحکم ایده‌یلمش اولماسی، بو داعی‌نک نه خارق‌العاده برآدم اولدوغی اثباته کایدر. شرقده فلسفه بو آدمک‌آثاری ایله جدی بره‌ورنده باشلامش و انکشاف ایتمشدر. (معلم اول ارسطالیس) نامی، حکمای عرب عندنده میجلدر. ارسطو، یونان قدیمک (*stagyre*) شهرنده

بوتون بوسويلديكم وبالمناسبه كچن بابہ ارجاع نظرله تکرار اخطار ايتديکم شيلر سببت اعتقادينك علم وفلسفه ده نه بويوك بر رول اويناديغني وبواعتمادك بزده پك گوكلشمش وطيعتمزده چوقدن بري مندج بولونمش بر فکري اساسي اولدوغني کوستيرير .

ايکنجی سنه کله لم : فلسفه نك اسباب موجبہ سندن بري (کثرت حادثات حضورنده وحدت نظره ميل فطري مزدر) دينلمشدي . شيمدي بو قضيه نك

ميلاددن (۳۸۴) سنه اول تولدايتمش و آلتمش ايکي سنه ياشامشدي . پدری (Nieomachus) طبيب ایدی . ارسطو ؛ پك كوچوك ياشنده ايکن يتيم قالش و (Prexenus) نامنده بر ذاتك بدصيانته توديع ايدلشدي . بو ذات اونی پك كوزل تربيه ايتمش ایدی . روايت موثوقه به نظراً ارسطو هنوز اون يدي ياشنده ايکن ايلك دفعه اولارق آتنه به كلش و مشهور افلاطون سچليادن آتنه به عودت ايدنجه ارسطو ، اونك درس لرينه دوام ايتمشدي ؛ فقط خواجہ سنك فلسفه سنی قبول ایتەمشدر . يکری سنه مەاديآ آتنه ده قالش و (Lyceum) مدرسه سنی تأيس ايدرك فلسفه تعليم ايلشدر ؛ کنديسي ، آساي صغاده (atarneus) حاکمی و پرنسی (Hermias) ك اولادانی اولان (Pythias) نام قيزله تروج ايتمشدي . (Hermias) ك قتل اولونماسی اوزرينه ارسطو رفيقه سيلاه برابر ميدالی اطه سنه فرار ايتمش و اوراده ايکي سنه ياشامشدر . صوکره ما کدونيا قرالی (فيليب) ك اوغلي جهنکير شهر اسکندر کبيرك صهيبي اولونجه اوکا التحاق ايتش و شا کردی ايله برابر سفر ايدرك اکثر فتوحاتنده حاضر بولونمشدر . اک صوکنده يونانستان خاق کنديسي دينزلکله - يعني او زمان خلق عننده ميجل اولان اصنامه رعایت ايتمه مکله - اتهام ايله نيجه ، مشهور سقراطك عواقب احوالي کوز اوکنه کتيروب دوشونهرک جهلا النده هدر اولادن ايسه آتنه دن فراری اختيار ايتمش و (Chalcis) شهرينه قاچمشدر . بر مدت صوکره اوراده وفات ايلشدر . بو خارق العاده داعی ، زماننك حقيقتاً محيط المعارفی ایدی . هر علم اوزرينه منتظم و مکمل اثرلر يازمش اولدقدن ماعدا ، منطق ، قواعد اساسيه سيلاه تدوين ايتمش ، علم رويی بر حقيقي علم حيثيتيله تعين ايلش ؛ حيوانات کتسابی يازمقله بوتون علوم حياتيه نك تمللريني آتمش ؛ بها حقنده ، (علم احوال جو météorologie) حقنده ايلك دفعه اولارق منتظم و مرتب اثر يازمش ؛ و علی الخصوص الهييات و مابعد الطبيعياتی اويله منتظم و مضبوط بر صورتده ترتيب و تدوين ايتمشدر که ، يقين زمانه قدر فلسفيات اونك چيزديکی دائره خارجه نه چيقه مامش و اونك عين ايتديکي شکلي ده کيشديره . مەمشدی بوکون بيله بو فيلسوفك شخصي و آثاری حقنده انکلتريه و آلمانبا مدققين حکماسی يکی يکی کتابلر يازمقده درلر . رسطونك اخلاق و حکمت سياست حقنده يازدينی اثرلر (مابعد الطبيعياتی کبی) شرقده همان هر مؤلفه مأخذ علم و منبع عرفان اولمشدر .

متضمن اولدوغی معنای آکلایه لم. بزانسانلر، ایچنده بولوندوغمز بوکائنات مادیه یی تشکیل ایدن اشیا یی و بوتون حادثاتی یکان یکان و کافه جزئیاتیه احاطه ایده مه یز. بوکا بالفعل امکان یوقدر؛ چونکه اشیا و حادثات عالم، صاییلماز اولچولمز، او درجه چوقدر وساحه تجزیاتی، بزم احاطه حسیه و ذهنیه مزه قیاساً نامحدوددر. بر شکل ثابت اوزره دخی طورماز، او قدر متحولدر. بوتحولده دخی بدایت نهایت تصور ایده مه یز؛ زیرا - اولجه ده عرض ایتدیکم وجهله - اک اساسلی تجاربمزدن استنباط ایله بیلدیکیمز عقیده قویمه یه مغایردر. یعنی شوآنده وقوعنه بالذات شاهد اولدوغمز تغیراتک بهمه حال تغیرات متقدمه نتیجه سی اولدوغی هر تجربه من اثبات ایدوب طورویورکن و بوکا برتک استثناکوروله مه مش ایکن، تصور ایده مه یزکه بوتحولات، سکون مطلق دن طوغمش بر اثر حرکت اوله بیلسین. (هر حرکتی حصوله کتیرن بر حرکت متقدمه در) دستوری یالکیز اک بو یوک، اک عمومی (معارفه axiome) لردن بری دکلدر؛ اک (عمومی général) واک (یقینی positif) واک (صحیح exact) اولان علمک، (عام میخانیک la mécanique) ک مستند اولدوغی قانون اساسی در.

بویه دوشونورسه ک، [نسلکه بوکون آنجق بویه دوشونمکه مجبورز!]. اوت بویه دوشونورسه ک حادثاتک هانکی نقطه سندن طوتسه ق نامتناهی به قاجارز. بو سلسله حرکت، نه بدایت استقامتمنده طوره بیلیر، نه ده نهایت استقامتمنده! . . .

ینه بوفصلده بوندن اوچ بش صحیفه اول (سبب) بختنده ذهنمزی یورونجه همان ایکنجی خطوه تدقیقه دور و تسلسل کردانه طوتولدوغمزی کوسترمش واونک-باش دوندوروجی اذیتدن قورتولمق ایچون (نامتناهی l'infini) تصویرینه صغینمق مجبوریتنه، نصل اولوبده دوشدوکمزی آکلتمشدم. کورویور- سکیزکه ینه عینی جریانه ذهنمزی قایدیریورمشر. وهانکی نقطه دن باشلایوبده تحول حادثاتی بویه آدیم آدیم فرداً فرداً تحقیق و تبعه قالدیشیرساق بهمه حال جریان تسلسله قابیلهرق عینی کردابه دوشمرز. بو حاله سبب بزم عجزمز، عجز فطرمزدر. اونک ایچوندکرکه بو حادثات نامعدوده عالمنده برجهت وحدت

آرایوب اونی مبدأ اتحاد ایتک واطرافزی احاطه ایدن بونجه غریب شیری
 آجق اومبداله بردرجهیه قدر تعریف ایده بیلیمک ایچون عقلیمزک بر میل فطریسی
 واردر . ایشه بو(میل وحدت) دخی ، طبق هر حادثه یی برسبیه اسناد ایتک
 میلی کبی فلسفه نك اسباب موجبہ سندن بری در .

بوراده دقت ایده جککمز بعض مهم نقطه لر وار : اولادقت ایدرسه کز
 کورورسکمز که ، هر شیئه برسبب آرامق میلی ایله وحدته میل ، عینی شیدره
 سزه براز اول (سبب) بخشنده لزومی قدر آ کلادتمدی که کثرتده آرادیفمز
 مبدأ وحدت ، نه دیمکدر ؟ .. ونه ایچوند ؟ . طبیعتده هرجهته متوجه اولان
 جریان متسلسلک اوجنی بولمق، یعنی یکدیگریسه مضاف اوله رق زنجیرله مه
 کیدن بو اسباب متسلسله نك اصل (سبب کلی la cause universelle) سنی
 یاقالایه بیلیمک، دیمک دگیلدر ؟ .. البته ! ... او حالده بر شیده سبب آرامق،
 (خصوصا بر سبب کلی آرامق) ایله (مبدأ وحدت آرامق) عینی ایشدر . باشقه
 شی دکلدر .

باقیسه چوق زمان (حقیقت، حقیقت !) ده یوب آرادیفمز واوغورنده
 مناقشه لر، مجادله لر، حتی محاربه لر ایتکدن بیله جکینمه دیکمز بو (سبب) ، بو
 (مبدأ وحدت) ، صرف انفسی بر شیدر . یالکمز بزم ذهنمزده طوغمش بر
 فیکردر که عالم خارجیده اونک مقابل حقیقیسی اولاییله جک بر وارلق بولمق
 متمنمدر . بو فیکرک ذهنمزده نه سببیه ونه صورتله تولد ایده بیلیمش اولدوغنی
 دخی کوردوکز و آ کلادیکز که بلا انقطاع اوزایوب یکدیگریسه متصل کیدن
 وحدالغایه سی کورونمه یی بر سلسله وقوعاتک اوجنی بو جاغنی بوله ماییشمزدن
 طولانی بر یرده طوروب دیکلیمک مجبوریتدن طوغمشدر . بوکاده سبب
 عجزمزدر . مع مافیہ (وارلق Pêtre) محققدر . البت برشی وارکه بوتون بو
 تحولات و تجلیاتی حصوله کتیریور . بز بالذات وارلغیزی حس ایدوب طو-
 رورکن (یوقلق) باطل بدیهی در . (سرویلیام هاملتن) بو مسئله یی ملاحظه
 ایدرکن ، بوایکی میل طبیعی نك منشأ لری باشقه اولمقله برابر ، عینی نتیجه ده
 برلشدکرینی سویلیور . صوکره :

« بوايكي ميلك هر ايکيسي ده ، ذهنمك هر هانكي بر قدرت ذاتيه سندن نشأت ايتيور؛ بالعكس عيني عجز ذاتي سندن، عيني قدرتمز لکندن ايلري کليور.»
 ديور؛ و بوني متعاقب کان صحيفه ده ، فلسفه نك کائناتده بالخاصه مبدأ وحدت تحري سندن تولد ايتش بولون دوغنی ادعا ايد بيور؛ وینه اولکي سوز لرینه رجوع ايدرك : « بو خصلت ، ديکريني متضمندر [*] بوني ده ا زياده تصريح ايتك لزومي واردر. بو (ميل وحدت) ذهن بشرک اک بارز صفات کاشفه سندن بری در. قسماً ، ملکات عقليه مرک پلادت و مسکننتدن نشأت ايتمشدر [**].
 ساحه مشاهده مزه معروض بولونان اشيانک کثرتي ايجنده کنديمزي غائب ايد بيور؛ و آنجق اواشاي نامعدوده يي بر طاقم صنفلر اوزره ترتيب ايتمکله.
 درکه طبيعتک نامتاهيلکني، ذهنمك حدود متناهي سنه ارجاع ايد بيليرز. [***]
 ديورکه عجز مزدن منبعث اولان مجبوري کي کوستير .

هاملتن ، طبيعتک شو طاغيق کثرتنه قارشى ، روحمك ، يکپاره انايتي ،
 يعنى (بن = لکني) دخي ذکر ايدرك ، بوانا ايتمك - حيثيت ذاتيه و طبيعیه سی اعتباريه - بالضروره وحدته ميلي ده اخطار ايد بيورکه ذاتاً معروف بر ادعادر.
 بو خصوصده نه سويلنمش ، نه دوشونولش ايسه اولنرک هپسني بوراده
 نقل ايتك احتمالي يوقدر . حتى سزك کي اولا مقدماته محتاج اولان مبتديلر

[*] برآز يوقارده: ايکي سی عيني شيدر؛ ديمش و ديد بکمي تعريف ايتمشدم . سرويليام
 هاملتن ده مختصراً اوني ديمک ايد تيور، يالکرشو فرقله که سبب آراقمده کي ميل طبيعى مزى ،
 وحدته ميلدزدن نشأت ايتش کي کوستريور. بن طن ايدرم، هم قوياً طن ايدرم که
 سببيت فکري اصلدر؛ وحدته ميلمز اوندن نشأت ايتمشدر. بو دعوانک دلائلي (سبب)
 بحث مستقلده عرض و ابراز ايتمشدر؛ کوره چکسکز .

[۰۰] عيناً (inbecilité) لفظي قوللاشمدرکه (پلادت متناهي) تعبير قديمي
 بونک مقابلي در. هاملتنک ار جمله سی بودر : (In part, it originates in the
 imbecility of our faculties.) (مابعد الطبيعيات حقنده فونفرانس لر Lectures
 on metaphysics) نام کتابندن (جلد ۱) .

[**] ايلريده « مبعج حادثات » فصلنده بو مسئله به مثال و برلش و (وتيرة طبيعیه
 procédé naturel) اوزره موجوداتي فصل تصنيف ايتمکده اولدوغمز و نتيجه
 تصنيف (مقولات catégories) ديد بکمز « اجناس عاليه genres supérieurs » به
 فصل پيوسته اولوب قالدېمز کورلشدر .

ایچون لزومی یوقدر . یالکیز بو قدرینی بیلک واونی ده بیلک که بو فرضیاتده
فلسوفلرک اکثریتی متفق درلر .

فلسفه دیدیکمز مشغله نك طبعی اولان اسباب ظهوری ایچون ترتیب
ایدیلن فرضیه لرك الك مشهوری و الك زیاده حقیقه مقرون اولانی ایشته بونلردر .
شیمدی شو نقطه ده براز توقف ایدوب ینه دوشونمه لم ؛ و باقالم که کچن
فصلده کی تعریقات مشهوره دن هانکیسی بو بحثك مضموننه دها ملایم ، دها
موافق دوشیور ! ..

ظن ایدرم که بونی اوزون اوزادی یه دوشونمکه حاجت یوق ! . نتیجه
بجتمزی نظر ملاحظه یه آلوب حکم ایتک کافیدر :

مادام که ذهنمك فطرت ذاتیه سنده - هر نه سبیدن ایسه ! . - وحدته بر
میل جبلی و ضروری وارمش ؛ و فلسفه دیدیکمز دوشونجه لر دخی بزده بو
یوزدن وقوعه کلیورمش ؛ مادام که اطرافزی احاطه ایدن اشیای متنوعه ونا
معدوده یی تفصیلاً و فرداً فرداً ادراک ایتک امکان عادی فوننده ایمش و بالخاصه
بوندن طولایی موجوداتی صنوفه واجناسه تقسیم و اوکا کوره ترتیب ایتکه
مجبور اولویورمشز ؛ او حالده بوتون کائنات حقنده ، هم آهنگ بر (علم اجمالی
connaissance sommaire) حاصل ایدم بیامک فلسفه یایمق دیمک اولویور .
اوایله ایسه سپنسرک تعریفی طوغرودر . « فلسفه توحید علم دیمک در » . بونک
ایچون ده هر کثرته بر جانب وحدت آرامق و قوانین اساسیه (وارکان قیمه
éléments stables) بولمق لازمدر . او حالده ، بزم کاتب چلبی نك تعریفی
[*] تقدیم ایتمه لی: « هر کثرته جانب وحدتن دخول واحاطه کایات ایله ضبط

[*] کچن فصلده سوبیلکه غالباً اونوتدم ؛ بوراده سوبیلیمکه ، کاتب چلبی فلسفی
تعبیرنه ماصدق اوله جق هیچ بر مهم اثر یازمامشدر . بو کوزل تعریفی دخی فلسفه تعریفی
اواسون دیه سوبیلیمه مشدر . کندلی طرز تنبیه آ کلامتی ایچون (میزان الحق) رساله سنده
(دأب فقیر ، هر کثرته جانب وحدتن الخ الخ) دیمشدر ؛ فقط بو طرز پک فیلسوفانه
اولدوغی ایچون ذکر ایتدم . مع مافیه کاتب چلبی عثمانلیلرک الک بویوک (تحریر) =
(érudit) ی در . (کشف الظنون) نامنده کی اثر معتبری خیلی زمان اول لایتنجه یه
ترجه ایدلش (وخواجه خلیفه) نامنی دنیا یه یامشدر .

اصول، ایده بیللمه‌لی که «توحید علم» و بناء علیه فلسفه یا بقی ممکن اولسون؛ کوروپورسکیز که کاتب چلی‌نک تعریفی، سپنسرک کئی عادتاً شرح ایدیور. و ظاهری اسلوب افاده فرقه نظراً اساساً عینی فکر و معنایی متضمندر.

فقط فلسفه‌دن آیرمق مجبوریتده بولوندوغمز (les sciences = علوم) دخی بویه یا پیورمی؟ .. بر علم و ارمی که موضوع بحث ایدیندیکی جمله حادثاتی تفصیلاً و فرداً فرداً تتبع ایتدکه موفق اوله بیللمش بولونسون؟ .. علوم‌ده فلسفه کبی ذهن انسانی‌نک اثر فعالیتی دکلکی؟ ... فلسفه خصوصنده عاجز و مسکین اولان عقل بشر، علم خصوصنده نه‌دن خارق عاده بر قدرته مالک اوله بیللمش؟ نه‌دن جزئیات اموری کافه تفصیلاتیه ادراک ایله بیللمش؟ ... بر نباتات عالمی، دنیاده نه قدر افراد نبات و ارسه جمله‌سنی بالذات تحقیق ایده بیللمشمی در. حتی ایده بیللمی؟ ... ذاتاً او سبیل دکلکی در که بیلدکلرینی بیلله جنس‌لره نوعلره، فصیله‌لره آیریور؛ صوکره هیچ کورمه مش اولدینی بر چیچکی کورونجه، اولجه بیلدیک صنفلردن برینه درج ایدیور؛ ایده مزسه یا لکیز او چیچکله یکی بر صنف ایجاد ایدیور. حکمت، کیمیا ودها سائر علم اربابی - آشاغی یوقاری! - هب بویه یا پیورمی؟ .. آز چوق عمومی قانونلر کشف ایدوب نا محصور اولان حادثات جزئیه‌یی او قانونلره اصنافاً تعریف ایتیمورمی؟ .. اگر فلسفه دخی یا لکیز بونی یا پیورسه علوم ایله فرقی نه اوله بیلیر؟ ...

اوت! .. کاتب چلی‌نک و سپنسرک تعریفاتی تلقی ایتدکدن صوکره شو شیمدیکی ملاحظات مشروعه، بر ضرورت منطقیه‌دن تولد ایدر. و (او حالده علم ایله فلسفه‌نک فرقی نه‌در؟) سوآلی قارشوسنده بولونورز. فصل که بو تعریفلر، بوملاحظات قایلید ایدرک او سوآلی انتاج ایلشدر.

بن بومسئله‌نک، بوراده، سزه آنجق صورت تولدینی کوسترمک ایسته‌دم. بو بابک صوکر فصلنده ده اونی مناقشه ایدوب جوانی ویره جکم. یا لکیز، تعریفاتک برندن دیکرینی فصل استخراج ایتمک ممکن اولدوغنی سزه یاقیندن عرض ایتمک ایچون، پشیناً شو قدر سویله‌یم که، علوم ایله فلسفه‌نک - یا لکیز بونقطه نظر دن! - اصولی، صحیحاً بر در. شو قدر وار که علوم، تقسیم اعمال

ضرورتیله کائناتی قسم قسم آیرمش و هر بری بر قسمی کندیمی ایچون بر ساحه تتبع اتخاذا یلشدر. اوندن طولاییدر که علوم دخی نتیجه تحقیقاتنده بعض قوانین کلیه به بالضرورده پیوسته اولور. فقط اوکلیات ایله کائناتک هیئت، مجموعه سنی تعریف ایتک ممکن اوله ماز؛ اولدوغی فرض ایدلسه بیله، طوغر و اوله ماز. چونکه هر علمک کائناته نظری آنجق برجهتدند و علوم سائر نک جهت نظری اهل ایدر. او سبیلده در که علوم متخصصه نک کائنات حقنده ترتیب ایده بیلدیکی فرضیه لر، اکثریا متناقض دوشر؛ بو پراکنده نظریاتی طولایوب آرده کی تناقضی رفع ایدرک، بویوک و هم آهنگ بر بنای نظریات ترتیب ایده بیلیمک وظیفه سی و معرفی یالکمز فلسفه نک ایشی در. [*]

ایشته بونی آکلادقن صوکرده ارسطونک شومشهور تعریفی ده لایقیله آکلارز :

« فلسفه ، بوتون علومک علمی ؛ بوتون صنعتک صنعی در . » [**]

اوت !.. و سببی ده شیمدی آکلادیق و جهله در .

وقم اولسه و بوابتدائی درس لک تحمیلی اولسه، سزه بالفعل کوستیردم که تعریف لک - اساساً متناقض اولانلرینی بیله - یکدیگر لریله بر نقطه ده تألیف و برینی دیگرندن استخراج ایتک - پک قولای اولماسه بیله! - هر حالده ممکندر. فقط بوقدری کافیدر صانیرم . فلسفه یه دیگر ایکی مهم سبب ده کوستیریاور؛ اولنری ده قیصه جه کوروب کچلم .

ینه فیلسوف لر دییور که، فلسفه نک اصل سببی (حیرت *étonnement*) در؛ آرتق کثرتده مبدأ وحدت آرامق ، هر حادثیه بر سبب دوشونمک کی تمایلات طبعیه مزک جمله سی ، کائنات حضورنده حیرتمزدن نشأت ایتشدر . بو فکری

[*] آلمان فیلسوف شهرری (قانت Kant) ک ایجادی اولان (architectonique) تعبیر نک معنای اصطلاحیسی بودر. (معماری) دیمکدر. قانت فلسفه یی (معماری) افکار) اولق اوزره تلقی ایدیور. سپسر دخی، فلسفه ترکیبیه نامیله وجوده کتیردیکی سلسله آثارک آهنگنه باقوب، نظریات معمارانی ایله افتخار ایدیور فی الحقیقه بواکی فیلسوف دایده بوقابلتک درجه خارق العاده سی کورولور .

[**] *τέχνη τεχνῶν, καὶ ἐπιστήμη ἐπιστημῶν* ارسطو .

ایلك اول بیان ایدن ینه مشهور افلاطوندر ؛ و بوده - شبهه یوق که - مهم بر فکردد. زیرا جانلی مخلوقات، یعنی حیوانات آره سنده (حیوان متحیر) آنجق انساندر. سائر حیوانات عالیه حیرت، قورقودن فرق اولونه ماز. انسان ایچون، قورقو باشقه شی، حیرت باشقه شیدر. احتمالکه بزده حیرت اساساً قورقولی برشبهه دن، یاخود شبهه لی بر قورقودن طوغمشدر. فقط بزه بوحالت روحیه نك بوراده منشائی تحقیق ایتك لازم دكل؛ شو محقق درکه بوکون انسان کائنات حضورنده آز چوق متحیردر. وحیرت، قورقودیمك دکلدر. هرکون عینی صورته کوردوکی شیلره حیرت ایتیمورمش کبی طاوورانیشی، انسانك اونلرله الفت ایتیش اولماسنددر. اونلرك ماهیتنی آ کلامش اولماسندن دکلدر. هیچ کورمدیکی بر حادته نك وقوعی، اونی در حال حیره القا ایدر؛ اکر او حادته ده کندی حیاتی ایچون برتهلکه تصور ویا تخیل ایدرسه، او وقت خوفه دوچار اولور. خلاصه هر حالده (حیرت)، انسانه مخصوص بر حالت روحیه در، و مهمه حال (تعقل ratiocination) دن ایلری کلیر و محاکمات فکریه یه مبدأ حرکت اولور.

بو حالت روحیه نك، فلسفه یه وجود ویره جك قدر. اهمیتی وارمی در؟ .. اوت، واردر!.. هم پك بویوك اهمیتی وار، تعریف ایدیم: هر کس، عجائب حادثاته قارشى آز چوق حیرت ایدر. سحراده، ایلك دفعه اوله رق (سراب mirage) کوردن و بالتحقیق اونك خیال اولدیغنی آ کلایان بر بدوی، شبهه سز مدهش بر صورتده حیرت ایدر. کیجه له یین باطافلقلرده ویا مزارلقلرده متحرک بر نور کوردن بر آدم، البته مدهش بر حیره دوچار اولور. قطب اهلایسی ایچون طلوع شمس قدر عادى و طبیی بر حادته اولان (فجر شمالی aurore boréale) بزم استانبولك آفاق سکونپورنده تجلی ایده جك اولسه، معلومانلی هم شهریلر مزدن ماعدا هرکسی ناخوش بر حیرت استیلا ایلر. [*] را کد و بر آق دریه صوقولان

[*] حتی، بوبله بر حادته - ظن ایدرم برایکی عصر اول - استانبول افاننده تجلی ایتیش و بوتون خلقی خوف و حیره وبعده مدهش بر هیجانه العا ایتشد. پك ایی خاطر مرده قانامش؛ فقط محقق بیلورم که شهر مترك جوامع کبیره سندن برینك اولوسنده وجامع شریفك اولویه ناظر جمله قبوسی جوارنده کی دیرکلردن برینك قاعده سنده معدنی

بر باستونك، صويك سطحه تصادف ايدنر نقطه سنده قيريق كورونم سنى ايلك دفعه مشاهده ايدن بر چوجوق لطيف بر حيرتك تأثير فسونه طوتولور. الى آخره !

اوت ! . . . بو كجي حادثات غريبه حضورنده انسان حيرته دوشر؛ چونكه اونلرى ايلك دفعه اوله رق كورمشدر؛ ايلك دفعه اوله رق كورولن شيلرشدتله دقتى اويانديرير . دقت ، منظومه افكارك زه نبره كنى حركته كتيرير وذهنى محاكاته مجبور ايدر. محاكاتك حدمعنى يوقدر؛ تسلسل ايدم بيلديكى قدر كيدر؛ كيتسكجده مسئلهلر توليد ايدر . تجربه ايله بالفعل تحقيقى ميسر ويا ممكن اولان مسئلهلر، مسائل علميه دندر. تجربه فوقده (يعنى متعال transcendent) اولانلرى، مسائل فلسفيه دندر .

عوامك فيلسوفانه دوشونجهلرى يوق دكلدر؛ حيرتى موجب اولان حادثاتده اسرار خلخته انفاذ نظر ايدم مزده - عيى زمانده - دوشونمكدن ده قورتوله مازسه عجزنى آكلار و معماى خلقت قارشيسنده - حالنجه! - فيلسوف اولوويرير : مثلاً يومورطه نك جانسز اولدوغنى و صكره بر حرارت مطرده تأثيريله يكرمى يكرمى بش كون ظرفنده اوندن بر جانلى پيلىچ چيقديغنى نظر دفته آلنجه ، دوشونور: «هى كيدى قدرت وقوت صاحي ! .. يومورطه به جان ورن اللهم !» ديه رك تفلسف ايدر. حيرتك بو تفلسفه مبدأ اولدوغنى كورورسكز . يالكز شوفر ق واركه عوام، و بو خصوصده اونلردن پك فرقى اولمايانا كثرىت خواص،

چنبرك اوزرنده محوك يازيلر واردر . (فلان تاريخده مغرب جهتدن جو هواده عظيم قيزيلقلىلر پيدا اولمش و بوتون استانبول خلقي حيرت و خنيت استيلا ايتمش و صوكره بعناية الله زائل اولمش بولوندوغنى) نقل ايدبيور . آكلاشيلايدنه كوره فجر شامى حادثاتنه مشابه بر وقعه اولمش و خلق بونى علامت قيامت نظن ايدرك فنا حالده حيرت و تلاش دوشمشدر. حالا بر قوروقلى بيلديرك افق مزده بليرمه - عوام نامى - برفلاكت احتمالى اندیشه سيله - خوف و تلاش دوشورور. حالبوكه مشهور ارضروملى ابراهيم حقى عيى حادثه نى ارضروم آفاقنده ورمش و حادثات طبيعده دن اولدوغنى آكلامش و بر درجه به قدر اسباب نجه ده تعريف ايدرك (ياران صفا ايله سيروتماشا) ايلمش اولدوغنى (معرفتنامه) سنده نقل ايدبيور . ديمك كه استانبولده برابر ابراهيم - قى بولو مامش ! .

الف واستیناس ایتش بولندقلری حادثاتک برینه حیرت ایده منز. آنجق ایلک دفعه اوله رق کوردوکی وماهیتی (بالحدس par intuition) آکلایه مادیفی شینه حیرت ایدر؛ او شی نه قدر بسیط اولورسه اولسون!....

برکویلیه ایلک دفعه اورق بر اوفاق (میقناطیس)، میخادیز عرض ایدیکز؛ او چاتال ده میر پارچه سنک بر ایکنه یی نصل بر آنده جذب وضبط ایتدیکنی کوستریکنز. حیرتندن مبهوت قالیر. [*] حالبوکه یتیشدیردیکی اپیک بوجکنک، اولانقطه کبی برنخم ایکن، بر (سرفه larve) اوله سنی؛ صوکره بویوک بر (طیرطیل chenille) حالنه کچمه سنی، دها صوکره وجودندن افراز ایتدیکنی لزوجی بر ماده ایله صارینوب (قوزه Cocon) ایچنده محبوس قالمه سنی، بر مدت او قوزه ایچنده قالدقن صوکره - فو - العاده غریب - بر شکله (استحاله se transformer) ایدرک (عروس nymphe) حالنه کیرمه سنی، دها صوکره ده او صورتک - یینه فوق العاده عجیب - بر استحاله سی ایله (که له بک Papillon) حالنه کیروب اوچه سنی هیچ موجب حیرت بر کیفیت اولمق اوزره تلقی ایتز؛ چونکه الف ایتش بولوندوغنی برشیدر؛ ارتق مراقنی او یاندیره منز، اونی طبیعی بولور؛ ماهیتی دوشونه منز. حالبوکه میقناطیسیت کبی ساده بر حادثیه نسبتله بر تحمک، سرفه، طیرطیل، عروس و که له بک اوله سی نه خارق العاده، نه مبهم بر معمای خلقتدر! عوامی براقلم ومعدور کوره لم!... نیجه نیجه (اقدیدن آدم لر) واردرکه برحقه بازک یابدیغنی (معرفق لر) ه قارشنی حیرتی کیزله یه منز؛ (کوزی باغلانیر!)... لکن کیفیت رؤیت وادراکک، نه حیرتبخش بر سر اولدوغنی - بر کره اولسون - نظر دفته آلوب دوشونمه مشدر!... دوشونمه مشدر؛ چونکه اونی (بذاتها

[*] بن بونی بعضی کویلولرده بالذات تجربه ایتدم؛ و کیفیت میقناطیسیه ایله (قوزه بوجکی) نك کیفیت استحالاتی آرمسند نه قدر فریق اولدوغنی و بو استحالاتک اوتنه کی حادثه بسیطیه نسبتله نه قدر موجب حیرت بر سر اولدوغنی آکلامق ایسته دم. تلقی ایتدیکم ملاحظاتک خلاصه سی شو اولدی که (ایک بوجکی هب او یله اولور. او یله اولدوغنی هرکس بیلیر.) یعنی یک طبیعی ومعلوم بر کیفیتدر. بناء علیه موجب حیرت برشی دکلدرد، دیمک چیقار.

بدیهی (évidente par elle-même) بر حادثه عادیہ اولیٰ اوزره تلقی ایدر .
 حالبوکه انسانک مکانی ادراک ایدیشی وکوزینی قاپانجه - بر آن ایچنده - قوصقوجه
 برشهرک پانوراماسنی (اولدوغی کبی) ذهنده کوروشی نه قدر آ کلاشیلماز ،
 نه قدر غریب بر جلوۀ فسون در !!! هله براز معلوماتی اولوبده بو ادراکی
 حجیرات دماغیه عطف ایدہ جک قدر تعریف ایدہ بیلیرسه حیرتی یوزقات دها
 آرتار؛ چرنکه یقرو سقوب صفیحه سی اوستنده اقلأ آلتی یوزکره بویوتولدکجه
 کوروله مین او حجیرانه برشهرک منظره سی نصل انتقاش ویا اندراج ایدیور ؟..
 بونی ده حیرت لرله دوشونمہ سی لازمکلیر . [*]

ایشته شو عادی، سهل الادراک مثاللرک مطالعه سندن - حیرت دیدیکمز
 حالت روحیه نک ملاحظات فلسفیه ده نه مهم بررول اوینادیغی کوره بیلیرسکز؛
 بوقدری ده کافیدر . خلاصه و شیمدیلک شونی بیامه کزی تمنی ایدرم که نظر
 عادی ایچون بدیهی اولان هرشی، نظر فیلسوفانه بر (معما énigme) اوله رق
 معروضدر . زیرا فیلسوفلر کیفیاته دکل ، حقیقت اشیا به نظر ایدرلر . و بو
 (سیاق نظر manière de voir) کوره هر بدهات ، پرفسون بر بیلیمجه یی
 متضمن ، بر (مسئله لدنیه question ontologique) یی حاویدر . ایشه بویله
 هر شیده موجب حیرت بر ماهیت مبهمه کوره بیلیمک ، هر شیده (فلسفی
 بر نقطه نظر) کشف ایتیمک دیمکدر . (فلسفه حیرتله باشلار) ده ین افلاطونک،
 نه دیمک ایسته دیکنی آرتق لایقیله آ کلامش سکزدر ، صانیم . لکن ظن
 ایتیمه سکزکه، انسانلرک اوتہ دنبری حیرتنی دعوت ایدن مستثنا حادثات غریبه،
 یالکز مادیات عالنده مشاهده اولونه کلشدر . خیر !! معنویات عالنده ده دفعات
 ایله جلوہ کر اولان بعض مستثنا وقوعات ، اک وحشی ، اک اسکی زمانلردنبری
 پک زیاده حیرتی موجب اولمش و ذهن بشری دوشونمکه مجبور ایلشدر .

[*] (مبحث علم épistémologie) مسائل غامضه سندن بری ده بودر . و بو دورلو
 دوشونمک مجبورتنی زمان ایله مکانک مستقلاً موجودیتی ادعاسنی ردونفی ایدر . بومسئله به
 تعلق ایدن فرضیاتی بالآخره مناقشه ایدہ جکز و کوره جکز که اشکال و مناظر خارجیه نک
 ذهنده انعکاسی ، یاخود انتقاشی و یاخود اندراجی حقنده کی فرضیه لر هپ یا کلشدر .
 چونکه پسقولوژی نک بوبابده کی نظریاتیلہ غیر قابل تألیفدر .

(علم انسان anthropologie)، (علم اقوام ethnographie) و (علوم اجتماعیه sciences sociales) علماسنک بو مسئله حقنډه کی تدقیقاتی، بعض نظریات علمیہ تولید ایتشدرد که مشهوردر. بو نظریاته کوره (فکر الوهیت l'idée de Dieu)، (آخرت la vie future) بقای روح (l'immortalité) و (بعث بعدالموت resurrection)، یعنی تولد کدن سوکره تکرار دیریلک کبی عالم انسانیتده اکثریت خلقک حقیقت اولمق اوزره قبول ایتش بولوندوغی عقائد قومیه نک، وجدان عمومی ده تولدی ایله، (رؤیا le rêve) [*] کورمک کیفیت، صیقی صیقیه مربوط وعلاقه داردر. بو تعداد ایتدیکم علومک مدققین متخصصینی ادعا ایدیورلرکه اک وحشی انسانلرک بیله رؤیا کوردکلری برامر واقعدر؛ ورؤیا دیدیکمز بوحالت غریبه نک موجب اولدوغی حیرت، الک قوم و الک قدیم عقائد انسانیه نک تولد و تکمیلنده ذی مدخل بولونمشدر. برلین دارالفنونی فلسفه معلمی (فریدریخ پائولسن Friedrich Paulsen) (فلسفه یه مدخل) اولمق اوزره یازدینی کوزل بر اثرده بونقطه یه جلب دقت ایدرک پک واضح برلسان ایله موضوع بحثی ایضاح ایدیور. روح حقنډه انسانیتک اعتقادی ایله حادثه موتک رابطه سنی واونکده رؤیا ایله مناسبتی او قدر صراحتله ابراز ایدیورکه او سوزلری عیناً بورایه نقل ایتکدن کندیمی آله مادم :

«روحک، یالکر برقوت، یاخود برکیفیت، برخاصیت اولمایوب بدنن آیری و مستقل برجوهر اولماسی، بروقه مهمه دن دخی استدلال اولونمشدر. اویله بر وقعه که ابتدائی انسانلرک فکرینه درین بر تأثیر اجرا ایتکدن خالی قالمامشدر؛ اوده (حادثه موت) در. تولوم واقع اولور اولماز، وجود بشر،

[*] رؤیانک ملاحظه ماهیتندن تولد ایدن مسائل مابعدالطبیعیه ایله بالخاصه (فلسفه روحیه philosophie spiritualiste) نک وهله (سپیریتیزم spiritisme) ک نه قدر صمیمی و اساسی بر علاقہ سی اولدوغی کورمک و تسلیم و اذعان ایتک ایچون (فلسفه تصوف Théosophie = philosophie mystique) یه واقف اولملی در. بزده شیخ اکبر محی الدین عربی نک (فتوحات) و محاضرات (نامنده کی جسم اثرلرنده بو دعوایه نا معدود و مهم مثالر بولونور.

جائسز جسملردن (یعنی جماداتدن!) کندیسنی تمیز ایدن خاصیتی ضایع ایدیور. حسسز وحرکتسز قالیوریور! نصل اولویورده بویله بردنبره جاد درکهنه دوشووریور؟! تولوم ایله نه اولویور؟! نه وقوعه کلیور؟! بدن، بوندن بردقیقه اول نه ایدی ایسه ینه اولیه قالیور؛ خارجاً اکیسلمبور؛ تبدل ایتمش بولونمبور؛ یالکیز حرکتیه قابیلتنی ضایع ایتمش اولویور. بناء علیه شو حاله نظراً واقع اوله جق استدالات صریحه شو اوله بیلیرکه، بدنی تحریک ایدن شی (که روحدر!) اوننی ترک ایتمش دیمکدر. اولیه ایسه روح غیر جسمانی برشی در؛ اگر اولیه اولمسه بدی (جسمانی اولسه بدی!) بز، اونک قاجوب کیتدیکنی کورم بیایردک! دیمک که روح بر جوهر مستقلدر. اونک جسمدن آیرماسی و وارلغنده دوامی بونی اثبات ایدر. فی الحقیقه بوتون اقوام و مللک تجربه سی، روحک، تولومدن صوکره محو اولمیه رق دائم و باقی قالدیغنه دائر، انسانلرده عمومی و مشترک بر اعتقاد قویمه وجود ویرمشد. او تکرار تجلی ایده بیایر (میدانه چیقه بیلیر!) و فعالیتده بولونه بیلیر. [ایشته انسانیتک اک اول حادثه موت اوزرینه واقع اولان تجاربندن استدلال ایده بیلدیکی فکرلر بودر.] آنتروپولوژی علمی هر یرده (پرستش اجداد) اعتقادیکنک و عادتکنک دلائل و اماراتی کشف ایدیور. بومارهلر، بوندن اول ارتحال ایدن روحک بقا و دوامنه قویاً اعتقاد ایدلیدیکنی اثبات ایدر بر علامت قطعیه در. موجود اولمایان برشی ایچون کیمسه راحتنی بوزمازدی. [یعنی اوکا احتفالات یا پیماز؛ آره صره اوندن استمداد ایچون دعا ایتمز؛ حاصلی اونک محبت و توجهنی قازانمق ایچون تقیداتده بولونمازدی. اسکی مصریلرک موتالری مومیا حالنده محافظه ایتهلری، روحک عودتنه اعتقاد ایتدکارینی کوستیر. عودت ایدن روح بالخاصه کندی بدنی بولوبده تکرار اوکا کیرسین، یا کلشلقله و یا خود سوق ضرورتله بر حیوان بدننه کیرمکه مجبور اولماسین دیه اجسادی تفسخدن، چورویوب محو اولمقدن محافظه ایدرلردی. کذلک برچوق قبائل وحشیه موتانک مزارینه سلاحلرینی تزیناته عائد اشیاسنی، حتی ییه جکنی، ایچه جکنی ده قویوب براقبورلر. بوتون بوتقیدات، اثبات ایدیورکه روحک اوجسمی، آنجق موقتاً بر اقوب کیتدیکنه

ویوق اولمادیغنه قویاً اعتقادلری واردر . اولماسیدی ، بو زحمتلری یوق یره اختیار ایتمزلردی . دیمک ایستیور . [*] « معافیہ بواءتقاد ، مدنیتک صفحات ابتدائیه سنده دخی عینی صورت اوزره کورولویور . روحک بدنن موقتاً افتراقی ، حتی حیاتک دوامی حالنده بیله موقتاً آریله بیلمه سی اعتقادی عمومی در . اویقو ائناسنده وجود ، حرکتسز یاتیور ؛ فقط روح ، عاقل دکل ینه فعال بولونویور : کورویور ؛ ایشیدیور ؛ حس ایدیور . حتی بعض زمانلر اولو-یورکه حیرتفزا بعض حالات حقنده تجربه لر یاپیور . یعنی رؤیا کورویور ! .. بز بوکون اوپله دیرز ! فقط انسانیتک ابتدائی اولان ذهنی ، بوکیفیت رؤیایی باشقه درلو تفسیر وتعبیر ایدیور : روح ، اویقو زماننده ، وجودی برمدت ترک ایدوب کندی کندینه سیاحت چیقور ، وبوسایه ده - بزم رؤیا دیدیکمز - عجائب شیلری کورویور وتجربه ایدیورکه اونلر خیالات دکل ، محض حقیقتدر . ایشته ابتدائی برذهن هر زمان بویله دوشونه کلشدر !، الح ! الح ! . [**] رؤیایک (مابعدالطبیعیات عالنه آچیلمش برینجره) مثابه سنده اولدوغی بیله ادعا ایدلمشدر . خلاصه بونظریات علمیه نک قیمت ذاتیه سی نه اولورسه اولسون ، اونلردن شو حقیقتی استنباط ایدیورزکه ، رؤیادن نشأت ایدن حیرت ، انسانی - ادوار وحشتدن بری - بعض مهم مسائل مبهمیه ارشاد ایتش ونظر دقتنی کائنات مادیه دن - آره صره - چویره دک عالم مغنویاته توجیه ایلشدر . ذهن بشر ، حیات ومماته ، دنیا وآخرته متعلق اولان مسائلی ، آنحق بو وجهه استقامتنده کشف ایده بیامشدر . بو مسائلک جمله سی ده - مسائل مابعدالطبیعه نوعندن در ؛ یعنی بالخاصه فلسفه مسائلندندر . حتی اولوم اندیشه سی وتولومک

[*] بو [] اشارتلر ایچنده کی سوزلری بن علاوه ایتدم . پاؤلوسه نک ، آنتروپولوژی علمنده هانکی نقطه لره اشارت ایتدیکنی ایضاح ایلک ایسته دم .

[**] تصوف ده (عالم مثال) واردر . . او عالم معنوی ده (جابلسا) و (جابلقا) نامیله ایکی شهر واردر (رؤیا) دیدیکمز حادثه ، روحک بو شهرلره سیاحت ایدوب اوپرالرده بعض عجائب سیر ایتمه سی در .

حقیقی ، (غرائب رؤیا) ایله اساساً علاقه داردر . [*] حقیقت حیاتی بيله رؤیا به تشبیه ایله تعریف ایدن فیلسوفلر پک چوقدر . بوتون صوفیه نك اعتقادی بودر . فقط بو خصوصده صوفیه ایله متفق الرأی اولان وهیچ حکمت تصوفه میل وعلاقه سی بولونمایان ایده آلیست فیلسوفلرده یوق دکادر . مثلاً (شوپنهاووه Arthur Shopenhauer) و (فوئه رباخ Ludwig Andreas Fuerbach) کبی ، معاصرینمزدن ایکی بویوک متفکر : (حیات رؤیادار !) دیمشدر . حتی ایکنجیسی ده ایلری کیدرک (بز رؤیا ایچنده رؤیا کوروپورز !) دیه بيلمشدر .

بوندن تقریباً آتی بحق عصر اول قونیده معمر اولان عارف حکیم وشاعر ملهم (مولانا جلال الدین رومی) : منویسنده : (عالم هستی میر ملهم نامت [*])
ضمناً برادر که آمد خردقا نمست ! (**) دیمشدی . بزم اک بویوک شاعریمز عبدالحق حامد پک دخی :

(بیلیم کوردرکنی خراب خراب ایچنره کشی ؟)

(بنم مهرانه کی عالم بوطا مطابره در !) [***]

دیه رک آلمان متفکرنی (فوئه رباخ) ک سوزلرینی عیناً تکرار ایتش اولویور . واقعا (بو عالم بر رؤیادر) دیمکله مطلق اولیه اولماسی لازمکلمز ؛ لکن بو

[*] معاصرین علمادن (تهدوود ، ب . طایلار Edward B. Tylor) اون طوقوزنجی عصرک نافذ النظر مدققیندن در . بوذات (مدنیت ابتدائیه la civilisation primitive) نامیه ایکی بویوک جلد اثر یازمش وعادتا بریکی علم شعبه سی آچمشدر . او ائرده بوتون انسانیتک عقاید ابتدائیه سی ، اصول علمیه به توفیقاً تبیع ایتش ، اقوام وقبائل وحشیه نك خرافات واعتقاداتی بربرلرینه قیاساً مطالعه ایش و بوندن بر چوق معنا چیقارمشدر . خصوصاً (رؤیا) نك (animisme) اعتقادیله بونک بکونکی عقاید مؤسسهدن بظلمرله نه صیتی مناسباتی اولدیغی ابراز ایتمشدر . دقتله مطالعه سی توصیه ایدرم . بو کتاب نوعی شخصه منحصر بر اثر معتبردر ، وهر مدنی لسانه اهمیتله ترجمه اولونمشدر .

[**] معناسی : (بو وارلق عالمی ، رؤیا کورن برکیمسه نك رؤیاسی کبی در . اویقوده بولونان آدم ظن ایدرکه ، او رؤیا کندی کندینه قائم برعالمدر .) دیمک اولور .
[***] (تولو) نامنده کی رساله نك هان ایلک صحیفه سندن آلمش بریتندر .

سوزلر اثبات ایدیورکه عینی دینه ، عینی جماعته ، عینی دور مدنیته منسوب اولمایان وبربرینی طائمانیان بو بویوک آدملرک ، عینی مسئله مهمه حقننده عینی صورتله بیان فکر ایتمه سی، کیفیتی عینی نقطه نظر دن تلقی و محاکمه ایدیشلرندندر. ایشته، بزی جستجوی حقیقته مجبور ایدن (حال حیرت) که نه مهم بر سائقه تفکر اولدوغنی آکلایورسکزر. معلوماتکز و تحقیقات شخصیه کز ارتدجدها ایی آکلایه جقسکزر و تسلیم واذعان ایده جکسکزر که (یقینیات) دن عدایتدیکمز معلومات صحیحه و نایته نك اساس استنادینی تشکیل ایدن ارکان اعتقادیه دخی - حد ذاتنده - ذهنی متحیر ایده جک ماهیته در؛ زیرا جمله سی (متعارفه قیلندن - axiomatic) در و (ایکی کره ایکی درت ایدر) جهسنه اولری اثبات ایتک ممکن اوله میور .

بالجمله موجودات حقنده کی علممزرک نقاط استادی بویله اولونجه، کائنات ، هیئت مجموعه سیله - ذهنی متفکر ایچون - صحیحاً موجب حیرت بر معمای مغلقدر. فیلسوفانه دوشونجه لره میل واستعدادیله ممتاز اولان بویوک شاعر لر مزدن مرحوم ضیا پاشا، کائنات حضورنده درین درین دوشونمش اولمالی که :

«بیوته در مواملی کرداب هیرنه»
 «بر بورد که هاصلی بو بحر بیکرانه»
 «بجانه من نمیر فی صنفه العقول...»
 «بجانه من بقمر نه یعجز العقول...»

دیهرک ادیبانه اعتراف عجز ایتش وبر حقیقتی ، علوی بر اسلوب ایله ادا ایلیه بیلیمشدر .

کذلک عبدالحق حامدبک دخی:

«فتره، ظنره و بورد، حکمتک آری: هیرت...»
 «صورکنده چونکه، او معنا بیقرار بو صورته...» [۱۰]

(۱۰) عبدالحق حامدبکک ملاحظه سنده شایان تنقید ، شو نقطه وارکه ، فنون ، یعنی

دییور. ادبیات فارسیه ایله الفتکز اولسه یدی بوکی ملاحظات فلسفیه نك
 اك فسونكار ادالرینی، ایرانك الهامپور شعراسنده کورور و بیك بر درلو
 جلوه سیله کورور دیکز. ایران صوفیه سنك بو خصوصده وجوده کتیر مش
 اولدوغنی پاکیزه اشعارك نظیریخی اوروپا ادبیات حاضره سنده بن کوره مدم.
 اشارتاً عرض ایتکده اولدوغم شو مختصر مثاللردن آکلار سنكزه
 افلی طونك (حیرت) حقنده کی ملاحظه سی، بوتون انسانیت متفکره نك مال موروثی
 صره سنه کچمش وعقاید اساسیه دن بری اولمشدر. بو حکیمك دیگر قیسه تعریفنه،
 یعنی (ئولوم دوشونجه سی) ترکینه کنجه، ظن ایده رم که بر جهان افکار استیعاب
 ایده جك قدر جامع الکلم اولان بویکی سوزك درین معنای حکمتی، عبدالحق
 حامد بکدن ایی تفسیر ایدن بر کیمسه اولما مشدر. وارسه ده بن - بونجه تحقیقاً تمه
 رغماً - بوله مادم. دهاسنده شبهه من اولمایان حامدك ملاحظات فیلسوفانه سی
 فی الحقیقه منحصر آئولوم دوشونجه سندن طوغمشدر. (ئولو) و (مقبر) که اعتقادجه
 هم شاعرك هم تورك، ادبیاتنك اك مستقنا واك قیمتدار ایکی اثر بدیعیدر - بوتون
 بر فلسفه یی ناطقدیر. یالکز قیسه قیسه دستورلر شکنده وارد اولان ملاحظات
 حکیمانه، او اثرلرده پراکنده بر صورتده بولوندوغنی ایچون سلسله ارتباطی
 هر کس کوره من. بن بالاتزام تدقیقاته قویولدم، و بو سلسله افکاری تعیین ایتدم.
 نتیجه ده فلسفه حاضره نك باشلیجه ارکانی بولدم. [*] اونی سزه مثال اوله رق

(علوم، ظنون یعنی (فرضیات) دن عبارت دکلدیر، و فرضیات قسمی علوم ثابتنه دن
 صایلماز. نه کیم حکمتك آدی دکل، حدودی حیرتدر! . . ضیا پاشا نك سوزلری
 دها طوعرو ودها کوزلدر.

(*) بوتدقیقاتی برایکی سنه اول ایسته دیکم کی یاپدم و بو موقعیتدن پك ممنون اولدم
 بکا، برجاعت علمیه بروطفه حواله ایتشدی. (عثمانلی تاریخ ادبیاتی) نامیله بش بوپوك
 جلد یازان و عمرینی بو اوغورده صرف ایدن انکلز مستشرق مشهوری (جون الیاس،
 وویلیکینسن گیب John El. W. Gibb) بومهم اثری اکماله موفق اوله دن قضا را
 وفات ایتش والتنبی جلدینی یازوب اثری آتام اتمك خدمتی (کمبریج) ده بکا تفویض
 ایدلشدی. ایشته او التنبی جلدده حامد دن لایقیله بحث ایتدم، وئولو ایله مقبر حقنده
 آبریمه تنقیدات و تحلیله کبریمه رك بوشاعرك نه درین برمتفکر اولدوغنی دلایل صریحه.
 سیله کوستردم. واقعا اثرلرندن النقاط ایتدیکم اوکوزل مصراعلری - که اکثراً بر

عرض ایده جکم. چونکه حامد، بوتون مابعدالطبیعیات مسائلی مزارقوسندن تدقیق ایدیور. نصل اولوبده، ثولوم اندیشه سندن منتظم برسوری ملاحظات فلسفیه تولد ایده بیلدیکنه - ظنمجه - اگ بلیغ، اگ عالی بر نمونه کوستیریور. بویله برشاعری بوراده استشهاداً ذکر ایتک فلسفه بحی خارجنه چیقمق صایلماز بو بویوک آدمی مملکتمز حقیله طانیامشدر. او، (مولانا) کبی، (که ته Gøthe) کبی هم بویوک بر شاعر همده درین بر متفکر در. کرچه اصولی دأره سنده بر تربیه فلسفیه کورمه مش و فلسفیاته دأثر اثر یازما مش سده، یالکز ذهن فیاضک الهامیله، اگ مدهش شبهلری، اگ مبهم حقیقتلری، بللور کبی صاف و واضح برر دستور شکنده عرض ایده بیلمشدر. اونلری بن ایسته دیکم کبی ترتیب ایده جکم و کوره جکسکز که پک طوغرو بر فلسفه تعین ایده جکدر.

حامدک فلسفه سی، هندقدیمک (وه دانتا Vedantas)، (پورانا Pouranas) و (اوپانیشاد upanishads) نامیله مشهور اولان آثار مخلده سنده کورولن (سوژه قتیوزم subjectivisme) شکنده در، وشوپنهاؤوهرک تعبیرنجه (دراماتیق dramatique) یعنی صرف حسی و ذی حیات بر صورتده جلوه نمون اولمشدر. بوفلسفه یا کلش دکدر. بوتون ملل متمدنه اولا قبا و سطحی بر (ماتریالیزم) دن باشلایه رق دونه طولاشه بونیجه یه پیوسته اولمشدر؛ نته کیم زمانزک (ایده آلزم) ی - اصول اعتباریله بوسبوتون باشقه حتی اسکی زمانه ضد یولدن کیتدیکی حالده - نهایت عینی نتیجه یه واصل اولمشدر.

حامد، اولاً مطلق بر وارلغه اینانیور. اوندن هیچ شبهه ایتیور:

«نه شبهه؟ اول رآضر رهبر و مطمن در،»

«اوقررررر عالمی انسانه کتاب شکنده ...»

دستور حکمتدر - ایسته دیکم کبی ترتیب ایدرک حامدک فلسفه سنه بر صورت و بر دم، فقط ظن اولونماسین که بم افاضه ایتدیکم بوصورت، افکارک ترتیبات منطقیه سنه ده موافق اولقله حقیقه ده ائی در. خیر! حامدک پراکنده افاده سی ده جانی در. چونکه او، بودستورلری منطق دلالیله دکل، حسیات الیه سنک شدتیله و محض الهام قوتیله بولش و فریاد شکنده اظهار ایتمشدر.

دییور . فقط حادثات عالمده هر شیئك دوامسر ومتغیر اولدوغنی وبو
تغیرات بی نهایتك بردور دائم اوزره جریان ایتكده بولوندوغنی - بزم ایچون
بك مهم بر کیفیت اولمق اوزره - تلقی ومشاهده ایدیور :

« بر شیده درام یوقنی یارب ؟! »
« هر شیده ندر بردور دائم ؟! »

دیه سورویور ؛ و ، دوشونویور . زیرا تغیر ، یوقنی دكل ، ینه بر وارانی
اثبات ایدر . اولا برشی اولمالی كه اوشی تغیر ایدم بیلسین . (هیچ) لكده تغیر ،
تصور اولونه ماز . او حالدہ : « بوكون هیچ برشی ثبات ایتدورسه ، البته شو
جایلله حادثات ینه بر (شی) در . مكونات هب یالان ، هب خیال اولسه بیلله
تولومه نسبتله ینه حیات ، (یعنی ادراك قابلیتی!) برشیدر . ایدم نسبتله ده (مات)
برشیدر . هایدی بوتون بوشیلره بر (مسبب) دوشونمیهلم . سبب یوقدر دیهلم !..
لكن البته كندی كندینه دخی شو كائنات برشی در . مادام كه بز اونك ایچنده بز .
زده برشیز ؛ بوسبوتون هیچ دكلز ! » دیه ملاحظه ایدیور . ایشته بو بیتلر
او دوشونجهلری ناطقدور .

« قیلمازسه بوكونه ثبات ، برشی ، »
« اولمازمی بومادانات ، برشی ؟! »
« فلازسه سحر ، خیال ایدم سبب ، »
« انجم صابیلیرسه صفر درجهب ، »
« نسبت تولومه ، حیات برشی !... »
« نسبت ایدم ، مات ، برشی !... »
« برشی بوغیسه بولم مسبب ، »
« البته بولم نانات برشی !!! »

او حالدہ بوتون بوتونحوالاتك ، بر حقیقت مطلقه وقیمه یه دال اولان بو حادثاتك ،
بر نقطه استنادی اولمق لازمكلیر . اوندر ؟!

حامد بوسواله طبق (ده قارت) کېې جواب وړيږي. (قسطاس حقيقت
critérium de la vérité) اولمق اوزره عالم خارجي، کائنات ماديې کوسترميور.

« دجهانده در اک بويوک حقيقت !... »

« هې. اوڼده بويوک ، کويوک حقيقت !... »

ديه برحکم وړيږي که پک مصيب در و (سوبزه قتيويزم) فلسفه سنک يکانه
مبدأ اعتقادي ، واک متين زمين استنادی بودر. دنيا ناک اک بويوک فيلسوفلری
بوفکرده بولونمشلدر . زمانمز فلسفه سي ده بواعتقاده مستنددر .

بوفکرې برمبدأ اولمق اوزره قبول ايدنجه (علم بشرک اضافي) اولدوغنی
تسليم ايتمه مک ممکن دکلدر. حامد بالضروره بوني تسليم ايدييور و (آغوستي سينم
agnosticisme) ک دستورخي وړيږي :

« بيليرمي کوردرکني خواب خواب ايځنده کشي ؟ . »

« بنم مېړانده کی عالم بولا مطابقر . »

« بازيو خبير دکل ، بونده ، برهقيقت دل ، »

« اکريم کوردرکني سربسر مطابقر . »

« آني تجسس دار بزه انچه استغراق ، »

« دممم که کترفي شيتک بوغفل ، فارقدر . »

« کورده بيلمه مکي آکلده دبرم محضا ، »

« فقط دممم : بشرک شونده علمي لايقر . »

بوکوزل سوزلرک معناسني - بيليرسکزکه - مشهور (سقراط socrates)
اوج کله ايله بيان ايتمش (بيلدم که هيچ بيلميورمشم εἶδα οὐδὲν εἶδα)
ديمشدی .

قوجه عمر خيام بو اعتقادي بر رباعي سنده ، کندينه خاص اولان ، او
ظريف ، کنايه لي ادا ايله عرض ايدييور :

« آناه که صاحب فضل و آداب شدند ، »
 « در مجلس عرفانه ، شمع اصحاب شدند ، »
 « ره ، زین شب تاریک ، نبردند برده : »
 « گفتند فغانی در غراب شدند !... » [٩]

حالم اسلامك مدار افتخاری اولان فیلسوفلردن (فخرالدین رازی) دخی
 برکوزل رباعی ایله عینی صورتده اعتراف عجز ایدیور :

« هرگز دل من ز علم محروم نشد ، »
 « کم مانده ز اسرار که مفروم نشد ! »
 « هفتاد و دو سال فکر کردم شب و روز : »
 « معلوم شد که هیچ معلوم نشد !... » الی آخره ... [١٠]

حامد بو نتیجه پیوسته اولونجه حالات وجدانیك منشائی دوشونویور
 وعینی کریوه عجزه دوشویور :

« ندونه کلیدر غموم ؟... بیلمم !... »
 « ندونه قیلیدر هجرم ؟... بیلمم !... »

(*) معنای : اوکیسه لره آداب و فضیلت صاحبی ایدیلر و بو حیثیته عرفان مجلسنده
 دوستلری تنویر ایدن شمع ، یعنی موم کی ایدیلر ، بو قارا کلق کیجه دن (یعنی بومعمای
 وجوددن !) یول بولوبده خارجه چیه مدیلر . (یعنی اونی حل ایدمه مدیلر !) مصال
 سولیوب اویقویه واردیلر . (یعنی بوخصوصده بعض فرضیات بیان ایدوب وفات
 ایدیلر !) دیکدر .

[١١] بو بووک فیلسوف ، طبایته مشهور اولان (ابوبکر رازی) دکدر . بو بالخاصه
 فیلسوف ایدی . سوزلرینک معنای شودر : « بنم روح اصلا علمدن محروم اولمادی .
 بنم نظرمد آکلاشیامادق اسرار پک آز قالدی . یتش ایکی سنه کیجه کوندوز دوشوندم .
 نهایت شو معلوم اولدی که هنوز هیچ برشی نجه معلوم اوله مامشدر . » بو سوزلر
 سنراطک اوج کله سنک عیناً تفسیریدر .

« آنار غضب کور رب سعادہ ،
 « نینر طورور الہم دعاہ .
 « رؤبا کورہ مم ، نجوم بیلہم !
 « دیادہ زور لزوم ؟ بیلہم !...
 « دیکار بری قاقارم ہواہ ؟
 « ہر سودہ علی الہوم : بیلہم !... »

شاعر، بوندن صوکرہ شہیہ دوشویور؛ دیمک کہ بنم (یار) دیدیکم ذہنمدہ
 بر (فکر) دن عبارت ایمش !... دیمک کہ قارشیمدہ کی کولککین بن (وار) ظن
 ایدیورمشم !... دیور :

« زہنمدہ کی فکری بلددم ، یار !
 « قارشیمدہ ظلی آکلادم ، وار ! »

[اوہلہ ایسہ بز، نامتناہی بردریای فسون ایچندہ یوزر برر غریب خیالتزا
 بو عالم بر حقیقت اولسہ بیلہ ، برسہ پردہ حقیقتدر . طوغوب ٹولنلر، اورادہ
 بر آن اوینایوب کیدن خیالتلردر !] دیہ تأمل ایدیور . بو فکری - کندی
 خواجہ سی - فیلسوف تحسین افندی حقندہ یازدینی بر حکیمانہ مرثیہ دہ حامد،
 صراحتاً بیان ایتمشدرد . مرحومدن بحث ایدرکن :

« بحر بی انہرای مہلقتدہ ،
 « برسہ پردہ حقیقتدہ ،
 « بر خیالتدر . اوینامسہ ، کیتمسہ !...
 « ایلہسہ قہقہہ بیلہ وارہلہ !... »

آ کلاشیلورکہ، حامدک اعتقادنجہ حقیقت عالم، ہر دم متغیر بر کولککدن،
 (محی الدین بن عربی) نک تعبیرنجہ بر (وجود ظلی) دن عبارت قالنجہ ، حقیقت
 حیات دخی (فجیع ومضحک tragi-comique) بر موقت اویون اولویور .

اويله ايسه بر حقيقت مطلقه يوق؛ حقيقت بزم (عندی) اولان تقدیرمزه
 کورده در . بناءً عليه بزم خلیامن نه ايسه بزم ایچون حقيقت ده اودر ؛ حامد :
 « فیاضمزه ، فیاضمزه حقیقتمه »
 دیمکه بو اعتقادك دستوری ویریور .

لكن حامد بو قدرله قناعت ایدوبده وجداتی صوصدیره میور . بویه حقیقته
 اینانمیور :

« بروه بن برنحوله طایانمام ... »

« بن برویه حقیقته اینانمام ... »

دیهرک فریاد ایدیور؛ حتی فنا حالده شبهه دوشویور؛ هم اولجه حاصل ایتیش
 اولدینی اعتقادی ییقوب زیر وزیر ایدمک ملاحظه لرده بولونیور .

« عالم ، دیررز ؛ فیاضمه هب !... »

« کور دکلمز ظالممه هب !... »

« نعبیر دیکمه هبسی همیک ! »

« همیک ايسه هبسی در ؛ کنزلك ! »

صوکرده اسکي (احتماليون Probabilistes) دن (قارنه آدهس Carnéades)
 وامثالی کی حکم ویریور . اینیله کوتی ، یالانله کرچک یکدیگرینه پک بکزر .
 فرق اولونه ماز . دییور

« برور بو ؛ شهبه نیکمه یک ! »

« سیاهه کی ، بیلر مظه بیلرک »

« فرداشلرده زیاده بکزر »

« یکمیکمینه بالانله کرچک . »

[اويله ايسه هرشی ثولیور وئولسکه دوام ایدمک . هرشی پیدا اولوب
 همان محو اوله جق . دیمک که مشهور (ههراقیت Héraclites) ك دیدیکی

کجی: (هرشی آقوب کیدیور؛ هیچ برشی قالمیور *Πάντα γελ καὶ οὐδέν* *μὲνη*). لکن اصل مایه وجود محو اولیورمش؛ فقط بوندن نه چیقار؟!.. انسانلر ایچون ملتزم اولان شی اودکل، شخصیت و صورت حیات در. کاشکه بوظواهر بو حادثات باقی اولهیدی. جانان تولمزدی. [دیه دوشونویور:

« باقی، بوظواهر اولاییری! »

« مهنانه بظواهر اولاییری!.. »

مادامکه او یله اولمیور. هرشی تحوله یعنی تولومه محکومدر؛ او یله ایسه بوهیچلک برحقه دلالت ایدر. هر حالده حقیقت تولومدر.

« برهیچ که مغه دالیر هب؛ »

« بر قدرت ذرا لولیر هب. »

« هر مالد مرمر حقیقت، »

« امرال بشر ار مالد هب!.. »

او یله ایسه (مقبر) حقایقک صوکی در؛ شاهقه سیدر. اوده خالقک برسر غریبی در. او آ کلاشیلماز. ای بدبخت انسان!.. سنک، جهانده لایقک بو!.. شانک بو!..

« مقبر!.. صوکی در دقایقک بو!.. »

« برسر غریبی خالقک بو!.. »

« بر نور که میل اینجه خوار، »

« اینمکرده شو بر یغین تراب. »

« اک بو کسکی در شوالهقک بو!.. »

« اک مرهشیر-مقایقک بو!.. »

« بدبخت!.. ار حقیقت آ کلاشیلماز؛ »

« شانک بو مهنانه، لایقک بو!.. »

دیمک که بر (سر) وار؛ و (سر) دیمک (یوقلق) دیمک دکل!..

« بر سر که کور و لایبر نشاند »
 « بر نور که فرقی بوی در ماند »
 « بر سر که - برین - عمیم بر سر »
 « لکن دیند - عمریم بر سر ! »

اولیه ایسه بر قدرت مطلقه وار !.. هر آن غیر منقسمه بلا انقطاع واقع اولان شو تحولات متسلسله ، فصل اولویورده بزه (فکر ابدیت) نشسته ویریور؟.. اگر بر قدرت اولدینی محقق ایسه بهمه حال ابدیت دخی محققدر . یالکنر خیالدن عبارت اوله ماز . او حالده :

« بر باشقه حیات مستدلدر . »
 « محو اولماز او روح متقلدر . »
 « بر سر محیط و مستقلدر . »
 « بر امر محال و محتملدر . »
 « اول سری بیان او ذات در که ، »
 « اسرارینه ذاتی مشتملدر . »

ایشته (سرالاسرار) اولان بو (ذات مستقله) ، وجود مطلقدر . الله دیدیکمز بهمه حال اودر .

« نیچون حیاته ویرسین زوال فکر مزك ، »
 « ویرن بوکون ابدیت جهانده بر آنه ؟؟ .. »

بناءً علیه :

« لیلال ایچنده خیالانه بکزه سه مده ، بنی »
 « ازاله ایله جک بر صباح صادقدر ! »

زیرا :

« سزادر آدم ایچون معنوی بر استقبال ، »
 « که هیچ کورمدیکی بر جماله عاشقدر . »
 « لزومنی - وار ایسه معدلت !.. انک بنجه ، »
 « جهانده چکدیکمز اضطراب ناطقدر . »

محققدرکه :

- « بوکاشانده ، هرشیده ، کوکده قرآنده ، »
 « کوکلده ، جانده برالله وارکه خالقدر ! »
 « بزه کورونسده ، مظلم ، مثال جای غروب . »
 « بوقبرلر ، هبانک نورینه مشارقدر ! » [*]

[*] حامدک بو فکرلری مشهور انکایز شاعری (ووزورث Wordsworth) ک بر شمرینه بکریور؛ وبوده اثبات ایدیورکه بو دوشونجهلر یک اسکی زمانلردن بری متینکر انسانلرک ذهننده پیدا اوله کلدشدر. حتی داهی شاعرلده بر حس صمیمی وارکه نجر به ایله حالاً تحقیقی ممکن اولامایان حقایق او طویفو ایله کشف ایده یایلرلر . (ووزورث) بو حس علویدن بحث ایدرکن حامدک سولیدیکی سوزلری - بر باشقه شکاده فقط عیناً - سویلیور، انکایزجه سی بودر :

« Sense Sublime »

- « Of something far more deeply interfused »
 « Whose dwelling is the light of setting suns, »
 « And the round Ocean, and the living air »
 « And the blue Sky, and the mind of man; »
 « A motion and a spirit that impels »
 « All thinking things, all objects of all thought »
 « And rolls through all things. »

حرفیاً ترجمه سی شویله اوله یایلر :

« ای حس علوی! .. ای کاشانک الک درین یرلرینه نفوذ ایدوب کیزلیمش (برشی)
 حقنده حاصل ایندیکنز حس علوی! .. ایله برشی که ، (ایله بر هویت اینده که !) اونک
 قرارکمی باطن کونشدرک ضیاسیدر؛ بحر محیطدر؛ ذی حیات اولان هوادر ، مائی - سادر
 وانسانک عتل ووجدانی در. اوشی، ایله بر حرکتدر ، بر روحدرکه بوتون دوشونوجی
 موجوداتی وهردرلو دوشونجهلرک موضوعاتی تشکیل ایدن اشیایی حرکتده کتیرییور .
 (یعنی جانلاندیریور !) هر شیئی احاطه ایدیور؛ هر شیده ساری بولونوبور . »

(پانتئیزم یعنی وجودیه Panthéisme) فلسفه سنک شمرده تجلیسی ونفوذی ایچون
 بو منظومه لرک ظریف مثالر تشکیل ایدر. فارسی ادبیاتنده اک نفیس لرینی بیلیم . فقط
 حامدک برباشقه منظومه نفیسه سی ده ا واردرکه اونده شاعر بو (روح ساری) به خطاب ایدر.

« ای سن ای سن ! . که ! . الخ الخ ... ! »

اوبله ايسه نېچين آخرتدن نوميد اولملى ؟ ..

« انسان اوله ماز زواله قائل ، »

« زيرا ياشاماز او حاله قائل . »

فقط زواللى انسان بويله يوكسك برسپهر احتمالاتده اوچان بر خيالى اميد
بشنده قوشمقوله كندينى آلداتمايورمى عجباً ؟ ..!

« كوكده باشى ، زيرى چاه اسفل ، »

« هپ كندينى آلداتير او مغفل . »

حامد، بو اذيتنيزا شهبه يه قاناديله تماس ايتدكن صوكره اوركويور، ينه

خطابنك تكررله ، آهنگ سلاسنه دم طوتان بوكوزل شمردنه :

« كه شفق نقطه قراركدر ! »

جمله سى ، انگليز شاعرنك يوقاريكى منظومه - سنده ايكنجى مصراعك مضموننى عيناً
ادا ايدييور . ظن اولونماسينك حامد بوككرلى (ووزوورث) دن تلقى ايتشدور . حامدك
كندى كوكلى توكننيز برمنيم الهامدر . بو (روح عالم) اعتقادى (نوفلاطونى - Néoplatonicien)
فلسفه سيله طوغمش واوندن جهان عرفانه سرايت ايتشدور . ايكي بيك سنده لك
برعقيده در . مشهور (پلوتينوس Plotinus) بوتعبيرى وضع ايتشدى . ($\psi\upsilon\chi\eta$)
ايدى كه اعتقاد بجه ماديت صفتندن مبرا ومرا اولان حق تعالى ايدى . (عالمده حركت
وحياتك باشليجه - $\psi\upsilon\chi\eta$) ($\psi\upsilon\chi\eta$) ($\psi\upsilon\chi\eta$) ($\psi\upsilon\chi\eta$) ($\psi\upsilon\chi\eta$)
مشهور لاتين شاعرى (وريژيل Virgile) دخى بواعقادده ايدى : انافس آئاردن ممدود
اولان برشمرينه : (روح مادى تحريك ايدر $Mens agit moles$) دبه باشليوركه
(ووزوورث) ك منظومه سى بو جمله نك شرحى ديمكدر . يالكر شو فرق واركه حامد بو
اعتقادي ($\psi\upsilon\chi\eta$) ($\psi\upsilon\chi\eta$) ($\psi\upsilon\chi\eta$) ($\psi\upsilon\chi\eta$) ($\psi\upsilon\chi\eta$)
شهرت آلان ($\psi\upsilon\chi\eta$) ($\psi\upsilon\chi\eta$) ($\psi\upsilon\chi\eta$) ($\psi\upsilon\chi\eta$) ($\psi\upsilon\chi\eta$)
بودر . (فيض سريانى ايله هرشيئى احيا ايدن برووح سارى ومحرك) ، برغسون وعود
مطلقى وحق اوله رق قبول ايدييور . حتى صراحت منكر اولان شريهاثوور ، روحى
روح كللى وبوتون اوکا متعلق اولان اعتقاداتى رد وتزييف ايتدبى حالده حقيقت اشيايى
(ارادت $\psi\upsilon\chi\eta$) اولقى اوزره تلقى ايدييور . درلو درلو شكلرله تجلى ايدن بو اعتقاد
يك اسكيدر وبوتون شاعرله سرمايه ملاحظه ووسيله فلسف اولشدور .

ایمانه التجا ایدیور؛ انجق اونده سلامت بولیور و مستریخ اولق ایستیور. یاسه
دوشمکدن قورقویور :

« سن خالقمزسک ؛ ایتدک ایمان . »

« بر سنده بولور بویأس ، پایان . »

« سن وارکن، اولورمی آخرت، یوق ؟ .. »

« یوق شبهه که سنده مغفرت چوق ! »

« طویدم ؛ سنی ایستیور بووجدان . »

« بیلدم ؛ سکا واصل اولدی جانان ! »

دیهرک، اللهه ایناندیغنی و او قدرت خالقه‌نک هرشی ایچون (مبدأ و معاد
Commencement et fin) اولدوغنی اعتراف ایتدکن صوکره آخرتی و بقای
روحی (مغفرت الهیه) دن استدلال ایدیورکه، قرون و سوطاده (اسقولاستیق
Scholastique) ، (الهیون Théologiens) ننگ ، عندنده پک معتبر اولان
(دلیل بالغفران Argumentum ad misericordiam) ایشته بودرلو استدلاله
دیرلردی .

لکن ، بقای روحه اینانمق ، مفتون حسن صورت اولان بر شاعری
تسلیه ایدمز ؛ چونکه او، (هیچ برشی محو اولمیه جقدر؛ فنا یالکنز صورته
عارض برحالدیر) جمله سیله ویریلان تأمیناتی لزومسز وفائده سز کورور. برکوزل
چیچک صولوب تارمار اولدقدن ورنک و رایحه سی کیدوبده صولدقدن وچو-
رودکدن صوکره اونک ماده سی ینه طبیعت قاریشه جقمش !.. شاعر بو حقیقتی
بیلوبده نه یاپسین: اوکیما کردکل شاعر در. اوکا چیچک لازم !.. چیچک ده،
حسن و آهنگ، رایحه ورنک دیمکدر. کذلک بقای روح ای، فقط او، سودیکنی
جسمانی ایله برابر کورمک ایستیور ؛ و :

« بن نیلیم بقای روحی ؟ »

« اولمازسه وجود ایله برابر !.. »

« تجرید ایلہ روح اولیور شاد . »
 « برجسمہ وار احتیاجی مزداد . »

 « تغیر ایتہ سی عین زوالدر بنجہ ، »
 « او پیکرک کہ سرم دوشدی انکسارندن »

دیور . اوندن صوکرہ برنقطہ مهمہ دها وارکہ ینہ مبہم قالیور : برشینہ ایمان ایتک باشقہ ، او شیتک حقیقتی بیلک ینہ باشقہ ! بر آخرتہ اینانیورز فقط حیات مستقبلہ دائر ، قطعی بر فکر آلہ بیلیورمی یز ؟ .. حقیقت اشیا ، یالکز اینانقلہ وجدانہ انکشاف ایدہ بیلیورمی ؟ ایمان باشقہ امنیت باشقہ ! ..

« طورور حقیقت اشیا تراب شکلندہ ، »
 « سوال آخرت ایتدکجہ بن بو تربدن ! »
 « نہ کوستیر بکا برقبر تا ابد بستہ ؟ .. ! »
 « نہ آکلارم بن انک فکر تارمارندن ؟ .. ! »

حالبوکہ حقیقت آکلاشلہ ، بیلنسہ چوق ای اولوردی . زیرا قورقومن مجہولندرد . بزم ایچون (ابوالہول Sphinx) مجہول دیدیکمز (سرغامض) درہ ایمان بزى تأمین ایتسہدہ ، او (مجہول قورقوسی La peur de l'inconnu) یی ازالہ ایدہ میور . چونکہ مسئلہ یی حل ایدوب حقیقتی عیاناً کوسترمیور . او مبہم قالدقجہ ینہ وجدان ، اونک حضورندہ تیریور ! ..

« عقیدہ رہبر ایکن برجہان باقیہ ، »
 « ٹولوم دہ بنجہ ، ٹولور فانیان ، خشیتدن . »

سبی دہ ، بقای روحہ ایمان ایلہ برابر حقیقت موتک ، مدہش بر مجہول اولہرق قالماسیدر . انسانی اورکوتن ، ایشتہ بودر .

« آلیشمیور ؛ نہ عجب ! . انقلابہ طبع بشر ؛ »
 « بوکون جہاندہ اولورکن نہ وارسہ دیکر کون . »

« توحش ایتمز ایدک بلکه بز مهالکدن ، »
 « اگر حقیقته اولسه خیاللز مقرون !.. »

نولوم ؛ ایشته او حقیقتک اک مدهش بر صورت تجلیسیدر . مع مافیه :
 « شو امره ظلم ویا معدلت دیمک بوشدر . »
 « نه سویلسهک ، اوکا دائر یقین دکل مظنون ! »

دیه رک ینه (آغوستی سیزم) حدودینه واریبور . بو اوچورم کنارنده آیاغی
 قایوبده (نیلینزم Nihilisme) گردابنه دوشمه سین دیه (امید) . طوتونویور .
 مادام که امید وار ، امیدک نقطه تعلقی دخی البت واردر دیمک ایستیور :

« امید بقا ، بقای ناطق . »
 « برباشقه حیات مفتضی در ؛ »
 « انجام ، ممات ! یوق ، نه لایق !.. »
 ایشته بوامید کیم نهاندر
 باقیلکه بلکه برنشاندر .

لکن ، بوانحق امیدک الهام ایتدیکی بر عقیده در . مع مافیه امید ، بوسبوتون
 بوش واصلسز دکلدر . بناء علیه عقل ایله حکم ایدوبده (آخرت یوقدر)
 دیجه ملی !.. آخرت اولماز !.. دیجه ملی . دنیا اولور شیعی در !..؟

« اولماز - دیمک - آخرت ؛ نه بوش رأی ؟! »
 « دنیا دخی - هیچ دکل - اولور شی !.. »

حامد بعض عقلا نك : (آخرت واردر) دیمک جهلدن کلیر ؛ دیدکلرینه
 باقیورده :

« واردر ! سوزی جهلدن کلیر مش ! »
 « یوقدر !.. دیجه مزده بنجه بویه !.. »
 « عقل اولمه ایله قصیر و محدود ، »
 « خارجه قالدان اولور می مردود ، »

« کر یوقسه انی قبوله اسباب ، »
 « رد ایتکه ده کورولمز ایجاب . »
 « بز آ کلامادق که ابتدایی ، »
 « محکوم اوله عندمزده غایت . »

دیپورکه پک طوغرودر. بوکون بومسائل مابعدالطبیعیه ده تماماً (آغوستیق) بروضع و طور آلان سنسر، داروین، هکسلی ودها بوکچی زمانمزلک الک بویوک فیلسوفلری، هپ بوفکرده در. محاکمه لری ده عیناً بوصورت اوزره جاری در. الی آخره ...!

بوراده، آرتق کسه جکم ؛ چونکه مقصدم ، افلاطونک اواییک کله سندن، یعنی (تولوم دوشونجه سی) سوزلرندن نه انکین برعالم معنا، نه اوزون برسلسله مسائل چیقاریله بیله جکینی سزلره کوسترمک ایچون، برمثال ویرمکدی. حامدک ملاحظاتنده او مثالك اعلاسی بولدم ده اوندن طولایی الک مهم اثرلرینی براز تحلیل ایتدم . سزی بوداهی شاعرك فضای ذهنده کزدیردم. اوراده سلسله افکارینی تعقیب ایده بیلمه کنز ایچون سزه ایکی کله ایله بر ایپ اوجی ویرمش اولدم . یوقسه جریان بحثی بالاتزام ادبیات وادیسنه دوکمک نیتنده دکلم . ذاتاً اوسوزلرک مزیات ادبیه سندن دکل، انجق قیمت فلسفه سندن نشان ویردم؛ و- ظن ایدرم ! - لایقوله آکلادیکزکه ، بوتون بومسائل مابعدالطبیعیه یی ، حامد ، (تولوم دوشونجه سی) ندن چیقارمشدر . یوقاری ده ینه بو مناسبته اسمنی و بعض سوزلرینی ذکر ایتمش اولدوغم، (شونپهاووه ر)ک دیدیکی کچی: بزى خواب غفلتدن ایقاظ ایدن و بونکله برابر - ایچندن جیقلمماز- برکرداب حیرته القا ایله ین بالجله مسائل مابعدالطبیعیه ؛ هپ او مدهش و مزعج دوشو- نجه نك اثر الهامیدر .

بناءً علیه :

« تولوم قیلار بزى ، ایقاظ ، خواب غفلتدن ؛ »
 « آیرمایان ده او ، لکن ، ظلام حیرتدن ... »

دیمکله بحنی خلاصه ایده بیلیرم .

فقط ، فلسفه بوکون ، یالکز (ماورای حیات) مسائلندن عبارت دکدر . حتی اومسائی ، پروغرامندن بوسوتون طی ایدن فلسفه سیستمی ، زمانزده بردن زیاده در وپک معتبر اولان همان اونلردر . اویله اولدوغی حالده ، علی-الاطلاق حکم ایدرک : (فلسفه ، ثولوم اندیشه سندن طوغمشدر !) دیمک طوغرو اوله بیلله جکمی در ؟ ...

ایشته بوده - شو موقف تفکرده - کندی کندینه قارشیمزه چیقان بر سوالدر . بوکا ویریه بیلله جک جوابلرک اک طوغروسی ، مغویتزک تاریخ تکاملندن آلدیغمز فکر اوله بیلیر :

واقعا نیجه نیجه عصرلرک نتیجه تکاملی اولان بوکونکی درجه ترقیه باقارسق ، فلسفیاتده انحق مابعدانطیعیات دیدیکمز قسمک - حقیقت اشیایه دکل ! . - یالکز بزه ، ویزم آخرتمزه تعلق ایدن بعض مسائی ایچون ، اویله برحکم طوغرو اوله بیلیر . حالبوکه ، فلسفه ، بوکون - فی الحقیقه - بوندن عبارت دکدر . مابعدانطیعیاتک بیلله اصل موضوعی ، مبحث وجود ومبحث علمدر . آرتق ماورای حیات مسائی بوسوتون آیرلمش و (الهیات Théologie) نک موضوع مخصوصی تشکیل ایتشددر . الاهدن وصفات کالندن ، (علم الهی Théodicée) بحث ایدر . (آخرت Vie future) و (بقای روح immorta- lité de l'âme) بختلری وبونلره تعلق ایدن تفرعات مسائلینه الهیات علمنک موضوعاتنده داخدر . روحک باقی اولوب اولماماسی مسئله سندن صرف نظر ایدرک ، روحک یالکز قواسنی ، قابیلیتی ، حادثاتی ، تجلیاتی تدقیق وتتببع ایتمک وظیفه سنی منحصرأ (علم روح Psychologie) درعهده ایتشددر ووده - ظن اولوندوغی کبی - فلسفه دکل ، علمدر ؛ هم بوکون تجربی برعلمدر . الی آخره ! ...

وقتیله ، ارسطو زماننده [*] بو علوم ، فلسفه دن تمامیه آیریلوب تمایز

[*] حامدک ملاحظات فلسفیه سی ، تعلق ایستیکی مسائل متنوعیه نظراً اودورک مباحثی اکتدیریر . بوکون بومسئله لر آیری آیری موضوعاتندر .

ایده‌مه‌مشدی . زیرا موضوعاتی تمامیه تعین و تمایز ایده‌مه‌مشدی . هله فلسفه دیمک مابعدالطبیعیات دیمکدی . مابعدالطبیعیات دخی اساساً الهیات دیمکدی . حتی قرون وسطاده (اسکولاستیک Scholastique) یعنی مدرسه اصولنک علی‌العموم و علی‌الاطلاق عرفانه تحکمی سبیله ، فلسفه الهیاتدن عبارت قالدی . زیرا - ذره قدر شبهه محل و فکر تنقیده منفذ بر اقایه رق - احکام اصلیه سی (نص قاطع) اولق اوزره تعلیم ایدلدی که (Théologie dogmatique) دیدکری بودر .

ای ..! لکن بو بویه اولقله بوندن یا کلش معنا چیقار ماملی ..! بو کون تقسیم اعماله اوغرامش اولدوغی ایچون آیری آیری علملرک موضوعاتی تشکیل ایدن مسائل مهمه نك یکدیگریله علاقه ایه و صمیمیه سی یوق دیمک چیقمازا! اونلرک هپسنگ منشأی بر در و عینی اندیشه در . انسانلر - واقعا - اک اول : [حادثات باشقه شی ، لدنیات باشقه شی اولق لازمکلیر . او یله اولونجه حادثاتک ضمننده بر وجود مطلق واردر . بو وجود مطلق عجا مدرک می در .؟ یوقسه دکلی در ؟..] دیه دوشونمکه قویولما مشلر . اک اول تولوم ده نیلن اک مدھش و بدیهی حقیقتی کور مشلر و اکثراً رؤیا دخی کور مشلر . حقیقتی آکلایه مامشلر . یوق اولمقدن ده فنا حالده قورقدقلری ایچون بومسئله لر اوزرینه - لاینقطع - اعمال فکر ایتشلر ، بوندن بر چوق مسائل دها طوغمش ، ونهایت بونلرک بر قسمی فلسفه نك موضوع مخصوصی اولمش! دیمک که بپ بودوشونجه لر بر مزار قوغوغندن نبیان ایتشدر . سز بو کونکی حاله ، بو کونکی تقسیماتنه باقله قالمایکنز؛ منشأنه باقیکنز! و قیله (هندسه géometrie) تارلا و عرصه اولچمک عامندن عبارت ایتش . اسمی بومعنایه دلالت ایدیور؛ مصر قدیم هندسه سی ده بوقابلتدن پک ایلری کیده میه جک قدر ابتدائی اولدوغی ایچون اسمک . سمانه توافقی اثبات ایدیور . فقط بو کونکی هندسه مسائلی بوندن و بو قدردن عبارت می در ؟.. واقعا مکان اولچوسنه تعلق ایدن ایشلرک جمله سنده معلومات هندسیه اساسدر . فقط هندسه (Arpentage) و پاخود (طوبوغرافی) می دیمکدر ؟.. اسکی (الکیمیا Alchimie) ، هر شئی آلتونه تحویل ایده بیله جک

اولان (حجر فیلسوفی la pierre philosophale) یی ، (کبریت احمر) دهنیلن او جوهر خارق العاده یی کشف ایده بیلیمک غیرتدنن طوغمش ، مظلم و اسرار انکیز بر علم ایدی . اسمک معنای لغویسی اونی افاده ایدیور؛ قرون اولایه قدر او معهود علمک بو حیثیتله یاشایه بیلیمش اولماسی ده بومعنای تایید و تصدیق ایدیور . لکن بو کون بیلدیکمز کیمیا علمک موضوعی، غایه سی و باشلیجه مسئله سی، هر ماده یی آلتونه تحویل ایتیمکی در؟ .. (علم هیئت Astronomie)، - محققدرکه - (علم نجوم Astrologie) دهنیلن بیلدیز فالجیلغندن طوغمشدر . بو کونکی علم هیئت ، واقعا ، ریاضیاتک یاردمیه ، استقبالده وقوعبوله جق خسوف و کسوفدن دقیقه سی دقیقه سنه ؛ حتی ثانیه سیله خبر ویره بیلایور ؛ فقط فهرست مباحثده فالجلیق مسئله لری وارمی ؟...

فلسفه ایچون ده هان طبق بویه اولمشدر؛ دیه بیلیم . ذاتاً (سوسیولوژی) و (آنتروپولوژی) وادیلرنده اجرا ایدیلن تدقیقات مخصوصه آز چوق صراحتله کوسه تریورکه ، فلسفه نک ، اساطیرک ، تاریخک ، شعرك عقائد دینه نک منشأی بردر . تکامل مدنیتک اقتضاسندن اولان ترقی و تقسیم اعمال سبیلله صوکرده دن صوکره ، خرافات ، روایات ، معلومات ، مجهولات یکدیگرندن آریلوب تمایز ایتیش و وسائط تدقیق چوغالجه بوسبوتون (موضوعات علمیه) تعین ایلمشدر . بو نقطه لری - بو بابک نهایتلرینه طوغرو - ده ازیاده شرح و تفصیل ایده جکم .

بناءً علیه ، شیمدیلاک ، بوفسلده ویردیکم تفصیلاتی تلخیص ایدرسهم ، دیه بیلیم که :

[علوم ، یاشامق احتیاجندن ؛ فلسفه ، تولوم اندیشه سندن طوغمشدر .] هم عینی زمانده طوغمشدر . اکثریا ظن اولوندوغی کبی ، بری دیکرینه تقدم ایتهمشدر . مثلاً ، (دور حجری l'âge de pierre)، دهنیلن ازمئه قبل التاریخیه ده انسانیت وحشیه نک حالی دوشونورسهک باشقه درلوحکم ایده مه یز : یونتولامش چاقق طاشنی ، قبا - صابا بر صوبا اوجنه گچیروبده اوق و مزراق یاباجق درجه ده بر قابلیت تأمین ایدن تجربه بشریه یی علوم صحیحه نک منشأی اولق

اوزره تلقی ایده بیلیرسهك، شبه یوقدر كه ینه اودور حجری ده وقوع و ظهوری -
آثاری دلاتیله - حس ایتدیكمز احوال روحیه حقدیه کی تجربه انفسیه یی ده ،
افكار فلسفیه نك ، عقائد دینه نك حسیات شاعرانه نك منشأی اوله رق تلقی
ایده بیلیرز .

(طایله ر Tyler) ، (فره ی زهر Fraser) و امثالی کی مدققینك بو
كونکی اقوام وحشیه اوزرنده اجرا ایتدكلی تدقیقات ، بك مهمدر و بو
(تتبعات قیاسیه - études comparatives) کوستریوركه ، محافظه ذات ایله
اندیشه ممات عینی سائقه طبیعی نك اثر الهامیدر . یكدیكرندن آیری غیری شیلر
دكلدر . عینی مادالیه نك ایکی مختلف یوزی در . ینه عینی سبیله دركه (حیات -
مات) مسئله لری یكدیكیرینه اساساً و صمیمیاً مربوطدر . بوتون مدنیتمزك ،
بوتون اخلاقزك منشأی و سبب ترقیسی ، ایشه بو سوق طبیعی نك ایکی وجهه
تجلیسندمه ظاهر اولان بوا یکی عامل مجبردر : (یاشامق احتیاجی ؛ ثولوم قورقوسی ؛)
مدنیت مادیه و اخلاقیه یی وجوده کترین عوامل مغویه میاننده بونلردن مهمی
و قدیمی یوقدر .

طبیعی دركه هنوز مدارج وحشتك اك سفلی قدمه سنده بولنان (انسان
ابتدائی l'homme primitif) نك اك بویوك اندیشه سی - اول امرده - فلسفه
دین و یاخود شعر اولمامشدر . انسان اولمازدن چوق اول ، حیوان اولان
بنی بشر ، اك اول سوق طبیعی سنه تابع اوله رق شخصنی محافظه ایتمکی دوشونمش
و انجق بو اندیشه نك اقتضاسنه كوره حرکت و تقید ایتمشدر . [کونی کونه
قارنخی طویورمق ، و قوی بر دشمنك لقمه احتیاجی اولماق ! .] ایشه نك
زیاده عملی و طبیعی بر فلسفه نك ، اك موجز و اك طوغرو دستوری ! .
بونی اك وحشی انسانلر دكل ، اك وحشی حیوانلر بیله بیلور . و بو حقیقی
بر فلسفه خواجه سی دكل ، طبیعت هرکسه ، هر فرد عضویه اوکره تیور .
لکن ، شوراسی وارکه ، بو اندیشه نك تذهیله ، انسان اطرافنی احاطه
ایدن اشایی - سوق طبیعت و تعقیب منفعت ایله ! . - تبع ایدرکن ، کیفیات
اشیایه دائر نه تجربه ایتمش ونه اوکره نه بیلمش ایسه ، تجربی اولان شو

(مکسویات ابتدائیه) سی، معلومات صحیحہ سنک سرمایہ اصلی سنی تشکیل ایتش، بو وادیده یواش یواش واقع اولان ترقیات تجربیہ سی سایہ سنده یواش یواش او سرمایہ، نما بولمش، و (معلومات محققہ) قسمی وجودہ کتیرمشدرکہ علوم، ایشته بو جنسدن اولان معلوماتک - تقسیم اعمال یوزندن - تنوع و ترتب ایتش اولان شعباتی در. موضوعات مخصوصہ سیلہ یکدیگرنندن تمایز ایدن معلومات صحیحہ من، بونلردن عبارتدر.

فقط، تجربہ بوندن عبارت دکل! . انفسی تجربہ لردہ وارکہ اصل بونلر، ذهن ابتدائی بی، عجزو حیرتہ خوف و خشیتہ دوشورمشدر. رؤیا کبی! . . . ٹولوم کبی! . . .

اک وحشی، اک یرتیجی حیوانلرہ - حیلہ ایلہ، آلات و ادوات ایلہ، تعاون و اتفاق ایلہ - تأمین غلبہ ایلہ یں انسان، (بری) لردن، (جن) لردن، (شیطان) لردن، (دیو) لردن و بر چوق (ارواح سایرہ) دن قورقش و اونلردن صاقینہ بیلیمک احتمالی اولمادیغنه قناعت کاملہ حاصل ایتمشدر. انسانک ہر شئی کندینہ قیاس ایلہ تقدیر ایتہ سی طبیعی بولوندینی ایچون، ارادت بشریہ بہ رام اولہ مایان حادثات و وقوعات عالمی - انسان وحشی - بالضرورہ او (جن) لرک، او ارواحک ارادتنہ، کیفہ، غضبہ، انتقامنہ اسناد ایدرک تعریفہ چالشمش در! ایجابنہ کورہ اونلرہ قربان کسمہ سی، میوہ ہدیہ ایلہ سی حضوع و خشوع ایلہ دعا و نیاز ایتہ سی، و اکثریا (ارواح گذشتہ) دن مدد اومماسی، یاردیم طلب ایلہ سی، اثبات ایدیورکہ انسان، اک ابتدائی زمانلردن بری معنوی برطاقم موجودات مشخصہ اعتقاد ایدرمش؛ mamouth ماموت فیلندن بویوک مغارہ کدیس (le grand chat des cavernes) (*)

(*) ماموت، دہشتلی بریابانی فیل ایدی. قبل التاریخ پکاسکی بر دوردہ یاشاردی. توپلری پکاوزون، دیشلری بویوک بر ہلال شکلندہ ترسنہ یوقاری یہ قیویرلش، جہلی، قورقونخ بر حیواندی. سبیر یادہ بوزلر ایچندہ تام الاعضا اولارق بو حیوانلردن برقاج دانہ سی بولونمشدر. بویوک مغارہ - کدیس دہ بو کونکی قیلانک جدا کبری صایلیورکہ پک یرتیجی مدہش بر جانواردی. ابتدائی انسانلرک مغارہ قوغورلندہ یاشادقلری بر دور قدیمدہ منحصرأ مغارہ لرہ مسلط اولمشدی. اجداد منی صید ایدردی.

وامثالی کچی مدھش جانوارلردن زیاده ، او (ارواح غیبیه) دن قورقارمیش . کائناتک صورت تکوتی ، انسانک یر یوزنده ظهورینی ، خیر وشر وقوعنی هپ ارواح طیبیه ویا خبیثه نك معرفت وارادتنه عطقاً تعریفه چالیشیرمیش . (اساطیر وخرافات mythologies) بوخصوصده شبهیه محل براتیور .

دیمک که انسان عاجزه کنیدی بیلدیکی و دوشونه بیلدیکی زماندنبری (مجهول- الطبیعه) بر قدرت کلیه نك ، ارادتنه رام اوله رق یاشامقده بولونذوغنی حس ایدیورمیش!.. او ابتدائی زمانلرده دین نامنه بر مؤسسه مغویه اولماقده برابر ، ادیانک ظهورینه سبب محص اولان (حس دینی le sentiment religieux) فطرت بشریه ده مرکوز بر قوت مغویه اوله رق موجود بولونویورمیش (حیات - ممات) مسئله لرله بو حسک درین واساسلی برعلاقه سی وارمیش!.. وارمیش که او یله بردور وحشت ودرکه جهالنده بیله ، یابانی انسانلر ، یالکنز ییه جک ، ایجه جک شی دوشونمبورلر میش . دنیانک نصل وجود بولدوغنی ، انسانک یر یوزنده نصل ظهور ایتدیکی ، ئولدکدن صوکره ناوله جفنی ، نزه یه کیده جکفی ، نصل معامله کوره جکفی ده دوشونه بیایورلر میش!...

انسان ابتدائی بی مدھش بر تاثیر آلتنده براقان او (مجهول قورقوسی) نی ، برطرف ایدرده ، موضوعات فکریه یی وبالخاصه بو دوشونجه لرك تعلق ایتدیکی مسائلی ، نظر دفته آلیرسه ق ، کورورزکه بوتون بو مسئله لر ، بو کونکی (قوزموغونی = cosmogonie) یعنی (مبحث تکوین) و (مابعدالطبیعیات) مسائلی در . اونلر بو کون دخی عیناً موضوع بحث اولمقده در . یالکنز شوفرک مهم واردر که بوسواللره ویریلن جوابلر علوم وفلسفه دیدیکمز معلومات مرتبه نك مباحثی تشکیل ایدر ؛ اسکی زمانلرده اولدوغنی کچی (اساطیر وخرافات) قیلندن اولماز . وهله ، بومسئله لر - بوکون - تاثیر حسیانندن کلیاً ازاده اوله رق تتبع اولونور . بوملاحظات - بر درجه یه قدر - اثبات ایدر که علوم وفلسفه ودین وشعر واساطیرک منشأ مشترکی ، انسانک اندیشه سنده آرمالیدر .

ایشته سپنسرک دعواسی بوایدی وبوقاریده مختصر آ عرض ایتدیکم تحقیقات علمییه مستند ایدی .

فی الحقیقه بووادیده کی تدقیقاتیله صلاحیت کامله قازانمش اولان (آنترپولوژی) علمای متخصصینی، ادعا ایدیورکه: علی العموم وبلااستثناء انسانیت وحشیهده - برجهول مطلق قورقوسیهله ! - تولد ایدن بوحس حضور، واقعا بدایت امرده بت پرستلک ضلالتنی موجب اولمش ایسهده ، او (دور جاهلیت) ، دین حقیقی نك ظهورینه بالخاصه وسیله ویرمش در . فقط قورقو ، عینی قورقودر! حس حضور ، عینی حس حضوردر ! سجده لر، رکوع لر، عینی سائقه خوف ورجانك ، عینی حس تقدیسك ایجاب ایندیردیکی اطوار طبیعیه دندر ! یا انکز بوکون ، انسانیتك معبودی (حق تعالی) درکه اك عالی حقیقت، دیمك اولور . ینه مسئله تکوینی - جمهور انسانیت - اونك ارادتیهله تعریف ایدیور ! اوقدرت خالقهدن قورقق، اونی تقدیس ایتك، ینه اك بویوك فضیلت صاییلور! یوقسه سجده لك معنایی اولمازدی . حامد ، بوفکری ده پك کوزل بر لسان بایغ ایله ادا ایتشددر :

« دینیر : مخافت باری بویوك فضیلتدر ! »
 « دل ، اعتبارینی اکلار بوقول معتبرك . »
 « فضیلت اولماسهده ، اول صفت طبیعی در ؟ ؟ ؟ ! »
 « ندر یا حکمتی الله اوکنده سجده لك ؟ . . ؟ ؟ ! »
 « اوخالقك جبروتنده اولماسه قدرت ، »
 « اولورمی بزده ثبوتی ، رجا ایله حذرک ؟ . . ؟ ؟ ! »

ایشته - طوغرودن طوغرویه - فلسفه موضوعاتندن معدود اولما یوبده بعض علوم طبیعی و اجتماعیه حتی (فیلولوژی Philologie) یه تعلق ایدن بوتقصیلاتی ویرمکدن مقصدم موضوع بحثمزه نظر دفتکزی جلب ایتك وهر وجهله . فکر یکیزی تنویر ایلک ایچوندی . شیمدی آکلادیکز - ظن ایدرم که - نیچون [فلسفه نك وعلومك منشأی بردر . علوم یاشامق احتیاجندن ، فلسفه نولوم اندیشه سندن طوغمشدر ! .] دیدم ایدی !

فلسفه نك اسباب ظهوری بحثنده پك قیمتی بر فکر دها واردرکه ، افلاطون

وسائر متقدمینک افکارندن ، اهمیتجه ، دون دکلدر . اوننده مختصراً عرض ایدرک بوفصله نهایت ویریم. بونی اهمال ایدهمهیز، چونکه دوراخیر، بوقفکری قبول ایتش ، حتی اونی اصول اتحاد ایله مشدر .

فلسفه عالمده صوک دورک فاتحلرندن بری اولان (دهقارت Descartes) دخی بالخاصه (شبهه le doute) بی تفلسفه سبب کوستیریور. (Cartésienne قارتیهنه.) (*) فلسفه سنده (شک اصولی le doute méthodique) بر مهم

[*] (قارتیهنه) و (قارتیهنیزم cartésianisme) تعبیرلری (cartes) لفظندن مشتق و بویکله دهقارتک اسمنده ، دها طوغروسبی مخلصنده داخلدر . بوی حکیمک مسلککله (قارتیهنیزم) دیرلر . (رونه دهقارت René Descartes) ، دنیانک اک بویوک علما و فیلسوفلرنددر . کندیس فرانسدر . (لای La Haye) شهرنده (۱۵۹۶) سنه میلادیه سنده طوغمش و (۱۶۵۰) ده اسوهچ ده وفات ایتشدر . اولا (La Flèche) مکتبده تحصیل و تربیه کورمش و فقط سقولاستیق اصولی بکنمهدیکی ایچون (۱۶۱۲) سنه سنده او مکتبی ترک واهمال ایتشدی. زادکاندن بولوندوغی جهته سلك عسکریه منسوب ایدی . بو حیثیت و مجبوریتله (۱۶۱۶) سنه سنده هولاندا اردوسنه ، و (۱۶۱۹) ده باواریا دوقه سنک اردوسنه داخل اولدرق ضابطه صفتیهل برمدت خدمت ایتشدی. سقولاستیق اصول عرفانی ایدیا ده ویرن بوخارق العاده آدم ، (۱۶۲۱) ده سلك عسکریدن بوسبوتون استعفا ایدرک یکیدن تحقیقات علمیهیه قویولش و بومقعده ایتالیا ، فرانسه وسائر مملکتلره سیاحتلر اجرا ایتشدر . (۱۶۲۹) ده هولاندا ده بر مدت تمکن ایتشدر. (۱۶۴۷) ده فرانسه خاندان قرالین ، بوفیلسوفه معاش باغلامشدر. اوزمانلر ، دهقارتک شهرت شایعه سی جهان مدنی طوغمشدی. اوانشاده - افکار منوره وحسیات ترقی پرورانه سیله ممتاز اولان - اسوهچ قرالیچه سی (قریستینا Christina) دهقارتی دعوت ایتش و فیلسوف دخی اجابت ایدرک (ستوقهولم Stockholm) شهریه کیتشدی. قرالیجه کندیسندن درس آلیر، مسائل فلسفیه اوزرینه مباحثه ایدر وشخصنه ، دهاسنه زیاده سیله حرمت ایلردی . دهقارتک بوتون اعظم زمان ایله معارفه و مکتبه سی واردر . کندیس ذاتاً نخیف ایدی ؛ برکون زیاده سیله صوغوق آلدقندن صوکره احتقان رثویدن خلاص اوله مامش وستوقهولم ده وفات ایتشدر. [دور اخیر فلسفه سنک پدری] وصفی ایله عموم ملل متمدنه عنندنه مبعجل اولان بوفیلسوف ، (اصول حقنده کی نطق) (Discours sur La méthode) نامنده برکوجوجوک رساله ایله سقولاستیق فلسفه سنه نهایت ویرمش ، افکار قویعه یی آلت اوست ایتش ، و اصولی ده کیشدیره رک دورجدید فلسفی فتح ایله مشدر. شهرت فلسفیه سی اوقدر پارلاقدرکه قابلیات سائرهنی کولکده برافشدر . یوقیه ریاضیاتده برنجی درجه ده علمای کاشفیدن اولدوغی کی

حیثیتی جائزدر . ده قارتك فكرنجه، شبهه ، دیدیکمز حالت ذهنیه ، فلسفه نك منشائی اولمشدر . اکر انسان کوردوکی ، حس ایتدیکی شیلر حقنده، فطرتاً شك وشبهیه مائل اولماسهیدی ، فلسفه اولمایه جق ایدی . بوده يك قیمتلی واهیمتلی برفکرردر وزمانمزد (اصول تحقیق methode d'investigation)ك برنجی شرطی عد ایدلمشدر .

فقط شونقطه ده بر آرزذهنمزی طوبلایلم؛ تکرار دوشونهلم: بز، انسانلرده فلسفه دیدیکمز دوشونجه لره سبب، ایسترکثرتده برمبدأ وحدت آرامق اولسون، ایستر سر خلقة قارشی حیرت اولسون ، ایسترسه شك وشبه اولسون ، ایسترسه هر شیک سببی تحری ایتك مراقندن منبعث بولونسون، البته طبیعتمزك صفات ذاتیه وبارزه سندن بر میل مخصوص اولمق لازمکلیر. فقط بوخصلت جبلیه من

علوم حیاتیه (Biologie) مسائلی حل ایده بیلمک ایچون الك اول تجربهیه مراجعت ایدلردن بریسی در. (نه ایله مشغولسك شیمدی ؟) دیه سوال ایدن دوستلرینه : [شیمدی برمههم کتاب اوقویورم !] دینش واولری عملیاتخانه سنه کوتوره رك بر (بوزاغی) بی تشریح ایله مشغول اولدوغنی کوسترمش و: (ایشته ! بوکتاب طبیعی اوقویورم ؟) ده یه رك سوزلرینی ایضاح ایتمشدر. هرملت متمدنه دورجدید فلسفی ده قارتدن باشلیور. واقعا مجدداك شرفی یالکز ذه قارته حصر ایدیله من . مشهور « بهقن » لورد وهرولام Bacon, Lord vérulam « ده قارتدن برازا اول، سقولاستیق علییه - همده صراحتاً - مجاهدهیه کیریشمدی . ذاتاً « ۱۵۶۰ » تاریخ میلادیسنده طوغمش اولدوغنی ایچون ده قارتدن اوتوزآلتی یاش بویوکدی. « بهقن » بالخاصه تجربهیی اصول اتخاذاشمش اولدوغنی کبی بوجاهده سنده کالیله غلبه چالیدی ایچون « اصول تجربهیه meth. expérimentale »ك اصل پدیری وواضی در. معاصر فیلسوفلردن وبویوک مؤلفلردن کبریچ دارالفنون فیلسفه معلی « راهب دوكتور هیوول Rev. Dr Whewell » « علوم استقرائیه تاریخی philosophy of the ind. sciences » و « علوم استقرائیه فلسفه سی rationalisme » نام ایکی بویوک اثرنده ده قارتك « راسیونالیزم » فلسفه سندن آیریلوبده تماماً تجربهیه اعتبار واعتماد ایدمه دیکنی ادعا ایتش ومقبلی وشا کر. دانی سایه سنده « تجربه » نك اصول اوله بیلدیکنی سولمشدر . آلمان مورخین فلسفه سی ده بو فکرده درلر . اصل فلسفه تجربهیی « بهقن » ، وزمانمزك راسیونالیزم اصولی ده ده قارته اسناد ایدرلر. ده قارت تجربهیه بویوک براهیمت ویرمکله برابر، فی الحقیقه معقولاتی ده التزام ایتشدی .

نهی اثبات ایدیور ؟ . . . بکا صور ارسه کز ، بلا ترد جواب ویره بیلیرم وده یه بیلیرم که: (بر حقیقه ایمانز اولدوغنی اثبات ایدیور ، بر وارلغه ایناند - یغمزی کوستریور .) او یله اولماسه یدی ، نه مبدأ وحدت آراددی ، نه سبب تحری ایدردک، نه حیرت، نه ده شبهه ایدردک ! . . . مبدأ وحدت دیدیکمزدده اودر . علت اولی دیدیکمزدده اودر ! لکن ، هویت ذاتیه سنی بیلهدیکمزددن طولایی، هر جلوه غریبه قارشی حیرت ایدرز. شبهه ایدیشمز دخی - حقیقتی بیلهدیکمزدندر ، یوقسه وارلغه ایناندیغمزی ینه بو(شبهه) مز هرشیدن زیاده اثبات ایدر . بناء علیه ، شیمدی یه قدر سویلدیکم سوزلری ، بیان ایتدیکم ملاحظه لری طولایوب تلخیص ایدرک ، ده یه بیلیرم که : بزده جلی اولان جستجوی حقیقت مراقی بر طرفدن علومک ، بر طرفدن فلسفه نک مشیمه تولدی اولمشدر .) بوتون بواندیشه لر ، بوتون بودوشونجه لر ، البته بر حقیقت آراق میل جلی سندن ایلری کلیور، چونکه برشیی آراق آنجق اوشینک وجودینه ایمان ایه اولور. انسان، (معدوم مطلق)ی آراماز. کندی وجدانم بکا صمیمی و کامل بر قناعت الهام ایدیور که بن وارم، بناء علیه بو عالمده برشی واردر ! . . . ایشته اوشینک ، نفس امرده هویت ذاتیه سی نه ایسه ، - کرک بنم نفسم اولسون، کرکسه بنم نفسمک مبدأ وجودی اولسون - ایشته بنم اصل آرادیم حقیقت اودر . اوله بیلیرم که کندی وارلغمدن دخی شبهه ایده بیلیرم فقط شبهه ایتک هر حالده دوشونمکدر . ، او یله ایسه (دوشونجه) واردر، اونی بوسبوتون انکار ایدم، چونکه شوآنده شبهه ایتمکه بیلهدوشونمش اولویورم. بواندیشه م (حالی actuel) در، یعنی شوآنده واردر. دوشون نفسمدن شبهه ایتسم بیله بالذات دوشونجه دن امیم؛ او حالده - هیچ اولمازه - (دوشونجه) نامه بر حقیقت واردر .

ایشته (قارته زیانیزم cartésianisme) مسلکنده اساس اولان وفلسفه عالمک اسکی سیاق نظری بوسبوتون ده کیشدیرن ملاحظه مهمه نک خلاصه افاده سی بودر، و بوده کوستریر که شبهه ایتک بیله بر حقیقتک وجودینه ایمان ایتمکه ممکندر. شونی ده آریجه اثبات ایدر که شبهه برشینه مستند اولور. (هیچ) اوزرینه

بر (بنای شك) توروله ماز. او حالده اولا هرشیدن شبهه ایتملی؛ فقط اونو تاملالی که بو شبهه بر (هیچ) ه، بر (معدوم مطلق) ه پیوسته اولمق ایچون دکلدر . زیرا - ده مین دیدیکم کبی - شبهه نك بر (نقطه استناد و تعلق!) وارددر. اولیه ایسه شبهه او نقطه مهمه نك ماهیتی کشف ایتمک صورتیله ذهنی بر حقیقته ایصال ایتملی در .

ایشته بو درلو دوشونوشه دخی - اصطلاحده - (شك اصولی Le doute methodique) دیرلر؛ اک اول بویه دوشونون فیلسوف مجدد (ده قارت) اولمشدر، و بو دوشونجه لری ایله، اول (مبحث معرفت épistémologie) ک تمللری - صاغلام بر صورتده وضع ایتمش، ص و کره اصول و قواعدینی کوستریش و بوسایه ده فلسفه جدیده دیدیکمز، او عظیم، قیامت فکریه یه سبب اولمشدر. اونک ایچوندرکه مجددلک شرفی - اتفاق ارا ایله - کندیسنه اسناد اولونویور .

شیمدی شو بسط ایتمدیکم فکرلرده بر مهم نقطه یه نصب نظر ایده لم : (دوشونمک، دوشونجه سز اوله بیایرمی؟...) (اونی ملاحظه ایده لم!...) . بر موضوع تفکر، یا خود بر ماده تفکر اوله دن دوشونه بیایرمی سکیز؟.. هایدی دوشونک باقالم!... بن ادعا ایدرم و امینم که کیمسه بوکا موفق اوله ماز. زیرا دوشونجه - تعبیر معذور کورولسون! - صابون کوپوکی ایچی بوم بوش برشی دکلدر. یا خود - دها طرغرو بر تشبیه ایله - هندسه ده، معهود (جسم تعلیمی) کبی، ماده سز بر (شکل صرف forme pure) دن عبارت دکلدر؛ و اوله ماز اولسه بیله موضوع تفکر بالذات او (شکل) اولور. (دوشونمک) ارمی؟.. (دوشونجه) دخی عینی زمانده وار دیمکدر. انسان دوشوندوکی زمان البته و البته بر (شی) دوشونور؛ ولو که اوشی، خارجه ده موجود اولماسین!... او حالده بیله یه بر فکرت مجرده و یا موهومه اوله رق بر دوشونجه، ذهنده موجوددر، ماده تفکری تشکیل ایدر. خلاصه هر دوشونجه بر (شیء)!.. تعلق و استناد ایدر. اوشی حقیقته وار اولسون، اولماسین. اویر برکه ذهنده موجود بولونسون!... آکلاشدیغنه کوره: (رونه ده قارت)، کندی ذهنده

موجود اولان دوشونجه لرك جمله سندن شبه لشمس ، وبرر برر اولنری آتوب
ذهنی بوشالشمس ! بيلم بوكا نصل موفق اوله بيلمس ؟ . . . چونكه بوكون
بويله برموفقیت امكانه ، نه پسقولوزی قانع اوله بيلور ، نه ده فيلسوفلر اينانه
بيلور ! هر نه ايسه ، ده قارت - بنم تحقیقه و آكلادیغمه كوره - هر شیدن
شبهه ایده بيله جكنی افهام ایچون بوطور ادایی ترجیح ایتش ! کویا ذهنتک
محتویاتی تشکیل ایدن هر فکر دین حقیقتاً انسلاخ ایتش ایمش کی سوزسویلش
فقط کندی بنلکندن شبهه ایده مامش ، اوفکر وحشی وجداندن چیقارده مامش
چونكه ذاتاً وجدان دیدیکمز ، اوندن باشقه برشی دکلدر : کندی انا تمزه
حالا شعور مزدر . ایشته بو صورتله ، محتویات وجدانیه یی قالدیروب آتمق
(بر تشبیه مشهور منظومچه) « لوحه خاطری آینه مجلاکی صاف » برحاله
قویه بيلمك موفقیته ، ده قارت « وجدانی بوشالتمق » دیور . (tabula rasa)
(۵) ایشته بودرکه - ده مین عرض ایتدیکم کی - هر شیدن شبهه ایده بيلمکدن
کنایه در .

صراحتاً آکلاشیلورکه (ده قارت) ، سقولا ستیق فلسفه سنک تعلیماتندن
نمون قاله مامش اولدینی ایچون ، اوزمانه قدر تحصیل ایتش بولوندوغی
معلومات متنوعه نك قیمتی آکلامق و تقدیر ایتک ایشته مامش . کورمش که
او کرنیکی ، بیلدیکی شیلرک حق و حقیقت ایچون فائده سی یوق ! .. بونک

[*] بز بوتعبیر مهی (لوح املس) دیه ترجمه ایتدک . حالبوکه فلسفه صوفیه ده دخی ،
بويله وجداندن خواطر (reminiscences) و افکاری سیلمک و لوحه اندیشه اوزینه
برسونرک چکدرک وجدانی بر (لوح مصفی) حاله کتیره بيلمک ، پک معروفدر ؛ حتی
معرفت حق ایچون بو ، برنجی شرطدر . زیرا حقیقت مطلقه (خواطر ايله ژنکدار
یعنی باصلي اولان) آینه ده تجلی ایده مز . (وجه دلداره حقیقتدر) اوبله باصلي و کبری
بر آینه ده جمال کانی عکس ایتدیره مز . بواعتماد ، تصوفده اساسدر . بو خصوصده
پک چوق کوزل شعرلر یازلشد . (وجد extase) دخی بو ، مقصده ایرمک ایچون
توصیه اولونور . ده قارت (table rase) یا پنجه آینه وجداننده کندی بنلکنی کو-
روبو و اوندن شبهه ایده میور . غریبدرکه انا لقی دین صوفیه دخی (لوح مصفی) یعنی
علائقندن آزاده اولان وجداننده عینی شیئی کورویور باشقه کورمیور . حالبوکه
ده قارت فلسفه سیله تصوف آره سنده صوک درجه ده مابینت وارددر .

اوزرینه ، بوتون محتویات وجدانیه سنی حدّه تدقیقندن کچیرمک ایسته مش ، وبالخاصه علم بشرک سرمایه سنی تشکیل ایدن ارکان اصلیه یی تحقیق ایتشدی . معلوماتندن شبهه ایتسه یدی ، بویه بر تشبیه بولونمق ، البته خاطرینه کلزدی . دیمک که بوفیلسوف مجدد ، (شبهه) یی ، هم فلسفه یه سبب بیلمش ، همد رهبر اصول اتخاذا ایتشدرد . باقیسه ده قارتک بوتون دهای فلسفی سی ، ذهنک بووضع مخصوصنده تجلی ایدر .

ایشته بو وضع ذهنی ، بک بویوک برانقلاب فکری وجوده کتیرمش و تکمیل اصول تفکری و طولانیسه علوم و حیات ذهنه نک جریانی ده کیشدر مشدرد . بووضع مخصوصه ، فلسفیات عالمی خارجنده بلکه بعض سبیلرده بولمق ممکندر ، واحتمالکه (ده قارت) ، (دور انتباه renaissance) ک هنوز صبح انفلاقنده یتشن وظلمه قربان اولوب کیدن برچوق فیلسوفلر کبی [مثلا : (قامپانه للا Campanella) ، (جه نوردانو ، برونو Geordano Bruno) ، (غالیله نو غالیله ئی Galileo Galilei) ودها بر چوق احرار متفکرین کبی !] (*) حریت فکریه سایه سنده حقیقی اصول علم و فلسفه یی تاسیس ایده بیلمک

[*] Thomasso Campanella ایتالیانک (Calabria) طرفنده (Steynano) نام کویده (۱۵۶۸) ده طونمشدر (۱۶۳۹) ده یتش بریاشنده اولدینی حالده پارسده وفات ایتشدی . (dominicain) باباسلرندن وسقولاستیق فلسفه سنی تخریب ایدنلردندر . هر فلسفه سیستمی تبع ایتشدی . ارسطویه و طولانیسیله کلیسایه شدتله تعریضاتی یوزندن چوق دشمن قازانمش ؛ دینسزلک ، بوکوجی لک ، اختلافیانی ایله اتهام ایدلشدی . بوتون تعصب عالمی ، علیه قالدی . نهایت ناپولی محکمه سنده محکوم اولدی . یدی دفعه انکریسیونک اک شدید عقوباتنه تحمل ایتدی . اک صوکره غایت طار وسفیل برچرده ده مادام الحیات حبس اولونمغه محکوم اولدی و بکری یدی سنه کون کورمیه رک اوراده یاشایه بیلدی . حتی حالتندن شکایت شویله طورسون ، حقه تشکر ایدر ایدی که بو محبوسیتی ایله عالم خارجیدن کف ید وفک علاقه ایدرک یالکز فلسفه ایله ذهنی مشغول ایتک میسر اولمشدر . عاقبت ، پاپا ، سکرنجی (Urbain) ثوربن) . بر حیله ایله (قامپانه للا) یی رومایه جلب ایتدی . کویا بو شبهه لی آدمی انکریسیونه حواله ایده جکدی . لکن حمایت و عنایت ایتدی . اسپانیا حکومتی بوندن شدتله منفعل اولدی . چونکه قالا برا اسپانیا حمایه سنده ایدی . کندی مأمورینی واسطه سیله قامپانه للا یی روماده توقیف و جلب ایتدیره جکی صیره ده پاپا ، فرانسه سفیری (قونت دونوآی C. de Noailles) واسطه سیله بو حکیمی فرانسه یه

ایچون ، طوغرودن طوغرویه (کلیسا L'Eglise) نك (حقایق منصوصه les vérités dogmatiques) سنی انكار ایله اورطیه آتیلماش ، بالعکس ، نصوص خرسیتیانیه ، قوی بر ایمان ایله مربوط و معتقد اولدوغنی - اول باول اعتراف - ایتیش ؛ همدۀ اولیه بر طور ایله که سوزلرینک صمیمیتدن شهبه ایده مه یز . لکن ، کلیسا نظرندۀ ذاتاً مردود و یا خود دکر سز اولان بعض معلومات عادیه و اعتقادات فلسفیه حقندۀ (شهبه) بی رهبر ایدرک تحقیقاته کیریشمکه ، فلسفیه قوتلرول حقنی قازاندریمش ؛ حق تنقیدی تأسیس و تأمین ایتیش . الحاصل ، شهبه بی ذهن بشره بر کره صوقش ! شهبه بر ذهنه کیرسه - طور ! .. دیدیکک یرده طورماز . تفرعات مسائلدن باشلایه رق مبادی علمیه ونهایت ، نصوص اعتنادهیه قدر واریر و بوتون مبنای معلوماتک تملی بر کره صارصار و چوروک ایسه بوسبوتون ییقار ؛ خراب ایدر . صاغلام اولان ارکان اعتقاد ، قالیر .

پارسه قاچیردی و اوراده اون اوچونجی لوه و قاردینال ریشلیو طرفندن حسن قبول و حمایت مظهر اولدی قید حیات ایله معاش آلدی . فرانسه ایله اسپانیا آره سنده رقابت سیاسیه اولدوغی ایچون قاردینال ، قامپانه لایی حمایه ایتشدی . حریت افکاری ، وسعت علمی ، جسارت و هله صبر و متانتی ایله خارق العاده بر آدمدر .

(Geordano Bruno) ، (۱۵۴۸) ده (ناپولی قرالتی) داخلندۀ (Nole) نامندۀ برکویده طوغمشدر . عالم ، ریاضی ، هیئتشناس ، فیلسوف ، معلم ، شاعر ، خطیب ، واعظ و بالخاصه حقیق بر قهرمان حریت اولان بو آدم بویوک بر داعی ایدی . غایت جمیل الوجه و متناسب الاندام برکنج ایدی ؛ کندیسنی بر کره کوروب دیکلینلر ، بهمه حال دهاسنک فسون تأثیرینه طوتولورلر ایدی . اونوز یاشنده مجاهدهیه باشلامش و درحال شهرتی دنیایی طوتشدی . اولا هرصله (مناستر cloître) تربیه سی کورمش و (dominicain) باباسلری صمنه داخل اولشدی . یازدیی منظومه لرك برنده بودوره حیاتندن بحث ایدرکن : (او قاراکلی و طار محبس که برخطا ، بی پک اوزون برمدت اورایه زنجیره مش بر ایشدی !) دیمشدر . بو آدم باباسلنی ترک ایتکه جسارت ایدرک سقولا سبتی فلسفه سنی تملندن بیقمغه کیریشدی . بر طرفدن (ارسطو) فلسفه سنه ، دیگر طرفدن (بطلمیوس Ptolémée) هیئتنه شدتلی اعتراضلر توجیه ایدرک بوتون کلیسا ارکانتی ، متعصبینی و اکثریت ناسی کندینه دشمن ایتدی . کندیسنی انکیزیسیون شدتله تعقیب ایتدیکی ایچون بر یرده او طوره مادی . جنوه ، ونديک ، میلان ، آلمان ، فرانسه و انکاره بی کزدی طولاشدی و هر یرده حریت پرورانه و حق پرستانه رطلرله عظیم

ایشته ده قارتك دهاسی ، باشلیجه بوموفقیتمنده در . یعنی کلیسانك شبه سنی قطعاً او یاندر میهرق (شبهه) یی ذهن متفکره ادخال ایتش اولماسنده در . اوندن صوکره جهان عرفانده وقوعبولان تبدلات - پك طبیعی اولهرق - کندیلکندن ظهوره کلمشدر . یوقسه (ادعای یقین) ایدن فیلسوفلره قارشى شها ايله مقابله ایدن منقد فیلسوفلر ، تاریخده اوقدر چوقدرکه بر (جماعت فلاسفه) تشکیل ایدرلر .

بونى برتشیه ايله آکلاتمق ایچون دهیه بیلیرم که : [متین براسکی قلعه دیوارینك فرجه سنده پیدا اولان برقیانیز ، یواش یواش بویوبوده هر طرفه كوك صاره رق ، نصل اوقوجه دیواری - گورولتوسزجه - تملندن صارصوب ، ییقار ، خراب ایدرسه ، ده قارتك (اصولی شبهه le doute methodique) سیده اسکی اصول عرفانك بوشاقلرینه اویله جه نفوذ ایدرك كوك صالمش نهایت (سقولاستیق) ده نیلن ، اومتین و غایظ زندان دیوارینی طارما طاغان ایدرك

ولولدی موجب اولدی . بوسرسری حیات اون سنه سوردی . فرانسه ده بالخاصه قرال اوچونجی هانزینك حمایتنه مظهر اولدی فقط طورمادی . ینه ایتالایه رجعت سوداسنه دوشدی . اوصیره لرده ایدی که ناپولی زادکانندن (موجه نیغو Mocenigo) نامنده بر آلقاق ، (برونو) یی ، اولادلرینه صربی اولق اوزره دعوت ایتدی . آدبجغز ناپولییه عودت ایدر ایتمز ، طوتدی انکیزیسیون مأمورلرینه تسلیم ایتدی . حبس اولوندی . عا که سی ایکی سنه سوردی . نهایت اعتراف جرم وتوبه ایلک شرطیله عفو اولونه جنی کندیسنه تبلیغ اولوندی . (جوردانو) بو تکلیفی شدتله رد ایتدی . اونك اوزرینه : (ممکن اولدینی قدر صرحتمله وعلی الخصوص قان دوکولیه رك تجزیه ایدله سی) ایچون حکم قلمی صادر اولدی . یعنی بونك معناسی (احراق بالنار) دیمکدی . اویله ده یاپلیدی . کمال سکون وجسارتله یانارکن (جوردانو) انکیزیسیونه بر سوز سولمشدرکه تاریخده مشهور اولوب قالمشدر . (سز بو حکمی ویریرکن بندن زیاده قورقوروسکیز !! . بن اونی دیکله مکدن اوقدر قورقیوروم !) دیمشدر . بوفاجعه مشهوره اون سکونجی عصر میلادینك برنجی سنه سنده واقع اولمشدر .

مشهور غالبه لك انکیزیسیون محکمه سنده کی طوری مشهور عالمدر .
(Vanini) دخی عینی سبب ايله اعدامه محکوم اولمش وابتدا دلی کرپه دن ايله قوپاریلدندن صوکره احراق ایدلمشدر . امثالی چوقدر . حریت فکریه لك انسانیت ایچون قاچه مال اولدیغنی بوفاجعه لر کوستریر .

عصر لردنبری محبوس اولان ذهن متجسسی اطلاق ایله مشدر : [بوهمت، جداً بویوکدر . بویوک فیلسوفک اصولندن - بالاخره - لزومی قدر بحث ایده جکم . شیمدیلک بوراده شو مهم نقطه یی دائماً نظر دقتکزده طوتوکز وایی بیلکیز که بویوکون ، اولا شبهه ایتک ، بزجه قازانلش برحقدر شبهه ایتهدن فلسفه یاپه مایز . فقط اونو نماییکیز ، یا گیلما ییکیز ! (شبهه) یوقلنی دکل ، بهمه حال بر وارلنی اثبات ایدر . چونکه هرشیدن شبهه ایده بیایرز ؛ لکن ، - هرشیدن شبهه ایده بیلن - وجدانمزدن ؛ شبهه ایدمه یز ! .. وجدانی بر (بدیهه اولی *vérité de première évidence*) اوله رق قبول ایتدکدن صوکره ، بزجه ادراک وتصوری ممکن اولان حقایقک جمله سنی اونک دلالتیه کف ایده بیله جکمزه دائر قویاً امید وار اوله بیلیرز .

ده قارتک شوتعلیماتی سایه سنده (تجربه) دخی - (اصول *méthode*) اولمی اوزره - او یله مهم بر حیثیت قازانیور که اسکی زمانلرده بونک بیکده برینی حائر اوله مامشدی .

ایشته دور اخیر فلسفه سنک خصایص اصلیه سندن بری (سوژه قتیف *subjectif* یعنی انفسی) اولماسیدر که اوده ده قارتک (اصولی شبهه سی) سایه سنده وجدانک بر (بدیهه اولی) اولمی اوزره تحقیق و قیامی نتیجه سیدر . چونکه حقنده شبهه ایدیه مهین بر حقیقت وارسه اوده آنجق وجداندر .

(تجربه *l'expérience*) دخی (اصولی شبهه) ایله علاقه داردر . مادام که اک مقنع ، اک قوی کورونن تصورات وافکارمن ، شبهه نک صدمات هجومه طایانه میور ، مضمحل اولویور . او یله ایسه انجق (تجربه) (قسطاس حقیقت *critérium de la vérité*) اوله بیلیر . تجربه نک زمین استنادی ده وجداندر . طویغودر .

شیمدی بوفصلک روح مباحثنی درت جمله ده تلخیص ایده بیایرز . فلسفه (حیات - ممات) مسائلله هر علمدن زیاده علاقه داردر . اونک ایچون حیات معنویه مزک ، انکشاف طبعیسندن طوغمش بر فعالیت ذهنیه در . علومک ترقیسی ایله لزومسزلنی دکل ، بالعکس لزومی ثابت اولور و ترقیات

علمیه نسبت‌بنده اهمیتى آرناز . چونكه (ناظم علوم) اودر . هیچ بر علم ، كائنات و حیات حقنده فلسفه قدر شمولی و بناءً علیه اعمال و آمازله هم آهنگ بر (فرضیه) ترتیب ایدوب بردستور عمل ویره مز .

سبب نشأته و منشأته كلنجه، [*] (بروفسور ویلیام آرچر بطلر . Will) Archer Butler) ك مختصراً دیدیكى كبی [اولا روح بشر حس واسطه سیله قابلیت استشعار حاصل ایدوبیلش و بالطبع ضرورات حیات سببیه ، كائنات محیطه ایله علاقه دار اولش . بدایت امرده آلمش اولدوغی شو استقامتی ذهن بشر ، بك اوزون بر مدت محافظه ایدرك كائنات مادیه دن اعراض نظر ایدوبده كندی حقیقتی دوشونه مه مش . بناءً علیه عقلك ، اك صوكره تعقل ایدوبیلدیكى شی كندیسی اولمشدر . اولاً تجسس ، مراق ، صوكره حیرت ، آره صره كشفیات غیر منتظره ، ذهنی تهییج ایدرك عالم محیطه علاقه سنی آرتدیرمش .] الی آخره !! نهایت (شبه) بوسبوتون تحقیقه رهبر اولش ...! علومده ، فلسفه ده بوندن طوغمشدر . شیمدی بونی تدقیق ایدوب جكز .

— ۵ —

ترقیات فکریه نك سیر طبیعیسی و مدنیت مغویه نك تاریخ تكاملی کوستر . بیوركه ابتداری ، فلسفه ، بالجمله معلومات مكتسبه نی شامل بر (علم محیط) ایمش . فلسفه نك اساطیر ایله شعردن ، عنعناتدن خرافاتدن ، ماصالاردن آیریلوب حقیله تمایز ایش اولماسی الاول یونان قدیمده كورولمشدر . حالوكه تاریخ فلسفه نك او دور ابتدائییه تعلق ایدن صحیفه لری آچیلنجه كورولویور و آكلاشیلیوركه بر فیلسوف ایلك دور مدنیتده معلوماتك هر نوعیله علاقه دار بولونور و هر شیئی تحقیق ایدر مش . مسئله ، ایستر حادثاته ، ایسترسه لدنیاته عائد اولسون ، اونلرك جمله سنه دائر بر فكر بیان ایلر مش !... مثلاً: زلزله نك ، ییلدیریمك نه دن ایلری كلدیكنی ، یاغمورك ، قارك ، طولونك

[*] رهبان صنفه منسوب ارلان بو ذات، کیریچ دارالفنونى فلسفه معلملرندن ایدی. شیمدی وفات ایشدر . مختصراً نقل ایتدیكم بو سوزلر (فلسفه قدیمه تاریخی حقنده قونفرانسار) نامنده کی کتابنك برنجی جلدندن آلمشدر .

نیچون وناصل یاغدیغنی ؛ بر بغدادی دانه سنک ویاخود بر چکر دکک رطوبتلی
 طوبراق ایچنده نصل جیملندیکنی ؛ دکرلرده مد وجذرک نه سبیله وقوعه
 کلدیکنی؛ نیچون منطقه حاره سکنه سنک علی الا کثر سیاه کوزلی، سیاه صاجلی
 اولدوغنی ؛ صوغوق مملکتلرده نهدن دها زیاده مائی کوزلی، صاری صاجلی
 آدمیر بولوندوغنی تدقیق ایتمکه چالیشدیغنی کبی وجدان بشرک حقیقتنی؛ اراداتک
 نصل بر قوت اولدوغنی ؛ حسیات وافکارمزرک نصل ، نرمدن ونه واسطه ایله
 حاصل اولدوغنی ده آ کلامق ایسترمش ! . . . عینی زمانده دخی حکومت ،
 عدالت، حق، باطل، خیر وشرکی الفاظ مجردنک متضمن اولدوغنی اعتقاداتک
 منشأ وماهیتنی بیلیمک مراقیله اساسلرینی امتحان ایدر ، وصوکرده ، جماعت
 انسانیه نیک بختیار ومسعود اوله بیلمه سی ایچون هیئت اجتماعیه نیک نصل تشکل
 ایتمه سی وافرادی نیک نه صورته هپ برآراده یاشاماسی لازمکه چکنه دأثر درلو
 درلو فکترلر بیان ایدرمش . (اعداد) دیدیکمز مقادیر وکیاتک ؛ (حسن)
 و(آهنک) دیدیکمز کیفیات مرغوبه نیک خارجهده مستقلاً موجود اولوب
 اولمادیغنی ده تحقیق ایله اوغراشیرمش . الحاصل مادی ، معنوی ؛ سیاسی ؛
 اجتماعی ؛ بدیی ، اخلاقی ؛ عضوی، غیر عضوی ؛ طبیعی ، صناعی ؛ شئونی،
 لدنی ، دینی ، اخروی ؛ الهی ، انسانی ؛ نظری، عملی اولمق اوزره ذهن
 بشری مشغول ایده بیله چک نه قدر مسائل وارسه، بر فیلسوف بونلرک جمله سی
 ایله بردن ذهنی مشغول ایدر وهر بری حقنده ده بر فکر سویلرمش !.

بوکون بویله بر غریب آدم چیه بیلمه ایدی ، حیرت ایدردک؛ وجودینه
 اینسانه مازدق ! اینانه مامقده دخی - یردن کوکه قدر - حقمز اولوردی !
 چونکه کائنات مادیه ایله برابر وجدان بشرک بالجله حادثاتی - ولوکه اجمال
 طریقیله اولسون - احاطه ایده بیله چک وصوکرده اومسئله لر حقنده - ولوکه
 تقریری ویاخود فرضی اولسون ! - برر فکر ویره بیله چک قدر خارق العاده
 بر ذکایه مالک برآدم بولونه بیلمه سه - بوکون - آرتق قطعاً احتمال یوقدر .
 معلومات بشریه نیک انواعی او قدر چوغالمش ، وساحه تدقیق او قدر توسع
 ایتمشدرکه ، تک بر انسان - نه قدر خارق العاده اولورسه اولسون - آرتق بو

کهکشان معرفتی ذهنه صیغدیره ماز !

فقط مدنیتك بدایتده و ذهن بشرك جو جوقلنی هنكامنده ایش ، بویه دكلدی . اووقتله ، معلومات مدونه (یعنی طوپالانمش ، ترتیب اولونمش بیلدی لر) نسبتاً پك آز و پك اهمیتسز ایدی . طبیعی دركه معلومات ، نه قدرمتنوع اولورسه ، آره لرنده کی مناسباتی تعین ایتك و اونلری یكدیكرینه قیاساً ملاحظه و تصنیف ایتك اوقدر ای اولور . فقط بیلدیكمز هم آ از همده مشوش اولورسه ، خصوصاً اونلرك صحنه دائرقطعی دلیللرده هنوز ابراز اولونه ماش ایشه اووقت اونلری بربرینه قیاس ایتكده خطایه دوشمكدن توقی ایده میه جكمز کی ، تضیف خصوصنده طبعی براساس بوله مایز ، چونكه اونلر آره سنده حقیقتاً اوصاف مشتركه نه کبی کیفیات ایشه ، ایشه اونلر هنوز تمامیه تعین ایده مه مشدر . حالبوکه اك طوغرو و طبعی بر تضیف بو اوصاف مشتركه اوزرینه مؤسس اوله بیلیر ؛ [*] بو کیفیات اصلیه و مشتركه کشف اولونما قجه ، یاپیله جق قیاس ، (قیاس مع الفارق) اولور ؛ یعنی بربرینه حقیقتده بکزمه مین واساساً علامت فارقه لرله ممتاز اولان شیلری - جهل و غفلتله - بربرینه بکزتمك و عینی صنفه داخل ایتك دیمك اولورکه پك معروف و پك مهم بر یا ککشلق در . مع مافیه ، معلومات کمتیاً آ از ، و کیفیتاده نا معین اولونجه اونلری احاطه ایتك ، البته زور دکلدر .

ایشته ، میلاددن تقریباً آلتی عصر اول استقلال کسب ایدن فلسفه بو حالده ایدی ؛ یعنی فلسفه نك موضوعاتی تشکیل ایدن مسائل مهمه معدود و اونلر حقنده کی معلومات ، هم مشوش ، همده محدود ایدی . اسکی فیلسوفلرک هر شیدن بحث ایتمه سنه برنجی سببده بوایدی ؛ دیمك که هر شیدن بحث ایده بیلمه لری ایدی . قولایلق بوندن ایلری کلیوردی . لکن براینکجی سبب ده ا واردی : معلومات صحیحه نك معیار حقیقیسی اولان (تجربه) ، او وقتله ، هیچ بر قیمت و اهمیت جائز دکلدی . ذاتاً اصولی ده معلوم دکلدی ؛ زیرا (اصول تجربیه) دخی

[۱] بوندن اولکی صحیفه لرده تصنیفك بزجه طبعی برعملیه ذهنیه اولدوغنی ذکر

ایتدم و مثال ویردمدی .

ترقیات فکریه وانکشافات مدنیہ ایلہ تکامل ایتش وبالخاصہ تجربہ یابہ بیللمک ایچون نیجه نیجه دقیق، نازک وحساس آلتلرایجاد اولونمشدر. صنایع ترقی ایتسه یدی بویله بره موفقیتہ امکان بولونه مازدی. بونلرک هیچ بری (طالس Thales) ویاخود (فیثاغور Pythagores) زماننده معلوم دکلدی؛ چونکه یوقدی. تجربہ نك علمده معیار صحیح اولمق اوزره اعتباره مظهریت قازانه بیللمه سی، دور اخیر مدینتک عرفه فتوحه مصادف اولمشدر. مصادف دیدم؛ یا کلش سویلدم! . . . تجربہ نك علمده هم (قسطاس)، همده اصول اتخاذا اولونماسی دور جدیدک فتحنه سبب اولمشدر! دیمه لی یم. واقعا اسکی زمانلرده (اسکندریه لی ههرون Héron d'alexandrie) و (سیرا کوزالی آرشیمد Archimède de Syracuse) کبی - مثلی نادر کلیر - دهاته علما، تجربہ بی رهبر تحقیق اتخاذا ایتشلر وبوکا مکافاتاً پک مهم حقیقتلر کشف ایلشلردی. فقط بو بویوک آدملر کندی زمانلری ایچون بر راستنا تشکیل ایدیورلردی. تجربہ نك اصول علم حیثیتی احراز ایده بیللمه سی مشهور (غالبه) دورنده ممکن اوله بیللمشدر. او وقت بر چوق کاشفین علما ایلہ برابر، بر چوق مجددین فلاسفه، عینی سیاق نظره اتباع وعینی اصولی رهبر اتخاذا ایدرک اسکی احکام اعتقادیه بی اساسندن صارصوب خراب ایتشلر و (دور انتباه Renaissance) ی فتح ایلشلردی. مثلاً (هاروهی Harvey) (دوران دم circulation du sang) کیفیت مهمه سنی بالتجربه کشف ایتمکه طبابت عتیقه نك منبای حیثیتی ییقمش، وافکار علمای (جالینوس Galien) حکیمک تحکمندن قورنارمشدر. (غالبه) ارضک کریتی وجوه مختلفه ایلہ اثبات ایتش وبر چوق قوانین مهمه بولمش؛ (قریستوف قولومب)، دنیانک بر نقطه سطحیه سندن حرکت ایتمکه، دوراً عینی نقطه ره رجوع ممکن اولدیفنه قناعت حاصل ایدرک هندملکتی زیارته چیقمش ویولی اوزرنده آمریقای کشف ایتمشدی. بوده دنیانک دومدوز ویا جادیر کبی برشی اولمادیغنی اثبات ایچون - تجربی بر یولدن - غالبه بی تصدیق ایلمشدی. فضه اوله رق کندی عالمزدن باشقه عالملر، باشقه انسانلر باشقه مدینتار اولدوغنی ده کوسترمشدی. فلسفه جدیده نك واضع حقیقیلری اولان (فره نسیس به قن، لورد وه رولام Francis Bacon)

(Lord Verulam) ، ایله (رونه ده قارت René Des cartes) دخی اوزمانك
 الك بويوك آدمارندن ايديلر . ينه فلسفه ده الك ممتاز چهره لردن (هوبس Hobbes)
 (gassendi غاسساندى) ودها بر چوق فضلا ، بر چوق صنعتكارلر وشعراهب
 بونلرله معاصر ايديلر . ذهن انسانيتده مشهود اولان اوعومى اويانيقلىق ، ايسته
 بويوزلرجه داهى نك محصله همتى در . علمده تجربه نك - اولجه سويلديكم كې -
 هم معيار صحيح ، همدە اصول اوله رق على العموم مظهر قبول اولماسى بودورك
 - بلكه الك مهم - صفت كاشفهمى در .

حالبوكه ايلك دور فلسفیده يوناني لر ، تجربه دكل ، عقلارينه ، حتى وهم و خيالارينه
 اعتماد واعتبار ايدرلردى . بر بحثده ، ايلرى سوروان بر دعوانك حقيقتنى
 اثبات ايچون ، كيمسه قالقوبده :

(اعتماد ايتمز ايسه ك ، اورمك تجربه ده ...)

ديه برتكليفده بولونمى خاطرينه بيله كتير مزدى . كتير سده سويله مكه جسارت
 ايدهمزدى . او وقت فيلسوفلر ك هانكيسى (بحث وجدل dialectique) ده
 جريزه لى ايسه ، حقيقت نامنه برشى تصور ايدوب فكرينى ايلرى سورر وچكه
 قوتيله ، منطق معرفتيله ذهنلره تحكم ايدردي .

دلائل تجربيه استناد ايتمه رك يوروتولن مباحثاتك نه قدر قولاي اولديغنى
 وهله (جريزه) ده نيلن (آغيز غلبه لنى) نك ، جهلاي اقناع خصوصنده ، نه
 بويوك ، نه فسونكار بر رول اويناديغنى كورمك وبالذات تحقيق ايتك ايستر -
 سه كنز ، بوكون دخى ممكندر : هر هانكى بر مسئله غامضه حقنده عندى ادعالر
 كودهن وهم متحكمانه ، همدە متهمانه بر صورته (كسديرمه) فكرلر بيان
 ايدن (عقلا) نك سويلدكارينه باقك ! . طورينه باقك ! ... بيكرجه سنه دنبرى
 دهاته انسانيتك تجارب وتدقيقات صبورانه سيله آنجق كشفى ميسر اوله بيلمش
 بولونان حقايقك نه درجه اهامل ايدليكى آكلارسكنز ؛ و كورورسكنز كه بر
 اكثريت جاهله نك قناعت سهيله و طفلانه سى ، تعيين حقيقتده مدار حكم اولونجه
 آغيز غلبه لى قدر قوتلى بر دليل ده اوله ماز .

فقط عوامی و عقلای عوامی ، شویله بر طرفه براقلم !... بر چوق داهی متفکرلر واردرکه تجربه لزومی قدر اهمیت ویرمه دکاری ایچون پک صریح بر حادثه طبیعی بیله یا کلاش تفسیر ایتشلر واوندن بوسبوتون آیقیری بر معنا چیقارمشلردر. تاریخ علم و فلسفه ده بو خطانک امثالی پک چوقدر . بناء علیه ایلاک دورده یتیشن مؤسسین فلسفه بی جدا معذور کورملی یز . قصور ، او بویوک آدملرده دکل ، اصولده و ذهن بشرک طفولیتنده در . یوقسه متقدمین حقیقتاً پک نافذ ، پک پارلاق بر دها ابراز ایتشلردرکه بو کون بیله ذکانک بودرجه سنه حیران اولویورز .

بناء علیه ایکنجی سببده تجربه علمیه نک فئدانی وهله اعتبارسنزانی ایدی ؛ ده بیلیرز!...

مدنیت معنویه ، یاواش یاواش تکامل ایتدجکه موضوعات علوم دخی تمایز ایتش و تجارب بشریه نک وسعتنه ، استقامتنه ، اصابتنه کوره الک اول ، الک بسیط و عمومی حقیقتلردن بعضلری کشف اولونمشدر . دیمک که انسانلرک معلومات ابتداییه سی بوکجی ضرورات طبیعییه تبعاً ترتیه کیرمش و کیتدجکه آریلوب تعین ایلشدر . یعنی ظن اولونماسین که مدنیت بشریه ، ابتدائی بر درجه بی آشوب ده ، - حادثات عالم حقده - انسانلرجه بر آز معلومات صحیحه حامل اولونجه ، فیلسوفلر ایله عالملر موضوع بحثلری تفریق و تعین ایتک ایچون بالانفاق قرار ویرمشلر و کشور معلوماتی پایلاشمشلردر . خیر!.. ترقیات مدنییه سایه سنده بو (تقسیم اعمال division de travail) کندی کندینه واقع اولمش! ذاتاً مشاهده و تجربه آرتقله ، هر درلو کیفیات اشیا و هر نوع حوادث آراسنده (مشابهت و مغایرت resemblance et dissemblance) نقطه لری ، دها ایی کوروله بیلمش ؛ دها ایی آکلاشیاه بیلمش! بویله اولونجه ، طیبی درکه بوتون حادثات مشهوده و کیفیات معلومه ، بو یکی ترتیه کوره تصنیف اولونمش . تصنیفده (اسالاساس) اولان قاعده ، بر چوق افراد متماثله آراسنده حقیقی واصلی بر وصف مشترک بولمق واونی ، بر صنف مخصوصک علامت فارقه سی اولمق اوزره تعین ایتکدر . [*]

[*] بوکتابک ایکنجی فورمه سنده بو تصنیف عملیه سنک - ذهن ایچون پک طبیعی ارلدوغنی سوبلش و بعض مثاللر ویرمشدم .

بوده انجق، اشیا و حادثات آراسنده - ظواهره باقیه رق ! - حقیقی و اساسی مشابهت و مغایرتلر کشف ایدم بیلیمکه اولور . ذهن بشر، حرکت طبیعی سیله - حتی چوق زمانلر غیر مدرک اوله رق - بو وادیده اکال تجربه ایدم کلمشدر واید طور، قده در . اکال تجربه ایتدیکده تصحیح تصنیف ایتدیکده در . حالا و حالا بویله در . علمده ترقی یولی بودر . بو کون بیله واقع اولان هر یکی کشف، - فائده نظریه سی اعتباریله ؛ - اسکی تصنیفی تصحیح و اصلاح ایتمکدن عبارت قالور . بالینه بالینک بالی اولمادیغنی، یاراصه قوشنک قوش اولمادیغنی کشف ایتک علم حیوانات ایچون بر بویوک خطوه ترقی اولمشدی ؛ فقط بو کشف نه بی اثبات ایتدی ؟ وقتیله ظواهر حاله باقوبده آلدانان و بالینه بی بالی ، یاراصه بی قوش صانان ذهن بشرک، یا کلش بر تصنیف یا یمش اولدوغنی اثبات ایتدیم ؟ .. بالینه ایله علی العموم بالقلرک، یاراصه ایله بوتون قوشلرک - خلقتاً یعنی تشکیلات اساسیه و بنیه تشریحیه اعتباریله - بر برینه بکزمه دیکنی کوسترمه دیمی ؟ پرلانطه نك صافی کومور اولدوغنی (لاووازیه Lavoisier) بالذات و بالتجربه اثبات ایتمکه عینی حقیقی میدان قویما دیمی ؟ .. اویله اولونجه تصنیف کایاً ده کیشمه دیمی ؟ .. عوامه : (پرلانطه صافی کوموردر) دیسه کز، سزه کولر ! .. حالبوکه باشنه برشی دکدر ! بیلیر سگبر ! .

اون طقوزنجی عصر میلادینک اک بویوک کشفی - شبهه یوقدرکه ! - [حرارتک حرکت نوعندن برکیفیت مخصوصه] اولماسیدر . حتی [حرارتک معادل میخانیکیمی (l'équivalent mécanique de la chaleur)] دخی بر دستور ریاضی ایله تعیین اولونمشدرکه ادعانک محق اولدوغنی اثبات ایدر . حالبوکه یاقین زمانه یعنی (۱۸۴۰ تاریخه) قدر (حرارت) ، (فلوریزستون flogiston) نامنده بر ماده لطیفه در؛ ظن اولونویوردی . بو کشف مهم حرارتی مادیات صنفندن آیروب قواصنفنه درج ایتمکه اسکی تصنیفی تصحیح ایتمش اولدی . خلاصه هر خصوصه ترقی حقیقی بو وجهله تحق ایتشدر . تاریخ علوم بوکا نامعدود مثاللر عرض ایدر . حتی (تاریخ علوم l'histoire des sciences) بو (وتیره تحقیق procédé d'investigation) ک بو کون دخی دوامنی کوستریر .

بویله اولونجه، یاواش یاواش، حادثات عالم دها طبیعی، دها معقول بر تصنیفه قابلیت اکتساب ایدیور؛ و بو تصنیف طبیعی سایه سنده هر جنس حادثات بر علم مخصوصك موضوعی اوله رق - کندی کندینه - تعین ایتش بولونیور، دیمکدر. معلومات تفصیلیه من بو درجه چوغالنجه - طبیعی درکه - اولنری بر کشی نك ذهنی احاطه ایده من اولویور. تجربه، تحقیقاتده (اصول Méthode) اتخاذ اولونونجه بر آدمك عمری، قدرتی ده بوکا کفایت ایده میور؛ بناء علیه بالضروره تقسیم اعمال حصوله کلیور. [*] ك بسیط، اك عمومی حادثاتی موضوع بحث ایدین علوم، اك اول (معلومات مشوشه Connaissances confuses) کتله سندن آریلوب کسب استقلال ایدیور. متخصصین علوم، هر علمك قواعد و اصولنی وضع و تعین ایتدکدن سوکرده هر علم کندی کندینه ترقی ایدیور. وینه طبیعی اوله رق - بردها - تقسیم اعماله معروض

[*] مشهور انکیز فیلسوف معاصر متوفی (هربرت سپنسر H. Spencer) بو مسئله حقیقه پك مهم بر رساله یازمشد. (۱۸۵۴ سنه میلادی سنده قوارترلی ره ویو Quarterly Review ده اوله طبع اولونمشدی؛ سوکره رساله شکنده دفعات ایله نشر اولوندی.) بو رساله سپنسر، علومك صورت ظهور و تکوننی موضوع بحث ایتش و بالاخره (تصیف علوم classification of sciences) نامیله یازدینی اثر معتبر ایچون او تدقیقاتی زمین استناد اتخاذ ایتددر. بو بحثك فیلسوفلر و علما عندنده بویوک بر اهمیتی واردرد. او سبيله درکه (فلسفیات یقینیه philos. positive) مؤسسی (اوغوست قونت A. Comte) ایله و (آلکساندر باین Alexander Bain) ودها سائر فیلسوفلر ایله (سپنسر) آره سنده سورکالی مناقشات وقوعه کلشدی. سپنسر، اطرافیه بویوننی احاطه و حین اداره ایتش و یچون (قونت) دن آیرلینفه داترده آریجه بر رساله یازمشد. (باین Bain) منطق کتایبده سپنسرک تصنیفی ردأ تنقید ایلشد. ماد یوندن مشهور (لودویغ بوخنر Ludwig Büchner) دخی فلسفه ایله علومك روابط متقابله سی حقیقه پك ایی بر مقاله یازمشد که، (طبیعت و علوم Natur und Wissenschaft) نام کتایبده مندرجدر. تصنیف علوم بحثی اهمیتی اولمقله یرابر بودرس کتایبده و خاصه ائیه پسته مولوژی) بحثنده یر بوله میه جنی ایچون تطویل مقالدن صرف نظر ایدیور. فقط، طبعه افندیلرک التماسی اوزرینه بومسئله ده دائر و قتیله ایکی اوزون مقاله یازمشد. (علوم اقتصادی) مجموعه سنده مندرجدر؛ اصحاب مراقبه اولنری - شجیدیاك - توصیه ایده بیلیرم.

اولویور . حکمت ، ریاضیات ، طبیعیات بوکا پک کوزل مثالر عرض ایدر ، خلاصه اونه دنبیری ترقیات علمییه وفکریه بووادیده وبوججه واقع اولمشدر . حالا عینی صورتله معلومات چوغالیور وضبط وربطه آلنه رق نظام آلتنه کیره- ییورکه اصطلاح معناسیله (علم science) اصل ، بوکا دیرلر .

فلسفه ایله علومک حقیقه روابط ومناسباتی آ کلامق وتعیین ایتک ایچون ، علمک تاریخ تکاملی رهبر تحقیق اتخاذ ایتکجه مجبورر . بوتقطه نظردن مسئله یی تتبع ایدن محققین ، (علومک تاریخ تکیونی La genèse des sciences) [*] نئی کوستره رک ادعا ایدیورلرکه اولافلسفه ، بالجه معلومات نظریه یی شامل ایش ؛ اونک ایچون ، اسکی یونان فیلسوفلری - براز یوقاریده عرض ایتدیکم کبی - هرشیدن بحث آچارلر ؛ هر حادثه دن بر مسئله چیقاریرلر واونی کندی خیالارنجه حل ایدرلرملش . چونکه معلوماتک او زمانکی درجه سنه کوره ، موضوعات علمییه ایله مسائل فلسفیه هرج ومرج ونا معین بر حالده بولونیور ایش . (قواسزلنی inconsistency) وبسیطلکی اعتباریله عادتا بر (سحابیه Nébuleuse) یه تشبیه اولونان بو قارما قاریشیک کتنه معلوماتدن ، اک اول (ریاضیات) دیدیکمز شعبات علمییه نک موضوعاتی آیریلشدر . فقط ریاضیات دیدیکمز زمان ، (جبر algèbre) ، (حساب تمامی و تفاضلی Calcul intégral et infinitésimal) کبی پک یوکسک ونظری اولان شعبات علمییه یی آ کلا- ماییکمز . اولر صوک زمانک فتوحاتنددر ؛ یاواش ، یاواش وعلی مراتبهم کشف اولونه بیللمش سیستملردر . بوراده ریاضیاتدن مقصد ، بوتون کمیات ومقادیر علمک اساسی تشکیل ایدن اک بسیط وابستانی حساب وهندسه در . بوشعبه علمییه نک سائرلرندن اول تأمین استقلال ایده بیللمش اولماسنه سببده ، موضوعات اساسیه سنک فی الحقیقه پک بسیط ومعین (معطایات données) دن

[*] موضوعات علومک ، اتفاق علما ایله تفریق وتعیین ایدلش اولدوغنی ایما واشراب ایده جک صورتده بیان مطالعه ایله بن بعض جدی متفکرلره تصادف ایدم . زنه ار بو خطایه دوشمیه سکیز . مشهور (ژان ژاک روسو J. J. Rousseau) نک پک معروف اولان (عهد اجتماعی contrat social) خطایه ایته بودر .

عبارت اولماسیدر. (اعداد les nombres) و او اعداد آرد سنده کی نسب ثابتہ کبی!... سو کره کندی کندینه ، عظیم ترقیاتہ مظهر اوله رق ، ریاضیاتہ (علوم حکمیہ sciences physiques) یهده تاثیر ایتش و بویوک یاردیمی طوقور۔ نمش در . علوم حکمیہ، اول امرده ، قونترولسز تجربہ لک محصولی ایکن یعنی صرف (تدریسی empirique) ایکن ، سو کره تصحیح اصول ایله (تجربی expérimentale) اولمش ودها سو کره اصول ریاضیاتک تطبیقاتی سایه سنده (علوم صحیہ ثابتہ sciences exactes et positives) درجه سنده ارتقا ایتمکه حیثیت حقیقیه سنی قازانمشدر . یوقسه بذایتده فلسفیاتدن معدود بولوندوغنده شبهه یوقدر . میلاد عیسادن تقریباً بش عصر اول شهرت شعار اولان (فیثاغور حکیم Pythagore) جنوبی ایتالیا ده کائن (ئله آ Elée) نام یونان مستملک سنده . بر مدرسه تأسیس ایتشدی که تاریخ فلسفه ده (ایتالیا مدرسه سی Ecole Italique) دیه پک معروفدر . بو مدرسه نك مذهب فلسفی سی اساساً و تماماً (ریاضی) ایدی واربانه (ریاضیون oi μαθηματικοί = les mathématiciens) دیر لر ایدی که فلسفه نك منحصر آ ریاضیات احکامنه مستند اولدوغی دور تفکره مثالدر . کذلک بو حکیمدن تقریباً بر بحق عصر سو کره یتیشن و فلسفه نك استقلالانی خیلی دن خیلی تأمین ایدن (افلاطون) بیله کندی مدرسه سنک قبوسنه (ریاضیات بیلمه یین بورایه کیره مز!) جمله سی یازدیر مشدی . حالبو که او مانلر ریاضیات فلسفه دن آریله رق، چوقدن بر علم مستقل اولمشدی . فقط فیلسوفلر، او علمی ینه بر شعبه فلسفه اوله رق تاقی ده دوام ایدیورلردی .

بو ایتالیا مدرسه سنک رقبی اولان (مدرسه یونانیه Ecole Ionique) نك تعلیماتی ده نظر دقنه آلبرسق ، ینه عینی کیفیتک عینی صورتله وقوعه شاهد اولورز . بونلر واقعا (ریاضیات) ایله دخی علاقه دار ایدیلیر . لیکن (طبیعیون == oi φυσιολόγοι = les Physiologues) عنواناتی طاشیورلردی؛ چونکه تجرئ حقیقتده مبدأ حرکتلری طبیعت ایدی . نظریات فلسفه لر دخی طبیعاته مستند بولونویوردی . او وقته کوره بوتعبیر، علوم مجرددن ماعدا بالجله معلوماتی شامل ایدی؛ اسکی فلاسفه طبیعیون، علامت جویه دن، ییلدیزلردن، کره ارضک احوالندن،

عالم عضوی به و احوال روحیه عائد حادثاتند - بالکلیه - بحث ایدر لرردی که بوصف حادثات هر بری ارتق - بوکون - بر علم مخصوصک موضوعی تشکیل ایدیور. هیئت، قوزموغرافی، طبقات الارض، فیزیولوژی، پسیقولوژی، الخ!... کبی!... یوقاریده دیدیکم وجهله ریاضیاتی متعاقب، علوم طبیعی و حکمییه - ایکنجی طاقم اوله رق - فلسفه دن آریلوب بوسبوتون تعین ایتکه باش - لادی که بو ترقیات (دور انباه) ده واقع اولمشدر .

علم روح، ارسطو ایله طوغمشدی ده نیله بیلیر. زیرا بو استاد، هر کسدن اول (περι ψυχής یعنی: روحه دائر) بر اثر یازمشدی. فقط (روحه دائر) اولق اوزره موضوع بحث ایتدیکی مسائلی بالخاصه فلسفه مباحثندن آیرمامشدی. نته کیم عینی زمانده (علائم جویه météorologie) دن ده بحث ایتک اوزره بر کتاب یازمشدی، و اوکی حادثات دخی - کندنجیه - فلسفه موضوعاتندن معدود ایدی. قرون وسطایه قدر، (علم روح)، ارسطونک بر اقدینی کبی قالدی. حتی اولانوفلاطونیلر و شرقده بالخاصه ابن سینا، مباحث روحیه یی - ایچیه - قورجالادقلری حالده، پسیقولوژی، ینه بر علم مستقل اوله مادی. نهایت اون سکزنجی عصر میلادی نک بویوک فیلسوفلرندن (دهی وید هیوم David Hume) (۱۷۱۱-۱۷۶۰) بالخاصه مباحث روحیه به انظار دقتی جلب ایتمکله برابر، کندی همیله، اونی بر علم مستقل صایله حق درجه یه کتیردی. بوکون ایسه باشلی باشنه بر علم در؛ علی الخصوص (Psycho-physiologie)، زمانمزک عالم فیلسوفلرندن (Wundt ووند) وائالی کبی مدققینک تحقیقات فعایه سی سایه سنده بر علم تجربی اولمشدر .

کیمیایه کلنجیه، بو علمک تاریخی، شو طرز تکامله، بلکه اک کوزل و واضح بر مثال اولور. (الکیمیا Alchimie)، بدایتده خرافات ایله قاریشیق، اسرارانکیز بر مجموعه معتقداتدن عبارت ایدی، (علم جفر)، (علم نجوم)، (علم خواص) کبی فالجیلقله دخی غایت صبیقی علاقه سی واردی؛ هر ماده دن آلتون یاغمه قادر بر (سحر Magie) در ظن اولورددی. هر کسه اسراری فاش ایدلمز، دائما کیزلی

طوتولوردی. [*] اونك ایچون بودرلو یالان علملره (علوم غریبه) (occultes sciences) نامی ویرایردی. (هرمس (Hermès Trismégistos) زماننده بوسبوتون بو (سحر بازاقی علمی). برعجیب فلسفه شکلی آلدی. فقط هرشیئی آلتونه تحویل ایتک خرسنه طوتوله رق تدقیقاته کیریشنه نلر چوغالدینی ایچون معاملات کیمیویه ایله کوندن کونه الفت حاصل اولمغه باشلادی و بوالفت تجارب عملیه یی - بانضروره - تنظیم وتنسیق ایتمکه خادم اولدی. حتی تصادفی اوله رق بعض مهم کشفیاتده موفقیت الیوردی. عربلر زماننده الکیمیا بو درجه یی بولمش (تدریجی) اوله بیلشمیدی. او زمانک اک مشهور الکیمیایئونندن (ابو جابر بن حیان الصوفی) حامض آزوتی کشف ایله مشدی. اون سکزنجی عصره کانجه یه قدر بوعام بویله (تدریجی) بر درجه ده قالدی؛ مع مافیه بو ساحه ده خیلی مهم کشفیات اجرا ایدیله بیلدی. نهایت مشهور (لاووازیه (Lavoisier))، (کیفیت تخمضی (Poxidation)) کشف ایدرک، بالجله حادثات کیمیویه نك حقیقت اصلیه سنی تعریف ایتمش اولدی. او وقت اصولی ده کندیلکندن تعین ایتدی و (تجربی) بر علم صیره سنه کچدی. اک مهم قوانین نابتیه سی بولوندی. حاصلی او قدر باشقه لاشدی که، او اسکی شارلاتانلقدن تمیز ایتک ایچون اسمنه ارتق (کیمیا) ده نیلیدی. طوغرو یولی بولونجه، بو مرحله ترقی ده دخی قالمادی. اصول ریاضیه یی قبول وتطبیق ایدیلدن بری بر (علم صحیح) اولیوردی. اساساً تجربی اولقله برابر، بو کون برده (کیمیای نظری) واردر که عاداتعلوم مجرددن

[*] شعرا و مشاخ صوفیه نك سزیندی اولان مولانا جلال الدین رومی نك شو بیی معروضاتی تصدیق ایدر: مشار الیه منویده (از کرامات بلند اولیات + ازلین شعر است و آخر کیمیاست) دیور که شعر ایله کیمیانك (سحر) دکل (کرامت) درجه سنده تلقی ایدلکیکی اثبات ایدر. فضله معلومات ایچون، مشهور (Berthelot) و (Hoëffer) ه باقیکنز. (هرمس) اسمی شرقده شهرت شمار اولشدر. حتی برهان قاطع نامنده کی لغت کتانه بیله کچمشدر. تاریخ حیاتی واصلی فصلی پک معلومز اوله مایان بو غریب آدم الکیمیایئونك اک بو وکلر ننددر. دائماً بو علمی (سر) طوتاردی. اونك ایچون اسمی اصطلاح اولشدر: (Hermétiquement fermé) صیم صقی قابلی دیکدر. عربلر صقی صقی به قاپانان شیشه قاپاتلرینه (هرمادجه) دیرلردی. بوتون بو تعبیرات هرمس کله سندن آلمشدر و بو آدمک نفوذینی کوستیر.

صابیلر و مسائل کیمیویه ارتق ریاضی دستورلرله حل ایدیه بیلیر. عینی زمانده بو تکامل، کیمیاده تقسیم اعمالی ده اقتضا ایتدی. (کیمیای عضوی)، (غیر عضوی)، (کیمیای صناعی)، (کیمیای حیاتی "biochimie") کبی 'عبات معینه سی واردر.

موضوعات علومک بو صورتله تعین و تمایزینی، و تتبع حادثاته باضروره تقسیم اعمال و قوعیله معلومات بشربه نك نسق و انتظام اوزره ترتیه کیردیکنی، الحاصل علومک فصل تولد و تشکیل ایتمکده بولون دوغنی تحقیق ایتمک ایچون، ترقیات فکریه تاریخی قاریشدیرمه بيله لزوم یوقدر. بو تکامل - بوکون - کوزومزک اوکنده واقعالویور، چونکه اوتهدنبری دوام ایدوب طورویور. آردی آراسی کسيلمه مشدر. مثلاً :

(علوم اجتماعیه Sciences sociales) صنفنده داخل بولونان بر چوق علومک قسم کایسی، واقعا چوقدنبریدر، تعین ایتشدی. ارسطونک (politique) دیدیکی مجموعه معلوماتن بر چوق شعبات علمییه آیرلمشدی. فقط بالخاصه (علم اجتماعی Sociologie) اولا (اوغوست قونت Auguste Comte) ک و هان اونی متعاقب سپنسر (H. Spencer) ک همتیله وجودبولدی و یکنی بر علم مخصوص اولدی. حالبوکه (علم اقتصاد Economie politique) - بعض اسباب ضروریه دن ناشی - تقریباً بر عصر اول (آدام سیمث A. Smith) طرفندن - اصول و قواعد اساسیه سیله - وضع ایدلمشدی.

(باقه ریولوژی Bactériologie) و (اوسه آنوغرافی Océanographie) ودها بعض امثالی کبی عاملر ایسه بزدن اول طوغما مشدر. بز اونلرک صورت تولدینه شاهد اولدق ..!

الی آخره!

بومعروضاتم، سزه بو بحثدن بر مثال ویرمک ایچوندیر. بناءً علیه بو قدر تفصیلات کفایت ایدر. یالکیز شوراسی خاطریکیزده قالسین که بوتون بو علوم، وقیله فیلسوفلرک موضوع بحثی تشکیل ایدن (هرج و مرج) برکتله معلوماتن آیرلمشدر. [بو کونکی درجه کمال اوزره او کتله معلوماتده مندرج بولونیور.

لردی [دیمک ایسته میورم. صاقین اوپله ظن ایتیه سکز! ... اواسکی زمانلرده فلسفه مباحثنی تشکیل ایدن معلومات مشوشه، برچوق مسائل مختلفه نی شامل ایدی. بومسئله لر دخی (غیر متجانس *hétérogène*) برسوری حادثات طبیعییه متعلق بولونیوردی. تجارب ایله برابر معلومات بشریه نك ترقیات طبیعییه سایه سنده بونلرک ایچندن هربری یاواش یاواش آیرلدی وباشلی باشنه ترقی ایدرک بوکونکی حاله کلدی]، دیمک ایستورم که حقیقت ده بودر.

او حالده فلسفه ده - بالخاصه فلسفه یه عائد اولمق اوزره - نه قالدی؟ .. وبویله کیدرسه - ننه کیم کیده جکدرده! ... - نه قاله جق؟ خلاصه (علومک ترقی سی وتعددی فلسفه نی کلیاً نحو ایدوب اورطه دن قالدیره جقمی؟)

ایشته شیمدی تحقیق ایده جکمز مسئله بودر. علوم مختلفه نك نصل تکیون وکسب استقلال ایتدیکنی، تفصیلات سابقه ایله البت ا کلا دیکز. بو حقیقتی، بزلردن چوق اول، عربلر اکلامش وتسلیم ایتشلردی. (تمایز العلوم بتمایز الموضوعات) جمله سی بو کیفیتک عربجه بردستور افاده سیدر. ومشهوردر. بوکون بو کیفیتک (مبدأ تکامل *Le principe de l'évolution*) ایله صیقی صیقی به علاقه دار برائر ترقی اولدوغنی، حتی هر طرز تکاملک اقتضا ایتدیردیکی (تخلف *différenciation*) نتیجه سی عد ایدمک لازم کله جکنی بک اعلا بیلورز.

شو تقدیره کوره علوم، کیتدجکه، حادثات عالمی، جنسلرینه کوره آیروب موضوع بحث ایده جک وبناء علیه اصلاً یکپساره اولان بو کائناتی - تجلیات متنوعه سنه نظراً - اقسامه آیروب ده محدود وممین بر دایره ایچنده تتبع ایله جک ومنحصراً بر جنسدن اولان حادثات متماثلنک قوانین نایسته سنی بولمغه چالیشه جقدر. علمک دایره سی - ا کلا شیلیورکه - (اختصاص *spécialité*) در. فلسفه نك غایه سی بوتون رموز کائناتی وسرائر حیاتی - بر نظر شامل ایله احاطه ایدوب، (وارلق دیدیکمز معمای مهم) حقنده معقول بر نظریه ترتیب ایده بیلیمک در. فائده سی ده، او نظریه یه کوره بر (دستور عمل) اقامه ایدوب - ممکن اوله بیلدیکی

قدر - فطرتك ايجابات احكامنه اتباعاً يا شايا بيلمكدر. انجق بو شرط اساسی به رعایتله مسعود اوله بيله جكمزه اينانورز .

علوم، كائنات نامتناهيك محدود بر ساحه تجربه سنده، محصور بر دائره اختصاص ايچنده، وارلنك انجق برنوع سلسله حادثاتق تحقيق وتفحص ایده. بيلمكله، بويه بر (نظريه عمومیه *théorie générale*) ترتيب ایده بيليرمی؟.. طبیعی درکه ایده مز؛ چونکه عام، اختصاص ديمكدر وبو اختصاص نه درجده تعین وتحقق ایدرسه، بر عام او درجه (مضبوط؛ متسق و صحیح) اولور . یعنی شایان اعتماد اولور . او حالده علومك، كائنات حقهده کی نظری، اونك آنجق بر وجهه تجلیسنه کوره محدود اولق ضروریدر. نصلکه بونی-اشارتاً- اولجده سريله مش ایدم . اونك ایچوندرکه بويه عمومی بر نظریه- لازم ایسه - اونق فلسفه دن بکلیه جکزر .

عجبا فلسفه دیدیکمز مجموعه معلوماتك موضوع حقیقی، علوم متنوعه نك موضوعندن غیری برشمی در؟.. اکر او یله ایسه (فلسفه) دخی علوم متنوعه عددانده داخل در . یعنی اوده باشلی باشنه قثم و موضوع مخصوصی معین، بر علم مستقلدر؛ ديمك اولور . بناءً علیه تصنیف علومده موقعی بولوب تعین ایتك لازمکلیر . یوق، موضوعی دیگر علومك موضوعاتندن عبارت ایسه، بويه بالجمله علومك مباحثی - طاقیله - بنماین بر عام، آدم عقلی تحقیقاته موفق اوله میه جنی ایچون حقیله (یعنی اصطلاح معنا- یله!) بر علم حیثیتی حائر اوله ماز؛ وشو تقدیر کوره، مادام که فلسفه نك، من حیث المجموع (یعنی طویدن) وسطجی بر نظره تبع ایتك دعواسنده بولوندوغی شو (وارلق عالمی) نی، علوم متنوعه، تجلیات مختلفه سنه کوره، موضوعاته آیردق بالاخصاص تدقیق ایدیور و کائناته دها یاقیندن باقه بیایور، فلسفه نك تحقیقاتنه لزوم قالماز؛ چونکه علوم دها انی سنی باقمه موفق اولویور؛ ديمكدر .

او حالده مقام تعریضده شو ملاحظه وارد اوله بیلیر :

[(فلسفه) ده نیلن شی، معنای صحیحی ايله خصوصی بر (علم) می در؟ دکلیدر؟.. بر علم ایسه موضوعی - کندی دائره صلاحیتنه تخصیصاً - تعین

ایدیکز ؛ تصنیف علومده یرینی کوستریکزر. برعام دکلسه، حیثیت حقیقیه سنی وهله لزوم وفائده سنی بیلدیریگز!... خصوصاً تکامل معلومات و تکمیل اصول ایله علوم، کیتدیکه تعین و اختصاصه میل ایدم جکی ایچون، ایلریده فلسفه نك فصل بر زمین استناد بولوبده وارلغنی محافظه ایدم بیلجکنی ونه دن دم اوره. بیلجکنی دوشونوکرز و بزہ بونی آ کلاتیکز!....]

ایشته افندیلر، اسکی زمانلرده هر علمدن زیاده قیمت و اعتباره مظهر اولان فلسفه نك، هر کسدن فضله حرمت و اعتیاده شایان کورولن فیلسوفلرک بوصوک زمانلرده معروض قالدقلمری اک جدی اعتراض بوندن عبارتدر ؛ ده یه بیلیرم. بو اعتراض پک جدیدر ؛ چونکه فلسفه نك حیثیت ذاتیه سنی انکار و لزومی استخفاف ایدیور.

فقط، غریبدرکه فلسفه بوندن قوت آلیور ؛ زیرا بواعتراض - اورطیه - اوایله بر مسئله فیلاتوب آتیورکه - ماهیتی اعتباریله - بالخاصه فلسفه مسائنندن صاییلیر؛ و بوکمی مسائل عمومی بی حل ایتک صلاحیتی، انجق فلسفه نك ایشی در. دیمک که، بز بواعتراضده (و امثالی وارسه ایشاند) فلسفه نك لزوم و بقاسنی تأیید ایدر بر دلیل قوی ده بوله بیلجکزر. اونک ایچون، مندرناً، بونی بر مسئله اوله رق موضوع بحث ایدم جکزر. ذاتاً اسلاف و معاصرینمزدن برچوق فیلسوفلر مجبوراً بو بحثی آچمشلردر ؛ بن اولنلرک فکر لرینی سزہ خلاصه نقل ایدرک کندی دوشوندکارمی ده - علاوه - بیان ایدم جکم.

دیدیکم کبی، همان هر فلسفه کتابزده بو تعریضی و امثالی رد ایتک ایچون ملاحظات مهمه واردر. فقط معاصر فیلسوفلر میانزده، بو بحثی اطرافیه ضبط و احاطه ایدوبده لایقیله تنقید و مناقشه ایله ی - بنم تقدیرمه کورده - (پاوولسن Paulsen) در. [*] اولان و سواکره دیگر بعض معروف فیلسوفلردن بعض مطالعات آله رق اولنلری شرح و تنقید ایدم جکم.

[*] براین دارالفنونی فلسفه معلمی اولان بو ذاتک اسمی یوآریده، بربرده کچمشدی. (مدخل فلسفه) نام اثرندن بعض ملاحظات نقل ایتشدم. شیمدیکی موضوع بحثمز دخی یته او اثرده بویوک بر باب تشکیل ایدر.

یوقاریده کی معروضاتمدن - طبیعی - پک قولای آ کلامش اوله جقسکیز - درکه ، بوتون مسئله (فلسفه بر خصوصی علم می در ؟. دگلی در ؟.) سؤالنه منجر اولویور و بو سؤال فیلسوفلره توجیه ایدلمش بولوندوغی ایچون، جوابی ویرمک دخی انجق اولنره دوشویور .

فیلسوفلر بو سؤاله ایکی صورتله جواب ویرمشلردر . ویربان جوابلار - طبیعی ! - فلسفه نك وجه تاتی سنه کوره واقع اولمشدر ؛ یعنی کایشی کوزل بر جواب اولسون دیه سویلنمش سوزلر قییلندن دکلدر . ذاتاً انجق بویله اوله - بیایردی ! زیرا بالخاصه فلسفه ایله مشغول اولان هر (صاحب - مسلك) متفکر ، - کندی نقطه نظر نجه - فلسفه نك موضوعی ، غایه سنی ، فائده سنی ، اصولانی تعیین و تعریف ایتمکله بویله بر (سؤال مقدر) ه ضمناً جواب ویرمش اولویور دیمکدر .

(فلسفه ، علوم متنوعه دن آیری غیری بر شیدر !) دهینلر اولمش ... ! بویله بر ادعا ایلری سورولونجه بوفرک (شکل و اصول forme et méthode) اعتباریله می، یوقسه موضوع بحث اعتباریله می تحقق ایتمکده بولوندوغی آ کلاتمق مجبوری حاصل اولور .

« بوایکی سیاق نظره کوره باشلیجه ایکی ادعا ایلری سورولمشدر. ادعائک برینه نظراً فلسفه نك ، کندینه خاص بر ساحه حقیقتی واردر که باشقه بر علم اوراده دعوائی صلاحیت ایده من . بناء علیه تصنیف علومده فلسفه آیری بر علم درکه سائرلریله روابط منتظمه عرض ایدر. [یعنی کندی باشنه بر موضوع حقیقتی واردر و اونی تبیع ایده جک بر زمین تحقیقی ده واردر.] دیگر ادعایه کوره فلسفه نك موضوعی سائر علومک کی نك عینی در . فقط فلسفه اونی باشقه بروجهله تلقی و برطرز دیگرده تبیع ایدر. [یعنی فلسفه ، علوم سائرده دن انجق شکل و اصول اعتباریله تمایز ایدر .] »

« بوایکنجی ادعا ، عصر حاضرک (اون طقوزنجی عصرک!) نصف اولنده تحکم ایتمشدی . (فلسفه نظریه philosophie spéculative) نك دعوائی بو

ایدی ، [تحقیقات تجربیه و بناء علیه کشفیات علمیه قطعاً اهمیت ویرمیه رك صرف قدرت تصور له حقایق اشیایه واقف اوله بيلمك امیددن قوت آلان] بوفلسفه نظرند بون شو (وارلق عالمی) ، ایکی وجهله قابل تبعدر . بری فلسفی ، دیکری ده علمی بر سیاق نظرله !.. یعنی بری تصویری ، دیکری ده تجربی بر صورتده !..... علمك وظیفه سی ، (اصولی بر تجربه expérience methodique) سایه سنده حادثات (یعنی جزئیات) حقنده اکتساب معلومات ایتمکدر . فلسفه نك وظیفه سی ایسه - کندینه مخصوص بر (و تبره تحقیق procédé d'investigation) ایله - اشیانك حقیقت ذاتیه سی و یکدیگری آراسنده کی روابط باطنیه کشف ایتمکدر . [*]

(پاولسن) شونقل ایتمیکم سوزلری ایله - بو ایکی طرز تاقی حقنده - صریح و قیصه بر فکر ویردکن صوکره ، فلسفه یی بر علم مخصوص اوله بر قبول ایدنلری رد ایدیور بو خصوصده کی ملاحظاتی ، اعتقاد زمانیه ترجان اولقی اعتباریه طوغرودر . خلاصه افاده سی شودر :

[صرف تصویری بر فلسفه دن ، انسانلرك صدقی صیریلوبده ، امنیتی منسلب اولونجه ، فلسفه نظریه دخی اعتباردن ساقط اولدی . تجربه یه محتاج و مفتقر اوله برقی ، صرف معقولات و (مفهومات Concepts) ی - منطقی بر صورتده - اعمال ایتمکله حقیقت اشیایه دائر (معلومات انیه connaissance pariori) قازانمق امکانه ، زمانمز آرتق اینانیمور . حقیقت ، بر اولدینی کبی ، اوکا ایصال ایدن طریقده بر اولقی کرکدر ؛ اوده (ترتیب معقولاته الویریشلی بر تجربه rationalising experience) در . فیلسوفلرم مخصوص بر (شاهراه Royal road) یوقدر . صرف تصور ، ینه معلومات اوزرینه مستند بر دوشونوشدر ؛ فقط دوشونمهنك بو کولمیش چارپلش بر صورتی در . بونده زمین استناد اولان معلوماته کلنجه ، ینه محصول تجربه در ؛ اوله اولدوغی ، نظریون نمندده مسلم اولماسه بیله !....]

[*] (Paulsen) ك (فلسفه یه مدخل Introduction to philosophy) نام اترندن وانکایزجه یه ترجمه اولونمش نسخه سندن اقتباس ایدلشدر .

(پاؤولسه‌ن) یکی برشی سویله‌مش اولمور؛ - بوتون معلوماتك تجربه حسیه محصولی اولدوغنی ادعا ایدن- (فلسفه تدریبه *Philosophie empirique*) اربابك دستور معروفی تکرار ایتش اولمور. زمانزده - فی الحقیقه - اعتقاد راجح بودر. ایلریده مذاهب فلسفیه بحثنده بو کبی عقاید مشهوره‌نك قیمتی تقدیر ایده‌بیلیمك ایچون تحلیلات و تفصیلاته کیریشه جکم.

شیمدی بحثمزه دوام ایتزدن اول شو نقطه‌ده براز توقف ایدوب - یوقا- ریده کچن - فلسفه تعریفانه ارجاع نظر ایتلی یز. بونده مجبوری حاصل اولدی دیمکدر. چونکه، زمانزك شو حکمی - مطلقا - مصیب ایسه، تعریفات مذکورده‌ن هانکیسنی چوروکه چیقاره‌جغمزی، شیمدی، بك اعلا تعیین ایده‌بیلیرز.

کچیکی درسلی اونوتماش ایسه‌کز، درحال ده‌قارتك تعریفی واونك دلائله قینالی زاده‌نك ونصیرالدین طوسی‌نك ملاحظات و درخاطر ایده‌جکسکیزدر. بیلورسکیزکه ده‌قارت، فلسفه‌بی تعریف ایچون: [مبادی اولادن بالدهاه استدلال اولونان حقایقك عامی در]. دیمشدی. مبادی، بوفیلسوف نظرنده، صرف عقلی و (انی *apriorique*) برطاقم حقایق کلیه ایدی که یقیناندن اولمله برابر، قطعاً محصول تجربه دکل ایدی. حتی تجربه‌ایله هیچ برعلاقه‌می یوقدی. بلکه تجربه‌یه رهبر، وعینی زمانده ناظم و مقیاس ارلان شی، ایشه او مبادی ایدی. بونلره ده‌قارت (افکار و هییه *idées innées*) دیمشدی، یعنی تجربه‌دن طوغنامش، فقط، الله طرفندن انسانه موهبه بخش اولونمش، برطاقم حقایق نایته و قیمه اولمق اوزره اونلری قبول و تسلیم ایلشدی. ده‌قارت ایشه بومبادی اولادن بر جوق حقایق چیقاریور و اونلری بالکیز منطق بر صورتده استخراج ایدیور که (عقلیه *rationalisme*) و (فلسفه نظریه *philosophie spéculative*) دیدکلری ایشه بو طرز فاسفی در. (پاؤولسه) نك، ردیه‌سی بوکا قارشی در. بزم (قالی زاده) نك (خواجه نصیرالدین طوسی) دن نقل و روایت ایتدیکی تعریف دخی (*rationaliste*) جدر. [روش حکیم و نظر فیلسوف، تضایای عقل صرف تبغه مقصور] [*] اولونجه،

[*] یوقاریده کچن فصللرده فلسفه تعریفانه تکرار باقیکز.

كشـف حقيقت ايچون تجربه نك ذره قدر اهميتي ويا رديمي اوله ماز . چونكه
فيلسوف ، حقيقتيه واصل اولوق ايچون - كندينه خاص اولان - بو شاهانه
يولدن، كسديرمه كيدر و كوزيني آچوب كائناته باقمه بيله حاجت كورمه دن او
كائناتك حقيقتيني كشف ايده بيلير. آرتق تفرعات و جزئيات اموره تعلق ايده بيلن
تجربه يه البته اهميت ويرمز . او ديكنلي و طولامباج يولدن كيتمكه تنزل ايتمز .

كورويورسكزكه پاره لسه نك ادعاسيله (rationalisme) مذهب فلسفي سي
طابان طابانه ضد دوشويور . بو آلمان يروفسوري بوكون مقبول اولان اصوله
طرفدار و اكثريت اوزره تحكم ايدين اعتقاده ترجمان اولدوغى ايچون، ده قارتك،
نصيرالدينك ، قينالى زاده نك و بوتون فلسفه نظريه اربابنك بو مسئله حقنده
شايع اولان دستور اعتقاديني چوروتيور و تماماً اعتباردن دوشوريور . [*]

[*] زمانزده على العموم اذهان متفكرينه حكمفرما اولان بوعتقاد، (راسيوناليزم)ك
رواجنه كلياً كساد ويرمشدرد . بوكاده سبب بالخاصه زمانزده علومك فوق العاده بر
درجده ترقى سي وانكشافاتي و اصول تحقيق اوله رق تجربه نك، عادتا، هردا اثره معلوماته
(معيار حقيقت) اولوق حيثيتيله مظهر اولدوغى اعتباردر . فقط (rationalisme)
بوسبوتون متروك ومنسى قالمشدر ظن اولونماسين ! بوكون حالا بويوك فيلسوفلردن
بعض نوادر ، راسيوناليزمه مائل ، وبالخاصه (مابعدالطبييات)ك ، (تجربه فوقنده بر
طاقم مسائل اقصى) ايله مشغول بولوندوغنه قائلدرلر . (افكار و هييه (idées innées)
اعتقادي اوزرينه مؤسس بولونان (راسيوناليزم مدعاسي (la thèse rationaliste) ني،
اك اول ابطال ايتمكه قالفيشان ، مجدد مشهور (بهي قن Bacon)، نام انكليز فيلسوفى
ايدى كه براز يوقا ريده اسمي كچمشدرد . (فلسفه تدريبيه (Phil. Empirique) نك مؤسس
حقيقتيسي اولان بو ذات ، اولافدن ارسطوي شذتله تنقيد ايتمش و نظر اعتباردن دو -
شورمشدى . ارسطو ، (راسيوناليزم)ك پيري ايدى . (بهي قن) بو استاد اولى باطيرمق
ايچون ، مشهور (ديموقريت (Démocrite) ي چيقارمش و زياده سييله مدح و تحسين
ايتشدى . ارسطودن اول كلش اولان ديموقريت (épistémologie) بحثنده (حسيون
sensualiste) فرقه نك اماردر ، و (فلسفه حسيه (phil. sensualiste) فلسفه تدريبيه
طرفداردر . چونكه مدركات حواسي منشأ علم عد ايتدجكه ، اصولده تجربه يي اساس

او حالده زمانمرك احكام فلسفیه سنه اتباعاً حکم ایده جک ایسه ک :
 [فلسفه نك ، شكل واصول اعتباریه علوم سائر دن آیری غیرى بر جهتی
 یوقدر . بناء علیه بو نقطه نظردن باقیلوبده ماهیتی حقیقده بیان فکر ایدنبجه ،
 بر علم مخصوص و ممتاز دکلدر] دیمکده مضطر قاله جغز .
 اویله ایسه ، ایکنجی ادعا قالیور ؛ یعنی [فلسفه ، هر نه قدر شكل واصول
 اعتباریه علوم سائر دن فرقلی دکلسه ده ، کندینه خاص بر موضوعی و بر دائرة
 تبعی واردر . بناء علیه آنجق موضوع مخصوصیه ممتاز بر علم مستقل در .]
 دهینلرک شو ادعاسنی تحقیق ایتک وظیفه سی قالیور .

اتخاذ ایتک طوغرو اوله ماز . زیرا تجربه حس ایله اولور . بوحقیقته بناءً (بهی قن) ک
 وضع مخصوصی نظراستباره آلیرسه ، آکلاشیلیر که بو بویوک وفطین فیلسوف ، ارسطویه
 قارشى دهموقریشی التزام ایتکله ، راسیونالیزمه قارشى ، سانسوآلیزمی ترویج ایتش ،
 وسقولاستیق مرضی ایله ذاتاً حال احتضاره دوشمش اولان راسیونالیزمی سوندورمک
 ایچون تام وقت مناسبی بولشدر . (بهی قن) ک جهاد مظفرانه سیله باشلابان بوجریان افکار
 (John Locke جون لوق) و (David Hume دهی وید هیوم) و (Reid راید)
 کبی بویوک فیلسوفلرک یاردیمی ایله کیتدکجه قوت بولش نهایت زمانمزدده بالخاصه (میل
 J. S. Mill) و (هربرت سپنسر H. Spencer) ایله کرکی کبی تحکم اینشدر . حتی
 سپنسرک تکامل فلسفه سی ، (idées innées) دعواسنه قطعاً نهایت ویرمشدر . ایکی
 یوز المی سنه اول (لوق Locke) ذاتاً بونی انکار ورد اینشدی . کورولویور که بو
 جریانک منجی واک قوتلی وادیمی انکلترده ده در . آلمانیده مجدد مشهور (قانت) ک ال
 بنام شاگردلرندن (schelling شه لینگ) ، فیخته (Fichte) و بالخاصه (هغل Hegel) ،
 فلسفه نظریه یی (romantisme) درجه سنه کوتوردیلردی . علمای کاشیفینک همما
 فوق العاده سی وعلوم حکمیه و تجربیه نك ترقیات سریعه ی ، فلسفه نظریه یی اعتباردن
 دوشوردی ؛ همان اوصیره لرده پیدا اولان (ماتریالیست) لر و بالخاصه (یاقوب موله شوت
 Jacob Moleschott) ، (کارل فوخت Karl Vogt) ، (لودویخ بوخنر
 Ludwig Büchner) کبی وعلومه منسوب جسور فیلسوفلر ، هغلاک آچدینی جریانی
 طور دوردیلر و فلسفه تدریجیه یی ترویج ایلدیلر . بوکون عمومی اصول بودر . (لائیکه)
 و (باوولسن) ودها بر جوق معاصر فیلسوفلر ماتریالیست اولمادقلری حالده تجربه یی طرفدار
 درلر . مع مافیهراسیونالیزم بوکون انکلترده واوروپاده بکی دن بر جریان آچغه چالشیور .
 موقع مخصوصنده بومشله لری تفصیلاً مذاکره ایده جکیز بو حاشیه بر اشارتدر .

في الحقيقة بو ادما اربابی بوکون اولدقجه توتلی بر موقع اشغال ایدیورلر؛
 زیرا بعضی (یکی مسالک) صاحباری ده بوزمرده داخلدر. شیمدی اک مشهور.
 لردن ایکیسنک اسمنی ذکر ایدم جکم، وفکر واعتقادلرینی - مختصراً - آکلاته جفم..
 فلسفه بر (موضوع مخصوص) و آیری بر (دائرة اشتغال) کوسترمک؛
 واونی بر - علم ممتاز حیثیتله - اقامه ایدوب، حیاتی، استقلالنی تأمین ایدم بیلمک
 ایچون پک چوق تشبثانده بولونولمش اولدوغنی (پاوولسهن) بیان ایدیور؛
 همان صکره (فانت)ک بوخصوصده کی موفقیتهنی (قونوفیشهر Kuno Fischer) [*]
 سوزلرله استشهاداً روایت ایدوب کچور؛ چ-ونکه کندی فکری باشقه در .
 کرده جکیز !..

[قونوفیشهرک ادعاسنه بائیلیرسه، علوم آراسنده فلسفه بر موقع خاص
 تعیین ایدن (فانت)در. بو مجدد، فلسفه ایچون اوילה خصوصی بر زمین تتبع
 کوسترمشدرکه اوراده باشقه هیچ بر عالم دعوای صلاحیت ایدم من: اوده
 (علی الاطلاق علم) در. «اشیا، تجربه نك موضوعنی تشکیل ایدر. تجربه
 - که حقیقته بوتون علم بشرک کیفیت ذاتیه سی در - اوده فلسفه نك موضوعنی
 تشکیل ایدر. » (**)]

دیور و بو قدرله بر اقیور. بو سوزلرک معناسنی - تفصیلاته گیریشمیهرک -
 بن سزله آکلاتمالی بم؛ زیرا مهمدر .

اولجه سویله مشدم که، صوک دور مدینتک نشئه عرفاننده، (صفت کاشفه
 le caractéristique)، انجق (اصول Méthode)، عارض اولان بر تبدل مهم
 ایدی. یعنی (تجربه نك) واسطه تدقیق (moyen d'investigation) و (معیار

[*] بو ذات، زمانزک اک بوبوک فلسفه مورخلرنددر. پک چوق کتابلر یازمش
 و علی الاموم مظهر اعتبار اولان اثرلنده بوبوک بر ثروت معلومات و فائد بر قدرت تنقید
 کوسترمشدر. هنوز وفات ایتمهش ایسه، خیلی اختیار اولاق لازم کلیر. (ده قارت)
 حقنده، آریجه بر تاریخ فلسفه یازمشدرکه پک احاطه لیدر. اثرلی هر مدنی لسانه ترجمه
 اولونمشدر.

[**] بوسوک ایکی جمله فانتک تجربه و علم حقنده کی حکمنی ناطق اولاق اوزره (قونوفیشهر)
 طرفندن روایتاً ایراد اولونمش و پاوولسهن طرفندن ده استشهاد صورتیله ذکر ایدلمشدر.

تحقیق (critère de vérification) اولق اوزره - عموماً و قطعياً - اعتبار قازانماسی ، و [منطقہ مستند اولان اسکی اصولی قیمتدن دوشوروب] یکی اصولک اساسنی تشکیل ایتمهسی ایدی . بویکی اصوله اتباع ایتک ایله علومک نه درجه فیض و قوت اکتساب ایلدیکی محقق و مسلمدر .

او حالده هر علم ، مستقلاً کندی دائره اختصاصده ، شو کائناتک بر کوشهسی ، بر پارچهسی ، انجق بر طاقم حادثاتی - قیاسات منطقیه ایله دکل ، تجربه ایله !.. - تحقیق ایتدیکی وظیفه ایدینش اولوبور ، و هر بری کندی موضوعنه ، کندی نقطه نظرینه کوره ، برطاقم معلومات حاصل ایدوب (و اراق مسئلهسی la question de l'être) نی حل ایتکه چالیشور دیمکدر . بناءً علیه هر علم شو (و اراق عالمی) نه متعلق اولق اوزره آز چوق برشی بیلور . فقط (بیلیمک !؟) ، ایشته بواک مهم بر مسئلهدر ؛ حتی الکیوبوک (معما énigme) در !.. (بیلیمک) نهدر ؟؟ بر انسان ، ناصل اولوبورده بر (شی) ی بیلور ؟؟ و بیلیمکی ناصل بیلور ؟؟ و اونی ، طوغرو بیلیمکندن ناصل امین اوله بیلور ؟؟ بو امنیتک (ضمانت guarantee) ی و ارمی ؟؟ و ارسه نهدر ؟؟ الحاصل (بیلیمک) و علی الاطلاق (بیلیمکی) نهدر ؟؟ سلامت و صحتی ، خطا و سقامتی نه کی شرط لره تحقیق ایدر ؟؟ بوتون علم بشرک قیعتی نهدرکه (حقیقت) بمخنده (یقین certitude) افاده ایدم بیلیمکنه اعتماد ، طوغرو اوله بیلیمین ؟... الی آخره !

گورویور سکزکه بوده . یک جدی بر (موضوع بحث) تشکیل ایدیور ، و متضمن اولدوغی مسئله ، بر چوق مسلسل سؤالر تولید ایدوب متفرع اولوبور . حالبوکه علومک ، آیری آیری هیچ بری ، بوسواللره جواب ویرمهز . چونکه علوم ، بالذات (کیفیت علم) ایله مشغول اولوبور ؛ کائنات ایله ، اشیا ایله مشغول اولوبور و اونلر حقنده بالتجربه (معلومات) تحصیل ایدیور . علمک وظیفهسی انجق بودر و بو قدردر . بناءً علیه هر علمک موضوعی ، کرک کائنات مادیه نیک برنوع حادثاتی اولسون ، کرکه کندی نفسمزک بعضی حالاتی اولسون ، (بعضی شیونات) در ، و بالذات علمه نسبتله بونلر (موضوعات objets, données) در ؛ یعنی بالذات (بیلیمکی connaissance) دکلدر . او

بیلگی بی - ماهیتی ایله - تحقیق ایده جک بر علم مخصوص اولماسین می؟.. ایشه او علم، (فلسفه) در ! بالذات (بیلگی)، ایشه اونک موضوع بحثی در . باشقه بر علمک بو موضوع اوزرینه سوز سـویله مکه صلاحیتی یوقدر ؛ چونکه بو موضوعه هیچ بر علم تماس ایتمز. مادام که بوتون علممز تجربه دن کلیور، او یله ایسه (بیلگی) دیمک، (تجربه) دیمکدر؛ و مادام که، فلسفه، علی العموم علم بشری موضوع بحث ایدیور ، او یله ایسه فلسفه نك موضوعی (علی العموم تجربه) در.

کور و یورسکز که - افیدیلر !.. - فلسفه یی بویله بر موضوعه بنا ایتک، خیلی جدی بر (سیاق نظر *manière de voir*) در . ا کر - صحیحاً - فلسفه بودیمک ایسه ، نهایت لنهایه (مبحث معرفت *épistémologie*) . منجر اولور ؛ و - ارسطونک مشهور تعریفلرندن برینی [*] براز تعدیل معنا ایله تلقی ایدرسک - حقیقتاً (بوتون علومک علمی) صایله بیلیر ؛ چونکه علی الاطلاق علمک منشأ و ماهیتندن ، کیفیت حصول و تحقیقندن ، درجه وثوق و قیمتندن بحث آجان - فلسفه ده! - (*épistémologie*) در؛ علوم میاننده ده (*psychologie*) در؛ شو قدر فرق وار که فلسفه نك (مبحث معرفت) دهنیلن قسمی ، مختلف (نظاریات علم *théories de la connaissance*) دن - تنقیدی بر صورتده! - بحث ایدر و اونلری بر برینه قیاس ایدرک - حقیقته مقرونیت و اصابت نقطه نظرندن - قیمت نسبیله لرینی تقدیره چالیشیر ؛ حالو که علم روح بوکبی مسائلی قالدیهله آلاز و اودرلو مباحثی کلیاً ترك واهمال ایدر. [**] یالکنز کیفیت ادراکی، یعنی بیلگی نك، طویغونک میخانیزمه سی - شرائط طبیعیه سیله - تحقیق و تتبع ایدر. بوکون فلسفه یی منحصر آ بو حیثیتله تاقی ایدنلر واردر؛ دیمشدم ؛ بونلرک

[۰] (بوتون صنعتلرک صنعتی و بوتون دلوک علمی) دیه معروف اولان تعریفی در که مناقشه یی یوقاریده یکمشدی .

[**] شو تقدیره کورده (مبحث وجود *Pontologie*) ، (*épistémologie* مبحث معرفت) دن آریلیر و اونک دثرة تعاقندن خارج قایلیر. بوکون بالخاصه (مابعدالطبیعیات)، بو (*ontologie*) یه منجر ارملش کبی در .

اك مشهورى (برادله Bradley) ايله (برغسون Bergson) در . [*] بوايكى
فيلسوفك بو مبحثده طرز محاكمه سنى درت سطراله عرض ايتك ممكن دكل
ايسه ده ، بونقطه يى دخى مبهم بر اقامق ايچون ، اومتفكر لرك ناصل دوشونوبده
بوفكره باغلاندقلىرى براز كوستريم :

بز ، بر (موجوديت حقيقه) ايله صميمى ودائى بر تماسده بولونيورز .
فقط ، بو (وارلق عالمى) هيچ بر حال اوزره ثابت وبر قرار دكلدر ؛ دائما
متحولدر . بز ، اونكله تماسمز (تجربه) در . علممز دخى ، ايشته بوتجربه مزدن
عبارتدر . لكن بز ، دائما چالقانوب كيدن بو (عمان حادثات) ك انجق بر ساحه
محدوده سنى احاطه ايدم بيلدورز ، واو ساحه ايچنده يالكلز تجربه مز نسبتده
معلومات حاصل ايدم بيلدورز . حتى تجربه مز شو وارلغك انجق بعض تجلياتى

[*] (Francis Herbert Bradley) ، (۱۸۴۶) ده طوغمش و (اوفسفورد
Oxford) دار الفنوننده تربيه كورمشدر . (ميرتن نواج Merton-College) اعضاسندن
ايدى . مزاجاً نحيف و مريض اولان بو فيلسوف ، دائما عزت اوزره ياشامش وبر قاچ سنه
اول وفات ايتمشدر . (Hoëffding) ، مشهور اولان (تاريخ فلسفه حاضر) سنك صوك
جلدنده بو ذاتدن اهميته بحث ايديور و : (بوكون شهبه سز انكتره نك اك مهم متفكرى
بودر) دييور . انكترده بالخاصه (ميل) و (سينسر) ايله تأمين غلبه ايتش اولان
« فلسفه تدريبيه ph. Empirique » دليهنه بر « جريان انجماعى mouvement
réactionnaire » حاصل اولغه باشلادىنى زمان « مدرسه فيلسوفلى - les universi-
taires » ، آلمان فلسفه سنه ميل كوسترمشدر و بالخاصه (هگل Hegel) ي - بر چوق
تعديلات ايله - احيايه چالشمشلردى . « برادله » بونلرك اك بوبوكى در ؛ وه هگل حقنده
كال استعسان اوزره سوز سويلر . « ظواهر و حقيقت appearances and reality »
نام اثرى بك معروف و معتبردر . « Hoëffding » ك اداسنه كوره « برادله » ، انكيزلردن
« غرين Green » ك ، آللاردن « هگل » ايله « لوتزه Lotze » نك آثارندن متأثر
اولمشدر . « لورد هولدين Lord Haldane » و كبريجده فلسفه معلمى « پروفيسور
ماق تاغارت Mc Taggart » ، تماماً هگل فلسفه سنه طرفدار اوله رق مهم اثرلر يازمشلردر .
بوايكى ذات ايله كوروشدم و بحث ايتدم ايدى .

« برغسون » فرانسزد . زمانزده بوبوك شهرت قازانش و آقاده مى به اعضا انتخاب
اولومشدر . اساس فلسفه مى حقنده « اجتهاد » بر اوزونجه مقاله يازمشدم . ارباب سرافه
توصيه ايدرم .

حس و تلقی اینمکدن عبارت قالیور. او (تجلیات manifestations)ك جمله-نی
 وهر صورتی تجربه ایده بیلسه یدك، (حقیقت وجود)ی تماماً وهر وجهله ادراك
 ایتمش اولوردق كه فلسفه نك (غایه but)-سی ده بودر. حالبو كه ، بوكا - حالا -
 احتمال یوق !... او حالده تجربه مزی نه قدر تشمیل و توسیع ایدرسه ك ، نه
 قدر اصلاح و اكمال ایلرسه ك، علی الاطلاق، حقیقته تماسمز و بناءً علیه علممز،
 او نسبتده آرتار. علوم - منفرداً - بوكا موفق اوله ماز؛ زیرا هر علم ، محدود
 بر ساحه ده ، معین بر جنس حادثات اوزرینه اجرای تجربه ایتمكه مكلفدر ؛
 اونك ایچون، هر علمك كائنات حقنده نظری البته محدود و یکجهت در. بوتون
 تجربه بشریه یی یعنی بوتون علم انسانی یی بو قدر وسعت نظرله - اولسه اولسه -
 فلسفه احاطه ایده بیلیر. شو تقدیر کوره فلسفه باشلی باشنه بر علمدر و موضوع
 مخصوصی (علی العموم تجربه l'expérience générale) در.

شو عرض ایتدیکم (خلاصه) یه باقیایره (قانت) کبی بر فیلسوف ایله
 (برادله) و (برغسون) ودها بعضی امثالی کبی متفکرین معاصرینی، بو نقطه ده
 تألیف و توفیق ایتك پك کوچ بر ایش اوله جقدر . زیرا (قانت) معلومات
 بشریه نك جمله-نی محصول تجربه اوله رق قبول ایده مه مشدی. بوتون معلوماتی
 ایکی مختلف جنس کبی تاقی ایدیور و بوسبله ایکی قسمه آیری یوردی. بونلردن
 برنجی قسمه (معلومات بعدیه connaissances apostérieures) دییوردی كه بونلر
 انجق تجربه ایله حاصل اولمش بیلکیمزدر. فقط قانتك ادعاسنه کوره معلو-
 ماتمزه دها مهم بر قسمی ده واردر كه اونلر دیگر لرینك اصل و اساسی و نقطه
 استنادیدر ؛ و اصلاً تجربه محصولی دکدر ، و اوله ماز. چونکه : اولاً ، تجربه
 فوقنده بر طاقم (حقایق متعالیه vérités transcendentes) افاده ایدرلر ؛
 یعنی ، تجربه ایله اکتسابی ممکن اوله مایان بر طاقم یوکسك و نظری حقیقتلری
 متضمندرلر . نانیاً ، تجربه یی تنظیم و اداره ایدن بالذات او حقیقتلردر. ایشه
 قانتك (معلومات قبلیه connais. apriori) [*] دیدیکی، بو قسم بیلکی لریمزدر.
 [*] قانتك بو ادعای مشهوردر و شونی اثبات ایدر كه بو آلمان فیلسوفی - مج-داکنه

برنجی نوعدن اولان معلوماتز، علومك مباحثنی تشكيل ايدر، و تجربه نسبتنده آرتار وتنوع ايدر. ايكنجی نوعدن اولان معلوماتز بالخاصه فلسفهك موضوع بحثنی تشكيل ايدر، و تجربهك بوقسم معلوماته امدادی یوقدر، چونكه بو (لدنیات معقوله noumènes) ایله قطعاً علاقه‌سی یوقدر .

ایشته قانتك بومسئله ده فكر مخصوصی، مختصراً بودر، فقط عیناً بودر. حتی قانتیه طرفدارقله مشهور اولان معاصرین فلاسفه دن (ف. آدولف لانكه (F. A. Lange)، ایله (دوقورهیوول Dr. Whewell) ودهابعض کیمسه لرك بوبابده کی فکرلری ده - بعض تعدیلات جزئییه رغماً - اساساً بودر. حالبوکه (برادله Bradley) شدتله ومنتحصراً تجربه طرفداریدر. (معیار حقیقت اولمق اوزره تجربه تامه complete experience as standard of reality) ادعا -

رغماً - ده قارتدن آریله مامشدر . زیرا ده قارتك - یوقارلرده ذکر ایتش اولدوغم - (idées innées افکار وهیه) - سی ایله قانتك « معلومات قبلیه conn. apriori » - سی صبقی صبقیه علاقه دارد . حتی ده قارتك اعتقادنجه [موهبة الهیه] رقانتك اعتقادنجه [دماغزك بنیه تشكلی اقتضایی] اولمق اوزره تعریفلر براز فرقلی اولمسه ایکیسی ده هینی شیدر دیه جگم ، چونكه ماهیتاً اوله در . برطرفدن «راسیونالیزم» ده نیلن فلسفه نظریهیه گنیش برمیدان بوبوک بر حق حیات ویرمك، دیگر طرفدن تجربه بی واسطه تحقیق عد ایتك خصوصنده ده تماماً وضع وطورلری ده بردر . « قانت »، مدخل « prolégomènes » نام کتابنده (apriori) معلوماتی فلسفهك بالخاصه موضوعی اولمق اوزره گسترش وکمال صراحتله وکرینی ایضاح ایتشدر . « هانکی طرز معلوماتك ابعد الطبیعی توصیفه نیان اوله ییله چی «Du mode de la connaissance qui peut seul être appelé métaphysique» حقتنده بر باب مخصوص واردر . فلسفیانده مبتدی اولمالار ، اورایه سرأجت ایدرلرله کورورلکه قانت « apriori » جنسندن اولان معلوماتده بر (وجوب nécessité) صفتی بولوبور . جنسندن اولان معلوماتده بویله برماهیت مخصوصه بوله میور، و بو فرقه يك اهمیت ویریور ، حتی منطق ده « قضایای علییه » و « قضایای حسییه » تقییمی « Jugement analytique » و « Jugement synthétique » تقسیمینه تابعدر، اوده (apriori) و (aposteriori) فرقه مستنددر . بوفکرلر ، هپ قانتکدر . کورور- لویورکه بو فیلسوف شو نظریانه بوبوک بر قیمت ویرمش واونلری منطق مباحثنه دخی تشمیل ایتشدر . [قاموس اصطلاحات فلسفه] ده یوبخته دائر لایقوله ایضاحات ویردم .

سندھ در ، و بو دستور افاده کندیسنگدر . کذلک ، (برگسون Bergson)
 دخی (تجربه ، تجربه نك تكمیلی l'expérience, toute l'expérience) دیور .
 اك صوك زمان متفكر لرینك طوری و روشی هپ بودر . حتی او قدر كه مثلا
 (هیوول) و (لانكه) كبی فیلسوفلر ، (حقایق ریاضیه) نك (apriori)
 اولدوغنی و تجربه دن تولد ایتش اوله میه جغنی ادعا ایلدكلری حالده ، زمانزك اك
 بویوك ریاضیون حكمایی مثلا (سرجون هرشل sir John Herschell)
 و (پوآنکاره Poincaré) كبی متخصصین عكسفی ادعا ایدیورلر و بونی اثباته
 جالیشیورلر .

بودا - بك معلوم و مشهور اولدوغنی اوزره - (فلسفه تدریبه) اربابنك
 دستور اعتقادیدر . (empirisme) ك مؤسس اولان (به یقن) ایله باشلامش ،
 (جون لوق) ایله زیاده قوت قازانمش و عصر مزده بالخاصه (میل) و (سبنسر)
 ایله تماماً تغلب و تعمم ایتشدی . طبعی ، (برادله) و (برگسون) دخی بو
 زمره متفكرینك - شو نقطه نظر دن صوك معقبلی در .

بو ایکی متفكری - شو دعوالرینه نظراً - قانت ایله بونقطه ده تألیف ایتك
 ممكن دكلدر . واقعا ، فلسفه به بر موضوع معین و بر ساحه مخصوصه كوستره رك ،
 اونی بر علم ممتاز حیثیتله تاقی ایتكده ، اوچده متفق الرأیدر . فقط قانتك
 طرز تلقی سی باشقه ، بريكیلرك کی باشقه در . بنم آكلادیغمه و اوتدنبیری تحقیقاً
 بیلدیكمه كوره ، قانت نظر ند فلسفه نك باشلی باشنه بر موجودتی و لزومی
 واردر . چونكه اوده بر علم در . موضوعی ده علی العموم (بیلگی) در . (برادله)
 و (برگسون) نظر ندده فلسفه نك حیثیت حقیقه سی تماماً بودر . موضوعی ده
 علی العموم بیلگی در . لكن قانتك اعتقاد نیجه علی العموم بیلگی (بوتون تجربه
 Toute l'expérience =) دكلدر . چونكه - ده مین آكلاندیغم كبی - بوتون
 بیلگیلر مذك اس الاساسی و خصوصاً (وجوب) ایله ممتاز اولانلری (قبلی و آتی
 apriorique) اولان قسمی در ؛ بونلر ، تجربه ایله تحصیل اولونمش معلومات
 قیابندن اوله ماز ، چونكه تجربه فوقنده برطاقم حقایق متعالیه افاده ایدرلر .
 قانت كندی لسانجه بونلره (صرف عاقله نك مفهوماتی les concepts de

(l'entendement pur) دیر . ایشته (مابعد الطبیعیات) ، انجق بونلری تدقیق وتنقید ایتمکه موظف بر علم مخصوصدر .(*)

فلسفه‌ی آری بر علم کجی تلقی ایدوب، بالذات (علم بشری) اوکا (موضوع) اوله رق تعین ایتک خصوصنده (قانت) ه حق تقدم ویرمک، انجق بر درجه‌یه قدر و بر شرط ایله طوغرو اوله بیلیر : (تجربه) یی علمک هر نوعه تشمیل ایتمکه، هر درلو علمی تجربه‌یه بر طوتما مقله اوله بیلیر . فقط (بوتون علم toute la connaissance) یی (تجربه کلیه l'expérience totale) اوله رق تاقی ایتک صورتیه ، علم بشره بر حیثیت معنا ویرمک اولور ساق ، او وقت

[*] حق قانتک مصلک مخصوصی عد ایدین (criticisme) ، بو فیلسوفک صرف بو اعتقادندن طوغمشدر دیه ادعا ایده بیلیرم . فی الحقیقه بو مجدد ، فلسفه هالنده عظیم بر انقلاب حصوله کترین مشهور اثرینی بو اعتقادینه بناءً وانجق بو نقطه نظره توفیقاً لازمشدر . کتابک اسمی « تنقید عقل صرف critique de la raison pure » در ، بو تعبیر دخی قانتک اعتقادنجه « فلسفه مابعد الطبیعیه » مرادق در . ذاتاً اوله تلقی ایتش اولدوغنی هم تعریف وایضاح ایدیور همده اختیار ابتدیی (dialectique) اصولی ایله اثبات ایدیور . بو آدمک لسانی و فلسفه‌سی آ کلابه بالهره ، برنجی کتابک تکمیل « مدخل » قسمی وعلی الخصوص مدخلک اوچونجی فصلی توصیه ایدرم . بو فصلک بالکیز عنوانی بیه یوقا ریده کی ادعای تصدیق ایدر ؛ ایشه :

III. — La philosophie a besoin d'une science qui détermine les principes et l'étendue de toutes nos connaissances apriori.

ترجمه‌سی :

فلسفه‌یه بر علم لازمدرکه بالجمله « معلومات ائیه » مزک مبادیسی وسعه شمولی تعین ایتسین . مدخلک یدنجی و صوک فصلی ده بو علمک نه اولدوغنی آ کلانیر ؛ بانیکنز :

III. — Idée et division d'une science particulière sous le titre de critique de la raison pure.

ترجمه‌سی :

« تنقید عقل صرف » عنوانیه بر علم مخصوصک تقسیماتی و او علم حقنده بر فکر . «
الی آخره ...!

Cr. de la Rais. pure. Traduction. J. Tissot troisième édition.

(قانت) ایله (برادله) و امثالنی بر طوته مایز ؛ چونکه آرا رنده خیلی انکین و درین براوچوروم حاصل اولور. زیرا قانتک اعتقادنجبه (قطعاً محصول تجربه اولمایان) (معلومات قبله *connaissances apriori*) ، تجربه کلیه نك ساحه شمول و احاطه سندن خارج قالیر . حالبوکه - قانتیه کوره - بوتون علممزنك (یقینی *certain*) و (واجب *nécessaire*) اولان اساسلی انجق بونلردر . بناء علیه، بلا استثنا هر درلو معلومات بشریه نك محصول تجربه اولدوغنی - صراحتاً - ادعا ایدن (سرجون هرشل)، (جون ستوئته میل)، (آلکسانده ربهین) و (برادله) کبی فیلسوفلر ، قانتک - قسماً *rationaliste* ، قسماً ده *empiriste* اولان - ادعاسنی ، بالطبع ، عیناً قبول ایده مزلر . زیرا ، احکام و اساسات علمک منشأ و ماهیتی مسئله سمنده بونلرک فکری ایله قانتک اعتقادی ، تماماً متناقضدر . [۵]

شو تقدیرجه (قونوفیشه ر) ک قانت حقننده ویردیکی حکم دخی، - هیچ اولمازسه یاری یاری یه! - یا کلشدر .

فلسفه بر حیثیت مستقله ویرمک ایسته ینلرک بر باشقه نظریه سی ده اواره :
[عالم خارجی علومک میدان تجربه سیدر . فقط عالم وجدان بالخاصه فلسفه نك دائرة تبعی تشکیل ایدر. بناء علیه (تجربه خارجی *l'expérience externe*) علومک موضوعی در ؛ (تجربه باطنیه *l'expérience interne*) فلسفه نك موضوعی در!] ده ینلرده واردر . او حالده (بالخاصه فلسفه *la philosophie proprement dite*) ، (علم روح *psychologie*) دن عبارت اولمش اولویور و (علم روح) سلسله علومدن طی و اخراج ایدمک لازم کلیور .

(پاوولسه ن) بو نظریه یی ده - همان اوج سطرله - ذکر و (لیپس *Lipps*) نام آلمان فیلسوفنه اضافت ایدیور . حالبوکه بو نظریه ده ا جوق اسکیدر و بالخاصه انکلیزلر کدرده نیله بیایر . زیرا (دهی ویده یوم *David Hume*) ، هر کسدن زیاده نظر فلسفی بی وجدان عالمنه توجیه ایتمش وتا او زماندنبری

[۶] پاوولسن، کتابنده بو انکلیز فیلسوفلربی ذکر ایتیمور .

پسیقولوجی ایله فلسفه‌یی بر طوتمق ، بك چوق انكلیز فلسفولرنجه عادت حكمنه كیرمشدی. بو طرز تلقی به بر مهم سببده اولدی دهیه بیلیرم: بن قویاً ظن ایدیورم که اولاً (.مقارت) ایله باشلا یوبده صوکره لری (هیوم) ، (بارقله) ایله بوسبتون قوت بولان (سوژه تیویزم = subjectivisme = انفسیه) جریانی، کلیاً اذهان متفکرینه تغلب ایتیش وکائنات حقنده حاصل ایده بیلدیکمز هر درلو معلوماتک، صرف مدرکات انفسیه دن عبارت اولدوغی - بر حقیقت عمومیه- اولق اوزره قبول ایتدیرمشدیر. شو تقدیرجه معمای وجودک طلسم انکشافی ، خارجه بر یرده دکل ، منحصرأ حالات وجدانیه ده آرامق لازم کله جکمنه قناعت کامله حاصل اولمشدیر . بو نقطه نظره کوره دخی وارلفک اک بویوک واک غامض معمای ، بالذات (وجدان conscience) اولمش اولور . بناءً علیه حالات وجدانیه یی تدقیق ایتک (تطورات وجود les modalités de l'être) ی، یعنی وارلفک درلو درلو اشکال واطواری تحقیق ایتکله بردر . فلسفه نک وهله بالخاصه مابعد الطبیعیاتک ده ایشی بودر. مادام که وجدان و احوال وجدانیه یی تدقیق ایتک وظیفه سی درعه ره ایدن علم مخصوص، پسیقولوجیدر، او حالده فلسفه، علم روحه منجر اولور . آراده فرق قالماز .

اوت ۱ . بن قویاً ظن ایدیورم که (بالخاصه فلسفه یی) ، (علم روح the science of mind) دیه تاقی و تعریف ایدن اکثر انكلیز فیلسوفلری همان شیمدی ایضاح ایتدیکم وجهله- شو سوژه تیویزم جریانه طوتوله رق، مجبوراً بو اعتقاده پیوسته اولمشلردر .

بونلرک اک مشهورلرندن و- احاطه علمیه سی اعتباریله- اک متنفذلرندن بری اولان (سر ویلیام هاماتن Sir W. Hamilton) [*] بو مسئله ده اوقدر صراحتله

[*] بو ذاتک اسمی بوندن اول دخی بر قاج کره کچش و بر حاشیه ده مختصراً ترجمه حالی قید ایدلشدی . بو معلم، بو مسائلی تدقیق اسرنده بویوک بر وقوف کوتومش و مابعد الطبیعیات حقنده ایکی جلد اثر براقشدرکه هنرز یک معتبردر . بوراده استمه ادا ذکر اولونان سوزلر، او اثرینک برنجی جلدنده اوچونجی بابک صوکه صحیفه لنده مندرجدر .

[Lectures on metaphysics Vol. I. III d'lect. Page 62]

بیان ملاحظه ایدیور که ظنمک اصابتده ذره قدر شبهه به محل قالمیور :

و فلسفه‌نک موضوعی قوری قوری به تحصیل معلومات دکلدرد ؛ اسباب
حقننده معلومات ایدیونکدر ! مادام که (بالذات روح !! mind itself)، هر کیفیت
علمده (هر فعل ادراکده !) مشارک و معاون اولان باشلیجه (سبب کلی) در،
بناء علیه فلسفه، روحی (موضوعه اولی) و (مطلب اعلا) اولمق اوزره نظر
اعتباره آلمغه مجبوردر. شو تقدیرجه روحی تدقیق وتبیع ایتک، (افضل وجه
اوزره by pre-eminence) برتبیع فلسفی در. فلسفه‌نک هیچ برشبعه سی یوقدر که
روحی کندی تحقیقاتنه مبدأ فرض ایتش اولماسین ؛ اوندن استعاره نوریتمه سین !..
بو شعباتک، فی الحقیقه یک چوغی، علم روحک خصوصی بر طاقم نقاط نظریته
کوره ویاخود خصوصی بعض تطبیقاتنه کوره تاقی ایدلمش علملردرد. مثلاً منطق
- تعبیر دیگرله - (قوانین فکرک علمی the science of the laws of thought)
(عمومی - علم روح) ک انجق بر پارچه سی، بر قسمی در؛ بناء علیه - منطق ! -
قوانین مذ کوره به تبعیتله منتظماً وقوعه کلن بعض عملیات ذهنیه به دائر برطاقم
معلوماتی استلزام ایدرد. [*] اخلاق دخی، - فاعل مختار اولمق لغمز حیثیتله -
بزم اعمالمزی اداره ایدن قوانین مخصوصه‌نک علمی در. بوقوانینه دائر معلومات
پیدا ایده بیلیمک، انجق (عامل اخلاقی = moral agent = فاعل مختار)
اولان انسانک ماهیت معنویه سنی بیلیمکله ممکن اوله بیلیر. بونک کی [**] (سیاسیات
politics =) دخی حیات مدنیه و اجتماعیه ده انسانه عارض اولان تبدلاتی

[*] یعنی، مادام که منطق، عملیات ذهنیه بی تنظیم ایدن قوانین تفکری موضوع بحث
ایتش بر علم مخصوصدر، البته - اول باول - عملیات ذهنیه حقننده بعض معلومات و معطایاته
استناد ایدرد. بو معطایاتی و برن علم ایسه بالخاصه پسیقولوژی در. ایشته بو صورتله منطق
پسیقولوژینک موضوع بحث ایدیندکی حادثات ذهنیه نک انجق قوانینی تابع ایدرد. فکرک
ماده سنی دکل، صورترتیبی و قوانین قیاس و استدلالی تحقیقی ایدرد و بوسیله ینه پسیقولوژی به
باغایدرد ؛ دیمک ایستیور .

[**] بوراده سیاسیات، دیپلوماسی دیمک دکلدرد . اک کنیش مناسبله تاقی ایدلمشدره
سوسپولوژی دخی بو معناده داخل اوله بیلیر.

تقدير و تعيين ايتكم له مشغول اولور بر علمدر : فقط بوكا موفق اوله بيلمك ايجون دخی اول امرده انسانك فطرت اصلیه سی ونه کی تغییراته مستعد اولدوغنی بيلمك ايجاب ایدر. صنایع نفیسه یه کلنجه، جمله سنك اساسی (حسن نظریه سی) نه طایانیر؛ بو نظریه یی ده علم روحك، حادثات حسیه یه تعلق ایدن قسمی ترتیب ایده بیلیر. دین و آلهیات دخی فلسفه روحه قارشی مستقل دکلدر؛ زیرا اللهك موجودیتی ادراك و ملاحظه ایده بيلمك ايجون لازمکن ملکات عقلیه یه انجی بز- انسانلر- مالکیز!، الخ!.

دها زیاده تفصیلاته ودها باشقه فیلسوفلرك آثارندن اقتباساته حاجت یوق! انکلیز متفکرینك پك چوغنی بو فکرده در. (Rev, Butler بطلر)، (من سئل Rev. Mansel)، حتی (هربرت سپنسر H. Spencer) بیله!.....

نتیجه شو اولویورکه، عالم - حد ذاتنده - نه اولورسه اولسون اونوهر شیئی ادراك ایدن حتی اللهك وجوب وجودینی تعقل ایله ین (انسان) در. انسان دیمك ده (وجدان) در. کیفیت ادراك ایله برابر روحك بوتون قابلیت و حالاتی تدقیق ایدن علم، بالخاصه پسیقولوژی در. مادام که علوم سائره نك جمله سی - موضوع اعتباریله - معلوماته مقتدر و مستنددر؛ و مادام که معلومات ده مدرکاته منجر اولور، او حالده هر علمك باشی پسیقولوژی یه باغلی در هر علم، پسیقو- لوژینك بر شعبه سی مثابه سنده در. فلسفه بالخاصه علم روح اولدوغنی ايجون بالجمله علمی محیطدر.

بر مشهور نظریه دها واردرکه اودخی فلسفه یه- موضوع اعتباریله- بر حیثیت مستقلة ویرمك ایستر. بو نظریه یه طرفدار اولانلر، فلسفه ایله علوم سائره آره سنده موضوع بالخاصه نقطه نظر اعتباریله هم بر فرق کورویورلر: (علوم، حقیقت اثباتی تدقیق واستکناه ایله مشغول اولور. فلسفه، هر شینك انسانه نسبتله قیمتی تقدیره چالیشیر. بناء آیری بر علمدر!) دیورلر و فلسفه یی (علم قیم la science des valeurs) دیه تعریف ایدیورلر.

(پاوالسنه) بو نظریه یی ده مختصراً ذکر ایدیور و (Döring دورینگ)

اسناد ایلپور. بنم بیلدبکمه کوره (آویناریوس Avenarius) [*] بو نظریه‌ی بر بویوک (سیستم système) حاله کتیرمشدر .

(پاوولسن) بوتون بو نظریاتی باطل کوروپور و فلسفه‌ی علوم سائرهدن آیرمق اوزره آرهیه قطعی و معین بر حد فاصل چکمک ایسته‌ین متفکرینک جدی اعتراضاته معروض قالدیله جکلرینی ادعا ایدرک بالذات اعتراضاته باشلیور. [فلسفه قیم، (علم اخلاق) در. هر شینک و بالخاصه اعمالک، انسانه نسبتله قیمتلرینه نظر ایدن (اخلاق) علمی در. فقط عمومی و شامل معناسیله فلسفه بو دیمک دکلدرد] دیورکه طوغرودر. فقط (فلسفه‌نک موضوعی، بالخاصه علم در.) ده‌ینلره قارشى، مقام تعریضده :

(بویله برعلمک، هر حالده دهاسکی براسمی واردر. (منطق logique) ویاخود (épistémologie) دیدکلری علم، ایسته اودر. نهدن بو اسمی ده‌کیشدیرمکه مجبوریت حاصل اولویور؟)

دیورکه طوغرو دکلدرد. منطق بوسبوتون باشقه‌شی در. او، طبق ریاضیات کبی (علوم مجردة sciences abstraites) صنفندن بر علم در؛ موضوعی ده علی‌الاطلاق معلومات دکل، حتی، چوق کشیلرک ادعاسنجه، (قوانین فکرت les règles de la pensée) بیلده دکلده ساده‌جه (قواعد استدلال de la preuve) در. [**] نه‌یسته مولوژی‌یه کلنجه، کیفیت ادراک ایله برابر حقیقت اشیایه دائر ترتیب اولنه بیلان فرضیات معقوله‌ی - تنقیداً - تدقیق ایدر بر شعبه فلسفه در. منطق ایله بونک آراسنده دنیا قدر فرق واردر. واقعا منطق بعضی مقدمات مسلمهدن بر نتیجه جبقارمه‌یلمک ایچسون، ذهنک رعایته

[*] صوک دورک مکمل بر تاریخ فلسفه‌سی یازان «هوفدینگ Hoëffding» بو نظریه‌ی تماماً «آویناریوس» عطف ایدیور و تاریخنک اوچونجی جلدنده بوفلسوفه بر باب تخصیص ایلپور. بن اجتهاد غزته‌نک بر نسخه‌سنه «فلسفه قیم» حقنده بر مختصر مقاله یازمشدم. [**] هاملتن ایله میل آراسنده موجب مناقشه اولان مباحثک باشلیجه بریده بودر. هاملتن ادعا ایدرکه منطق «قوانین فکرت» ک علمی در. میل دیرکه قوانین فکرتی تحقیق ایتمک بسپمولوژی‌نک وظیفه‌سیدر. منطق «قواعد استدلال» علمی در. میل حقی در.

مجبور بولوندوغی قواعدی موضوع بحث ایدن بر علم در ؛ و بو حیثیتله ،
هر درلو تحقیقات و ملاحظاته حکمی اتقاز و احساس ایدر بر علم آلی در
(و اصول methode) ده اساسدر ؛ شو اعتبار ایله نه بیسته مولوژی ده دخی
قواعد منطقیه رعایت، صحت استدلال ایچون شرطدر . فقط بو باشقه، بالذات
منطق بوسبتون باشقه در !

بچمزمه دوام ایدم ! . . . (فلسفه ، علومدن آیری بر شی دکلدر ؛ شو
قدر وارکه ، تفصیلات ایله اوغراشماز ، بالجمله علومک مبادی و احکام
اصلیه سنی موضوع بحث ایدر .) ده یئلرده وارکه - خاطر کزده اولماسی لازم
کله چکنه کوره - ارسطو، اصل بو فرقه نک باشندن بولونمق کرکدر . زیرا
فلسفه نی - بو موضوعه کوره - تعریف ایدن، الاول او ایدی . زمانزده حالا
بو فکدرده بولنانلر چوقدر . پاوولسن، بو زمره دن اولق اوزره پروفیسور
(یوبروغ Ueberweg) [*] ی ذکر ایدیور؛ فقط (هاملتن) و تابعینی ایله
برابر ده بر چوق انکایز فیلسوفلری هپ بو اعتقادده درلر . (سپنسر) بیله
فلسفه نی علومدن قطعاً آیرمادیفی حالده بو فکدرده بولوندوغی صراحتاً بیان
ایتمشدر . (مبادی* اولی les premiers principes) نامیه مشهور اولان باشلیجه
اثرنده بوکا دائر خیلی ایضاحات واردر که تطویل بچشدن احترازاً نقلندن صرف
نظر ایدیورم . ذاتاً کتابک اسمی، ادعای تصدیق ایچون دلیل کافیدر . فلاسفه
اسلام دخی - همان جمله - بو فکدرده ایدی .

پاوولسن بونظریاتک جمله سنی یا کلش بولویور و فلسفه نی کرک اصول، کرک

[*] بو آلمان فیلسوف معاصری تدقیقات تاریخیه سیله مشهوردر . ایکی بویوک جلددن
مرکب اولان (تاریخ فلسفه) سی پک معتبر برآردر و هر یلر ایله برابر بوتون ادواری شاملدر .
بو کتاب امتالی آره سنده ، (مأخذ) لدن معدوددر . برنجی جلدک مدخلنده مؤلف (فلسفه
تعریفاتی) نی صره ایله ذکر ایدر واک مشهور فیلسوفلری کندی سوزلیله اشهاد ایلر . بنم
کتابخانه مده کی اثر انکایزجه ترجمه سیدر . (فلسفه مادیه تاریخی) صاحبی (آدولف لانکه
F. A. Lange) پروفیسور (Ueberweg) ک ترجمه حانی یازمش و کالی تقدیر ایتمشدر .
(۱۸۷۱ تاریخنده !) .

موضوع اعتباریله علوم سائرمدن هیچ بر وجهله آیره میور . (مبادی* اولی) نظریه سنی ده قبول ایده میور، چونکه مبادی نك نرمدن باشلا یوب نرمده بیتدیکنی کسدرمك قطعاً ممکن اولمادیغنی وهرعلمك کندی دائره سنده حقیقت اشیا دن بالضروره بحث ایندیکنی ادعا ایدیور . مثلاً کیمیا (ماده) حقنده ، حکمت قوت حقنده فرضیه لر ترتیب ایتمک مجبور بولونویور . [فلسفه دخی بو شیلردن بحث ایدیور . فقط بو شیلرک حقیقتنی استکناه امرنده علومك وسائط تحقیقندن واصلوندن ده مکمل وبوسوتون باشقه وسائط واسوله مالکمی در ؟ ..] ، دکسه [فلسفه یی بر علم مستقل اوله رق آیرمق ایچون ، آرایه چیزیلن حد فاصل ، بر ظن باطلدن عبارتدر] دیه بر حکم ویریور . بونی متعاقب : [فلسفه علومدن آریله ماز . اوساده جه بوتون معلومات فیه نك مجموع یکونی در . (۰) بوتون علوم ، یکنسق بر سیسته مك [**] اقسامی صاییلیر . او (علم کلی) universitas scientiarum) نك موضوع بحثی ، (کلیتی اعتباریله ، حقیقت وجود the whole of reality) در . اعصار وادوارك انشا ایتمکله اوغراشوید . اکمال ایلیه مدیکی بوسیستم ، بو (بنای علم) ایشته فلسفه در . هر علم خصوصی ، محدود بر دائره ده حقیقت اشیا یی آکلامق ایچون تدقیق انده بولونور حقیقت وجود و طبیعت اشیا نه در ؟ .. سؤالنه جواب ویره بیلمك ایچون ، بوتون او علوم خصوصیه نك نتایج تحقیقاتی جمع وتالیف ایدرسك فلسفه یامش اولورز . [مجازی برلسان ایله سویله مك لازم کلیرسه دیه بیلیرم که حقیقت اشیا ، عقل بشره معروض بر بویوک معمار . علوم متفرقه دن هر بری ، بو بیلمه جه نك جوانی بوله بیلمك ایچون بعض معلومات ویریر . فلسفه بو معمایی حل ایتمك ، بو (سر اعظم mysterium magnum) ك طلسم انکشافنی بولق تشبی در .]

[*] [La somme totale de toute connaissance scientifique]

[**] بو (-سیستم) (système) تمیزندن مراد ، بر منظومه علمی در . (universitas scientiarum) ترکیبده لایتنجه بو دیمکدر . (کلیات علوم) معنایه کلیر . (دارالفنون) (université) کلمه سی بورادن آلمشدر ؛ یعنی معنایه دلات ایتمك اوزره وضع اولمشدر . او مدرسه لده بالجه علمی - علی وجه الاحاطه ! - تعلیم وتعلم ایتمکدن کنایه در .

دیور؛ بوسوزلره دهه جك يوقدر؛ طوغرودر؛ وصراحتاً آكلاشیلوركه باوولسه ن دونه طولاشه سپنسر ك نظریه سنی قبوله مجبور اولمشدر . مع مافیله فلسفه (توحید علم) ایدوب حقایق اشیا یی آكلامغه چالشمقدر ، ده نیجه ، سپنسر ك ادعا ایتدیكى كبی ، انجق (مبادی واحكام علومى نظر اعتباره آلیر ؛ جزئیات امور وتفصیلات حوادثله اوضراشه ماز) . بناء علیه بو طوغر و نظریه نك لازمه صحتی اولان بوفكری ده تسلیم ایتلیدر . حالوكه باوولسن ، اونى اولجه رد ایتشدی . مع مافیله بوراده (علوم خصوصیه نك نتایج تحقیقاتی !) دیدیكى شیلر ، انجق هر علمك ومبادیسی وكلیاتی در . تفصیلات اوله ماز . نصل كه سپنسر (مبادی اولی) نام كتابنده (علم ایله دین) ك بیله - نتیجه اعتباریله سه عینی افكاره پیوسته اولدوغنی وعینی مسئله لر قارشیدنده برلشه بیله جكنی كوسترمشدر .

ایشته باوولسن ، اولجه صراحتاً رد ایتدیكى صوكره ضمناً قبوله مجبور اوله رق بونظریه مقبوله یی تسلیم ایدیور . بونی متعاقب ، فلسفه یی علومدن آیری طوتمق ضلالتنده (*) قانتك تعلیماتی ، باشلیجه سبب اوله رق ابراز ایدیور . اوتنه بری فلسفه وعلومك عینی ماهیت وحیثیته تاقی ایدیله ككش اولدیغنی اثبات ایچون تا اسكى یونانیلردن باشلایه رق تاریخ فلسفه یی ادوار متعاقبه سیله اشهاد ایلور . كوستریور كه میلاددن (۶۴۰) سنه اول تولد ایتش اولان مشهور حكیم یونانی (تالس Thales) دن سپنسر كه كنجه قدره بویوك فیلسوف فلسفه یی بویله آكلامش ، بو حیثیته تلقی ایتش وقطعاً مجموعه علومدن آیری طوتمامشدر یالكیز (لایب نیچ Leibnitz) دن صوكره یتشهن بنام آلمان فیلسوفلرندن (قریستیان وولف Chr. Wolff) ، فلسفه ایله علوم آراسنی آچه جق صورتده بر تعریف ویرمش و : (علوم حادنانك (نصل comment) وقوعه كلدیكى تدقیق ایدر ؛ فلسفه ایسه (نیچون pourquoi) اوصورتله وقوعه كلدیكى تحقیق ایدر .

[*] قانتك ، معلومات بشریه یی (apriori) و (aposteriori) اولقی اوزره ابكى قسمه آیرمش اولماسنی بو خطایه سبب كوستریور ، صوكره ده قانی تركیه ایتك ایستیور ؛ قباحق شاكردلیته ، بالخاصه (هگل Hegel) عطف ایدیور .

دیمش که (فلسفه اسباب علمی در) دیمه نك باشقه بر در لوسی فقط معنا عینی در. [*]
 پاوولسه نك ادعاسیجه اصل بو تفرقه یه سبیت ویرنلر قانتك اوچ مشهور
 شا کردی (فیخته Fichte)، (شلینگ Schelling) و (هگل Hegel) در که
 بونلر المان (رومانتیزم Romantisme) نك مؤسسی ایدیلر .

فضله تفصیلات لازم دكل ؛ یالکز بوراده بر مهم مسئله وار که حل ایتمک
 مجبور. نته کیم پاوولسه ن دخی اوئی اورتمک و کیشدیرمک ایسته میور. بالعکس
 لایقیله ابراز ایدرک اوکا جواب ویریور. [فلسفه علومدن خارج و آیری برشی
 دکلسه؛ حقیقتی استکناه امرنده علومک اصول و وسائظندن باشقه، هم دهامکمل
 وسائظه مالک دکلسه، بیهوده در. علومک لایقیله اجرا ایده بیلدیکی تحقیقاته هیچ
 بر وجهله امداد ، و هیچ برشی علاوه ایده یه جک اولدقندن صکره
 فلسفه یه نه لزوم وار ؟ علومک تحقیقاتی جمع وتنسيق ایتمک وظیفه سنی کنديسنه
 حصر ایدیورسه ، بو کونکی ترقیات علمییه و تشعبات فیهیه نظراً ،
 هانکی فیلسوف بویله بر ادعایه جسارت ایده بیلیر ؟ . . فلسفه یه بویله
 بر وظیفه تخصیص ایتمک وفیلسوفلق دعواسنده بولمق (دورینگ Döring) ک
 دیدیکی کبی (dilettantisme) [۰۰]ی، جدی بر (مسالك profession) درجه سنه
 اعلا ایتمک دیمک اولور!]

[*] بو بابك ایلک فصلارنده عرض ایتمش اولدوغم فلسفه تعریفلرندن آکلاشیله جفته
 کوره (وولف) ک بو ملاحظه سی ده یکی برشی اولمق لازمکایر ، چونکه اک اول بو
 تعریفک صریح بر دستورینی ویرن نه ارسطو اولمشدر ، بو تعریف شرق و غربده
 برچوق حکما طرفندن عیناً قبول ایدلشدر. جتی بزده (le pourquoi et le comment)
 مقابلی اولمق اوزره (چون و چرا) تعبیرلری پک مشهوردر . (اولوری بویله مسائلده
 جای چون و چرا ؟ . . بزى بو درلو یار اتمش او خالق ییون !) عبدالحق حامد.

[**] بو تعریفک مع التألف هنوز بزده مقابلی یوق ، حالبوکه (dilettantiste) لر پک
 چوقدر . ایतालینجه دن آلمش وهر لسانه کچمش اولان بوکله ، (متخصص) ضدی کبی
 قوللانیلیر . برلم و فنده متخصص اولان آدم ، بیلدیکی اطرافیه، حقیله بیلیر . حکمده
 و تنقیده کالیله صلاحیتداردر. حالبوکه (dilettantiste) اولان، سطحی نظر در . معلومات
 اساسیه و کافیه مالک اولمادینی حالده برشیدن (دم اورور !) . ایतालینلر بو تعبیری ابتدا
 سطحی نظر و مسالکه بیکنانه اولان (صنایع نفیسه منقدرلری) حقنده قوللانشلردی. صوکره
 معنایی تعیم اولوندی. استهزا صورتیه قوللانیلمزسه (amateur) کبی بر معنا فاده ایدر.

(Döring دورینگ) ك بو جدی ملاحظه تعریفیه سنه قارشى پاولسنك
 ویردیكى جوابلر ، پك طوغرودر وپك كوزل ترتیب ایدلمشدر. شویله تاختیص
 اولونه بیلیر :

« حقیقت ذاتیه سی اعتباریله ذهنمز حضورنده بر معمای مغلق اولمق اوزره
 طوران مجموعه کثات، حد ذاته یکه پاره برشی در. - اولجه تعریف اولوندوغی
 کبی - علوم مختلفه دن هر بری او علمك مختلف اجناس حادثاتی آیری آیری
 موضوع بحث ایتمش و حقیقتنی آ کلامق ایچون هر درلو وسائط ایله تدقیقاته
 قویولمشدر . بناءً علیه علوم دخی ، کلیشی کوزل تألیف ایدلمش آیری آیری
 اقسام معلومات دکلدر ؛ جمله سی ده یکنسق بر مجموعه معرفت تشکیل ایدرکه
 اقسام و اجزاسی آرسنده طبعی و عمومی بر رابطه وارددر . [*] حتی ، هیچ
 بر علم باشلی باشنه قائم اوله ماز . زیرا دیگر علومك یاردیمه محتاجدر. مثلاً
 فیزیولوژی، حکمت و کیمیا به استناد ایدر؛ حادثات حیاتی به تعریف ایدر بیلیمك
 ایچون حادثات حکمیه و کیمیویه بی بیلیمك لازمدر. الی آخره! بناءً علیه (توحید
 علم) یعنی فلسفه ، غندی بر فرضیه ، بوش بر فکر دکل ، فکرک ضروری بر
 وادی جریانیدر. [علومك بودرجه تشعباته و بو کونکی درجه کالنه نظر آجمله سنك -
 ولوکه احکامنی اولسون - تلقی ایدوبده اونلری بالتألیف توحید علم ایتمک کیمک
 حدیدر؟ ..] دیه واقع اولان اعتراض، یالکز فلسفه به دکل، آیری آیری علومك
 هر برینه توجیه ایدیه بیلیر . زیرا بو کونکی درجه ترقیسنه رغماً هیچ بر علم

[*] سپنسر ، [علوم یوندر ، علم وارددر ؛ بناءً علیه علم ، حد ذاته بردر وعینی
 شیدر ؛ تلقی ابتدکی موضوعه ونقطه نظر کوره تعین و بو منوال اوزره تشب
 ایدر.] دیورکه بو تعریف علم ایله فلسفه آرسنده فرق بر اقرز . علم ، حد ذاته
 بر اولونجه، فلسفه ده توحید علم اولونجه ، اکیسی ده عینی شی اولور . یالکز مسائل
 مخصوصه بی غصصی بر نقطه نظر دن تنبع و تدقیق ایتمک، شعبات علمییه تک ایشی؛ مسائل
 عمومی بی بر نظر شامل ایله احاطه ایدوب تحقیق ایتمک فلسفه تک وظیفه سی اولمش اولورکه،
 شو تقدیرجه فرق ، ماهیتده یاخود موضوعده دکل ، یالکز تعمیم و تخصیص نظرده در .
 سپنسر ك پك صریح و واضح بر صورتده بسط ایتمش اولدوغی شو نظر به ، بو کون
 اکثریت فلسفه طرفداردر؛ علی الخصوص (پاولسن)، اونك قوتلی مدافعلرندن بیدر.

کافی بولمیش دکلدر؛ حتی بوله جقده دکلدر. اوندن صوکره علومک تعریفاتی، بالتجربه تلقی اولونان مواد و حادثات جزئییه نظرله دکلدر. او حادثاتک تولید و ایقاع ایتدیکی (مسائله Problèmes) نظرله در. تعریفات علمییه نك قیمت و حیثیتی ده، حلی مطلوب اولان بر مسئلهیه افاضه ایتدیکی شکل مخصوصه کوره تعین ایدر. او مسئله نك هنوز حلنه چاره بولونه مامش، حتی یول بولونه مامش اولسه بیله، مسئله مذکورده کتسا ایتدیکی شکل تعریف اوزره طورور وینه قیمتی محافظه ایدر. [*]

فی الحقیقه هر علم-کندی دارة تعلقنده- انجق بومسائل حل ایتکله اوغرا- شیر. یوقسه جزئیات اموری هیچ بر علم، تمامیه احاطه ایده مز؛ مقصد ذاتاً جزئیات دکل، او جزئیات حوادثک قارشیمزه دیکوب بر اقدینی مسائلدر. ایشته علمکده فلسفه نكده موضوع حقیقیسی بو مسائلدر. اوایله ایشه آرده هیج بر وجهله فرق یوقدر. (فلسفه بو قدر معلوماتی احاطه ایده مز!) جمله سیله ادا اولونان تعریضه قارشی بوملاحظات جواب کافی ویریر: (فلسفه بوتون علومک دأره سنده داخل اولان معلومات جزئییه بی احاطه ایده جک دکل، انجق مسائلی احاطه لی بر نظر ایله تتبع ایده جک و توحید افکار ایله جکدر. یوقسه جزئیات اموری علوم دخی احاطه ایده مز!) ده نیله بیلیر. (تدقیقات و کشفیات علمییه ایله ده بر جوق مسئله لر ظهور ایتمی طبیی در؛ حالبوکه بو کون اولردن خبردار بیله دکلز! بناء علیه شو حائده فلسفه اوله ماز. چونکه مسائلک هپی معلومز دکلدر که اولری جمله احاطه ایدوبده علممزی توحید ایله لم؛ و (حقیقت وجود) و (معمای تکوین) دأرقطی بر فکر، صار صیلماز براعتقاد حاصل ایده بیللم!)

ده نیله جک اولورسه، بو ملاحظه تعریضیه نك، تمامیه علمییه ده توجیهی قابلدر و طوغروردر. فی الحقیقه علوم طبیعییه و حکمییه دن و یا خود علوم تاریخیه و فیلولوژییه دن هانکیسی - هیچ اولمازسه کندی دأره تبغنده! - اکال معلومات ایتشدیر... ایتش اولسه یدی ترقی احتمالی قالمزدی!... حالبوکه بو

[۰] مثلاً حکمت طبیعییه ده (action à distance) و حکمت حیاتییه ده (génération spontanée) مسئله لی کی که هنوز حل اولونه مامش و نقطه شکرینی محافظه ایتشدیرلر.

کون، بر (عالم طبیعی)، بر (عالم ریاضی)، بر (عالم تاریخ) تعبیر لرینی قوللانیورز؛ و بو کبی آدم لک علوم طبیعیده، علوم ریاضیهده، علوم تاریخیده، معلوماته مالک اولدقلرینی قبول ایدیورز. لکن بالجله معلوماته صاحب بولوندقلرینی مراد ایتیورز؛ چونکه بویله بر موفقیت طاقت بشریه خارجندهدر. فقط باس یوق، انسان هر بیلدیکنی - علی طریق الاحاطه - بیله بیلیر؛ تفصیلاته نهایت یوقدر؛ جزئیات امور قابل حصر و تحدید دکدر. بناء علیه بواعتراضده حکمسزدر؛ زیرا عیناً علمدهه توجیه اولونه بیلیر. او حالده عینی شرطلر داخلنده بر آدم عالم اوله بیلسینده دیگر بر آدم نه به فیلسوف اوله ماسین؟!... خصوصاً که (پیتاغوراس Pythagoras) و (سوقراط Socrates) دن بری فیلسوفلر (حکمت sophia) دکل (محبت حکمت philosophia) دعواسندهدر. [بز حکمت خلقتی بیلورز ۱] دیمورلر. [آ کلامغه چالیشیورز. بو کبی تدقیقاته مراق و محبتمز وار ۱] دیمکه اکتفا ایدیورلر. سر حکمتی آ کلامق ممکن اولماسه بیله، محبت حکمت، پک ممکن و مستحسن در معلوماتمک آزاوماسی بومراقه و توحید عامه هیچ مانع دکدر. بو قدر ایضاحات و مناقشات یتر. فلسفه نکه نه دیمک اولدوغنی - اول باول ولایقوله - آ کلاما کز الزم و بنجه ملزم بولوندوغنی ایچون بو یحیی مخصوصاً اوز ایدم؛ و بوساحده بر مناقشه آچق لزومنی حس ایتدم. بنم اعتقاد محب، فلسفه، [معماری علم l'architectonique de la science] در. [*] علومک هر بری کندی ساحه محدوده سنده، کندی دائره معینه سنده، طبیعتک بر کوشه سنی تتبع، و اوراده تجلی ایدن سلسله حادثاتی تعقیب ایدر؛ هم یالکیز او جنسندن اولان شئوناتی تفحص ایلر. طبیعی اوله رق، علومکده توحید نظره میلی واردر؛ بو حیثیتله فلسفه دن هیچ برفرقی یوقدر. بناء علیه، موضوع بحث ایدیندیکی حادثاتک جنسی نه اولورسه اولسون منفرداً جمله سنی هیچ بر علم احاطه ایدمه چکی ایچون - هر علم، جریان حادثانده تحقیق ایده بیلدیکی (نسب ثابتسه و معینه rapports constants et déterminés) نی

[۰] بو کوزل و مهم تعبیر قانتکدر. فلسفه بی یالکیز بو ایکی کله ایله تعریف ایتک - اعتقاد محب - کافیدر، و دیگر لرینه مرجعدر.

برر (قانون طبیعی loi naturelle) اولوق اوزره قید و ضبط ایلر و اوکا بر
 (دستور formule) شکلی ویریر . فقط هر علم بعضی (مقدمات مسلمة) اوزرینه
 استناد ایدر که اولره - لسان اصطلاحده - او عامک (معطایات donnés) ی
 دیرلر ؛ و هیچ بر علم کندی معطایاتی مناقشه و تنقید ایده من [*] ؛ زیرا
 اولری یا (متعارفه axiome) اوله رق ، یا خود (مبادی بدیهه principes
 évidents par eux-mêmes) (شهادت وجدانیه ایله مسلم بر کیفیت
 un fait admis sur le témoignage de la conscience) اولوق اوزره - اول
 باول - قبول ایتشدیر . بناءً علم هر علم - همه حال - بعضی مبادی به استناداً حرکت
 ایدر . ایستراو مبادی - (علوم مجردة sciences abstraites) ده اولدوغی
 کبی متعارفه لردن عبارت بولونسون ، ایسترسه - (علوم مشخصه sciences cencerètes) ده
 اولدوغی کبی - بالذات بر حادثه و یا خود بر کیفیت وجدانیه اولسون ؛ هر حالده بر علمک
 اساسلری بو کبی شیلردر . بو اساسلر اوزرینه قورودوغی (بنای معرفت édifice de la
 connaissance) دخی بر (مجموعه کایات un système de généralisations) در .
 یعنی کندی ساحه تدقیقاتنده کشف ایتدیکی قوانین طبیعیته ، منتظم و مؤتلف
 بر هیئت مجموعه سیدر . هر علم فلسفه به بویله بر هدیه ایله کلوب تماس ایدر .
 فقط اونو تمامالی بزه - هله فلسفه بحثنده قطعاً نظر دقتدن دور طو تمامالی بزه ؛
 - بوتون بو حادثاته وآره لرنده تحقق ایدن (اطراد uniformité) و (آهنگ
 harmonie) ه معنا ویرن ، انجق بزه ، انسانلرز ؛ اصل ، قوانین و حادثات
 طبیعییه معنا ویرمک معرفتدر ؛ خصوصاً طوغرو معنا ویرمک بویوک معرفتدر .
 الک غایض و مبهم مسئله لر بو یوزدن تولد ایتمش و تألیف معلومات ایله توحید
 [*] فقط بر علمک معطایاتی ، باشقه بر علم موضوع بحث و تنقید ایده من دیمک دکلدر .
 مثلاً : ماکنه علمی ایچون حرکت و کتله معطایاتندیر . بو علم حرکت و ماده ک نصل
 شی اولدوغی تحقیق ایتمز و اصول و وسائط تدقیق اعتبارله ایده منده ؛ لکن بر طرفدن
 پسیقولوژی ، بر طرفندنده کیمیا ، بوشیلری - بالائزام - تدقیق ایدر . کنذاک منطق و ریاضیات
 کندی معطایاتی اولان حقایق متعارفه بی پسیقولوژی به براقیر . الی آخره ؛ علمک آیری
 غیریشیلر اولما بوب یکباره بر منظومه تشکیل ایتدیکنی و بر برینه صمیمیاً مربوط بولندوغی
 بو رابطه اثباته کافیدر .

معنا ایده‌مه‌مك سببيله طوغمشدر . اصل بزجه حلی مطلوب اولان متنوع بيلمه‌جه‌لر ايشته بو مسئله‌لردرکه ، اونلرک هر بری (وارق Pêtre) دیدیکمز او (بویوک معما) نك برر (جلوه appearance) سنه متعلق برسری متضمن‌در . هر علم بر صنف مسائلی حل ایدوب اونلره کندنجه بر معنا ویریور . لکن شوراسی محققدرکه هر علمك کندینه خاص بر سیاق نظری ، بر موضوعی بر اصولی ، بر طوتومی واردر . اونك ایچوندرکه هر علم کائناته کندی نقطه نظرندن باقیوروانچق کندی اعتقادنجه بر معنا ویره بیلور . اونك ایچون علوم مختلفه آره‌سندہ تعارض و تناقض واقع اولوبور . مثلاً (علوم حکمیه sciences physiques) متخصصی اولان بر آدم ، قطعياً ارادتی انکاره واریور . چونکه منسوب اولدوغی علم بوتون حادثاتی ، تسلسل اسباب نقطه نظرندن تبع ایده‌بیلیر . بویه بر عالم ، احتمالک ، باشقه بر تربیه آلمش اولدوغندن طولایده روحه اینانه بیلیر ، حتی دینداردخی اوله بیلیر . ایش اوراده دکل ! فقط بالخاصه علوم حکمیه ، ماهیتی اعتباریله (deterministe) در ؛ زیرا کائناتی (صرف میخانیکی purement mécanique) بر سیاق نظرله تحلیل ایدوب هر حادثیه بر قوه محرکه کوسترمه مجبوردر . بوسلسله اسبابی نه درجهیه قدر تعقیب ایده‌بیلیرسه او نسبتده تحقیقاتی ایلری کوتورمش اولور . اوندن سوکره ، حادثانه سبب اوله رق تعیین ایده‌بیلدیکی قوه محرکه‌یه (عقل ، ارادت و نیت intelligence, volonté, intention) اسناد ایتمه‌مکده مجبوردر . زیرا ایتدیکی تقدیرده حادثات طبیعییه نك کیفی اوله رق وقوعه کلکده بولوندوغنه اینانماسی لازم‌کلیر . بوکا اینانجه علوم حکمیه‌یه لزوم قالماز ؛ چونکه کیفی اوله رق وقوعه کان حادثانه بر (سلسله مطرده enchainement uniforme) اوزره تعاقب اسباب آرامق عیشدر . بناءً علیه : (عینی اسباب ، عینی مسبیلر حصوله کتیریر Les mêmes causes engendrent les mêmes effets) ، ده‌نیله مز . حالبوکه علوم حکمیه نك - حتی معنای صحیحی ایله بالجله علومك ! - كرك احکامده مبدأ اعتقادی ، کرکسه اصولده نقطه‌استنادی ، انجق بودستوردر . بویه اولورسه ، یعنی بوتون علوم حکمیه و طبیعیه ، صرف کندی دائره خصوصیه‌لرینه نظرله اکتفا ایدرلرسه ، مسئله تکوین

بمختصه انجق (دینسز جه athéiste) بر حکم ویرمک مجبوریتدن قور توله مازلر .
 زیرا علومده (اصول اعتباریله ! quant à la méthode) اسالاس اولان
 (شرط لابد condition sine qua non) حادثاتی ، انجق (تشارک و تسلسل
 اسباب concours et enchainement des causes) ایله تعریف ایده بیلیمکدر ،
 یعنی بر خالق مدبرک مداخله سنه لزوم کور میهرک ، تعریفده نه قدر ایلری کیتیمک
 ممکنسه او قدر ایلری کیده بیلیمکدر .

بلا تردد اعتراف ایده بیلیم که بو سیاق نظر ، صرف حادثات طبیعیته
 میخانیکیت وقوعه یعنی ظواهر حالته معطوف اولمق شرطیله طوغرودر ؛ و علوم
 طبیعی بو وادیدن آریلاملی در . آریلیرسه - ذره قدر آریلیرسه ! .. - حسابی
 ششیریر : ایکی کره ایکی تک هر زمان درت ایده جکندن امین اوله ماز ؛ خسوف
 و کسوفی وقوعندن اول خبر ویرمکده تردد ایدر ؛ بخارک قوه توتریه سنه هر زمان
 عینی وجهله اعتماد ایده ماز ؛ کونشک هر کون شرق طرفندن طوغه جفته . بیله
 شبهه ایته سیری واردر ، ایده بیلیر ! خلاصه علم ، (صحیح و ثابت exacte et positive)
 اوله ماز . فقط - اصطلاح معناسیله - عام بویله اولمق لازمکله جکنه بیان قناعت
 ایله برابر ، عینی قناعت واطمئنان ایله ینه ادعا ایده بیلیم که علمک سیاق نظری
 یکجهت در ، سطحی در ، و محدود در . زیرا بو سیاق نظر (سرتکونین
) (le mystère de la création) تماس ایده مدیکی کبی ، کیفیت وجدانیه یی ده
 - بزه قناعت کامله الهام ایله جک صورتده ! .. - تعریف ایده میور . حالبوکه ،
 بنجه مقصد حیات اولان ارزولریمک و آمالک منشائی بیلیمک ، و ساولری تحقیق
 ایتیمک ایچون بی تحریک ایدن ، بکا جسارت و امید ویرن ، - ارادتک ، نصل بر
 قوت اولدوغنی آکلامق ؛ بخار ما کنه سنک قوه محرکه سنی بیامکدن ، خسوف
 و کسوفک اسباب حقیقیه سنی آکلامقدن البته اقدم و هر وجهله اهم بر مسئله در .
 سرگذشت انسانیت ، تاریخ مدنیته دخی باقینجه کور و یورم که مقدرات بشریه ده
 قوای طبیعی و اقلیمیه دن زیاده ، قوای معنویه تک تأثیری اولمش و بو کونکی
 جماعت انسانیه تک بو کونکی حال و وضعیتنی انتاج ایله مشدر . عالم طبیعتده
 بویوک فورطنلر کونشک تأثیر حرارتی ایله وقوعه کلیورسه ، عالم انسانیتده

تبدلات و ترقیاتی موجب اولان بویوک اختلالات، اعتقادات و آمالده وقوعه کنن
 نیرات سائقه سیله حصولبولیور! ددیهمه یزکه زلزله نك، قاصیر غه نك اسسبانی
 تحری ایتك، (دور ابتداء) و (اختلال کبیر) ك عوامل معنویه سنی تدقیق ایله مکدن
 - بزلرجه - دها مهم بر مسئله در.

اوندن صوکره بر عقیده انسانیه نك - حد ذاتنده - باطل اولدوغنی، علوم
 حکمیة (کندی نقطه نظرندن!) اثبات ایده بیلسه بیله، او عقیده، انسانیت
 عندنده و تاریخ ساحه سنده قیمت مخصوصه سنی - ذره قدر! - ضایع ایتمش
 اولیور. اوچ درت بیک سنه د نبری الله و دین نظریاتی او غرنده بلکه بکرمی میلیوندن
 زیاده انسان بر برینی تلف ایتمشدر. جماعت بشریه یی بو درجه تحریک ایدن،
 روح انسانیتده بو قدر مدھش فورطنه لر قوباران بر عقیده یی، حکمت، کیمیا،
 طبقات و تشریح کبی علملر موضوع بحث ایتبور دیه، اهمیتسزجه تلقی ایده مه یز.
 باطل بدیهی دخی عدایده مه یز. حکمت، تشریح و کیمیا نك بونده بیان رایه صلاحیتی
 یوقدر. باطل بیله اولسه، انجق بالکیمیا، یاخود بالتشریح باطلدر! فقط ینه
 انسانی اداره ایدر بر قوت معنویه در. اونی بیلمکه، ا کلامه چالشمالی یز! یوقسه
 معمای حیات و سرکائنات حقنده ترتیب ایده بیله جکمز نظریه لر، سعالجی و بکه بحت
 اولور.

او حالده باشقه علومکده رأینی صوره جغز و صورنبجه کوره جکمز که اونلر،
 علوم حکمیة و طبیعیة مخالف و حتی اونلرله طابان طابانه ضد، اعتقاداته - بالضروره -
 متایدلر لر.

معاصرین فلاسفه دن و پسقولوجلر ك مشهور لرندن اولان متوفی (ویلیام
 جیمس W. James) علوم متخصصه ساحه سنده واقع اولان تحقیقات
 منحصره نك، احکام متناقضیه پیوسته اولوب قالدیغنی ا کلاتیور، واحکام علمیة
 میانه سندن رفع تناقض ایله تألیف افکار ایلک معرفتی، فلسفه نك باشایجه
 وظیفه سی اولق اوزره کوستریبو:

[*] [.] وارسین، پسقولوجی، کندی صدد بخی دائرة سنده و کندی

[*] بو مهم ملاحظاتی، متوفی (پروفیسور ویلیام جیمس Prof William James) ك

اصول و غایه سی نقطه نظر ندن (ده تهرمی نیزم) ادعاسنده بولمغه مجبوریت کورسون!.. بونده هیچ کیمسه خطا بوله مازا کر بوادعانک انجق اضافی ونسبی بولوندوغی، حتی عکسفی التزام ایتک بیله ممکن اولدوغی دوشونولورسه، مدعالری تالیف و توفیق ایدرک، آرده کی تناقضی قالدیرمق قابلدیر. نته کیم علومک نتایج تحقیقاتنده بویه بر تناقض واردر؛ مثلاً (علم اخلاق la science morale) پسیقولوزی نك ضدینه بر ادعاده بولونوبور. بن، اخلاقک مدعاسنی دها قوتلی بولمغه تردد ایتبورم: ارادت بشریه نك قیوددن آزاده اولدوغنی درحال تسلیم ایدیورم. بناء علیه بنم نظر مده پسیقولوزی نك (ایجابیه déterminisme) اعتقادینه تمسک ایتمه سی، (صرف اصوله عائد purement méthodologique) وموقت بر مجبوریتدر. علم اخلاقک نقطه نظری مدافعه ایتک ایچون دلیل کتیره جک دکل ایم؛ بوراسی یری دکلدر! (اخلاق) ایله (پسیقولوزی) آره سنده - نقطه نظر اخلاقدن ناشی- واقع اولان شوتنازع اعتقادی یالکیز بر مقصده ذکر و ابراز ایدیورم: شو کیفیت مهمه بی کوسترمک ایستبورم که، تتبع و تحقیقه موجب سهولت اولمق ایچون عالم حقیقتک انجق بر قسم مخصوصنی بالا فراز، موضوع بحث ایله بن علوم خصوصیه، یکدیگرینه اساساً مربوطدر و بر وجهله یاردیجی درلر. بناء علیه هریری نتایج تحقیقاتنی اورطه یه قویوب ادعالرینی قارشیلان شیرمالی، و احتیاجات متقابله لرینه نظر آزمین بختی بالتئور، احکام اساسیه بی بردها کوزدن کجیروب تصحیح ایتلی درلر. ایشه علوم خصوصیه نك، اجتماع ایدوبده مباحثه کیریش رکاری (= forum = میدان) [**] رینه (مابعدالطبیعات metaphysics) ده نیلیر. علوم خصوصیه بر جوق

پک متبر بر درس کتاندن عیناً نقل ایدیورم. لسانمک انونه تونیق، ترجمه سربستهجه یایاشدر. بو سوزلر، مختصر پسیقولوزی نك نهایتده (epilogue خاتمه) بی تشکل این (عالم روح و فلسفه Psychology and Philosophy) باندن نقل ایدلدر. [صحفه ۴۶۱]. پروفسور (و. ج. بیس) رمانمک صاحب مملک فیلسوفلر ندن و نامدار پسیقو-لوژی علماسندندر. اسر بلمک مدار افخ بی اولان بوذات مشهور (هاورد Harvard) دارانونده پسیقولوزی خواجه سی ایدی. پک جبل الوجه بر اختیار ایکن بوندن بدی سکز سنه اول وفات ایتلدر. مهم اثرلی واردر.

[**] Forum روماده مشهور بر میدان ایدی. اوراده اعیان و مبعوثان ملت اجتماع ایدرک مجلس سیاست عقدالمرلر ایدی. مغللاک (قورولتای) مجلسی (forum) طرزنده رشی ایدی، فقط یالکیز اعیان و ارکان دراته خاص و بناء علیه آریستوقرات بر مجلس مشیرت ایدی.

(معطایات) ایله مشغول اولورکه اونلر مظلّم، مبهم حتی بکدیگریله متناقض شیلردر. لکن هر علم، کندی نقطه نظرندن باقیجه - محدود اولان صددبختی داخلنده - بو قصورلری کورمیه بیلیر، نظر اعتباره آلمیه بیلیر. طبقات الارض عالمک دائرة بحثنه (مکانک ماهیت ذاتیه سی) مسئله سی صیغماز. ما کنه عالمی، (عکس تأثیرک، نصل اولوبده ! تأثیره معادل و مقابل کلدیکنی) بیلیمکه مجبور و دوشونمکه محتاج دکادر. بسیقولوی عالمی، هم کندیسنگ، همده موضوع بحثی تشکیل ایدن (ذهن ک) - نصل اولوبده ! - عینی عالم خارجی ایدن ادراک و تعقل ایده بیلدیکنی صورماز بیل! ... فقط شوراسی آشکاردرکه بر نقطه نظره کوره صدددن خارج قالان و مناسبی اولمایان مسئله لر، دیگر بر نقطه نظره کوره، اصل موضوع بحثی تشکیل ایده بیلیر !.. بوتون کائناتی، هیئت مجموعه سیله یعنی یکوجود اوله رق موضوع مطالعه ایدوبده، اونک ایچ یوزینه ممکن اوله بیلدیکنی قدر انفاذ نظر ایلک و طبیعتی آکلامق مقصود اولونجه، (مابعدالطبیعیات معماری) هر مسئله دن دهامهم ودها مبهم اولوریر. [الی آخره!....

شبهه یوق که فلسفه - براز اول ادعا ایتدیکم کبی - معماری علمدر. علوم مختلفه و خصوصیه، اوکامالزومه انشائی ویریر؛ هم حاضر لانتش بر شکلده ویریر: یعنی هر علم، جزئیات حوادثی دکل، اونلرک ضمننده کشف ایتدیکنی مسائلی عرض ایدر. او مسائلی، یکدیگرینه قیاساً ترتیب و تألیف ایدن فلسفه، منتظم و متناسب وهر وجهله هم آهنگ بر (بنای معرفت) وجوده کتیریرکه، او - بوتون کائناتی محیط - بر (نظریه علم théor. de la connaissance) در. سرائر خلقتک و تجلیات وجودک، فسون الهماتیله ذهن بشرده تولد ایدن معماریک جمله سی ایچون - او بنای معرفتده - معین و خصوصی بر موقع وارددر. فیلسوف، بر (موزه خانه) یی تنظیم و ترتیب ایدن علامیه بکزر: طبقی اونک کبی، او مسائلی تصنیف و ترتیب ایدر. یالکزر شو ترتیبندن بیلله بر معنا چیقاره بیلیر: موزه خانه ده کی شیلری صره سیله تتبع ایدن عالم، کره ارضک ادوار عمرینه دائر، عالم عضویتک یر یوزنده ظهوریله تکاملنه دائر، مدینتک انکشافیله تر قیسنه دائر بر فکر حاصل ایتدیکنی کبی، فیلسوف دخی علومک کندیسنه

عرض ابتدایی مسائل متنوعه‌دن بر چوق معمار حلنه یول بولور . حالبوکه (پاله‌ئون‌تولوغ) و (آرکه‌ئونلوغ) ده‌نیان عالمه بوفکرلری ویرن، بوملاحظه‌لری الهام ایدن مستحائاتی، اجار و صخور مختلفه‌یی، الحاصل موزه‌خانینی طولدوران ماده‌لری او آدم بالذات کشف ایتمش، کندیمی بولوب چیقارمیش دکلدر . فقط اونلری قارشیسنه دیزوبده کندیسنک بالذات بولوب چیقاردینی مسئله‌لر وار!.. معنار وار!.. بر آلتنده بر مستحانه بولمق باشقه ، او مستحانه‌یه انفاذ نظر ایدوبده ضمتنده کیزلی بر مسئله کشف ایتک و اومسئله‌یه بر معنا ویرمک بوسبوتون باشقه شیدر!...

فيلسوفك مشغله‌یی و معرفتی طبقی بوکا بکزر.

فيلسوف ، بسته‌کار افکار و معمار علم اولمق حیثیتله، اک‌بویوک (آرتیست Artiste)، اک‌بویوک (Compositeur) در . (پارته‌نون معبدی Parthénon) معبدی کچی بر بنا یاپه‌بیلیمک - شبهه یوق که - فوق‌العاده بر ده‌ها ایله اولور . فقط ارسطونک کلیات آناری کچی بر بنای معرفت قوره‌بیلیمک ایچون البته ده‌ها بویوک ، حتی عالمشمول ، بر ده‌ها ایستر!... (پارته‌نون معبدی) ، زمان ایله خراب اولمش ، ییقیلیمشدر ؛ امثالیده ، کونک برنده ، ییقیلیمشدر . فقط ارسطونک (منطق) ی عقل انسانیت ایله برابر پایدار اوله‌جقدر. نته‌کیم‌بونان قدیم استادلرینک بنا ایتمش اولدوغی مسالاک فلسفیه - برچوق تعدیلاته رغماً - حالا پایداردر .

شوملاحظات خصوصیه‌مه اشتراك و قناعت ایدیورسه‌کز، اینی‌بیلیملی سکزکه فیلسوفلق معلوماتمز اولماز ؛ همده‌متنوع ، مختلف و شه‌والی معلومات ایستر! نصل‌که معمارلق اولما معلوماته صوکرده درلو درلو مالز مه‌یه محتاجدر . فقط فلسفه، ساده قوری معلومات‌ایله‌ده اولماز!... غایت خصوصی و جبلی بر استعداد ایستر! بر کوزل منظومه یازه‌بیلیمک ایچون خصوصی بر استعداد شاعریت لازم اولسون‌ده بوتون کائنات ماده و عوالم انفسیه‌نک معمارینی - هیچ اولمازسه!- تعبیر ایده‌بیلیمک غیرتیه بر (منظومه معرفت) ترتیب ایلک قابلیتی، نیچون خصوصی بر استعداد متوقف بولونماسین ؟!...

هر كسك - ايسته ديكي زمان و ايسته ديكي كبي - فيلسوف اولو و پر مه سنه باقياير سه بويه بر استعدادك لزومي ، لسان حال و طور ايله ، انكار ايدلمش اولو بور ، ديمكدر . حالبو كه بو طوغرو دكلدر!.. اوروپا مدرسه لر ينك هر برنده بيكلرجه شا كرد معرفت واردر . فلسفه دخی بك مهم و متنا بر درس اولمق اوزره دارالفنونلرك جمله سنده لايقيه تدريس اولونمقده در . معافيه ، بويوك فيلسوف لر عصر لرده بريته بيلور!.. حتی ، برخيلي كشفیات علميه واقع اولوبده بر چوق مالزومه فكريه طوبلانقدن و يا واش يا واش اعمال ايديله رك بر شكله قونولدقن صوكره (فيلسوف) دنيلن معمار ظهوره كليور واونلردن بر (بنای اعتقاد) قورويور . قانتك ، قونتك ، ميلك ، سپنسر ك تاريخ ظهوري ، وسيله ظهوريني ده كوستيرر .

ايسته افنديلر!.. بن فلسفيني بويه بيليرم و فيلسوفی بويه طانيرم ! فلسفه اك عالي معناسيله اك بويوك (صنعت Art) در . علومه شدله احتياجي واردر . نصل كه صنايع نفيسه نك ده علومه احتياجي آشكاردر ؛ محققدر . فقط استعداد ، ده ، الهام ، معلوماتدن كلز ؛ واقعا صنعت ، عناصر لازمه سني ، كال حریت ايله ، علوم مختلفه دستكاهلرندن آير . فقط ايسته ديكي كبي آير ، ايسته ديكي كبي قوللاير!.. اونك ايجوندر كه فيلسوفك ، (عام بحثده) جزئيات اموري - بر متخصص كبي واونك قدر - بيلمه سي لازمكمز .

مثلا ، مطبخ طوزينك هانكي (جمله système) ده تبيلر ايتديكني ؛ مختلف رنكلرك يكدركرينه نسبتله درجه امتصاصي ؛ (باللي بابا) نك ، يا خود (طام قوروغني) نك هانكي فصيله نباتيه منسوب بولونوغني ؛ زخل ييلديزينك نقلت اضافيه سيله حجمي ؛ و يا خود قاينارجه معاهده سنك فلانجه بنديني ؛ مسققات قانونك اون ايكنجي ماده سني ، بيلمه سي لازم دكلدر . (بو تفصيلاتي بيلمك لزوم سزدر و يا فائده سزدر !) ديمك ايسته ميورم !.. بالعكس ارباب اختصاص ايجون برنجي درجه الزم و فائده ليدر . يالكيز بر فيلسوفك علومدن اقتباس ايده چكي معلومات بو قيلدن اولان خصوصيات دكلدر . بو خصوصياتك عقده اساسيه سني تشكيل ايدن مسائلدر . شو قدر وار كه بر فيلسوف - حين حاجنده -

جزئیات علمیہی بالذات تحقیق ایدہ بیلہ جک درجہ دہ عمومی برتریہ فکریہ بہ صاحب ومالك اولمالیدر۔ هر علمی اطرافیلہ، جزئیاتیہ بیلک، ممکن دکادر؛ لازمہ دکادر۔ فقط (علمک روحی، واصولانی l'esprit et la méthode de la science) بیامک الزمدر۔ بونی بیلہمین فیلسوفلر، استعدادلربنہ رغماً یا کلش حتی مضر سیستملر وضع ایتمکله تملی چوروک بنالر قورمشلر وفائدہ یرینہ ضرر ایقاع ایتمشلردر۔

مختصراً تعداد ایندیکم شو شرطلر، نظر دفته آلیندرده فلسفہنک وضع وحیثی تأمل اولونورسہ :

(علموک ترقیسی وتکامل ایله تشعی، فلسفیہ حاجت برآقایہ جق وبلکہ اونوی محو ایدہ جکدر) جملہ سیلہ ویریان حکمک، نه قدر حکمسنز اولدوغی درحال آکلاشیلیر۔ صلاحیت علمیہنک - طوغرودن طوغرویه - تعلق ایدہمدیکی نیجه مسائل وار۔ (بومسائل)، واقعا علمک ترقیسی ایله چوغالیوروتنوع ایدیور؛ بویله کیدرسہ فلسفہ، محو اولمق ویا لزومسنز قالمق دکل، بوسبوتون موضوع بحثی واهمیتی آرتدیرہ جق ولزومی کوندن کونه دها زیاده حس اولونہ جقدر۔ (لکن مسائلک بودرجه چوغالوب تنوع ایتمہسی دہ احاطہ فلسفیہ خلل لجنده قالیر!) دیه برفکر خاطره کلیر ومقام اعتراضده سرد اولونہ بیلیر؛ فقط اونکده، ظن ایدرم، یک اوقدر حکمی یوقدر۔ یکی یکی انواع واجناس نباتیہنک کشف اولونماسی احتمالی، نباتیونی اندیشہیہ دوچار ایدیورمی؟... نباتاتک ہر فردینی آیری آیری تتبع ایتمک، برعالم ایچون مجبوری ولابد برشرط دکل کہ!.. عالم، هانکی نباتی الینہ آلیرسہ اونوی بر صنفہ درج ایدہ بیلیر۔ اگر بوسبوتون اوصاف متایزہ عرض ایدیورسہ، اونکله بریکی صنف نباتی نک (انموذج type) نی بولش اولور، ویکی برصنف تشکیل ایدر۔ ریاضیون، نامعدود اولان مسائل محتملہدن اورکویور، قورقویورمی؟.. (بویله کیدرسہ ریاضیات محو اولہ جق، لزومسنز قابوب اورطہدن قالقہ جق!) دیه اندیشہ ایدیورمی؟... نه قدر غامض مسائل حسابیہ اولورسہ اولسون اونلرہ بر شکل ویردکدن صوکرہ جملہ سنی دہ - هرکسک بیلدیکی - اعمال اربعمہیہ ارجاع ایله حل ایتمک

چالشیور. بر (تاریخ عالمی savant historien)، دنیاده گلش کچمش نه قدر وقوعات وارسه، جله سنی تفصیلاتیله بیلورمی؟... حتی بالذات شاهد اولدوغی حادثات اجتماعی و سیاسی بی - بوتون جزئیاتیه!... ضبط و قیدایده بیلورمی؟... بو سوالره، (اوت!... های!... های!...) دهیه جک بر عالم دکل، (بلکه!...) دهیه بیله جک بر جاهل بیله تصور ایدم!...

او حالده علما نصل حرکت ایدیورسه، فیلسوف دخی اوپله یاپار و اوپله یایمه سنی هر کسدن ایی بیایر!... بوتون مسائلی بر ایکی شکل عمومی یه ارجاع ایدرک حله چالشیور. نباتات عالمی بیلیرک هانکی نباتات اولورسه اولسون حیانتک شرائط اساسیه سی بعضی قوانین عمومییه شکننده و برر عمومی دستور صورتنده ضبط و افاده اولونه بیایر. تاریخ عالمی ده بیلیرک حیات اجتماعی و اختراعات و امال انسانیه تک بعضی شروطه کوره معین و عمومی جریانلری واردر. هر عالم کندی ساحه تدقیقنده، انجق او جریانلرک ثابت و معین دستورلری بولمقله اوغراشیر و بو وجهله فلسفه تک مالزمه انشائییه سنی (اعمال élaborer) ایدر. تفصیلاته اوغراشمه سی، بالخاصه تفصیلات ایچون دکلدرد: اونلرک ضمننده کیزله تن مسائل خصوصیه بی کشف و اظهار ایتک ایچوندر.

(بعضی مشهور علماء فلسفه سیستملری قورمشلردر. آیریجه فلسفه یه نه لزوم وار؟) دهینلرده اوله بیایر!... واقعا اوپله!... فقط او کبی علما، بویله بر موفقیت اثبات ایدیه بیلمشلر ایسه، عالم اولمقله برابر، برده (دهای فلسفی) یه مالک اولدقلر نندردر. شبهه سز بو بر بویوک بختیارلق در. فقط هر عالم متخصص، محضاً عالم اولدوغی ایچون بویله بر قابلیت کوستره میور. مع مافیه (ده قارت) دخی - بر باقیمه - عسکر دی؛ فقط دهای شخصی سی اعتباریله عسکر می ایدی یا؟... مشهور موسوی فیلسوفی باروخ اسپینوزا - معلومدرکه! - بر فقیر جاجبی ایدی. لکن، اوز کای خارق العاده یه باقیلیرسه جاجبی می ایدی یا؟... اوپله فرض ایدرسک بر عسکر، بر جاجبی فیلسوف اوله بیلسین ده ندن بر عالم ریاضی، بر عالم طبیعی، اوله ماسین؟!... شبهه یوق که عالم بر آدمه فیلسوفاق دها زیاده یاقیشیر؛ چونکه فلسفه علمدن مستغنی قاله ماز. آیری بر (زندانعت) ده دکلدرد؛ (احاطه لی بر نظرله

طالملك) ك آدى فيلسوفلقدر . فقط فلسفه علمه نه قدر محتاج ايسه ، علمده طوغرو بر فلسفهيه او قدر محتاجدر . زيرا علمه (اصول methode) نى ورن (فكر فلسفى) در . غاليله ، قوبرنيق ، نيوتن ، هاروهى ، لاووازيه كې كاشفين ومجدين ، عصرلرنده (تفصيلات علميه) ايله هر كسه فائق اولدقلى ايجون دكل ، اك طوغرو فكر فلسفى به صاحب اولوب اك ابي اصولى كشف ايده بيلدكلى ايجون ، يكي بر دور آچق شرفى احراز ايتديلر . معافيه اصول علمى - على الاطلاق ! - تحقيق وتنسيق ايتك فلسفهك وظيفه سيدر .

بوراده فلسفهك بالمله علوم ايله مناسبتى مسئله سنى تذكر ايده بيليرز . بونك ايجون بك چوق بحثلر آچيلمشدر . بنم بو خصوصده كى فكر واعتقادم جهور متفكرينه مخالف اولدوغى ايجون ، بو بحثى واوكا تعلق ايدن مناقشاتى بورايه نقل ايتيه جكم . بو مناقشه يى (methodologie) بحثنه براقيورم . فقط بوراده فكرى قيصه و صريح بر صورتده عرض ايتك مجبور ايتنديم .

اكثر فيلسوفلر ، علمى ، غريب بر تقسيمه تابع طوتمشلر ؛ منطق ، پسيقولوژى ، اخلاق ، كېلرينه (علوم فلسفيه sciences philosophiques) ديمشلر . باقىسىده (علوم غير فلسفيه) اولمق لازمكه جك !... حالوكه بونى صراحتاً ادا ايدن يوق !... معاصر ينمز آره سنده تحقيق قاتيله ، صلاحيتيله مشهور اولان بويوك فيلسوفلردن متوفى (سرويليام هاملتن) ، منطق ، اخلاق ، سياسيات وصنایع نفيسه يى پسيقولوژى شعباتندن عد ايدىيور ، واولجه سويله . ديكم كې - پسيقولوژى يى ده بالخاصه فلسفه ايله بر طوتويور . اعتقادجه ، بو ياكشدر ويا كلشاغك سوبزه قيويزم يوزندن وقوع بولدوغى ده ، اشارتاً اخطار ايتشدم .

بنجه پسيقولوژى دخى داخل حساب اولمق اوزره بونلرك جمله سى علوم صنفنددر . علومك جمله سى ده وارللك بر سلسله تجلياتى ، بر طاقم حادثاتى تدقيق ايتدىكى ايجون ، بلاتردد ادا ايده بيليرم كه (غير فلسفى) هيچ بر علم يوقدر . معماى وجوده وكيفيت معرفته آرزچوق تعلق اولان مسائل خصوصيه يى

هر هانكي بر علم ساحه سنده بوله بيليرز . هر علمك فلسفه يه مناسبتي ده بومسائل واسطه سيله در . شبهه يوق كه علم روح ، كيفيت ادراكي بالخاصه وبالصلاحيه موضوع بحث ايتديكي ايچون ، فلسفه نك بر مهم تسمى اولان (مبحث معرفت épistémologie) ، طوغرودن طوغرويه علم روح مسائلي ايله صيقي صيقي يه علاقه داردر . لکن سائر علوم ايله علاقه سي يوق ديمك دكلدر . علمده - باطني ، ظاهري - هيچ بر حادته يوقدر كه فيلسوف اوندن بر معنا چيقارده ماسين ! فلسفه نك ، دين ايله ، حتی ميتولوژی ايله دخي علاقه سي واردر ، چونكه اوساحده دخي بر خيلي مسائل ظهوره كلشدر . بونلري ايضاح ايتك ايچون ير قلامادي يالکزر الهيات ايله رابطه سنه دائر (هاملتن) دن نفل ايتديکم شو سوزلرله اکتفا ايدوب فلسفه نك بزکائنده بر (علت اولی eause première) آرييورسه ق: [. . . . فکر الوهيت (la notion de Dieu) يالکزر علت اولاده مندرج دکلدر . بويله بر علت اولايي قبول وتسلیم ايتمکده (مؤمن théiste) و (ملحد athéiste) متفق در . حتی بويله بر علت اولايه (قدرت کليه omnipotence) صفتی اسناد ايتمکله بيله ، حقيقت الهميه تماماً افاده ايدلمش اولماز ، زیرا (ماده matière) يي وياخود (اقتضا nécessité) يي بالجمله موجوداتك (مبدأ اصلی principe original) سي اولق اوزره قبول وادعا ايدن بر (ملحد) ، بومبادي يه کور کورينه - بر قدرت کليه اسناد ايتمکله (ماده) يي وياخود (اقتضا) يي الوهيت مرتبه سنه چيقارمش اولماز . عقل و ارادت و فضيلت ايله متصف اولمادجه علت اولی ، الله اوله ماز . الى آخره !]

ا کلاشيایورکه ، بو علمده سر خلقت و معمای تکويني قوانين ميخانيکيه ايله تفسير ايتمک کائنده (فعال لمايريد) ، (مدبر) بر (عقل کل) اولديغني انکاره وارير . عکسني دوشونمک بوتون علوم طبيعيه و حکمييه نك اصولاني انکاره وارير . ايسته ، (نزاع علم و دين le conflit de la science et de la religion) مسئله مهمه سي ، بو بر زخده ظهور ايتمش وحلي فلسفه يه ترك ايدلمشدر .

معلوماتك هر قسمنده بويله مختلف فيه مسائل بولق ممکن اوله جني ايچون شونقل و اراد ايتديکم مثال ، سزه بر فکر ویرمه کافيدر .

شیمدی فلسفه نك تقسیماته و مسائل خصوصیه سنه باقم ! . . .
 فلسفه تاریخ، فلسفه حقوق، فلسفه صنعت، فلسفه . . . الی آخره ! . . .
 دیه بر تقسیم معروف واردر که فیلسوف اولمایانلرده اونی بیلیر . بو تقسیم
 بوراده نظر اعتباره آلیه جغز! هر شیک بر فلسفه سی اولونجه، فلسفه نك شعباتی
 حصر و تحدید ایتک امکان خارجنده قالیر. واقعا، هر علمک بر (فلسفی جهتی)
 اولدوغنده شبهه یوقدر؛ هر شیه فلسفی بر نظرله باقی ده ممکندر. حکمت شناس
 مشهور، متوفی پروفیسور (تیندول Tyndall)، [*] (حرارت = Heat = chaleur)
 نامیله معروف اولان کتابنده، مختلف رنگارک (قابایت امتصاص d'absorption) نی تتبع ایتش و نتیجه تحقیقاتنه بناء (فلسفه تلبس) عنوانیله
 بر بحث آچشدر. فلسفه صنعت، نه قدر فلسفه ایسه بوده اوندن آشاغی قالماز.
 لکن بزم آرادیمز بو دکلر . بر تقسیم طبیعی، ممکنمی ؟.. دکلی ؟.. اوکا
 باقم جغز ! . . .

ارسطونک بر مشهور تقسیمی واردر که بوتون دنیا اونی - بر و قتلر ! -
 قبول ایتشدی. حتی - بوراده اثبات ایده جکم وجهله - حکمای اسلام دخی
 عیناً تاقی ایله مشدی .

بر ویلیام هاملتن، ارسطویه کوره فلسفه تقسیماتی بویله جه عرض ایدیور:
 [فلسفه نك الیاسکی و عمومیت اوزده مقبول و مسلم اولان تقسیماتی ایکی در:
 فلسفه نظریه و فلسفه عملیه !.. بونلر، غایه لرینک اختلاف ماهیتته نظر آ بر برندن
 ممتازدرلر. برنجی قسمده (غایه اعلا = Highest end = le but le plus élevé) (حقیقی بیلیمک) اولدوغی ایچون، اوکا فلسفه نظریه ده نیلیمشدر.

[*] اصلاً ایرلاندالی اولان بو ذات عصر نك مشهور حکمت نك اسلر ننددی. هله خواجه
 اوانی و درس تقریر ایتک اعتبارله خارق العاده بر اقداره، خصوصی بر استعداده مالکدی،
 دیرلر. اک غامض مسأله یی بک قولای بر شکل قویار و هر که لایق له آکلانه بیلر مش.
 هربرت سبنسر، بر کون درسی دیکله مکله، تقریرینه حیران اولمشدر؛ حیات نك نهایت
 قدر فیلسوف ایله بو عالم، صمیمی دوست اولمشدری. (تیندول) فلسفه یی بک مراقفی و
 غایتله جدلی و بحث اولدوغی ایچون، و باحه آچدینی کی یورغون و سیکرل، سبنسر بزار
 اولور، قاچار مش. (تیندول) شدتله ماتریالیزمه میالدر. آرلری هر لسانه ترجمه ایدلشدر.

فلسفه عملیه‌ده ایسه (معرفت حقیقت) مقصد اصلی دکلدر؛ بر (غایه قریبه Proximate end = but prochain) در . بو بر مقصد اصلی ایچون آنجق واسطه‌در و اوکا تابعدر. فلسفه نظریه‌ده یالکیز (بیلیمک مقصدیه) کسب معرفت ایدرز . (لاینلرک Scimus ut sciamus دیدیکی بودر !) فلسفه علمیه‌ده آنجق (بر ایش یا همق ایچون) کسب علم ایلرز . (Scimus ut operemur) الی آخره ! . . .

بزم قینالی زاده علی افندی ، (اخلاق علائی) نام اثر معتبرنده تماماً بو تقسیمی عرض ایدیور و اونی (اخلاق ناصری) صاحبی حکیم و ریاضی مشهور (نصیرالدین محمد طوسی) دن نقل ایتدیکنی اعتراف ایلور .

اخلاق علائی نک مقدمه‌سنده ، [*] فلسفه‌نک ، اسکیلرجه الک معروف اولان تعریفی ویردکدن صوکره ، حکمتی ، (حکمت نظریه) و (حکمت عملیه) اولاق اوزره ایکی بویوک قسمه آیریور . و طبق ارسطو کی تعریف ایدیور . صوکره حکمت نظریه‌یی اوچه تقسیم ایدیور : کرک خارجه ، کرک ذهنده ماده جسمیه دن مستغنی بولونان ، یعنی (عقول و نفوس مجرد) کی شیلردن بحث ایدن فلسفه‌یه (علم الهی و علم اعلی ! Théodicée) دیور . ذهنده ماده دن مستغنی ، فقط خارجه ماده‌یه محتاج اولان شیلردن بحث ایدن ایککنجی قسمده (علم اوسط) نامی ویریور که بوتون ریاضیات بو صنفده داخلدر ، وهیئت ، هندسه ، حساب ، موسیقی علملرنی شاملدر . ذهنده و خارجه ماده‌یه محتاج بر طاقم موضوعاته تعلق ایدن اوچونجی قسمه دخی (علم اسفل) دیور . [زیرا خارجه و ذهنده ماده ناقصیه محتاج اولدوغنی ، علم اسفل دیمکه باعثدر !] حکمت عملیه‌یه کلنجه ، (علم اخلاق) ، (علم تدبیر المنزل) ، (علم سیاست

[*] (اخلاق علائی) نک بولاق باصمه‌سی . صحیفه (۱۱) دن اعتباراً . —

(تاریخ ادبیات عثمانیه) نامیله بر بویوک اثر معتبر وجوده کتیرمش اولان متوفی (میستر کپ) ، تاریخک برنجی جلدنده (فلسفه ، تصوف و دین) نامیله بر باب آجش و قینالی زاده‌نک حکمت و تقسیماتی حقده کی صحیفه‌لرنی نقل و شرح ایدرک و مأخذ اصلیه‌سی کوسترمشدر .

(المدن) نامریله اوج قسمه آریلیور که ارسطونک (éthique)، (économique) و (politique) نامریله تقسیم و تسمیه ایتدیکی شعبه لر در . بونلرک بر سوری تقسیمات تالیه سی ده اوار . الی آخره ! . . .

بو تصنیف، واقعاً — یاقین زمانه قدر — عموماً دارالفنونلرده مقبول و معتبردی . هاملتن بوکا بر سبب کوستریور که طوغرودر: [اوروپا دارالفنونلری تأسیس ایدلدیکی زمان — یعنی قرون وسطاده ! — ارسطو فلسفه سی اذهان اتسانیته حاکم یکانه ایدی . طبیعی در که ارسطونک اوزمان الده تداول ایدن بعض آثار مشهور دسی مشق تعالیم اتخاذا اولوندی، و فلسفه تدریساتی (منطق)، (مابعدالطبیعیات)، (حکمت اخلاق Philos. morale) (حکمت سیاست Phil. politique)، (علم تدبیر المنزل économique) [*] و برده (طبیعیات Physique) شعبه لرینه آیرلدی . [دیور . بزده ده اوتدنبیری مشهور و معتبر اولان فلسفه تقسیماتی تماماً بودر . بز عربلردن آلمشز ؛ عربلرده (معلم اول) و صفیله تجیل و تکریم ایتدکاری ارسطودن آملشدردر .

صوکره ارسطونک تحکمنه نهایت و یرمک و حقیقته قرون وسطی بنای عرفانی هدم ایتک اوزره موفقیتله مجاهده یه کیریشن (بهی قن Bacon)، فلسفه یی، موضوعاتنه نسبتله اوج بویوک صنفه آیرمشدی . فلسفه موضوعاتی ده — بو انکلیز حکیمنک انتقادنجیه — (الله)، (طبیعت، یعنی کائنات مادیه) و (انسان) در .

کذلک (ده قارت) دخی فلسفه یی، حکمت نظریه و عملیه اولق اوزره

[*] بو کونجی لسان علمی بزمده (économique) تعبیری (اقتصاد و اقتصادی) کله لرله ترجمه ایدر ز . بو معنا (écon. politique) ترکیبه طائدر . واقعا بو علمک واضعی اولان آدم سمیت، بو تعبیری طوغرودن طوغرویه ارسطو لسانندن اقتباس ایتمیشدی که (ایقوس) منزل و خانه زیمکدر (نوموس) دخی قانون معنانه در . (پولیس) ده، مدینه دیمکدر . اونک ایچوندر که ارسطو لساننده (ایقونومیکی)، بو کون بزم اداره (بیتیه) دیدیکمز شیلیری موضوع بحث ایدر ؛ اونی اسلافز (علم تدبیر المنزل) ترکیبیه ادا ایتشدردر . نته کریم (پولی تیکی) بی ده علم سیاست المدن دیه ترجمه ایلمشدردر . افلاطونک ره بوبلیق نام کتابخی عربلر سیاسته المدینه نامیه ترجمه ایتشدردر .

ایکی بویوک صنفه آیرمش ودها دوغروسی ، ارسطونک تقسیمنی اساساً قبول ایتشدی . نته کیم شاگردانی و معقبیری تماماً ارسطونک تقسیمنه رجوع ایتدیلر . (غاساندی Gassendi) ، (لوق Locke) ، (قانت Kant) ، (فیخته Fichte) کبی بویوک فیلسوفلرک و (دالامبر Dalambert) ودها بعض مشهور علمانکده تقیباتی واردر ، فقط بونلرک جملهسی تصنیف علومه منجر اولورکه بوراده تصریحی اوزون سورر ولزومسزدر ، اونک ایچون واز یکپورم ، خصوصاکه فلسفه تقیباتی — بنم اعتقادجه — بو دکلدر .

بو کون ، مسائل اصلیه سنه نظراً تقسیم ایدرلرکه الک طوغروسی بودر ، و فلسفه نک — فکرجه — الک طوغرو تعریفه موافق اولانی در .

شیمدییه قدر وجوه مختلفه اوزره عرض ایتدیکم مطالعاتدن ، فلسفه نک آنجق معماری علم اولدوغنی آ کلامشسکزدر . امید ایدرمکه بو تعیردن نه معنا مراد ایتدیکمده دخی ذره قدر شبهه کز قالمشدر . بونک ، ماهیت و اصول اعتباریله علومدن فرقلی و بوسبوتون باشقه برشی اولمادینی محقق و مسلم بولونمقله برابر ، جزئیات امور ایله دکل ، فقط کلیات مسائل ایله مشغول اولدوغنی دخی آرتق هر کسجه مقبول بر اعتقاددر . نتیجه تدقیقاتنده متخالف نظریانه و متعارض اعتقاداته پیوسته اولان (علوم شتی ، Sciences diverses) نک بوتون (مسائل قصوا Les problèmes ultimes) سنی موضوع بحث ایدوب آرده کی تناقضی قالدیره رق (معمایی وجود l'énigme de l'existence) حقنده معقول بر نظریه ترتیب ایتک ، فلسفه نک وظیفه مخصوصه سیدر . بونی هیچ بر علم کندی باشنه و کندی دائره سننده یاپه ماز . علومک علی الانفراد ترتیب ایده بیلدیکی فرضیات و نظریات ، خصوصیدر ، یکجهتدر ، ناقصدر و یکدیگری ناقصدر . بر عالم ریاضی ، الک غامض و معضل مسائلی اعمال اربعیه ارجاع ایله حل ایتمکه چالیشدینی کبی ، فیلسوف دخی بوتون مسائل علمیه پی اوج درت مسئله اصلیه ارجاع ایدر و او عمومی سؤالره جواب تدارکی ایچون دوشونور چالیشیر .

بو بویوک سؤالر — بنم فکرجه — نهایت ایکییه منجر اولور :

(حقیقت وجود نه در ؟ ...)

(بز اوکا نصل مطلع اوله بیایرز ؟ ...)

ایشته فلسفه نك الك عمومی و اساسی تقسیاتی بو ایکی سؤالک ماهیتنه کوره تعین ایدر . برنجی سؤال ، (مبحث وجود *Ontologie*) دیدیکمز قسم فلسفه یه عائددر ؛ یعنی مبحث وجود بو سؤاله جواب ویرمکله اوغراشیر و شیمدی یه قدر ترتیب ایدیه بیلمش اولان مشهور جوابلری تتبع و تنقید ایدرک قیمت نسبیله لرخی تقدیره چالیشیر . اصل (مابعدالطبیعیات) عنوانی بو قسمه تخصیص ایدله لی در ؛ و ایدلمکده در !

ایکنجی سؤال ، فلسفه نك (مبحث معرفت) دیدیکمز قسمنه عائددر . یعنی (نه بیسته مولوژی) بو سؤاله جواب تدارکی ایله مشغول اولور و شیمدی یه قدر ترتیب ایدیه بیلمش اولان مشهور جوابلری نظر اعتباره آلیر ، تنقید ایدر ؛ قیمت نسبیله لرخی تقدیره چالیشیر . بو خصوصده ترتیب اولونه بیلن (اطرافلی جوابلر) ، (کیفیت علم حقنده بر نظریه) دن عبارت قاله جنی ایچون اونره (نظریه علم *Théorie de la connaissance*) ده نیلیر . مذاهب فلسفیه ، بو (نظریات علمیه) ده واقع اولان اختلافات اساسیه دن نشأت ایتمشدر و او اختلافاته ، هر وجهله تابع بولونمشدر . یعنی ، بویله بر مسئله ده اساساً قاج نقطه نظر دن اختلاف ممکن ایسه ، او قدر مذاهب فلسفیه یه ایرلیق ممکندر ؛ زیاده و یا اکسینک دکل ! ... بالطبع بو شعبه فلسفیه ده کیفیت علم ، اک زیاده اهمیتله تقدم ایدر بر مسئله غامضه اولدوغی ایچون و اونک ده اساسی (کیفیت ادراک) مسئله سنی تدقیقه واره جنی ایچون ، (نه بیسته مولوژی) ، صبیق صبیق یه پسیقو- لوزی ایله علاقه داردر . زیرا ، (شعور) ، کیفیت ادراک و حس ، تمامیه و طاقیله علم روحک موضوعات مخصوصه سندن در ؛ و بناء علیه — کمال صلاحیت و اختصاص ایله — بو حادثات وجدانیه نك جمله سندن بحث ایدن آنجق پسیقو لوزیدر . جتی (عالم خارجی نی ادراک *Perception du monde externe*) بحثی پسیقو لوزی ده بر باب مخصوص تشکیل ایدر ، و بو علم بو مسئله نی کندی نقطه نظرندن ، کندی دائره سنده ، و کندی وسائطله تدقیق ایدرکن —

بالضروره! — بوكا دائر بر فكر مخصوص وهيچ اولمازسه! بر فرضيه ويرمكه مجبور بولونور.

ايشته فلسفه نك (نوپسته مولوژي) دعواسنده بو فكر وفرضيه اساسدر، ومتناقض نظريات عائد (Thèse مدعا) لره قيمت ويره بيلمك ايجون حكم اوله رق اقامه اولونور.

فلسفه ده پسيقولوژينك اهميت حاكمه سي بوندن ايلري كليور، واوني علم روح ايله بر طوتانلر، بو اهميته نظرله ياگيلورلر، مبالغه ايديورلر.

(مبحث معرفت)، هر حالده — ينه كندی اعتقادجه! — (مبحث وجود) دن اقدم واهمدر. چونكه (معمای وجود) حقنده ترتيب ايديله بيله جك جوابلر، اول امرده مبحث معرفتده تحقق ايدن احكام ومعلومات مسلمه يه استناد ايده جكدور وانلره تابع بولونه جقدور. بو خصوصده كي مناقشات ومباحثاتده، طرفينه حكم اوله حق علمده — عرض ايتديكم كي — الك اول پسيقولوژي در.

اسكي فيلسوفلر، (نوپسته مولوژي) ناميله بر شعبه فلسفيه بيلمورلردی. اونلرك نظرنده بالخاصه فلسفه، يعنى (اصل فلسفه)، مابعد الطبعياتدن عبارت ایدی. افلاطون، بوكا (ديالهكتيكي = La dialectique) دير ایدی، ارسطو (فلسفه اولی، = La philosophie première = Πρώτη φιλοσοφία) نامی ویرمش ودرس پروغرامنده (طبیعیات) د دائر یازدینی کتابلردن صوکره تعلیم اولونمیه لی لزومنه اشارتاً (τὸ μετὰ τὰ φυσικά) دیه اخطار ایتشدی. بالآخره — هم ظن ایدرم بر ایکی عصر صوکره! — فلسفه اولی تعبیری یزینه (مەتافیزیکا) کله سی قوللانلغه باشلادی و صوکره بو تبعاته علم اوله رق تعمیم ایتدی؛ حتی طبیعت خارجنده، یاخود فوقنده بعض حقیقتلردن بحث ایدن بر علم اسمی اولوق اوزره، اویله غربب بر معنا قازاندی که اصل بو علمی تدوین ایدن ارسطونك خاطرنندن بيله بویله بر تصور کچه مشدی. فقط بو علم منحصرأ مبحث وجود اوزره مناقشات وتفقیدانده بولونوبوردی. نظریه معرفته دائر — حسب الوسیله — تك توك بعض فكرلر بیان ایتكده البته

مجبوریت واردی؛ لکن، بوفکر لر مرتب و مدون اولمادینی ایچون فلسفه ده آیریمجه بر (تئیسسته مولوزی) قسمی یوقدی. بونک سببی معلومدر. یک چوق مدق و مورخ فیلسوف لر بونی تحقیق ایتشلردر.

آمریقانک اکطوغرو دوشون و اوروپاچه او قدر معروف اولمان معاصرین فلاسفه سنندن متوفی (بوردن پا کر باوون Borden Parker Bowne) [*] دور جدید فیلسوفلرینک سیستملرینی بو نقطه نظر دن تاقی ایدرک حققرنده شویله حکم ویریور:

[تاریخ ترقیات فکریه به باقیایر سه کورولور که فلسفه سیستملری هان داتما بو ایکی قسمدن برینه دها زیاده اهمیت ویرمشر. بونلرک کیمپسی دها زیاده (نظریه علم) حیثیتی حائر در؛ کیمپسی ده (نظریه وجود) ی اساس اتخاز ایتشدر. مثلاً: (لوق)، (هیوم) و (فانت) ک سیستملرند (نظریه علم) دها مهم بر موقع اشغال ایدر. یعنی بونلر (épistomologique) سیستملردر. حالبوکه (سپینوزا) و (لایب نیچ) ک سیستملری دها زیاده (ontologique) در؛ یعنی وارلنی بانلیجه مسئله اوله رق تذکر ایدر. بوکا سبب، شو کیفیتر که ذهن بشر، بدایت فعالیتنده خارجه منعطفدر اشیا به باقار، کندینی کورمن، دها صوکره کندینه منعطف اولمغه باشلار. علم وادراک، حقیقتده، هم نفس مدرک، همده ادراک اولونان شیئک مناسبتی ایله آنجق ممکن اولور و تعین ایدمیلیر. علمی ایجاب ایدن اصل بو ایکی عامل اساسیدر. فقط کندی ذاتنه هنوز انعطاف ایدمه مش بولونان ذهنلر ایچون علمده یکانه هدف نظر اشیا و عالم خارجی در.]

[*] بو ذات، بر ایکی سنه اول وفات ایتش ایمش. بنمده کندینندن و اثرلندن قطعاً خیرم یوقدی. اسمنی هیچ بر یرده کورمه مشدم. آمریقان، بوراده قوازه کان ر قالدین بکا بو فیلسوف بیلدردی و اثرلرینی هدیه ایتدی. زیاده سیله بمنون اولدم؛ چونکه بر قرابت فکریه حس ایتدم. بر قاج جلد اثرلری واردر و جدأ مهمدر. یالکیز راسیو-نالیست، حتی قانیتستدر. حالبوکه بن دکلم! باوون آلمانپاده تحصیل ایتش ایمش. ارباب سرافه اثرلرینی توصیه ایدرم. خصوصاً مبحث معرفت و مابعدالطبیعیات حقنده یازدینی کتابلر، امثال آره سننده اک ایسی واک طوغروسی در.

دیپور که يك طوغرودر و هر كسك فكری بودر. فی الحقیقه ذهن بشر هنوز اوان طفولیتده ایكن تمامیه كندینی بیله مز و بیله مدیكی حالده كندینه اعتقاد ایدر. چونكه ماهیت ذاتیه سنك نه بویوك، نه آ كلاشیلماز بر (سر غامض) اولدوغندن ذره قدر خبردار دكلدر. بناءً علیه تنقیدات ویا تشكیكاته و سبيله اوله بیله جك بعض مشکلات ظهوره كلوبده عقلك قارشینه دیکلمه دجكه عقل، كمال ایمان واطمئنان ایله حكم ایدر. اونك ایچوندر که یونان قدیم فیلسوفلری (مبحث معرفت) ایچون فلسفه ساحه سنده بر میدان آچامشاردی، واعتقاد لرینی كمال امنیت و صمیمیت ایله بیان ایتمشلردی؛ ینه او سبيله در که بر زمانه كلنجیه قدر، اسكی فلسفه سیستملری هپ (dogmatique) ایدی. حقیقت اشایی یقیناً بیلمك ادعاسنده بولونان بو مذهبزه — سوفسطائیه نامیه پیدا اولان — بر فرقه مخالفه اعتراض ایتكه باشلاينجه تنقید دخی شدله میدان آلدی؛ او زمان (مبحث وجود) مناقشائی بر درجهیه قدر ترك اولوندی، مبحث علم مسئلهیی اورطویه قونولدی. چونكه: (بز حقیقتی بیلپورز. ایشه هر شئك اصلی آتشدر. فلاندر!) دینلره قارشئی معترضلر: (شیمدی حقیقتی بر افيكيز. بیلمك نه در؟ اونی بیله بیلپورمیسكيز؟ ... بیلپورز دیديكيز زمان نهیه اعتقاد ایدهرك بودعواده بولونوپورسكيز؟ ... حسكره می؟ ... سر ادرا کی آ كلایه بیلدیکیزی؟ ...) دیه يك مهم وحقلي سؤالر صورپورلردی که ماهیتلری اعتباریه (épistémologique) مسئله. لری متضمندر. حقیقتی هر صورتنده اظهاره یكانه مدار و واسطه اولان (روح تنقید)، سوفسطائیهك، فكر انسانیته — شبهه سز — اك بویوك خدمتی در. فلسفه ده مبحث معرفت، ایشه بوفكر تنقیددن طوغمش و طبعی در که ذهن بشر دها درین دوشونمكه و كندینی كورمله قادر اولدقدن صوكره طوغه بیلمشدر.

بوكون فلسفه ده (Criticisme) دهنیلن مسلك، مبحث معرفتی، مابعد الطبیعیاته تقدیماً دوشونمكه تشبث ایتكدن عبارتدر. قانت بو ترتیبی — بیله

بیله — بر اصول اتخاذ ایتیش اولدوغی ایچون مسلیکنه بو نقطه نظر دن
(فلسفه تنقیدیه) واربابنه تنقیدیون ده نیلمشدر . بزم تعلیمزده دخی ترتیب
اساسی بودر .

(باوون) ك بو خصوصده کی افکار ومطالعاتی تام بنم اعتقادمه موافقدرد .
زیاده سیله اهمیت ویردیکم ایچون بر آرز تفصیله مجبور اولدوغم شو برنجی باب
بوراده نهایت ویرمك مجبوریتده اولماسه یدم ؛ بك معروف اولمایان یو فیلسوفك
قیمتلی وطوغرو مطالعاتی بورایه عیناً نقل ایدردم . فقط بو آنه قدر سوبلدکرم
— بعض نقاط خصوصیه دن صرف نظر — زمانك بو بحثده اك محق ملا-
حظاتی جامعدر .

مبحث معرفتده اك بویوك واساسلی اختلاف ، کیفیت علمده ذهنك رولنه
ووضعیتنه تعلق ایدن مسئله مشهوره دن ظهور ایدیور . تحصیل ایتدیكمز بالجمله مدرکات
ومعلوماتده ذهنمز فعال می در ؟ . . . یوقسه ساده (آخذ Recepteur)
وضعیتده می در ؟ . . . یعنی کیفیت علمده ذهنمز کندیلکنندن بر ایش کور-
رو یورده او علمی ، بالذات فعالیتی ایله می حصوله کتیریور ؟ یوقسه علم بزه
طاقیله خارجدن کایورده ذهنمز — جانسز وعاطل بر آینه کی — صور اشیایی
یا لکزجه عکس می ایتدیریور ؟ . . . وعلم بوندن عبارت می اولویور ؟ . . .
ایشته شو صورتله وضع اولونان بو سوأله ویریه جك جوابلره کوره
(فلسفه تدربیه Phil. empirique) و (فلسفه عقلیه Phil. rationaliste) نك
تملی وضع ایدلش اولور .

مبحث وجودده اك مهم واك اساسلی اختلاف ، (اصل وجود) ك عاقل
مدرک و (فعال لمایرید) اولوب اولمامی مسئله سندن منبعث اولور . بوده شو
کائناتی اداره ایدن عاقل ومدبر بر قدرت مطلقه وارمی ؟ . . . یوقسه بوتون
بو حرکات وبو کون وفساد صرف میخانیککی واقضائی می در ؟ . . . سوألرینه
منجر اولورکه بونلره ویریه جك جوابلرک تصدیق وانکاره متایل اولماسنه
کوره بر فلسفه مؤمنانه ویا دینسز اولور ؛ سپریتوالیست ویا ماتریالیست اولور .

ایشته مذاهب اساسیه نك وسیله و صورت ظهورینی تحقیق ایدرکن، اونلرك نظریه علم اعتباریله، روابط منطقیه و علاقه ضروریه لرینی دها ایلریده — لایقيله — کوره جکیز .

پا وولسه نك فلسفه تقسیاتی حقنده کی ملاحظات سلیمه سی ده طبقی معروضاتمه بکیزر؛ یالکز او، منطق ایچون دخی بر وظیفه و موقع کو سترمشدر . شو قدر بر فرق وار

(هاملتن) لده کندنجه بر مهم تقسیمی وار . فقط فلسفه یی پسیقولوژی ایله بر طوتمق ادعاسنه مستند بر تقسیمدر . طوغرو اولمادیفی ایچون نقل و تفصیلندن صرف نظر ایتدم . نته کیم بو مسئله لده پك چوق بویوك فیلسوفلرك قیمتی ملاحظاتی ذکر و شرح ایتك ممکندی ؛ فقط بو تفصیلاتی کمبریچ و اوقسفورد دارالفنونلرنده بیله ویرمیورلر و اشارتله کچیورلر . بناء علیه بو مقدمات سزك ایچون فضلهدربيله!.. یالکز بونلری ایی ملاحظه ایدوب بنمسه مکزی تمی ورجا ایدرم . زیر بونلرله نه قدر استیناس حاصل ایدر سه کز ، بوندن سو کره کله جك درس لری اوقدر ایی آ کلایه بیلیر سکز .

شیمدی ایکنجی بابیه باشلیه بیلیرز!...



ایکنجی باب



برنجی فصل - (مبحث حادثات = Phénoménologie)

۱. — عالم حادثات نه دیمکدر؟.. بز اونی اولا حواسمز واسطه سیله ادراک ایدرز. حواسمز، هم محدود، همده هر برینک ساحه شمول واحاطه سی محدوددر. بو واسطه لرله تاق ایتدیکمز معلومات عنصربه وابتهاییه، اصطلاحده (مدرکات حواس) دیرلر. مبادی معلوماتمز انجق بونلردر. اجسامده استشعار ایتدیکمز کیفیات، (مدرکات حواس) نوعندندر. بونلرکده ماهیتی تحقیق ایدرسه ک آکلارزکه (کیفیات) دیدیکمز شیلر، بزده — بعض سبیلرله — حاصل اولان بر طاقم (احوال روحیه) دن عبارتدر. بوتون مدرکاتمز جنسلینه نظراً، بر قاج بویوک صنفه تقسیم ایده بیلیرز. بو تقسیم عندی وکیفی برشی دکادر. بنیه تشریحیه مزه تابع و حواسمزک تنوعاته موافقدر؛ بوصورتله بالضروره بعض مبادی به پیوسته اولورز. اسکی فیلسوفلرک (مقولات) دیدیکی شیلر ایشته بویله عینی جنسدن اولان ناهصور حادثات وکیفیاتک اسامی عمومیه سیدر. عناصر معلوماتی تلقی ایتکده حسک؛ اولری ترتیب ایلکده (مدرک) نک، بو ترتیباته معنا ویرمکده (عاقله) نک باشلیجه رولاری وارد؛ فقط (حسه le sens)، (مدرک l'entendement)، (عاقله la raison) دیدیکمز قابلیتیر، (مذکة faculté) نامیه آیری آیری ومستقل قوای روحیه دن اولایوب عینی روحک، عینی ذهنک مراتب فعالیتندن عبارتدر.



• بحث حادثات Phénoménologie •

افندیلر !...

§ ۱ . شو ایچنده طوغوب یاشادیغمز ، ونهایت سینه‌سنده ترك حیات ایدوب ینه عناصرینه قاریشسیدیغمز عمان وقوعاته (عالم حادثات Le monde phénoménal) ده نیلمه‌شدر . تعیر ، پك اسکی در . عربجه‌سی : (حادثات 'ولان ، یعنی سوکرده‌دن پیدا اولان شیلر عالمی) دیمکدر . فرنکجه‌سی ، یونانی دن آلمشدر . $\varphi\alpha\iota\nu\acute{o}\mu\epsilon\nu\omicron\nu$ (Phénoménon) (ظاهر و مشهود اولان شی) معناسنی افاده ایدر . آ کلاسیلیورک . بوایکی کلمه متعاده آره‌سنده معنای لغوی اعتباریله بر فرق وارددر . عربله کائنات خارجی‌ده‌کی (تحول دائمی Changement perpétuel) بی باشلی باشنه بر علامت حدوث اوله‌رق تاقی ایتمشلر ، و بو نقطه نظر دن کائناته عمومی بر اسم ویره‌رك (عالم حادثات) دیمشلر . اسکی یونانیلر ، هرشیدن اول خارجه‌ده‌کی وارلغك بزه نسبتله تظاهراتنی نظر دفته آلمشلر و تعیری اوکا کوره وضع ایتمشلر . فقط بو تظاهراتك جمله‌سی‌ده تحولاتدن عبارت بولوندوغنی ایچون ینه هب حساب بر در ، و تعیرلر آره‌سنده‌کی معنا فرقی سطحی و صرف لغوی در . بز بو عالم خارجی ایله تماسده بولوندوغنزی حس ایدر ایتمز ، اك اول استشعار ایتدیکمز حقیقت ، کندی وارلغمز در . کندی بئلكمز در . بالطبع بونکله برابر کندیزدن باشقه شیلرکده موجود اولدوغنی عینی زمانده حس و ادراك ایدرز . چونکه ادراك تحقّق ایده‌بیلیمك ایچون نفس مدرک ایله ، ادراك اولونه‌بیله‌جك بر شئك متقابلاً تماسده بولونمسی لازمکلیر . شعور ، آنجق بو تماسك - بزجه - حس اولونمسی در . بوقابلیت شعور ایله - بالجله موجودات معلومه آره‌سنده - ممتاز اولان نفسمزه (وجدان La conscience) ده‌نیلیر . فیلسوفلر لساننده وجدانه ، بعضاً (انا Le moi, Ego) یعنی (بن ، کندم) تعیرینی قوللانیلر ؛ ادراك ایتدیکمز شیلرک هب‌سینه‌بردن دخی (غیر انا

(Le non-moi, non-ego) یعنی (بدن غیر یسی) دیرلرکه - شعوره نسبتله - وارلنك اك كنیش ، اك مبهم فقط الك اساسی ایکی بویوك صنفه تقسیمی دیمكدر. حیوانات عالیهده بيله شعور البته بو درجه ابتدائیة فوقندهدر . وجدانك، كندی وارلغمه شهادتی، اك بویوك (بداهت Evidence) در. بو شهادت مقنعه وبو بداهت مطمئنه سایه سندهدر كه بن ، هم كندی بنلكمه همده بنله تماسده بولونان موجودات محیطه نك بدن آیری غیری، وجدانمندن خارج بر طاقم شیلر اولدوغنه واقف اولورم واینانیرم . ایشته اونك ایچون اطرافنی صاران موجوداته هپ بردن (عالم خارجی) دخی دهیه بیلیرم كه (وجدان عالمی) اوكا مقابل دوشر؛ وبو ایکی تعیر، فلسفه لساننده اصطلاحات مشهوره دندر .

عالم خارجی ده علی العموم نه کوروپور ، نه حس ایدیورسه هم ، اونلرک هیئت مجموعه سنه (طبیعت la Nature) دخی ده نیلیر . همزمانز اولان انكایز فیلسوفلرندن متوفی (برادله Bradley) طبیعتده، نظر فلسفی یه کوره، بر صفت کاشفه بولویور و اوکا اشارت ایدیورده دییوركه: «طبیعتده بزه الك زیاده چاربان حال وکیفیت، اوعلمك مستقلاً موجود اولماسی در، یعنی كندی وارلنك، بزم حیات انفسیه وباطنیه مزه تابع ومتعلق بولونماه سیدر. طبیعتله تماس ایدن هر فرد متحسس ایچون، او عالم، عینی شی اولهرق قالیرویرنده طورور. بونی هپ بویله تلقی ایدر، بویله کوروورز ؛ بوکا هپ بویله اینانیرز . حتی ، بزم جسممز، بدنمز بالجمله اعضاسیله برابر، او عالم خارجی بی اولدوغی کبی تلقی ایتك و بزدن مستقل وخارج اولهرق موجود بولوندوغی ادراك ایتك ایچون یارادلش بر طاقم آلات و وسائط مخصوصه دیه تلقی اولونور. بناء علیه عالمده وجدان اولماسه، متحسس ومدرك هیچ بر کیسه بولونماسه بيله ینه بر (حقیقت جسمانیه = une réalité corporelle) و بر (موجودیت مادهیه une existence matérielle) نك وار اوله جغنی، واولدوغی یرده صابه صاغلام طورماسی لازمكه جگنی دوشونمك خصوصنده گوجلک چكمه یز. واقعا بونك عكسینی فرض ایتك ممنع برشی دكلدر. [یعنی عالم خارجی نك حقیقت ذاتیه سی

اولمادیغنی و کوردو گز شیلرک خیال قیلندن اوله بیله جکفی ده فرض ایتمک قابل در؛ [و بویله بر فرض، علی العاده بر آدم ایچون-شبهه سز-ممکن در؛ هر نه قدر، عادی بر آدم، - بعضی اسبابدن طولای - بویله برشی فرض ایده بیله جکفی آچیقندن آچیفه سویلمکدن چکینسه ده، ینه دوشونه منر دکلدر. بویله بر احتمالک، باطل و بی معنا اولدوغنه کندنجه امین و مطمئن بولوندوغنی ایچون اونو رد ایدر؛ چونکه بوتصوری (طبع سلیم) دیدیکی شینه آچیقندن آچیفه معارض کورر، آ کلاشیلورکه، طبیعتله تماسمزده وجدانمزه الک زیاده چاربان جهت، اونک موجودیت مستقلسی، یعنی کندی کندنه وارانی در؛ بوده طبع سلیمک بزه - اول امرده - الهام ایتدیکی قناعت قویمه در .

بناءً علیه، بو قناعت هر کسده ایلک لمعه شعور ایله حاصل اولور. فلسفه عوام، بو قناعت عادیه نك افقی آشه ماز . فقط ایلریده مواقع مخصوصه سنده کوره جکیزکه فیلسوفلر، بو اطمینان وجدانی نك نقطه استنادینی، منشأ و ماهیتی تحقیقه مجبور بولونمشلر، واونی بر مهم مسئله شکلنه قویمشلردر . (علمک قیمتی *la valeur de la science*) مسئله سی، (شک و یقین *le doute et la certitude*) مسئله سنه طایانیر؛ اوده موجودات مستقلسیه قناعتمزک منشأ و ماهیتی حقنده حاصل ایده بیله جکمز اعتقاده - قطعاً ! - تابعدر .

بزبو مسئله نك مناقشه سی شیمدیلک باب مخصوصه بر اقله وینه طبیعتنه رجوع ایده لم. اوت بزه، طبیعت دیدیکمز شو پایانسز عیان وقوعات ایچنده یوزرکیدرکن البته بر چوق شیلره تماس ایدرک اونلرک وجودندن بر چوق وجهله خبردار اولویورز. اولاه، بزمله برابر، عینی زمانده نامعدود شیلرکده وار اولدوغنی ادراک ایلویورز و کال اطمینان ایله وهله اولاده تسلیم ایدیورزکه، بز اولماسق دخی اونلر خارجه ده ینه موجود اولوب قاله جقلردی . بو قناعت بزده ادراک ایله برابر حاصل اولویوررکه سالم انسانلرک جمله سنده بالطبع حصول ووقو- عندن طولای اوکا (طبع سایم *bon sens*) دیمشلردر . بزه بو حس امنیتی الهام ایدن - نیم کندی اعتقادجه ! - حواس دکلدر . فقط حواس اونک

زمین استنادی ویریر [*]. زیرا بز طبیعتدن - ابتدای امرده - هر نه تلقی ایدرسهك انجق حواسمز واسطه سیله ایده بیلیرز.

معلومدرکه بز، انسان اوله رق، بللی باشلی (بش حاسه cinq sens) مز واردر. بونلر ادراك وشعور ایچون ایلك واسطه مز اولدوغندن طولایی عرب حکماسی اولنره (مشاعر خمس) دخی دیمشلی. (مشعر)، آلت شعوردیمکدر. بو آلات شعوردن بری (باصره la vue) در؛ بونکله انجق (مبصرات les choses visibles) ی کوره بیلیرز. یعنی رنگلری، شکللری، ضیایی وکولکهای

ادراك ایده بیلیرز. بری ده (سامعه l'ouïe) در؛ بونکله ده انجق (مسموعات les phénomènes acoustiques) ی، یعنی صدایه تلقی ایدن، سس وکوروای

جنسندن اولان بالجله حادثاتی طویه بیلیرز. بردیکری ده (ذائقه le goût) در؛ بونک واسطه سیله بوتون طعوم نوعندن اولان کیفیاتدن خبردار اولورز. صوکره

(شامه le sens olfactif, l'odorat) واردرکه اونکله ده تکمیل قوقولری حس ایده رز. دها صوکره (لامسه le tact) واردر؛ دها طوغروسی بو حاسه،

دیگرلرک جمله سندن اول ذکر ایدلیدر؛ چونکه (تکامل عضویت l'évolution de l'organisme) ده هر حسدن اقدم وبلکه ده اهم در. بونکله مقاومت، سرتلك،

یوموشاقلق، رطوبت، یبوست، ملاست، خشونت کبی احواله واقف اولورز. صیجاقلق، صوغوقلق، دخی طویارز. مع مافیه بعض فیلسوفلر بو حاسه لامسه نك

بسیط اولمایوب قاریشیق اولدوغنی ادعا ایتشلر؛ و مثلاً صیجاقلق ایله ملاست ویا خشونت ویا مقاصوت کبی احتساساتک عینی جنسندن اولمادیغنی فرق ایدوب

سویلشلردی. بو کون (فیزیولوژی) علمنده اجرا اولونان تحقیقات مخصوصه اوفیلسوفلره حق ویریور؛ کوستریورکه وجودیمزک دریسندن یعنی بوتون

سطحنده موجود اولان نامعدود (حلیات papilles) لامسه ایله، بالخاصه حرارتی حس ایدن حلیات، یان یانه وقارمه قاریشیق بر صورتده موضوع ومنشربولو.

نویور؛ شویله که، اگر (حلیات حروریه)، آیری آیری وباشلی باشنه بر یرده

[*] بو حس امنیتک زهدن کلدیکنی ایلریده موقع مخصوصنده - بللی باشلی بر مسئله اوله رق - منافشه ایده چکم

بولونسه‌یدی؛ بر عضو مخصوص اوزره موضوع اولسه‌یدی، آلتینجی بر حاسه مستقله تشکیل ایتمش اوله جقدی. او تقدیرده، مستقلاً بر آلتینجی حاسه‌یده مالک اولمش بولونه جقدق! اوندن ماعداینه بعض تدقیقات پسقو لوزیه اثبات ایدیورکه بر شینک ملاست ویا خشوتی، یعنی سطحنک دوز ویا قایپاق ویا خود پورتو کلو اولماسی ایله او شینک مقاومتی، یعنی بزم تضییقه مزه قارشی قویماسی، ماهیتاً باشقه باشقه طویغولردر. بو حسلرک برنجیسی لامسه ویره‌یایر. ویرنده بالخاصه اودر. و بونده ارادات ذاتیه مزک دخلی یوقدر یالکیز تماس کافیدر. فقط مقاومت حسنی، صرف تماس ایله تلقی ایده‌مه‌یز. اونی یالکیز لامسه ویره‌مز! بر شینک مقاومتی آکلامق ایچون بزم او شیئی ایتوب قاقیه ویا تضییق ایتمهک تشبث ایتمهک کمز لازمکیر، یعنی اراداتمزی اجرا معاوتی ایله واقع اولان بو طویغویه، بوکون (حاسه عضلیه *Sens musculaire*) دیورلر، وبالخاصه لامسه‌دن بر آز آری طوتوبورلر. حتی (حاسه مفصلیه *Sens articulaire*) ی بیله بونلردن آیریورلرکه بونک بر موقع مخصوصی یوقدر. وجود مزک بوتون جمله عضلیه و مفصلیه‌یی بو حسلک مرکزی صاییه‌ییلیر.

(حاسه عضلیه و مفصلیه) نك کیفیت شعورده نه‌بویوك بر رول اوینادیغی ایلریده کوره‌جکیز و آکلایه‌جغزکه مکان، ابعاد نائه، جهت، و حرکت کی کیفیاتک ادراک اولنسنده بو حاسه‌نک نه درجه‌لرده خدمتی واردر؟! و بوتون بو طویغولرمزده ارادات ذاتیه مزک نه قدر و نصل دخلی و تأثیری اولویور! شیمدیلک یالکیز شو مهمه‌یی نظر دفته عرض‌ایدیمکه، الک اسکی تقسیمه ظاهرأ رعایت ایدیلوب حالا بش حاسه‌مز اولدینی ذکر اولونویور؛ فقط لامسه‌نک قاریشیق بر طویغو اولدوغی دخی عینی زمانده صراحتاً ادعا ایدیلیور. تشریح و فیزیولوژی علملرینک ترقیات و کشفیات ایلریده بو مسئله غامضه‌یی ده‌ها زیاده تنویر و بلکه‌ده بسبتون حل ایده‌جک و جلد مزک سطحنده - غیر منتظم بر صورتده! - منتشر اولان و بزه ایکی مختلف صنف اوزره طویغولر

احساس ایدن بو حلیات آردسند - احتمالکه تشریحی - بر فرق تعیین ایده جکدر .

شیمدیلک هنوز بویه بر فرق ایله متمماز اولدقلریخی بیلمیورز ؛ یالکز اونلرک مدرکات مخصوصه سنده مهم بر فرق حس ایدیورز . ملاست و خوشونت ایله حرارت و رطوبت کی طویغولری اصلا بر طوته میورز .

ز ، انسانلر ، ایشه بو وسائط طبیعییه سایه سنده عالم خارجی ایله صمیماً تماسده بونقده یز - اول امرده ؛ - اولات ادراک ایله تاقی معلومات ایدیورز . بوراده (معلومات Connaissance) سوزینه یاکاش ودها طوغروسی فضله معنا و یروبد ، کتابلردن و غرتلردن آلدیغمز معلومات قیاندن بر شیر مراد ایدیورم ، ظن ایتمه ملی سکز ! بوبخنده معلوماتک معنای اصطلاحیدی (طویغولر) دیمکدرکه وهله اولاده حواس واسطه سیله ادراک ایدرم . ایستر عالم خارجیدن کسین ، ایستره کندی ایچمدن کسین ! . . . ایشه شو حیثیتله تاقی ایدیلن (طویغولر) ، اک بسیط و (غیر قابل ارجاع Irréductible) اولان (معلومات ابتدائیة Connaissances primitives) مزدر . بالجه معلوماتک (مبادی Principes) سی ، اس الاساسی بونلدر . انسانلرک بوتون بیلکیسی ، اول بو مبادی دن ؛ وصوکره اونلر اوزرینه قوردوغی بنای محاکات و ملاحظاندن متشکلدر . اونک ایچون بونلره اصطلاح فلسفه ده (معطایات حواس Les données des sens) ویاخود (مدرکات حواس Les perceptions des sens) دیرلرکه حواسک وجدانمزه ویردیکی ، عرض ایتدیکی معلومات ویاخود ، عالم خارجیدن آلدینی ، الده ایتدیکی خبرلر دیمکدر . شبه یوقدرکه معلوماتک بو درلوسی ایدینک ایچون ، خواجه ویا کتاب ایسته مز ! یک عقلی وواقومش اولمقده لازمکمز ! سقط اولماق ، بهوش قالمق شرطیله اک جاهل ، اک احمق آدملر بیله حواسی استعمال ایدرک کندی وارلغی حس ایدر و عالم خارجی نی کورور ، طویار ؛ و بناء علیه کندی نفسندن مستقلاً موجود بر چوق شیر بولوندوغی ده تیقن ایدر .

کورولویورکه هم کندی بیلکمزدن ، همده عالم خارجی نک وجود وکیفیه

شدن خبردار اوله بيلمك ايچون ايلك واسطه من حواسدر ، بو واسطه لرله ده تلقى ايده بيلديكمز ايلك بيلمكي ، بو (معلومات عنصرية Connaissances élémentaires) در . فقط در حال بوندن آ كلاشيلور كه بوتون آلدنمز معلومات ، آله بيلديكمز قدردر . يعنى عالم خارجيه وحتى عالم وجدانده نه وارسه ، ونه اولويورسه ، ونه اولمق ممكن ايسه او حادثاتك جمله سندن خبردار اوله ميورز . چونكه آلات ادراكز هم معدود ، همده ساحه شمول واحاطه لري اعتباريله محدوددر . (اضافيت علم بشر Relativité de la connais. humaine) مبحث مهمنده سزله بو دعوایي شبهه كوتورمن بر صورتده اثبات ايده جكم .

شيمدى شو وسائطله وشو صورتله ايدينه بيلديكمز معلومات بسيطه وابتنائيه فلسفه جه نه معنا ويره بيله جكمزى تحقيق ايده لم : كورد جكمز كه عالم خارجيى تشكيل ايدن اجسامده استشعار ايتديكمز كيفيات ، (مدركات حواس) دن باشقه بر شى دكلدر . ديمك كه بزم ايچون (كيفيات اجسام) ايله (مدركات حواس) ماهيتاً عيني شيدر . باشقه باشقه نقطه نظرله كوره عيني شينه ويرلمش ايكي اسمدر . بونده بوكون هيچ بر فيلسوفك شبهه سى قلامشدر . صوكره تحقيق نامزده بر قدمه دها ايلري واريرده (كيفيات) ديديكمز مدركات حسيه نك ماهيتى ايجه آ كلامق ايسترسه ك كورورزكه ، اونلر ، بزم وجدانمزه مهرانكي بر وجهله تأثير ايدن بعض (عوامل Agents) ك ، روحزده حاصل ايتديكي (انفعالات) دن عبارتدر . ايستر بو عوامل قواى خارجيه دن اولسون ، ايسترسه بالذات كندى قواى روحيه مزدن اولسون ، ويرديكم تعريف ايكي سنى ده شاملدر . شو تقديره كوره مدركات حواسك عالم خارجيه اضافتله اسمى كيفيات اولدوغى كهي ، كندى وجدانمزه كي اشكالنه اضافتله بر اسمى ده (احساسات Sensations) اولمق كركددر . احساساتى ده تدقيق ايدرسه ك آ كلاشيلير كه اونلر ، زده بر طاقم حالات روحيه دن باشقه بر شيلر دكلدر .

كيفيات ومدركاتى بو طرز ايله وبو سياق نظره توفيقاً تاقى وقبول ايتك يك مهم بر دعوادر كه اونى ، بوراده يالكيز ذكر واشارت ايله كچورم . ايلريده ، [معلومات بشريه نك (آفاقي Objectif) وياخود (انفسى Subjectif)

اولوب اولمادیغنی [مناقشه ایدرکن، بو طرز تلقی نك اولانجه اهمیتی کندیلکنندن ظاهر اوله جقدر.] حقیقت اشیایه مطالع اولوب اوله میه جغمزه دائر [میدان مناقشه ده حالا بر هیكل هر لئلك کبی طوران مسئله قديمه نك، بو دعوايه صیقي صیقي و طوغرودن طوغروه نسبت و تعاقی بولوندوغی ایچون دخی (مدرکاتك حالات روحیه دن عبارت اولوب اولماسی) مسئله یی فلسفه ده بر قات دها اهمیت قازانمش اولوبور؛ و آنجق او حیثیته درکه حقنده بر چوق نظریه لر ترتیب اولونمشدر.

شیمدی ده مدرکات حسیه مزنی فصل ترتیب و اداره ایده بیلیمش اولدوغمزی آکلایه بیلیمك ایچون، قیصه بر ملاحظه یه میدان آچالم:

بن بوتون طویغولرمی بر قاج صنفه آیره بیلیرم. هر صنفه عمومی بر اسم ویردرك عینی جنسندن اولان بالخله حادثاتی او اسم جامعك دائره شمولنه درج ایده بیلیرم و پیسنی بردن او اسمله یاد ایلیه بیلیرم. بو، یالکیز بکا مخصوص بر قابلیت دکلدرد؛ بر قابلیت انسانیه در. حتی بویله [مدرکاتمی تصنیف ایده بیلیرم!] دیمك بیله اوقدر طوغرو بر ادعا دکلدرد. [تصنیفه مجبورم!]؛ چونکه (عضویتك بنیه تشکلی Constitution organique) اقتضاسندن اوله رق باشقه دورلو یاپه مام. حواسمك (متفرق Différencié)، متعدد و متنوع اولماسی سببیه، تاقی ایده بیلدیکم مدرکات بکا ذاتاً (طاقم طاقم Par groupès) کلپور. بن ده اوندن طولایی شو طویغولرم آردسند (نسبت مشابهت Rapport de ressemblance) و (نسبت مغایرت Rapport de dissemblance) حس ایدیورم و او صورته مدرکاتمی صنفلر، جنسلر، نوعلر اوزره تقسیم و تصنیف ایتمکه مجبور بولونویورم. بر آز اول (مبصرات)، (مسموعات)، (قوقولر) والی آخره! . دیه بر تصنیف ضروری و طبیعی عرض ایتمشدم که حوادتمزك جنسنه و عددینه تابع اولدوغی آشکار ایدی.

دها زیاده دقتله کاشته انفاذ نظر ایده لم، باقلم، فصل اولوبورد (ماهیات کلیه و عمومیه Notions générales) یه و بعض ارکنه ذخم پیوسته اولوب قالیور؟! ...

بني احاطه ايدن شو کائنات ماديه، کورويورم که اولاً بر مکانه در، يعني بوتون موجوداتک يکديکرينه قارشى بر موقى، بر موصى واردر و مر شى بهمه حال کندينه خاص بر ير اشغال ايدر که بوکا (حيز) ديرلر. ينه کورويورم که موجوداتک بک چوغنى قيميلدانيور. حتى ساکن و طورغون ظن ايتسدیکم شيلر بيله بر قوت تأثيرينه معروض اولونجه قيميلدانه بيليور و يا خود بالاراده قيميلداتيله بيليور. شوراخى ده فرق و تميز ايدم بيليورم که حرکت ايدن بوشيلرك بعضيسى طبق بنم کي قيميلدانيور، يعني محضا کندی ارادتى ايله حرکت ايدنيور. ديمک که اونلر ذوى الحياتدر. بونی کنديمه قياساً استدلال ايدنيورم. حس ايتسدیکم موجودات آراسنده بر قسم کليسى ده وار که آنجق خارجى بعض (عوامل طبيعىه Agents naturels) نك سوق و تأثيريله حرکت کله بيليور. يوقسه طور دوغنى يرده مدت مديده طوروب قاليور. يعني بوزر جانسز، ارادتسز شيلردر. اونلره هپ بردن جمادات ديورم! [طاش، طوبراق کي!...] صوکره کورويورم که کيجه، کوندوز اولويور، ياز، قيش اولويور و بو وقوعات، مناوبه، حتى اولدوچقه منتظم بر صورتده ظهورده کليور، يکديکرينى بلا فاصله ولى و تعقيب ايدنيور؛ هم بو جريان مطرد، بزم شوکندی دنيا سزه مخصوص بر کيفيت اولماق لازم کليور. چونکه خسوف و کسوفى - هيئت اربابى - وقوعندن اول، دقيقه سى دقيقه سنه قطعياً اخبار ايدم بيليور. حتى تصادفى اوله رق وقوعه کلدیکنه اينانديغمز روز کارلرك، فيرطنه لرك بيله - بعض اسباب طبيعىه دن ناشى - بر منتظم جريانه تابع اولدوغنى (علم احوال جو Météorologio) ادعا و اثبات ايدنيور.

بوتون بو احوالى و بو شيلرى مشاهده ايتمکله آکليورم که بو حاداناتک جمله سى ده آن واحده اولوب بيتيورم بور!... زنجيره له مه کيدنيور!... يعني بر مکان ظرفنده وقوعه کلدیکی کي بر زمان جريانه ده اتباع ايدم لرك، بلا

[ه] برنجى بابک مقدمه ماده نلفه تعريفاتى متعاقب (تصديف) دن براز بحث ايتش و بو قابليتک بزجه طبيعى اولدوغنى سويلامشدم. اوسوزلى خاطر لاييکيز؛ چونکه بوراده يادنيغمز ينه تصديفدن باشقه بر شى دکلدور.

انقطاع طائغالانوب آقپور، و بو آقیشنه نهایت کورونمپور. فضله اوله رق بو جریان وقوعانده (محقق !) بر اطراد وانتظامده وار. بن (زمان) كه نه ديمك اولدوغنی بوندن آكليورم. فقط بو حقیقی، كندی حیاتمك كچوب كیتمه سیله، بلکه هر شیدن ای آكليورم. مثلاً، چو جوقلغمی یاد ایدیورم: مسقط رأسم اولان (جسر مصطفی پانا) قصبه سنك بویوك سوقاقلرینی، مریج نهری اوزرنده کی اوزون طاش کوپرویی، اوطوردوغمز حکومت قوناغنی، خیال - میال خاطر لیورم. صوكره اورادن استانبوله نصل کلدیکمزی، پك ایب دوشونه میورم، فقط اسکدارده اوطوردوغمزی، كچن روس محاربہ سی هنکامه هیجانی، صوكره مکتبه دوام ایتدیكم سنه لری وکلیبولی به کیدیشمزی خاطر لیورم. بوتون بوسنین حیاتی طولدوران وقوعاتك اكه مهملری ده یادمده در. ایسته دیکم زمان، دوشونمكه قویولورسم عادتا بر (سینه ما) کچی هپسی کوزمك اوکندن کچور. صوكره کندیمی یوقلیورم، باقیورم: بنلکمی محافظه ایتمکه برابر، خیلی دن خیلی تبدلاته اوضرا دیغمی ویاواش یاواش اختیار لادیغمی حس ایدیورم. باشقه آدم لرده ذاتا بو حالی بالفعل تحقیق ایتش وکورمشمدم. پدر ووالدهم ودها بیلدیكم بر جوق کیمسه لر بو تبدلاته اوضرا دی؛ بر قسمی ده وفات ایتدی. اسکی مکتب آرقداش لرمك چهره سندنده بو حالی مشاهده ایدیورم. هپ بونلر، بكا (وقتك كچدیکنی !) اثبات ایدیور. حتی عالم خارجیدن قطع نظر ایدوبده، - شویله کندی کندیمه ! - بر آن حیاتی دو شونسم وباشلیجه صفحاتی ذهنده احضار و دعوت ایتك صورتیله بر نانیه قدر دوشونسم ! ! ! . ینه نظرگاه خیالده بو (طومار وقوعات) ك آچیلوب برانور اما عرض ایتمه سی بكا (مدت Durée) حقنده بیله ینه صریح بر فکر ویره بیلور. بو مدت نه قدر قیصه، نه قدر آز اولورسه اولسون، حکمی یوقدر، چونکه وقوعات حیاتم متسلسل کیدیور، بر برینه (تداخل) ایتور !

بكا (مدت حسی Le sentiment de la durée) نی ویرن ندر؟ . . . البته بنده کی خواطر ك بر وسیله حاضره ایله اویانوب انكشاف ایتمه سوردرکه بوده (وقیله عالم خارجی ده واقع اولمش، گلش كچمش)، بر سوری حادثاتك

صورت تسلسل و تماقبنی - بو کون شوآنده - تکرار آکثیریور. لکن او (وقوعات سابقه ! ؟) بو کون، عجیباً واقع اولمادیفی ایچون، اونلره (واردرد!) ده بوب وجود ویره مه یز! ... اونلر، بو کون، یوقدر! ... او حالدی وجودی اولمایان بر شیر، - نصل اولویورده! ؟ - ذهنمزی طالع الاندیریور و (تاریخ!) دیدیکمز حیات ماضیه یی تشکیل و تمثیل ایدیور؟ ...

بو اینجه مسئله یی شو شکله افراغ ایدوبده قارشیمزه وضع ایدرسه ک حل ایدمه یز، چونکه بدایت ملاحظه ده عظیم وفاحش بر خطایی نقطه حرکت اتخاذ ایتیش اولورز. فی الحقیقه، بزم ذهنمزی چالقالایوب طالع الاندیران - هر کسک ظن ایتدیکی کبی! - (ماضی) دکدر! ... البته (حالی) (Actuel) بر وقعه در، بلکه اهمیتسز بر حادثه در که ذهنمزه زنبه ره کفی قیلمداتمقله او او خارق العاده ماکنه یی حرکت کتیریور. فرضا بر ماکینست کوچوچوک بر موصولی چویریور مکه - فرق بیک بار کبر قوتسده بر مدش ما کنه یی حرکت کتیریور یور، صکره - لزوم کوردوکی زمان! - ینه ایکی پارماغیله او موصولی ترسنه چویره رک بو عظیم قوتی - دیولرک ضبط ایده به جکی بو ماکنه یی - طور دوروب ضبط ایدیوریور. شیمدی! ... ده بیلیر، یسکیز که مدش بر زرهلی یی، یکریمی بش میل سرعتله یوروتن او ماکنه یی، او کوچوک موصلق حرکت کتیریور؟ ... ویا خود ماکینست، ایکی پارماغی قیلمداتمقله بو خارق العاده قوتی ابراز ایدیور؟ ... ظن ایتیم که بویله بر ادعاده بولونه بیله سکیز! ... این بیلیر سکیز که او موصول و او ماکینست، آنجق (وسیله!) در. ینه بک اعلا دوشونه بیلیر سکیز که او ماکنه ک افسامی و تفرعائی یعنی (Rouage) لری آره سنده رابطه اولماسه، ماکنه طاقیله حرکت کله مزدی.

بو تشبیه، بک قبادر اما، ذهنمزه اساساً بوکا بکسر: جداً خارق العاده، و - شیمدیک - عجیباً اسرارانکیز بر ماکنه در. اک اوفاقی بر (حادثه) حالیه (Phénomène actuel) اونی حرکت کتیرمکه کفایت ایدر. بو آنجق بر وسیله در. یوقسه قوه محرکه کسی کندنده مندر. بن - مثلاً - بر یاز صباحی دکز کنارنده کز رکن ساحلدن بر تحف قارپوز قابوخی حس ایدرم؛ در حال

چو چوقلغمده جولانكاهم اولان (حمزه بك ساحلی) خاطریه كایر. چونكه بن او غریب دكز رایحه سنی ابتدا اوراده - تعریفی مشکل بر حس حیرت و نمونیتله - طویمشدم. متشابه طویغولردن، حالی اولانی، كچمش اولانی تکرار اویندیریر. فقط اوراده قالماز، او ایلک اوکجه اویانان خاطره نك دلاتیله بر چوق شیلری دها تخطر ایدر، و بویله جه کرییه کیده بیلدیکم قدر کپدرم. چونكه بو خاطره لر مسلسل، متصل در. آره لرنده - آز چوق قوی - رابطه لر وارد در. بن هنوز بر كونلك بېك ایکن دخی بر چوق عوامل خارجیه نك تأثیرات مختلفه سنه معروض ایدم. اکر اوزمانلر شعورم اولسه دوده حسیاتی - بیله بیله - ضبط و قید ایده بیاسه ایدم، خاطراتم، طوغدوغم آنه قدر تمادی ایده بیلیردی. [*] شبهه یوق که بنم ذهنم و ذهنمك جلوه کاهی اولان دماغم ایشته او عواملک محصله تأثیراتی ایله شکل عضوینی اکتساب ایتشددر. عوامل مذکوره بنم دماغی عادتاً یوغورمش و ذهنمه بر عضویت مخصوصه افاضه ایله مشدر. حتی (عوامل حیاتیة Agents biologique) نك اك مهم و اك مؤثری اولان (وراثت Hérité) کیفیتنی فلسفه تکامل نقطه نظرندن ملاحظه ایدرسهك: (دماغیزی او عوامل وجوده کتیرمشدر!) دیمکه قدر واره بیایرز. بوتون بو تأثیرات نسج، دماغی آرئدیرمش و بر ترتیب مخصوص اوزره (قتلامش!) در. بر شی فصل قاتلامش ایسه، ینه او ترتیب اوزره آچیلوب انكشاف ایدر. ایشته (احیای خواطر) دیدیکمز شی بو انكشافدر. (فاتلامق) کله سنه بدل (حافظه) تعبیر علمینی قوللانیرسحق، آ کلاشایرکه شو آنده حاصل ایتدیکمز بر (تأثر Affection)، (ذهن) دیدیکمز ما کنه بی تحریکه وسیله اولویور، حافظه من قات قات آچیلور و بر خاطره بر دیکریخی دعوت ایدیورکه (تداعی Association) دیدیکمز کیفیت بودر. اولجه تأثیراته معروض بولوندوغمز عوامل متسلسله و حادثات متعاقبه - بو سفر - ترسینه

[*] معافیله ار تأثیراندن، بن، خبردار اولماشم دیه، اونلرک - هنوز شکل ایتکده بولونان - وجدانده اجرای نقرز ایتش اولماسنی انگار ایدم. وکون وجدانك مادون الشمورا subliminal و Inconscient) قسمتی تشکیل ایدن، او خبردار اوله مادینم تأثیراتدر.

جریان حاصل ایدوب کیدیور . بو انکشافاتی آدیم آدیم تعقیب ایدن (شعور من Notre conscience) ، - طور دووغی یرده ! - قطع مسانه ایتیش کی اولویور . حالبوکه حرکات انفسیه وحالات روحیه نك وقوعی مکانه محتاج دکدر . یعنی فیلسوفلرک لسانیه بوکیفیتی بیان ایتک ایسترسهک : (حادثات روحیه اتساعی دکدر . Les phénomènes psychiques ne sont pas extensives) یرز . چونکه برآنده ذهنم بورادن لوندیره کیده بیلور . دها طوغروسو ذهنم اورایه کتیمور . لوندیره نك خاطره سی ذهنمده درحال اویانه بیلور . فقط ، حقیقت حال نه اولورسه اولسون ، مادامکه ذهنم - احیای خواطر ایدوب حافظه دیدیکمز کتاب عمرک یار اقلرینی چویریرکن - کریه طوغرو بر حرکت اجرا ایدیورمش کی بر حالت حس ایدیور ، بو حسی ، (مدت باطنیه Durée interne) کی تلقی ایلورز . ، بو هنوز بر (حس Sentiment) در . ذهن ، بونی (بالتجريد تشخیص - Personnifier par l'abs-traction) ایدوبده بر (فکرت مجرده Idée abstraite) شکلنه قویارسه ، اووقت (زمان Le temps) ک آنجیق نه دیمک اولدوغنی (؟؟) تعقل ایتیش اولورز . حالبوکه نه اولدوغنی (؟؟) - عقمزه دکل - جسمزه صورارسق بر (مدت باطنیه Durée interne) طویغوسندن عبارت قالیر . دها ایلری کیده من . او طویغونک ماهیتی ده تحقیق ایدرسهک حافظه مرک فسونندن باشقه بر شی اولمادیغنی ا کلارز . فقط بو کیفیتی دخی صرف بسیقولوزی نقطه نظرندن تاقی ایده جک اولورسق کندی حالات روحیه مزده واقع اولان بر طاقم تبدلاته منجر اولوب قالیر . فلسفه اصطلاحنده وفرنک لساننده (Changements d'états de conscience) دیدکلری کیمیت ، ایشه بودرکه اونک متسلسل بر صورتده وقوعنه شعور حاصل ایدرسهک (مدت) حسنی طویارز . [*]

[*] (Bergson رغون) ک فلسفه بنده اساس بومدت باطنیه فکریرد .

بو طویغوده حافظه نك ؛ حافظه ده (تداعي Association) نك نه مهم بر رول اوینادیفی - کرکی کبی ؛ - تحقیق ایدیور .

کور و یورسکیز که بو کونکی احتساستمک دلائلیه (حافظه la mémoire) می یوقلایه جق اولور سه می یکدیگرینه مر بوط بر چوق (خاطره souvenirs) لر ، چوراب سو کوکی کبی چوزوله رک ذهنی (ماضی le passé) به کوتور و یور . کرک کندی حیاتی تشکیل ایدن خاطراتده کرکسه عالم خارجی ده تحقیق ایتدیکم وقوعاتده (ایلری - کری ؛) حاصل اولان بوجریان ، بکا ، (زمان le temps) حقدده اولد قجه صریح بر فکر مخصوص ویریور ؛ ویدیورم که : شو عالم حادثاتده زمان دخی ، يك مهم رکن وقوعاتدر . اونسز برشی اولیور ؛ برشی قیملدایمور ؛ برشی یاشامیور ؛ برشی تعریف اولونه میور . (مکان l'espace) دخی ، طبقی بونک کبی بر حیثیت مهمینی حائر کورونویور . [*] دوشونیورم ، و آکلایوب تسایم ایدیورم که مکان دیدیکم شو پاپانسز میدان اولماسه پدی ، کوردو کم وقوعاتک هیچ بری ممکن اوله مازدی ؛ حتی واراق اوله مازدی ؛ چونکه اک کوچوک بر ماده ، اک بلیرسز برواراق بیله کندیسه کوره بر یرایستر . همده - شوپهاو وورک ودها بر چوق فیلسوفلرک دیدیکی کبی - او ماده نك قیملدایه بیلمه سی ایچون ، اشغال ایتدیکی یرک - بهمه حال ! - کندی حجم وجسمندن بویوک و گه نیش اولماسی لازم کلیر . یوقسه ، قابل دکل ! . . . حرکت ، تصور و تعقل اولونه ماز . بزم ایچون بو بر ضرورت نذهنیه در .

[۹] علی المرم اسلام و عرب حکامی ، زمان و مکان ، حرکت و سکون کبی مسائل اصلییه خیلی دن خیلی اهمیت و بر مشلر و بونلر حقدده اوزون اوزادی به منقشه لر آچشلردر که بمجادر . شرح مراقفک اوچونجی موقعی (اعراض) دن و بالجله اعراضه متعاقب مسائل مختلفه دن بحث ایدر . زمان ، مکان ، حرکت ، سکون عدد ، مقدار والی اخره . . . هب بوموقفده تذکر اولونشدر ، چونکه اعراضدن معدود اولق اوزره تلقی ایدلمشدر . زمان و مکاندن صرف نظر ، حرکت و سکون کبی کیفیاتده در عیرلرجه (آفاق objectif) برشی ایش کبی قبول اولونماسی زمانز فلسفه - منجه (ضروری بر خطای مشهور) کبی تلقی ایدلمشدر . در عیرلر بونلرک آنجی بر قومه (کون) تعبیری نی تخصیص ایدرلردی . اکوان (حرکت ، سکون ، اجتماع و افتراق) دن عبارت ایدی . اهل - لذت یا اکثر مکانه (کون) دیش و اونزده حیزله بر طوته ورق (تحیز) مقامنده (کائیت) کله نی ایجاد ایتشدی .

(ماده La matière) دخی بویه! ... زیرا که و یورم که مکانده (مکین) بر شی وار! ... وایشته اوشی حرکت ایدیور؛ یر ده کیشدیریور؛ بو قیمیلدایشی ایله ده بکا زمان وتسلسل حوادث حقنده بر فکر ویریور. ماده بی دوشونمه سه م حرکتی ده تعقل ایده میورم. بناء علیه، - کمال امنیتله: [ماده اولماسه یدی، باشلی باشنه حرکت اوله مازدی؛ ماده دن مستغنی ومستقل حرکت ممتنع التصوردر! ...] دیورم. بو محاکمه مله آکلیور واذعان ایدیورم که وقوعات عالمده ماده بی ده - بر رکن اصلی اولمق اوزره! - دوشونمه که مجبورییت الویریور. حتی دوشونمه که بیله حاجت یوق! ... زیرا کورویورم، طوتویورم هر کون آغرمده چیکنه یوب یو طویورم، اونکله بیله نوب یاشیورم. هر نر به وار سه م الیمه آیاغمه طولاشیور. وارانلی بدییدر. هیچ شبهه کونورمن. اونک موجودیتسدن شبهه ایده بیله سه م بیله، - یعنی بوتون موجوداندن - کندی جسممدن فصل شبهه ایده بیلیرم؟ کندی وجودی هر شیدن اول حس وادراک ایتدیکم ایچون بو بداعت قویه ومطمئنیه قارشى - طوغروسی! - فضای نامتناهی بی بوم بوش تصور ایتک ایسته میورم. بویه بر دوشونجه بی دکل، فقط شرط تحققی محال بولویورم. لکن حرکت وحادثاتی ده برابر تفکر ایدر سه م بالذات اویله بردوشونجه بیله ذهنده قابلیت کورده میورم. یوده پک طبیعی در: زیرا، مطلقا برشی اولمق کرک که اوکا بر قوت تعلق ایتسین؛ ویاخود، قوت اوشیدک کندی ذاتندن صدور وتجلی ایتسین ده، بر حرکت ممکن اوله بیلسین!.. باشقه درلو دوشونمه یز!.. حاصلی، قیمیلدارسه؛ برشی قیمیلدار؛ اوشی، اول امرده وار اولمالی درکه قیمیلدانه بیلسین!... (یوقاق ده حرکت) تصویری محالدر. اکلاشیایورکه، حواسمه بالفعل ادراک ایتمکده اولدوغم حرکتی تصور وتعقل ایده بیلمک ایچون بیله، بهمه حال بر ماده لازم ایش!.. ضروری درکه بر ماده اولمالی!.. سوکره مکان اولمالی!.. چونکه قیمیلدانه جق (بر) ده ایستر!.. سوکره قوت لازم. زیرا: (ایستر خارجدن کلسین؛ ایستر بر جسمک کندن صادر اولسون!) قیمیلدانه بیلمک ایچون استطاعت ایستر!.. اینته بو شرطلر اولونجه حرکت ممکن اولور، ومتحرک اولان شی یر ده کیشدیردکجه (زمان)

حس و ادراك اولونور. دها دوغروسى (توالى حادثات-continuité des phénomènes) ادراك اولونور. (زمان) انجق بومدرکاته بناءً محاکمه ایدیله رک - صوکره - بالتجريد دوشونوله بیلیر!..

شو (تحلیلی analytique). ملاحظاتمزله فلسفه یاپیورز، ظن ایتیه سکز!.. بو دوشونجهلر ایله یالکیز (طبع سلیم sens commun) [*] حدودینه کلیورز که اصل مابعدالطبیعیات مسئله لرینی اوراده بوله جغز و شکل لرینی تعیین ایده بیله جکز. یوقسه آرز جوق طوغرو دوشونمه سنی بیایر وافکار وحسیاتی تحلیلله چالیشیر برکیمسه، بوتون بو شیلری دوشونه بیلیر وهان عینی صورتله دوشونه بیلیر. اختلافات فلسفیه هنوز بو ساحه ده باش کوسترمز. فلسفه بوندن اوتهدر. صکره برشی دها وارکه پک مهمدر. اونیده ملاحظه ایتمدن بو بحثی کچمه یز: بز واقعا مدرکات حسیه مزى تحلیل ایتدک، صکره تصنیف ایتدک، دها صکره یته بعضی مشابعت ومغایرت علاقه لرینه بناءً محاکمه ایدرک افکارمزی (ترکیب synthétiser) وتعمیم ایله دک، ده بو بر قاچ ارکانه پیوسته اولدق. فقط دوشونمه دک که بونلر، نتیجه التیجه، بزم کائنات حقدوم حاصل ایده بیله یکمز بعضی (مفهومات کلیه notions générales) دن عبارتدر. هیچ اولمازسه - شیمدیلک - او یله کورونوبور. اکر صحیحاً او یله ایسه، بونلر بزده، بزم کندى ذهنمزک محصولی اولق لازمکلیر؛ چونکه ذهنمزدن خارج وبزلردن مستقل اوله رق بر طاقم مفهوماتک وجودینی قبول ایتک - عجائب - برشی اولور. بویه برشی مطلقاً قبول ایدیله مز، دیمک دکادر. افلاطون کبی بر بویوک فیلسوف بویه بر ادعاده بیله بولونمشدی. اونک ادعاسنی تکرار ایدن دها بر جوق بویوک فیلسوفلر دخی کلدی کجدی. بوکونده او یله لری واردر. لکن مفهوماتک استقلال وجودینی قطعاً اثبات ایتک ممکن دکادر. معافیله هر نه

[*] حکمای اسلام بو تعبیره (حس مشترك) دیشلردر. بئم بویه دیمه یشمه سبب وار: حکمای اسلام نظرند حس مشترك، حواس خمس باطنه دن بری ایدی حالبیکه بوکونکی معناسیله (sens commun) حکمای اسلامک (عقل سلیم وطبع مستقیم) دیدیکی شیدر. اندن صوکره بوکون (حواس باطنه) بش دکادره تفصیلات ایچون قاموس فلسفی به مراجعت ایدبکزه.

ایسه، بوراده بر (کور-دوکوم) وارکه اونی - ایی کوتی - حل ایتمکه مجبورز. [زمان، مکان، قوت، الی اخره، مفهومات قییلندن دکل، موجودات حقیقه دندر. اولسه اولسه اوموجوداته ویردیکمز اسمی معینه در. یوقسه خارجده زمان، مکان، بالذات وبلاستقلال موجود در. بز اولسه قدده اولماسه قدده اونلر واردرا] دیه بیلیرز. نته کیم، بویله دیمش اولان وحالا بوعاده بولونان برچوق فیلسوفلرده وارد در. او حالده ایکی درلو دوشونمک ده ممکن اولیورمش و بناء علیه اصل مسئله بو نقطه ده چاتاللاشورمش دیمک!...

هایدی زمان و مکان و ماده نك (آفاقیتی Poljectivité)، در حال قبول ایده لم و (طبع سلیم) لك، یعنی ذهن اکثریتك بو مسئله لرده ویردیک حکم وقراره بزده اتباع ایده لم: بو يك قولای بر ایشدر، حتی عوام و اکثریت ناس ایله اختیافاته وسیله ویرمیه چکی ایچون يك ای ده بر ایشدر. فقط بو قدرله ایش بیتمز که!... مدرکات حسیه مزی تحایل ایتمکه کشف ایده بیلدیکمز شو ارکان، ایستر خارجده مستقلاً موجود اولسون، ایستره بزم ذهنزده تصوراً موجود اولسون، ایستره بعضی موجوداته ویردیکمز اسمی معینه دن عبارت بولونسون، بونلری درك ایدن، تصور ایدن و بو اسملری ده ویرن، انجق بز، انسانلرزا!... بونلرک منشأ و ماهیتی بر مهم مسئله در؛ وانجق بزم ایچون بر مسئله غامضه در! زیرا، تاریخ فلسفه یه مراجعت ایدرسه ك کور و یورز و سزیورز که بوتون قرون وسطی فیلسوفلری بو مسئله یی تذکر ایتمک مجبوریتندن قورتوله مامشلر و (حقیقیون réalistes)، (منهومیون conceptualistes) و (اسمیون nominalistes) ناملریله اوچ فرقه مشهوریه انقسام ایدرک التی یوزسنه شدله مناقشه ایدوب بوغوشدقلری حالده ینه مسئله یی حل ایده میوب براقشلر، واولدوغی یرده اولدوغی کبی براقشلر!.. بو آدملرک اصول فلسفه سی نه قدر فنا و کندیلری نه قدر گوه زه فرض اولونسه بیله، ینه - محضاً چکه چاللق ذوقی ایچون - آلتی عصر بوش لاقیردی ایتمک ایسته مش اونالرینه عقل ایرمز. بویله دوشونمکدن ایسه، مسئله نك اهمیت ذاتیه سی تسلیم واعتراف ایتمک دها

حقلی اولور . چونکه بو بحث - بو کون واقعا بوسبوتون باشقه بر شکلده اوله رق - ینه (افکار یون Idéalistes) ایله (حقیقیون Réalistes) لر آره - سنده موجوددر، شدتلی مباحثات و مناقشات سبب اولمقدردر .

هانکی طرف حقلی کورونورسه کورونسون ، شوراسی محقق درکه هنوز بو مسئله قطعاً حل و فصل اولونماشدر ؛ وشبه یوقدرکه بزم ذهنمک بو خصوصده بر رولی وارددر . بز بو ارکانی تحقیق ایدرکن ، کندی روحزی ، حسابده داخل ایتمه دک . حالبوکه قابلیات روحیه مزدن اولان (حافظه) نك (زمان) ی ادراك خصوصنده نه بویوک دخلی وارددر .!... کورمه دیکزمی؟... زمان حقنده نصل اولوبده بر فکر مخصوص حاصل ایده بیلدیکمه دائر سزله بر مثال ترتیب ایدرکن ، کندی حیاتمک جریانی نصل دوشونه بیلدیکمی کوسترمش وماضیه - کیده بیلدیکم قدر - کیتمشدم . حافظهم اولماسه یدی ، کچمش اولان وقوعات متسلسله یی خاطر لایه بیلیری ایدم؟ حتی کندی حیاتمک (سینه ما) سنده بعض دورلری بعضیلرندن ده ائی خاطر لایه بیلدیکم وبهض صفحات عمرمی لایقيله تخطر ایده مدیکم ایچون (سینه ما) نك او پارچه لری عادتا (سیلیک Effacé) کورونمیدی ایدی ؟ . . . یا بنم وبوتون انسانلرک هیچ حافظه می اولمایه ایدی ده بوتون خارجدن تاقی ایده بیلدیکمز (مدرکات حسیه) ، (آئی تأثیرات Affection momentanées) دن عبارت قاله ایدی ! . . . عجب او حالده ده بزده (زمان فکری l'Idée du temps) اوله بیله جکمی ایدی ؟ . . . حتی (زمان) نامه ، صحیحاً ومستقلاً خارجده بر (شی) موجود اولسه بیله ، بزجه اونك وجودندن خبردار اولمق - شو فرضمه کوره - ممکن اوله بیله - جکمی ایدی ؟ . . .

[تحف شی ! . . . بویله مسئله اولورمی ؟ . . . بویله شی دوشونولورمی ؟ .]
دیمه ییکز ! . . . غایت سفلی و ناقص الاعضا حیوانانده ، حافظه عجیباً بزمکی درجه سنده می در؟ . . . زمان حقنده بویله بر حیوان سفلی نك ، بر (فکر فلسفی سی) اولسه یدی ؟ . . . نصل اولوردی ؟ . . . البته بو دوشونوله بیایر بر مسئله در! . . . بو کوچوک حیوانلری براقلم ! . . . بن ، زمانی دوشونه بیلیمک ایچون شو

آن حیاتمدن اعتباراً ماضی به ارجاع نظر ایدرك حافظه مه مودوع بولونان وقوعات طومارینی آجیورم. آنجق بو (انبساط خواطر)، بکا زمانك نه ديمك اولدوغنه دائر بر فكر ویریور. فقط (ماضی) نامه حقیقتاً موجود بر شی واری یا؟. بن حافظه می یوقلاینجه، مثلاً پدرمی کابیولی محکمه می صالوننده مدعی عمومیلک صندالیه. سنده اوطورورکن کوروورم؛ هم بوکون صاغ اولسهیدی بوندن اینی کورمه. مزدوم. فقط بکا صورارسه کز - یکر می بش سنه دنبری - وفات ایتمش اولدو. غنده ذره قدر شبهم یوقدر. او حالده بویله یوق اولان شیرلی ذهنده - بر آنده احضار ایدوب - وار کوسترن حافظه مک شو فسونکارلغنه باقیایرده درین دوشونولورسه، زمانك آفاقیتی و موجودیت مستقلمه سی حقنده انسان - بر آزجق اولسون - شبهه دوشورسه معذور دکلی در؟ ... یعنی مادامکه حافظه مز، کلش، یکمش و بوسبوتون یوق اولمش وقوعاتك خیالی - بر آنده - بزه عرض ایتك صورتیله بر فسون اجرا ایدیور که زمان فکری بزاوندن حاصل ایدیورز؛ صاقین زمان دیه (حقیقت مستقلمه) ظن ایتدیکمز شی محضاً بر (جلوه فسون) اولماسین!؟ ... دیه دوشونوله مز می؟ ... او قدر دوشونو. لورکه بوتون صوفیه مجبوراً بویله دوشونمش؛ بوتون هند فیلسوفلری بویله دوشونمش و بو دوشونجهك ضروری و منطقی بر نتیجه سی اولمق اوزره دخی: [وارلق بر آندر. ماضی. مستقبل حواسمك بر فسونکارلنی بر شعبده سی در! ...] دیمش لردر که اهل تصوفك [عالم بر دم در! ...] دیدیکی بودر!.. [*]

بونلری براقلم! ... زمانمك اك بوبوك فیلسوفلردن يك چوق کشیلر ذکر ایده بیایرم که بر چوق مسائل مهمه ده اختلاف اوزره بولوندقلری حالده [حقیقه مقارن اولان مدرکاتمك آنجق حالی Actuel اولدوغنی] ادعاده علی العموم متفق الرایدرلر. (جون ستوئت میل) ایله (سرویلیام هاسانتن) کی!.. [بونلر مابعد الطبیعیات اهلینك بر ضلالت غریبه سی در؛ خارجه زمان

[*] نیچ به Nietzsche و بر چوق اورویا فیلسوفلری ده بو اعتقادده درلر.

وار، شبهه کورتورمز: ... ساعته باقوب يلقووانك حرکتی تعقیب ایتک کافی!... [دیمک، محله بکجیسی کبی دوشونمکدر. اونی انکار ایدن یوق، فقط آزیجق بو شیلرک ماهیتی دوشونوله جک اولورسه، اولیه مسئله لر تولد ایدیورکه - حلنه موفق اولق شویله طورسون! - قولای قولای ایچندن چیقماق ممکن دکدر.

بو ارکانی موجودات مستقله دن اولق اوزره تلقی ایدن اکثریت خلقک دوشونوشنه فکر می ایدورسه ق بیله، آزیجق ذهن می قورجالایجه، بر سوری مسئله لرک ظهوری وعقل مزه رهن اولو ویردکاری کورویورز، اونلردن قورتوله میورز. چونکه زمان، مکان، ماده قوت مستقلاً موجود حقایق دندر. ده یوب کجیورمک ممکن اولیور. منشأ و حقیقت وجوده متعلق اولان بالمله مسائل، ده ا زیاده قوتله ذهن مزه - اصل بو سفر - تعرض ایدیور. زیرا بویله بر شیلرک وار اولدوغنی قبول ایتشدک ...!

مدرکاتمک بزی نره لره کورتوردوکی و (طبع سلیم ساحه سی) حدودندن فصل چیقاردیغنی کوسترمک ایچون سزه بو مثاللری و تفصیلاتی ویردم. مابعد الطبیعیات مسائلی بوندن صکره انجق باشلار.

کورییورسکز - اقتدیلر! - که، شو عالم خارجی تشکیل ایدن متنوع حادثات نا معدوده یی جنسلرینه کوره تصنیف ایده ایده نهایت بش درلو ارکانه ارجاع ایده بیلورز واوراده ذهن مز طورویور. چونکه ارتق بو بش ارکان اصلیه یی یکدیگرینه ارجاع ایده مدیکمز کبی یکدیگرندن آری اوله رق دخی دوشونه میورز؛ وشایان دقتدرکه بوتون حادثات معضله یی تحلیل ایده ایده بو ارکان اصلیه یه ارجاع ایله رک بر درجه یه قدر تعریف ایتش اولویورزده او ارکان، حقیقی اعتباریله یه فلسفه نک الک غامض معمالرینی تشکیل ایدیور. مکان، زمان، ماده، قوت، حرکت هممزک کوروب حس ایتدیکی بدیهی شیلردن اولقله برابر بوبده ات فلسفه نقطه نظرندن باقیلنجه الک بویوک معما اولوب قالیور. مکان، حقیقته نه در؟ واری در؟ یوقی در؟.. مناهیمی در، دکلیدر؟... بر

فرد متحسس اولماسه یدی عجباً مکان اولورمی یدی اولمازمی یدی؟.. اولدینی تقدیرده مکان، حد ذاتنده فصل ونه اولوردی؟.. نیچون مکان ابعاد ثلاثیه حائرده؟.. درت، بش ویا(ن) بعدلی مکان اوله بیلیرمی؟.. ویا خود بر، ایکی بعدلی مکان اوله بیایرمی؟.. اولسه یدی اومتنوع مکانلرک عالمی فصل اولوردی؟... بزدن عضو نتیجه دهانا قاص حیوانات، مکانی طبق بزم کی می حس ایدر، دوشونور؟.. دکلسه عجباً اولنردده مکان حس وفکری وارمیدر؟.. وارسه فصلدر عجباً؟.. بزدن دهاکامل موجودات متحسسه ایچون مکان حس وفکری مطابا بزمکی کی می در؟.. دکلسه، فصل اولق کر کدر؟.. هر شیدن اول مکان می موجود ایدی، یوقسه صورکه می وجود بولدی؟ نیچوندرکه مکانه مکین اولان اشیای موجوده یی ذهنأ طی وتجریده ایده بیلدیکمز حالده مکانی ذنأ بیله محو ایده میورز؟.. حالبوکه مکانی بر موجود حقیقی اولمو اوزره دوشونمک ده متمنعدر. مکانی تصورده ذهنمز تعرض ایدن بوغرابت تناقض نه در؟.. جهت، مکانک لوازمندمی در؟.. اوله ایسه نامتناهی بر مکانه تعیین جهات ممکنمی؟.. الی آخره.

ایشته سزه بر سوری سواللرکه یالکمز مکانه عاندر و بونلرک هیچ بریسنه آدم عقلای بر جواب قطعی ویریه مامشدرکه بروجهله تعریضی دعوت ایده جک ماهیتده اولما-ین!... بوتون بو سواللره قطعی بر جواب ویریه بیلیمک ایچون مکانک (حقیقت ذاتیه Réalité essentielle) سنی بیامک لازمکلیر. ایشته اونی هنوز بر بیان یوق! حالبوکه هر کیسه صورسه کز، اک جاهل بر آدمه بیله: [مکان فصل شیدر؟... | دیسه کز، [ایشته!...] دیه سزه پارمغیله مکانی کوستریر. بو اوقدر بدیهی بر شیدر. فقط خلق ایچون بویه! یوقسه فیلسوفلر ایچون اک بو یوک معما بو بداهتدر. اک بو یوک مسئله دخی او بداهتی، حقیقت ذاتیه سیله تریف ایده بیلیمکدر.

زمانمزک اک درین متفکریندن واک بو یوک فیلسوفلرندن هر برت سپنسر، (H. Spencer) (مبادی* اولی Les premiers principes) نامنده کی کتاب مهمنک، (اضافیت علم Relativité de la connaissance) بمحنده بومسئله لره دائر پک صریح ایضاحات ویریور. بن اونلرک روح معناسی بوراده ایکی سطرله

تلخیص ایدیورم :

(بوتون شو عالم حادثان دن تاقی واستنباط ایده بیلدیکمز معلوماتك جمله سنی ده تحلیل ایده ایده عناصر بسیطه واركان اصلیه سنه ارجاع ایلیه بیایرز اوو تقدیرده (مكان، زمان، قوت، حرکت، ماده) فکرلرینه کایر طورورز. بو اركان ایله هر شیشی نسبی بر صورتده تعریف ایده بیلدیکمز حالده بالذات اركان مذکورینی تعریفدن، ماهیت ذاتیه وطبیعت اصلیه لرینی آ کلامقدن عاجرز. بونلر عادتاً عملیات حساسیه ده قوللاندیغمز (س)، (ع)، (ف) کبی اشارات جبرییه بکزرکه انحق مقادیر وکمیات بجهوله نك تمثالی درلر. کذلک کندی وجدانمز عالنك حادثانخی دخی تحایل ایتدیکمز زمان، (حس، ادراك، فکر و ارادت) کبی اركانه کلوب طایانیرز. بو اركان ایله بالجمله (Phénomènes subjectifs) یی نسبی بر صورتده تعریف ایتدیکمز حالده بالذات حس و ادراك نه در فکر و ارادت نه در؟ ... بونی قطعی اوله رق تعریف ایده مه یز. وجدانك حقیقتی بیله مه یز. یالکمز عالم خارجی نك تظاهراتی ایله حادثات انفسیه من آره سنده قطعی ودائمی بر مناسبت، بر توازن و توازی اولدوغنی کورورز!..) دییور. مکان ایچون بویه اولدوغنی کبی ماده، زمان، حرکت، قوت ایچون ده بویه در. بو ارکانی، ایکنجی کتابمزده وخصوصی بابلرده نظر دفته آلوب ماهیتلرینی مناقشه ایده جکزر.

فقط سېنسرک صوک سوزلرندن ده آ کلاشیایورکه بو بش اركان ایله ده ایش بیتیمور! دنیا یالکمز عالم خارجی دن عبارت دکل، بزده وارز! او عالمی ادراك ایدن، اونلرک حقایقی دوشون بزلرز! حیاتمزله، وجدانمزله، عقل و جسممزله، الحاصل بوتون معنویتمزله، برابر بزده عالم حادثانده داخلز؛ بزم وارلغمز دخی باشلی باشنه اك بوبوك، اك مبهم واك غامض بر معمار! ...

(۱۸۲۸) سنه میلادیه - سنده وفات ایتش اولان سقوجیالی فیلسوف (دوغلد ستیوارت D. Stewart) روح انساننی نك حادثانندن بحث ایدرکن يك حقلی اوله رق دییورکه :

(روح انسانی نك نظر دقتمزه عرض ایتدیكى حادثات مختلفه آره سنده هیچ بری یوقدرکه (ادراك) دیدیکمز کیفیت قدر مراق وحیرتمزی تهیج ایدیه یله جك مرتبه ده مهم اولسون ! . . . بزم ایچمزه موجود اولان او حساس، متفکر و فعال پرنسیب ایله (یعنی نفسمزه !) اطرافمزی احاطه ایدن اشیای ماده آره سنده کی مناسب نه در ؟ فصل حیرتبخش بر شیر ؟ ! .)

اوت ، بو فیلسوفك چوق حقی وار : بز بر شیتی کورور کورمز اونو ادراك ایدیورز ؛ اونك بزدن غیری بر شی اولدیغنی و بر یرده متحیز و مستقلاً موجود بولوندوغنی قناعت و طمانینت کامله ایله آ کلا یوب تسلیم ایدیورز و بو حکمی بر لمحّه بصرده و یر یور یورز ؛ بو نه غریب شیر ! فصل معمار ؟ . . بزده آ کلا یان کیم ؟ . . خار جده آ کلا شیلان نه ؟ . . . و آ کلامق ، ادراك ایتك فصل کیفیتدر ؟ و فصل وقوعه کلیور ؟ . . .

بو درلو سواللری زنجیره له مه اوزاته بیلیرز . فقط قیسه کسهیم ! یالکز همان شونی اونومه دن سویلهیم که بو . واللر حقنده ده قطعاً مقنع جوابلر و یرن بر کنشی هنوز کله مشدر . طبق عالم خارجی حادثاته عائد اولان مسائل غامضه ده اولدیغنی کی ، وجدان علمك حادثات مخصوصه سنه تعلق ایدن مسائل نفسیه حقنده ده هر نه سویلنمش ، نه دینش ایسه ، جمله سی دخی آز چوق معقول فرضیات قیلندندر . بناء علیه هپسنك ده بر چوق نقطه سنه حقی و شدتلی اعتراضات توجیه ایدیه بیلیر . یعنی اونلرده بوسبوتون مقنع و صاغلام ملاحظه لر دکدر . خلاصه ! . . . اک شهه سز و بدیهی صانديغم معلوماتی تحلیل ایدرك عناصر اصلیه سی آرایه جق اولسه م عالم خارجی به عائد اولانلری بو بش ارکانه ، نفسمه عائد اولانلری دخی حسیات ، ارادت ، و افکاره منجر اولوب قالیور . بوتون مدرکات و محسوساتمی بو صورتله بویوک صغله ره تقسیم ایدیشمده ده سبب ، طویغولرمده کی فرق اساسی در . ذاتاً ذهنمزی بو تصنیف طبییی به سوق ایدن مجبوریت، ینه او فرق ادراك ایدیشمدر . الله طوتوب کوزمله کوودوکم ، قوقوسنی طویدوغم بر شیك ، مقاومتی ، قوقوسنه ، قوقوسنی ، رنکنه ، رنکنی شکله بکزمه بیلمك احتمالی یوقدر . بن بو حسیاتی .

وجدانده آیری آیری (حالات روحیه) اولق اوزره حس ایدیورم . طبیی بونک کبی ، عالم خارجییه عائد اولان طویغولرمدهده مکانی ، زمانا ، زمانی مادهیه مادهیی حرکتیه بکزه تهبیلیمک احتمالی اولمادیغنی ده جزم وتیقن ایدیورم . طبیعی درکه بوتون معلوماتیی تصنیف ایدرکن بو ضرورته تابع بولونمقدن قورتوله میه جنم . [*]

صوکره ! . . . اولجهده اشارتاً سوبایدیکم کبی ، بوتون عالم خارجی حادثاتی زمان ، مکان ، ماده ، قوت و حرکت ایله تعریف ایده بیلدیکم حالده بالذات بو شیلری تعریف ایتمکدن عاجز قالیورم . کذلک وجدانده عائد حادثات انفسیهیی ، حسیات ، ارادت و افکار ایله تعریف و ایضاح ایده بیلدیکم حالده بو حسیات و ارادتی و افکاری تعریف ایده میورم ؛ فصل شیلردر و فصل اولویورلر ، آکلاهی میورم ! دیمک که بو ارکان اصلیه ، بوتون معلوماتیزک یالکیز مبادیسی دکل ، حدود انتهاییه سی دزده ! . . . بنم بیلدیکم ، علم ، وارلغ بو مبادی و حدود آردسنده محصور قالیور . اونک خارجهه چیق-ق احتمالی کوره میورم ، که ، بوده پک مهم بر مسئلهدر و (علم بشرک اضافیتی) حقنده بوکون متفق الرأی اولان بوتون فیلسوفلرک قناعته زمین استداد اولمشدر . ایلری ده بر باب مخصوص آچوب بونی شرح ایده جکم .

شیمدی ، حادثات خارجییهیی وبالذات وجدانمیزک محتویاتی تحلیل ایتمکله بولدوغمز شو ارکان اصلیه ، (که معلوماتیزک عناصر ابتداییهیی اولق اعتباریه مبادیسیدر ، و تحقیق-قاتده ذهنمیزک واره بیله جکی صوک مرحله فکریه اولق اولق سبیلله دخی حدودیدر) ایشه بو ارکان دیدیکمز شیلرک ماهیتی دوشو-نولسه ، آکلاشیلیر که بونلر بر طاقم کیفیات عمومییه ویردیکمز عمومی وشامل اسملردن باشقه بر شی دکلدر . وارلق عالمده بر طاقم (تطورات Modalités) کوروپورز یا ! ایشه او تطوراته ویردیکمز اسملردر . بونلره اوتدنبیری

[*] بو کیفیتدن ، آلمان فیلسوفی (لانگه Lange) مهم بر معنا چیتارم شدره ایلریده کوره جکیز .

فیلسوفلر (مقولات Catégories) دیرلر . و بو تعبیری ایجاد ایدن مشهور
ارسطودور . سوکردهر فیلسوف وازان جمله (قانت Kant) ، ارسطونک متولاتی
تمدیل و کندی نقطه نظرینه کوره بر جدول مقولات تشکیل ایشدی که
بوراده صایدیم ارکان ترتیبه بکزه من . ایلری ده یونلری ده کوره جکزه .

شو تقدیره کوره کرک زمان ، مکان ، ماده ، قوت و حرکت کبی عالم
خارجی ده تحقیق ایتدیگمز ارکان اصلیه ، کرکه حسیات ، ارادت و افکار کبی
صرف کندی وجدانمزه بولدوغمز حالات روحیه ، شو و اراق عالنده حس
و مشاهده ایده بیلدیگمز حادثاتک اک عمومی صورتلریدر و بنشاء علیه جوهر
وجودک اک عمومی تطوراتی در . آرتق حادثات وجدانیه و آفایه دن هر نه دورلو
بر وقعه اولورسه اولسون ، بز اونی بو بیوک صنفلردن برینه درج ایله
تعریف ایده بیلیرز . ومثلا (محبت) حسیات مقوله سندندر . نشوونما حرکت
مقوله سندندر . الماس ، ماده مقوله سندندر . الی آخره ! .. دیه بیلیرز .

فقط بو تقسیم ، آنجق منطق نقطه نظرندن حائر اهمیتدر . و قتیله فلسفه
یالکمز منطقه مستند یر مبنای علم ایکن بو تقسیم ایله قناعت ایدیله بیلیمشدی .
برقاج عصر وارکه فلسفه منطقدن مستغنی در ؛ چونکه منطقک اساس استنادی
اولان احکام اصلیه بیله بو کون فلسفه نک موضوعات طبیعی می داخلنده اولان
مسائلندندر . آندن سوکره منطق ، علوم صحیحهدن بری در ؛ فلسفه حاضره
نظرندره اهمیتجه - علوم سائردهن فرقی یوقدر . زمانمزه ، مناقشات فلسفیه ده
طرفینجه حکم ، و بنشاء علیه بجنه حاکم اولان ، (علم روح) در . علم روح
- کندی نقطه نظرندن ، یعنی صرف مدرکات مقوله سندن اولمق اعتباریله ! .. -
ماده یی ، مکانی ، زمانی ، قوتی ، حرکتی برر مسئله اوله رق تاقی ایدیور ؛
و آنجق (معطایات Data) اولمق حیثیتله ! اولنلری تدقیقه قاقیشیور . فقط
نتیجه تحلیلده بر طاقم (احساسات عنصریه Sensations élémentaires) دن
باشقه بر شی بوله میور ! . . . [*]

[*] بو کون (Sensations) دهنیلن ابتدائی طوبیولری . (احساسات) دیه ترجمه
ایدیورز . عربلر (احساسات) و (حسیات) دیرلردی ؛ و یالکمز عالم خارجیدن حواس

فلسفه عمومی ده اساس و مقصود اولان (نظریه معرفت Théorie de la connaissance) که هرشیدن اول و هرشیدن زیاده (کیفیت ادراک l'Acte de perception) ه دائر ترتیب ایده بیله جگمز فرضیاتدن متأثر ایله جفی محقق و عموم عندنده مسلمدر. ادراک مسئله بی ده انجق بسیقه ولوژینک موضوعات خاصه. سندن معدود بولونان حادثاتنددر. بونی و بوتون کیفیات وجدانی بی تتبع ایتک او عامک صلاحیتته بر اقلیمش بر ایشدر. (منطق) که دکل ! . . . زیرا منطق یالکیز بعض مقدمات مسلمیه استناداً بر نتیجه استدلال ایتهک قواعدنی تحقیق ایدوب ضبط و ربطه آلیز ؛ محاکات و قیاسات و استقرآتک و برهان اقامه ایتهک اصولانی، و صور مختلفه سی کوستریر ؛ صحت و فسادی شرطلرینی تعیین ایدر بر (علم مجرد Science abstraite) در . عاداتا ریاضیات قیلندن برشی در. یالکیز، ریاضیات دیدیکمز شعبه علومده محاکات (کمی Quantitatif) بر صورتده واقع اولور ؛ منطقده ایسه (کیفی Qualitatif) در . لکن منطق ، محاکاته اساس استناد اولان مبادینک حقیقتنی دوشونمز ؛ حتی مقدماتک موافق حقیقت اولوب اولمادیغنی تحقیق ایلدخی تقید ایتمز . چونکه بو تحقیقات اونک وظیفه

ظاهره من واسطه سبله تاقی ایده بیلدیکمز طوبفولره تخصیص ایدلمش تعبیرلر بونلردی. باطنی طوبفولر منک جمله - نه بردن (وجدانیات) دیرلردی که بوکون (faits de conscience) تعبیریک تماماً ترجمه سی اوله بیلیر. قرنکار دخی طبق عربلر کی، (Sentiments) تعبیرنی - لاعلی التعین - محسوساتمز حتمده قولانیرلردی ؛ ایستر او محسوسات ، عالم خارجیدن، ایستره وجداندن کلین ! . . . لکن صوکره لری (sensation) ایله (sentiment) تعبیرلری آره - ننده بر مهم فرق آمین ایتدی . (تأثیری Affectif) اولان طوبفولر منزه (Sentiment) افطی مختص اولدی، وکین، عداوت ، عشق و محبت کی شیلره انجق حسابات تعبیری موافق کورولدی که بونلر هیچ بسیط و ابتدائی طوبفولر دکدر. (احساسات Sensation) تعبیری ده علی العموم بسیط طوبفولر منزه اسم اولدی قالدی. حالبوکه زمانمک اک بویوک فیلسوفلرندن برچوق کشیار ، بو فرقه هنوز رعایت ایتیور . مثلاً (ستواتر میل) ودها برچوق معاصرین منفکرین (sensation و Sentiment) کلرینی قطعاً عینی معناده استعمال ایدیورلر . بن معنا فرقه رعایت ایله قولانپورم .

خاصه سی دکدر . منطق بوتون مبادی اساسیه سی، آنحق پسقولوژی ساحه.
 سنده موضوع بحث اوله بیلیر . حالبوکه منطق اونلری، اولدوغی کی تاقی ایدر
 ویا به جفی بنای قیاس و محاکمهی او اساسلر اوزرینه قورار . خلاصه منطق
 - قرون وسطا فیلسوفلرینک، حتی معاصرینمزدن بعض متفکرینک ظنی کی -
 کشف حقیقت علمی دکل، اصول استدلال و اقامه برهان صنعتی و عامی در .
 ایسته بوتون سقولاستیق فلسفه سی ایله زمانمزد فرقی شو تعریفله کوسترلمش
 اوله بیلیر، دیسه مبالغه ایتش اولام. اونک ایچوندركه بوکون فلسفه مباحثنده
 منطق دکل، پسقولوژی نقطه نظری مرجح و متمبردر .

یو بحثی ترك ایتمدن، دوشونه حکمز بر نقطه دها وار ! . . . بز، کائنات
 جقنده - اوتدنبیری - حاصل ایتش اولدوغمز معلوماتی تحلیل ایتکله نه یامش
 اولدق ؟ ! . . . بر طاقم مجردات فکریه پیوسته اولدق ! . . . اله آووجه
 صیغار بر (شی) یعنی (مادی بر جوهر *Un substance matérielle*) بوله.
 بیلدکی که، معلوماتمزی تحلیلدن صوکره، کشف ایتدیکمز افکار مجردیه
 تقابل ایده بیلسین ؟ ! . . . بن ظن ایتیمورم ! . . . مثلا : (زمان)، دیه،
 خارجه مستقل موجود بیلدیکمز وایکی اوجنی تصورایده مدیکمز و - بناء علیه -
 نامتناهی فرض ایتدکه مجبور بولوندوغمز شی، حقیقته هیچ بر (شی *Objet*)
 دکدر . یعنی کندی کندینه قائم و موجود بر (وارلق) دکدر ! . . . بز،
 اونی - اولجه بر آز آ کلاندیغم کی - تعاقب حادثاندن، استدلالاً (دوشونوب
 چیقارمشز !) ؛ و بو صورتله ذهنمزد تواید و تصور ایتش بولوندوغمز بر
 (فکرت مجرد *Idée abstraite*) یه بر (کله !) ایله بر اسم طاقمشز ! بناء علیه
 بو اسمک مسمای حقیقیسی او فکر دکل، بزم ذهنمزد او فکرت تولدینه
 سبب اولان (احساسات *Sensations*) ک، هیئت مجموعه سیدر . پسقولوژی
 علمنک بو خصوصده تحلیللاتنه باقیلیرسه، بزم اشیا نامنه ادراک ایتدیکمز، آنحق
 بر طاقم (احساسات مؤلفه *Sensations combinées*) در . (فکر *Idée*)
 دیدیکمز یالکمز بر اشارتدر که او (احساسات معضله *Sensations complexes*) یی
 (تمثیل *Représenter*) ایدر . کله دخی اونلری اخطار و ذهنده احضار ایتدکه

خادم بر اشارت صوتیه در . [*]

مکان حقننده کی علممی ده تحایل ایدہ جک اولورسہم عینی صورتلہ حکم ویرمکہ مجبور اولدوغمی حس ایدیورم: (مکان) دیہ خارجدہ مستقلاً موجود ییلدیکم وحدودنی تعیین ایدہ مدیکمدن طولایی نامتناهی اولدوغنی فرض ایتمکہ مضطر بولوندوغم شی، حقیقتہ! . هیچ بر شی دکدر! . . . اگر صحیحاً مکان، بر شی اولسہیدی، شو کوردیکم وتماس ایتدیکم موجودات ومکونانک هیچ برینہ (یر قالمزدی! . . . وحرکتہ دخی امکان بولونامزدی!) حقیقت مکان - فلسفہدہ - بر یک مبہم معما اولقلہ برابر؛ اونک حقنہ ینہ - عامیانہ - بر اعتقادمن واردرد: بوسبوتون بوشافہ، (قابل مساحہ اولان بر ہیچلک) ، مکان دیرز . لکن (هیچ) ، نصل بر شی اولہ بیلیر...؟

بنجہ (قوت) و (حرکت) دخی بویله! . . . حتی برنجیسی فضلہ بیلہ کو-رونور . چونکہ اینی دوشونورسہک، (قوت)، حرکت ایچون [فرض ایتمکہ مجبور بولوندوغمز! ؟] [سبب مجهول la cause inconnue] ویردیکمز براسمدن عبارت قلیر . اوسبیک نہ اولدوغنہ، نہ اولہ بیلہ جکنہ دائر هیچ بر علممز - اما ذرہ قدر! . - بر فکرمن یوقدر! . حرکت، علی الفور ومستقلاً کندیمزدن صادر اولورسہ، اونی ایقاع ایدن قوتہ (یعنی سبب مجهولہ! .) [ارادت Volonté] دیورز! . . . بو سبب مجهولی، دیگر بر (سبب مفروض cause hypothétique; G. supposée) عطف ایلہ تعریفہ چالیشہرق اوکادہ (روح، نفس، أنا، l'âme, l'esprit, le moi) دیورز. فقط بودیدکلر مرکز

[*] (جون ستونہت میل) مشہور منطق کتابک اسمارہ طائد اولان باب مخصوصندہ، [اسمارہ؛ اثباتک اسملریدر او اشیا حقنہ حاصل ایتش اولدوغمز افکارک اسملری دکدر،] دیورز؛ واشیاتک نہ اولدوغنی تعریف صدندہ: [اشیا دیدیکمز، بزده بر طاقم احساسات مؤتلفہ در،] دیورکہ (ہستیولوژی، تحلیلی) نک بوکون بو مسئلہدہ حکمی دہ بودر. (میل) بو ملاحظہ سبلہ بالخاصہ دہ قارتک (راسیونالیزم) نہ انتراض ایتش و (ساندوالیزم) دہواسندہ بولونمش اولوبور، فی الحقیقہ بزم کائناتدن تلقی ایدیکمز، اول اسرہدہ افکار دکلی احسا-ساتدر. یاقیندہ بو بحثہ کلہ جکمز.

معنای حقیقیسی (قوت) دکلدرده ندر؟! .. حرکاتمرك (علت موجبہ cause efficiente) بی دکلدرده ندر؟! .. خارجده بولونان واعتقاد مزجه بی حیات، بی حس و بناء علیه بی شعور اولان بونجه اشیای مختلفه نك حرکات متنوعه سنه برسبب دوشونمك مجبوریتدن فارغ اوله مدیفمز ایچون (قوت) دیه رك قیصه کسپورز؛ و بویله جه ذهنمزی کویا صوصدورمش اولویورز! ... دیمك که کرک کندیمزدن صادر اولسون؛ کرکه اشیای خارجیه ده ظاهر اولسون بزم - اول امرده! - حس ایتدیکمز حادثه، انجق (تبدلات changements) در. (حرکت mouvement) کلمه سی، او تبدلاتی علی الاطلاق افاده ایدر بر اسم جامعدر . دیمك که اصل کائناتده بالذات و بلاشبهه مشاهده و تاقی ایتدیکمز، انجق تبدلات- درکه - قولایلق اولسون دیه عمومه بردن (حرکت) دیورز . یوقسه بالذات (قوت) نامنه نه کیمسه بر (شی) کورمشدر؛ نده - اعتقاد بجه! - کوره بیلیر! ... (ماده la matière) یه برده یه چکک یوق آ!!!! ... ده یه بیایر سکز؛ فقط هیچ پروا ایتمدن ادما ایلیه بیلیرم که ماده حقنده کی عامم دخی ماهیتاً ارکان سائره حقنده کی علممدن ذره قدر فرقلی دکلدر. زیرا بو خصوصده کی معلوماتی ده تحایل ایتدیکمز زمان عینی نتیجه یه پیوسته اولمقدن قورتوله میورم. خصوصاً بومشله- لرده هر کسدن و هر علمدن زیاده صلاحیتی مسام بولونان بسیقولوزی علمنی رهبر اتخا نایدنجه، قطعاً بونتیجه یه واری میورم؛ باشقه چیقاریول دخی کوره میورم! ... هم ساده بن دکل، بویوک فیلسوفلر دخی - همان اکثریتله - بویله دوشونمك مجبوریتدن قورتوله میورلر . نته کیم بونلرک فکر لرینی ایلریده کوره چکز .

اوت!!.. (ماده!!) دیورز؛ وارلقی انکار ایتیمورم! ... اوستنی اورتوب کیزله میسیم؛ بو مسئله نك اطرافدن طولاش-وب کچیمه ییم؛ اونی طوغرودن طوغروه قارشیلاییم؛ باقلم، ماده دیدیکمز شی حقنده حقیقتاً و صحیحاً بیلدیکمز ندر؟! ... او شیک، کندی (مادیته matérialité) می؟! .. ده طوغروسی (جوهریتی substantialité) می؟! .. خیر!!.. شبهه سز او دکل!!.. او اولمش اولسه یدی، فلسفانک الک بویوک، ال مزعج (معمای لدنی énigme ontologique) بی- حل اولونمش بولونوردی؛ و او حالده ، ابعد الطبیعیات مناقشاتنه لزوم و حاجت

قالمازدی. دیمك كه (ماده) دیدیکمز شیده، بیلدیکمز اونك مادیتی، جوهریتی
دكل

نه در یا ؟ ...

انجق خواص و کیفیات محسوسه-سی در !. حتی (محسوسه sensible) ،
دیدم ؛ چونکه ماده-ده بزم حس ایده-مدیکمز بر طاقم خواص و کیفیات دخی
اوله-بیایر ؛ نته کیم اوله-بیلدیکنی کشفیات علمییه اثبات ایتشدر .

فی الحقیقه هر هانکی بر ماده اولورسه اولسون ، بنم اونده - اولا و بلا-
واسطه - ادراك ایتدیکم ، رنگ ، شکل ، رایحه ، طعم و یا خود سرتاك ؛
یموشاقلق ؛ پورتوك و یا خود قایباق اولمق ؛ صیجاقلق ؛ صوغو قلق ؛ آغیرلق ؛
خفیغلق ؛ بویوكلك ؛ کوچوكلك ودها بویوکی کیفیاتدرکه بونلری حواس خمسهمه
اسناد ایدرك طاقم طاقم آیره-بیایرم. آیره-نجه-ده آلتنده برشی قالماز !.. شو قدر
واركه ، بومدرکاتی - ینه !.. - برسبیه ، بر علت موجبیه عطف ایتك مجبو-
ریتندن قورتوله-مادیغم ایچون ، بر (قوت مجهوله) نك تاثیرینه حمل ایدرم .
(مادیت و جوهریت) دیدیکم شی، ایشته بنده ، بوتون بو حسیاتی ایقاع ایتدیکنی
دوشونمکدن - بردرلو ! - قورتوله-مادیغم، او (عامل مفروض l'agent sup-
posé) در. بونی واقعا، دوشونمهك بنجه و- ظن ایدرم، هیچ برکیمسه جه !
- ممکن دکلدر. فقط اونی انجق دوشونیورم؛ یعنی اوبرفکردن عبارت در! یوقسه
کوروب حس ایدوب طویدوغم، طوتدوغم، یالکمز بر طاقم اوصاف و کیفیاتدرکه،
اونلرك دخی نه اولماسی لازم کلدیکنی ملاحظه ایدنجه ، جمله-سی-ده ، بنده بر
طاقم (مدرکات حسیه perceptions des sens) یه منجر اولویور . مدرکات
حسیه-ایسه کیفیات نفسانیه-مدن، یعنی حالات روحیه-مدن باشقه برشیلر دکلدر!..
یالکمز برشی وار: بن بعضی خواص و کیفیاتی، هپ بردن، و بر یرده (متمرکز
Concentrées) و (متمایز Distinctes) اوله رف کوردوکم ایچون ، او (جمله
احساسات Groupe de sensations)، بر هویت، بر شخصیت ویریورم. مثلا
(الما) دییورم! فقط بومیوه. علومه-یی تحایل ایدرسهم، بوتون هویت معینه-سی،
مدرکات حواسه منجر اولویور . لکن بن او کیفیاتی هپ بردن و بر آنده

(مؤلف Combinées) اوله رق ادراك اينديكم ايچون ، اوکا (برالما) ديه رك برهويت ويريبورم وسائر مدرکات مدن اوشيشي آري طوتويورم... مواد معينه حقنده كي معلوماتي - بسيقولوژی نقطه نظرندن - تحليل ايدر - هم غالبا جمله سینه دائر ويره جگم حکم هب بويله اوله جقدر...!

ايسته افديلر...! بو مسئله لره حکم ايتمکه اک زياته صلاحيت دار اولان علم روحک - بعد اتدقيق وتحليل - ماده حقنده ويرديكي حکم ده بودر .

او حالده - بو حکم طوغرو وموافق حقيقت ايسه - بزم ايچون علي الاطلاق بر (جوهر مادي Substratum matériel) يوق...! بزم ايچون انجق شو ماده وبوماده وار...! اوده تحليل اولونونجه، بر جمله احساساته وياخود (پروفيسور هکسلي Prof. Huxley) نك - تعبير معنادر نجه - بر (حزمه احساساته = un faisceau de sensations) ه منجر اولويور . جوهر ماديتہ کلنجه، او ، بزده بو احساساتي ايفاع ايدن عامل مجهولک وياخود سبب مفروضک اسمي اولمش اولويور...! او قدر...!

بوملاحظات فلسفيہ بي البته (عقل سليم Bon sens)، يعني اکثریت ناسک اعتقادينه هيچ موافق بولمارسکيز ؛ او قدر غريبدر...! دکلي...؟ حالبوکه عوام ناسک (طاش طاشدر...! اغاج ده اغاجدر...!) ديمکدن عبارت قالان فلسفهي (که بن اوکا صيغير تماچ فلسفهي دييورم...!) ذهنمزي هر وجهله اقناع ايدوب - حقايق اشيايه دائر بزده جبلي اولان مراقي - تشفيه وتسکين ايدم بيلسيدي، بلکه بو غريب ملاحظاته مجبور اولمازدق! شبهه يوقدر که فيلسوفلر عقل سليمة موافق کورون اعتقاد عاميانه بي تحليله مجبوريت کوردکلري ايچون دوشونه دوشونه يو غريب فکر لره قدر وارم بيلمشلردر . سزه بر آز اول : مسائل فلسفيہ بي عقل سليم حد وندن اوده بولونه جغز ديمشدم . ايسته او ديدیکم سوزک معناسي بودر .

شيمدی بومسئله بي لايقيه قورجالاق ايچون بو بحثي تفصيل ايتمکه مجبورم . ايکنجي بابک برنجي فصنه (تمه) !

عناصر علميه مزي تشکيل ايدن (مدرکات ابتدائيہ Perceptions primitives) مزي تلقی ايدن حواسمردر ؛ ديه چوق کره سويله مشدم . لکن ،

اول امرده ويکنظرده [بسیط و عنصری Simple et élémentaire] ، ظن اولونه بیلن بر چوق مدرکتمز وارددرکه - بعدالتدقیق - اونلرک اویله بسیط اولمایوب (مؤلف Combiné) اولدقلری تحققیق ایدیور و (تحلیل بسیقولوی) ايله کیفیت ثابت اولویور . بویله اولونجه اونلری - معنای اصطلاحیسی ايله - (مدرکات) دن عدایده میز . زیرا مدرکات دیدیکمر طویغولر ، همه حال (آنی و بلاواسطه Immédiat) تاقی ایتدیکمر شیلردر . او خالده [عنصری و بسیط] درلر؛ اونلری بالاخره تألیف و ترکیب ایدن ذهنمردر. کذاک [حالی Actual] درلر یعنی شوا آنه منحصر طویغولردر؛ اونک ایچون بر حسن نه قدر بسیط اولورسه اولسون (خاطره Reminiscence) قیلندن اوله رق مشهور اولورسه، او بر حسن حقیقی دکل، و قیله ادراک ایدلمش بر حسن حقیقی نک (خیال Image) یدر. ایشته شوانجه فرقلر، بسیقولوی و فلسفه ده بک مهم و شایان نظر نقطه لردرکه اهل ایدیایرسه، مسائل اصلیه ده بر چوق اویغولر. نزاقلر ، بر چوق سؤقهملر حاصل اولور. نته کیم اولمشدرو آریجه - بر طاقم - مسائلک حدوتنه سبیت و بر مشدر. بونقطه ده دخی بوراده بر اشارت، بر (بال مومی) یایشدیروب بر اقیورم. صوکره بوکا عاقد مباحث کله جکدر . شیمدی شو قدر خاطره قالسین که مدرکات ، بسیط ، حالی و بلا واسطه حاصل ایده ییلدیکمز طویغولردر ، صوکره - بزم خبرمن اولمده دن! - اونلری ترتیب ایدن قدرت ذهنیه مزه (مدرکه = L'entendement) دیرلر. بومدرکات مرتبه و بوتون مستحضرات ذهنیه مزه معنا ویرن عقلمزده (عاقله La raison) دیرلر. اسکی فیلسوفلر، بونلری رومزده آیری آیری (قوتلر) اولق اوزره قبول ایدرلر و (ملکه Faculté) نامیله، هر برینه بر شخصیت مستقله استناد ایدرک وجود ویرلردی . حتی بونلره بعضاً (نفس) و (نفوس) دخی دیرلردی. بو اعتقاد واکا تملق ایدن تعبیرات؛ هپ ارسطونک (Energies == ἐνέργειαι) حفته کی نظریاتندن آلتش و عالمه انتقال ایتشددر . بو کون بو اعتقادک طوغرو بر شی اولمادیفی تحققیق ایتشددر. (ملکات) دیه حالا قوللانمغه مجبور اولدوغمز بو تعبیر - ارنق - ذهنمزه مستقلاً موجود، آیری آیری قوتلر معنانه کلیور. عینی روحک، عینی ذهنک مراتب فعالیتی اخطار ایدیور. ایلریده بونلره تعلق ایدر مسئله لر ظهوره کله جکدر.

ایکینجی فصل

- ۲ -

برنجی فصلده ، مذاکراتک نتیجه‌سنده خواص اجسامک ، مدرکات حواسه منجر اولدوغی و مدرکات مذکورہ تک دخی کیفیات نفسانیہ دن عبارت بولوندوغی آکلاشیلیور . بو سیاق نظر - اکر یا کاش دکلہ ! . . . - کائنات خارجیہ تک وجودینہ متعلق اولان بالجلہ مسائل اصلیه یی ، (حکمت طبیعیہ Physique) ساحہ دن پستیقرلوژی ساحہ سنہ نقل ایتیش اوله جغز ، و او مسائل حل ایدمیلک ایچرن او - احده تدقیقانه مجبور بواو . نه جغز . زیرا کیفیات اجسام دیدیکمز شیلر کندی وجداندرد پید اولان بر طاقم حسیات متفرقه و متمایزه دن عبارت قالور . بوراسی ، بللی باشلی برمرحلہ منفکدر . دوشونه لم باقم نه کپی مسئله لر فارشیسنده بولونه جغز ؟ !

فی الحقیقه کیفیات اجسام پستیقرلوژیک ک غامض مسائلندرد . نه پسته مواوژی نازره . سنده موضوع مناقشه اولان (نظریه علم) مباحثده دخی بو کیفیات مسئله سی اساسدر . تعلق اعتباریلہ ، کیفیات آرد سنده فرقلر کورولمش و بو فرقلر کوره اولاری تصنیف ایتمک ضرورتی حاصل اولشدر . کندی نفس زده ، و یاخود (کائنات مادیہ) دیدیکمز اجسام خارجیہ نسبت اولوندوغنه کرره کیفیاتک ایکی بویوک صنفه تقسیمی لازمکمشدر . فیلسوفلر ، اجسامک جوهریتنه عائد ظن ایتدکاری کیفیاتہ (خواص اولی) دیمشدر . طوغرودن طوغرویه اجسامه عائد اولمایوب حواسه تک خصوصی بر نوع اثر انفعالی اولق اوزره تلقی ایتدکارینه دخی (خواص ثانیہ) دیمشدر . حکمت طبیعیہ ده دخی ، خواص اجسامک بویوک بکزر بر تقسیمی وارددر . بعضی فلاسفہ معاصرین بو ایکی صنف خواص آرد سنده بر اوچنچی نوع احداث ایتشدر ، فقط مشته یی توضیح ایلمسکدن زیاده تشویش و تغلیط ایتشدر . (سروبیام هاملتن) ، (مہنسل) ، (سپنسر) ، و بو مسئله تک مناقشه سی . تاریخ فلسفہ یه بر نظر رجعی ، و بویوک فیلسوفلرک بو خصوصده افکار ذاتیلری . (دہ تارت) ، (جون لوق) ، (هیوم) ، (بارقله) ، (قانت) ، (شوپنهاوور) ، (سروبیام هاملتن) ، (میل) ، (سپنسر) ، (بئین) (هکسلی) (برادلہ) وغیرهم خلاصه کلام ، کرداب افکار .

بوابك - دهمین بكن - فصلنده ، مذاكره ايتديكمز بعضی مسائل غمومیه نتیجه‌سنده حاصل ایده‌بیلدیکمز فکدرلر نفس‌الامرہ مطابق ایسه یعنی طوغرو ایسه ، ینه بو مرحله تفکرده براز دیکه‌نوب ، کندیمزی طریقلامغه وتصفیة حساب ایتدکدن صوکره تکرار دوشونمکه مجبورز. فلسفه‌نک بالخاصه موضوع. عاتی تشکیلایدن (مسائل مغلقه Questions abstruses) بی - اولاء - کشف ایده‌بیامک ایچوز، موجوداتی نصل برنقطه نظاردن تاقی ایتدک؟!... - نانیاء - نیچون ، طبع سلیم حدودینی آشفه ، یعنی اعتقاد عامیانه‌دن آیرلغه مجبور اولدق؟! - ثالثاً ، - حقیقتی آرامق واستکنه ایده‌بیامک ایچون (پردہ بدهات Le voile de l'évidence) ی قیملداتیر قیملداتماز ، قارشیمزه نه‌کی مسائل عجیه چیقیوردی؟! - رابعاً ، - بو‌کی مسائلی نه‌کی شہلر تولید وایقاع ایتدی؟! - خامساً ، - عجبا او شہلر محق ومشروعی در؟. دکلّی در؟. یعنی بز ، انسانلر بدهاتاً مشاھرہ ایدوب بیلدیکمز وبیلدیکمز قناعت کاملہ ایله مطمئن بولوندوغمز شو عالم بدیهی‌نک کنہی آ کلامغه ، حقیقت لدنیہ‌سنی کشف ایتمکه قالفیشیر قالماز، ضروری وطبیعی اوله‌رق بو‌کی شہلرک کردابنہ‌می طوتولوبوروز؟. یوقسه بو شہلر محق، مشروع ، ضروری وطبیعی دکلده ، بزم یا ککش برنقطه نظر انتخاب ایتدیمزدن، یاخود فساد محاکمه‌مزدن، ویاخود معلوماًتمزک نقصانندن می‌نشأت ایدیور؟! یعنی ، بویله کیزلی حقیقتلری کشف ایده‌بیلمک ایچون، هنوز وسائط لازمیہ مالک اولمادیغمزدن می‌ایلری‌کلورده بویله عجایب معمالر قارشیمسندہ بولونیوروز!؟.

بونلر هپ دوشونوله‌جک شیلرد ؛ وبو نقطه‌ده جدآ دوشونمکه مجبور بولوندوغمز شیلردر!.. عوام ، واونلردن فرقی اولمایان خواص ، بو دورلو دوشونجه‌لرله معذب اولمادینی ایچون ، اصل فیلسوفانه دوشونمک ، بونقطه‌دن باشلار ؛ ددیہ‌بیلیم .

ذهن بشر، بویله زمین استنادی اولمایان برساحۃ‌ترده نفوذ ایتدیمی؟! قطعاً برطرفه توجه ایدوب‌ده برحکم ویرہ‌میور. چونکه حکمدہ مدار استناد اوله‌بیله‌جک یعنی ، امنیتله طایانیله‌بیله‌جک بر زمین متین بوله‌میور . فقط هر

حاله ینه عینی سبیدن ناشی اولمالی درکه موازنت فکریه سنی ده چوق مدت محافظه ایده میور و جزئی بر صارصیتی ایله صاغه صوله میل ایدیو بریور . بو میل ، هم نقطه نظر منری تعیین ایدیور ، همده مخا که مزك وادی جریانی - اولدن - چیزینور و کوستریور . ایشته بوکچی شرطاره تبعاً دوشونمکه مجبور اولونجه ، ویره بیله جکمز حکم ، ضروری اولوبور . فقط بودرلو مخا کما تمز ، (مقدمات یقینیه *prémises certaines*) یه مستند فرض اولونسه بیله ، تجربه ساحه سنده توقیف ایدیله مه دیکی کچی ، اکثریا منطق حدودی ده آشدینی ایچون ، نتیجه ده ویریلن حکمده او قدر لایتنزل اوله میور ؛ و ، برکت ویرسین ! - حکمزدن قولای قولای رجوع ایده بیلورز . اولک ایچوندركه ؛ بونوع حکملره مقارن اولان اعتقادات فلسفیه من ، - ماهیت و حیثیتری اعتباریله ! . . . - برر فرضیه اولمقدن عبارت قالبور .

هرنه اولورسه اولسون ! . مادام که ، بداهت ساحه سندن اوته کچوبده ، حد معروفي آشنجه ، بویله فرضیات منطقه سنده سرسری طولاشمغه مجبور بولو . نویورز ، هر حالده ینه دوشونه لم ؛ باقالم ، قارشیمزه دیکیان او مسائلک هانکیسی طبیعیدر ؛ هانکیسی وهمی در ؟ . . هانکیسی زمین نشاتنده نابت - قدم در ؟ . . هانکیسی اوفله مکله بیقیله بیلیر بر هیکل وهدر ؟ .

اولا ، باقه لم ، نقطه نظر من اکریمی ؟ . طوغرومی ؟ . . .

بز ، هانکی نقطه نظرندن حرکت ایتدکدی ؟ . . کائنات ماده دن دکلی ؟ . . (عالم طبیعت *Le monde physique*) ، (عالم حسی *Le monde sensible*) دیدیکمز بو موجودات ، بدیهی در . اونده شبهه من یوق ! . . بزده اوندن تاقی ایتدیکمز معلوماتی اساس اتخا ایدرك دوشونمکه باشلادق . بداهتندن شبهه ایندیکمزدن ناشی دوشونمکه مجبور اولماق ! . . بوراسنی ایجه آکلا یوب خاطرده طوتما کزی تمی ایدرم ؛ زیرا اکثر فیلسوفلر ، حتی نامدار فیلسوفلر بویله بر ظن فاحشده بولونویورلر : [بداهت عالم حقه - ده کی اعتقاد مزه شبهه عارض اولدوغی ایچون فلسفی دوشونجه لره طایورز ؛ حتی اوقدرکه - اولجه

بدیهی الوجود - ظن ایتدیکمز بو عالم مادینک نهایت وجود حقیقیسی بیله انکار ایدرك ، بوتون کوردوگمز ، طوندوغمز شیلرك بر خیال باطل اولدوغنه بیله قائل اوله ییلورزا!.. [دییورلر .

بن او یله دییورم !.. بن کوردیورم که ایلک خطای فاحش بو برنجی خطوه ملاحظه مزله باشلیور!.. بن؛ دییورم که عالم نامنه بیلدیکم برشی وار که بداهتاً وجودی ثابتدر . اوندن قطعاً شبهه ایدیه مز . و ، بن ، قطعاً شبهه ایتیورم . یالکمز ، بر مهم نقطه وار : بن او عالمی فصل ونه واسطه ایله بیلورم !.. البته حواسم واسطه سیله دگلی ؟... شبهه یوق که اوله در . اما ، ده یه جکسکمز که : (یالکمز حواسک اولسه یدی ، بو عالمی شیمدیکی بیلدیکک کچی بیله مزدک !. اونک حتمده بر - فکر!؟! - حاصل ایده مزدک !... عقلک اوله بو فکری حاصل ایدیورسک !.) یک اعلا!... وارسین اوله اولسون ، اونیده انکار ایتیورم . یالکمز ، شیمدی (وسائط علم - Moyens de Connais sance) بحثه عائد اولان بر مسئله مشهوره یی بوراده موضوع مناقشه ایتک ایسه میورم : [کاشانه عائد اولان معلوماتده عجبا حسک می ، عقلک می خدمت وساطتی اقدم واهمدر !..] سؤالنک جوانی - شیمدیک عن قصد - تأخیر ایدیورم . یاقینده بالخاصه واوزون اوزادییه اونکله مشغول اوله جتم؛ چونکه یری کله جکدر . فقط ، درحال وکال امنیتله ده یه بیلیرم که :

مادام که بزی شیمدیک مشغول ایدن وحلی مطلوب اولان مسئله ، (عالم خارجی Le monde extrinsèque) نک وارانته تملق ایدن معمار ؛ و مادام که او عالمی ادراک ایتک خصوصنده - اول باول ! - حواسمک خدمت وساطتی درکاردر ؛ اوله ایسه عقلک - حصول علمده - خدمت مخصوصه سی انکار ایتمه مکه برابر ، حواسمک - امر معرفتده - برنجی درجه ده بر رول اوینا - دینفده تصدیق و تسلیم ایتمه که مجبورم !... اکر حواسمک وثوق شهادته اعتماد ایدیورسهم ، - ننه کیم ایتمه مک بنجه ممکن دکادر ! - حواسمک ، عالم حقنده بکا ویردیکی معلوماتندن شبهه ایده م!.. فصل که بکا [بو کوردوگک ، طوندوغک ، الحاصل حس ایتدیکک شیلر واردر !..] دییور ؛ بنده

ایسانیورم . ذره قدر بونده شبهه ایتمیورم . لیکن ، [بو کوردو کک شیلر حقیقه تده کوردو کک کبی در ! . . . سن اولماسه یدک ، مثلا شو آغاچ ، شو طاش ، نفس امر دده بویه کوردو کک کبی بر آغاچ ، بر طاش اوله رق موجود بولونوردی ! . .] ایتمیور ! . . . وده یه مزده ! . . . زیرا ، بو ملاحظات حسک ساحه تعلقاتی خارجنده در ؛ یعنی (عقلک دوشونجه سی) در ؛ (حسک طویفوسی) دکلدر ؛ واوله ماز . چونکه طویفو قیلندن بر شی دکل ، آنجق بر (دوشونجه) در .

اوله اولونجه یا ککش محاکمه لرله جیقه ماز یولره صابماق ، ویاخود اوچو- روملره دوشمه مک ایچون نصل حرکت ایتمه لی یم ؟ . . نه یامالی یم ؟ . . هانکی نقطه دن حرکت ایدوب نرم لرده طور مالی یم ؟ . . .

ایشته معرفت بودر ! بوکا بز فلسفه لساننده (اصول Méthode) دیرز . بو اصوله اتباعاً دوشونور سه م آکلارم که ، حواسمک بکا اخباراتی - من حیث المجموع - طوغرودر ؛ شایان امنیتدر . فقط ویردیکی خبر ، (کائنات ماده) دیدیکم شیلرک ، آنجق (موجودیت حاضره Existence actuelle) سه عئددر ، واولرک شو آنده ! وارانی ادعاسنه منحصر قالمق شرطیله طوغرودر . یالکز بونده شبهه یه محل یوق ! . . .

لیکن ، فیلسوفلری علاقه دار ایدوب دوشوندورن مسئله اساسیه بونکله وبوقدرله بیتمیور ! . . بر شیک وارلغه اینامق باشقه ؛ علممک حقیقه ، نفس الامر تماماً و عیناً (مطابق Adéquat) اولدوغنه اینامق بانه شیدر ! . . فی الحقیقه ، طالله نفسمک مناسبتنه شعور حاصل ایدر ایتمز ، بومناسبتله نه خبر آله بیلدیکی ؛ بوتماس ایله نه ادراک ایله بیلدیکی ، دوشونورکن - حدی آشامغه جداً دقت ایدر سه م - او ، ویردیکم حکم طوغرودر ؛ وانجق او دائره یی آشامق شرطیله طوغرودر ! . زیرا حواسم ، بکا خارجه بر جوهر ماده نک ، یاخود ایجمده بر جوهر روحک موجود اولدوغنی دکل ، انجق بر طاقم (محسوسات خارجیه S.ens extrinsèques) نک وینه برطاقم (محسوسات

باطنیه (Sens. intrinsèques) نك موجود اولدوغنی - ویا لكز (حالی Actual) اوله رق موجود اولدوغنی !! - سویلو یور ! غایت صحیح و بدیهی اوله رق - حواسمدن - آلدیغ خبر و معلومات بوندن عبارتدر . ایشته بوندن هیچ شبهه ایتیمورم ؛ حتی اونی - فیلسوف اوله رق - موضوع بحث بیله ایتیمورم . بئم ایچون شیمدیلک حقیقتاً موجود اولان شیر ، انجق بونلردر ؛ و بو حیثیات واحساساتم وجدانمه دفعهٔ معروض اولان معطایاتدر . یعنی (ادراك)، دیدیکم (کیفیت وجدانیه Fait de conscience) ده (ذات وقه = Ipso facto) [*] انجق بو طویفولرمدر . بونلردن شبهه ایدنلر ، یا بدلادر ؛ یا دیوانه در ؛ یاخود ، - اسکی زمانك (ریبی sceptique) فیلسوفلری کی شارلاطاندر . [*] چونکه بونلری موضع اشتباهه دوشورمك کندی بنلکنی انکار ایتمکدر . حالبوکه کندی بنلکنی طویمقله برابر ، (او هویت شخصییه بالذات تشکیل ایدن، اوکا وجود ویرن) حیثیاتی انکار ایتمکه قالیشمق و، - بوانکار عنادی به رغماً !! - کوزل کوزل محاکمه لره کیریشمك البته شارلاطاناتق در . چونکه اوطوردوغنی دالی کسمکدر .

طویفولرمك حقیقتنده ، وجودنده هیچ شبهه یوق !! . حتی ، بکا او طویفولری ویرن حواسمك صحت ادراکنده بیله هیچ شبهه یوق !! . قدمای ریسیون، طویفولرندن شبهه ایتدکرنده حقلی بولونقلریخی - کویا اثبات ؟! - ایده بیلیمک ایچون ، حواسك (غلطات les illusions des sens) نی دلیل اوله رق ابراز ایتمکی عادت ایدنیشلردی . دوشونیمورلردی که بر دعوائی اثبات

[*] بو برهم تعبیردر . وقه نك کندیسی، ماده سی دیمکدر . لاتینجه سی تام ترجمه سیدر . فرانسزجه سی (la matière du fait)، انکیزجه سی ده (the matter of fact) در انیکیز فیلسوفلری بو تعبیری پك اهمیتله وپك برنده قوللانمی اعتیاد ایتشلردر .

[**] اسکی زمانلرده، بالخاصه سقراطدن بر آز اول ظهور ایدوب صوکره لری بر قاج عصر دوام ایدن برفرقه حکما واردی که تاریخ فلسفه ده منهوردر . بونلره (سوفسطایشه les sophistes) دیرلردی؛ (ریبی les sceptiques) لر بونلر میاننده برفرقه مشهوره نك اسمیدر . اسلام فیلسوفلری بونلره (لاادریه) دیمشلردی . بزبوکه لی (agnosticisme) تعبیریه تخصیص ایتدك وریجی لره دخی (حسابیه) دیدك . شیمه دیدنمکره او یله قوللانه جنم .

ایده بیلیمک ایچون ! - بهمه حال بر شیئك حقیقته اینامق و او شیئی هم نقطه
استناد، هم برهان احتجاج، همد مدار حکم اوله رق تلقی اتمک، و بونک ایچون
اوکا بر قیمت ویرمک لازمکلیر. هیچ بر شیئه اینانه مایان، حتی کندی وارلغندن شبهه
ایده بیلن (!؟) بر آدم، هیچ بر شیئه استناد و اعتماد ایده مز که اونی دلیل، حجت
و سند اتخاذ ایده بیلسین ده بر دعرایی اثباته - بحق ! - مقتدر اوله بیلسین ...!

غلطات حسیه یه کلنجه، بنم نظر مدده اونلرک ذره قدر حکمی یوقدر. بر تک
حسم یا کیه بیلیر؛ فقط هر زمان دکل، بعضی شرطلر داخلمده، بعضی کره یا کیه -
بیلیر ! لکن، اونک خطاخی دیگر حواسمک معرفتیه تصحیح ایده بیلیرم .
خصوصاً که بالجله حواسم، عینی زمانده وهله عینی صورته یا کیه ماز !.. بناءً
علیه بن، عالم خارجی حقننده معلومات صحیحه آلمق ایسترسیم بر تک حسمک
افاده شهادتیه اکتفا ایده م. - یوقاریده برنجی باده سویله دیکم کی - حواسم؛
برر (تجربید ما کنه سی Machine d'abstraction) در . اونلرک هیچ بری -
یالکز باشنه ! - بکا عالمک هویت تامه سندن خبر ویره مز . ولو که ویردیکی
خبرلر، (صرف انفسی Purement subjectif) بر طاقم معلومات اولسون، ینه جمله سی
عینی زمانده متفق و متحد و طوبولوجه بر خبر ویرملی درلر . ایشته بن یالکز
اوکا اینانیرم . یالکز اوندن شبهه اتم !.. یعنی آیری آیری، هر حسم، بی،
بر وجهله آلدانه بیلیر، زیرا غلط ایشلیه بیلیر . فقط اونلرک (محصله افاده سی
la résultante de leur expression) بهمه حال طوغر ودر . هر خس، وارلغک
- هویت تامه سی دکل، - انجق بر جلوه سی بکا بیلدیره بیلیر؛ و بعضاًده یا کلش
بیلدیره بیلیر. فقط در حال دیگر بر حسم او یا کلشنی اخبار ایدر و - عقلم !! .
بالحا که !! - اونی تصحیح ایده بیلیر . حتی عینی حسم کندی غلطاتی بالذات
دخی تصحیح ایده بیلیر . مثلاً براق ورا کد بر صویه باسطونمی صوقونجه،
صویک سطحنه مماس اولان نقطه سنده اونی قیریق کورورم ! بو، شبهه سز
بر غلط حسی در . فقط او باسطونی صودن چیقاروبده المله - یعنی دیگر بر
حسمله ! - تحقیق ایدنجه ایلک منظره نک بر غلط رؤیتدن نشأت ایتدیکنی
یقیناً آ کلارم، زیر باسطونک قیریق اولمادیغنی حس ایدرم. لامسه نک قونتروله

حاجت کورمه دن دخی بو تحقیقاته موفق اوله بیلیریم . صودن چیقار چیقماز - ینه کوزمله - باسطونمه باقارسه هم قیریق اولمادیغنی کورور ، یقیناً آ کلارم . دیمک که غلطات حسیه نك غلط اولدوغنی یعنی طوغرو اولمایوب یا کلش برشی اولدوغنی تصحیح ایدن وهیچ اولمازسه غلطاتی تصحیح ایچون عقلمه ، طوغرو خبرلر وصا غلام دلیللر ابراز ایدن ینه بالذات حواسمدر . اونلره نصل اینانما . یه بیلیریم ؟! . صوکره اونلرک انحق محصله سی طوغرودر !.. دیمشدم . البته او یله در !.. چونکه محسوسات آیری آیری تلقی ایدلیکی تقدیرده انحق بعض کیفیات مجرددن عبارت قالیر ، رنگ کبی، قوقو کبی ، یوموشا قاق ، سرتلک وامثالی کبی حالبوکه بو کیفیات مجردنک عالم خارجیده ، بویه آیری آیری موجود اولدوغنی کورمک و بالفعل تحقیق ایتمک شویله طورسون، دوشونه بیلیمک بیله وهم وخیالزک ، قدرت تصورمزنک خارجنده در . بو نك سبب معقولی - بنم اعتقادجه ! - عالمده هر نه موجود ایسه ، اونک انحق (مشخصاً Con- crètement) موجود اولماسی در . اونک اوصاف و کیفیاتی ، یعنی (تطورات وجودنی les modalités de son existence) آیری آیری تلقی ایدن ، بزم کندی (حاسه Sens) لریمزدر . لکن اونلر حد ذاتنده طوبلو بولونور . بزدهنی بر (شی) حقنده بوتون حواسمزدن خبر صورارسق اونلرک محصله معلوماتی طوغرودر؛ و بونده غلط احتمالی یوق کبی در؛ چونکه حواس متقابلاً یکدیگری قونترول ایتدکن صوکره بالاتفاق و بالاتحاد بزه اوشی حقنده - ویره بیله جکی کبی، و ویره بیله جکی قدر! - خبرویرر . لکن بو خبر یالان دکلدر؛ و خارجه کی موجودات منفرد کبی (مشخص Concret) در. بزه ممکن اوله بیلان معلومات ابتدائیه نك طوغروسی ده بو اوله بیلیر .

بو بابک برنجی فصلنده وایکنجی فصلک مقدماتنده بالجمله معلوماتی تحلیل ایده ایده زمان مکان ، کبی بر طاقم ارکانه طایانمش طوره مشدق !.. صوکره اونلری تحقیق ایدنجه ، موجودات حقیقیه به بکزه ته مه مشدک !.. مع مافیه یکدیگرندن بوسبوتون آیری و مستقل اوله رقه تصور ایده مدیکمزی آ کلامشددق !.. او یله دگی ؟...

بو غرابتك سببی - ینه بگا - صورارسه کز، بلا پرواسمه دهیه بیایرم که،
 شو شیمدیک ویردیکم تفصیلات او سببی میدانه قویمشدر، یعنی موجوداتک
 آیری آیری خواص و کیفیات صورتند دکل، بر (کل مجموعی Un tout compact)
 اوله رق (مشیخصاً Concrètement) موجود بولونماسی بوکا سیدر.
 وارلنک (تطوارت محسوسه Modalités sensibles) سی آیران بزم حواسمزد.
 حواسمزك ذاتاً وظیفه سی بودر. اونك ایچسون بز، یا کیلوب زمانی مکانی،
 قوتی، ماده یی، رایجه یی، شکلی، رنگی، یوموشاقلنی، قاطیلنی صیجانی،
 صوغوغنی، طاتیلنی، آجیلنی، آیری آیری و باشلی باشنه موجود شیلر ظن
 ایدیورزو فاحش بر (تجرید خطاسی une erreur d'abstraction) نك قربانی
 اولویورز. اکر حسلرمزدن شبه ایدم جکسه ك، اونلرك ویردیک معلومات
 عنصریه و ابتدایه دن دکل، (تجرید Abstraction) خصوصنده اجرا ایتدکاری
 فسوندن شبه ایتملی ز!... یوقسه ویردکاری معلومات عنصریه بزم کیفیات
 اشیایی - طاقم طاقم، صنف صنف، جنس جنس - بیلدیریور. بو طوغرودر.
 فقط باشلی باشنه صوغو قلق، صیجاق قلق، اکشیلک، طاتیلق، حرکت فلان
 یوقدر. انجق اکشی، طاتلی، صوغوق، صیجاق و متحرک بر (شی) لر واردر.
 و بو شیلر یالکیز بو کیفیت واحده ایله ثابت و موجود دکلدر لر، عینی زمانده
 دها برچوق کیفیاتی ده حائزدر لر که اونلری ده دیگر حواسه زله تاق و تحقیق
 ایدم بیلیرز. ایشه بو قدر!

بوقدری انجق طوغرودر، و بوقدری ده (حسبانیون les sceptiques) که
 معهود دعوی باطنی رد ایتمکه کفایت ایدر.

صوکره غلطات حسیه نك و جودی سلامت حس احتمالی ده تضمندر؛ چونکه
 برطاقم مدرکاتک غلطات مقوله سندن اولدوغنی تحقیق وتمیز و اثبات ایدن، اول
 امرده سلامت حسدر. او یله اولماسه یدی حس سلیم ایله حس غلط آره سنده
 فرق کورده مزدك!... حالبوکه کورو یورز! حتی کندی واراقلرندن شبه
 ایدن حسبانیون بیله بو فرقی - پك اعلا! - ادراک ایدیور لر که (دعوی
 سفسطی Thèse sophistiquo) لرینی اثبات ایچون غلطات حسیه نك وقوغنی

(عمده مدعا) اتخاذ ایدرك اونی بر دلیل قوی کبی قوللایمق ایستورلر .
 فقط بنجه غلطات حسیه نكده فلسفی بر قیمت ذاتیه سی واردر . اونلر
 کیفیت ادرا کده (صورعلمیه les formes de la connaissance) نك بر طاقم
 شروط خصوصیه تابع و باغلی اولدوغنی کوستیرر و اثبات ایدر . را کد و بر آق
 بر صویه باسطونکزی صوقدیفکمز زمان ، صویك تماس نقطه سنده باسطونی
 قیریق کورویورسکمز ، و بوکا بر غلط حس دییورسکمز! طوغرو!
 لکن بر میلیون ، ایکی میلیون دفعه ، باسطونکزی عینی شرائط داخلنده صویه
 صوقسه کمز ، امینم که هب عینی صورتده و عینی نقطه ده اونی قیریق کوره چکسکمز ..
 حتی بونی پک بویوک بر امنیتله سویلیورم ؛ چونکه قانونلری واردر ؛ و کشف اولومشدرا .
 دیمک که شروط رؤیت دائماً بو صورتله تحقق ایتسهیدی ، دائماً بو غلط رؤیت ،
 بزم ایچون بر امر طبیعی اوله جقدی ، و بونی بر حس غلط دکل بر حس سلیم
 ظن ایدوب کیده جکدک!

غلطک بویله سی ، پک اهمیتی بر حادثه اسیقو لوزیه در ؛ مبحث معرفده بر بویوک
 قیمتی حائرر . ادرا کک بعضی شروط معینه داخلنده وقوع بولدوغنی - قوانین
 طبیعییه استناداً !! - اثبات ایدیور .
 او حالده!

یا بزم حس سلیم دیدیکمز مدرکاتمزده بویله بر طاقم شروط خصوصیه ایله
 مقید و بناء علیه بوتون انسانلر ایچون عمومی و تحقیقی ، تصحیحی نا قابل بر غلط
 ایسه ، بر (grande illusion) ایسه ، هند فیلدوفلرینک ادعاسی کبی بر (Māyā
 بویوک فسون) ایسه ؟؟؟!

ایشته ، طولامباج یوللردن ینه اک بویوک معما قارشیسنه چیقدق!
 اکشیک ، طاتلیق ، صیجاقلق صوغوقلق بر کیفیتدر ؛ فقط بو کیفیات
 موجودات مستقله دن دکلدر . دیمشدک . زمان و مکان دخی او یله برشی کبی
 کوروندی ایدی . عجبا حقیقتاً بونلرده او یله بر طاقم کیفیات مجرده دئمیی در ..!
 دکلی در ؟. اکر او یله ایسه اونلر خارجه د یوق اولمق لازمکایر ؛ بویله اعتقاد
 ایدرسه ک بوتون موجودات بر نقطه هندسیه ، بر صفره منجر اولور . حالبوکه

بو باطل بدیهی در . بونی تصور ایده می‌یز . چونکه بزده بو حقه نك آلتنه کیدر محو اولورز. حالبوکه شو آنده موجود بولونمقدمه اولدوغمز ، ذره قدر شبهه گوتورمز، بر کیفیت بدیهه در. بناء علیه زمان و مکان کیفیاتدن معدود اولسه بيله، سائرلرندن فرقلی کورونویور بونده ده بر معماوار ... البته !. وار !.

شیمدی ده بونی مذا کره ایتک ایسترم !
طبع سلیمه موافق اولان اعتقاد عامیانه دن نیچون و فصل آیرلغه مجبور اولدو. غمزی - شو ملاحظاتم ایله - البت اکلامش سکزددر . سطحی بر نظر اطه نشان ایله کاشتی - اولدوغی کبی دکل ، فقط کوروندوکی کبی ! ... - تاقی ایتکدن حاصل اولان بو اعتقاد عامیانه، غافلانه بر ظن در . هم قابا بر ظن در ، اوکا بر حیثیت واقعه، بر قوت فائقه و برن کیفیت، بو ظنك، انسانلر آره سنده (عمومی Général) اولماسیدر . بوده پک طبیعی در؛ چونکه قوجه سعدی* شیرازی نك دیدیکی کبی :

بنی آدم اعضای یکدیگرند ،

چو در آفرینش، زیك گوهرند !... [*]

فقط کیفیتك بویه اولماسی اکثریت انسانیه نك اصابت نظری نه درجه اثبات ایدرسه، غلط رؤیتنه دخی او نسبتده دلیل اوله بیلیر. یعنی بو کیفیت - حق و حقیقت بخشنده - برهان اولمقدمه بر قیمت مطلقه یی حائر دکلددر. هله بو کون علمك ترقیسی ایله - بالتجربه ! - ثابت اولمشدرکه علم و فلسفه مباحثنده طبع سلیمه (یعنی ظن عمومی به) استناداً احتجاج ایتک، علمك و حکمتك روخنه بییکانه اولدوغی اثبات ایتکله بر در . بو خصوصده (عقل شخصی) نك ده او قدر یاردیمی یوقدر. زیرا غایت ذکی آدملر واردرکه منحصرأ بو وادیده تحقیقات

[*] کاستان و بوستان صاحبی مشهور سعدی* شیرازی بو حکیمانانه سوزلری کاستانده سوبله مشدر انسانلر یکدیگرینک اعضا - سیدرلر؛ یعنی عینی وجود عضوینک اعضا سیدرلر. چونکه عینی جوهر دن عینی حامور دن یارادملشلردر؛ دیکددر. حتی عینی صورتله یارادملشلردر دخی دیه بیلیر .

اجرا و معلومات خصوصیه اکتساب ایتدکاری ایچون ، کائنات حقنده کی ظن عمومی بی تصحیحه مدار اوله بیله جک کشفیات علمیه و حقایق جزئیه دن بی خبر قالمشردر . مثلا :

اون مترو اوزاقده مشاهده ایتدیکمز بر اغاجی هر ایکی کوزمزه دخی آیری آیری کورمکده اولدوغمزی بیلیرز؛ بونی بیلیمک ایچون کیفیتی علمادن ضرور و دانشمغه حاجت کورمه یز!.. فقط او آغاجک خیالی هر ایکی کوزمن دخی عینی مسافده کورمن. بر کوزمن دها اوزاق دیکری دها یاقین کورور، چونکه تمامیه هر وجهله بر برینه متوافق ایکی کوزیوق کی در. ساحه نظرده مختلف مسافلرده وضعیت آلان شو ایکی خیالی - ذره قدر خبرمن اولمادن! - آلت بصرمز تسویه ایدر؛ یعنی عینی مستوی به عینی سویه کتیره دک تصحیح ایدر و - نوعا - ایکی کوزله آیری آیری واقع اولان تحمینمک وسطی سنی آلیز. اوندن صوکره - ینه ذره قدر خبریمز اولمادن! - ذهنمز، هر ایکی شبکه عینیهده مرتسم اولان او ایکی خیالک - خارجده - عینی آغاجک صورتی اولدوغنه حکم ایدر. انحق اوندن صکره او آغاجی کورمش، ادراک ایتمش اولوروز. لکن بوتون بو عملیات فیزیولوژی و ذهنیه، او قدر کیزی، او قدر چابوق اولورکه، بز اونک وقوعی هیچ بر وجهله استشعار ایده مه یز. اونک ایچون او آغاجی هر ایکی کوزمزه بردن، عینی موقعده و عینی مسافده - همده دفعه و آنی اوله رق - کوردو کوزه کمال اطمئنان ایله اینانیرز. حالبوکه بو بر ظن باطلدر. بو ظن ایسه عموم انسانلرک قویم بر اعتقادیدر. معافی (پسیقوفیزیولوژی ده (Psycho-physiologie) ده (انطباق Accomodation) [*] پسیقوفیزیولوژی (Inférence، کیزی محاکمه = قیاس خفی) مسئله لرندن خبردار اولمایانلر - نه قدر عقلی اولورسه اولسون - بو سره واقف اوله ماز؛ و باطل اولان

[*] تألیف ایتکده ، لوندوغم مفصل قاموس فلسفی ده (illusion) (adaptation) (accomodation), (inférence) کله لرینه باقارسه کز فائده لی تفصیلات و ایضاحات بولورسکز.

ظن عمومی به تماماً اشتراك ایدر. حتی بو ظنه مربوطیتی، جهلی نسبتنده قوی در ده به بیلیرزا! ...

او حالد، بن شو (انطباق و قیاس خفی) کیفیتلرینه ایماصورتیه، قالدوب ده غزنه لر مزك یرته بر مقاله یازسه م؛ و دیسه م که :

[بوتون انسانلر ، اول امرده شاشی کورور . مثلاً هر ایکی کوزیه عینی آغاجک خیالی، آری آری، ایکی کورور . برکت ویرسین ، اکثریت ناس بو شاشیلنی هان تصحیح ایدرلرده کوردکاری او آغاجک خارجد (بر، تك!) اولدوغنه حکم ایده بیلیرلر . حالبوکه شاشی دیدیکمز آدملر ، تشکلات عضویه جه بعضی قصورلرندن طولانی، بو خطایی بالفعل تصحیح مقتدر اوله مازلر . معافیة محاکمات ذهنیه ایله ینه بو غلط رؤیتی تصحیح ایدرک بر وعینی آغاجی کورمش اولدقلرینه حکم ایدرلر .]

بو ادعاه قارشی کیم بیلیر ؟ . اکثریت ناس عنندنه فصل بر مظهریت قازانیردم؟! . احتمالکه دیوانه اولدوغمه حکم ایدنلر بیله بولونوردی . حالبوکه - تحقیقات علمیه و کشفیات تجربیه به نظرآ - ایشک طوغروسی، دیدیکمز کی در! هرفردک (ساحه نظر = Champ visuel) ی حقنده واقع اولان تجارب علمیه اثبات ایدیورکه هرکس باقیور(!؟)؛ فقط ساحه نظرنده موجود اولان بر چوق شیلری کورمیور(!؟)

خلاصه بوتون بو کیفیات ودها پک چوق اولان امثالی اثبات ایدیورکه طبع سلیم دیدیکمز شی، عوام ناسک (ظن غالب) ی در؛ و بو حیثیتله علم و فلسفه ده قسطاس حقیقت اوله ماز . اوله اولونجه ، نیچون طبع سلیم حدودینی آشمقده و پداهتک ماوراسنده طولاشمقده نیچون مجبوریت کوردوکنز دخی - اسبابیله و معذرتیه ! - اکلاشیلیر .

برده بداهتی قیمیلاتمقده کی مجبوریتیزی دخی عینی سبیلره عطف ایده بیلدیکمز کی، او پرده نك آرقه سندن بویله بر طاقم مسائل غریبه نك ظهور ایدیوریشی ده - بو سفر! - پک طبیعی بولورز ؛ یعنی هیچ ده غریب بولمیز! ...

بو مسائلدن هانکیسینک طبیعی اولدوغی دخی - بوندن صوکره باشلایه جق اولان - محاضرات و ملاحظاتمز صیره سنده - ممکن اولدوغی قدر - تبین ایده بیله جکدر .

بوتون بو مسئله لری (حکمت طبیعی Physique) - ساحه سندن آلوده (پسیقولوژی) ساحه سنه نقل ایتک مجبوریتنده دخی ینه عینی سبیلر واردر : بدیی درکه مسئله، ادراک مسئله می در بو و بوکا، عائد بوتون معمارلر و سائر مسائل تالیله بالخاصه پسیقولوژی علمنک موضوعاتندندر. علی الخصوص خواص و کیفیات اجسام، تحلیل اولونورسه، نتیجه ده اولنرک حسیاتدن عبارت اولدوغی تحقق ایدیور. او حالده بز، خواص اجسامی، بر حکمتشناس نظریله دکل، بر پسیقولوغ نظریله - بوراده - تلقی و تبعه مجبورر .

اولجه، [پسیقولوژی ایله فلسفه یی، بعضی انکلیز متفکرینی برطوتمش لر] دیمشدم، ظن ایدرسیم شیمدی ارتق بو یا کاشلغک سبب حقیقی سنی ده اایی کلا دیکیز. یعنی بو کبی مسائل فلسفه یه نک طبیعی اولان ساحه مناقشه سی پسیقولوژی دائره سی اولدوغی ایچون، انکلیز فلسو فلرندن بعضلرینک انجق شوسیدله بو خطایه دوشمش اولدقلرینی ده اایی اکلامش سکزددر !

شیمدی، سویله مش اولدقلریمی تحکیم ایچون بر بویوک فیلسوفک سوزلرینی استشهداً ذکر ایدرک بو بحثی براز ده ااییلری سوره جکم .

(ستوئت میل)، ادراک مسئله سنده جسم و خواص و کیفیات حقنده باقیکنز فصل دوشونویور و کائنات مادییه یی فصل تلقی و تحلیل ایدیور. بو بحثه دائر اک مهم ملاحظاتی، سزه، عیناً نقل ایدیور :

« بو بحثک موضوعی حقنده بیان ایدلمش اولان و یا ایدیله بیلن افکار و ملاحظات مختلفه یی تدقیق و امتحان ایدرکن، یالکنز جسمانی و مادی شیرله »
 « حصر نظر ایلر سه ک مسئله یی ده ااییسیت و ده اایی واضح بر صورتده عرض ایتش اولورر. شبهه یوقدر که بوتون اشیا، بزه حواسمز واسطه سیله، معلوم اولویور. »
 « اشپای مادییه متعلق اولقی اوزره هر نه اوکر نه بیلیور سه ق، انجق بو مجرالر

« واسطه سیله اوکره نه بیلورز ؛ باشقه واسطه لرله دکل ! حواسمز اولماسه یدی
 « اوکی شیلرک وجودندن خبردار اوله مازدق ؛ حتی اونلرک وار اولدقلرینه
 « دائر جزئی بر ظن بیله حاصل ایده من ایدک ! اونلرک نه اولدقلرینه دائر
 « حواسمزک بزه سویلدیکندن باشقه برشی بیلمه دیکمز کی ، بوندن زیاده سسنه
 « مطلع اوله بیلمک ایچون ، طبیعت دخی بزه هیچ بر واسطه ویرمه مشدر . شو
 « سوزلر معنای عادسی ایله تلقی ایدیلیرسه ، کیسه بو حقیقتی انکار ایتیز ؛ هر
 « نه قدر بونی بر باشقه درلو افاده ایتیمکی ترجیح ایله بن متفکرین وارسه ده... »
 « حالبوکه اشیا حقنده بزه حواسمزک نه سویلدیکنی ، نه خبر ویردیکنی
 بیلمک مـ . مثله سنده ، متناقض فکرلر واردر . حواسمزک بزه ویردیکنی معلوماتک
 بر قسمی ایچون وسیله مجادله یوقدر : حواسمز ، بزی احتساستمزدن خبردار
 ایدیور . بونده شبه یوق !... اشیا خارجه ، بزه بعض احتساستات ایقاع
 ایدیور ؛ ویا خود وجدانمزد بوض حسساتی تهیج ایلور . اشیا ناک بزه
 وقوعه کتیردیکنی احتساستات ، او اشیا حقنده کی معلوماتمزدک هیچ اولمازسه بر
 قسمی تشکیل ایدر . کیفیات اشیا دیدیکمز خواص ، او شیلرک بزم وجدانمزد
 حسبات حصوله کتیرمک خصوصنده کی قابیلیتی در . بزه پک معلوم بر مثال ،
 فرضا بر پورتقال آلهلم ، واونی تدقیق ایده لم ؛ بو ماده صاری رنگده در ؛
 یعنی باصره من واسطه سیله بزه خصوصی بر حس لون ایقاع ایدر . یوموشاقدیر ؛
 یعنی حاسه عضلیه من واسطه سیله بزه بر مقاومت احساس ایدر که جزئی بر قوت
 ایله اوکا غلبه چاله بیله جکمز اکلارز . طائیلدر ؛ زیرا ذائقه من واسطه سیله
 اوندن خصوصی بر ذوق طویارز که خوشدر . شکلی یووارلاقدر وایکی قطبی
 آرز چوق باصیتجه در . بونک بویله اولدوغنی ، بزه ایقاع ایتدیکنی حسساتک
 شهادتنه بناء تصدیق وتسلیم ایدرز . واقعا بو حسساتک منشای موضوع بحث
 ومجادله در : اونلر (یعنی اشکاله متعلق احتساستات !) اول امرده یالکمزلامسه
 وحاسه عضلیه ایله می تلقی ایدلمشدر ؟ یوقسه باصره نکه ده بو خصوصده دخلی
 وارمی در ؟ بونی بیلمک ایچون حالا پسیقوولوغلر مناقشه ایتمکده درلر . (ایشته

بو هنوز مختلف فیه بر مسئله در! پورتقالی صویدوغمز کبی، اجزا واقسامنده بر ترتیب مخصوص اولدوغنی کشف ایدرزکه اوده اقسام مذکورہ نك بر برندن باشقه، یعنی آیری غیري اولمسيله اكلانیلیر. فقط بو فرقك بزجه هیچ بر انباتی یوقدر، شوقدرکه او اقسامك هربری بزده یکدیگرندن فرقلی حسیات ایقاع ایدر. (یعنی او اقسام اراسنده فرق اولدیغنی اكلامق ایچون احتساسات فرقندن عبری دیلمز یوقدر!) پورتقالك قابوغنی، لی، عصاره سی، دنك، لذت، قوقو وقوام اعتباریله (یعنی تضییقه قارشى درجه مقاومت اعتباریله!) فرقلیدرلر. بونلر اولیله برطاقم کیفیاتدرکه جمله سی ده حسیاتمزده ادراك ایتدیگمز فرقلدن عبارت قالیر. فضله اوله رق پورتقالك اقسامی یکدیگرندن خارجدر. یعنی مکانك مختلف اقسامی اشغال ایدرلر. بو فرق، (یعنی عدم تنافذ کیفیتی) بیله احتساس فرقنه منجر اوله بیلیر؛ دیه ادعا ایدنلر واردر. کرچه بو ادعا شدتلی تعریضاتی دعوت ایتمش ایسه ده... شو تحایلدن صوکره ده نیله بیلیرکه اشیایه حل واسناد ایتدیگمز اوصاف، بزم وجدانمزده درلو درلو اختساسات اوایندیرمق قابلیتندن عبارتدر. ادعا اوله بیلیرکه، کیفیات اجسامك معنایى بودر؛ بزم ایچون بر جسم، بوجه مخصوص اوزره حواسمزه اجرای تاثیر ایدن برشی در. باشقه دكل!.. (جسم وشى) کله لرینه باشقه بر معنا ویرمکه مقتدر دكلز. حتی نظر مزده موهوم بر ماده بیله، حواسمزه یکی بر صورت اوزره تاثیر ایده بیله جك برشی حقننده حاصل ایده بیلیدیگمز بر تصورندن عبارتدر. شو وجهله که: كرك اشیای حقیقییه دائر، کرکه بالذات او اشیا حقننده حاصل ایده بیله جگمز توهانه دائر، معلوما تمیزی تحلیل ایدرسك، کورورزکه هپ بیلیدیگمز، بزده او شیلرك ایقاع ایده بیله جکلری حسیاتدن مرکبدر. ویاخود ایقاع ایده- بیله جکلرینی ظن و تخیل ایتدیگمز حسیاتدن مرکبدر. ،

ستوارت میلک ملاحظاتی عیناً ادا ایده بیلمك ایچون سوزلرینی حرفیاً ترجمه ایتدم؛ اسلوب افاده یه باقادم. عینی ملاحظاتی (بارقله Berkeley) ، (بهین Bain) ، (براون Brown) ، (برادله Bradley) ، (رید Read) ،

(لانکه Lange) ودها بر چوق بیوک فیلسوفلرک آئارندن نقل و اقتباس ایدمه بیلیردم. فقط لزوم و حاجت کورمدم. چونکه دعوالری اساساً بر در ؛ و بو دعوائی ده بسیقولوزی علمی تصدیق و تحکیم ایتکده در .

بوندن آکلایورز که بر جسمده ادراک ایتدی کمز شیلر، انجق ادراک ایدمه بیلدی کمز کیفیاتدر؛ یعنی او جسمک انجق بعض حواس محسوسه سیدر . بو نقطه مهمه یی - بر قاج صحیفه اول - نظر دقتکزه حواله ایتشدم؛ چونکه او جسمده، بئم هنوز حس ایدمه مدیکم کیفیات دخی اولایلیر . بو احتمال عقلاً مستبعد دکدر. زیرا کورو یورم که حیوانات سفلیده حواس، بئمکی قدر مشوع و مکمل دکل؛ مادام که هر متحسس ایچون انجق بو حواس، آلات ادراکدر؛ احوالده عینی شیده بئم حس و ادراک ایدمه بیلدی کمز کیفیاتک جمله سنی، بر بوجک بئم قدر وحتی بئم کی حس ایدمه میه جکدر؛ و ایدمه میه لازمکلیر] شو تقدیرده بئم شمیدیکندن فضله حواسم، یعنی آلات ادراکم اولسه یدی، بلکه شمیدی شو کوردوک شیلزده . هنوز کورمه مدیکم سه زمه مدیکم بعضی کیفیات ده حس ایدمه بیله جک ایدم . بونده هیچ شبهه یوق ؛ چونکه یالکز بو منطقی و قیاسی ملاحظه ایله اکتفا ایدمه رک بویله بر حکم ویرمیورم . تجارب و تحقیقات علمیله بیلدیورم و تسلیم ایدیورم که بویله در. مثلاً کوزم بالجه شعاغانی ادراک ایدمه میور. طیف شمسی ده، مائی و قرمزی ضیانک ماورای حدودنده بعض شعاعات ده و ارکه، یالکز کندی آلات بصریه مله طوغرودن طوغروه ادراک ایتمکلکم بئم ایچون ممکن دکادر؛ و بو بر حقیقت علمی ده که شبهه کوتورمز؛ چونکه ده مین سوبلیدی کمز کی - تجارب مکرره و تحقیقات علمیله ثابت اولمشدر . بناء علیه اشیاده ادراک ایتدی کمز کیفیات، انجق بئم ادراک ایدمه بیلدکرمدر ؛ و سونوت میلک مثالندن واکا بناء عرض ایلدیکی ملاحظاتدن اکلاشیلور که خارجه بیلدی کمز او کیفیاتی، ماهیتی اعتباریله تحقیق ایدرسه جمعه سی ده بنده بر طاقم حسیاتدن عبارت قالیور. دیمک که طویغولرملک صور خارجه سنه کیفیات، صور وجدانی سنه ده حسیات دیورم. بناء علیه عینی طویغوی بری (آفاقی objectif)، دیکری (انفسی subjectif) اولق اوزره ایکی وجهله تلق ایتش اولویورم.

فقط طویدوغم بیلدیکم هپ بردر. اوده کندی حسیاتم، کندی حالات وجدا. نیه مدر. باشقه بر شی دکل ! . . . بدایت امرده اتخاذا ایتدیکمز نقطه نظره کوره، ویردیکمز بو حکم، ضروریدر. او حالده بو تحقیقاتمه نظراً بر جسم، بزم جسمه کوره نه اولمش اولویور ؟ ! . . . دیه دوشونمکدن کندیمی آله میورم. و او سؤاله قارشی : (وجدانم مواجهه سنده، جسم بر مجموعه احتساستدن عبارتدر.) قضیه سندن باشقه بر جواب بوله میورم. فصل که ده قارتدن برآز صوکره واندن بری بوتون سوژه قتیوزم فلسفه سنک جوابی بو اولمشدر. فقط بو جواب، نه قدر صواب اولسه، کندی حالات روحیه مزه نظراً بر جسمده کی کیفیاتک هیئت مجموعه سنی اشعار ایتمکدن عبارت قالیور. لکن بز جسم دیدیکمز زمان، اونده یالکمز کیفیاتنک هیئت مجموعه سنی مراد ایتمیورز؛ ماده سنی ده قبول و تسلیم ایتمش اولویورز. او کیفیات محسوسه نك نقطه تعلق وزمین استنادی اولق اوزره برده (جوهریت ماده Substantialité matérielle) دوشونیورز؛ و دوشونمه نك الیزده دکلدر. مادام که وسائط ادراکمز ویکانه آلات اطلاعمز اولان حواسمز، بزه آنجق جسمک کیفیاتی عرض ایده بیلیمز، و مادام که بز، جوهریت جسمانی بی حواسمزله ادراک ایده میور ایتمز، او حالده فصل اولویورده بر جسمده، یالکمز خواص و کیفیات تلقی ایتمکله اکتفا ایده میورزده بهمه حال اونک بر ماده سی، بر جوهری یعنی او کیفیتک مسند الیمی اولدوغنی برآنده تسلیم ایتمکدن کندی میزی آله میورز ؟ ! شوقدیرجه، بوتون کیفیات ادراکده اصل اولان کندی احتساستمزددر. میلک نك صریح اولان ادعاسنه کوره (عملیه ادراکده ییکانه حقیقت کندی طویغولرمزددر.) بلاواسطه تلقی ایتدیکمز بیلکی ایشه بودر؛ و بو قدردر ! بوکا عربلر (علم ضروری) دیرلردی. بونده جوهریه اطلاع حسی و فکری هنوز یوقدر. بو، انجق سببیت علاقه سیله کلیمز، (انفعالات ذاتیه مزه سبب اولسی لازمکن بر فاعل مؤثر) دوشونمک مجبوریتدن طویغویور. او حالده بو سببیت علاقه سنه اهمیت ویرمه یئرلر و یا خود احتساستات ذاتیه مزی بر جوهر مؤثره اسناد ایتمکده حاجت کورمه یئرلر ایچون فلسفه نك (Ontologie

مبحث وجود) قسمی پیروده لافزنلکدن عبارت قالمق لازمکله جک ! . . .
آئینده کوره جکیزکه بر جوق فیلسوفلر وبالخاصه (Positiviste) لر، بو ادعاده
بولونمشلردر.

اوتدن سوکره بو (سیاق نظر *Manière de voir*) ذهنمزی بر باشقه
کریوه اندیشهیه دها دوشورویور، واوراده بر ایکنجی مسئله تولد ایدیور؛
بونیده ایجه آ کلاتیم: دهمینکی تدقیقاتمه بناء قبول ایتدیکمز فرضیه کوره
عالم خارجیدن تلقی ایتدیکم بالمله احساسات، حالات روحیه مدن عبارت
اولونجه، اجسام مادهیه ده، بوتون حس ایدوب بیلدیکم شیلرده کیفیاتدن
عبارت قانجه، دوشونویورم؛ ذهنم بوسبوتون قاریشیور . . . چونکه
کیفیات اجسام دیدیکم واجسامک کندیلرینه عائد اوصاف ذاتیه دن عبارت
بیلدیکم خواص حقنده اعتقادم ده کیشیور. کرک ستوئت میلک، کرکسه تحلیل
بسیقولوزی ک بکا اوکرتدیکی حقیقه باقجه آ کلایورم. وتسلیم اتمک مجبور
بولوندوغمی دخی آ کلایورم که، کیفیات اجسام دیدیکم شیلر دخی بنم کندی
احساساتمدن عبارتشم، کندی احساساتم دخی، - بوتون ملاحظات سابقه دن
آ کلاشلدیغنه کوره - حالات روحیه مدن باشقه بر شیلر دکل ایش . . .
او حالده جوهریت مادهیه فکر واعتقادی بنم کندم، (انفعالاتمه بر سبب دو-
شونمک مجبورتی ایله) احساسات واقعه مدن استدلالاً تصور وتسلیم ایدیورمشم
عجبا اوپله می؟ . . . ایسته (Ontologie) مسئله سی بو! . . .

فقط، اگر کیفیات اجسام حقیقت، بنم احساساتمدن، احساساتم دخی حالات
روحیه مدن عبارت ایسه، اونلر خارجه کی جسمده دکل، بنده اولمق لازمکلیر.
مثلاً: بن، عوام ناس ایله برابر پورتقال رنگنی، شکلی، لذتی، قوقوسنی، الحاصل
بالمله کیفیات محسوسه سی، خارجه پورتقال دیدیکم او مادهیه موجود ظن
ایدیورم؛ وحسمه باقیلیرسه، حالا طویغوم بکا اوپله اولدوغنی احساس والهام
ایدیور. اگر بنم بو طویغوم بر (غلط حس) ایسه، یعنی پورتقال اوصاف
متمایزه سی - کوردوکم، حس ایتدیکم کبی - خارجه مادهیه دکل ده صحیحاً

[*] بوندن براز اول، بونی ینه بعضی ملاحظات ایله بو فصلاک ایلمک صحیفه لرنده
دوشونوب بویله بولمشدق! . . .

بنده ایسه نصل اولویورده بن اونلری خارجه در ظن ایدیورم وطمائنت
کامله ایله بونک بویله اولدوغنه قناعت ایدیور؟! . . .

بومسئله غریبه بی حل ایچون ذهنی یورمه باشلامازدن اول اول حسیاتمدن
قطعاً شبه ایتمک خاطر مه کله مشدی؛ شیمدی ده حسیاتمدن شبه ایتمورم و خارجه
طویدوغم شیرلی، حسیات باطنیه مدن پک ایی فرق ایدیورم. مثلاً الیه (قضارا)
بر ایکنه باطارسه آ کلیورم که ایکنه خارجه برشی در و بدن غیری برشی در.
طویدوغم آجی، ایکنه ده دکل، بنده در. و صرف بکا عائد بر طویدو در. ایکنه،
بو طویدوغمه قارشلی بر سبب خارجی دن عبارت قالیر. هر (طبع سلیم bon sens)
صاحبی بونی بویله حس ایدر و بوکا بویله حکم ایدر. ظن ایدرم، دنیا ده بر تک
کیمسه یو قدر که - عقلی باشنده اولسون ده - باشقه درلو دوشونوب بومسئله ده
بر حکم ویره بیلسین؟! هر کس اول امرده ایکنه بی خارجه و آجی بی کندنده
حس ایدر. (ذوق و الم کبی حسیات حالات وجدانیه دندر؟) ده نیلیرسه،
بو دعوائی هر کس تسلیم ایدر؛ فقط (ایکنه نك سرتلکی، رنکی، شکلی،
الحاصل بالجمله کیفیاتی ده عینی صورته حالات وجدانیه مز دندر؟) ده نیلنجه بوکا
عقل سلیم اول امرده قارشلی قویار. بویله غریب بیداعایی تسلیم ایده مز. ایدنجه
خارج ایله باطن فرقی قالماز. ماده قالماز. مکان قالماز. بوتون شو کائنات بدهات -
وجودینه رغماً - استقلال وجودینی غائب ایدر و وجدان مزده متجلی بر طاقم
حسیاتدن عبارت قالیر. یعنی خیالاتدن صایلیر. اوندن صوکره، حقیقتاً او یله
اولدوغی فرض اولونسه، اشیایه اعتقاد مزده او یله بر عقده پیدا اولور که حل
اولنه ماز. مثلاً نصل اولویورده طویدو قلمزك جمله سی ده حالات وجدانیه دن
عبارت اولدوغی حالده بز (ذوق و الم) کبی بر قسمنی ایچمزده حس ایدیورز؛
کیفیات اجسام کبی دیگر بر قسمنی ده طیشاری به عکس ایتدیریورز و طیشاریده
فرض ایدیورز؟!... بویله، حالات روحیه مزك بر مهم قسمنی دائماً (exterioriser)
خارجه عکس ایتدیریش) مزه سبب نه در؟! و بو کیفیتی نصل تعریف ایده بیله.
جکوز؟ یا، سبب خارجه دکل ده بنم کندی نفسمه، کندی عقل وارادتمده
ایسه؟! اشته عقده دیدیکم بودر.

شو ایضاحات صریحه ایله بسط ایتمش اولدیغ ملاحظات ، طبع سلیمک بو
پسیقولوژی مسئلهسه قارشى اك شدید تعریضاتی در . مسئله دخى هنوز موضع
مناقشه ده در . ایلری ده بونی ندقیق ایده جکز . شیمدیلک یالکز اشارت ایتدم
وکیفیات اجسامک ، حالات روحیه منجر اولماسی دعواسندن فصل مسئله لر
تولد ایتدیکنی کوسترمک ایسته دم . ایشته بوده بو مبعثده ظهوره کلن ایکنجی
بر مسئله مهمه در که ماهیتی اعتباریله تدقیق ، بالخاصه پسیقولوژی یه عائددر .

شبهه یوق ۱ . . .

فعل ادراك باشلی باشه بر معمار ، حل اولونماز بر سردر ۱
كائنات خارجیه نك بداهت وجودینه بزی اقناع ایتك خصوصنده حواسمز
- واسطه ادراك اوله رق - البته بویوك و مهم بر رول اوینویور . واقعا بزی
چوق دفعه آلداتان و متحرکی ساكن ، ساكفی متحرك كوسترن و بنساء علیه
ایقاع ایتدكاری غلطات ایله بزی یاكلش محاکمه لره سوق ایدن ینه اولنردر . فقط
بو غلطاته رغماً علی الاطلاق (واراق) حقنده کی اعتقاد مزى ینه اولنرك شهادتنه
مدیونز ۱ محیط مزله تقسمز آره سنده جاری اولان مناسبتده صمیمی رابطه
وايلك واسطه ، حواسمز در . بر جسمك عینی صورتله واقع اولان اخبارات
مكرره می ، عالم خارجى نك و كندی نفسمرك وارافنه دائر بزه (علم یقین) افاده
ایدر ، وجدانمرك بو خصوصده وثوق شهادتی ده ، بر وارافنه اعتقاد ایچون
بزه اطمئنان و قناعت كامله ویریر . ده مین سویلیدیكم کی ، بز عالمك وارافنی و كندی
موجودیت مزى آنجق بو تماس و بو مناسبت دائمه سایه سنده ادراك ایده بیلیورز ،
ذی شعور اولان هر کس ایچون ده حال بویله در .

كندی واراقلریله برابر (كائنات محیطه L'Univers ambiant) نك استقلال
وجودینه اینانانلرك شو قناعتی ، نه قدر تدقیق ایدیلیرسه ایدیلیرسن ، کورولور که
هر کسك بو خصوصده (عمده اعتقاد de la foi Le fondement) ی و بو
قناعت وجدانیه سنك نقطه استنادی ، ینه وجدانك شهادتی در . بو شهادته بر
حیثیت وثاقه ویرن کیفیت دخى ، حواسك (تجارب مكرره و متجانسه
Expériences répétées et homogènes) سیدر . احوال وجدانیه یی تحلیلده

بوندن ایلری کیده میورز . موجودات ایله مناسبتمزده حاصل ایده بیلدیکمز . معلوماتک بالمله (Modalités) ی ، نهاییه الهیایه ، (فعل ادراك Acte de perception) منجر اولوب قالیور . اوراده طورویورز ، چونکه فعل ادراکی تحلیل لایده میورز ؛ بر درجهیه قدر ایده بیلسمک بیله تحلیل ایله ماهیتی و کیفیت وقوعی تعریف اولونه میور . واقعا بز شو درجه کالمزه کوره فعل ادراکک حال حاضرینه باقوب آلدانیورز . اونک بر کیفیت بسیطه اولدیغنه - دوشونمندن ، تحقیق ایتمدن - اینانیورز . اونک ایچون اولسه کرکدرکه (آنی و ضروری) اوله رق وقوعی جزم وتیقن ایتدیکمزه ذاهب اولوب بدهتنی تسام ایله اکتفا ایدیورز . تدقیق ماهیته کیریشمک قطعاً خاطر مزه کلیور . بناء علیه کیفیت ادراکی تعریفندن مستغنی بولویورز . او بیدن ناشیدرکه المنزله طوتوب کوز منزله کوردوکرز بر طشاش پارچه سنی ، حقیله بیلدورز ظن ایدیورز ؛ اونک استقلال وجودنده شبه ایتدکدن ماعدا ، نفس امرده دخی بو صورت وبو هیئت اوزره بولونماسی لازمکه جککنده قطعاً تردد ایتیورز . خلاصه : اعتقاد عامیانه کوره :

عالم خارجی ایله انانیتمز آره سنده واسطه استشعار اولان حواسمز ، خارجه بر شیتی ، مثلاً بر طشاش پارچه سی یکدن حس ایدیور ؛ یعنی تماس آنی ایله اونی ادراک ایدیور . وجدانمز ینه بر آن غیر منقسمده بوکا مطلع اولویور ؛ یعنی او طشاش پارچه سی حقنده بر علم یقین حاصل ایدرک ، اونک استقلال وجودینه قناعت کتیریور . ایشته بو قدرینی عقل دخی کافی کورویور . واقعا ، حیات عادیه بی مهمما ممکن اداره ایده بیلسمک ایچون بو قدری کافی ، حتی فضله در بیله ! مثلاً بر طاشدن صاقینمق ایچون یاخود بانچه نك دیوارینی تعمیر ایچون بو سطحی معلومات یتر ! فقط بسیقولوژی ده - طلسمی بولونماز - بر معما وارسه اوده کیفیت ادراک مسئله سیدر : نصل اولویورده بز ، بر طشاش پارچه سنی ، بویه بر آنده ادراک ایدیوریریورز ؟ عجباً بر آنده وبلا محاکمه ای ادراک ایدیورز ؟ نصل اولویورده مثلاً اهتزازات هواییه صماخ اطلاعاتمه (صدا) صورتنده محسوس اولویور ؟ .. اهتزازات اثیریله نظر ادراکزده

(ضیا) حیثیتند متجلی اولو یور و او اهتزازاتك مقادیر معینہ سی چشم حیرتمزه رنکارنك جلودلر عرض ایدیور . حالبوکه اصلندہ بر اهتزازدن عبارتدر ؛ اهتزاز باشقہ شی ، او اهتزازی (صدا) یا خود (ضیا ورنك) اولہرق ادراك و تاقی ایتك باشقہ شی ! . . . حتی دها غیری شوکہ ، بر جسم مستقل اولہ- بیلیمہ سی هیچ بر وجہلہ تسلیم ایدہ میہ جکمز مکانی کوزلہ کورہ بیلور ؟ . . بو فصل فسوندز ؟ ! . . . بوتون بو حیرتی موجب اولان کیفیاتك جملہ سی دہ (فعل ادراك) دیدیکمز معمایہ متعلق بر طاقم اسرارانکیز مسائلدر . کیفیت ادراك بیلیمہ دیک ، بونلر حقندہ مفعول جوابلر ویرلہ من . آنجق بعض فرضیات ترتیب اولونہ بیلیر ! فقط ، هر نہ درلو اولورسہ اولسون ، او فرضیاتہ اعتراض ایتکدن قولای بر شی یوقدر . یالکیز بویله (متعال Transcendental) یعنی تجربہ و علم خارجندہ بولونان مسئلہلر ایچون آز چوق معقول و مقبول بر فرضیہ ترتیب ایدہ بیلیمك ، هر کسك کاری دکلدز واریابی ایچون دخی بك زوردر . خلاصہ (فعل ادراك) ، ماهیتی و کیفیتی اعتباریلہ (یعنی اساساً نہ اولدوغی و نصل وقوعه کلدیکی اعتباریلہ !) صحیحاً ك مبهم معماردر . فقط وقوعه اینانماق ممکن دکل ؛ چونکہ اوندن بدیری بر شی اولق بزم ایچون ممکن دکلدز . بزم داهی شاعر من عبدالحق حامدك غایت ظریف و طوغرو بر سوزینہ کورہ :

« بر سرّ که بداهتیلہ مستور »

در دہیہ بیلیرز .

فلسفہ دہ ، بسیقولوزیہ تعلق ایدن وجدانیات مسائلنك جملہ سنك مبدای وزمین استادی فعل ادرا کدر . کیفیات اجسام دخی طبیعی اوندہ داخلدر . و (نظریہ علم) بمختندہ عمدہ و اساسدر . چونکہ کیفیات اجسام دیدیکمز ، و حواس ظاہرہ منزله تاقی ایتکدہ اولدوغمز مدرکاتہ نہ معنا ویریرسہك ، عالم خارجی حقندہ حاصل ایدہ جکمز اعتقاد ، او معنادن متأثر اولور ؛ زیرا اوکا تابعدر . مثلاً مدرکات حواس و بنسأ علیہ کیفیات اجسام ، صرف وجدانمزدہ متجلی حادثاندن یعنی حالات روحیہ دن عبارتدر دہ نیلیرسہ و بویله اولدوغی

حقنډه قوی دلیللر کوستریله بیلیرسه، بزم علممزك آفاقی اولدوغی ادعا ایدیله من. بو حالات روحیه کندی نفسمز، سبب اوله رق کوستریلرسه، عالم خارجی مادی اوله رق قبول ایدیله من! بناء علیه (فلسفه مادیه Matérialismo) نك نقطه استنادی ییقلوب محو اولمش اولور. بالعکس (مقاومت) حسی، (عدم تنافذ) کیفیتی اوزرینه بنا ایدیلرده کیفیات اجسام خارجه بالذات موجود برکتله مادیه نك، عضویمز اوزرینه اجرا ایتدیکی تأثیرات میخانیکه دن عبارتدر! .. ده نیلرسه و ابراز اولونان دلائل بو سیاق نظره تقویت ویررسه (ماتریایزم) طوغرو و محق بر فلسفه اولور.

اونك ایچوندركه (فعل ادراك) حد ذاتنده پك قرا کلق بر معما اوله رق قالمقله برابر، کیفیات اجسام بحقی فلسفه نك الگامض، بر قسم مسأله یی جامعدر. اسکی فیلسوفلر، خواص اجسام دیدیکمز کیفیاتی، علی السویه نظر اعتباره آلوب بر طوتمشلردی. اونلرک هپسین خارجه کی مادیاته اسناد ایدرلر و یا خود هپسندن عینی صورته شبهه ایدرلردی. بونلرک حقیقت ذاتیه سنه یا اینانیرلر، یا اینانمازلردی. فقط اونلر آرمسنده حیثیتاً فرق کورنلر اولمامشدی، و یا خود اولمشده وضوح ایله کورمه مشلردی و کورنلر اندردی. سرویلیام هاملتن ارسطونك بو بحثده بویه بر فرق تعیین اتمش اولدیغی ادعا ایدیور و جدی تحقیقاتنه بناء سویلیور. امکان مدرکات بسیطه من آرمسنده بر مهم فرق کورن، و بو فرق صراحتاً تعیین ایدن (دکارت Descartes) اولمشدر؛ فقط بونکله جداً مشغول اولان، و بو مسئله نك اولانجه اهمیت فلسفیه سنی کشف واعلام ایدن مشهور انکلیز فیلسوفی (جون لوق John Locke) درکه، جاذبه قانونلرینک کاشفی (نیوتن Newton) نام علامه نك معاصری و پك صمیمی دوستی ایدی.

شیمدی، بونون شو دوشونجه لرمنك موضوع غربیتی تشکیل ایدن مسئله اساسیه بر شکل معین ویرلمده اوصورت اوزره اونی موضع تحقیقه قویه لم! . ستونته میلک - مثال اوله رق - آلوب تحلیل ایتدیکی پورتقال حقنډه - بوسفر - قطعی دوشونلم، و، - ممکنه! - بر قرار ویرلم؛

شو پورتقالك قوقوسی، رنکی - صحیحاً! - بنده می... یوقسه خارجدہ
 کنديسنده می؟... بونی - آرمزده - قونوشوب دوشونه جکیز... اکثریت
 خلقه بویله برسوال سوروبده جواب بکلیه جک اولورسه ق، سلامت عقلمزی
 شهبیه دوشورمش اولورز. هرکس (!؟) امیندرکه پورتقالك رنکی، قوقوسی،
 طبقی سائر اوصافی کبی کنديسنده در انسانده دکل... واوله ماز. اویله غریب
 برشی ممکن اوله بیلسییدی پورتقال صاتون آلمق ایچون ناصه می چکیلیردی؟...
 مادام که او میوه نك قوقوسی، لذتی و اوصافی بنده ایمش... خارجدہ پورتقال
 آرامغه ازوم قالیر می؟....

بوندن منطقی، بوندن معقول جواب ده اولماز...!

فقط، بزینه پسیقولوزی نك تعلیماتندن آیرلیه رق، مسئله یی تحقیق ایتمک
 مجبورز: البتہ رنك ولذت، بنده برر (حس مخصوص Sensation spécifique) در.
 اولسه اولسه، پورتقال دیدیکم اوماده ده، برطاقم قابلیات خصوصیه واردرکه بنده
 بو درلو حسلر ایقاع ایده بیلور؟!... باشقه درلو دوشونمک ممکن دکل... بو
 دوشونوش دخی سببیت مبدآنه طایانیر، چونکه: [بنده، بورنك ولذت حسنی
 وجوده کترین سبب، خارجدہ کی پورتقالده در. بنده دکلدیر. بناء علیه سبب
 خارجدہ در (مسبب ۱. ۱. ۱)، انجق بنده در...] دیمک چیقار. مسبدک سیه
 بکزمه می لازم گلز. کسیدیکم اودونك مقطعی، قوللانیدیغ بانطیه وبکا،
 فصل بکزمه میورسه حس ایتدیکم لذت ورنك دخی، بنده بو حسلری حاصل
 ایدن اسبابه - اویله جه - بکزمه می لازم کلیر. صیجاقلق، صوغوقاق حقنده
 ودها بوکی (کیفیات تالیه) حقنده هب بویله دوشونه بیلیرم...!

لکن پورتقالك ماده سی و مادیتی حقنده و یا خود شکل و ابعادی کبی - ماده سنه
 تعلق ایدن - کیفیات اصلیه سی حقنده، عینی صورتله دوشونوله میه جکفی حس
 ایدیورم. نیچون دوشونوله میه جکفی دخی - پک اعلا - آکایورم: بن کیفیات
 تالیه دیدیکم احساساتک، بهمه حال بر طاقم اسبابدن نشأت ایتدیکنی قبوله
 مجبورم. عکسی تقدیرده، بوکی طویغولرک بنده فضولی، کفی و بلاسبب حصوله
 کلدیکنه اینانمقلغم ایجاب ایدرکه، بو ممکن دکلدیر... اولسه یدی بوسوتون

شاشیریریردم وهیچ بر شیتی آکلایه ماز ، تعریف ایدر مزردم !... حالبوکه
هر شیتی آکلماق و طویغولرمی تعریف ایده بیلیمک ایچ-وز ، بو صیقینی لی
دوشونجه لره دوشدو کده شهه یوقدر !

اولیه ایسه ، - دیمک اولویورکه - بن ، کندی نفسمده وقوعه کان (تغیرات
احوال Alterations d'états de conscience) ک سببی - مطلقا ! - خارجه
برشیده ، و بریرده فرض ایدیوردم - غالباً - اونک ایچون پورتقالک ماده سی حقنده
ددمینی محاکمه نی تطبیقه جسارت ایده میورم . زیرا کیفیات تالیه ایچون خارجه
آرادیم سبک بر محل تعلق اولق ایجاب ایدر . ماده دیدیکم شی ده اودر واونک
ایچون ماده نی و مادیتی ، کیفیات تالیه دن اولق اوزره تلقی ایده میورم . چکیذورم ؛
چونکه ماده نی تصور ایتدیکم کبی ، ابعاد نلته تصویری ده برابر کلیور . ابعاد
نلته ، محدود و معین اولونجه (حیز) دیمک اولویور . حیز تصویری ده - همه
حال - مکان تصویری استلزام ایدیور . حالبوکه ماده حقنده کی معلومات
ابتدائیم ، قوقو ورنک حقنده کی معلوماتدن حیثیتاده فرقی دکدر ، قیمت
اعتباریله ده فرقی دکدر . واسطه ادراک اعتباریله ده فرقی دکدر . حاصلی
دیگر لرندن ده اصالغلام دکدر . چونکه اونی ده انحق حواسم واسطه سیله تلقی ایدیور .
اولا (مقاومت Résistance) و (عدم تنافذ Impénétrabilité) حسلیله
بیلیورم . صوکره حرکت ایله (امتداد étendue) ی ادراک ایده بیلیورم . بلا
مقاومت حرکت ، (یعنی مساحه مسافه) ، بکا مکان فکری ویرمه ک کیفیت
ایدیور . اکر حرکت ، مقاومه ، عروض اولورسه ، او وقت (ماده) حقنده
بر فکر حاصل ایده بیلیورم . بو خصوصده کی احساساتی تحلیل ایدرسیم ، بو
جیقیور !...

کودیورم که باشقه درلو دوشونه مدیکم ماده ده (ابعاد نلته Les trois di-
mensions) فکری و ابعادده دخی مکان فکری ذاتاً مندرج و مندرج در . پک
ای آکلیورم که (خارج extérieur) دیمک ، مکان دیمکدر . اکر مکان ،
کندی کندینه ثابت و مستقلاً موجود بر (شی) اولمازسه و یا خود اولیه بر شیتک
کیفیت اصلیه و دائمه سی کبی تلقی ایدلمزسه ، انحق کیفیات تالیه دن معدود اولق

لازمکاپر . باشقه چاره یوقدر . (کیفیات تالیه) دن معدود اولونجه ، خارخده دکل، بنده اولمق ایجاب ایدر و بر (حال انفسی état subjectif) اوله رق بنده موجود بولونماسی اقتضا ایدر. او حالده ده (خارج) و (عالم خارجی) نامنه هیچ برشی قالماز. بونی ده ذهن آلاماز!.. چونکه بن، کیفیات تالیه یه برسبب دوشونمک مجبوریتندن قورتوله مامشدم ؛ اوسببی ده مطلقا خارجده فرض واعتقاد ایتشدم. ملاحظات سابقهم ایسه (خارج) ی بر نقطه هندسیه یه ، بر صفره منجر ایدوب بر اقیور. چونکه مکانی بر (هیچ) ارجاع ایدرک محو ایدیور!... احساساتک سببی، ارتق بن زویه وضع ایده بیلیرم؟.. عالم خارجی دیدیکم کائناتده انحق کیفیات اجسامی ادراک ایده بیایرسم، و کیفیات مذکورده نک جمله سنی، احوال روحیه مدن یعنی کیفیات تالیه دن عسارت عد ایتدکدن ماعدا ، بالجله موجوداتی محیط و حاوی اولان، بوتون وارقلری قوجاقلایان مکانی ده، کندمده ظاهر بر جلوه حسیه کی تاقی ایدرسم نصل اولور ؟.. کائنات نامنه روحدن باشقه نه قالیر؟.. ایشته تاریخ فلسفه ده (انیه = Solipsisme) دیه مشهور اولان بو کرویو افراطه دوشمه مک ایچون ، ماده نک کیفیات تالیه سنی کندی نفسمزده واقع بعضی حالات انفسیه کی تاقی ایتدیکمز حالده ، شو حالاتک سبب موجب ، خارجه وضع ایدیورز، چونکه خارجده فرض ایدیورز؛ وبالضروره (جوهریت مادیه Substantialité matérielle) او (سبب مفروض Cause hypothétique) ک موضوعی و محلی ، حتی بالذات کندیسی اولمش اولویور . فقط - اولجه دخی دیدیکمز وجهله! - برشیدک جوهر مادی سی حقنده قطعاً هیچ بر علممز اولمادی نی کبی، اوماده مفروضه نک کیفیات اصلیه سی حقنده کی علممزک، کیفیات تالیه سی حقنده کی معلوما تمزدن (وثوق و یقین اعتباریله quant à la certitude) دخی هیچ بر فرقی یوقدر !...

آکلا یورسکز که جوهریت مادیه اعتقادی (سببیت مسئله سی La question de causalité) یوزندن وهله (سبب احساسات La cause de nos sensations) ی خارجده فرض ایتدکدن چیقیور !...

[سببی ، نیچون - مطلقا - خارجده فرض ویا اعتقاد ایدیورز ؟!]

دیرسه کنز ، بوکا صحیحاً بر جواب معقول یوقدر!.. [اوتنه دنبری اویله
 حس ایتشنز ، اویله دوشونمشز!...] دیمکدن باشقه چاره یوقدر . بوده :
 [انسانیتک دور وحشت وجهالندن بری حاصل ایندیکی حس واعتقاد بودر!..]
 دیمکله بردر ، وبویله بر جواب ، فلـفه بختنده مقبول اوله ماز ، چونکه ، بویله
 پک قدیم ، واعصار وازمان ایله محکم بر جوق اعتقاد اتمزک ، پک یا کاش ، پک
 باطل اولدوغنی ، ینه تحقیقات فلسفیه اثبات ایتشدرد .

یا سببی کندی نفسمزک ارادته ، یا خود (فعالیت Atcivité) نه عطف
 ایدر سهک؟. [بوتون طویقورلرمزک سببی کندی روحزک فعالیتی در . سبب ، خار جده
 دکلدرد . چونکه خارج نامنه برشی یوقدر . سبب کندی روحزدر!...]
 دیرسهک!؟! .

بویله دیرسهک در حال (لامادیه Immatérialisme) مذهبنه دوشمش
 اولورز ؛ وکائنات ، (حاوی) سی ایله (محتوی) سیله ، یعنی مکان واونده داخل
 اولان شیلرک جمله سیله بر (صفر Zéro) . منجر اولور ، که بو ، - ینه اولجه
 عرض ایتدیکم کی! - بوتون اذهان شرقیه نک- (حرکت فلسفی Mouvement
 philosophique) - ده صوک مرحله تفکری اولمشدی . اوروپاده (بارقله
 Berkeley) ، بو مذهب فلسفی نک مؤسسی واک قوتلی مدافعی ایدی . بومذهبه
 (افتکاریه انفسیه Idéalisme subjective) دخی دیرلر .

لکن ، بوده عقله یاقین می بیلیم ؟... بداهت عالمی ، محض حقیقت ظن ایدن
 عوام ناسک شوساده دلانه فلسفه سی ، تفریطدر . فقط (بارقله) نک کی ده افراطدر .
 اکر بداهت عالمه اینانمق باطل ایسه ، عالمک وکندی جسممک ، هیچ اولدوغنه
 اینانمق ده باطلدر ، صانیرم .

بو کتابک دردنجی بابنده (مذاهب فلسفیه نک وسیله ظهوری) فی تحقیق
 ایتدکن صوکره هر برینی آیری آیری واطرافیه تبعه قویولدوغمز زمان ،
 جدی تنقیداته کیریشه جکم ؛ و بو (نظریات علم) ک نسبی قیمتارینی تعیینه چایشه جغم .
 بوراده کی ملاحظات مختصره ، سز لری دوشونمکه آلیشدیرمق وذهنی ، چیقماز
 سو قاقلره سوق ایدن پوللری کوسترمک ایچون رهبرک ایتک ایچون در ،

کیفیات اجسام بحثنده نه غریب مسئله لر ظهور ایتدیکنی - بر درجهیه قدر اولسون ۱ - کورمش اولدوکنز : . . . البته دقت ایتشسکزدرکه ، بو بحثک ال اهمیتلی نقطه سی (مقاومت Résistance) و (حرکت Mouvement) حسلریدر . چونکه مادیت فکری ، سائر احساساتدن زیاده بو حسلره مربوطدر . طبیعی درکه (شکل Forme) ، و اوکا متعلق اولان بالمله (کیفیات مکانیه Propriétés spatiales) دخی ماده یه ، اساساً مکانه باغلی در .

او حالده (کیفیات اولی و ثانیه Propriétés primaires et secondaires) مسئله سی ، (حکمت طبیعییه Physique) ده (خواص عمومی و خصوصیه اجسام Propr. génér. et spécifiques des corps) مسئله سنک ، فلسفی بر نقطه نظر دن و بسیقولوژی ساحه سنده تحقیقی دیمکدر .

اوندن سوکره ، لایقيله آ کلامش سکزددر - ظن ایدرم ! - که بو بحثده اصل معنائک عقده سی تشکیل ایدن مشکلات ، سبیت اعتقادنده کیزلی در . شیمدی آرتق کیفیات اجسام حقنده فیلسوفلر نه دوشونه بیلمشلر و نیچون اونلری ایکی ، حتی اوج صنفه آیرمشلر ؟ .. اوکا باقلم :

بو آنه قدر ویردیکم تفصیلات ایله بو کیفیات اجسام مسئله سی الک بسیط بر شکلنه ارجاع ایده بیلدم ، ظن ایدیورم . اساس بحث ، [شکل و مقاومت اجسامک بالذات او جسملرده بعضی خواص ذاتیه دئی ؟] . یوقسه صرف بزده بر طاقم کیفیات نفسانیه دئی ؟] . اولمه سنده در . طبیعی درکه رنگ و رایحه کبی ، کیفیات تالیه دن عد ایتمکه تردد ایتمه دیکمز ، بعضی اوصافی بوسبوتون کندیمزده بلا سبب حاصل اولمش بر طاقم احوال وجدانیه دن عد ایتمه یورز . البت اینانیورزکه بزده بو طویفولری حاصل ایدن سبب همه حال جسملرده بولونان بعض احوال اولسه کرکدر . فقط هر نه اولورسه اولسون او احوال شکل و مقاومت بکزمه مز ، یعنی صرف انفسیدر . حالبوکه شکل مقاومت کبی کیفیات اصلیه یی انفسی اوله رق دوشونه بیلیمک حقیقاً کوچ بر شیدر . ده ا دوغروسی ، کوچ دکل ، فقط بزلی ایلاک آدیمده اوچورومه دوشورر بر دوشونوشدر . مثلاً شو اوکده طوران یازی ماصه سنک رنگنی رنگ اوله رق ، یعنی صرف انفسی بر

طویغواوله رق، هایدی بن کندمده فرض ایدیم! بوفرض، اوماصه نك خارجده وجودینه دائر بنده کی اعتقاد قویمه خلل ویرمز! فقط [ماصه نك شکلی ده مقاومتی ده عینی صورته بنده در!] دیدیکم کبی، خارجده بیلدیکم اوماصه، برآنده محو و نابود اولور؛ بردها اویله برشی دوشونه نم. زیرا بر شینك خارجده وارلفی محافظه ایدن باشلیجه کیفیت، مقاومتی و شکلیدر. بوتون انسانلرک الک صاغلام اعتقادی بودر!

شیمدی: دعوا بو ایکی کیفیات اساسیه اوزرینه جریان ایدیوردیمکدر. علی الاطلاق کیفیات اجسامی بلا تفریق انفسی عدا ایتمک، طوغریدن طوغری یه ذهنی (Idéalisme) مذهب فلسفیسنه سوق ایدمکچی ایچون بو مسئله نك - مبحث معرفنده ظهوره کلن ومذاهب فلسفیه بی تولید ایدن - اختلافات جدیه ایلنه نه صیق مناسبتی اولدینی آرتق صراحتاً آکلاسیله بیلیر. طبعیدرکه مزاج ذهنلری اعتباریله (Idéalisme) و یاخود (Substantialisme) . میال اولان فیلسوفلر بومسئله ده یکدیگرینه طابان طابانه ضد بر نقطه نظر اتحاد ایتشلر؛ .. تمامیه متقابل و متناقض حکملر ویرمشلردر.

مسئله بونکله ده بیتمه مشر، وشو ایکی کیفیت آراسندن براو چونجی صنف کیفیات دخی ظهور ایدمک دعوا بی جاتالاندیرمشدردر. برشینك مقاومتی و شکلی، وصوره؛ رنگی، قوقوسی، لذتی، صیجاقلنی، صوئوقلنی آیری آیری موضوع مناقشه اولدینی کبی، برده حرکتی نظردقتی جلب ایتمش و بو خصوصده ده عقللر حیرته دوشمشدردر؛ زیرا حرکتی بذاتها کیفیات اولادن عد ایدمه یز؛ چونکه بر جسم بزه نسبتله خارجده [ماده سیله و شکلیله] موجود اوله بیلیمک ایچون مطلقاً اونك متحرک اولمه سی بر شرط اساسی دکلدر. بزه، ساکن بر جسم دخی تصور ایدم بیلیر؛ حتی بالنسبه ساکن بر جوق اجسامک موجودیتی اعتقادیمزجه بداعت عادیه دندردر. الحاصل، شو محققدرکه (حرکت) دیدیکمز حال، اجسامده بر (قابلیت ممکنه) اولقله برابر او اجسامک تصور ماهیتده همه حال داخل بر کیفیت اصلیه دکلدر. او حالده حرکت بزه بر حسدردر، دییه بیله جکمز. باشقه چاره، باشقه یول یوقدر؛ چونکه بداعتاً کوروب حس ایتدیکمز حرکتی

یا خار جده بر شیئه اضافه ایده جکر ، یا خود کندی وجدانمزه عطف ایده رک
اونی کندی نفسمزک کیفیتندن صایه جغز! بوایکنجی صورت اوزره دوشونمکده
پک قولای دکادر ؛ چونکه باطل بدیهی کورینور ! [رتپه دن یو وارلانو بده
دیزیمه چارپان، وجانی آجیتان بر طاش پارچه سنک حرکتی - ناصل اولور که
- اونده دکادرده بنده در،] دیه بیایرم. واقعا الم، آجی بنده در، فقط الم، آجی
دیمک، طاشک حرکتی دیمک دکادر: او حرکتک نتیجه سی اولان صدمه نکده
نتیجه سیدر . آ کلاشیلور که آرا برده ظهوره کلن بو مسئله یی ده حل ایتک ،
اولیه ظن اولوندینی کبی ، پک قولای برشی دکل؛ بوده غریب بر معما تشکیل
ایدیور ! هم شونقطه شایان دقتدر که : خار جده وقوعه کلن ، ومطلقا وقوعی
ایچون مکانه محتاج ومقتدر بولونان حرکتی ، انفسی اوله رق دوشونمک ، یعنی
کندمده فرض ایتک ، طبق بر شینک شکلی انفسی فرض ایتکه بر چیقیور ،
عینی نتیجه یی ویریور، یعنی مکانک استقلال وجودینی در حال انکاره واریور!
بر آرز دوشونورسه ک ، بونده هیچ غرابت بولماز !.. چونکه شکل ، مکانه نه
قدر محتاج ایسه قیملدامق ایچونده ، مکانه اونسته ده احتیاج واردر . تمامیه
بوش وغیر مقام بر میدان اولمادقجه ممکن دکل حرکت تصور اولونه ماز !

شو تحلیلی مطالعاتمنده پک اعلا آ کلاشیلور که بوتون بوشیلر، بوغریب
دوشونوشلر، طوغریدن طوغری یه مکانه متعلق بر طاقم مسئله لردر. بزم ایچون
شیمدی یه قدر تمامیه مغلق بر معما شکلنده قالمش اولان (ماهیت مکان) مسئله
اصلیه سندن طوغمش بر سوری اسراردر که، اولرک هر برینی؟. بز هر ناصلسه، بر
مسئله یابوب اورته یه آتمش. بیایم، بو مسئله لر طبیعی شیلر میدر، یوقسه بوسبوتون
وهمی شیلر میدر؟ یا لکیز اوکا اینانیورم که، مکانک ماهیتی متضمن اولان معمای
اصلی، حل اولونمش اولسه یدی، بو بریکی مسئله لرک جمله سی ده مضمحل اولور،
کندیلکندن قالداری .

هر حالده وهمی اولسون، طبیعی اولسون، مباحث فلسفه میاننده بویله بر
مسئله ده واردر . او حالده بعضی فیلسوفلر نظرنده کیفیات اجسام، اوچ صنفه

منجر اولیور. برنجیلری، یوقاریدن بری سویله دیکم کی، بالخاصه مقاومت ایله شکلدن عبارتدرکه بونلرماهیت مخصوصه لر ی اعتباریله آفاق ی یعنی (Objectif) در، ظن اولونیور، وبونلر خارجه ده .تمکن اولان ماده نك کندی ذاتنه خاصدر؛ اونده بولونور. بزده کیفیات نفسانیه قیلندن برشیلردکلدر. بزاونلری طوغریدن طوغری به تماس ایله ادراك ایدرز؛ وحد ذاتنده اولدقلری کی ادراك ایدرز . ایکنجی قسم: رنك، قوقو وامثالی کی بر طاقم خواص تالیه اجسامدرکه اونلر بزده حاصل اولمش بعض طویغولردر، وبویله، رنك و رایحه اوله رق خارجه کی اجسامده قطعاً موجود اوله مازلر؛ اولسه اولسه، بزده بو طویغولری حاصل ایدن بعض سبیلر اوله بیلیر که خارجه کی اجسامده اوسبیلر بلکه بعضی تطواتدن و یا خود تبدلاتدن عبارتدرلر؛ ده یه بیلیرز .

شیمدی بو برنجی قسم اوصاف (Statique) در، یعنی حرکتیه مناسبی اولمایان بر طاقم خواصدر. حالبوکه بوتون کاشانده، حادثاتدن باشقه، بزم ایچون هیچ بر شی یوقدر. حادثات ایسه، تماماً (Dynamique) در؛ یعنی ماهیتاً حرکت نوعندن بر شیدر. بناء علیه برنجی وایکنجی طاقم کیفیات آراسنده بر اوچنجی صنف کیفیات ایجاد ایدن فیلسوفر، یوقاریشیق مسئله یی بوسبوتون قاریشدیرمش اولمقله برابرینه معذوردرلر، چونکه حرکتی، [یعنی کیفیت حادثه یی] تعریف ایده بیلیمک ایچون بوکامجبور اولمشلردر. ایشته، (سرویلیام هامیلتن) و آرزوق اوکا اتباعاً، هربرت سپنسر ودها بعضی معروف فیلسوفر، بو اوچنجی صنفی، آرا رده احداث ایتیمکه لزوم کورمشلر حتی هامیلتن بو صنفه [کیفیات ثانویه اولی = Qualités secondaires] دیمش ایکن، سپنسر بونلره [Qualités statico-dynamiques] دییه بر اسم طاقمشدر؛ هرکسک اولی توصیف ایتدیکی کیفیاته ده (Statiques) دیور .

شیمدی بو احداث اولونان اوچونجی صنف کیفیاتی نریمه عطف ایتلی؟ چونکه اوده بر صیقتیلی مسئله اولویور: وارلق عالنده ایکی شی وار: بریسی نفس مدرك (Le sujet percevant)، دیگریدر ادراك اولونان شی (L'objet perçu). کیفیات دیدیکمز شیلری یاپرینه، یادیکرینه اسناد ایده چکمز!

بر شخص ثالث، یا خود او چونجی برشی یوق که اوکاده، شویکی احداث ایتدیکمز کیفیاتی اضافہ ایدلم ! مع مافیہ بوفیلسوفلر، بوکاده چاره بولیورلر: ادراک ایدن نفس ایله ادراک اولونان شینک قابلیات متقابله سی جمع ایدمک، (دها طوغریسی حاصل ضربنی آلهرق) اونی تعریف ایدیورلر . دییورلرکه [بوسفدن اولان کیفیات، هم بزده در، هم ده اشیاده در. بزده (Subjectivment) موجوددر، اشیاده ده (Objectivment) موجوددر .]

بو تعریفی چوق کیمسه لر بکنمه دیکی کی بنده هیچ بکنمه دم . زیرا اوچنجی برصنف تشکیل ایتمکه، معلقده قالان بو کیفیاتی، نهایت بر یره اسناد ایدم بیلیمک ایچون، اشیاده آفاقی اوله رق ، بزده ده انفسی اوله رق بولوندقلرینی تصویره مجبور اولیورز دیمکدر. او حالده کیفیاتک جمله سی بودورلو دوشونه بیلیرز. چونکه بزده انفسی اوله رق هر نه موجود ایسه اوکا خارجدہ - آیریجه - آفاقی برسبب تصور ایتمش اولویورز ؛ وعینی شیده ایکی طرفدن آیری آیری باققله تعریف ایتمش اولمقدن باشقه برشی یاپمایورز دیمکدر ؛ عینی سکه نک بر طرفه باقوب یازی دییورز ، او بر طرفه باقوب طغرا دییورز ، دیمک اولیور .

کورییورسکیز که بوصورتله موقع مناقشه یه وضع اولونان شوغریب مسئله نک بو وجهله حل اولونماسی ، ذهنه قطعاً قناعت بخش اوله میور. انسان، بوتون کیفیاتی برجنسدن عد ایدرسه بلنکه دها طوغرو دوشونمش اولور ، صانیرم .

هر فیلسوفک بومسئله حقننده فکری بردکدر. شیمدی ده بعض مهم آدملرک ناصل دوشوندکارینه دائر قیصه بر مثال ویروب بو بحثی ده کچلم .

تاریخ فلسفه ایله زیاده سیله مشغول اولان معاصر فیلسوفلریمز بعدالتحقیق ادعا ایتشلر وکوسترمشلردر که بو کیفیات مسئله سی پک اسکی زمانلردنبری صحنه مناقشه ده در. لوندرد دارالفنونی فلسفه معلمی پروفیسور (قاروئث رید Carveth Read) ادعا ایدیور که کیفیات اجسامی اولی وثانیه اولمق اوزره فرق وتمیز ایتمک (ده موقریت Démocrite) دن وحی (لوسیپ Leucippe) دن باشلامشدر و بو تصور فیلسوفلرک وتأسیس ایتدکاری (آتوم = ذره) نظریه سیله علاقه داردر،

چونکه اونك مناقشه سندن ظهور ايتمىدرد . كذاك انكلكترده ميل وسپنسر دن
 صوكرا اشتهار ايدن اك بويوك فيلسوف و فردن (برادله Bradley) دخی
 (ظواهر و حقيقت) نام ائرنده مسئله نك پك اسكى برشي اولديغنى سويله يور ،
 فقط اسم تصريح ايمه يور و تفصيلاتنه كيريشمه يهرك اصل موضوعى مناقشه ايدى يور .
 تاريخى بر نقطه نظر دن بو مسئله نك صورت تولدينى و تقريباً يكرمى بش
 عصر دنبرى كچر ديكى صفحاتى دقتله ولايقيله تتبع ايدوب غايت مفيد بر تاريخچه سنى
 يازان ذات سر وليم هاملتن در . سقوج فيلسوف شهرى (ريد Reid) ك
 اثر لرينى تفسير و تنقيد ايدوب تكرار باصديرمشدى . بوتاريخچه او اثره تذييل
 ايدلمشدر . بن طبيعى بو اوزون مونوغرافى نى بورايه نقل ايدمك دكم ؛ كاشكه
 كتابمىز ك حجمى و درسمىز ك حدودى مساعد اوله يدى ده نقل ايدم بيله يدم ! بناء عليه
 بالضروره دور جديدى فتح ايدن ده قارت دن باشلايه رق بو مسئله مشهوره نك
 باشليجه صفحاته دائر يك مختصر بر فكر و يرمك . بوسوك دور ايجون ده
 آييجه بر ماخذ مهم واردرد : مشهورشونهار ، (Parerga und Paralipomena)
 نام رساله سنده ، موضوع بحثى تماماً بو مسئله يه حصر ايتمش و ده قارت دن باشلايه رق
 كنديسنه قدر بوتون صفحات مهمه يى تتبع و تنقيد ايتمىدرد . ادعا ايدى يور كه
 اسكيلر بو فرقى كوره بيلمىلر سده اونى لايقيه آكلايان و عالم وجودده هر
 شينك بزم ايجون انفسى و آفاقى صورتلرينى تميز و تعيين ايدن ده قارت اولمشدر
 و بونك ايجون كنديسى بحق فلسفه حاضره نك پدريدرد ؛ زيرا او مشهور
 (Dubito, cogito, ergo, sum) يعنى « شبهه ايدى يورم ، دوشونم يورم ، اويله
 ايسه وارم » دستورينى بيان ايتمكله [انسانك بلاواسطه و آنى اوله رق آنحق
 نفسى ادراك ايدم بيله يكى] بر حقيقت اساسيه اولمق اوزره وضع ايله مش و فلسفه يى
 انفسى بر صورته بالا فراغ بو حقيقت اوزرينه بنا ايله مشدر . [*] شو نقطه
 نظره كوره بوتون مدركا تمىز ، بوتون معلوماتمىز طبيعياً و ماهيتاً صرف انفسى
 اولمق لازم كلير و بالنتيجه آنحق بزم ذهنمزه پيدا اولان بر طاقم خيالاته و صور
 فكر يه و قوفىز اوله بيله جكنى و يالكىز بونلردن قطعياً امين اولمق لغمز

اقتضا ایده جگنی قبوله مجبور بولونورز. بونقطه به کلدکن صوکر ا بوخیالاتمزله، اونلردن مستقل و بزدن آیری بولونان اشیای خارجی نه کی بر مناسبتی اولدیغنی دوشونمکده ضروریدر. بزده کی خیالاته سبب فرض ایتدیکمز او اشیای خارجی نه صحیحاً موجود اولوب اولما دقلری دخی بر ایکنجی مسئله تشکیل ایدر؛ و اوکا دائر ناصل ونه صورتله ونه کی بر سند قطعی ایله بر علم یقین حاصل ایده بیلیرز؟ بوده بر اوچنجی مسئله تشکیل ایدر.

دیوروعینی زمانده، شوانفسی و آفاقی فرقدن، باشایجه مبحث معرفت مسئله سنک نصل ظهور ایتدیکنی و اونکده علم یقین مسئله سی نه صورتله تولید ایتدیکنی کوستریور.

شوپنهاورک دعواسنه کوره ده قارتک اک مشهور تابعیندن (مالبراناش = de Père Malebranche) بوتون فلسفه سی بونقطه اوزرینه، یعنی کائنات حقنده کی علممک صرف انفسی اولمه سی کیفیتنی اوزرینه بنا ایتشدرد. مزه بو نقطه یی بر آرز ایضاح ایده میم تا که بویه ظاهرده اهمیتدن عاری کورونن انفسی و آفاقی فرقتک بر چوق فلسفه سیستملرینه ناصل وجود ویرمش اولدیغنی کوره سکز. اونوتمایکمز، ذاتاً شو کتابمز بالخاصه فلسفه نک مبحث معرفت قسمنه تعلق ایدن مسائل مختلفه یی مناقشه ایتک ایچون یازلمشدر. بوندن ده مقصد بو مسئله تساط ایدن شهباتک هانکی نقطه لرده ونه کی ضرورتلره بناء مذاهب فلسفیه یه وجود ویرمش اولدقلرینی یاقیندن کورمکدر.

ده قارت، بوتون معلوما تمک طبیعتاً انفسی اولمه سی لزومنه مجبوراً قناعت ایدنجه، عالم خارجینک استقلال وجودی بالضروره (Problématique) یعنی مختلف فیه واثباته محتاج بر مسئله شکانی آلمشیدی. حالبوکه هرکسک وعلی-الاطلاق طبع سلیمک هر دورلو شبهه دن وارسته اوله رق محققاً و مستقللاً موجود بیلیدیکی عالم خارجی یی، بویه شبهه یه دوشورمک ایکی وجهله تهلمکلی ایدی: بریسی فلسفه، دیکری ده الهیات نقطه نظرندن؛ فلسفه نقطه نظرندن تهلمکلی ایدی، چونکه طوغریدن طوغری یه ذهنی نه یلزم کردابته دوشورویور-وبوندن

اوج بش صحیفه اول یابدیغم مناظره لر سایه-سند کوستردیکم کی - کائنات مادییه و بوتون عوالم خارجییه بر نقطه هندسیه ارجاع ایدوب بر اقیوردی .

الهیات نقطه نظرندن دخی تهلهکی ایدی، چونکه دهقارته کلنجیه قدر شرق وغرب، مسلمان وخرستیان عالمترینک بالمله آلهیونی (اثبات واجب) صدنده اک قوتلی دلیلی عالم خارجیه بولویورلر و(اتردن مؤثره انتقال یعنی) عالم خارجینک وجودندن صانع حکیمک وجودینه استدلال صورتیه الهی اثبات ایدیورلردی. ایشه فلسفه والهیات تاریخنده (*Prouve cosmologique* = دلیل تکوینی) دییه مشهور اولان برهان بو ایدی . حالبوکه دهقارت ذهن متفکری انفسیه وادیسنه سور وکله مکله بوبرهان مشهورک نقطه استنادینی بیقوب محو ایتیش اولویوردی . اثر اولمازسه مؤثر ناصل اثبات اولونور ؟ ! مصنوع برشی اولمازسه اونک صانعی ناصل خاطره کله بیلیر ؟ ! ایشه فلسفه عالنده دهقارتک ملاحظاتیله وقوعه کلن تجدد بو قدر مهم بر تهلهکی قارشیسندن بولونمشدی . حتی بلکه هرکسدن زیاده دهقارت، بالذات بوتهلهکییه یاقیندن کورمش اولدینی ایچون درحال اونک اوکنی آلمق ومدهش سوء تفهملره معروض قالمق ایچون بر چاره دوشونمش واو زمانه قدر هیچ بیلمهین بر دایل ایجاد ایتمشدر . اونی مختصراً شویله جه عرض ایده بیلیرم :

واقعا انسانک اک اول و قطعاً و یقیناً بیلدیکی شی کندی وجدانیدر . عالم خارجی حقنده کی معلوماتی کندی وجداننده حاصل اولان برطاقم صورخیالیهدن عبارتدر . شو تقدیرجه عالم خارجینک استقلال وجودی شبهیه دوشه بیلیر . تلقی ایتدیکمز بوضوح و خیالاتک حقیقتاً اصلی اولوب اولماه سی موضوع بحث وجای تردد اوله بیلیر . فقط ممکنمیدرکه جناب حق وخالق مطلق بزی بهوده یره بویله خیالات ایله، اصل وفصلی اولمایان شعبده ایله، آلداتمی ایسته سین؟ بونی عقل قبول ایده مز !

شیمدی بویله دوشونورسهک - که حقیقتاً دهقارت بو صیقتی دن قورتولمق ایچون عیناً بویله دوشونمشدی - او وقت آکلارزکه فیلسوف مجددک ایجاد

ایندیکی شویکی دلیل تماماً اواسکی دلیل تکیونیك ضد مقابلیدر؛ زیرا دلیل تکیونی اتردن محاکمه به باشلایه رق مؤثری اثبات ایدیوردی، حالبوکه ده قارت، -وجودی واجب- بر مؤثر ك (عنایت) ندن قوت آله رق اترك وجود حقیقیسی اثباته چالیشور و واجب الوجوده (عبث اسناد ایتم) عقیده سنك باطل بدیهی اوله سی لازم کله چکنه اسناد ایدره ك (کائنات خارجیه نك وارلغه تعرض ایدن) شبهه یی دفع ایتمك ایسته یور؛ یعنی قبول ایدمه یور که الله انسانلری - وجودی اولمایان - اوهام و خیالات ایله عبث یره مشغول ایتمك ایسته سین! بونی تصور ایتمك باطل بدیهیدر. بناء علیه بز عالم خارجیده کی اشیانك حقایق ذاتیه لرینه واقف و عارف اوله ماسه ق بیلله اونلر بهمه حال واردر، چونکه اونلر ك خالق اولان بر واجب الوجود واردر، دیمك ایسته یور.

مالبرانش، ده قارتك ایشته بویکی دلیلنی دستور اساسی اتخاذا ایدره ك تکمیل فلسفه سنی اونك اوزرینه بنا ایتمشدر. مالبرانشك فلسفه خصوصیه سنده اك مهم نقطه (Causes occasionnelles = اسباب عادیه) نظریه سیدر؛ اوده: (انفسی بر نقطه نظر دن باقینجه اوهام و خیالاته بکزمین) شوکائات ماده ده بالجله و قوعات و حادثاتك، ینه سببیت علاقه سیله واقع و بر برینه مربوط اولدیننی قبول ایتمکله برابر، بوتون بواسباب عادیه یی (وسیله کی = Occasionnelles) عد ایدوب خالق (یکانه و حقیقی سبب) بیلیمکدن عبارتدر. مالبرانش ده قارتك دستورینه بنای محاکمه ایدنجه، بر ضرورت منطقیه الجاسیله بو نظریه طایانمش و بونك نتیجه سی اوله رق (La vision en Dieu = رؤیت فی الله) اعتقادنده قرار قیلمشدر که ماهیتاً بو بر (Idéalisme religieux = افشکاریه دینه) مذهبی در؛ و بزده (صوفیه شرق = Le çoufisme oriental) تماماً و عیناً بو اعتقادیه پیوسته اولمش و بونی بر دستور شکننده ادا ایتمشدی. ارباب تصوف اونی امام علییه اسناد ایدرلر: (وما رأیت شیئاً الا ورأیت الله فیه) یعنی «هیچ برشی کورمه دم که اللهی او شیده کورمش اولماییم» دیمکدر.

اسمنی مجبوریتله حتی بویوک بر ممنونیتله بر قاچ دفعه ذکر ایتمش اولدینم عبدالحق حامد بك، بو اعتقادك ده بك کوزل بر دستورینی ویرمشدر:

بوتون سرائر تحقیق ایدک خدا ظاهر!
بوتون مظاهری تدقیق ایدک خدا مضمون!

دیور که تماماً شو تعریف ایتدیکم اعتقاد مخصوصک نظماً بر افاده سیدر.
شونپناور، بر فطانت مخصوصه ایله کوسترییور که ده قارتدن سوکرا واونک
ایزند پیدا اولان بویوک فلسفه سیستملی، و او سیستملرده بر موقع مخصوص
اشغال ایدن مسائل اساسیه، هپ بوتقطه دن نشئت ایتشدرد؛ «حالا فلسفه ده کی
مشکلات اساسیه ده قارتک ابراز ایدوب کوستردیکی عقده اصلیه مندر جدر.
اوده شودر: بلا واسطه مطلع اولوب بیلدیکمز عالم، صرف خیالیدر، یعنی انفسیدر.
منحصرأ بزم کندی قافامزده کی تصوراتدن مرکب بر عالمدر. ایشه ده قارت
بونی کوسترمشدر؛ و بونکله برابر دایماً کندی تصوراتمک حدودینی آشرق
اونک خارجده مستقل و حقیقی بر عالمک وجودینه حکم ایتک خصوصنده بر
میل طبیعیمز اولدیغنی دخی ابراز ایتشدرد. دیور. فی الحقیقه جزئیاتده بر جوق
قصورلری، خطالری بوکون محقق بولونان ده قارتک فلسفه ایله بویوک خدمتی
ایشته بواولمشدر. و بوسایق نظر، فلسفه عالمنده بر دور جدید فتح ایده بیلمشدر.
مع مافیه ده قارتک بو حکمی، ماهیتیه تحلیل اولونسه لایقوله آکلاشیلیر که انفسی
و آفاقی فرقه استناد ایدر. بوفرقت دخی - مناقشه بحثی صدندن بولوندیغمز -
کیفیت اولی و تالیه فرقتدن عبارتدر. اگر جداً مقاومت، امتداد و شکل بزده
اولمایوبده اشیا خارجیده ایسه، یعنی انفسی اولمایوبده آفاقی ایسه همه حال
بر (خارج) اولق لازم کلیر؛ و او خارجده بزدن تمایله مستقل بر کائنات اولق
اقتضا ایدر. و اگر او کائنات حقنده کی تصوراتمز، اونک حقیقت ذاتیه سنه
تماماً توافق ایدیور ایسه، علممز یقین افاده ایدر. او وقت و او تقدیرده
بیایکی مزه اعتماد ایده بیلیرز؛ هم هر وجهله اعتماد ایده بیلیرز. بناء علیه
(Substantialismo) [یعنی عالمک خارجده بر جوهریت مستقله ایله قائم بولوندیغنی
و حقیقتاً وار اولدیغنی ادعا ایدن فلسفه، که بوکا (Réalisme = حقیقه) ده
دیرلر،] اک طوغر و مذهب اولور؛ و طبیعی درکه (Dogmatisme) [یعنی علممزمک

معلوم اولان شیلره تمامی مطابقتی ادعا ایدن و بوکا بناء حقایق اشیا بهمه حال مطلع اوله بیلیمک امکانه قائل بولونان مذهب فلسفی [دخی حقلی کوردونور ، چونکه (Réalisme) نایمدر . اگر عکسی طوغرو ایسه (Réalisme) بر ظن باطلدن عبارت قالیر و اوکا بدل (Subjectivisme = انفسیه) و (Idéalisme = افشکاریه) مذهبیری طوغرو و مقبول اولور . طیبی درکه بو تقدیرجه عالم بشر ایله ، معلوم شیلر آراسنده موضوع بحث و مناقشه اولان (کیفیت مطابقت) باشقه برمعانده تلقی اولونمق لازم کلیر . چونکه ماهیتاً انفسی اولان تصورات و احساساتمزلک وجدانمز خارجنده بر طاقم موجوداته بکزمه یوب بکزمه یه مه یه جکی ، و بکزمه دیکی تقدیرده نه صورتله بکزمه مه سی لازم کله جکی ، آرتق موضوع بحث ایدیه مز . (چونکه خارجنده مستقلاً موجود فرض ایتدیکمز) او شیلر حقنده قطعاً برشی بیلیمه دیکمز کی بیلیمک ایچونده یول یوقدر . بناء عایه اشیا خارجه مسئله سی ماهیت ذاتیه سیله (Problématique = مختلفیه) و شبهه لی برمعما اولمق درکسه دوشر . او یله اولونجه ، یوقاریده ده مین تعریف ایتدیکمز یقینون ادعای طاقیله ییقیار ، چونکه نقطه استنادی قالماز . اولسه اولسه عالم خارجی ، حلی مطلوب برجهول مطلق ، ($x = s$) اشارتیه کونستریه بیلن برمعما شکافی آیرکه ذهنمزی اونکله علاقه داربولوندیران اندیشه آنجق (فکرسبیت = L'idée de causalité) در ؛ یعنی - شیمدی یه قدر چوق دفعه سویله دیکمز وجهله - احساسات و تصوراتمزه ضروری بر سبب دوشونمکلکمز ، و اوسبی وجدانمز خارجنده ظن ایتمکلکمز در . لکن بو ایکنجی سیاق نظر طوغرو ایسه ، یعنی (Subjectivisme) حق ایسه ، بو رابطه سبیت - که حسیاتمز واسطه سیله بزى عالم خارجی به باغلی بولوندیریور ! - بر باموق ایپلکندن عبارت قالیر . چونکه خارجنده مادی اوله رق موجود و بر یرده کائن شیلر اولماسی قولای قولای تصور ایده بیلیرز ؛ فقط وجدانمز خارجنده مستقلاً موجود بر (سبب) اوله بیلیمه سنه عقل ایر . دیرمه یز . بویله برشی فرض ایتک باطل بدیهی در . طبق بنده کی قورقوبی ، خرص واملی ، فکر عدالت و استقامتی عالم خارجیده فرض ایتک کی برشی

اولور. بوصاچه در! (سبب) دیه دوشوندو کز شی بر (فکر Idée) در. بر
 (شیئی حقیقی Objet réel) دکلدور. فکر، بزم قافامزده بولونور. خارجده
 موجود اوله ماز. لکن، غریبدرکه بز، انسانلر، سببی همان دأما عالم خارجیده
 آراز. چونکه عالم خارجی ده در ظن ایدرز!.. چونکه عالم خارجی به اینانیرز!...
 بوده، يك قاریش-یق بر مسئله در؛ اوزون اوزادی به مناقشاتی موجب
 اولمش وفلسوفلری- یکدیگریته شدتله معارض-ایکی فرقه به آیرمشد. مع مافیه
 مسئله نك ماعیتی تحقیق ایدرسهك، آکلاشیلیر که ینه بونده ده اساس طویغولر منزك،
 (Objective) و یا خود (Subjective) اولوب اولماسی دعواسیدر. بوده
 (کیفیات) مسئله سنی قاریشدر مقدر نشأت ایتشد. زیرا، (کیفیات اولی)
 وارسه، اونلر، انجق (Objectif) اوله بیلیر و کائنات مسئله نك اوصافی ذاتیه سی
 کبی تاقی ایدیه بیلیر. او حالده خارج واردر؛ و خارجده بر (شی) واردر؛
 نیم وجدانمده احساسات حصوله کترین (سبب حقیقی) اودر!.. دییه دوشونمکه
 مجبورز. طویغولر منزك جمله سنی ده انفسی عدا ایدرسهك، (کیفیات اولی) اوله ماز.
 عالم خارجی دخی شبهلی بر بیلیمه جه دن عبارت قالیر.
 بوتون مذاهب فلسفیه - نظریات علم بمختصده - بونقطه اختلاف دن نشأت ایدر.
 حالبوکه بزده کی (عناصر علمیه = éléments de connaissance) بی بوسبوتون
 (خیالی = idéal) عد ایدوبده اونلره مقابل اولمق اوزره (برعالم خارجیده)
 کائن حقیقی ومادی شیلر بولونمیه سی لازم کله جکینی دوشونمک، شو یکپاره عالمی
 ایکی به بولمکدر؛ و وجدانمزله عالم مادی آراسنه بی حدود و بی نهایت براوچوروم
 آچقدور. بیوده یره بو زحمتی اقتحام ایتمش اولدوغمیزی ادعا ایله بن فلسوفلر
 يك چوقدر. چونکه تاریخ فلسفه بو خصوصده برچوق نظریات مابعد الطبیعه
 دیزوب کوستریسورکه ذهن بشرک، بر معجز شبهه ایله، آچمش اولدینی بو
 اوچورو می فلسوفلر هیچ بر وجهله طولدیرامامشلدرد. حتی او بوشلفنک
 اوسته بر آصمه کوپرو بیله آتمامشلدرد. یعنی علم انسانی ایله حقیقت اشیا
 آراسنده کی رابطه بی تعریف ایچون نه دورلو ونه قدر فرضیات ونظریات ترتیب
 ایده بیلیمشلر ایسه او نظریات وفرضیات کندی آغیرلغیه بیقلمشدر.

اون سـكـزنـجـي تـصـر مـيـلادينـك يـتـشـد بـرـوش اولدوغي داهي لردن (باركله Berkeley) - او زمانلر فرانسده اذهان متكريمه حاكم اولان - (ماديه matéréalisme) مذهب فاسفي سني بيقمق ايچون بر مجبوريت حس ايتمش ايدى. زيرا كنديسى - مزاج ذهني (tempérament mental) اعتباريله - مفرط بر ايدى آليست اولدقدنماعدا، بر بويوك ومشهور راهب، بر انكليز بيليقوبوسى ايدى. اونك ايچون تاريخ فلسفهدد (Bishop Berkeley) ديه شهرت شمار اولمشدر . بومشهور فيلسوف، سائر آلهيون وديندار متفكرين كي حواسك شهادتي انكار ايتمكله استدلالاته باندلامادى. [ايلاك والكمهم واسطه علممز حواسمزدردر.] قضيه سني بر دستور اساسي اولق اوزره - اول باول - قبول ايدوب ايلري سوردى. صوكره:

[حواسمز ، بزه انجق كيفيات اجسامدن خبر ويره بيلير . فقط اجسامك ماديقي حقدنه هيچ بر علم ويره مز؛ هيچ بر شي سويله مز!.. چونكه بلا واسطه ، [يعني طوغرودن طوغرويه وآني اوله رق] عالم خارجيدن تاقى ايدى بيلديكمز معلومات، بر طاقم احساساتدر. اونلر بزه حاصل اولان بر طاقم اتفاقات وجدانيه در . ايشته (كيفيات اجسام) ديديكمز بو طويغولرمزدردر . بيلوب بيله جكمزده بو طويغولرمزه شعور پيدا ايتمكدن عبارتدر . حالوكه طويغو منحصر آ افسي برشيدردر. وجدانمز خارجنده طويغو اوله ماز. بوتون شو عالم حادثات، كيفياتدن عبارتدر . اونلرده بزم كندى طويغولرمزدن باشقه بر شيلر دكلدر. اويله اولونجه عالم خارجي نامنه بيلديكمز ، حس ايدى بيلديكمز ، هب كندى طويغولرمزدردر . مادي بر عالم ، غريب بر خيالدر . بز اوئي وار كورويوروز؛ فقط اويله بر شيلر يوقدر كندى افكار وحسايتمز واردردر. بز عالم خارجي مستقلاً موجود ظن ايدويوروز! فقط اونك سبي وار: بز انسانلر - بك طبيعي بر مجبوريتله - بو طويغولرمزه، بر (علت موجب cause efficiente) دوشونمكدن قورتوله ميوروز؛ واو سبي طيشاريده، وجدانمز خارجنده آرييوروز ايشته بزه مجهول اولان اوسبه (ماده) دييوروز. حالوكه اويله بر شي يوقدر. ماده بر خيال باطلدر. يانكز (ارواح esprits) واردردر . كائنات ماديه، زمان ،

مکان دیدیکمز شیلر و حرك ابداع ایتدیکی خیالات باطله دن عبارتدر. ماتریالیزم فلسفه سی، بو خیالاتی بر حقیقت مستقله ظن ایتک خطاسنه مستند، اساسمز بر فلسفه در.

دیه ادعا ایتشدی.

بك مختصر اوله رق عرض ایتدیكم بوفلسفه یی تحلیل ایده جك اولور سه ق در حال اكلا رزكه (کیفیات مسئله سی) بونده ده عمدہ واساسدر. چونکه بارقله نك بو سلسله محاکمائی: و بالجله کیفیاتك انفسی اولماسی، ادعاسنه طایانیر. بو ادعا طوغرو اولونجه (کیفیات اولی) و (کیفیات ثانیه) فرقی قالماز. بوفر ق اورطه دن قالقنجه عالم مادی ایله وجدانمك علاقه سی (سببیت فکرندن!) عبارت قالیر. حالبوکه حواسمز طوغرو دن طوغرویه و یالکمز (تماس contact) ایله معروض اولان شو (عالم حادثات) ك ضمنتده یعنی آلتنده، [حقیقتاً مادی بر وارلق اولوب اولمادینی] مسئله سی، مختلف فیہ بر معما کبی قالیرسه، (سببیت فکری) صحیحاً! پاموق ایلیکسندن قوتلی بر رابطه اوله ماز؛ مسئله یی آزیحق قور جالاینجه قوپار؛ موهوم اولان بر عالم مادیدن همان فك ارتباط ایتش اولورز. هرشی، نظر مزده افکار و حسیاتدن عبارت قالیر.

کائنات مادیه یی یی قوب محو ایتمه نك فیلسوفجه اصولی و یولی بودر. برکت ویرسین که بو تخریباتدن کیمسه یه ضرر ترتب ایتمز!...

ایشته (بارقله)، (عالم مادی) یی انحق بوصورتله و بویه بر سلاح ایله یی قوب محو ایتشدیر. یعنی معلوما تمك جمله سنی حادثاته منجر قیلمش؛ حادثاتی ده کیفیاتدن عبارت عد ایتش؛ کیفیاتك جمله سنی ده انفسی اوله رق قبول ایتش و (کیفیات اولی) نامیله ماده یه اسناد و اضافه ایده بیله جك هیچ بر خاصیت ذاتیه بر اقامش که ماده اوکا استناد ایدوبده کندی کندینه قائم اوله بیلسین!... (immatérialisme) لامادیه) دیدکاری مذهب فلسفی بودر!...

بویه تهلکه لی بر سلاحله اوینامغه کلز!... چونکه بر باشقه سی ده اونی قوللا. نه بیلیر؛ وایلاک قوللانان آدمک علیه نه چویره بیلیر. نه کیم فلسفه معرکه سنده ده تمامیه حال بویه اولمش!...

بارقه‌نك معاصرې وزماننك - فكر تنقيد و قدرت تحليل اعتباريله - اك بويوك فيلسوفى اولان (دهى ويد هيوم David Hume)، عيى سلاحى اله آله‌رق بارقه‌نك فلسفه‌سى عليه نه جوړمىش وعيى صورتله اونى تخريب ايتمىددر .
باقى كنز نصل !....

(هيوم = ۱۷۷۶-۱۷۱۱)، وسائط علم بڅښده (بارقه‌نك) اساس ادماښى تماميله تصديق و قبول ايتمىش، يعنى (عالم ايله تماسمزه ايلك واسطه و) (مخبر صادق) انجق حواسمزددر . اك اول هم كندى وارلغمزدن ، همده كندىمزدن باشقه شيلرك موجوديتندن بزه خبر ويره ن (حاسه لر مز) در . هره نه حقنه بر (علم connaissance) حاصل ايدى بيليرسهك ، بوعلممزدى حاسه لر يمه مديوتز . فقط ، بوسورتله حاصل ايدى بيلديكمز معلومات ، - [طاقيله وماهيتيله dans leur totalité et par leur nature] - حادثات قياندن اوله بيلير . يعنى منحصرأ انفسى بر بيلدى دركه (حقايق اشيا La réalité des choses) يى دكل ، انجق كيفيات اشياى بزه بيلديرم بيلير . كيفيات ديديكمز شيلرده ، بزم كندى وجدا نمزده واقع اولان (تبدلات Modifications) دن عبارتدر . بز ، - يك طبيعى و يك ضرورى اوله‌رق - بوتبدلاتك ، اسباب موجبى اولماسى لازمكه جكنى تعقل ايدرز . اوليه دوشونورز ؛ چونكه ، هيچ يوقدن وسببمزد اوله‌رق ، وجدانمزه (تغيرات احوال) وقوعه كله بيلمه سنى قبول ايدى ميه يز . عالمه دائمى تماسمزه ادراك ايدى بيلديكمز شيلر ، يالكنز حادثاتدر . آثارددر . او حادثاتك سبب موجبى ، او آثارك مؤثر حقيقى سى دكلدر . اونك انجق لزومى دوشو نه بيليرز ؛ دوشونمكندن ده فراغت ايدى ميه يز !... (سببمزد برشى اوله‌ماز) قضيه سى اك عمومى بر دستور ، اك بويوك بر (معارفه = Axiome) در . فقط بالذات (سبب) نهدر ؟ .. خارجه بللى باشلى ، مستقلاً موجود بر (شى Objet) مى در ؟ .. خاير !.. اوليه برشى اوله‌ماز . چونكه (سبب) بر (كله Mot) ، بر قورى سوز ، بر (اسم Nom) دركه اونك مسماى يعنى مدلولى ، خارجه موجود و حقيقى برشى دكل ، - انجق بزم ذهنمزه موجود - بر (فكرت مجردة idée abstraite) در . بر (نسبت مخصوصه = une relation propre) يه

ویردیکمز بر اسم در. (نسبت) خارجدہ طاش و آغاچ کبی کندی کندینہ موجود برشی دکدر. بزده بر (فکر) در. فی الحقیقہ ، بوتون طویغولر مرکز عالم خارجی ایله نسبتی دوشونمکه مجبور اولونجه بر (سبب) دوشونمش اولویورز . یعنی او نسبتہ بر اسم ویرمش واونی (تشخیص personnifier) ایتمش بولونیورز . بناءً علیہ (حواس خارجیہ sens externes) مزدن کلن طویغولر مرکز - بہمہ حال خارجدہ - بر سببی اولماسی لازمکہ چکنہ حکم ایدیورز . ایشته او (سبب مجهول la cause inconnue) (مادہ) و (دیورز) .

حاجو کہ بو ، (فرضی hypothétique) برشی درکہ ناصافی ، نددہ فصافی بیله بیلیر ! (-بیت تصویری la conception de la causalité) ، (تداعی افکار association d'idées) نک برفسونی در . بوتون بو ملاحظتہ (پیسقوپوس بارقلہ Bishop Berkeley) حقیقی وتماماً حقیقی در. لیکن بونقطہ یہ کلوبدہ توقف ایتک ندن ؟ ... مادہ حقندہ کی معلوماتی تحلیل ایدنجه (مادیت مسئلہ سی la question de la matérialité) نک (مختلف فیہ problématique) بر شکل وماہیت اکتساب ایتدیکنی کوروپورز ، وقطعیاً فیلسوفانہ حرکت ایدیلیرسہ اویله درده !... فقط (روح esprit) حقندہ کی علممز ، بوندن باشقہ برشی میدر؟ . یاخود فضلہ میدر؟... مادہ علیہندہ استعمال ایتدیکمز سلاح تنقید ایله روحی دخی تشریح ایدرسہ ک کورورز کہ اودہ باطنی دوینغولر مزی تعریف واسناد ایچون-دوشونمکہ مجبور قالدیغمز- بر سبب مفروضک اسمی در. روحک (وجودیت ذاتیہ ومستقلہ existence essentielle et indépendante) سو دخی -طبی مادہ نک کی کبی- (problématique) در؛ بناءً علیہ قطعياً اثباتہ محتاج در. بذاتہا بدینی (évidente par elle-même) دکدر .

« بز، روحک کندینسہ دائر برشی بیلورمی یز؟. خایر!... (آثار les effes) نی ، حادثاتی ادراک ایدہ بیلورز !... وجدانمزه باقدیغمز زمان (بلا واسطہ و آتی اولہرق استشعار ایتدیکمز ، بولوب ادراک ایله دیکمز شی ، روحک کندیی دکدر . (ارادت ، حسیات افکار volonté, sentiments et idées) نامپہ یاد ایدہ کلدیکمز اوچ (طاقم groupes) حادثاندر . بونلر روح دکل

روحك حادثاتی ، افعالی ، آثاریدر . قطعاً وشبهه دن وارسته اوله رق بیلدیکمز
 یالکمز بو حادثاتدر . بز ، - طبقى حادثات خارجیده اولدوغی کبی . - بونلرک
 دخی بلاسبب ، هیچ یوقدن حاصل اوله بیللمه لرینه اینانه میورز ، واونک ایچون-
 درکه اونلرکده سبب موجب دوشونویورز ، آریورز ، و-همه حال ایچمزده
 فرض ایتدیکمز - او سبب مفروضه (روح) دیورز . شو تقدیرجه (ماده)
 خارجی دویغولرمز ایچون وجودینی فرض ایتمکدن قورتوله مادیغمز بر سبب
 مجهولک اسمی اولمش اولویور . (روح) ، باطنی طویغولرمز ایچون وجودینی
 فرض ایتمکده - عینی صورتله - مضطر قالدیغمز دیگر بر سبب مجهولک اسمی
 اولمش اولویور . برنجی سببی خارجده ، ایکنجیسنی ده کندیمزده آرایشمز سبب
 برنجیسنک حواس ظاهره مزله ، ایکنجیسنک حواس باطنه مزله اولان علاقه سیدر .
 ایشته بوتون بیلدیکمز بوندن عبارتدر . و علم بشرک حیثیتی ده بودر . حادثات
 دائره سنی ذهن بشر قطعاً آشوبده او پرده نک ماوراسنده نه وار ؟ . . اونی
 گوره مز ، بیا مز ! . . .

ایشته اقدیلر !... هیومک ، زبده فلسفه سنی سزه صریح و آجیق برلسان
 ایله عرض ایتدم . بو خلاصه دن آکلایه بیلیرسکمز که بو داهی فیلسوف منقد ،
 (حادثیه = Phénoménisme) فلسفه سنی صاغلام بر اساس اوزرینه وضع
 ایتمشدر . چونکه (منشأ علم l'origine de la onnaissance) بحثده (حسیه
 sensualisme) زمیندن آیرلماشدر . طیبی درکه (انفسیه subjectivisme)
 مذهبی ده تعمیرایدرك ، اوکا شکل صحیح و طیبی سنی ویرمش و حدود معقوله سنی
 کوسترمشدر . اوندن صوکره بوتون بو مسئله لرك منشأ لرینه قدر انفاذ نظر
 ایدوب مبادی علممزی تنقید ایتدیکی ایچون (فلسفه تنقیدی philosophie
 critique) بابایی (دور اخیر ایچون) (مبحث معرفت épistémologie) نکده
 واضع حقیقیسیدر . فلسفه ده (sensualisme) ی اساس اتخاذایدن برمتفکر ،
 منشأ علم مسئله سنده تجربه یه اعتماد ایده بیلیر . عقلاک و معقولاتک رولنی ، خدمتی
 ایکنجی درجه یه ارجاع ایدر . چونکه اونک اعتقادنجی حصول علمده حس ،
 اصلدر . بناء علیه بو نقطه نظر دن دخی آریجه ملاحظه اولونورسه ، شبهه

قلاز که (هیوم) ، بو کون زمانزه حاکم اولان (فلسفه تدرییه philosophique empirique) نکه ده اک بویوک مدافعی وهله مجددی در. بوندن ماعدا، (شیمدی به قدر بسط ایتمش اولدوغم ملاحظات تنقیدیه دن آ کلامش سکزدرکه) بوکبی بخلرده - بالواسطه و بلاواسطه - ادراک ایده بیلدیکمز شیلری یکدیگرندن آیری طوتمق خصوصنده بوتون فلسه و فلر بویوک بر دقت و تقید کوسترمشلر و انحق بلا واسطه ادراک ایده بیلدیکمز شیلرک وجودینه و اعتماد ایدیه - بیهل جکنده اتفاق ایله مشلردر. بو خصوصده کی تقیدک سینی - اوزون اوزادی به - ایضاحه حاجت یوقدر . طوغرودن طوغرویه ادراک ایده بیلدیکمز شیلر ، کندی طویغولرمزدن عبارتدر ، بونلرک وجودی (وجدانک شهادتی - le témoignage de la conscience) ایله مصدق و مؤید بولوندوغی ایچون شبهه کونورمز . اوکی شیلره اینانغه مجبورز. فقط عقلک بالحاکمه ، یعنی استدلال صورتیه استخراج و کشف ایده بیلدیکمی شیلر - فلسفه نظرنده - عینی اعتباری حائز دکلدر. زیرا اونلری (بالواسطه استخراج) ایتمشدر. طوغرودن طوغرویه وجدانمزده بولماشدر. عقل، استدلالانزده یا کیله بیلیر؛ لکن بزم ایچون ایلاک و صمیمی حقیقت ، کندی وجدانمزک نداسی در .

[بلاواسطه ادراک ایده بیلدیکمز حقیقت (ماده) و (روح) می در؟ ... یوقسه کیفیات ماده و احوال روحیه می در؟ ..] سؤالنی کمال وضوح و صراحتله اورطیه قویان و اوکا جواب ویره بیلیمک ایچون انحق وجدانک نداسی دیکله ین هیوم ، - شو اعتبارایله - (اضافیت علم بشر relativité de la con. hum.) مبدآنک و بناء علیه (اضافیه relativisme) فلسفه حاضره سنک دخی تمل طاشفی وضع ایتمش دیمکدر. (علم یقین certaine connaissance) دعواسی (علم بلاواسطه connaissance immédiate) دعواسنه منجر اوله جنی جهتله ، بونک دستورینی تعیین ایتمک امرنده ده (هیوم) ک خدمت فوق الماده سی ظاهر در .

بوتون بو خدمت لرینه و کندی فلسفه سنک ماهیت و قیمتنه ، منشأ و نسبتنه نظراً بو فیلسوفک هویت مغنویه سی تعیین ایدلک لازم کلیرسه - ذره قدر تردد ایتمدن ! - ادعا ایده بیلیرم که هیومک ده قارت ایله قطعاً بر علاقه سی ، بر

صهریت ذهنیه سی یوقدر. هیوم، طوغرودن طوغرویه مشهور (هوبس Hobbes) ک ولد مغویسی در؛ واونک آجدینی جیغیری برشا همراه حاله کتیرمشدر که زمانزک اک مشهور مسالک فلسفیه سی اوندن تشعب ایتک صورتیله وجود بولدی. حتی طوغرودن طوغرویه هیومه معارض اولان فیلسوفر بیله بوخارق العاده آدمک تأثیرله طوغمشلردر. خصوصاً (قانت Kant) و (رید Reid) کبی صاحب مسالک وبنام فیلسوفر - هیوم اولماسهیدی - عالم عرفانه طوغمایه جقلر وهیچ اولمازه بو حیثیله طوغمایه جقلردی.

شیمیدی بو ایکی بویوک آدمک، شو کیفیات مسئله سننده هیومه قارشی آلدقلمی وضعیته و تأسیس ایتدکلمی فلسفیه دائره بر ایکی سوز سویلیهیم: تاریخ فلسفده بک مهم بر (دور تنقیدی période de critique) تشکیل ایدن بو مشهور مناقشه، عالم مدنیته بویوک فیلسوفلمی کمال جدیت واهمیتله تعقیب ایدیورلردی. علی الخصوص او عصرک بنام حکما سنندن (سقوجیالی توماس رید Thomas Reid) ایله (کوینسبرگلی ئەمانوئل قانت Emmanuel Kant de Königsberg) [*] بو مناقشه دن زیاده سیله متأثر اولمشلردی. (پیسقوپوس بارقله)، ماده نی؛ (دهی وید هیوم) روحی - عینی سلاح تنقید

[*] بو آدملمر، بوتون دنیا و تاربخده کان یکن اک بویوک فیلسوفرلردن معدوددر. (Thomas Reid)، سقوجیانک (strachan) شهرنده (۱۷۱۰) نیساننده طوغمش ویت محترم بر اسکی عائیله مذسوب اولان پدر ووالده سی، کندیسی ایی تربیه ایتمشدی. (Aberdeen) آبردین) دار الفنوننده اکیال تحصیل ایش، فقط (هیوم) ک آثارندن متأثر اوله رق استمداد فلسفیه سی انکشاف ایتمشدر. (آبردین) و بالاخره اغلاقو Glasgow دارالفنونلرنده اوتوز سنه متادیا فلسفه خواجه لکی ایش، (۱۷۸۱) ده خدمتدن چکیلمش اولونجه یه قدر ینه فلسفه ایله مشغول اولش سکسان آلتی یاننده وفات ایتمشدر.

قانت، دور اخیرک اک بویوک فیلسوفی صاییلور. بابایی سقوجیا مهاجرلرندن بر تعلیم ایدی المانیات (آرید - برغ) شهرنده توطن ایلمه مشدی. قانت، (۱۷۲۴) ده اوراده طوغمشدر. بو داعی، هیچ او شهردن جیقاماش دریاضیات ایله برابر، هر علمی کرکی کبی تحصیل ایتدکدن صوکره، فلسفه یه حصر عمر ایلمه مش، کمال انتظام و سکونته چالیشورق سکسان بر سنه معمر اولمشدر. قانتک نفوذ مغویسی، ارسطونک کنه شبیه دره بو آدم حقنده یوزلجه کتاب یازمشدر.

ایله ! - مضمحل ایدوب برافش ، واورطه یرده - نقطه استناددن محروم - بر اساسمز (*phénoménisme* حادیه) فلسفه سندن باشقه برشی قالماشدی .
 حالبوکه - اک یقین معلوماًتمزك منبجی و منشأی صاییلان - شو حادثات عالملك ،
 بوتون قیمتی و معناسی ، بر طرفدن (ماده) به استنادی ؛ دیگر طرفدن ده
 (روح) اعتقادی ایله تحقق ایده بیلورددی . [بوایکی (تمل - دیره کی) ییقینجه ،
 اعتقاد انسانیتله برابر ، فلسفه و دینك بناسی دخی - طاقیله ! - (نیلیزم
Nihilisme) اوچورومنه دوشوب محو اوله جق ، و (مبادی قومه *principes immuables*) به استناددن محروم قالان اخلاق انسانیت (تردی *dégénérer*)
 ایده جکدر ! [دییه اکثر فیاسوفلر ، بر غریب اندیشه به دوچار اولملاردی .
 (رمید) و (قانت) ، انجق بو اندیشه ایله غیرته کلش و ذهن متفکری ،
 مهلك بر شبههك پنجه تسلطدن قورتارمق ایچون بك متین برر مبنای فلسفی
 قورمشلردر . (رمید) ، طوغرودن طوغرویه (هیوم عالمنه تنقیداته قالدیشمایه رق ،
 اوزون اوزادی به ردیه ترتینه چالیشمایه رق ، اعتقاد انسانیتی ، تحقیقاتنه زمین
 اتخاذایتمش و : (طبع سلیمه استناداً مدرکه بشر حقنده تدقیقات) کیریشمشدر .
 (۱۷۶۳) تاریخ میلادیسنده لوندرده طبع ایدیان باشلیجه اثری : (*Inquiry into the human mind, after the principles of common sense*) عنوانیله
 میدانه جیقمش و (حقیقه طبیعی *réalisme naturel*) مذهب فلسفی سنی تأسیس
 ایتمشدی . بو کتاب مهم (سقوج فلسفه سی *la phil. écossaise*) نك (تمل
 طائی) در ، اونك ایچون (طبع سلیم فلسفه سی *philosophie du sens commun*) ،
 (اسقوج فلسفه سی) دیمکله بردر . بوتون شواحوال و شرائط محیطه به باقیلیرسه ،
 (بارقله) ایله (هیوم) میاننده تحدث ایدن ، مناقشات خطیره نك ، سقوج
 فلسفه سنه - بالضروره - وجود ویرمش اولدوغی تحقق ایدر . مناقشه نك
 مبدأی ده (کیفیات) بحثی اولمشدی . بونی اونو تماماً مالی سکرز ! ...

(رمید) ، (هیوم) کسکین و مخرب ریجی لکنه قارشی بر وضعیت مخصوصه
 آلمشدی . (*sensualisme*) ی اساس اتخاذایتمش و حواسك شهادتنه بناء بر
 فلسفه سیستمی قورممشدی . فقط ملاحظات مابعدالطبیعیه سنی طبع سلیمه توفیق

ایتمشدر . یعنی فیلسوفچه دوشونورکن ، (اکثریت ناسک وانسانیتک طبعاً طرفدار بولوندوغی) اعتقاد عامیانه دن آیرمایه رق حکم ویرمشدر . ماده نك واوکا جلوه کاه اولان شوعالم خارجی نك استقلال وجودینه اینانیدیغی سوبله مش وعینی زمانده روحك دخی موجودیت ذاتیه سندن شبهه ایتک امکائی بولونمادیغی ادعا ایدرك دلالتی سرد ایله مشدر . بو اعتقاد فلسفی ، جمهور انسانیتک عقیده طیمیه سنه موافق بولوندوغی ایچون ، (رنبدك مذهبی (طبع سلیم فلسفه سی) عنوانیه شهرت شعار اولمشدر . بوکا (ثنائیه طبعیه dualisme naturel) دخی دیرلر . باب مختص و صنده بو مذاهب فلسفیه دن - ده تفصیلی بر صورتده - بحث ایده حکم .

ذهنلری چالقالایان ، اك صاغلام عقاید طبعیه یی بولانديران بو فورطنلی مناقشاندن ، قانت دخی شدتله متأثر اولمشدی . فقط بوسبوتون باشقه بر وضع وطور ایله ایشه کیریشدی: بوتون بومناقشاتک ونتیجه ده ظهوره کلن اعتقادات ونظریات متخالفه نك زردن ونصل نشأت ایتمش بولوندوغی نظردقته آلدی:

(انکلیز فیلسوفی (جون لوق) ، (تدریبون les empiristes) ك اك بویوکلرندن بری اوله رق کندیغی کوسترمشدی : بوتون معلومات بشریه نك محصول تجربه اولدوغی ادعا ایتمش و (افکار وهیه idées innées) ك ، اصلسز برظن دن متولد ، یا کلش بر اعتقاد ایدیکنی شرح واثبات ایتک اوغورنده ، اولانجه دهاسیله غیرتی صرف ایله مشدی . ده قارت (افکار وهیه) نظریه سی وضع ایتکله مبادی معلوماتك ، محصول تجربه اولمایوب (عقل صرف Raison pure) دن صدور ایتمش بر طاقم (حقایق واجبه وعمومیه vérités nécessaires et générales) تشکیل ایتدیکنی ادعا ایله مشدی . ایلك دفعه اوله رق ، ده قارتك شو دعواسی چوروتتمک قالدیشان بر بویوک فیلسوف وارسه اوده (لوق) ایدی . بو طورینه ، بو اعتقادینه باقیلیرسه ، (لوق) ، ده قارتك دکل (بهی قن Bacon) و (هوپس Hobbes) ك صادق معقی در . (افکار وهیه) اعتقادینی تجزیه ایتکله (قارتیه زاینیم Cartésianisme) ی یعنی ده قارتك فلسفه سی تاملندن

بی‌قوردی. - اولجه سوبله دیکم کی! - کیفیات اولی و ثانیه مسئله سنی ده (اولانجه اهمیتله!) ادراک ایدوب اورطیه آتان و بو مناقشانه وسیله لر و یروب میدان آچانینه بو انکلیز فیلسوفی اولمشدی. طبیعی درکه بوتون علائق و روابطی ایله بو مسئله غامضه یی تتبع ایدن هر متفکر مزاج ذهنی سنه، حتی تربیه مکتسبه سنه - آرزو! - منقاد اولمقدن قورتوله مایه جق و میلان طبیعی سنه کوره بر نتیجه منطقیه پیوسته اوله جق ایدی. ایشته مزاجی اعتباریله شبهه یه میال اولان (دهی وید هیوم) که (مدرکات حواس perceptions des sens) (حسابی sceptique) بر سیاق نظرله تحلیلله کیریشمه سی، و نتیجه ده بر (جوهر حقیقی substance réelle) بوله مایه رق (phénoménisme) ده قرار قیلماسی،.. پک بویوک و داهی بر فیلسوف، فقط عینی زمانده پک بویوک بر (آلهی théologien)، حیثینی بر راهب، متدین و صمیمی بر خرسیتان اولان (بارقله) مک - دینسز، ماتریالیزمه نفرتی و عقائد نصرانیتی تعرضدن قورتارمق غیرتی ایله - (لامادیه immatérialisme) اوچورومنه آتیاماسی، هب او مشهور کیفیات مناقشه سی سبیلله و آنجق اونک قوتیله، حیزیله وقوعه کله بیلمش حرکات مفرطه دن باشقه برشی دکلدی. نته کیم (رید) که - هیوم و بارقله فلسفه سنه قارشی اندیشناک اولوبده - طوغرودن طوغروه (طبع سلیم sens commun) ه مراجعتی واک قدیم و قویم اولان عقیده انسانیه یی اشهاد ایتمکده مسارعتی ایچونینه که مهم سبب بو ایدی. بوتون بو بویوک ذهنلر، بو ضرورتی حس ایتشلردی. قانت دخی بو ضرورتک سائقه مقاومتسوزی ایله اورطیه چیقمش و خارق العاده بر ذکای محیط کوسترمش اولان اعظم زمانه نک بریدر؛ حتی برنجیسی در! - ده نیلر چوقدر.

بو آلمان فیلسوف مجددی، (افکار و هییه) دعواسنی نظر دقتدن دور طوماتیه رق، بوتون بو مسئله لرك منبعه واردی واوراده تحقیقاته قویولدی؛ لکن، اول امرده، بر (اصول méthode) احتیاجنی حس ایتشدی: «مادامکه بالجله معلوماتك تجربه محصولی اولدوغنی ادعا ایدن وار!.. و مادامکه بر قسم معلوماتك تجربه دن طوغمش اولمایوب منحصرأ (عقل صرف Raison pure) دن

صادراولش بولوندوغنی دخی ادعا ایدنلر وار!.. او حالده، اول امرده، (عقل صرف) ی تنقید ؛ وماهیتی ، قوای مخصوصه سنی ، محتویات ذاتیه سنی تحقیق ایتک لازمکلیر. صوکره (انا تمز notre moi) ایله عالم خارجی نك تماس و مناد سبتنده هرایکی عاملک [یعنی (sujet) ایله (شئی objet) ك] حصول علمده خدمتی، رولنی، حصه سنی تعیین ایتک اقتضا ایدر. عینی زمانده معلوما تمزك منشأ اولان تجربه نك شرائطی دخی تعیین وتوضیح ایدر!.. دیهه دوشونمشدی. مشهور جهان اولان (تنقید عقل صرف Critique de la Raison Pure) نام کتاب، بو درین دوشونجه نك قیمتدار محصولی در .

فقط قاتی، بویله درین درین دوشونمکه مجبور ایدن سائق حقیقی، هیومك تحلیلالات وتنقیداتی در . قانت ، او وقته قدر (مدرسه فلسفه سنی philosophie universitaire) یعنی (رسمی فلسفه) نك تأثیریه (غفلت اویقوسی) نه طالمش قالمش ایدی . علناً اعتراف ایتشدرکه ، کندیسنی بو (sommeil dogmatique) یقینیون اویقوسی (ندن ایفاظ ایدن ، هیوم اولمشدر . بیلدیكمز قانت دخی ، انجق بو خواب غفلتدن او یاندقدن صوکره صاحب مسلك و مجدد قانت اوله بیلشمدر. درسز ، ابتدائی وبسیط بر قادر و حدودینی آشماق مجبوریتی ایله مقید بولوندوغنی ایچون ، مختصر کچورم، ملاحظات ذاتیه می تأیید ضمننده، بویوك فیلسوفلرك آتارندن استشهاداً - ایسته دیکم کبی - نقلیاند بولونه میورم ؛ بو ضروری در . لکن شو مرحله ده (لانکه F. A. Lange) نك (تاریخ فلسفه ماده Histoire du Matérialisme) نام کتابنك ایکنجی جلدنده (هیوم) ایله (قانت) ك مناسبت فکریه سنه دأر، سرد ایدلمش بولونان مطالعات مخصوصه نك بر قسمی بورایه نقل ایتمکدن کندیمی آله مایه جنم . [*]

[*] (آلبرت فزیدریخ لانکه) ، اون طوقوزنجی عصر میلادی نك اك ناند النظر و اك معلوماتی فیلسوفلرنددر . (۱۸۲۸) ده طوغش و (جورج Zürich) و (بون Bonn) ده تربیه ایدلمشدی . اولا (کولونیا Köln) رشده - سنده خواجه ، صوکره (بون) ده ، دها صوکره (جورج) ونهایت (ماربورغ Marbourg) دارالفنوننده

کتابنک ایکنجی جلدینک برنجی بابنده ، لآنکه شویله سوبلیور :
 « عالم حادنانک (محصول تفکر produit de la pensée) اولدوغنی اثبات
 ایتمکه ممنون ومستریخ اولان فیلسوفلر [۱] دن، (قانت Kant) - کال وضوح
 وصراحتله - آریلیوردی. (پروتاغوراس Protagoras) (۲)، او عالم حادنانده
 راحتسز اولمایه جق بر وضعیت فکریه آلمشدی : بر حقیقت مطلقیه مطلع
 وواصل اوله بیلیمک فکرندن تمایله فراغت ایتمش وبوتون (منظومه فلسفیه
 système philosophique) سنی (اضافیت relativité) مدعایی اوزرینه تأسیس
 ایلمشدی. [انسانه هانکی شی حقیقت کورونویورسه، انسان ایچون، حقیقت
 اودر، هانکی شی (ای bon) کورونویورسه (ای) اودر] دییوردی .
 (بارکله Berkeley)، عالم حادنانک موجودیت مستقله سنی انکار ایله مجادله
 ایلرکن، - تضیق آلتنده قالمش اولان - دین وایمانه برحیات تازه نفع ایتک
 ایستیوردی، اونک ایچوندرکه مقصد حقیقیسی میدانه چیقیدینی آندن اعتباراً
 بو آدمک فلسفه سی طوورر. (۳) (حسابیون les sceptiques) یعنی ریجی
 فیلسوفلر، هر درلو ظواهرک حقیقتنی محو ومضمحل ایتمکه اکتفا ایدیورلر،
 ویالکز (عالم افکار le monde des idées) یعنی معقولات عالمدن وعالم حادناندن
 شبهه ایتمکه قالیورلر، ذهن بشرک تابع بولوندوغنی (قوانین فیکرت les lois
 de la pensée) حقنده ده شبهه ایدیورلر وقوانین مذکورنک (علی الاطلاق

فلسفه معلمی بولونمش وبو شهرده هنوز کنج ایکن سرطان علندن (۱۸۷۵) ده وفات
 ایتشدر. (فلسفه مادیه نکت تاریخی) بیویک برحاطه ووقوف ایله یازمش وماریا یزمک
 چوروک تملارنجی گسترشدر. (۱) یعنی سطحی نظر تدریجون. (۲) (پروتاغوراس)
 اسک یونان فیلسوفلرندن وسوفسطائی ظن اولونان حکمادندی. حالبوکه، بک بیویک ونافذ
 النظر بر فیلسوف ایدی. مشهور (به ریشه سی) اک عزیز دوستی وجوهرلرینک مبرسی
 ایدی. اضافه (relativisme) مذهب فلسفی سنک پیری در. (۳) یعنی بوسر آکلاشیلدینی
 آندن اعتباراً ارتق بارقله نکت فلسفه سی انسانی جذب ایچر، مرافقی تحریک ایدمزه. چونکه
 بالخاصه فلسفه ایچون دکل دین نصرانیتک بعضی احکامنی قورتارمق ایچون تفلسف ایتدی
 ظاهر اولور. دیمک ایستیور.

احتیاجه صالح اولماسنی (la validité absolue) انکار ایدیورلر . بویله ایکن بزم (قانت)ی شدته صارسوب، (آلمان دارالفنونلری فلسفه سی la phil. des univ. allem.) چیغیرینک خارجه آتان آدم، بر (ریی sceptipue) فیلسوف اولمشدی. هم اونی اویله بر استقامته فیرلاشم ایدی که قانت سنه لرجه درین درین تفکرایدوب چالیشدقدن صوکرده (تنقید عقل صرف) نام کتابی - اولایموت اثرینی !- وجوده کتیرمش ومقصدینه ایرمشدرد. اکر، بز، قانتک (بوتون سیستمی تحلیل ایتیمه رک) فکر اساسی سنی - وضوح ایله - قاورامق ایسترسه ک، اولا (دهی ویدهیوم) دن بحث ایتک ایجاب ایده جکدر .

«هیوم، انکلتزمک - (بهی قن)، (هوبس)، (لوق) کی - ا- اک عالی متفکرینی صیره سنه اصعاد ایدیله جک درجه ده؛ قدر وحیثیتی حائز بر فیلسوفدر. حق بوتون شو انکلیز متفکرینی میاننده عجبا برنجی موقعی اشغال ایتکه لایق دکلکی دره.. سؤالی، جای ملاحظه در . بو آدم (۱۷۱۱) ده بر اصل سقوج عائله سندن (نه دیمبه ری Edimbourgh) ده طوغمشدی. (طبیعت انسان la nature humaine) حقنده کی اثری ده (۱۷۳۸) تاریخنده طبع اولونوب چیقمشدی ؛ بو کتابی فرانسه ده براستراحت کالمه ایچنده تفکراته حصر ایتدیکی زمانلر یازمشدی..... مختلف وظائف رسمیه ایله مقید بولوندقدن صوکره پارسه سفارت کاتبی ونهایت ونهایت انکلتزده مستشار حکومت (sous secrétaire d'état) اولدی. بز، آلمانلر - (غیر ارادی بر تداعی افکار assosiat. d'idees involont.) ایله بر فیلسوف ده نیجه، اونی دائمی بر کرسی تدریس اوزرنده شهادت پارماغنی قالدیرمش بر حالده تصور ایتدی کمز ایچون ، انکلیز فیلسوفلری آرمسند بر چوق رجال حکومت بولونمانه بالضروره حیرت ایدرز. ده طوغوشی، انکلتزده رجال حکومتک ، بمض کره فیلسوف اولمالرینه شائار قالدیرکه بو کیفیت ده زیاده جالب دقتدر. » [۱]

[۱] بوکون ینه اویله در. رجال حکیم بدن پک چوغی فلسفه ایله مشغولدر . بالخاصه (میسرتربانفور) و (لورد هولده بن) نامدار وبویوک فیلسوفلر دندر.

« هیوم ایشته بویله بر آدمدی، الی آخره !..... »

.....

« بوهیوم، قانت اوزرینه اویله بر (نفوذ غالب influence si prépondérante) اجرا ایتشدی که کونینسبرغلی فیلسوف (یعنی قانت !؟) هیومک اسمنی آنجق درین بر حرمت ایله یاد ایدمه بیلیردی. الی آخره!....

لأنك نك شو بر قاج سوزینی ذ كر ایتكدن مقصدم، هیومك، صوك دور فلسفه سنی فتح ایتش، و نه پیسته مولوژی بی صاغلام اساسلر اوزرینه بنا ایله مش اولدوغنه دائر - یوقاریکی صحیفه لرده - بیان ایتش بولوندوغم ملاحظاتك مباالغه قیلندن اولمادیغنی کوسترمك و قدرشناس، عالم و عادل بر آلمان فیلسوف معاصرینی شاهد کتیرمك ایچون ایدی .

قانت، هیومك تنقیدات مخربه سندن زیاده سیله اورکدوکی ایچون، نهایت بر مسلك قویم تأسیس ایتك و فلسفه نك موجودیتی قورتارمق غیرتنه دوشمشدی. مع مافیله بو انکلیز فیلسوفنك تأثیرندن تمامیه کنیدی قورناره مامش و (یقینون les dogmatiques) طرفی التزام ایدمه مشدر. صوك دورك بوتون فلسفه سیستملرینی بر قاره بولوط کبی احاطه ایدن (لادریه agnosticism) مذهبی، قانتك فلسفه سندن طوغمش، و بو سفر پك قوتلی طوغمشدر. اسکی (حسابیون les sceptiques) ك علی الاکثر اساسسز و سفسطی برشکلده - سر دایده کلدکلری اعتراضاته بدل، قانت، قوی و آهنگدار بر صورتده (آغنوستی سیزم) احکامی ترتیب و تنسیق ایتش؛ احکام مذکوریه (اضافیت علم) و (عجز بشر) زمیننه اسناد ایله مشدر. بوکا موفق اوله بیلمك ایچون (وسائط علممز les moyens de nos connais. ك) (حدود طبیعیه limites naturelles) سنی تحقیق ایتش و بوتون معلوماتك (انفسی) بر ماهیتده اولدوغنی کوسترمش؛ (زمان) و (مكان) ك خارجه آفاقی اوله رق موجود بولونماسی انكار ایتش؛ مع مافیله بو اركانك (بنیه ذهنیه منز notre constitution mentale) دن متولد برر (شكل forme) و (علم تحدیسی connaissance intuitive) ك برر (طور modalité) ی اولدوغنی ادعا ایله مشدر. یعنی خارجه زمان و مكان نامنه مستقل بر شی لر یوقدر. زمان

و مکان انفسی الطبیعه اولمله برابر اشیا و حتی افکار نوعندن ده دکادر . انجق
اونلر تحسسات و تفکراتمکز - نوعما - قابیری در . ذهنمکز بنیه تشکلی اقتضاسندن
اوله رق ، هر نه حس ایدر سهك ، هر نه دوشونور سهك مطلقا مکان و زمان ظرفنده
حس ایدر و دوشونور ز . بوتون محصولات و جدانیه مز ، بو ایکی شرط عمومی به
تابع اوله رق تولد ایدر و بو ایکی شکل عمومی ایچنده طوغار . او سبيله در که
هر نه تصور ایدر سهك همه حال اونی بر مکانده تصور ایتمکدن قورتوله مایز و بر
زمان جریانی ایچنده دوشونمکدن فارغ اوله مایز . بناء علیه زمان و مکان اشیا ی
خارجیه نك کیفیتندن دکادر ؛ احتیاساتمز نوعندن ده بر شی دکادر . یالکیز
ذهنمکز بنیه سی یعنی خلقی اقتضاسی در . ذهنمز ، اوصورتله یایلمش ، نور و نش
و تشکل ایتمشدر که زمانمز مکانمز هیچ بر شی حس ایده مز ، هیچ بر شی تصور
ایده مز ، هیچ بر شی دوشونه مز . اویله اولونجه محقق بر (حقایق اشیا عالمی
le monde des choses en soi) واردر . فقط مادام که علممز ، تشکلات
عضویه مزه تابع و عضویت مخصوصه مزله صیقی صیقی به علاقه دارد ، بز حقایق
اشیایی بيله مایز . او عالمی (حد ذاتنده اولدوغی کی ! tel qu'il est en soi)
کورده مایز . وسائط ادراکمز بزه او عالمک وجودندن نه قدر و نه صورتله خبر
و یرمیلیرسه بزم ایچون ممکن اولان علم انجق بو قدرندن و بو درلوسندن
عبارتدر . بلکه باشقه درلو یارادلش اولسه یدق عینی عالم حقیقی باشقه درلو
تلقی ایدر ، باشقه صورتده کوروردك! ... شیمدیکی حالده بر شیتی بر یرده متحیز
کورویور ز ؛ فقط وجود مطلق ، حقیقتاً مکانه مفتقدردده ، او کوردو کمز شی
- حد ذاتنده! ... - بر یرده متحیزدر ، دییه اونی اویله کورم یور ز ؛ هر نه
کورم یایر سهك ، اونی همه حال بر یرده متحیز کورمك ، ذهنمکز (ملکة ادراک
faculté perceptive) مزك بر قانون طبیعی سی درده ، اونك ایچون هر کوردو کمزی
بالضروره بر محالده کورویور ز . شو تقدیرجه (مکان) ، (حیز) ، (محل) ، بر شیتك
کندی کیفیتندن دکل ، اونی ادراک و استحضار (représenter) ایدن ذهنمکز
فارغ اوله مادیی بر (طور استحضار mode de représentation) در . تصور مزك
بر (شرط لا بدنی condition sine qua non) و ضروری سی در . بزدن دهامکمل

مخلوقات تصور ایدیه‌بیلیر که ادراك و تعقل ده زمان و مكان قیدیه مقید
اولمایا بیلیرلر. [*]
الی آخره!

مواقع مخصوصه سنده لزومی قدر شرح و تفصیله مجبور بولونه جق اولدوغم
بو بویوک و مشهور فلسفه سیستملرندن - شوراده مختصرأ - بحث ایتمکده مضطر
قالیشمه سبب ، بو تفکرات و تصوراتک ینه کیفیات مسئله اصلیه سیله علاقه‌سنی
ابراز ایتمک و یوندن صوکره کله جک بابلرده مذاقشه ایده جکمز اختلافات مذهبی
مسائلنه قارشی ذهنکیزی حاضر لامقدر . پک مختصر بر صورتده وانجق قسماً
عرض ایتدیکم شو ملاحظه - آتی تحلیل ایدرسه کز قانتک ، جریان بحثی نه درلو
اداره ایتش و کیفیات اولی مسئله‌سنی نه شکله قویمش و تکمیل بو مناقشاتی نصل
بوسبوتون یکی بر وادی‌یه سوق ایده بیلمش اولدوغنی - کندی کندیکزه! -
کشف ایده بیلیرسکمز؛ قانتک نصل ، نیچون وهانکی زمین ده بر (مجدد novateur)
اولدوغنی ده آکلار سکمز .

آکلار سکمز که مکانک خارجه مستقل بر شی اولماسی ، یعنی (آفاقی
objectivité) نی رد وانکار ایدن قانت ، (شکل) و (مقاومت) ی ماده‌نک کیفیات
ذاتی‌ه سی اوله رق قبول ایده مزدی . بو امتناعک پک ضروری و منطقی بر سببی
وارد که هرکس دوشونجه اونی کشف ایده بیلیر : شکل ، انجق مکانده
اوله بیلیر ؛ چونکه (حیز) ایله تعین ایدر . (حیز) دیمک ، (مکان محدود
espace limitée) دیمکدر . مکان ، (بذاته en soi) خارجه موجود برشی
اوله رق قبول ایدیه مزسه ، اونک انجق بر (قسم محدود) ی ، بر (مقدار معین) ی
اولان (شکل) ک خارجه استقلال وجودنی ادعا و یاخود تسلیم ایتک ممنوع در .
کذلک (مقاومت) ایچون دخی عیناً بوا متناع واردر . واقعا مقاومت دیدیکمز
کیفیت معلومه‌نک مکان ایله طوغرودن طوغرویه بر مناسبتی یوقدر کی کورو-
نور . فقط مقاومت ، حین تصادم ده (یعنی ایکی شی بر برینه چارپدینی زمان!)
عدم تنافذ دیمکدر . بوده ایکی شیئک ، عینی زمانده عینی مکانی اشغال ایده مه‌مه‌سی

[*] بزم قینالی زاده علی افندی مرحوم دخی عیناً بویله یر فکر بیان اینمشدر .

دیمکدر، اوتقدیر جه عدم تنافذ تصویری، ینه ماده سز و مکان سز اوله ماز، نته کیم ماده یی مکاندن منز و معرا تصور ایده بیلیمک دخی ذهن بشرک قدرتی خارچنده در. باقیکنز شیمدی: قانت، (خارجده مکان یوقدر!) دیمش؛ بو، یکی برادعا دکادر. الکاسکی هند فلاسفه صوفیه سی و بزم شرق صوفیونی و بوتون (ایده آلیست) لر، بو اعداده بولونمشلر و زمان و مکانی بر (شعبده حسیه phantasmagorie des sens)، یعنی غلط حسک بر غریب فسونی کبی تلقی ایتمشلردی. قانت، برنجی اعداده اسلاف ایله اتفاق ایتدیکی حالدده ایتکنجی ادعای قبول ایتیمور: (خارجده مکان یوقدر؛ فقط خارجده تلقی ایتدیکمز مکان و زمان، بر شعبده حسیه دخی دکادر. اونلر (تحدس intuition) و (مدرکه entendement) کونلری در. دوشونجه لر مرکز، طویغولر مرکز قابیلری در. اونک ایچون ذهنمیزک بنیه تشکلی اقتضاسنددرلر. بز، احوورتله یارادلمشز و ذهنمیز اووجهله تشکل ایتشدرکه نه حس ایدر، نه دوشونورسک اونی بهمه حال بر مکان ظرفنده و بر زمان جریانی ایچنده حس ایدر و انحق اوپله دوشونه بیلیرز. بو ایکی قانون، حیات وجدانیه مرکز باشلیجه ایکی (شرط اساسی conditions essentielles) سی در. وجدان، شعور، به لیرمکه باشلادینی کبی، هر حس و هر دوشونجه مکان کسومه سنه بورونور و زمان جریانه تابع کورونور. باشقه چاره، باشقه امکان یوقدر.

بویله محاکمه ایدیلنجه کیفیات اولی و ثانیه فرقی قالماز؛ حتی بومسئله شکل سابق و اصلیمی اوزره قالماز. فضیه اوله رق، خارجده بر وجود مستقل قبول ایدوب ایتمه مکه قانتک شو نظریه سی متأثر اولماز. زیرا مادام که مکان و زمان، بزم کندی ذهنمیزک بنیه تشکلندن منبعث برر (modalité طور ادراک و شرط تصور) ایمش؛ یاخود کندی تعبیر مخصوصنجه (formes de l'intuition صور تحدس) ایمش؛ خارجده مستقلاً موجود اوله ماز؛ فقط بر (غریب فسون و یرنک une étrange hallucination)، بر (غلط حس illusion des sens) ده اوله ماز. بالعکس حیات وجدانیه مرکز قوانین طبیعه و اساسیه سی در. لکن انحق بزه، بزم کبی یارادلمش انسانلره مخصوص قانونلر در.

بناءً عليه ينه خارجه وعالم حقیقتده بر (وجود مطلق être absolu) اوله بیلیر؛ فقط او وجود مطلقک بهمه حال، (شکل) و (مقاومت) نانه بر طاقم کیفیات ذاتیه-یی اولیق لازمکمز. نته کیم، قانت وجود مطلق و علی الانفراد (حقایق اشیا les choses en soi) بی قطعاً قبول ایتمش، فقط اونلرک زمان و مکان، شکل و مقاومت ایله متکیف و علاقه دار اولما-یی احتمالی شدتله نفی وانکار ایله-مشد. حتی زمان و مکانک انجق بزم و بزم شو حالمزه مخصوص (قوانین فکرت les loi de la pensée) دن اولدوغنی قبول ایتدیکی ایچون [بزدن دها زیاده کامل یارادلش مخلوقات تصور اولونه بیلیر و اونلرک - بزم کبی بالضروره - زمان و مکان ایله مقید اولمایه قی حس ایده بیلیمه لری، دوشونه بیلیمه لری ده تصور اولونه بیلیر !] دیمشدر.

سزه - نویره جویره کو-تره رک - هر زاویه سندن عرض ایتک ایسته دیکم شومسئله نك مناقشه سندن آ کلیورسکیزک، قانت، ایکی جریان نهایت ویرمش و بو کیفیاب مسئله سی، بوسبوتون باشقه بر شکله افراغ ایتمشدر. کندیسندن اول، (کیفیات اولایی قبول ویا رد ایتک، عالم خارجی نك استقلال وجودینی قبول ویا رد ایتک) دیمک ایدی. چونکه کیفیات اولی مکانه محتاج و مفتقر کورونیوردی. قبول ایدنلر مکانک (آفاقی برشی) اولدوغنی تسلیم ایتمش اولویورلردی. رد ایدنلر مکانک بر (شعبده حس) اولدوغنی ادعا ایتمش اولویورلردی. قانت، مکان بوسبوتون باشقه بر ماهیت ویرمکه بو کیفیات مسئله سی، بو (قیاس مقسم dilemma) ک دائرة حبسندن قورتارمشد. بناءً عليه کیفیات اولایی رد ایدوب ایتمه مکله حقایق اشیایی و وجود مطلق رد ایدوب ایتمه مک آرمسند و رابطه قالمامشدر. قانتک اک اهمیتلی کشفیاتندن بری ایسته بودر. انکلینز فلسفه سنک اک زیاده اعتراضی جلب ایدن نقطه دخی بودر. [*]

قانتک ایزندن آیرلایه رقی یورون و صوکره باشلی باشه بر فلسفه تأسیس ایدن مشهور (آرتور شوپنهاؤمر Arthur Schopenhauer)، بو مسئله یی

[*] بو مناقشات زمان و مکانک ماهیت ذاتیه سنه عائد بولوندوغی ایچون کتائزک ایاکنجی جلدینی تشکیل ایده جک اولان (مبحث وجود ontologie) قسمته ترک و حواله اولونمشد.

تذکر ایدرکن قانتک سیاق نظرندن آیرلامشدر . بو فیلسوف ، (سپینوزا Spinoza) نك (جوهر متمد = substance étendue = substantia extensa) یعنی ماده ، (جوهر متفکر = substance pensante = substantia cogitans) و انفسی برشی اولدوغنی (sante) یعنی روح حقنده کی ملاحظات معروفه سی تنقید ایتدیکی صیروده ، امتدادك یعنی مكانك صرف (استحضاری representatif) و انفسی برشی اولدوغنی ادعا ایدیور : « بز ، اشیایی انجق متمد ، یعنی ابعاد ثلثی حائز اولدوق تصور واستحضار ایده بیلیرز . یعنی باشقه درلو حس ایده مه یز . دوشونه مه یز . فقط بوانفسی برشیدر . مسئله اوراده دكل ، بزم استحضارات و تصوراتمخ خارچنده ، متمد و ابعاد ثلثی حائز برشی وارمیدر ؟ . یوقی در ؟ .. حتی علی الاطلاق برشی وارمی در ؟ .. اونی بیلیمکدر ! قانت - رد ایدیلهمز بر درجه قطعت ایل - اثبات ایتشدرکه ، امتداد ، بزم ذهنمك قابلیت استحضاریه سنه مربوط برطرز ادراك در . مكان دخی امتدادك برشکلی در . او حالده ذهنمخ خارچنده امتداد یوقدر ، امتداد اولمانجه شو عالم مادیاتك ده اصلی فصلی یوقدر . « دیور وینه عادی ایده آیزمه دوشویور . [۰]

بر باشقه یرده دخی : « اصل کیفیات اولی ده نیلن شیلر کیفیات ثانیه در . بالعکس کیفیات ثانیه دیدیکمز احساسات ، اقدم در . بناء علیه بوتعبیرلرک نسبت مضمومتی آلت اوست ایتملی : برنجیلره (ثانیه) ، ایکنجیلره ده (اولی) دیملی ! . « دیور .

دیدیکی - بو سفر - پك جدی در . چونکه قوقو حس ایتك ، رنگ کورمك ، دیل ایل برشی طامق ، زمان و مكان حقنده بر فکر حاصل ایتکدن اقدم در . سلسله عضویت ایچون ده بویه در ؛ انسانك تکاملی ایچون ده بویه در . شبه یوقدرکه بر چوجوق کیفیات اولی حقنده بر فکر حاصل ایده بیلیمك ایچون ، خیلی تکامل ایتمش و (مجردات فکریه) به قابلیت اکتساب ایده جك درجه بی بولمش اولمالی در . حالبوکه کیفیات ثانیه بی طوغار طوغار ادراك ایدر .

چوق فیلسوفلر ، حتی بوتون ایده آلیستلر شوپنهاوهرك فکرنده درلر .

[۰] (Parerga und Paralipomena) نام رساله سنه . بو سوزلر مندرجدر .

هرشیدن اول حرکتی ادراك ایتمه که باشلا دیغمزی و ابعاد ثلثه و جهات و مقاومت حسلرینک حرکت حسندن (یاواش یاواش) تولد ایتمش اولدوغنی قوتله ادعا ایدیورلر .

بسیق و لوزی علمی بو ادعایی جدیدتله تاقی ایدیور .
 بناء علیه کیفیات اولی و ثانیه مسئله سنی صرف انفسی تاقی ایدرك آلت اوست ایله بن شوپنهاؤوه، اولر آره سنده کی فرقی - اعتباری - اولمق اوزره قبول ایدوب اسکی تقسیمه قطعاً اهمیت ویرمه مشدر؛ یاقینده کورده جکزر که بویه دوشونن فیلسوفلر پک چوقدر . مع مافیه ، (ماتریالیزم) فلسفه سنه زیاده سیله دشمن بر (ایده آلیست) اولمقله برابر شدتله منکر و ملحد اولان بو غربی آلمان فیلسوفی عالم حادثاتی ، صرف انفسی اوله رق تاقی ایتمش و بونکله قناعت ایتمه یوب، یعنی (*phénoménisme*) دائر دسند قالمایوب ، شو عالم شهود ضمنده (وجود مطلق) نامنه بر وارلق قبول ایتمشدر که، حادثاتک سبب موجبی در ؛ لیکن الله دکلدر یا لکیز بر (قوت) در که، بو فیلسوف اوک (ارادت = *wille = volonté*) دیور . و هر درلو صفات الوهیت دن معرا اوله رق تصور ایتدیکی بو (قدرت کلیه) نک (قیومیت و صمدانیت *aseité*) ندن بحث ایتدیکی حالده، ادیانک و کتب مقدسه نک خالقنی انکار ایدیور .

شوپنهاؤوه رک بو فکر غربی و بو طور عجیبی - بر چوق و جهله - شایان دقتدر . (انکار عنادی) سنه رغماًینه بر (وجود مطلق) قبول ایتمه که کی اضطرار ندن صرف نظر ، او وجود مطلق (ارادت) صورتنده تلقی ایتمه سی مهمدر . اولاً بزم کندی شخصیت مزده اساس اولان شی، (صور فکریه = *formes de la pensée*) دکل (ارادت *volonté*) در . بزم اناتیمزک مابه الفیامی انحق او قدر تدر . عالم حادثاتک جوهر اصلینشی تشکیل ایدن (حقیقت اشیا) دخی او یله بر قدرت اولونجه ، بوتون ذوی الحیات کندی روحلریله؛ بوتون مادیات، حرکتیه قابلیت لریله او ارادت کلیه نی تمثیل ایدیورلر و اونکله تمس دائمی ده بولونوبورلر دیمکدر [*] .

[*] برسیاق نظر، اسکی هند فیلسوفلرینک و بزم صرفه نک اعتقادینه بکدر بر (نظریه

ثانیاً، هر شئیك جوهر اصلی سی بر (قدرت مطلقه) اولونجه، ارتق اوکا کیفیات اولی نامیله بعضی (تطورات وجود modalités d'existence) اسناد ایتك عبث اولور. چونك (قوت) و (قدرت)، شكل هندسی به، مقاومت مفقور دكلدر. بو اوصاف انجق مادی الطیمه اولان بر وارلقده آرانیلیر.

آكلاشیلوركه وجود مطلق مسئله سنده ارادتی (-كه شوپنهاؤور لساننده قوت دیمكدر!)، جوهر اصلی اوله رق قبول ایتكله یعنی مابعدالطبیعیات بمختصه (قوانیه = dynamisme) مذهبی ترجیح ایتكله شوپنهاؤور، کیفیات اولی و ثانیه مسئله لرینی بر طرف ایتش، حكمدن اسقاط ایله مش واو دائرة مضیقه خارجنه حقیقه بیلمشدر.

ایشته بوده شوپنهاؤورك كندی كشی در. حتی كندیسی بالذات بو كشفنه بویوك بر قیمت و بریور و (افلاطون) ایله (قانت) دن بشقه كیمسه ی بكنمه ین بو مغرور المان فیلسوفی: (ایشته قانتك الكمهم قصوری بو حقیقتدن غافل قالمش اولماسی ایدی؛ اونیده بن كشف ایتدم و قانتك فلسفه سنی اصلاح وا كال ایله دم!) دیور.

المان فلسفه سنك جریانی قانت و شوپنهاؤورك تاثیریه بویله بر استقامت جدیده آله رق، کیفیات مناقشه سنی قوری بر ساحلده ترك ایتدیكي حالد، انكلیز فلسفه سی (phénoménisme حادیه) و (relativisme اضافیه) دائرة سندن آیرمایه رق جریان طبیعی سنده دوام ایله تكامل ایتش وبالضروره - او اسکی- کیفیات مسئله سنی اورتوب براقه مامشدر. حتی شوپنهاؤورك و فاندن خیلی سنه لر صوكره ینه بو مسئله حقدده (Sir W. Hamilton سر ویلیام هاملتن) اوزون اوزادی به ملاحظات بیان ایتش و بونكده وفاتی متعاقب (جون ستوئت میل I. S. Mill)، (هاملتنك فلسفه سنی تنقید و تدقیق) ایچون قوصوقه

علم) در. شوپنهاؤور، پك اوقومش و معلومات متنوعه اكساب ایتش تیلوفلردن بری ایدی. هندك (Upanishad) و (Vedantâ) نامیله معروف اولان مغلذات انارینی دقتله تتبع ایتشدی. اونرك (ایده آلیست) فلسفه سنی زیاده سیله تحسین ایدیور و اوروپا فلسفه سنی ترجیح ایلیور.

بر اثر یازم شدی. [*] میاک الکه مهم بر اثر فلسفی سی ده بودر. میل، بوکتابنده (هاماتن) که تناقض لرینی اورطیه قویه رقی فلسفه سی شدتله ردایدیور. و تناقض الکه بویوکنی کیفیات اولی بختده بولیور .

بوکتابی (میل)، (هاماتن) که وفاتندن صوکره یازمش اولدوغی ایچون، هاماتن جوابه قادر اوله مازدی. فقط اونک باشلیجه شا کردی راهب وفلسوف (منسل Rev. Mansel)، میاک اعتراضاته جواب ویره رک خواجه سی مدافعه ایتمک چالیشم شدی. بونک اوزرینه عالم عرفان چالاقلاشم وبلای باشلی فیلسوفلردن یکر می، یکر می بش کیشی بخته قاریشمش در. بونلردن کیمیی مفصل مقاله لر یازهرق، کیمیی آریجه کتاب نشر ایدره رک بر طرفی التزام ایتمشدر. فقط بو مناقشه نکه زمیننی تشکیل ایدن اساس بحث، ینه (کیفیات مسئله سی) ایدی .

بونندنده خلاصه بر فکر ویروب باشقه بر بابه کچیم :

سرویلیام هاماتن، اساساً سقوجیالی ایدی. بناء علیه اول امرده (سقوج فلسفه سی) نی لایقوله تحقیق و تتبع ایش و ماهیتی تبیین، قصور لرینی تنقید و اصلاح ایده بیلک ایچون بو (مدرسه école) نکه مؤسس واک نامدار فیلسوفی اولان (Thomas Reid) که آثار فلسفه سی شرح و تحلیل ایله مشدی. بر قاج دفعه سویله مش اولدوغم وجهله تاریخ فلسفه ده بویوک بر احاطه علمیه کوسترمش اولان بومعلم فیلسوفک باشلیجه اثری (رهید حقنده محاضرات Dissertations on Reid) نام کتابی در. هاماتن بر چوق افکار فلسفه سی بوکتابه - ملاحظات، حواشی و تنقیدات صورتنده - درج ایتمشدر. حتی - مع التأسف - ملاحظات مخصوصه سی اکمال ایده مەدن وفات ایتمشدر .

[*] بو مهم کتاب هرسان مدنی به ترجمه اولنمشدر. اسمی بودر :

(Examination of the philosophy of Sir W. Hamilton) آتی یوز صحیفه دن آزا اولایان بو اثرده فلسفه نکه منطق و سبقه لر و نکه ایجه واک فاض مسئله لر، بویوک بر نفوذ نظره تحلیل ایدلشدر. میل بوراده کندی نظریه علمیه سی ده - بالوسله - بسط ایتمشدر.

بوکتاب تتبع اولونورسه کورولوبورکه هامالئن، هرشیدن زیاده (مبحث معرفت) جهتی تنویره صرف همت ایتش و (نظریه علم Théorie de la connais.) مسئله سیه جدی بر صورتده اوغراشمش حتی بو خصوصده (وجدانک شهادتی Le témoignage de la conscience) نی اساسی اتخاذ ایدرک مذاهب فلسفیه ک تصذیف طبعی سنی دخی بامشدر. کنذینک فلسفه سی دخی بو تبعاتنک نتیجه سنده حاصل ایتش اولدوغی اعتقاد ضروری اوزرینه مؤسدر .

هامالئن (رهید) ک نظریه معرفتی تعقید ایدرکن ، - سقوچ فلسفه سنک پیری اولان - بو آدمک افکارندن متأثر اولمش ، وخصوصاً کیفیات مسئله سی بارماغه طولایه رق ای دن ایی مناقشاته کیریشمش و فقط - لایقوله تتبع ایتش بولوندوغی - قانتک ده نفوذ مغوییدن کنذینی قورتاردمامشدر . حالبوکه (بهی قن) و (هوبس) دنبری مستقل و (تدریجی empirique) بر نقطه نظر تعقیب ایدن و بو استقامته کوره بر وادی جریان آچوب کیدن انکلیز فلسفه سندن، قانتک فصل آیرلدیغی و نیچون آیرلدیغی - برازیو قاریده David Hume بحثنده - مختصراً عرض ایتشدم. بناء علیه قن دنبری آلمان وانکلیز فلسفه سی زمان و مکان بحثنده و بو ارکانه تابع اولان کیفیات مسئله سنده برچوق وجهله متباین نقطه لر ابراز ایتشلردی . واقعا هرابیکی فلسفه دخی - تحلیلات پسبقو- لوژیة (analyses psychologiques) نی اصولده رهبر اتخاذ ایتمکه ، نهایت (حادثیه phénoménisme) و (اضافیه relativisme) زمینده برله شوب قرار قیلمشدر ، و (حادثانندن باشقه برشی بیله میه جکمز) متفقاً اعتراف ایدرک مابعدالطبیعیات مسائله (آغوستینیزم، یعنی لادریه) دستورینه صبی صبی به صارملشردی . مع مافیه عینی نتیجه لره - بالضروره - پیوسته اولان هر ایکی طرف دخی باشقه باشقه وادیلر تعقیب ایدرک بو حدوده وارملشردی . سیاق نظرده و مسائل متفرعه ده ینه آرده برچوق اختلافات واردی . بوندن طو- لای درکه یا برطرفی، یا خود دیگر طرفی تماماً و طاقیه التزام ایتک لازمکلیردی. آره پرده - حل و تسویه اولونامش - برچوق اختلافات واریکن، و اختلافات

مذکوره اساسلرده مباحث نظرندن تولد ایتش بولونبورکن آلمان وانکلینز فلسفه‌سنی تألیفه قالدیشمق برچوق محظوراتی وتنقیدات محقه‌یی دعوت ایده بیلیردی. ایشته بر طرفدن (رهید ک)، دیگر طرفدن ده (قانت ک) نفوذ وتأثرینه طوتولان هاملتن، انکلینز و آلمان فلسفه‌سنک آره‌سندده صیقیشدی قالدی و (هیوم ک) آچیش اولدوغی چیغیردن آیرلایه‌رق، انکلینز فلسفه‌سنی اعلا واکال ایدن (جون ستوته میل Mill) ک موخذات شدیدسینه وسیله ویردی.

بو سویله دکلامی شیمیدی ایضاح ایده‌جکم و کوره‌جکسکزکه بونده‌ینه مرکز ثقلت ونقطه‌ استناد، کیفیات اولی و نانیه مسئله‌سیدر. بوتون بحث اونک اطرافنده دوران ایدیور. بوتون مبنای مناقشه اوکا استناد ایدیور.

سر ویلیام هامیلتون محرراتنده وبالخاصه (Discussions مناقشات) نامنده‌کی کتابسندده (Reid) حقنده یازمش اولدینی (Dissertations محاضرات) ندّه مذاهب فلسفه‌نک طبیعی بر تصنیفی یامش و بونده وجدانک شهادتی اساس طوتمشدی. مذاهب مختلفه و مشهوره‌یی تنقید و اکثریتله رد ایدرکن کندنجبه مقبول و ملتزم اولان مذهب مخصوصه کوره بر نظریه‌ علمیه بیان ایدیور. صراحتاً آکلاسیلیورکه بوفیلسوف (ثنائیة طبیعیّه Dualisme naturel) مذهبی تصدیق ایدیور. واقعا کندیمی قانت ایله رهید آراسنده بر موقع طوتمش، فقط هر ایکسینکده تأثیرندن قورتوله‌مامش اولدینی ایچون اولاً اضافیوندندر. بزم ادراک ایده‌بیله‌جکمز حقایقک جمله‌سی ده هم بزه‌نسبتله هم ده ادراک اولونان شیلرک یکدیگرینه نسبتله اضافیدر. بناءً علیه بز یالکز صور حادثاته واونلر آراسنده جایگیر اولان روابط مطرده‌یه یعنی او حادثاتک قانونلرینه مطلع اوله‌بیلیرز. بوندن ایلری کیتمک احتمالی یوقدر. بز وارلکک دائماً بر شیهه مقید و مشروط اولان صور حسیه و معقوله‌سنی ادراک ایده‌بیلیرز. وجود مطلق حقنده هیچ بر فکر پیدا ایده‌مه‌یز. حتی بوندن مکمل یارادلش اولسه‌یدیق دخی ینه بیلوب بیله‌جکمز حادثات قیلنددن اولوردی. بالخاصه وجدان، یعنی شعور ایکی عنصر علمک تقابلی سایه‌سندده ممکن اوله‌بیلیر. بریسی (Le moi)، دیگرکی (Le non moi) درالک جزئی بر (فعل شعور acte de

conscience) ده بيله بوايكي عنصر حاضر در ويكديگرينه مربوط اولمقله برابر مقابله در. انسان نه وقت وجداني يوقلارسه كنديني و كندندن غيري بر شيك موجوديتي بر آنده وعيني وضوح و صراحتله ادراك ايدر. يالكز بنسلكي ادراك ايتك ممكن اوله مديني كي كندى بنسلكنه شعور حاصل ايمه دن، ماده نك موجوديتي حس ايتك دخي اونسبتده ممتنعدر، دييور. بناء عليه اضافيوندن اولمقله برابر بوايم عيني زمانده (حاديون phenomenistes) دن و مابعدالطبيعات مسئله سنده لادرييونندركه بوده ضروري در چونكه بوايج مسلك عيني مبدادن نشئت ايدر و بربريني طوتار.

هاميلتون (اضافيت علم بشر) تركيبيله شهرت بولان بو مذهب فلسفي به او قدر اهميت ويرمش و علم بشرك حدوديني اوقدر صيقي صيقي به تعيين ايتك ايسته مشدي كه اللهك بيله طوغرودن طوغرويه و عييج بروجهله ادراك و تصور اولونه مايه جغني، يالكز وارلغني وجدانا تسليم و تصديق ايتك لزومي محقق بولونديغني فقط بولزومك بر علمه مقارن اولمقندن زياده (ايمان foi) ه مستد بر قناعت وجدانيه دن عبارت اولديغني ادعا ايله مشدر. فرانسر فلاسفه روحيو نندن مشهور (ويكتور قوزن) اضافيت عام بشري تسليم ايتمكله برابر اللهك طوغرودن طوغرويه كشف ضمير ايله ادراك اولونه بيله جگني دخي ادعا ايله مش و بو مسئله ده صوفيه كي دوشونمشدي. هاميلتون معاصري اولان بو فرانسر فيلسوفني شو ادعا سنندن طولاني تنقيد، تخطئه ورد ايدييور و ده مين عرض ايتديكم ملاحظاتك بر قسمي او رديه سنده ايضاحات كافيه ايله سرد ايدييور. اضافيت علم بشر بختده بودرجه صيقي و قطعي طاورانان هاميلتون، كيفيات بحثنه كلنجه يالكز اولي و ثانيه فرقي ايله اكتفا ايمه يرك بر او چنجي صنف كيفيات دخي دوشونيور و (ثانويه اولي = secondo-primaires) ناميله آرايه صيقتشديرييور. بوندن اولكي صيفه لرده بو انكاي فيلسوفك شو خصو صده كي افكاريني مختصر آ اولسون عرض ايتمش و هربرت سپه نسر ك دخي بو مسئله ده تماماً هاميلتونه اتباع ايتمش اولديغني كوستر مشدم. فقط هاميلتون فضله اوله رق ادعا ايدييور كه كيفيات اولي، يعني مقاومت، امتداد و شكل خارجه

مستقلاً موجود بولونان مادهیه عائد واونده حقیقتاً موجود کیفیات اصلیه دندر. بز او کیفیاتی طوغرودن طوغرویه ادراك ایتمکده بز. المزی یازی ماصه سنه قویدیفمز کچی بوماده نك شکلی، امتدادی و بزّه مقاومت ایدوب قارشى قویدیفی بکیدن حس ایدر، آکلار و بو حقیقتی تسلیم ایلرز، دیبور.

جون ستوارت میل هامیلتونی بو نقطه ده یاقه لایور و بو وسیله ایله اوزون بر مناقشه میدان آچور:

(هامیلتونك فلسفه سنی تنقید و تدقیق) نایله یازمش اولدینی کتاب مهمك بالخاصه ۱۳نجی باب مفصلی مختصر آ کیفیات اولی مسئله سنی موضوع بحث ایدیور و کوستریور که بوتون اختلافانك اساسی بو مسئله یی صور مختلفه اوزره تلقی و حل ایتمکه چالیشمقدر.

بو کتابنده يك درین ملاحظات پسیقو لوزیه و مسائل بعد الطبیعیه کیریشن جون ستوارت میلک سوزلرینی بورایه نقل ایده جك دکلم. یالکمز رديه سنده اساسی تشکیل ایدن و هامیلتونك تناقضی میدانه قویان دلیلی مختصر آ سزه عرض ایده جکم.

میل وجدانی کندى نقطه نظرندن اولاً تحلیل ایدیور. اینجه دن اینجه وادیلره دو کوله رک کوستر مک ایسته یور که وجدانك باشلیجه محتویاتی و شعورك ایکی عنصر مقابلی تشکیل ایدن (انائیت) حسی ایله (غیر انائیت) حسی بزده یاواش یاواش تکمل ایتش و نهایت بربرندن آیرنشدرد. حیاتمز، نشوونما مزه تعلقی اولان حسیات صمیمیه نك مطرد بر صورتده تکرری بزده (sujet نفس) حسی تولید ایتش، حیاتمزله طوغرودن طوغرویه علاقسی اولمایان احساساتك یزه مطرد بر صورتده تکرری دخی (objet شی)، (غیرانا non moi) حسی وجوده کتیرمشدر. اکثر فیلسوفلرک کیفیات تالیه دیدکاری طویغولر برنجی حس ایله یعنی، (sujet نفس) ایله علاقده داردرد. کیفیات اولی دیدکاری طویغولرده ایکنجی حس ایله یعنی (objet شی) ایله طوغرودن طوغرویه مناسبتده در. حتی بز یالکمز حس شامه مز، ذائقه مز و سامعه مز اولسه یدی و فقط بر حسك وقوعی بهمه حال دیگر حسله مترافی بولونسه یدی، بز او حالده بیله برشیده، یعنی خارجه مستقلاً موجود

بر جوهره، بر ماده‌یه اینانه‌بیله جکدك. بو کونکی حالمزده مقاومت حسی بوتون حسیات سائره نك (نوه nouan) سنی، زمین اساسیسی تشکیل ایدیور وزاو کا بناء احساسات سائره‌یی مقاوم بر شیشه عطف ایتمکده مجبور بولونیورز. و بناء علیه خارجده کندی باشنه موجود مقاوم بر شیشه حقیقته اینانیورز. حالبوکه بو اعتقادی بزده تولید ایدن، (حس عضلی sens musculaire) در. مثلاً: قولزی فضا ده بوشی بوشنه هر طرفه ساللادیغمز زمان انجق حرکت، جهت و امتداد طویغولرینی تحصیل ایده بیلیرز. فقط قولزی ساللارکن بر مانعه تصادف ایدیور نیجه او وقت مقاومت حسی دخی طویارز و بونی مطلقاً مقاوم بر شیشه وجودینه حل ایده‌رز. حالبوکه بو حسلرک جمله‌سی ده انفسی در؛ دیور.

انفسیونك وافتکار بونك کیفیات اولی و ثانیه آراسنده هیچ بر فرق کور. مه دکربنی اویله سویله مشدم. شو مختصراً عرص ایتدیکم ملاحظاتی دخی او فرقی انکار ایچون بالالزام ترتیب ایدلمش بعضی مقدمات قیلندندر. نته کیم چوق برده بو فیلسوف میقد او فرقی صراحته انکار ایدیور. بو ملاحظات و امثالی قوتلی اعتراضاتی دعوت ایده بیلیر. فقط بوراده یابه‌جغمز او دکادر. یالکیز سویله‌یهیم که میل ملاحظات واقعیه‌سی تقویه و دعوائی تحکیم ایچون ایراد ایتدیلر مثله قولی ساللادیغی زمان مکانك و بناء علیه امتدادك، یعنی ابعاد ثلاثه نك وجودینی اول امرده و فضولی بر صورتده قبول ایتش اولور. حالبوکه بو دعواده بر ایده آلیست بویله بر زمینه استناددن ممنوعدر. چونکه دعواده اصل اولان مسئله بهمه حال مکانك وجودینه مفتقر بولونان کیفیات اولی نك حقیقته وار اولوب اولمامسی بحثیدر. مکان اولدقیدن صوکر شکل، امتداد و مقاومتی اثبات ایتك قولاید. و بناء علیه مکانی صرف احوال روحیه منزله‌سنه ایندیره درک حقیقت اشیا‌یی رد ایتك کالقیشان ایده آلیستلر تناقضه دوشمش اولورلر. بر شینی رد و انکار ایتك ایچون لازم کان دلالتی ینسه او شیشه موجودیت مستقلسندن استخراج ایتش اولورلر که بو بر تناقض صریحدر. منطق لساننده (pétition de principe تصدیق علی‌المطلوب) دیدکاری سفسطه ایشه بودر. واقعا بوتون محسوسات و مدرکات مرک انفسی اولدوغنی ادعا ایتك

وعینی زمانده بعض مدرکاتک خارجده موجود اشیای مستقله تأثیریه وقوعه کلش بولوندوغنی دخی قبول ایتک نمکندر ونسبتاً طوغرودر. چونکه بونده تناقص بو قدر. ایشته اصل انفسیه اعتقادی بودروبو، ایده آلیست اولان متفکرین کبی عالم خارجی بی انکار ایتک دیمک دکدر. لکن بنم میلده حقلی کوردیکم نقطه لر بونلر دکل ومقصدم بوراده بوفیلسوف داهی به تعریف دکل، ایده آلیمک بو مسئله لرده سیاق نظری کواسترمک ایچون کوچوچک بر اشارت ویرمکدر. یوقسه بوندن اونه آجدینی مناقشه لرده میل، هامیلتونه قارشی تماماً حقلیدر. اضافیت علم بشر دعواسنده هر کسدن قطعی طاورانان هامیلتونک تناقضنی ناصل میل میدان قویور؟ بونی سزه اوچ بش سطرله تلخیص ایده بیلیرم:

علم بشر تماماً اضافی ایسه بوتون معلوما تمز، معقولاً تمز، محسوسات مز دخی تماماً انفسی اولق لازم کایر. هب بیلدیکمز شیلر حادثه نوعندن اولق ایجاب ایدر. بو تقدیرده (objectif آفاقی) هیچ بر کیفیت اوله ماز، اولورسه بز اونی ادراک ایده مه یز، چونکه او کبی کیفیات اصلیه بی ادراک ایده بیلدیکمز تقدیرده حقیقت اشیایه هیچ اولما زسه من جهة کسب اطلاع ایتیش اولورز. هامیلتون اضافیت علم بشر دعواسنده هر فیلسوفدن ایلری کتیدیکی حالده، حتی قطعاً وبلاشک (لاادریه agnosticisme) اعتقادینه مستند بر فلسفه تأسیس ایتیش اولدوغنی حالده ناصل اولویورده ایکی درلو، حتی اوچ درلو کیفیات اثبات ایدیور؟! کیفیات ثانیه بی منحصرأ بز احوال وجدانیه مزدن عدایتدیکی حالده [کیفیات اولی خارجده کی ماده ده در، بز اولماسق بیله دنیا ده مقاوم برشی واردر واونک شکلی ابعاد ثلاثه سی واردر..] دییور. هم [بز بو کیفیات اولی بی بلا واسطه وبرآنده ادراک ایتکده یز!] دیمکله اضافیت علم اعتقادیه تناقضه دوشویور، [حقایق اشیایه قطعاً وقاطباً مطلع اوله مایز واوله مایه جغز! دیدیکی حالده یا اضافیت علم دعواسی حق سزدر یا خود کیفیات اولی دعواسی باطلدر. بونک ایکسیسی بردن بنمسه مک تناقض صریحدر. ایشته میل اعتراضامه سنک اساسنی شو عرض ایتدیکم شکل ملاحظه یه افراغ ایده رک هامیلتونه شدتله تعریض ایتیش وبو تعریضات آتی یوز صحیفه لک بر مهم کتاب شککنده اورته یه چیقنجه عالم عرفانی باشند باشه چالقالامشدر. زیرا میل

یا لکز کیفیات مسئله‌سنه حصر نظر ایتمکه قالماش، بالجله مسائل اساسیه ده هامیلتونک فلسفه‌سنه دخل و تعریض ایله مشدر. طرفینک له وعلینده زمانک بو بویوک فیلسوفلری مقاله‌لر، حتی کتابلر یازمقدن کندیلمی آله مامشدر و بو مناقشه‌دن بر چوق آثار مهمه تولد ایتمشدر.

تاریخ فلسفه‌نک صوک دورینه عائد صحائفده پک مهم بریرطوتان بومنافسه مشهوره (ایکی مذهب مجادله‌سی La guerre des deux écoles) نامیله معروف اولوب قالمشدر. چونکه حقیقتاً بو مجادله (Représentationisme استحضاریه) ایله (Intuitionisme تحدیسه) آراسنده واقع اولمشدی. بونده اساس بحث کیفیات مسئله‌سی، دعوی ایسه علممیزک تحدیسی و یا استحضاری اولمه‌سی ایدی. یعنی: [تحقیقت اشیا به طوغرودن طوغرویه می یوقسه بالواسطه، یعنی استحضار صورتیله می مطلع اوله بیلوروز؟] ایشه بو مهم نقطه‌ی تعیین ایتمکدی. اگر حقیقتاً کیفیات اولی نامنه بر شی وارسه، خارجه‌ده مستقل برشی وارد. بز او کیفیات اولایه طوغرودن طوغرویه کسب اطلاع ایده بیلوروسه، شبهه‌سز حقایق اشیا بی‌ده بلا واسطه ادراک ایده بیلوروز، دیمکدر. یوقسه عکسی طوغرودر. ایشه بو عکسی التزام ایدن میل، واونکله برابر بوتون ایده آلیست فیلسوفلر ایدی.

میلک اعتراضات شدیدسه‌سنه قارشى هر حالده جواب ویرمک وضعیت و مجبوریتسه بولونان (Mansel منسل) متوفی هامیلتونک هم اک مشهور شاگردلرندن ایدی همده عامل وصیتی ایدی. لکن هیچ اولمازسه بر نقطه‌ده میلک ملاحظاته حق ویرمش اولسه کر کدرکه کیفیات اولی بحثنده استادی هامیلتونه عطف و اسناد اولونان تناقضی رفع ایتمک ایچون چوق غیرت کوسترمشدر. بوباید ویردیکم ایضاحندن آکلامش اوله جقسکزدرکه بر طرفدن (Agnosticisme) اعتقادنده قطعی، حتی مبالغه‌کار طاورانان هامیلتونک دیگر طرفدن همده عینی زمانده کیفیاتی اوچه آیرمه‌سی و کیفیات اولی نامنه مقاومت، تحیز یعنی امتداد و شکل کی قابلیاتی خارجه‌ده مستقلاً موجود بر جوهریت مادییه اسناد ایتمه‌سی بر تناقض مهم تشکیل ایدیوردی؛ زیرا یوقاریده اختصار

ایتدیکم وجهله شکل، مقاومت و تحیز دیدنیکمز کیفیات اولی، حقیقتاً بر ماده مستقله نك اوصاف ذاتیه سندن ایسه و بز انسانلر، بوحاللز و بوتشکیلات عضویه مزله او کیفیات اولایی بلا واسطه ادراک ایده بیلورسه ق شبهه یوقدرکه (Agnosticism) اعتقادی - هیچ اولمازسه مطلق و قطعی بر صورتده - قبول و مدافعه ایدیله مز چونکه در حال کیفیات اولایی ادراک ایدیورسه ق خارجده کی موجودیت مستقله نك اوصاف ذاتیه و اصلیه سندن، بلا واسطه قولای قولای خبردار اولویورزدیمکدر. بویه دیمکده (Agnosticism) دیمک دکادر، تماماً اونک ضدیدر.

ایشته بنم فکرجه، مه نسلك الك زیاده جدیتله تاقی ایتش اولدینی حمله تهریض بودر، زیرا بونی تأویله چالیشیور. و بو مسئله لری تحقیقاً یازدینی اوافق برکتابده [*] بر جوق مناقشه لرله ایضاحاته کیریشیور. خلاصه فکری شودر :

« انسانک مدرکاتی هر نهیه تعلق ایدرسه ایتسین انفسیدر. کیفیات ثانیهی کیفیات اولایی، [مثلاً شکلی] ادراک ایتمه سی ده انفسیدر. کیفیات ثانیهی، [فرضا بر شینک رایحه سی] ادراک ایتمه سی ده ینه انفسیدر. بوعتبار ایله آفاقی بر بیایکمز یوقدر؛ و مادام که انسانز؛ اوله مازده!.. یالکز، اشیانک کندی ذاته عائد ظن ایتدیکمز کیفیاته بالنسبه آفاقی دیوروز. ایشته شکل، مقاومت تحیز کی!.. فقط بو کیفیاتی ادراک ایدیشیمز دخی ینه آلات حسیه مز واسطه سیله ممکن اوله بیلدیکی ایچون اونلرده حد ذاتنده نهیه یوق که انفسیدر. دنیا ده هیچ بر فرد متحسس اولماسه یدی کیفیت اولی دییه اجسام مستقله یه عطف ایتکده بولوندیغمز شکل و مقاومت عجبا ناصل اولوردی؛ اونی محیحاً بیله میز؛ هامیلتون کیفیات اولایی آفاقی اوله رق تاقی ایتدیکی زمان ینه بو حیثیت معنایی نظر اعتباره آلمش، یعنی (اشیایه عائد اوصاف) دیمک ایسته مشدی؛ او قدر! شو تقدیره کوره (agnosticism) اعتقادی نقض ایده جک بر فکرده بولونماش دیمکدر. غریبدر که فیلسوف میل بوانجه نقطه یه دقت ایده مه مشدر..»

بنم تحقیقه کوره میل بوجهتی ده دوشونمش، فقط بوسیاق نظری قبول ایتک ایسته مه مشدر. فی الحقیقه بوتون ایده آلیستلرک ادعاسنه کوره بودعوی بر

[*] La philosophie de l'inconditionné.

اولماین ! بو تقدیرده حاسه بصریه یوق دیگدر؛ و بناءً علیه شکل، رنگ، ضیا حس اتمک احتمالی ده یوقدر. اوبوجکک وجدانی بزمکی قدر مکمل فرض اولونسه بیله اویله بروجدانده مبصرانه متعلق هیچ بر طویغو اوله مایه جقدر. ینه فرض ایدلم که اوبوجکک برکوزی اولسون، فقط غایت ابتدائی بر درکده بولونسون، نتهکیم امثلی یک چوقدر. اوحالده اونک کورکوسی انحق کنندی کوزینه کوره اولمق طیبیدر. بو حقیقی مسالم عد ایدیور، چونکه فیزیولوژینک ادعا سیدر، یعنی بر حقیقت علمیه در، بر فرضیه دکل ! بو کون فیزیولوژی مکمل بر کوزک اقسام مختلفه سندن آری آری بحث ایدیور وهر برینک کیفیت رؤیتده خدمتی و وظیفه خصوصیه سی بیلدیریور. مثلاً مکمل کوزلرده عدسه نک اشکال اشیایی تعینده و (حزمت هریمه (Faisceaut pyramident) نک و طبقه قرجه نک حس الوانده نه قدر ونه درلو دخل و تأثیری اولدوغی بیایور و تعریف ایدیور. الحاصل بو علم ادما و اثبات ایدیور که (Fonction وظیفه) نک درجه کالی (آلت Organe) لدرجه مکملیتله مناسبدر. فی الحقیقه فیزیولوژیده بو حقیقت اساسیه اک بویوک قانوندر. بویله اولونجه شبهه یوقدر که عالم خارجی کنندی باشنه وحد ذاتنده ناصل ونه اولورسه اولسون بزم اوخصوصده کی علممز، درجه ادراکز ایله متناسب اولور و انحق اویله اولمق ضروریدر؛ چونکه درجه ادراکز دخی و ساء ادراکزک درجه مکملیتنه تابع بولونور. اضافیت علم بشرک و انضیت مدرکاتمکز اک قوی واک مهم دلیلی بودر.

فقط بر باشنه مسئله ده اوار که بوملا حظاته قوی بولدقن و بوتحقیقاته کیرشدکن صوکره ظهوره کلیور: آلات حسیه مزک تنوعه، تعددینه و تعیننه سبب نهدر؛ مثلاً نیچون حادثات خارجیه دن، اهتزازات هوایه یی طوغرودن طوغرویه تلقی ایدیورزو (صدا Son) طویغوسنه قابلیت اثبات ایلورزده، بعضی حادثات سائرینه طوغرودن طوغرویه تلقی ایده بیسلمک ایچون بر عضو مخصوصه مالک دکلز؛ یعنی نهدن (سس ایشیتمک) ایچون قولاغمز وارده فرضاً نه لکتریک حادثاتی

طویق ایچون بویله بر عضو مخصوص یوق؟. یالکزر عوامل خارجی نك تأثیری ایله تکامل عضوی و تشکلات حسیه یی تعریف ایده جك ایسهك ، نهدن طبیعت بزده قولاق و حاسه سمع وجوده کتیر مشده نه لکتریک حادثاتی حس ایده بیله جك بر عضو مخصوص پیدا ایتمه مش ؟ . . .

بوده بر مسئله در و بحث مزله پك علاقه داردر .

لوندرد دارالفنونی فلسفه خواه لرندن و معاصرین متفکریندن (قارو و ث رید Garveth Read)ك قیمتدار بر اثرندن سزه نقل ایتدیكم شو ملاحظات ، عرض و ایضاح ایتدیكم مسئله یه دائردر . [*]

« وجدان بشر ك تاریخ تکاملی ، [تجربه کلیه *expérience universelle*] دیمکدر ؛ طبیعتله مناسبتمز ، تجربه کلیه در . بونك بر دیگر اسمی (تکامل وجدان) در . طبیعتله اونه دبری مناسبتمز ، اجسام عضویه نك و جمله عصبیه نك شرط تکملی در . وجدان و قابلیت شعور تکمل ایتدجکه ، اعضای حسیه و (روابط عصبیه *connections nerveuses*) و (مراکز عقیده *centres ganglioniques*) دخی تکمل ایدر . خصوصاً قشر دماغی نك خصوصی تعاریفی ، یعنی گیربنتی لری ، حقیقتی لری پیدا اولغه باشلار . زیرا قشر دماغده بولونان حجیرات و مراکز عصبیه خصوصی طویفورلرک ، معین شعورلرک اعضای مخصوصه سی در . اعضای حسیه معلوماً تمزك حدودینی تعیین ایدن اشارات مشهوده مثابه سنسده در . یعنی حدودی کوستریر علامات قیلنددر . بناء علیه هر هانکی بر جنسده و یا خود شخصده بعضی اعضای حسیه نك فقدانی کور و رسهك و یا خود ضعیف اولدوغنی تحقیق ایدوب کلا رسهق ، او اعضایه تعلق ایدن طویفورلرک ضعیف و یا خود بوسبوتون مفقود اولسی لازمکله چکنده قناعت کتیریرز . »

« اعضای حسیه نك تاریخی ، بوکونکی درجه علم وادرا کمزك تجارب ماضیه یه تابع بولوندوغنی تصدیق ایدر . بوتون اعضای حسیه جلد رك (یعنی وجود مزك ده ریسنك) تبدلاتندن وجود بولش کی کور و نور . بدایت امرده جلدك (ابتدائی بر تشنج *une irritabilité primitive*) قابلیته مالک بولونماسی لازمکله چکنی

(قیاس مقسم Dilemme) شكله كير : (اجسام مستقله نك اوصاف ذاتيه سی یا وارد در، یا یوقدر. یوقه نرم اونلره اسناد ایتدیكمز، اونلرك كندنده وارطن ایتدیكمز اوصافك جمله سی ده انفسیدر. یعنی اونلر اوصاف حقیقه دكل، بزم ادراكك بر صورت مخصوصه سیدر. دیمك جیقار. بویله اولما یوبده حقیقتاً اجسام مستقله ده کیفیات اولی نامیله بعض اوصاف ذاتیه وارسه اونلری بزا ادراك ایدم بیلیرز، یا خود هیچ ادراك ایدمه یز. ادراك ایدم بیلیرسه ك اونلر آفاق برشی اوله ماز، همه حال مدركات انفسیه دن اولور، چونكه ادراك بشر علی الاطلاق ماهیتی اعتباریله انفسیدر. اكر مفروض اولان او کیفیات اولایی حقیقتاً ادراك ایدمه یورسه قی اونلرك اسمی یوقدر، بحثی یوقدر، و بزم ایچون اوله شی یوقدر. خلاصه : [ادراك ایدم بیلدیكمز بالجه کیفیات لاعلی التعین، مطلقاً انفسیدر، ادراك ایدمه دكلریمز دخی هیچ برشی دكلدر، چونكه بزم ایچون یوقدر.] ایشه (Agnosticism) بالجه مدركات بشریه یی انفسی و اوضافی عد ایش و حقایق اشیا به قطعاً و قاطبةً مطلع اوله مایه جغمزی ادعا ایله مشدر. بوابکی قناعت وجدانیه و فکریه بر برینك متممی اولمق اعتباریله یكذیکیری سی استلزام ایدر عقائد فلسیفه دندر : بونك اورته بری یوقدر. من جه و قسماً (Agnostique) اولوب اولماق ممکن دكلدر. ایشه هامیلتونك تناقضی بوراده ده و بوتناقض رفع اولونه مامشدر.) - دیورلر.

سپه نسه رك اعتقائینه كلنجه بونك هامیلتون دن فرقی هیچ برشی سویله مه. دیکنی ایضاح ایتشدم. یالکیز شو قدر فرق وار كه تعبیرات فلسیفه یی دیکشیدر مش ومع مافیه طبق هامیلتون کبی کیفیاتی اوج صنف اوزره قبول ایتشدر. بونده کی مجبوره یی دخی بدرجه یه قدر شرح ایدم رك سپه نسه رك استقلال مکانه و موجودیت خارجییه اینانمقن قور توله مادیغنی کوستر مشدم.

پروفسور (هکسلی Huxley) دخی بومسئله دن طو ضرودن طو ضرویه بحث آچایه رق بالوسيله علاقه دار کورلمشدر. معلومکنز اولدییی اوزره کندی سی برنجی درجه ده علمادن اونقله برابر جبلی برمراق ایله تفکرات فلسیفیه میال ایدی. حتی بووادیده يك کوزل بعض شیلرده یازمشدر.

بوعالم متفکر دخی طبقی میل کبی خواص اجسامی تحلیلله کیریشیور
ویوقاریده میلک کتابندن ترجمه ونقل ایتدیکم صحیفه لده مذکور اولان
پورتقال مثالنه بدل برقریمزلی یووارلاق یعنی بیایا (Bille) آلیور واونی
برسیقولوج نظریه تحلیل ایدهرک بوتون بومدرکات حسیه ، یعنی کیفیات
آلتنده بر جوهریت ماده آریور وتکمیل مدرکاتی، حتی کیفیت تمیزی، انفسی
اولهرق تلقی ایتدیکی ایچون طیبی میل کبی دوشونیور ، مادیت وجوهریت
جسمانیه اعتقاد عادیسنی ضروری بر فرضیه اولوق اوزره تلقی به مجبور بولونیور،
یعنی طویغولریمز به سبب تصور ایتک ضرورتنه بناءً ذهن بشرک بالجوریه
وبالفه ترتیب ایتش بولوندوغی بر فرضیه دن عبارتدر ، دیمک ایستیهور. اونک
ایچوندرک (بر جسم بر حزمه احساساتدر) *Uncorps est un faisceau de sensations*
دییه حکم ایدیور .

فلاسفه اسلامییه میاننده معتزله فرقه مشهوره سنک الایلری کلن متفکرینندن
(نظام) ک بوخصوصده کی اعتقادی، طبقی پروفسور هکسلی نک کنه بکزر !
زیرا (الاجسام اعراض مجتمعه) دییه حکم ویرن (نظام) جوهریت مادهیه
قائل اوله مادیفی ایچون برخیلی اعتراضاته هدف اولمش ایدی که اونک مناقشاتی
بزم کتبخانه لریمزده محفوظ اولان اسکی آثار فلسفیه ده مختصراً اولسون
مذکوردر .

زماننرک مشهور ایده آلیست فیلسوفلرندن منطق وپسیقولوجیده رسوخ
علمی الیه مسلم بولونان پروفسور بهین (Bain) اساساً بوکیفیات تفسیحی یا کلش
بولویور وقبول ایتیور . بو ذاتک اعتقادنجه [خارجله باطن وبناءً علیه انفسی
وآفاقی فرقی مشاهدات عادیه دن متولد یا کلش بر اعتقاده مستنددر. بنابراین
مباحث فلسفیه ده بویله بفرق اوزرینه مطالعه یوروتمک فلسفه یه باقیماز
برطور عامیانه در.] دیور. کندیسنک ادعاسنجه انفسی وآفاقی، (انا وغیر انا)
حسلی، وبوحسله مربوط بولونان افکار واعتقادات، وجدان بشرک بر
درجه تکاملندن صوکر امکان اوله بیلیمشدر . وبناءً علیه حیوانات سفلیه ده
بو حسیات وبودرجه شعور اولماسه کرکدر. ماهیت ادرا که کلنجه، شبه یوقدرکه

اساساً انفسی و آنحق اضافی اوله بیلیر. بناءً علیه کیفیات اولی و ثانیه دعواسی غلیظ برخطایه مستند اصلسز بر دعوادر .

انکلتزه نك بو یوک فیلسوفلرندن سوکراکان وحیثیت و اهمیتجه اولردن آشاخی طوتولمایان برادله (Bradley) همان همان پروفیسور به نيك اعتقادنده در. انسانلرده انفسی و آفاقی فرقنك برتکامل وجدانی نتیجه سی اولدیفنی بو ذات دخی ادعا ایدیور. کیفیات اولی و ثانیه مناقشه سنه حصر ایتدیکی باب مخصوصده بوتقسیم معروفي طولایسسیله تخریب ایدیور ، وکوسترییور که کیفیات اولایی کیفیات ثانیه دن آیری فرض ایتک قطعياً ممکن دکلدرد و ذاتاً قابل تصور دکلدرد. مثلاً کیفیات ثانیه دن معدود اولان رنگ و یاخود رایحه، انفسی برحسبه منجر اولمقله برابر رنگ و رایحه نك مستقلاً تصور اولونمسه سی شویله طوسون ادراك اولونماسی بیلله مختلفدر. چونکه آنحق برشی رنگلی اوله بیلیر ، رایحه دار اوله بیلیر. بناءً علیه کیفیات ثانیه نك وجودینی انکار ایتک، کیفیات اولانك واراخی ده محو ایدرد. ایشک حقیقتی شوکه بونلرک جمله سی ده ظواهر (Apparences) ، یعنی حادثات نوعندندر ، حقیقت دکلدرد ، دییور .

بك مختصر اوله رنقل ایتدیكم شوملا حظات (Apparences and reality) نام کتاب مهمنده تفصیلاتیله مندرجدر .

بوغریب مسئله یه قاییلوبده افکار خصوصیه بیان ایتکدن کنبدینی آله مایان فیلسوفلر بك چوقدر . وبومستله دخی یوقاریلرده سویله مش اولدیغم کبی بك اسکیدر . بوملا حظاتك جمله سنی بوراده ذکر و تنقید ایتکه حاجت کورمه یورم. چونکه درسمز تاریخ فلسفه دکلدرد . سوزی بوقدر اوزاتدیغمه یکانه نه سبب سزه ، بونک کنه وماهیتی حقیله آکلاته بیلمک ایچون فضلجه مثاللرله درسمز ی توضیح و تحشیه ایتک ایدی. ظن ایدرم که بوقدری کافیدر . یالکیز بوراده طوروب دیکنه جکیز و دوشونه جکیز ! چونکه بوراسی ده بر مرحله فکریه تشکیل ایدیور. دوشوندکجه کورمه جکیز که تقریباً ایکی بیك بش یوز سنه دنبری انسانلرک ، هم الك درین دوشونن انسانلرک ذهنی اشغال

ایدن بومسئله بی بوسوک مرحله ده یته اولدینی کبی ترک ایدیوروز . حل ایش اولدیغمزه قناعت ایدرسک کندیمزی آلدائش اولمقله قالیرز .

فقط بونیچون بویله اولیور ؟ عجبا بوده برچوق امثالنی تاریخ فلسفه ده کوردو کز مسائل متوهمه دن بری اولماسین؟! اگر طبعی بر مسئله اولسهیدی ویاخود هیچ اولمازسه بومسئله ذهنمزه وضع طبیعی سیایله ، شکل حقیقیسیله طوغمش اولسهیدی ، البته اوننی نه ویرم چویرم برشیته بکزم تیر و حل ایدردک . مسائل علمیه ایله مسائل فلسفیه نک شومهم فرقنی نظر دقه آلانلر کوریورلرکه تدقیقات علمیه ، بوکون تجربه ساحه سنده واقع اولیور و مسائل علمیه بی یته تجربه تواید ایدیوروز . حل ایدن یته تجربه در . علمده حل اولونمایان وحتی حل اونه مایه حق کبی کوردونن مسئله لر یوق دکل . فقط بوکیلرینی علمای مجربین قالدیروب فلسفه نک باشنه آتیورلر : (آل ، بوسکا لایقدر ، سن موهومات ایله بیهوده یرم مشغول اولم بی ایش کوچ ایدنمشسک ، بز ، علمیا تخانه لریمزه آلات وادوات ایله مقیاسات و حسابات ایله بوکی مسائل طوتوب قاوریاه . مایوروز ، واونک ایچون حل ایدمه یوروز . آل بونیده سکا هدیه ایتدک . اوغراش طور !) دیمک ایسته یورلر و صوکراده فلسفه نک جدت حیثیتی وبرعلم اولمق اوزره قیمتی انکار ایدیورلر . اوحالده بز نیچون هر مسئله بی صحیح وطبعی ایش کبی تاقی ایدلم ؟ تاریخ فلسفه برچوق مثاللرله اثبات ایدیورکه ذهن بشر وادی تفکراتنده دائماً صاغه صوله میل ایدردک ساللانه ساللانه ایلرله یور . حتی چوق دفعه لر صاییتور وچیمماز سواقلره پیوسته اولویور . بلکه ده اویله غریب مسئله لر توهم و احداث ایدیورکه طوغار طوغار برقباس مقسم شکلنده کوردونیور . حتی هرایکی طرفدن باقیلدینی تقدیردهده باطل بدیهی اولدیغنه قناعت ایدیلور . وبوندن طولانی حل اولونماز برر ممما کبی قارشیمزده بیغیلوب قالیور . صوکر برمجدد پیدا اویور . اومعماری اولدینی رده بر اهرق باشقه بر نقطه نظر ، باشقه بر افق تفکر ، بریکی ساحه تحقیق ، دها الویرشلی بر اصول تدقیق کشف ایدیور . در حال آکلانیدیلورکه اومعهود مسائل ، بر عالم سراب ایش ! اویله مسئله لر یوقش ! اوندن صوکر اومعمال

ذهن بشرک ضلالتنه برر غریب مثال تشکیل ایتک اوزره تاریخ فلسفه صحیفنه
کیور . اونک ایچون بز، حل اولونه ماز کبی کورونن مسائلی برخی مدت
حل ایتکه چالشدقن صوکارا نهایت برده ماهیتنه باقمالی بز. عجباً طبیعی میدرلر
وهمی میدرلر؟ بونی دده و شونملی بز. هر حالده دوشونه دوشونه، اوغراشه اوغراشه
بوکیفیات مسئله سی بزى برغریب کرداب افکاره چیقاریور.

مادام که وجدان بشرک تکامانی و حافظه نك ادخار ایتدیکی حسیات وافکار
سابقه یی بوکی مسائلک ظهورنده علاقه دار کوسترنلر آز دکدر . او حالده
برده اونقطه نظرندن ، یعنی تکامل وجدان وتمايز حسیات نقطه نظرندن
باقوبده مسئله ادراکی تتبع ایدلم ، وخصوصاً سزه تفهمانی موجب اوله -
بیله جک ملاحظات وافکاری برطرف ایدلم . برچوق اول دخی سویله دیکم کبی
فلسفه نظرنده اوبدیهایتک جمله سی مختلف فیه برسوری مسائل تشکیل ایدر .
اصل سوء تفهومات بویکی نقطه نظری بر طوتمقدن ونتیجه ده بداهتی حقیقت
ظن ایتکدن ایلری کیور . بز فلسفه درسند بو نقطه یی ده کال جدیدله تأمل
ایتکه مجبورز .

اوچنچى باب

وجيدانغىزك بوكونكى حالى بر نتيجه در . بو نتيجه يى حقيقه تنبع ايتك بوكونكى كالزمه ماديره ييدك ايچون شعورمىزك تاريخ حياتى تدقيق ايتك لازم كايه . اكامل فلسفه سىك سياق نظرى بودر . بو خصوصده مشكلات : بى شعور بر حالدن ذى شعور بر حاله فصل كچمىش؟ . بونى آكلامى ايچون قيود ابتدائيه يوق! . مقاييه اصولى . انسانك وانسانيتك طرز تكاملى آره سنده توازي ومشا بهت . بوندن نه نتيجه چيقاره ييايرز ، واولك قيتى نه اوله يياير؟ بر مسئله ده! . حواسمىزك صورت اشكل وتمييزنده قواى طبيعيه مك تأثيرى . بونامىزك خصوصى وموضعى اولماسىك سببى . بو مبحثده بعضى ملاحظات ممتيزه . اضافيت علم مسئله سنى تاثير ايدن جهتلر . وجدان وشعور معاملى بو تدقيقات حل ابدى يله چكى؟ نتيجه .

اوچنچى بابك تتمه سى

سؤفهمه ميدان بر اقامى ايچون (مبحث معرفت) مسئله سنى فصل وهانكى نقطه نظر دن تنق ايتلى يز؟ . فيلسوفلر نه بى انكار ايدىيورلر ، نه بى اقرار ايدىيورلر . نعدن شبهه ايدىيورلر؟ . خلاصه دعوا نه اوزرىنددر؟ .

وجدانمك بوكونكى حالته وطويغولرمك شو آندهكى كانه باقوبده
اولره قيمت ويرمكه قالقيشيرسوق ، بالضروره ياكييرز . چونكه شو آندهكى
طويغولرمز ، بر سلسله احتساساتك نتيجهسى در . مجهول بر ماضيدن برى
لايتقطع دوام ايدوب كلن بر موجوديت مغويهك شودقيقهدهكى نشئه حياتى در .
مسلسل ، متصل كيدن بوحيات حسيهك ماضى ده نه زمانلره قدر اوزايوب وارده .
بيله جكنى بيله ميورز . بونى قطعياً تعين ايتك بزجه ممكن دكلدر . حياتمك ،
هله حيات مغويهمك تاريخى - اولدوغى كي! - احيا ايتك وبوتون اعوجاجاتى
ايله ، بوتون صفحاتى ايله تعين ايدوب خريطه سنى چيزمك قابل دكلدر . بوكا
موفق اوله بيلمك ايجون قطعياً محتاج بولوندوغمز معلومات وقود ابتدائيه
مفقوددر . بر جوق عوامل خارجيه ومؤثرات طبيعيهك محصله تأثيراتى ايله
بزده وجدانك بليرمكه باشلاديقى - فضولى - قبول ايتسك بيله ، حيات عضويه
مالك بولوندوغمز حالده تماماً (بى شعور *inconscient*) كچيرمش اولدوغمز بر
دور ابتدئى واركه اونك شرائط خصوصيه سنى بيله ميورز . يعنى بزده وجدان
وشعور قابليتلك نه كى شرطلر تحتند و نه زمان و نه كى عواملك تأثيريله باشلاديقى
- معقول بر صورتده - تعريف ايد بيله جك وثائق علميه به مالك دكلز . هنوز
(بى شعور) ايكن ، - فصل اولوبده - (ذى شعور) بر حاله كلديكمزى هر
درلو اسبابيله كوسترملك قولاي بر ايش دكل!.. انسان ، تماميله بى خبر كچيرديكى
چو جوقلق دورينى ، فصل بالذات ادراك ايد ميورسه ، انسانيت دخى - تماميله
بى شعور كچيرديكى - دور ابتدائى بيله ميور .

يالكنز برشى وار :

بويه بزي ، احوال وجدانيهك مهد ظهورينه قدر كوتورن تتبعات
علميه ده (رهبر) اتخاذ ايد بيله جكمز يكانه بر اصول وار : اوده (مقايسه
اصولى *méthode comparative*) در . مسئله بى نقطه نظردن تلقى ايدوبده
بو اصوله تطبيقاً حل ايتك چاره لرينى دوشونونجه انسانك طرز تكملنده ،

انسانیتک (و تیره تکامل Procédé d'évolution) فی تحقیق ایتک لازم کلیر .
 بوندن باشقه یول اوله بیلیر ، فقط بوندن امین یول یوقدر . مثلاً ، بن ، کندی
 نشأتمدن و او دور ابتدائی به مخصوص اولان احوال و حسیاتدن تماماً و قطعاً
 بی خبر قالمش . دنیایه کلوبده هنوز کون کوردو کم زمان ، نصل متحس
 اولدوغمی ، نه حالده بولوندوغمی بیلیمورم . لکن بن طوغدوغم زمان منسوب
 اولدوغم عائله افرادی - تام الشعور اوله رق - اطرافده بولونویورلر و بنم حاملی
 کورو یورلر مش . بن کندی و عالمه قارشى تماماً بی شعور قالدیغم زمانلره عائد
 اولان دوره عمریمی ، پدرمدن والدہمدن تحقیق ایدوب - بر درجهیه قدر -
 اوکره نه بیلدیکم کیبی ، کندی چوقوقلمدهده ، حیاتک بی شعور یکن اودوره
 ابتدایه سنی کوروب تتبع ایده بیلیمورم . بنم اولجه بیخبر یکن احوالک هان عینی
 اولادده مشاهده ایدیورم . وراثتله انتقال و نمادی ایدن بو سلسله حیاتده
 بن ، پدرمه اولادم آره سنده خط اتصال اولدوغم ایچون - جلوه شخصیتله
 تکرر ایدن - عینی ادوار حیاتی بی و او دورلرده بر برینه اساساً مشابه اولان
 حالات روحیه بی یکدیگرینه قیاساً مطالعه ایده بیلیمورم دیمکدر .

بو طرز تدقیقدن استخراج ایده بیله جکم نتیجه لر نه درجهیه قدر طوغرو
 اوله بیلیر ؟ .. اونلرک قیمت علمیه و فلسفیه سی نه اوله بیلیر ؟ ..

بو بر جدی سؤالدر ! .. و اونلک اولدقجه معقول بر جوابی ده واردر :

(نظریه تکامل Théoerie de l'évolution) ک عامللری اولان علمایالتجربه
 کشف و اثبات ایتشلرکه انسان ، (حیات جنینه vie embryogénique) سنک
 جریانی انساننده بوتون مراتب عضویه نک درجات تکاملی کچیریور و بو کونکی
 حدکالی بولونخیه قدر بوتون حیات جنسیه نک باشلیجه صفجاتی عرض ایدیور
 یعنی بر فرد عضوی ، (حیات داخل رحمی vie intra-utérine) نک دوامی
 انساننده بر چوق صفجات کچیریور و بو صفحاتک هر بری حیات عضویه نک
 بردور مخصوصی تمثیل ایدیور . ایشه علما بو کیفیته باقهرق حکم ایدیورلرکه
 بو ایکی سلسله تکامل آره سنده (مشابهت تامه parfaite ressemblance)

وارد. حتی (توازی *parallélisme*) وارد. [۰] حیات عضوبه‌نک-کیم بیلیر قاج میلیون سنهده - کچیره بیلیمش اولدوغی ادوار تکاملی وصفحات ترقی‌یی، هر فردک حیات جنینه‌سی پک قیصه بر زمان طرفنده خلاصه و مختصر آتکرار ایدوب کو-تریور. اویله اولونجه (*développement ontogénique*) یعنی افرادک حیات داخل رحمی ده کچیردیکی تکمل، (*développement philogénique*) یعنی جنسک حیات تاریخیه سنهده کچیردیکی ادوار تکملک بر مختصر فهرستی در. بناء علیه (تکامل فردی *évolution individuelle*) (تکامل جنسی *évolution de l'espèce*) کی اولویور دیمکدر. مادام که جنسک تکاملی ایچون میلیونلرجه سنلر سورن بر سلسله تبدلات لازم کلپور، بز، طوغوردن طوغوربه انسانیتک طرز تکملنه شاهد اوله مایز، فقط مادام که هر فرد، - بیکلرجه عصرلرده وقوعه کله بیلن- او تکاملی، نسبتاً پک قیصه بر زمانده تکراراً عرض ایدیور، اوحالده بز بر انسانک طرز تکاملی نظر دفته آلهرق تبع ایدرز و بوندن استخراج و استنباط ایده بیله جکمز حقایق عمومیه‌یی، انسانیت حقنده دهخی تطبیق ایلیه بیایرز. واقعا بو بر فرضیه دن عبارت قالیر؛ فقط قیمتسز بر فرضیه دکلدر. چونکه بر مشابته اساسیه اوزرینه مؤسس در. ایشته، علمانک بالخاصه تجربه ایستناد آتاسیس ایتک ایسته دکلری اصول تبعک نقطه استنادی بودر. بونک تطبیقاتی، همان یکی کتابلرک جمله سنهده کوره- بیلیر سکیز. ایستریسقیولوژی به عائد اولسون، ایسترتزیه به دایریزلمش بولونسون شو صوک دورک آتارنده بو فرضیه نک (رهبر) اتخاذ ایدلدیکی آشکاردر.

شبهه یوقدرکه وجدانمز، پک اسکی بر دور ابتدائی ده بودرجه کالی عرض ایده مزدی. هیچ شبهه یوقدرکه بو حده واصل اولمازدن اول حسیانمز، افکارمز

[*] هر جسم عضوی قیصه بر زمان طرفنده بر سلسله استحالات عرض ایدر. فرض ایده لم که بو استحالات، فوق العاده اوزون بر زمان طرفنده واقع اولسون؛ و بویله بر طرز مینده وقوع بولنش اوله جفته مختلف صورتلرده وقوع بولنش اولسون!.. او وقت عل العموم تکامل عضویت حقنده اولدجه واضح و صریح بر فکر حاصل ایدلش اولور. »

Herbert Spencer: Principes de Biologie.

دها بسیط، دها مبهم، دها ابتدائی بر در که ده ایدی . حتی اعضای حسیه من بوکونکی مرتبه کالی اوزره خاق اولونماشدی. علی الاطلاق کائنات عضویه یی نظر دفته آ ایرده دوشونورسهک (تکاملیون les évolutionnistes) ک ادعاسی دها قوتلی ودها زیاده مقرون حقیقت بولورز، واکلارز که اعضای حسیه مزک بوکونکی مرتبه تکملی تعریف ایده بیلیمک ایچون هر حالده اونلرک تاریخ حیاتی لایقيله تحقیق ایتک اقتضا ایدر. چونکه عضوی برشی، — کرک انسیجه کبی مادی اولسون، کرکسه طویغولر مزکی منحصرأ وجدانی اولسون — ذی حیاتدر. ذی حیات اولان شیلرک باشایجه خصوصیتی دخی نشو ونمایه قابیلیریدر. نشو ونما دیمک (مسلسل، متصل برسلسله وقایع) یعنی (تاریخ) دیمکدر.

ایشته بوملاحظاته منی در که وسائط علمیه مزک اک برنجیسی واک اهمیتیلی صاییلان حواسمزک قیمتی فلسفه تکامل نقطه نظرندن تقدیر ایده بیلیمک ایچون اونلرک تاریخ نشو ونماسی تحقیق وتبع ایتک مجبوریتی زمانمزک بک چوق فیلسوفلری کمال اهمیتله درک واذعان ایله مشلردر. بوکون کامل العقل وتام الشعور اولدوغز حالده محتویات وجدانیه مزی وحالات روحیه مزی تدقیق ایتکه قویونجه همه حال ایکی عنصر اساسی بولیورز که ایکسینکده برآنده وجودی وتقابلی شعور حاصل ایده بیلیمک ایچون لازم ولابددر. وجدانمزک اساسی تشکیل ایدن بوایکی عنصرک بری « انا » بریسی ده « غیر انا » در. ادراک وشعور بوایکی عنصر اصلینک یکدیگریته تقابلی وتماسی ایله آنجق ممکن اوله بیلیور. بو حالده (یعنی شو آنده کی وجدانمز باقدیغمز تقدیرده) بر ایکی شرط اساسیدن قوریتله میورز. صوکر (غیر انا) دیدیکمز وکندی بنلکمز قارش یابانجی عدایتدیکمز شینک دخی نتیجه نتیجه برنوع طویغویه، باشقه بر دورلو حسه منجر اولدوغنی کوریورز. دها صوکر : مادام که بر شی حقنده شعور حاصل ایتک مطلقاً نفسمزک یابانجی بر شيله تماسی سایه سنده اولیور ویالکمز نفسمز قالسق شعور حاصل ایتک ممکن اوله میه جق؛ او حالده لایقيله اکلاپورز که کندی نفسمز بیله عالم خارجیدن بر شيله تماسده بولونمازسه

کندی کندیسندن بردور او خبردار اوله مایه جق دره. واوله مامق لازمکه جک در !
 بو مسئله یی صرف انفسی وافتکاری بر نقطه نظر دن دوشونسه ک دخی ینه عینی
 نتیجه غربینه یه پیوسته اولیورز . مثلاً: [عالم خارجی ایله تماسه حاجت یوق،
 کندی حالات روحیه مزده بر فرق ، بر تبدل حصولی شعور ایچون کفایت
 ایدر !] دیسه ک ینه معمای وجدانی حل ایتمش اولیورز؛ حالات روحیه ده بر
 فرق وقوعه کله سیله انجق حصول شعور ممکن اوله جفی قبول ایتمه که برابر ینه
 حیرتن قور تیله میورز ، چونکه: [حالات روحیه مزه بویه تبدلاته اوغراتان
 و آرارلنده بر فرق احساس ایدن سبب نهدر ؟] و [عالم خارجی یی حسابدن
 خارج طوندوغمز حاده، تخالف حسیاتی ناصل تعریف ایده جکز ؟ و طویان
 کیمدر ، ذی شعور اولان کیمدر ، طویولان شی نهدر ؟ الحاصل عینی روح
 خارجدن متأثر اولمادیفی حاده کندی کندیسنی ناصل طویه بیلمیر، ادراک
 ایده پاییر؟] ایشته بوممانک دائره فسادنده بوغولوب قالیورز ، ایشک ایچندی
 جیقامیورز . حتی آریجه بر (روح مستقل) وبالذات مدرک بر (نفس ناطقه)
 تصور ایتسه ک ، برده اونکله تماس دائمیده بولونان بر (عالم خارجی) قبول
 ایله سه کیله ینه قارشیمزه برسوری مسئله لر جیقپور که هر بری ماهیتی اعتباریله
 باشلی باشنه برر معمارد. مثلاً: روحک هیچ خارجه مناسبی اولمادیفی حاده
 کندی وارلقه شعور حاصل ایده بیلمه سی نه قدر حلی کوچ بر معما ایسه عالم
 خارجی یه تماس ایله کائناتک وارلقی ادراک ایدوب حقیقته قناعت کتیرمه سی ده
 عینی درجه ده آکلاشیلماز برسر در . [کیفیت تماسه نه سحر وفسون وارکه
 اوتماس، شعور صورتنده جلوه کوستریور؟] ایشته بو، مابعدالطبیعاتک پسیقو لوژی
 نقطه نظرندن اک غامض ، اک مبهم معماسیدر .

بوییللمه جه لر حضورنده ییوده یره ذهنی یوران و قیل قدر ایلری
 کیده مه یی فلسفه، بو صوک زمانلرده ترتیب اولونان تکامل نظریه سندن استفاده
 بکله مش و بوسرک طلسم انکشافی بوله بیلمک امیدینه دوشمشدی . اونک
 ایچون وجدان بشرک حال حاضرینی حالی اوزره بر اقدی ؛ تطبیقی برتبعه

قويولدى. حسيات بشرك هنوز بي شعور بولوندوعى قراكلق زمانلره انناذنظر ايتك ايستهدى. بوتبعات هنوز اكال ايدلمه مش اولقله برابر يته بعضى فائدهلى نتيجهلر وىردى كه اونلرك هربرى بوكون ابي كوتو برر فرضيه صاييله بيلير، اكال اولونوب ده ايلريده بر حيثيت علميه قازانه جق درجه مقبوليته ايررسه اووقت بلكه برر قوتلى نظريه اولور .

شيمدى خلاصةً اونلره دائر بر فكر وىرديم :

على العموم عضويت عالنده سلسله حيواناتى درجه تكامللرينه كوره تدقيق وتتبع ايدوب ده انسانه قدر كليرسه كوررزكه برنجى درجه ده وسائط ادراكدن عد ايتديكمز حواس، هر جنسده بردكلدر. حيوانات سفليه ده بر جوق حواس اكسيكلدر، وياخود بعضيلرنده موجود اولسه بيله بزه وحيوانات عاليه يه نسبتله عيى سويه كلاله، عيى درجه قابليتده دكلدر. بو، كيفية ثابتدر. يعنى بر حقيقت مشهوددر. كيمسه ادعا ايدمهز كه مثلاً: سيورى سينكك كوزى بزمكى قدر مكمل يارادلمش اولسون ! كيمسه تصور ايدمهز كه بر طير طيلاك حافظه سى بزمكته معادل بولونسون! . . . كيفيت بويله اولونجه، حتى بونك بويله اولدوغى پداهت درجه سنده ثابت اولونجه، ايكي جهت نظر دقتمزى جلب ايدر، بريسى هر هانكى بر عضويتده برحسك بوسبوتون فقدانيدر؛ ديكر جهت ده او حاسه نك هنوز فايث (rudimentaire) بر دركه ده قالمش اولماسى و بالتبعيه او كا تعلق ايدن حس مخصوصك پك ابتدائى و ناقص و مبهم بر حالده بولونمه سيدر . برنجى تقديرده هيچ حس وادراك يوقدر، چونكه اونى تحصيله مؤكل اولان آلت مخصوصه يوقدر . ايكنجى احتمالله كوره حس واردر، فقط پك ناقص و پك مبهمدر، زيرا او حسى ويره جك آلت ناقص و ناتمامدر . بو ايكي حاله كوره او حيوانك وجدانى ناصل اولمق لازم كلير ؛ ! ديبه دوشونه بيليرز؛ و هيچ شبهه يوق كه هر هانكى بر حاسه دن محروم اوله رق يارادلمش بولونان بر حيوانده او حاسه نك ويره بيله جكى حسلر قطعياً مفقود اولمق لازم كلير . مثلاً، بر بوجك فرض ايدم كه هيچ كوزى اولماسين ؛ و كوزه بكرز بر آلت عضويه سى ده

قبول ایدرسهك، بو ابتدائی قابلیت تشنجه توافقی ایدهبیلهك و معادل اوله جق (مهم و ناممین بر نوع احساس - une sensation correspondante non-spécialisée) دخی قبول ایتك لازم كله جكدرد. (اویله بر مهم بر طویغوكه بو كونكى حاملزله اونی هیچ حس ایدهمیز ، طانیسه مایز . احتمالكه آز چوق ذائقه و لامسه احساساتی بر درجه یه قدر آكدی ریر بر حس ؛) ایچون قابلیت پیدا اولمشدی .! دیه بیله جگیز . بو طویغولر خارجی قوتلرك و عامللرك تضییق میخانیکسی و تأثیرات کیمیویهك تغییراتی ایه وجود بولمش و بو صورتله واقع اولان تأثیرات خارجی اعصاب ناقله سایه سنده محیط بدنن حیرات مرکزیه انتقال ایدم ایدم او حیراتده بر (عكس عمل réaction) حصوله کتیرم شدرد. عوامل خارجی دن كان تأثیرات ایه او تأثیراتك موجب اولدوغی (عكس عمل) آراسنده کی رابطه بو سایه ده تأسس ایدم بیله شدرد. صوکره صوکره هوا طالغه لرینك تضییقی ایه كتله تماسندن ، یعنی مواد صلبیه طوقونمقدن حاصل اولان تضییق آرمه سنده یاواش یاواش بر فرق حاصل اولمش و حس سمع ایه حس لمس یکدیگرندن تمایز ایدرك آیری آیری تکمل ایه مشدرد . کذاك داخل بدنمزدده پیدا اولان اعصاب محیطه دخی (حاسة حركیه sens Kinesthésique) و (حاسة اخشائیه = sens viscéral) نك ناقلی اولمشلردرد.) الی آخره!...

سربستهجه ترجمه و عرض ایتدیكم شوپارچه - بك مختصر و واضح اولدوغی ایچون- بنجه مرجع کوروندی. یوقسه بو فرضیه بك چوق کتابلرده اوزون اوزادییه بسط و مدافعه ایدلشدر . فقط بونك حیثیتی آنجق بر فرضیه اولمقدن عبارتدر . بونده ده خلاصه معنا ، بعضی عوامل خارجی نك ماده عضویه تأثیری وهله یکنسق و دائمی تأثیری سایه سنده او ماده عضویه نك سطحنده بر طاقم تغییرات حصوله کلسی و بو تغییراتك اعصاب مخصوصه واسطه سیله حیرات نشی کزیه انتقالی ایه حسیات مخلفه نك تعیندر. کیدرجه طویغو- لرده (تفرق différenciation) حصولی اعضا و اجهزه حسیده دخی (تقسیم اعمال division de travail) وقوعی استلزام ایتمش و بو صورتله حواس ، تعدد و تعین ایتشدرد .

تکاملیون بو فرضیه ایله اجهزه حسیه نك تشکل و تکملانی تعریف ایتک ایستیورلر . بو بر حقیقت ثابته دکل - دهمین سویلدیکم کبی - آنجق بر فرضیه در . بو حیثیتله سائر فرضیاتدن قیمتسز دکلدر . یالکیز بزجه بوراده نظر دفته آلمایی لازم اولان نقاط مهمه شودرکه، هر ناصل اولورسه اولسون کائنات محیطه ایله انا تمز آره سنده مناسباته ایلک واسطه اولان ، حواسمزددر . قوای طبیعیه نك هانکیلرندن متأثر اولمش ایسه ک اجهزه حسیه مز، او قوتلرک تأثیراتندن بزى خبردار ایده جک صورتده تشکل ایتمشدر . بو (طرز تعضی *mode d'organisation*) اقتضاسندن اوله رق مبحث معرفت مسئله سنده آنجق (اضافیت علم . *relativité de la connais*) پرنسپنه قناعت ایده بیله جکمز . قوای طبیعیه نك هانکیلریله مناسبتده بولونه بیله جک اجهزه حسیه مز وارسه ، آنجق او عواملک تأثیراتندن خبردار اوله بیایرز . کائنات حقسنده کی فکر وتصوورمز وعلی الاطلاق علممز، بو حواس معدوده نك تلقیاتنه تابع اوله جفی جهتله بالطبع محدود قاله جقددر . مع مافیسه ، قوای طبیعیه ، بزم بیلدیکمز وتأثیراتی تاقی ایده بیلدیکمز قدرندن عبارت اولمق لازم کلممز . حتی وجودندن وتأثیراتندن ذره قدر خبردار اوله مادیغمز قرتلر، بیلدکلر مزدن پک چوق اولسه کرکدر . ننه کیم سوزلریخی دهمین ترجمه ونقل ایتمش اولدوغم (پروفسور رید *Prof. Read*) ، عالم مشهور (دومورغان *De Morgan*) ک شوسوزلریخی اشهاد ایدرک بو دعوانی تحکیم ایتک ایستیور :

(دومورغان هزل آمیز بر طور ایله فرض ایدیور وشویله سویلدیور : پک نمکندرکه کائناتده - بزم بیلدکلر مزدن ماعدا - بر قاج عوامل، ملایاریم میایون قدر دها عوامل مختلفه بولونسون اوله بر طاقم قوای طبیعیه که اونلر حقدده هیچ بر کیمسه نك هیچ بر کونه معلوماتی یوقدر .) دییور .

پک طوضرو کورون شو ملاحظه بزى دوشوندورم جک ماهیتده در . چونکه بو مبدآن حرکت ایدوبده دوشونه دوشونه ودوشوندو کزی تنقید ایده ایده ایلری کیده رسه ک سلسله افکارمز بر ضرورت منطقیه متقاد اوله رق بر وادی مخصوصه کیرر واونک بوتون اعوجاجات طبیعیه سنی تعقیب

ایتمه دیکه بر آدیم ایلری کیده مز. کری دونوبده ایلک نقعه حرکتی ده کیشدر. مزسه وجهه استقامتی ده ده کیشدر. مز. بالعکس وتیره تفکرک ایجابات منطقه سینه تسلیم اختیار ایدوب کیدرسه او یولده رهگذارینه دیکله جک اولان مسائلک هیچ برخی اهامل ایله چیکنه یوب کچه مز. اونلرک هر برخی ائی کوتو حل ایدوب کچه ملی در. بویه یورودکجه مسلک فاسفی - بالضروره - تعین ایدر. عاقبت باطل بدیهی بر نتیجه پیوسته اولسه بیه او نتیجه مشرور ودر. چونکه بر طاقم مقدمات مسلمدن حرکت فکریه به باشلا یه رق سلسله افکارک - ناقابل مقاومت اولان - جریان منطقی سی ایله او نتیجه سور وکلنوب کلشدر.

فلسفه و اصوله کایاً بیکانه قالانلر تفکر اتمک تابع اولدوغی بو ضرورت منطقه یی بیلمدکاری ایچون، منتظم بر سلسله ملاحظاتک آنجق نتیجه سینه باقوبده فیلسوفلری استخفاف، یاخود اونلر تعریض ایدیورلر. هر کس اوزون دوشونه بیلسه بدی و دوشونجه لرینک صوک مرحله توقفه قدر یورویه. بیه جک قدرت عقلیه و طاق ذهنیه مالک بولونسه بدی - شهیدن وارسته بیلدیکی - عادی متعارفه لدن محاکات فکریه به کیریشدیکی حلاله عینی درجده باطل نتیجه لره واریردی. فقط فیلسوف اوله مایانلر (متعارفه axiome) لری محض حقیقت عد ایدرلر. حالبوکه اونلر عنندی و اعتباری بر طاقم حقایق اضافیدن باشقه بر شیلر دکادر. دوشونمکده سویه وسطایی آشامایانلر، محاکمه لرنده متعارفه لدن درت آدیم ایلری کیده مزلر. خصوصاً که هر کسک بیه مدیکی بعضی متعارفه لره واردر. علامه شهر (لورد کلوین Lord Kelvin) ک دیدیکی کی: (بعضی متعارفه لر واردر که هر کس ایچون متعارفه دن محدود اوله ماز.) یعنی اونلر آنجق عالمر و فیلسوفلر نظرند بر متعارفه در. خلق اوکی متعارفه لرک وجودندن بیه خبردار دکادر. بالاتزام اونلری اوکر نمه دیکه ده خبردار اوله مازلر.

ایشته بوکی اسبابدن ناشی در که هر هانکی بر مسلکک موز بر دستور فلسفی سینه قولای قولای اعتراض اتمک ممکن اوله بیلور؛ بوکی دوشونجه لره بیکانه اولانلر فیلسوفلره حیرت ایدیورلر: (باقکدی شو حریفک - حقیقت

نامه - بیان ایتدیکی فکر غریبه !...) دیهرك شاشوب قالیورلر و کولویورلر .
 حالبوکه بو طور عادی - اربابنك - بو شیلره کلیاً بیگانه قالمش اولدوغنی
 اثبات ایتمکدن باشقه بر قیمت اقتناعیه یی حاض دکادر .

سزه - بیکده بر - مثال ویردیم :

قرون وسطی فیلسوفلرینك تعریفی وجهله (جزؤ لایتجز) یی قبول ایدن
 فقط عینی زماندهده روحك بر جوهر بسیط اولدوغنه اینانان پك چوقدر .
 حالبوکه یوایی اعتقاد یکدیگرینی نقض ایدر . ایی دوشونولور واوزون دوشو-
 نولورسه تناقض میدانچه یقار . حتی جسممزی بیله یکپاره برکنله اولهرق تلقی
 ایدمه یز . دماغمزی کهکشان کبی - اجرام منفرددن مرکب - بر کائنات
 فرض ایتیکلکمز اقتضا ایدر . بونی ده عوامه آ کلاتمق ممکن دکادر . چونکه
 ذهنیت خلقه کوره (باطل بدیهی) بر شی در .

اونك ایچون فلسفه نك صرف نظری اولان بوقسمی اکثریت ناس ایچون
 دکادر .

ده میندن بری موضوع بحث ایتمکده بولوندوغم مسئله دخی بوقیلدندر .
 حواسه نك سبب تکیونی و صورت تشکیکی حقنده تکامل اربابنك فرضیه سنی
 عقلمزه ملایم کوروب قبول ایتدیکمز کبی بهمه حال خصوصی بروادی تفکره
 کیردیکمزی حس ایدرز . ذهنمز بو نقطه دن حرکتیه باشلار باشلاماز تعقیب
 ایده چکی وجهه استقامتی آلیز و منطق قوتی اونی نرملره قدر سوق ایدرسه
 بی اختیار اورالره قدر کیدر . نتیجه نه اولورسه اولسون ، فقط استدلالاتده
 باکلاش اولماسین ! ... فیلسوف نظرندک مهم شرط ، آنجق بودر . او
 نتیجه یی هر کس طوغرو بوله جقمی بولمایه جقمی ؟ .. دیه دوشونمک ، فلسفی
 بر دوشونجه دکادر .

بوکا بر مثال ویرمک و مذاهب فلسفیه نصل تعین ایدیور ؟ .. بو مهمه یی
 کوسترمک ایچون ینه عینی موضوعی اله آلوب محاکمه ایدیم . بحث انکشاف
 ایتدکجه ذهن منقد ، نصل ونه کبی ملاحظاتك سیل جریانه قابیلیور ؟ ..
 وکیتدکجه نصل خصوصی مسئله لر تولد ایدیور ؟ .. آ کلاشیله بیلسین ! ..

فی الحقیقه :

اگر ماده عضویه نك آنجق بعضی عوامل طبیعیہ تأثیریلہ بر طاقم تعدیلات تشریحیہ معروض اولدوغنی و نتیجہ ده (نسج عصبی *tissu nerveux*) و (نسج عضلی *tissu musculaire*) کبی انساج خصوصیه تشکل ایدرك او انساجه کوره بعضی وظائف حیاتیہ تعین ایتش بولوندوغنی قبول ایدرسهك بومبدادن حرکت ایدوب ملاحظات متسلسله یه مجبور اولان ذهنمز - بالضروره - بعضی مسائل حضورنده بولونه جقدر .

مثلا اول امرده ماده عضویه یه تأثیر ایتش اولان عوامل طبیعیہ نك فصل ونه اولدوغنی ؛ و عوامل سائرہ تأثیرسز قالدینی حالمه نیچون آنجق بونلرك تأثیر ایتدیکنی و بو تأثیراتدن - فصل اولوب ده - تغییرات عضویه و تشکلات تشریحیه وقوعه کلدیکنی دوشونمکه مجبور بولونه جغمز طبیی در .

عینی زمانده دیگر برطاقم مسائل حقننده قطعی و کسدرمه حکم ویرك ضرورتندن قورتوله میه جغمز دخی آ کلاشیاه جقدر .

فرضا : تکامل عضویت فی الحقیقه بو طرزده واقع اولمشه یعنی بوتون موجودات عضویه نك حیوانات قسمنده واسطه ادراك اولان نسج عصبی صحیحاً بعضی عوامل معینہ نك (ماده ابتدائیہ *protoplasma*) یه تأثیر و او ماده عضویه نك کیفیتنی تغییر ایتك - صورتیه وجود بولمش ایسه ، بهمه حال بزده (طویغو) تماس خارجیدن حاصل اولمش و بو تماسك عینی صورته تکرر و تبادیلی اعضای حسیه ایله برابر جهله عصبیه یی وجوده کتیر مشدر دیمك اولور . باشقه درلو دوشونه میز . او حالمه دخی (حسیه *sensualisme*) مذهب فلسفی سنه حق ویرمکله کمز لازمکلیر . چونکه معلوماتك منشأ اصلی سی مدرکات حسیه اولمش اولور . مدرکات ، آنجق عالم خارجیدن کله بیایر . اویله ایسه وجدانز خارجنده برعالم مستقل دواولق لازمکلیر ؛ بوتون بو دوشونجه لرك جریان منطقی سی ، ذهنمز زورله بو نتیجه یه سوق ایدر و عالم خارجی نك وجودینی تسام و اعترافه مجبور براقیر .

بونی - بر حقیقت اوله رق - تسلیم و اعترافه مجبور اولدق قی ؟ .. او وقت اصول بحثنده (تدرییه empirisme) یه کرکی کبی حق و یروب بوتون معلومات بشریه نك تجربه عمومیه محصولی اولدوغنی قبول ایتمکده مضطرب بولونورز . چونکه ، کیم بیلیر قاج یوز بیک و یا خود میلیون سنه لردنبری جسم عضوینک عالم خارجی ایله دائمی بر تماسده بولونماسی و بو سایه ده - کیندکجه - محیطنه تطبیق حیات ایتمه سی - حیات عضویه قدر سورکلی و اونک کبی فاصله سز - بر تجربه عمومیه صاییلیر . ذاتاً فلسفه لسانده تجربه عمومیه دهنیلدیعی بو معنا آکلاشیلیر . (وجدان conscience) کله سی ، اک کامل و شامل معناسیله ایشه بو تجربه عمومیه دیکدر .

اوله ایسه (طبع سلیم sens commun) فلسفه سنی ده ردایده مریز . چونکه (sens commun) دیدیکمز شی ، بوتون انسانیتک کچیرمش اولدوغنی تجربه عمومیه نك اک آشاغی فقط اک صاعلام ساحه سی کوسترن سویه عادیه دیرلر . انسانیتک سرمایه علمی تشکیل ایدن معلومات محققه بوسویه بی آساماز . بوتون مبنای اعتقادتمزک زمین استدادی بودر . بوده - باقیسه - تجربه عمومیه مزله قازانمش اولدوغمز افکار و معلومات صحیح نك عمومی و مشترک بریلانچوسی در . عینی زمانده ده بزم ایچون یکانه (قسطاس حقیقت critérium de la vérité) در ! ... چونکه یکی دن یکی به اجرا ایده جکمز تجارب شخصییه ایله قازانه جفمز معلوماتی تصحیح ایچون (sens commun) سی محک و معیار اتخاذ ایده جکمز . باشقه چاره یوقدر .

شو تقدیرجه تجربه عمومیه دعواسنی تسلیم ایتدکدن سوکره ، (sens commun) فلسفه سی علینده بولونه مایز . چونکه بو ایکی تعبیر عینی شینک ایکی مختلف اسمی در .

شو منطقی یولاردن کچهرک بوحده کلدکدن صکره (عنلیه rationalisme) دعواسنی رد ایده بیایرز . حتی رد ایتمکده مضطرب قایرز . چونکه (افکار و هییه principes innées) دیدیکمز جنس معلوماتی و یا خود (مبادی قبایه aprioriques) تعبیریه یاد و توصیف ایتدیکمز کلیاتی ، تجربه فوقیده بر طاقم

حقایق معقوله کبی تاقی ایدمه‌میز. اولسه اولسه، اونلر تجربه عومیه نتیجه‌سنده تحقیق و باورائه انتقال ایدرک ذهن‌زده تحکم و تأید ایدن معلوما‌ت‌زدر؛ دیاب‌یایرز. بوتون بو محاکات نتیجه‌سنده روحک بر جوهر بسیط اولمق اوزره استقلال وجودینی دخی انکاره واریرز. زیرا بزده اعصاب بعضی عوامل طیمیه تأثیریه وجوده گلش بر نسج مخصوص اولونجه، ادراک وحس دخی اونسجک (وظیفه عضویه fonction organique) سی عد ایدیلنجه، روح - ماهیتی اعتباریه! - (وظیفوی fonctionnel) بر جلوه حیات اولمش اولور. باشقه درلو تصور ایدیه‌مز. مکرکه طاقیه بو ملاحظاتی هدم ایتک ایچون اساسلرینی بیقمالی و باشقه اساسلر قبول ایدرک اونلر اوزرینه یکی دن بر بنای ملاحظه قورمالی!.. ایشته - اصطلاح معنایله - (معماری علم architectonique) بوکا دیرلر. یعنی بعضی اساسلری قبول ایتدکن صوکره اونلر اوزرینه بر بنای فلسفی قوروق و مسائلک مذاکرات و ملاحظاتنده ایجابات منطقه‌یه تبعاً او بنای علمه البق اولدوغی شکلی ویرمک دیمکدر.

بو اساسلر اوزرینه استناد ایدن تکامل فلسفه‌سنک بناسی بالضروره بو شکلی آلمشدر. بو فلسفه‌نک مهندس حقیقی سی اولان (هربرت سپنسر)، انسجه عضویه‌نک تولدنده و (اعضای حسیه organs de sens) نک تشککنده، بالخاصه عوامل طیمیه‌نک تأثیر تمادینی بر سبب اولمق اوزره تاقی ایتشدی. شو تقدیره کوره ماده عضویه اوزرنده (ضیا la lumière) نک ایقاع ایتش اولدوغی تغییرات کیمویه ایلا (تضیق la pression) نک موجب اولدوغی تأثیرات میخانیکیه، اول امرده، ایکی درلو طویغو حصوله کتیرمش اوله‌جقدرد. (اهتزازات اثیریه vibrations étherées) (حس حرارت sensation calorique) ایله (حس ضیا sensat. lumineuse) یی تولید ایتش و بو تأثیرات متادیه حرارتی و ضیایی ادراک ایدیه‌یله‌جک اعصاب مخصوصه‌نک محیط بدنه تشککنه سبب اولمشدر. نته‌کیم بعضی عواملک تأثیرات کیمویه‌سی (قوقو) و (طیم) طویغولرینی تولید ایتش و بو طویغولری ادراک ایدیه‌یله‌جک اعصاب مخصوصه دخی عینی زمانده وجود بولمشدر. صوکره تکرار تأثیرات میخانیکیه‌ده بر (تفرق différenciation)

حاصل اولمش : هوا طالعہ لری نك تضییقی صدا طویفوسنی ، (کتله تضییقی
 pression de la masse) ده مقاومت، ایله حس لمسی تولید ایتمش و بو طویفو
 لری ادراک ایده بیلله جک اعصابک تمایزینه خادم اولمشدر.
 بو فرضیه در؛ فقط تکامل فلسفه سنک تمامیتی ایچون ضروری بر فرضیه در.
 یعنی اوفلسفه بو فرضیه بی تصویره مجبور بولنور؛ و بونی قبول ایتدیکجه تمام اوله ماز
 دیمکدر. لکن بو فرضیه بر مسئله خصوصیه وجود و بریرکه اونی کندی
 باشنه حل ایده من:

هایدی اعصابک و بوتون جمله عصبیه نك بو صورتله تشکل ایتمش اولدوغنی
 قبول ایده من! و بلا معارضه تسلیم ایده من که بزده و حیوانانده آلات حسیه بعضی
 عوامل خارجیه نك تأثیرات متادیه سی ایله وجود بولمش اولسون! ... مع مافیه
 نیچون سائر عوامل طبیعیّه ، عینی صورتله ماده عضویه تأثیر ادراک بزده
 منحصر آوتأثیراتی ادراک ایده بیلله جک اعصاب مخصوصه وجوده کتیره ممش؟
 مثلاً نیچون (تلهکتریک electricity) دیدیکمز عامل طبیعی، ماده عضویه بویه
 بر تأثیر اجرا ایده ممش؟ .. ایتمش اولسه یدی، تأثیرات تلهکتریکه بی طوغرودن
 طوغروهی تاقی و ادراک ایده بیلله جک بر (جهاز حسی = appareil sensitif) من
 اولوردی؛ او خصوصی (آلت حسیه organo sensitif) ایله ده شو عالم
 خارجی به آریجه بر رابطه من اولوردی. احتزازاتک بر نوعی ضیا، بر نوعی،
 حرارت، بر نوعی صدا صورتنده تاقی و ادراک ایده بیلدیکمز کی، تأثیرات
 تلهکتریکه بی ده - کیم بیایر ناعل؟ - بر طرز و صورت اوزره حس و ادراک
 ایده بیلدیک. حالبوکه بو کون شو حالزله تلهکتریک ادراک ایده میورز. بوقوت
 طبیعیّه، بزجه بوسبوتون مجهول قالمشدر، دیمک ایسته میورم! .. بالعکس، اونی
 بر چوق تجلیاتیه بیلورز. ما کنه لر مزله حاصل ایدیورز. قوای سائر بی
 تلهکتریکه تحویل ادراک قوللانیورز، و اوندن کرکی کبی استفاده ایلیورز. لکن
 انجق آنارینی کورمکله قالیورز. کورد و کمز حادثات دخی یا ضیا، یا حرارت، یا
 حرکت صورتلرندن برینه منجر اولور. بونلری ادراک ایده بیللمک ایچون ذاتاً
 خصوصی بر طاقم آلات حسیه من واردر. او حالده تلهکتریک دیدیکمز عامل

طبیعی نك بز انجق بو آئارینی، حواس سائر مز و ساطیله كوره بیلپورز؛ دیمكدر. خصوصی بر جهاز عصی مز اولهیدی بلكه او حادثاتی بوسبوتون باشقه بر شكلده كورور ایدك! كیم بیلیر؟!....

بناء عایه، نلكتریق دیدیکمز عامل، نیچون، بزده خصوصی بر (جهاز حسی) حصوله کتیرمه مش؟.. تأثیر سز قالمش در! ده نیله مز. تأثیری عمقندر. او حالده بو غریبه نك سببی نه در؟..

ده میندن بری عرض ایتدیکم مبادی مرتبه بی و مقدمات متسلسله بی قبول ایدوبده بالضروره بو نتیجه یه پیوسته اولان. بر چوق فیلسوفر، بو صوك سؤاله معقول بر جواب ویرم بیلیمك ایچون، معهود (قانون تصرف la loi de parcimonie) دن استعانه ایتك ایستورلر.

معلومدر كه مشهور (بویوك فرمده ریق) ك توجه و حمایتنه مظهر اولان متفكریندن فرانسه لی (موپرچیوس Maupertius)، بعضی تدقیقات و ملاحظاته مبنی:

(طبیعت مقصدینه اك قیصه یولدن كیدر؛ و ممكن اولدینی قدر آزد مصرف ایدر.) دیه ادعا ایتشدی. ایشته (قانون تصرف) نامیله تاریخ فلسفه ده معروف اولان دستور اعتقاد بودر.

زمانمز متفكریندن بك چوغی و بالخاصه (تكاملیون les évolutionnistes) فرقه سنه مذسوب اولانلر - حواسمزك شیمدیکندن زیاده اولماییشی - بو قانونك حکمنه عطفاً تفسیر ایتك ایستورلر. ملاحظه لری شو بر قاج سطارلق سوزله تلخیص اولونه بیلیر:

(طبیعتده موجود بولنان عواملدن هر هانکی برینك تأثیرات متبادیه سی ایله وجوده کله بیله جك اعضا و اعصاب مخصوصه نك عضویت ایچون بر مصرفی واردر. بو (اجهزه حسیه) عالم خارجی ایله بزم آرامزده بر رابطه مناسبت تأسیس ایدر كه بو مناسبتك دخی ادامه حیات ایچون فائده مهمه سی واردر. اكر بوفائده، مصرفه دكمز ایسه، یعنی مصارف عضو یه تقابل ایتمزسه زیاندر. هیچ اولمازسه بهروددر؛ عبث در. طبیعت عبثله اشتغال ایتمز. بناء علیه او یله بر

رابطه ادراك دخی تأسس ایله من . چونکه بونك مصرفی فائده سنه غالبدر . خلاصه بزده شو بش حاسه دن زیاده وسائط ادراك پیدا اولماش سه ، دیمك اولویورکه طبیعت زیاده سنه لزوم کورمه مشدر . بقای شخصی و محافظه حیات ایچون بو قدری کفایت ایده بیل مشدر .

بوده بر فکر در ؛ بر ملاحظه مخصوصه در که طبیعتی ر (مقتصد *économiste*) نظریه تاقی ایتك حتی طبیعت بر فکر اقتصاد اسناد ایله مکدن حاصل اولمشدر . مثلاً : بر شمندوفر قومپانیه سی خطوط اصلیه دن ماعدا مرکزله اوزاق بر شهر ویا هجرا بر کوی آراسنده یکی بر خط التصاق تأسیس ایتك نیتنه بولونورسه عیناً بویله دوشونور . واقعا بو یکی خط التصاق تأسیس ایده بیله جك اولورسه مرکزله او هجرا کوی ویا خود او شهر آرسنده بر رابطه ، بر مناسبت پیدا اولور و بونده دخی بعضی وجوه ایله استفاده واردر . فقط ، بویله بر خط تأسیس ایتك وهله اوئی منتظماً و دائماً ایشلتمك بهمه حال مصارف معینه یی مستلزم اولور . بناء علیه قومپانیه کندی اختیار ایده جکی مصارفی حساب و تقدیر ایدر ؛ صوکره بویله بر خط التصاق تأمین ایده بیله جکی واردات ممکنه نك مقدار وسطی سنی تخمین ایلر . اکر بو مقدار ، تأسیسات و ایشلتمه مصارفی قورویه مایه جق کبی کورونویورسه ، بالطبع وبالضروره او ایشن صرف نظر ایدر . ضررینه بر ایشدر . ایشه (قانون تصرف) طرفدارلری بویله دوشونویورلر . (لکن طبیعت بویله بر نیت ، بویله بردرایت مقتصدانه اسناد ایتك طوغرومیدر ؟) دیه اعتراض ایدنلرده بك چوقدر . علی الخصوص طبیعت کایه یه بر نیت اسناد ایتك ، (علت غائیة *cause finale*) نظریه سنی استلزام ایده جکی ایچون فلاسفه نك بوسبوتون (احرار *les libres penseurs*) اولان قسمی وهله مادبون ، بو ملاحظاته شدته اعتراض ایدیورلر : (بو ، آلهیانه یاقیشیر بر (طرز محاکمه *mode de jugement*) در . فلسفیاته موافق بر وتیره تفکر دکلدر . آلهیون ، طبیعتده کوردکاری آهنگ وانتظامك صرف انفسی وانسانی بر (تصور *concept*) دن عبارت اولدوغنی اونوتویورلر ؛ عئل بشرک اثر تفکری اولان او انتظامی بر (عقل اعلا *Intelligence Suprême*) نك اثر ارادت و عنای

اولق اوزره تاقی ایدی-ورلر . مسئله خلقت بو صورتله نظر تأمله آلیرسه - بالطبع - فطرتده بر (غایه حکمت) کورمک لازمکایر . چونکه غایه سز نیت اوله ماز . ایشته (علت غائیة) نظریه سی بودر . بوده (عاقل و کامل بر خالق *nni Créateur intelligent et parfait*) اثبات ایدیه بیاک ایچون آلله یونک ترتیب ایتش اولدوغی بر (برهان *argument*) در . فقط علمک نقطه نظری بوسبوتون باشقه در ؛ حتی بوسبوتون آلهیات نقطه نظرینه ضد و معارضدر . چونکه علم ، هر حادثه طبیعی بی ، منحصرأ اسباب میخانیکیه ایله تعریفه چالیشیر . امور و معاملات طبیعیده عقل و ارادت ، غایه و نیت تصور ایدرسه علم ، کندی اصولی بوزمش ، کندی ماهیتی انکار ایتش اولور .) دیورلر .
 le conflit de la science و دین (تزعاع علم و دین *et de la religion*) تهلکسنه قای آچور .

حقیقت حاله کانه ، امور طبیعی بی معهود (تصرف قانونی) ایله تفسیر ایتک مطلقا آلله یونک نقطه نظرینه توافق ایدر بر طرز محاکمه دکلدر . چونکه بو تصرف (ارادی) اولمایوب (اقتضائی) دخی اوله بیلیر . فورطنه لرك وقوعنده جریانلرك حصولنده ، ترکیبات و انحلالات کیمبوته ده ، نباتاتک ضیایه میل ایتمه لرند ، دلاک و تماس ایله حرارت و تهلک تریق حصولنده بر (نیت) اولمادینی کی ! . . [۱]

هر حاله تکامل فلسفه سی ، آثار خلقتده بر نیت مخصوصه آراماقله برابر ، حواس بشریه نک اسباب تولدینی بعضی عوامل خارجییه عطف ایدیور . وعوامل سائرده دن بک چوقلرینک بوخصوصده ذی مدخل اولماش بولوندوغنه اینانیور . حواسمزلک بودر جهده قالمش اولماسنی دخی محافظه موجودیتیز ایچون کافی وافی کورویور . دیمک که شو تشکلات حاضرده من ، تمامیه محیطک و بعض عوامل مؤثره نک اثر اقتضاسیدر . شیمدیکی حاله محافظه حیانتیز ایچون تشکلات حاضرده من کافی در . علی الخصوص جزئی بر (فضل *avantage*) تأمین ایدر .

[۱] علت غائیة مسئله سی ایکنجی کتابیز اولان (*ontologie*) نک (*cause*) بحثنده تدقیق و مناقشه ایده جکم .

بیله جک بر (فرق تمیزی difference d'organisation) ، حیات مجاهده‌سنده غلبه‌یی تأمین ایده‌جکی جه‌تله ، بالنسبه تشکیلاتی دعا موافق و شرائط محیطیه به مطابق اولان افراد سائر لرندن زیاده فائز و موفق اوله‌جقلر ، و دنیا‌ده بونلرک نسلی غایبه چاله‌جقدر . بو سایه‌ده (تکامل عضویت l'évolution organique) دوام ایده‌جکدر . حواس‌مزک عددی تزايد ایتمه‌سه بیله اونلری اداره ایدن دماغک - تجربه ایله - قابلیت تصرف و اداره‌سی آرته‌جقدر .

ایشته خلاصه‌الخلاصه اوله‌رق تکامل فلسفه‌سنک بومسئله‌ده اعتقاد ضروری و منطقی سی بودر .

بوده کلوب (اضافت علم بشر) دغواسنه طایانیور . زیرا عالم خارجی ایله مناسب‌آمز اجهزه حسیه‌مز نسبت‌سنده اولونجه ، بونسبت خارجه چیقامیه جغمز بدیهی و ضروریدر . خصوصاً اجهزه حسیه‌مزک بو صورتله تولد و تشککنده بالجله عوامل طبیعی‌نک دخی اولمایوب آنجق بمضیلرینک تأثیری اولماسی کائنات ایله مناسب و جدانیه‌مزده بر جریان و بر شکل مخصوص ویرمش اوله‌جقدرکه اولنجه خارجه چیقامیه جغز . مثلاً اهتزازات اثیرییه آنجق ضیا صورتنده ادراک ایده‌بیله‌جکز باشقه درلو تاقی به بزجه امکان یوقدر .

شو تقدیرجه بز ، نه درلو ونه قدر حواسه مالک اوله‌بیلمش ایسه‌ک بزی احاطه ایدن شو کائناتی‌ده او درلو و او قدر ادراک ایده‌بیله‌جکز . چونکه آره‌مزده واسطه‌مناسبت بو درلوسندن و بو قدرندن عبارتدر . بزجه علمک اصل و اساسی تشکیل ایدن ادراک دخی بو مناسبته شعور حاصل ایتکدن باشقه برشی دکادر . اویله ایسه بزم علم‌مزله وسائط ادراکمز دخی بنیه عضویت‌مه و تشکلات عصبیه‌مز تابعدر ، بناءً علیه تماماً اضافی اولدوغی محققدر . بو حالده حقیقت اشیا به - کاهی - مطاع اولق شسویه طور‌سسون قوای طبیعی و عوامل خارجی‌نک بیله پک چوغندن خبردار دکاز ، و اوله‌یه‌جغز دیمکدر .

کورویورسکیزکه هر هانکی طرفدن یورویوب تحقیقاته کیریشسه‌ک ینسه عینی (دمیر قابو) به قفامزی وورویورز ؛ و مهموت و مأیوس - او حدود

اوزرنده - طور و یوزر. (اضافیت علم بشر relativité de la connaissance humaine) اعتقادی بو عجز مزك محصل طبیعی سی در .

کله جک بایده بو مسئله یی اطرافیه تحقیق ایده جکزر . لکن او بحثه کیریشمه دن اول ، حل وفصل ایده جکمز بر عقده وار . فلسفه مناقشاتنده بر چوق سؤ تفهمات ، هپ او عقده نك اهل ایدله سندن تولد ایدیور . بوندن سوکره آچه جغمز بحثلرده سؤ تفهماته میدان ویره مک ایچون اعتقاد ناسه تحکم ایدن بعضی یا کلاشقلری تصحیحه چالیشمالی یز .

تمه

انسانلر آراسنده فلسفی دوشونجه لره استمداد پیدا اولمه یه باشلادینی زمان ، یعنی خیلیدن خیلی به ترقیات علمیه وصناعیه واقع اولوبده احتیاجات عادیه نك فوقده بر طاقم مسائل عالییه ومجوده تنبئه ذهنی سوق ایدم جک مواد علمیه حاضر لاندینی زمان بالخاصه اوکی مسئله لری دوشونمه یه میال متفکرلرده ظهور ایتشدر . شه سز حیات ایچون محتاج اولدوغمز شیلری دوشونمك واونلره متعلق اولوق اوزره تولد ایدن مسائل عادییه یی اول امرده حل ایتك انسانیتك ، حتی انسانیت متمدنه نك بیله لك مبرم اندیشه سی تشکیل ایتشدی ؛ نته کیم حالاده اویله در . لکن مدنیتله برابر اصول وقواعد معیشت تعین ایدوبده اسباب رفاعت بر درجه یه قدر مستحضر بولونجه احتیاجات عادییه ورورمه حدودینی آشهرق مجردات ومعنویاته قدر انفاذ نظر ایده بیلن بعضی مستتا متفکرلر بو منطقه علویه ده دوشونه دوشونه بر سوری مسئله لر احداث ایتشدر درک بونلرک طوغریدن طوغرییه ودر حال حیاتمزله علاقسی یوق کبی کورونور ؛ بناء علیه اومسائل فلسفیه نك بعضی مستتا ذکاوتلر ایچون بر (زینت ذهنیه) قیاندن اولمه سی لازم کله جکنه حکم ایدییر . بو حکم طوغرو دکدر . تاریخ مدنیت وناریخ

فلسفه بزه کوستریور که هر کونکی حیاتمزه واک مبرم احتیاجاتمزه در حال
 علاقه دار کورونمیهن اومسائل مجردة نك ظهورینه سبب، هر کونکی حیاتمزه آدیم
 باشند بر تصادف ایتدیکمز مسائل عادیه در . معیشت مدنیه ایله تأسس ایدن
 وینه او وادیده ترقیاتی تأمین ایله این حکومت، حقوق، دین، اخلاق و بوکبی
 شیلره دائر مجبوری اوله رقی حاصل ایتدیکمز اعتقادات، برطاقم دستورلر شکنه
 کیرمشدر که اولنلرک طوغروسی کشف و تعیین ایتمکده سعادت حیاتیه مز
 طوغرودن طوغرویه ذی مدخلدر، و بوتون بوشیلر، بواندیشه لر، و بتحقیقات
 انسانک کندی اندیشه سی، کندی تحقیقاتی اولدوغی ایچون اونده اک بویوک
 غایه ده «انسان» در . انسان محیطندن آری اوله ماز . بوتقدیرجه اک مهم
 مسئله، انسانی محیطله برابر تتبع ایتک و نفسمزه کائناتک رابطه سی تحقیق ایدره رک
 اونک اک طوغرو دستورینی کشف ایله مکدر . زیرا هر دورلو موانعه رغماً آز
 چوق ترقی ایتدیکمزه شبهه یوقدر . بوکون بک انی بیلورز که بوترقی محیطمزه
 احسن صورت اوزره مطابقت دیمکدر . احواله تجارب ذاتیه مز آرتوب ده
 عالم و نفسمز حقنده کی اعتقادات محکمه و قویمه مز صاصر صلیمغه باشلادجیه بزه بر
 حالت مخصوصه عارض اولور که اوکا (شک و شبهه) دیرز . بو حالت چوق مدت
 دوام ایتمه ملیدر وایده مز، چونکه ترددی موجبدر و تردد اجراءات فعلیه ده
 عزمزه مانعدر . دیمک اولیور که بزهرنه دورلو اسباب الجاسیله اولورسه اولسون
 بو حائنه گرفتار اولدقی، نفسمزه عالمک رابطه سنه دائر، (یعنی بزمه محیطمزه رک
 موازنه سنه دائر) تأسیس ایتش اولدوغمز دستور اعتقاد، قوتی غائب ایتش و یکیدن
 بر موازنه تأسیس ایچون لزوم حس ایدلمکده بولونمشدر . بونی بر سوزله
 سویله مک لازم کایر سه دیه بیلیرز که یکی یکی شرائط معنویه کوره محیطمزه یکی
 باشند مطابقت ایتک و یکیدن تأسیس موازنه ایله مک مجبوری حس اولونمشدر .
 ایشته آراصر دودور دور، فلسفه تاریخده ظهوره کان بوشک و شبهه و تردد
 زمانلرینی اسباب موجب سهیله واک درین معناسیله آکلامقندن عاجز اولان
 اکثریت ناس - یعنی فلسفه یه بیکنه بولونان کیمسه لر - یا کلش تاقی ایدره رک فیاسوفلره
 تهمت و فلسفه یه عیب بر غرابت اسناد ایتمکدن هیچ بر زمان قور توله مامشلردر .

فیلسوفك بری - هر هانگی بر دورده اولورسه اولسون - هجا شو بنم
 حس وادراك ايتديكم شيلری هر كس ده تماماً و عیناً بنم كهی می ادراك ایدیور؟
 عجا حیوانانده عقل وادراك و قدرت تصور و تخیل انسانلر ككنه معادل و طبق
 اولنك كهی برشیمیدر؟ دییه دوشونك اولسه ودها بو كهی ملاحظاته بالضروره
 سوق ذهن ایلسه، فلسفه مباحثك ماهیت حقیقه سندن غافل اولان كیمسه لر
 اوفیلسوفی احتمالكه پك غریب كورورلر و بدهات عالمه قارشى شبهه ایده بیلدیكندن
 طولانی اونى نوعما مجنون صانیرلر. بویله برشبهه یه قارشى ده ساده دل و بیلکیسنه
 مغرور اولان خلقك بر قیصه و قوتلی جوابی واردر :

كونش انكار اولونورمی ؟ دیمكله اکتفا ایدر.

أرت كونش انكار اولونماز وشو كوردیكمز كونشی فی الحقیقه انكار ایدن
 اولما مشدر صانیرم . لکن شو بنم یدیهی اوله رق قارشیمده كوردیكم كونش
 بدیهی اولقله برابر بنجه بر معمار، چونكه بن او كونشی حواسمدن بمضلری
 واسطه سیله تاقی ایده بیایورم . آزیحق یسقه ولوزی كتابلرینی قارشیدیر و بده
 حواسمك کیفیت ادرا كده معرفتی و اوینادیفی رولی تحقیق ایتك مراقفه دوشر.
 سم، او وقت بر چوق غریب مسئله لك ذهنه هجوم ایتدیكنی كوریورم و او
 مسئله لرله قارشى قارشى به بولنمقدن قاجینعق احتمالی اولمادیغنی ده آ كلا بورم ،
 زیرا كونش قدر بدیهی بر حقیقته استناد ایدرك محاكاته كیریشدیكم حالده هر
 درلو تقیداته رغماً محاكاتك جریان منطقیسی بنی اویله بر طاق طولامباج
 وادیلره سوق ایدیور كه آدیم باشنده بر، رهكذاریمه برمانه چقیور و او، ذهن
 ایچون مدهش بر مسئله شكلنی آلوب قارشیمه دیکلیور . یوقسه كوزیمك
 كوردیكنه كوره كونش البته كونشدر . فقط بو حكم بكا كونشك حقیقتنی
 آ كلاتمادیغنی كهی سرادرا كه دائرده ذره قدر برشی اوكرتمز . خصوصاً كه
 بویله بدیهی شیلری ینه كندی بدهاتی ایه تعریف ایتك ذره قدر فلسفی بر فكر
 احتوا ایتمز ، چونكه بر صیغیر تماچ و بر محله بكجیسنه ده سورسه كز سزه بو
 جوابی ویرمكه قناعت ایدر .

بن كندی حسابمه علوم صحیحه و نایسته دائره سنده تحقیقات اجرا ایدركن،

اطرافى احاطه ايله بن بونجه معمارك هر هانكى بر وجهله حله چاره ازاركن
الك زياده بر حقيقتك تكررىنى كوربيورم؛ و تحقيقاً تمده نه قدر ايلرى كيدرسم
ونه قدر متنوع مثالارله او تحقيقاً تمى قونترول ايدرسم او قدر اى آ كلايورم كه
(بداعت محض حقيقت دكلدر) .

ايشته بو مهمه يى آ كلادقدن صوكرا واقعا بنده بر شېه حاصل اولويور،
فقط او شېه نك قيمت و ماهيتى و خصوصاً نه تماق ايتديكى لايقيه بيلمك
اقتضا ايدر .

بن كنندمن هيچ شېه ايتميورم .
هر حركتم اثبات ايدر كه هم كندى وارلقمه، همده عالم خارجيك موجود .
ديته اينانيورم و قطعياً اينانيورم . بو خصوصده قناعت وجدانه جزئى بر
شمه شېه عارض اولسه يدى ، نه يابه جفى شاشيريردم . قيلمده مازدم . كيم
ويا خود نه اولدوغى ، نرده بولوندوغى ، نه يابديغى بيله مزدم ! . . . حالو كه
محمد اولسون - هيچ اويله دكل . بندين زياده كندى بيلمك ، و كندى موجود .
ديته اينانق ، و عالمك وار اولدوغنده قناعت ايتك ممكن دكلدر . ايضاح ايديم .
فيا سوفرل حفته كى سؤ تفهيمك منشأى كندى بيلدنن منكشف اولسون و ماهيتى
ا كلاشلسين . مثلاً :

سزله فلسفه درسى و يرمك صورتيله بر خدمت مخصوصه تعهد ايتش
اولدوغى بيلورم . درس زمانلر نى ده بيلور و هر زمان خاطر ايدورم . وقتنده
وابوره يتيشه بيلمك اوزره ايركنجه حاضر لنيورم . ساعتده باقيورم : اون دقيقه
مهلم اولدوغى و بو قدر بر فاصله زمان طرفنده فرح فرح بيك اسكه سسه
وارد بيله جكمى - تجارب مكررمه بناء - قطعياً كسدير بيورم . مكتبه كايكن
وانى كوى اسكه سنى شاشيرميورم . درس خانه يه كيرنجه سزارك جمله كرى طانيورم ؛
اولجه كورديكم افنديلر اولدوغى كرى آ كليورم . يعنى هويت ممتازه كرى حافظم
تصديق ايدنيورم . (عجبا آمر يقاده مييم ؟ .. بوقسه حقيقه وانى كوينده مييم ؟ ..)
ديه ديوانه جه بر شېه نك زبون انديشه سى اولميورم . وريدكم درس لرده نلر
سويله ديكى ده بيايورم و البته بيله رك سويلدورم .

اوه عودت ايتديكم زمان اطرافى آلان سعيد ايله نظيفي كورونجه : (عجا
 بنم چوجوقلرم حقيقتاً موجودى ؟ يوقسه اونلرك موجوديتى ، بنم ذهننده
 بر (فكر *idée*) اولمقدن مى عبارت ؟ وياخود بوسكىلى چهره لرى كوردوكم
 زمان بر (شعبده ، بر غلط حس *illusion des sens*) لك مغبوتى مى
 اولويورمده يوق اولان بر شينى خارجه وار كيبى مى كورويورم ؟ .. وياخود
 بنم حسياتم (خارجه منعكس *exteriorisé*) اولويورده سعيد ايله نظيفك
 شكلارنده مى تجلى ايدويور ؟ .. اكر اويله ايسه بنم كندى وجودم دى باشقه
 كيمسملر نظرلنده صاقين اويله بر شعبده حس ، بر خيال محض اولماسين ؟ . [
 كيبى دوشونجه لره دوشه جك وبونلره اهميت ويره جك اولورسم كندى وارلغ
 حقدمه كى اعتقادى مدافعه دن عاجز قاله جنم طبيعى در . چونكه بنده حاصل اولان
 شبهه (شهادت حسيه *témoignage des sens*) مك صحت وقيمتنه دائر وجدانده
 مستقر اولان (قناعت صميميه *conviction sincère*) يه - طوغرودن
 طوغرويه - مسلط اولمش اولويور !!

بوكا چاره بولمق كوچدر . زيرا بو (حالت روحيه *état d'âme*) بر نوع
 ديوانه لكك (صفت كاشفه *la caractéristique*) سى در .

بنم شبهم بوقيلدن اولسه يدى ، وبوده حقيقتاً فلسفى بر قيمتى حائر
 بولونسه يدى ، او وقت واو تقديرده فلسفه درسلىرى مکتبه ودارالفنونده
 دكل ، بيمارخانه ده تعليم وتعلم ايتك دها زياده موافق ودهاده طوغر واولوردى .
 حالبوكه مسئله او دكل ا . (شك فلسفى *le doute philosophique*) نك ماهيتى
 بوسبتون باشقه در : او شبهه ، آنجق (حقايق اشيا) بحثنده ذهنمه عارض
 اوله بيلن بر حالت مخصوصه در ، و موقت اولمق كر كدر . كائنات مشهوديه
 و (معطيات حسيه *données des sens*) يه قطعاً و قاطبةً تعلق يوقدر . - دمين
 عرض ايتديكم وجهله - كندى حسياتمزدن ده شبهه ايتك ممكّن اولورسه
 فلسفه يه حاجت وحقى امكان قالماز . چونكه (وجدان *conscience*) دن شبهه
 ايدلمش اولور . حالبوكه بوتون فلسفياتك زمين استنادى وموضوع بئى اودر .
 بوتون مسائل علم وحكمتك مبدأى ينه اودر .

سلفده كلوب كچن (لادريون *sceptiques*) ايله بوكونكى (لادريون

(agnostiques) آره سنده پك بيوك واساسلى بر فرق واردر : اولكيلرفى الحقيقه (عالم حسى le monde sensible) دن و اوعله متعلق بولونان معلوماتدن شبهه ايديورلردى. حتى بونلرك شو طور غريبيه يورده طوقسان جعلى ايدى ، ده يه بيليرم. زيرا پك اعلا ييوب ايجيورلر وهر شيك ايسى سنى كوتوسنى فرق ايتمكه چاليشيورلردى. كوردكلرى شيلردن قطعاً اشتباه ايتمين اكثريت ناس كېي قضالردن و تهلكلردن صاقينيورلردى. ظن ايدر م ، مورخين اسلاف بو آدمرك افكار و احوالى تنقيد و ياروايت ايدر كن مبالغه يه قائلقدن و قايه نفس ايده مه مشلردر. مثلاً تاريخ فلسفه يه باشليجه مأخذ اولان كتب تاريخيه و وثائق معتبره ده روايت اولونويور كه قدامى لادريه نك پيرى اولان (پيرون Pyrrhon) نام فيلسوف كندندن بيله شبهه ايدر مش ، حتى شبهه ايتديكندن دخى شبهه ايدر مش .. او قدر كه فرط اشتباهندن طولايي هيچ بر شى يابه ماديى ايجون بالذات حركته دخى مقتدر اوله مازمش ؛ اوندن طولايي بر آدم بو فيلسوفك لندن طوتوب كزديرر و كنديسه دلالت ايدر مش ..

شيمدى شو حكايه ده - بنم اعتقادجه - بي لزوم بر مبالغه واردر. چونكه كندى حواسندن ، كندى وجدانندن فنا حالده شبهه ايده بيلن بر آدمك ، باشقه بر كيمسه نك دلالتنه عرض افتقار ايتتى ، كندى كوزينه ، كندى اينه اينانمايان بر آدمك يابانجى كوزلره ، يابانجى الله اينانماسى - بنجه - غريب بر تناقض تشكيل ايدر. لزومسز مبالغه ديديكم ده بو تناقض ده مندمج اولان غرابت معنادر. محقودر كه (پيرون) پك چوق ياشامش و بناء عليه بر چوق قضالردن ، ياكلش حركتلردن حياتى صاقيه بيلمشدر ؛ يعنى كمال امنيت ايله حركت ايتمشدر. يوقسه ياشايه مازدى ، مطلقاً باشنه بر قضا كليردى . اكلاشيلور كه بزه بو آدمرك افكارى نقل ايدنلر بر آرز فضله جه مبالغه ايتمشلر. بوكون بزم بر شبهه من وارسه ، عالم حادثاته دكل ، ماوراي حادثاته ، يعنى مابعدالطبيعاته دائردر. بز حس ايتديكمز شيلره قطعياً اينانيورز. يالكلز اونلرى حس ايتديكمز صورت اوزره قبول و تلقى ايديورز. فقط بوكوردوكز شيلرك حد ذاتنده ناصل اولديغى ونه اوله بيله جكنى دوشونمكه باشلا ديفمز زمان ، ذهنزه غريب بر شبهه عارض اولويور ؛ بوده ضروريدر. بناء عليه

معدورز ، چونکه (تلقیيات حسيه Acquisitions sensitives) مناك ماهيتاً انفسى اولدوغنى پسيقولوژى تدقيقاتى صراحتاً كوسترييور . نتهكيم بو بحثى برآز صوكره تفصيل و مناقشه ايدم جكم ، زيرا بالخاصه (مبحث معرفت épistémologie) مسائلى اوندن تولد ايتمشد .

مع مافيه هر كونكى تجارب حياتيه من و معاملات و حرركات قطعياً اثبات ايدويوركه شو ايچنده ياشاديغمز عالم ، اصلسز بر رؤيا دكلدر ؛ بر خولياده دكلدر ؛ بر شعبده حسده دكلدر ؛ بالعكس بر حقيقتدر . لكن حقيقت مطلقه دكل ، بر حقيقت انفسيه واضافيدر . ايسته بز بوكا اينانيورز ، بويله اينانيورز . بو خصوصده ذره قدر شبه من يوقدر . حتى بو وادى حادثاتدن چيقيماق شرطيله بعض احواله دخى اينانه بيلورزكه اونلرك وقوعه بالذات شاهد اوله مامشدر و اوله مازدق !.. مثلاً استانبولك تركر طرفندن فتح اولونمش ايديكنه اينانيشم ، قعريه جامعنك و قتيله بر روم كليساسى اولمش بولوندوغنه قناعت كاملهم بو قيلدندر .

ديمك كه زمان حاضر ك ساحه تجلياتنده داخل اولان بر طاقم حادثاتدن ، زمان سابقده حاصل اولمش و كلكش كچمش بعضى وقوعاته قطعياً استدلال ايدم بيلورمشم !.. اويله اولونجه ، يالكز شو آنده كوردوكم شيلرك حقيقتنه دكل ، - وقوعه بالذات شاهد اوله ماديغم - بر طاقم حادثات ماضيه نك صحنه بيله اينانه بيلورمشم !.. بو قدر اينانمق چوقدر بيله !..

ذاتاً هر كونكى حياتى تشكيل ايدن بر چوق وقوعات جزئيه شهادت ايدر كه وجدانم منكشف اولان شو عالم حسى نك وجودينه قارشى قطعاً شك و شبهه يوقدر . چونكه بو بديهى بر شيدرو و حقايق علميه نك زمين استنادى آنچق بو بداعت عالمى در . ملاحظات فلسفيه نك حقه اصابتى اثبات ايچون (علم science) دن دليل ايستين بر فيلسوف ، او عالمى ناصل اهل ايدم بيلير ؟ . كندنجه معتبر اولان و كشفيات علميه دن مقتبس بولونان دلائلك حيثيتى ناصل شبهه دوشوره بيلير ؟ ..

آكلاشيلوركه نم دعوام بداعتى انكار دكل ، اونى آنچق تفسير ايتمك لزومه طايانير . اولسه اولسه او بداعتك ماوراسنده موضوع فرض ايتديكم

ویا خود ضمننده کیزی ظن ایتدیکم بر شینه بر نقطه استفهام قویمقدن عبارتدر.
 (موجودات) دن شبهه ایسه یدم ، اونلرک لدنیاتی ، اصلی فصلنی آرامغه
 البته قالقیشمازایدیم. بناءً علیه داعی اشتباه اولان (حادئات (phénomènes)
 دکلدر . کرک تحقیقات فلسفیه ده کرکه (تفحصات علمیه investigations)
 (scientifiques) ده ، حادئات ، هم زمین استنادی ، همد ماده اصلیه بی تشکیل
 ایدر. فقط مابعدالطبیعیونی ، دوشوندورن (معما énigme) ایله علمانی مشغول
 ایدن مسئله بر وعینی شی دکلدر. مابعدالطبیعیون ، حادئات حدودینه کلوب
 طورمازلر؛ پرده حادئاتی قالدیروب ، هرشیک ایچ یوزنی ، لدنیاتی کورمک
 ایستلر. مابعدالطبیعیات ، ایسته بورادن باشلار. اوراده قارشیمزه - بوسبتون
 باشقه ماهیتده - بر سورو سؤاللر دیکیلیرکه ، علما اونلره جواب ویرمکه
 مکلف دکلدرلر. چونکه او معمالر ، تحقیقات علمیه نک حدودی خارجنده
 پیدا اولور و اونلرک علوم صحیحه ایله قطعاً علاقهمسی یوقدر .

بداهت ، نه قدر بداهت اولورسه اولسون ، - قیمت لدنیه سی اعتباریله -
 باشلی باشنه بر مسئله غامضه تشکیل ایدرکه حالا (مختلف فیه) در؛ چونکه
 حل اولونه مامشدر. بویله بر مسئله وضع ایتمک ، ذهن بشرک بر ضلالتندن می
 ایجاب ایتشدر ؟.. یوقسه حقیقتاً بویله بر مسئله به وجود ویرن بر معما وارمی
 یوقی ؟.. شیمدیلک اوکا باقیورم ؛ اونی صورمیورم و دوشونمیورم ! یالکز
 شونی عرض ایتمک ایستیورم که بوکون حالا فلسفه ده ایله بر مسئله واردرکه
 اک بویوک برمعمانی متضمن کورونویور؛ اوکا دائره اوزون اوزادی مباحثات
 و مناقشات وارکه فلسفه مابعدالطبیعیه نک باشلیجه موضوعاتی تشکیل ایدیور.
 بو نقطه ده ذهنه - بالضروره - عارض اولان شبهه ، بداهت عالمه ، شهادت
 حسیه یه ذره قدر طوقونماز. علوم صحیحه ایله ده مناسبتی یوقدر .

بر عادی مثال ایله - نه دیمک ایسته دیکمی - ده ای آکلاته یم :

یولده کیدرکن آیامه چارپان طاش پارچه سنی کوروپورم. اونک وجودندن
 ذره قدر شبهه ایتیورم ؛ دلی دلم !.. فقط : (شو کوردوکم ، تماس ایتدیکم
 طاش پارچه سی عجبا - حد ذاتنده ! en soi - نه در ؛ ونه اوله بیلیر ؟ ..) دیه
 بر دوشونجه یه واریرسم ، کیم اولورسم اوله یم ، مابعدالطبیعیات دائره سننده

بر سؤال وضع ایتمش اولورم . بن فرضا ، بر دوستمله بحث ایدرکن بویله بر سؤال صورتوغم زمان ، بکا ؛ (طاشدر ، نه اوله جق ؛ . طاش اوله بیلیر !) .
 دیه جواب ویریرسه ، او دوستم بنم سؤالک ماهیت معناسنی آکلاماش دیمکدر . تحقیقی صدندنه بولوندوغم مسئله مهمه حقندده جهله عوامدن زیاده وقوف و معلومات اظهار ایتمش اولماز . حتی ، او فرض ایتدیکم ذات ، برعالم اولسه وسؤاله برعالم کیی جواب ویرسهده ، او طاش پارچه سنک خواص عمومی و خصوصیه سنه ، ترکینه ، عناصر کیمیویه سنه ، ثقلت اضافیه سنه - طبقات الارض نقطه نظرندن - تاریخ تکیونه ، معدنیات اعتباریله جنسه دائر ایضاحات مفصله وکامله اعطا ایتمش اولسه بیله ینه بنم نه صورتوغمی لایقوله آکلاماش اولدغه دائر بکا قناعت کلز . چونکه بوتون بو ویردیکی تفصیلات هب علومه عائد معلوماتدر ؛ اونلرک جمله سی ده بلااستنا (کیفیات اجسام) ی تعداددن عبارت قالیر . کیفیات ایسه (مدرکات حواس perception des sens) دن بشقه برشی دکلدرد . اوت ! . تدقیقات علمیم کوستریور ، تجارب وجدانیم ده شهادت ایدیورکه خواص و کیفیات اجسام دیدیکم شیلر بنم کندی حسیاتمدن ، همد محضا (حسیات حاضره sentiments actuels) مدن عبارتدر . [یعنی آنجق شو آنده کی طویغولرمدن باشقه بر شیلر دکلدرد !] بو طویغولرمدن - بن - لایقوله خبردار بولوندوغم ایچون اونلری انکاره کندمده مجال کوره مم . فقط کونش دخی برابر اولدوغی حالده کائناده بنم اداریک ایده بیلدیکم شی آنجق بو طویغولرمدن عبارتدر . پسقولوجی بونک بویله اولدوغنه انسانی پک قولای اقناع ایده بیلور .

شیمدی ، قارشیمده بدیهی طوران شو دنیاده - بنم کندی طویغولرملک هیئت حاضره و مجموعه سنندن باشقه - بر شی واری .. یوقی .. ؟ مسئله ایشته بودر ! .. بونی ده کندی طویغولرمله حل ایدم ، چونکه بو برمعما که حسیاتمک حدودی خارچنده موضوع بولونویور .:

کورویورسکیزکه بنم هدف نظرم ، عالم محسوسک بزجه قابل ادراک اولان (صورت ظاهره) سی دکل ، (problématique مختلف فیه و مجهول) اولان حقیقی در . ادراکات حسیه مدن کیزی قالان (طبیعت صمیمیه nature intime) سی در .

مادام که بنجه شیمدیلک حلی مطلوب اولان معما بودر ، اول باول عالمی (شو کوردون دوکی شکل و حال اوزره !..) قبول ایتیکلکم ضروریدر : مالک بداهت وجودی تسلیم اولونماز ایسه ، هم بمحتملک موضوع خاصی مضمحل و منعدم اولور ، همده زمین استنادی کندیلکندن منهدم اولور . دیمک که اولاه محسوساته اینانمق [لدنیات بحثنه بر ساحة امکان احضار ایدوب میدان قازانمق ایچون] برنجی شرطدر .

او حالده بکا - عبث یره بر دلیل اولمق اوزره - خارجده کوستریلان کونشی وطاش پارچه سنی اولدوغی یرده واولدوغی کیچی براقه بیلیرم . [بونلر بدیهی شیلردر !..] دهینلره قارشی : [آما !.. بدیهی شیلردر اقدم !..] [ده یوب کجه بیلیرم . یعنی او شیرلی - صرف حادثاتدن اولمق حیثیله - بوراده موضوع بحث بیله ایتجه بیلیرم ؛ حتی ایتک ایسته م !.. ایسته مدیکمک سببی ده قطعاً ولایقوله آکلاما کز بنجه پک ملتزم وسزجده الزمدر :

بن بو کتابده سزه قوزموغرافی و (فیزیوگرافی Physiographie) اوقوتیمورم ! فلسفه نك مبحث معرفت مسئله سنی آ کلامغه چالیشیورم ! اگر علوم صحیحجه دائره سنده بر درس ایله مشغول بولونسه یدم ، او زمان کونشک و سائر اتک موجود منحصر آ اوصاف و بیفایاتی تحقیق ایله اکتفا ایدر ، قطعاً اوندن ایلری کیتیمزدیم . لکن شیمدی لدنیات بحثنده ذهن بشره عارض اولان بر شبهه مزعجه نك منشأ و ماهیتی اکلامق ایستوروز . بوراده اصل ایشمز ، حادثات پرده سی آلتنده کبزی ظن ایتدیکمز و یاخود او یله فرض ایتدیکمز بر وارلنک حقیقتی دوشونمک ، اونی تدقیق ایتمکدر . اصلی اولسون ، اولماسین !.. بز بویه بر شینک اصلی اولوب اولمادیغی آنجق بوکی تدقیقات سایه سنده آ کلاهی بیلیرز . بو ساحة نظریه ده تدقیقات اجرا ایتک تجربه ایله اوله ماز . یالکز طوغرو دوشونمکله اولور .

لکن ، بودوشونجه طوتولونجه ، ذهنمه - همه حال - بر شبهه عارض اولویور . ممکن دکل اونک پنجه تسلطدن قورتوله میورز . فقط اوشبهه مالک بداهت وجودنی تصدیقه قطعاً مانع دکلدر . چونکه بزم شبهه من (مسئله وجود la question de l'être) حقنده دکل ، اوندن امیز !.. بزم شو کوردو کز

و موجود بته قطعياً اينانديغمز شيلوك - نفس الامر ده دخى - حقيقتاً كوردو كمر
شكده اولوب اولماق قرينه دائر در .

ديمك كه بزه كورون شو كائناتك بدهات وجودينى قطعاً انكار ايتيورز .
شيمدى ، بوتفصيلانى لظر دفته آله رق اين دوشونه لم : بو بدهاتى تصديق
ايدويورمكه (معماى وجود l'énigme de l'existence) حل ايدلمش اولماز كه ! ..
موجوداتك بدهاتاً ثابت اولدوغنى بيلمكه اكنفا ايتمك ، هنوز هيچ بر شى
بيلمه مكدرد . بيلكى نك بوتورلوسى - هيچ شبهه كوتورمه ين ؟ ! - بر شعوردن
عبارت در . بناء عليه - تعبير خصوصى واصطلاحى سى اعتباريله - نه علمدر ،
نده فلسفه در ؛ شو قدر وار كه علم ايجون ده ، فلسفه ايجون ده بو بدهات ،
هم زمين استناد ، همده نقطه حركت در . ناصل كه بر آز اول سويله مشدم ! .
يالكرز سياق تتبع ده بر فرق واردر : علم حادثاتى ، حال حاضرينه نظرله ،
يعنى صورت ظاهره سيلاه موضوع بحث ايدر ، وتديققاندن آنجق مدركات حسيه
حدودينه قدر كيدر كه (بدهات) عالمى اوراده در و اوقدر در . علم بو حدودى
آشماز . حقيقت وماهيت اشيا ايله اوغراشماز . بو مسئله غريبه ايله خاصه
اوغراشان فلسفه در ؛ حتى فلسفه عموميه نك آنجق مابعدالطبيعات قسمى در .
اونك ايجوندر كه علمك طور دوغى نقطه دن مابعدالطبيعات باشلار ،
بناء عايه بدهات حادثات هر ايكي سنك ساحة تبعاتى آره سنده خط اتصال
تشكيل ايدن بر منطقه مشترك در . بدهات دائره سنده تدقيقاته دوام ايتدكه ،
ذهن بشره (شك فلسفى) تعرض ايدم مز . فقط او دائره ي آشنجه ، در حال
او شبهه عقل مزه مسلط اولور ، چونكه بدهات خارجنده ياخود ماوراسنده
هيچ بر دليل قطعى اقامه ايتمك ممكن اوله ماديفى ايجون ، هيچ ير مسئله
تعرض اشتباهدن مصون قاله ماز .

بناء عليه ، بن مابعدالطبيعات بحثنه كبرنجه :

(جمله مزجه بدهات وجودى مسلم اولان شو اشباحك حقيقى ندر ؟ ..
بو حادثاتك لدنياتى وارميدر ؟ .. بو ظواهرك باطنى ناصل شيدر ؟ .. حاصل
بو كورونشك ايج يوزى ندر ؟ ..) ديهه صوريورم و آنجق لدنيات امور
مسئله سنى وضع ايدنجه بو شيلرى دوشونوب صوريورم !

سؤالك موضوع ذاتیسی بكا جواب اوله مازكه (كونش كيی بدیی) كيی
بر دليل ايله بی الزام ایتك لازم كلسین ؛ و بوده منطقاً طوغری و محق
اوله بیلسین !

اساساً بن اوكونشی انكار ایتهدیکم ایچون اونك حقیقتی صوریورم .
بلکه کوردیکم شو کونشی ، - هیچ کوره مدیکم ، لکن وجداناً سزدیکم -
بر وجود حقیقتك کولکسی ظن ایدیورم ! او حالده کوزیمی قاشدیران
بو حادثه نك سبب اصلسی بنجه هنوز ظلام مهیمته در . بن - سؤالك شو
رضیته کوره - مابعدالطبیعیوندن بر فیلسوف اولق حیثیتی ايله ایشه اوسبی
آرایورم و ممکنسه ، اونی بولق ، اونی بیلک ایشه یورم دیمکدر .

آ کلاشیلورکه کوردیکی ، طوتدینی ، یدیکی ایچدیکی شیلردن دیوانهجه
شبهه ایدن بر کیسه ايله بنم شبهه آراسنده بویوک بر فرق واردر . تاریخ
فلسفه و اصول تنقید کوستریورکه اصل بو مرحله فکریه یی تحدید ایدن
نقطه لرده سوء تفهومات وقوعه کلیور . اختلاف نظر ، دهامناً نقطه سنده
باشلادینی ایچون زمین معارضه ده بر وضعیت متقابله آلان طرفین متفکرین
آ کلاشمان ایشه کیریشورلر .

بناء علیه بو سوء تفهمه باشلیجه سبب بداهت حسیه یی حقیقت محضه
ظن ایتك کی فاحش بر خطانك بجه تقدیمدر .

اوله ایشه رهگذار تفکریمزدن اك اول بو مانعه یی قالدیرالم . جدی بر
صورتده بجه کیرشمزدن اول بو خطایی تصحیح ایدلم .

فیلسوفلر نظرنده صورت بداهت عین حقیقت دکلددر . بو جهتی لایقیله
خاطر مزده طوته لم !.

بز اکر یالکیز شهادت حسیه مزه اینانمقله قناعت ایده جك ایشهك ارضك
یووارلاق اولمادیغنه ورنده ساکن بولندیغنه اینانمقله دخی مجبور و مضطر
قالیرز ؛ چونکه ارضك کره شکلنده اولدیغنی و ثانیه ده ناصل بر سرعت
خارق العاده ايله طی مکان و قطع مسافه ایندیکنی بزه اوکره تن ، بیلدیره ن
و ایناندیران شهادت حسیه مزدکلددر . حتی کوردیکمز بداهت او حقیقت مسلمه نك
قطعاً عکسفی الهام ایدر . اوله اولماسه ایدی یاقین زمانه قدر اکثریت علما ايله
برابر هرکس ارضك مستوی و ثابت اولدوغنه اینانمازدی .

بناءً عليه ، بن بداهت عالمی بر مسئله فلسفیه یا پوبده اورته به آتدیغ زمان
 کویا وجدانمدن وحسیاتمدن و بنا برین کندی ذاتمدن شبهه ایدیورمشم کبی
 بکا کونشی دلیل کتیرمک بداهتی بکا ینه او بداهتله اثباته قالشقمق دیمکدر ؛
 و کندی سؤالمی عیناً بکا اعاده ایتمکه جواب ویرمش اولمقدرکه بیهوده یره
 معلومی اعلام صایلیره یعنی عبندر بن اونی ذاتاً بیلورم و کوروب طور یورم .
 بکافارشی بو طرز استدلال بنم سؤالمک - هنوز کندی ماهیتی ایل - آ کلاشیله مامش
 اولدیغی اثبات ایدر . او حالدله بویله بر جواب ناممکدر . چونکه بنم سؤالمک
 جوابی اوله ماز ، اکر بن احتسası انکار ایتسه یدم او وقت کونشک دلالتی
 مقبول اوله بیلیردی . اوده عینی حسده هر کسه اشتراک اولمق شرطیله معقول
 اوله بیلیردی . یوقسه حس بصردن محروم اولسه یدم بداهت ضیا کونشک
 وجودندن بی ناصل خبردار ایدر و ناصل اقناع ایده بیلیردی آ کلا یه مام !!
 بز بو مبحثده افکار عامیانه بی وعوام ناسی معذور کورملی یر . بو فرقاری
 و مسئله نک مختلف و ضعیفی تمیز ایتمکه مکلف بولونان فیلسوفلر بیله اکثریا
 بو بحثی تهویش و تغلیط ایتمشلردر . اصل ماهیتی و جهت تعلقی آ کلا یا مامشدرده
 یکدیگر لرینه افتزیه قدر وارمشلر . خصوصاً قرون وسطا الهیوتجه وجود الوهیتی
 اثبات صدندنه ترتیب اولونه بیلن دلائل مقنعه نک اک مهملرندن بریده
 (ائردن مؤثره استدلال یولی) اولدینی جهته کائنات مشهوده نک وارلغی شبهه
 دوشورمک آثار خلقی و بناءً علیه لزوم خالق شبهه دوشورمکه بر
 طوتولمش ، و بداهت عالم مسئله سنده ذره قدر اشتباه ایدن لر بلا انصاف تلغین ایدیلوب
 خلق آراسنده کافر اولمق حیثیت مردوده سیله مستحق عتاب و عذاب اولمشلردر .
 نته کیم (وجودیه Panthéisme) مذهبه میل ایدن لر کده افتزای کفره معروض
 اوله کلش بولندقلری عینی سببه معطوفدر .

زواللی سپینوزا کبی فاضل و داهی بر فیلسوف بیله بوقنا افتزادن وارسته
 قالمامش و بغیر حق پک چوق اذیت چکمشدی . حالبوکه زمانمز مدقیننک
 پک طوغرو اولان ادعاسنه کوره حسیات دیندارانه ، سپینوزاده تجلی ایتدیکی
 ی سنج قدسیتده همان هیچ بر فیلسوفده کورلمه مشدر .

کتبرد ویرسین صوکر ا بداهت حسیه نک محض حقیقت اوله لازم

کلمه‌ی جکی کرکی کبی آ کلاشلمش و مالبرانش و بارقله کبی هم بویوک راهب هم ده بویوک فیلسوف اولان بعض آدمیر بیله بداهت طالی برشعبده حسیه اولمق درک لرینه قدر ایندیروب هیچه چیقارمشلر و غریبدرکه اللهک وارلفی انبات ایچون بو (افکاریه Idealisme) سیاق نظرندن ای بر دلیل بوله مامشدردر .

بزم صوفیه نك فکری ده تماماً بویله در .

شیمدی بو مهم نقطه آ کلاشلدقدن صوکر ا شونی اخطار ایده جکم که فی مابعد هر نه دورلو مسائل فلسفه حقه ده اولورسه اولسون بیان ایده بیله جکم شبه لر قطعاً عالم حسینک وجودینه متعلق اولمایا جقدرد . بناء علیه صرف بر شبه مابعد الطبعیه اولمق حینتی ابله تلقی ایدملیدرد . و قطعاً ایناملیدرکه مسائل مابعد الطبعیه ده جدأ شبه یه محل واردرد . اکر اولماسه یدی عینی بداهتی تفسیر ایچون افکار فلاسفه بودرجه تشتت ایتمز و بودر مختلف مذهب لر و مسالک لر ظهوره گلزدی .

شیمدی اومذهب لری مناقشه ایده جکز . اونلرک ادعالرینه اساس تشکیل ایدن دستورلری کوروب تنقید ایده جکز . فقط یالکز (مبحث معرفت) دائره سنده بحثی یوروته جکز . چونکه اونو تمایه لم ، بو کتابده آننجق (حقیقه ناصل کسب اطلاع ایده بیلیرز و ناصل علم یقین حاصل ایده بیلیرز ؟) سؤالنه بر جواب معقول تدارک ایتمک تشبندیز . بناء علیه بر حقیقت اولدیغی و یا خود اولمسی لازم کله جکنی ضمناً قبول و تسلیم ایتمش بولونیورز دیمکدر .

حقیقت ناصل شیدر سؤالنه جواب ویرمک - معلومکنز اولدینی وجهله - آننجق (مبحث وجود ontologie) ک وظیفه سیدرد .



دردنجی باب

کچنکی بابه سرد ایدیلن ملاحظاتدن استدلال اولونه بیلن نتیجه . — مذاهب فلسفیه نك اسباب ظهوری . — فکر تنقیدك بو خصوصده دخل کلیسی . — تاریخ عرفانده برهم وقعه : سوفسطایه فرقه سنك خروجی . — ایلک دفعه اوله رق فلسفه ده تنقید و تعریضی اصول اتحاد ایدن متفکرین، سوفسطائیون اولشدر . — بونلر کیملردی ؟ ناصل آدم لردی ؟ نه مشربده ، نه مزاجده ایدیلر ؟ .. باشلیجه دعوالری نه ایدی ؟ صاحب مسلك فیلسوفلر بو آدم لری ناصل تلقی ایدیورلر و حق لرنده نه دیورلردی ؟ سوفسطائیونك تربیه اجتماعیه بختنده بالخاصه فکر و نظری و فلسفه مناقشاتنده طوتومی ، کیدیشی ، وضع مخصوصی نه ایدی ؟ .. — سقراطك سوفسطایه گروهه قارشى مجاهده سی . — بحث وجدلده اوللرك اصولی ترجیح و قبول ایتمه سی . — سوفسطائیونك ادعاسنده جهت حق و حقیقت نه در ؟ .. — زمانمرك نقطه نظری و معیار تقدیری . — اسکی زمانلردن بری تعین ایدن مسلک لر . — بونلرك اسملری و وجه تسمیه لری . — مذاهب مذکورده نك طبیعی بر صورتده تصنیفی ممکنسی ؟ .. — سرویلیام هاملتنك تشبیه . — بو تصنیفده اساس اوله رق شهادت وجدانی مبدأ اتحاد ایتش اولماسی .

کچنکی بابك تتمه سنده ، ذهنه عارض اولان (شبهه فلسفیه) نك جهت تعلیاتی و دائره تعلقی نی تعیینه چالیشیرکن کوسترمشمدم که — هیچ اولمازسه بوکون — عالم حادثاتك (معطایات حسن اوله رق en tant que données des sens) ، موجودیتی موضع ترده دوشورن (عقلی باشنده !) هیچ بر فیلسوف یوقدر . حواسمه شو حالی اوزره معروض اولان کائنات بر (بدیهه اولی) درکه اونك وارلقی اول امرده بلاقید و شرط تسلیم و تصدیق ایتک — کرک تحقیقات علمییه کیریشه بیلمک ایچون ، کرکسه تفکرات فلسفیه یه قویولق ایچون — ضروری و (لابد indispensable) در . بوتون علما — هانکی شعبه علمییه منسوب اولورسه اولسونلر — بو نقطه ده متفق الر ایدرلر . فیلسوفلرده — هانکی مذهبه تمایل اولورسه اولسونلر — بو خصوصده علماتك ، حتی عوام ناسک اظهار ایتدیکی قناعت وجدانییه تمامیه مشارکدرلر .

واقعا بگویند دخی برخیلی (ایده آلیست) فیلسوفلر وارددر. مابعدالطبیعیات مسائلنه دائر بیان ابتدکاری ملاحظاته باقیلیرسه ، عالم مادیاتک استقلال وجودینی انکار ابتدکاری شبهه کورتورمز . فقط کوردکاری ، طوتدقلری ، ییوب ایجدکاری شیلرک (موجودیت حسیه l'existence sensible) سفی انکار ایدیورلر دیمک دکلدر . بو اعتبار ایله اسکی (لادریه) یعنی (حسابیه sceptique) لردن فرقلی درلر. هم قطعاً برشینئ انکار ایتک ، (شبهه) ایله برطوتولمالی در . انکار دخی قناعت کاملهیه مقرون بر حکمدر . یالکز بر (حکم منفی jugement négatif) در . بونده تردد یوقدر. فقط بو حکم معطایات حس حقنده واقع دکلدر. متافیزیک دائره سنده ویرلش برقرار قطعی در؛ یوقسه محقق در که بر ایده آلیست فیلسوف ثاله سی افرادینک کنیدیسی کیی موجود اولدوغنه قطعاً قالددر .

اوحالده بونقطه ده هر کس متفقدردیمک اولیور. بناء علیه نظریات فاسفیه ده کورولن اختلافات مهمه نک اسباب موجبہ سنی شو عالم حسینک حجتیه بداهتده آرامایه جغز .

اولجده اشارتاً عرض ایتیش اولدیغیم کجی کوزمزله کوردیکمز ، المزله طوتدیغمز بوتون شو موجودات مادیه نک سر حقیقتلری صورت ظاهره لرندن استدلال اولونه بیلسهیدی ، یعنی بداهت عالم ، مفتاح حقیقت اوله بیلسهیدی ، طیبی در که فلسفه نامنه بوقیل وقاللره هیچ حاجت قالمازدی ؛ چونکه برشینک بداهت وجودی اوشینک حد ذاتنده نه اولدیغنی ، نه اوله جغنی نره دن کلدیکنی ، نره یه کیده جکنی ، ناصل تشکل ابتدیکنی ونه زمان ونیچون یارادلش بولندیغنی تمامیه واطرافیه نره سویلر ذهنمزی مشغول ایده جک هیچ بر مسئله نک ظهورینه احتمال بر اقا زدی . حالبوکه ایش اوله دکل ! . . . حتی دیه بیلیرم که اوله اولمادینی ایچون ذهنمز مشغول اولیور و مشغول اولدجیه معنوتمز تکمیل ایدیور ، او سایه ده اسرار طبیعت کیندکجه ده ا زیاده انفاذ نظر ایده بیلیورز . بوتکامل ذهنی بویه منتظماً یورو یوب کیتسهیدی و قطعاً حادثات مجرا سندن انحراف ایتمه سیدی فلسفه مابعدالطبیعیه نامنه بر مشغله فکریه اولما زدی . یالکز علوم صحیحیه وثابته بزى اشغال و مراقزی تطمین ایتکه کفایت ایدردی . فقط

معنویتك طبیعتی اقتضاسندمیدر ؟ یاخود بعض کیمسه لرك ادعای کبی -
 عقلمك عجز فطریسندمیدر ، نه در ؟ بز دائما مشاهده ایتدیکمز حادثاته -
 احتمال که حدندن زیاده بر معنی ویرمکه فطرتاً میالز . وبلکه کندی حیاتمزه
 ووارلنمزه متعلق اولان قورقولرك ، امللرك ، آرزولرك محصله تأثیرینه تابع
 اوله رق هر شینه ایسته دیکمز کبی و دوشونه بیلدیکمز قدر بر معنی ویره یلورز .
 هر نه اولورسه اولسون شوراسی محقق در که کائناتی یالکمز مشاهده ایتمکه
 اکتفا ایدمه یورز . مشاهده ایتدیکمه آکلایورز که ادراکاتمزه ده مراتب مختلفه سی
 واردر ، و کتاب خلقتك معناسی کیتدیکمه تعمیق ایتك و کیتدیکمه دهایی
 آکلامق ممکندر .

معاصرین فلاسفه دن و کبریج دارالفنونی مدرسیندن دو قنور (یووهل
 Whewell) ك دیدیکی کبی ، (طبیعت برکتابدیر ، اونی تفسیر ایدن و هر بر
 اشارته معنی ویرن آنجق انساندر .) بزم ایچون هر بدیهی شینك بر کینلی
 معناسی واردر که ظن و اعتقادیمزجه اونك حقیقتی اصل اومعنی تشکیل ایدر .
 عثمانیلرك صوك فیلسوفی خواجه تحسین اقدی مرحومك دیدیکی کبی :

کتاب عالمك اوراقیدر ابعاد نامحدود
 دهر در حادثات دهر در اعصار نامحدود
 باصلمه دستظه لوح محفوظ طبیعتمه
 مجسم لفظ معنیبار در عالمه هر موجود .

أوت ، لکن اشاراتی بزم ویرن طبیعت ایسه ده او اشاراته معنا ویرن
 بز . وپك شبهه ایدیورم ، [غالباً (تمایل وجود Les symboles de l'existence)
 عد ایتدیکمز کائناته کیفتمزه کوره معنی ویریورز . بلکه شو عالمده ذی حیات
 و قابل حس و ادراک بر فرد آفریده بولونماسه بدی کائناتك هیچ معناسی
 اولمازدی ،] دیه دوشونیه بیلیر . مع مافیه [اگر کائناتك حد ذاتنده هیچ
 معناسی اولماسه بدی ، اونك سینه سنده بزم کبی ذی روح و معنادار بر موجودیت
 معینه ناصل وجود بوله بیلیردی ؟] دیه دوشونمکه ده ممکندر ، وبلکه بویاکنجی
 دوشونش دهاطو غرودر ؛ اوتقدیرده ده بزم عقلمز ، فکریمز ، آمال و تمایلاتمز ،

الحاصل بوتون حادثات معنویه سیله روحز دخی آهنگ عمومی کائناتده داخل برشی در ، و او حیثیتله شئونات طبیعیه دن صاییلیر . اونک ایچوندرکه نظر مزده اک بویوک واک برنجی بداهت - بزه کندی وارلغمز احساس ایتکدن برآن فارغ اولمایان - حس صمیمی مز ایکن ، اودخی ، معناسی آکلامق ، حقیقتی کشف ایتک ایسته دیکمز بر مهم حادثه ، بلکه ام المسائل اولان اک بویوک معمار . اوندن زیاده بدیهی هیچ برشی بیلمه دیکمز و کورمه دیکمز حالده اوکاده معنی ویرمهک چالیشیورز و تحقیقا مزده ایلرله دیکمه دها مین و صار صیلماز بر قناعت ایله آکلا یورز که بوتون فلسفه مسائلی وجدان معماسنه منجر اولوب قالبور .

علوم صحیحه ، یالکیز اصول تجربیه ته تمسک ایتدیکی ایچون حادثات ساحه سندن آریله مایور . او سببله اولمیدرکه بومسئله له طوقونامایور . طوقونسه بیله اونلری حل ایتک ایچون کندیسندن بر صلاحیت مشروعه کورمه دیکنی کمال خلوص ایله اعتراف ایدیور ، و طوغرودر .

بو کتابک مقدماتی تشکیل ایدن برنجی باده فلسفه نك لزوم و حیثیتدن بحث ایدرکن سوبله مشدم که مسائل مابعد الطبیعه هر تورلو حادثه نك آرقه سندن کورینور . هانکی شیئی موضع حسیسندن قیملداتیرساق ، هانکی طشائی قالدیررساق اونک آلتندن ینه اومعما جیقیوریریور . وبومسئله لر بوتون آمال حیاتیه مزله ، بوتون موجودیت معنویه مزله صیقی صیقی به علاقه دار بولندی ایچون ده اهمیتجه هر شینه تقدم ایدیور . اوندن طولای تحری حقیقتده ذهن بشرک عجزیه رغماً ینه تحقیقات فلسفیه برآن معطل قاله مایور . بلکه بز حقیقت مطلقه بی کشف ایدمه دیکمز ایچون یاکلش بر یوله صاپمش بولونیورز . و بناء علیه کندی خیال مزله بر طاقم مسائل احداث ایدیورز که اصلی فصلی یوقدر . بلکه ده یاکلش بر یوله صاپدیغمز ایچوندرکه آراد یغمز حقیقه بوله مایورز ا هر نه اولورسه اولسون ، عقل مزه رهن اولان و ذهن مزی اندیشه له له اشغال ایدن بویله بر چوق مسئله لر واردرکه اهمیتلری - حقیقی و یا خود محدث اولملری اعتباریله دکل - انجق بزم نظر مزده بر قیمت مخصوصه بی حائر بولوندقلرنددر .

بونلری - ایی کوئی - حل ایتمک ایچون بر مجبوریّت حس ایدیورز . چونکه استراحت وجدانیه وسعادت معنویه من - آرزوق - ماهیت اعتقاد منزه تابعدر . اعتقاد منزه ده او مسئله لرله او یله صیق بر علاقه سی واردر که حیات منزه تعلق ایدن هر ایشده بو علاقه تظاهر ایدیور . واقعا هنوز اونلری قطعاً حل ایدمه مشزدر . ایتسه یدک آردن اختلاف آرا وتباین افکار قالقاردی . مع مافیّه بوتون متفکرین عالم بو غصوده متفق الرأی اولماق له برابر هر کسجه و هر وجهه ثابت اولمشدر که بوتورلو عقده لری حل ایدمه بیلیمک ایچون آنجق برقچ یول واردر . ایشته بو یوللرک عددنجه مذهب لر تعین ایتش و هر مذهب اربابی - کندی نقطه نظرینه کوره - (تقریبی approximatif) بر صورت حل بولوب یالکیز اونی ترجیح ایتمشدر . بونلرک البته هیچ بری محض حقیقت دکلدرد . آنجق هر بری بر فرضیه معقوله در . مع مافیّه فلسفه ایله مشغول اولان کیمسه لرک بوفرضیاتی برر برر و حقیقه تتبع ایتش بولونماسی عادتا وظیفه در . بو مذاهب ، مباحثادن طوغمش و تنقیداته مقاومت ایتدکجه کسب کمال و متانت ایتمشدر . فلسفه عالنده مباحثات شدید آچان و اصول تنقیدی وضع و تأسیس ایدن ده سوفسطائی لر اولمشدر .

ایشته مذاهب فلسفیه نک ظهورینه سبب اسکیدنبری متفکرین انسانیتی دوشوندیرن بومسئله لرده بللی باشلی فیلسوفلرک مابینت فکر و نظریدر .

۲

طبیعی بو مسئله لر مدنیته ظهور ایدیور . علم ، صنعت ، فلسفه ، اولفون بر مدنیته صوک میوه لریدر . انسانلر هنوز وحشی بر حالده یاشارلر ایکن احتیاجات مادیه نک نیجه قهر و تسلطندن سرآزاده اوله مایورلرک مستریج بر ذهن ایله دوشونه بیلیمک ایچون مساعد وقت بولسونلر وجستجوی حقیقت شوقله بو طبقات فکریه یه قدر ارتقا ایدمه بیلسینلر . مع مافیّه بز آنجق اصول دائره سنده بو فکرلرک ظهور و ترتب ایتدیکی زمانی ، یعنی اسکی یونانی مبدأ تاریخ اتخاذ ایدمه بیله جکنر .

او مدنیته دن بزه بر درجه یه قدر خبر ویرن تاریخچه و بالخاصه تاریخ فلسفه یه باقه جق اولورسه قدها او و قتلر بعض مسائل مابعدالطبیعه نک تولد ایدوب

صورت بولدیغنی کوریورز. و عینی زماندهده اختلاف آرا یوزندن مذاهب مختلفه نك ظهورینه شاهد اولیورز. او و قتلر حکما بوتون شوکائاتی تشکیل ایدن موجودات ماده نك اصلی آرایورلرمش و بو وضعیت فکریه لرینه باقیلیرسه شبهه قالمایورکه هر شیئی بر و عینی اصله ارجاع ایده رك دوشونیورلرمش ، یعنی آفاج ، صو ، طاش ، طوبراق ، معدن ، انسان ، حیوان ، حتی روح و عقل کبی مادی ، معنوی بالجمله موجوداتك بر شیدن و عینی ماده دن یابلمش اولدیغنه قناعت کامله ایله اینانیورلرمش ! دیمك که (وحدیت monisme) اعتقادنده ایمشله. حتی بو خصوصده هیچ بر نوع شبهه و تردد ایله ییزار اولمایورق بر ایکی عصر متادیا بر لرله مباحثه و مناقشه ایدوب وقت کچیرمشلر؛ او ائندهده بعض مذهلر تعین ایده یلمش. بو اعتقادی موضوع بحث و مواخذة ایتك بالخاصه مبحث وجودك وظیفه سی اولدیغی ایچون بوراده بو مسئله یی کلیاً اهل ایده رك تفصیلندن واز کچوروم. یالکمز او دوره عائد اولق اوزره بر مهم واقعه فلسفه واره که مدنیت فکریه تاریخده پك بویوک بر شمتی موجب اولمشدر. نظر دقتکیزی ، بن اوجهته جلب ایتك ایسترم ؛ زیرا فلسفه نك اصل (نه پیسته مولوزی) قسمی او واقعه ایله طوغمش و او زماندنبری قوت آلوب بویوره رك اهمیتجه (اونتولوژی) قسمنه تقدم بيله ایتمشدر. اوده (سوفسطایه sophistes) نك ظهوریدر .

وقتیله مسخره ایدلمش اولان سوفسطایه مذهبی بویوک افتزالره معروض قاله رق حیثیت حقیقه سی غائب ایتش ایدی. فقط کچن عصر مدقینی طرفندن کال جدیدله تبقه شایان کورولمش و پك اهمیتلی بر جریان فلسفی ایدیکی تحقق ایتمشدر .

تالاس و فیثاغور کبی ایلک دفعه اوله رق اصولنه توفیقاً فلسفه ایله مشغول اولان متقدمین حکما هر شیتك بر اصلدن منبعث بولدیغنه کال صفوتله اعتقاد ایدرلر و حقیقت مطلقه یی بولدقلرینهده عینی درجه قناعتله اینانیورلرمش. کیمیی هر شیتك اصلی صودر ، کیمیی آتشدور ، کیمیی ده عدددر ، دیرمش . الخ . فقط هیچ کیمسه اعتقادنده ذره قدر شبهه ایتزمش ! بو صفوت اعتقاد غالباً مشهور سقراطك دور طفولیتنه قدر دوام ایدوب کیتمش . او زمانلر

مدرسه اربابنجه مسلم اولان بوفلسفه رسمیه معارض بر طاقم متفکر لر هر طرفده پیدا اولمغه باشلامش. بونلر فیلسوفلره قارشی بر (اعتراض طوری) طاقیمش لر وشدله اعتقادات فلسفیه یی تنقید و تشکیک کیریشمش لر. ایشته سوفسطائیون دییه فلسفه تاریخنده مشهور اولان آدم لر بویله بر زمرة (مقدین) تشکیل ایدن معارضین متفکرین در.

بونلرک ظهوری کینی ویا تصادفی بر حادثه تاریخیه کبی تلقی ایدله ملی در. کرک تاریخ طبیعتده، کرکسه تاریخ انسانیتده اویله کینی، تصادفی و بناء علیه (عبث) بر وقعه یوقدر. هر حادثه نك اسباب ظهوری واردر، و معناسی او اسباب و عواملک ماهیتده کیزی در. او زمانک عقائد فلسفیه سی متجسس ذهنلری تطمین ایدمه جک بر درکّه تعطیله دوشدوکی ایچون سوفسطائی لر فرقه سی ظهور ایتشد در.

تدقیقات تاریخیه کوستریورک فلسفه رسمیه قارشی عظیم بر معارضه چیقاران بو (بحاث) و (جدالچو) آدم لر، متنوع مسلکله منسوب و مختلف مزاجلرله متایز، یکدیگرینه بکزه مزیمه لر مش. بونلرک ایچنده (صرف grammaire) خواهجه سی (خطیب orateur)، ادیب (بلاغت rhétorique) مراقلیسی، (مربی précepteur)، مکتب معلمی بولوندوغی کبی، صحیحاً فیلسوف اولوق اوزره طوغمش بعض مستثنا ذکالرله برابر، دعوا وکیللرینه و غزته جیلره هر وجهله مشابه بعض چهره لرده وارمش. هله قوال و معارضه جی بر چوق شارلاطانلر چوقدر.

دیمک اولویورک (سوفسطائیه) عنوانیله شهرت قازانان جماعت معارضین بر (مذهب فلسفی école philosophique) منسوبی کبی، عینی احکام و عقائده باغلی بر متفکرین هیئته بکزه تیله میه جکدر. یالکیز بر شی وازکه بوتون بو خلقه (سوفسطائی sophiste) اطلاق اولونماسی محق کوستریور و سببی ده اورطیه قویویور:

مزاج، مسلک، مقصد، درجه علم و اقتدار اعتباریله آرمه لرنده کلیاً فرق وحق مابینت بولونان بو آدم لریک ایکی وجهله مشابهت تامه سی، ایکی نقطه ده صمیماً اشتراکی تحقّق ایدیور: بریسی، جمله سنک دخی حکمای زمانه یه

قارشى خروجى و معتبر اولان عقائد فلسفيه - لاعلى التعين - اعتراضى در. ايكنجيسى دخی بو وضع تعرض و مخالفتك ، پاره قازانمق و جماعت ايچنده كسب اعتبار و تعين ايتك مقصدينه مبنی بر حرکت حرمتشكانه دن عبارت اولاسيدر .

اسكى يونان فيلسوفلى ، بر حقيقت اعتقاد ايدر و انسانلرك اوكا كسب اطلاع ايدميله جكنده بلا تردد اينانيردى . صميمياً حق و حقيقت عاشقى اولدقلى ايچون دخی ، طالين معرفته حسبى اوله رق خدمت ايدرلر و باد هوا درس و يريرلدى . اوندن طولايى سوفسطائىلى كمال نقرتله تلقى ايتديلر . [بو آدملرك فيلسوفلره معارضه سى ، حكمتى اعتباردن دوشورمك ، اعتقادى تشكيك ايتك و اذهان نامى افساد و اخلال ايتدكن صوكره حقيقت نامه طرفره فروشلق ايدوب پاره قازانمق در . حرمتسزلكرى ، كستاخلقلى هب بو مقصدى تأمين ايچوندر . حكمت پاره ايله آلئوب ساتياماز . اوكا مالك اولانلر ، انسانيتك خيرى ايچون بذل حقيقت ايتك وظيفه سيله مكفدرلر . . .] حالبوكه بو آدملر هم مضل هم ضال همده خريص اقبال بر سوروشارلا طانلردر . ديديلر .

افلاطون آنارينك بك چوغنى سوفسطائيه عليهنده يازمش و اونلرى تزييف ايتمشدر . مشهور عالم اولان (محاضرات dialogues) لرينك اكثريسي معروف سوفسطائيلردن برينك ناميله معنوندر . (پروتاگوراس Protagoras) ، (غورجياس Gorgias) ، (تهتهتوس Thætetus) ، (قرايئوس Cratylus) ، (ئوئوده موس Euthydemus) كيبى كه بو اثرلرك هر برى بر سوفيست اسمنه نسبت ايدلمشدر . فضله اوله رق افلاطونك آريجه ده (سوفسطائى le sophiste) ناميله ، بر اثرى واردركه اوده بوتون آثار سائره سى كيبى (محاضره) طرزنده يازلمشدر . ديمك كه بو بويوك فيلسوف هب سوفسطائيه ايله اوغراشمشدر . افلاطون بو اثرلرنده بر سوفسطائىك نه اولديغنى تعريف ايتك ايچون غيرت ايتش وجديتنى - لزومى قدر - محافظه ايدمه مشدر ، چونكه بومعارضه جى فيلسوفلى توصيف صددنده : [زنكين كنجلارك صيادى ؛ وولطه ايله باليق آلايانلر ؛ روح ايچون الوريشلى بمض معلومات آلئوب صانان تاجرلر ؛ صنعت

تقلیدده ماهر شارلاطانلر . الی آخره !] کیی بر طاقم تعییرات مستهزیه صرف ایدرک اونلرک پک مقتدر قلاشلردن عبارت اولدوغنی ادعا ایدیورکه افلاطون مزاجنده و مرتبه سنده بر فیلسوفک بو قدر حدته مغلوب اوله رق بویه لسان قوللاقمقدن کندینگی منع ایدمه میسی ، میانه ده کی نفرت ورقابتک فوق العاده بر درجه یه وارمش بولوندوغنی اثبات ایدر . بوخاصمه نك پک درین وپک جدی اسباب سیاسیه سی ده واردرکه درسزک موضوع بحثنه - طوغرودن طوغرویه - جهت املقی اولمادیی ایچون او خصوصی تفصیلدن صرف نظر ایدیورم .

حالبوکه سوفسطائی لر باشقه تورلو دوشونورلردی . (براتیق *pratique*) ، یعنی ایشکنذار آدملردی . [فلسفه ، علم ، صنعت ، معرفت ، هب تأمین منفعت ایدم بیلیمک ایچون واسطه در . بونلر بوتون وسیله کار وکسب و واسطه رفاه وسعادتدر . حکمت ، بهوده وقت یکیرمک ایچون بر (ذهن اکلنجه سی) دکلدر اولمالیدر . مملکته قابیلیتی ، جریره لی ، بجزیکلی و طنداشلر لازمدرکه محافظه شرف وادامه استقلال ممکن اوله بیلسین . او (ایش آدملری *hommes d'affaire*) بزم - اساساً عملی - اولان اصول تعلیمزله یتیشه بیلیر . بزم یتشیدردیکمز آدملر ، مملکتده شرف ، نفوذ ، حیثیت و ثروت کسب ایدر . بز ، بویه بر خدمت ایچون اونلردن اجرت آلیرسه ق نه دن حقسز و عیب اولسون ؟ !]

دیورلردی ؛ و بو طرز تاقی ، بو دوشونوش ، یونان قدیم خلقتک عقلنه ده ماوافق کلش اولمالیدرکه ، پک چوق کشیلر و علی الخصوص مملکت ایشلرینه قاریشمق ، بولتیقه عالمه آتیاقم ایستین خریص کنجلر ، هب سوفسطائی لره قوشمشلردی . اک زیاده خطابت و جدل و مغالطیه مراق ایدیورلردی . چونکه بولتیقه عالمده و (جمعیت ملیه) مناقشاتنده اک چوق لازم اولان قابلیت ، خصم معارضی - هر نه صورتله اولورسه اولسون - شاشیرتمق ، باصدیرمق ، صوصدورمق و نهایت حق قازانمق دی . ایشته ، فکر حکمتدن زیاده جریره یه اهمیت ویرن ، و میدان جدله ، هر تورلو (سفسطیات *sophismes*) ی ، ایشه یارار بر (برهان *argument*) کیی قوللانوب اداره ایتک معرفتی اوکره تن

سوفسطائی لړك ، يونان قديم كنجلرينه وعد و تأمين ايتدكلى منفعت مهمه بوايدى ؛ وینه بونك ايجوندرکه (بدیع و بیان) خواجلرینك اطرافه دها جوق طلبه طوبلانیوردی .

او زمانلر یونانستان ، کوچوچوك و (لامركزى décentralisé) ایالتلر شكلنده بر جوق قطعات مستقله یه منقسم ایدی . جمله سنده اداره ، ده موقراسی اصوله توفیقاً جریان ایدیور و امور جماعت (بلده cité) یه باغلی بولونویوردی . بوکوجوك ده موقراسیلر ، دشمن خارجی یه قارشى متحد طاوواندقلى حالده كندی آره لرنده دائمی رقابت اوزره یاشیورلر واکثریا بربرلیله محاربه بیله ایدیورلردی .

ده موقراسی ، مملكتك اصلاً یونانی و بناءً علیه (حر libre) اولان هر فردینه پولیتقه میسدانی و نفوذ حكومت یولنی آجیق بولوندوردوغی ايجون ، جمله سنی حرص موفقیته اسیر ایتشدی . هر یونانی پولیتقه ایله ، حاكمك ایله وبلدیله ایشلرله مشغول اوله رق حكومتدن جزئی كلی بر معاش آلیر و - علی كل حال - كچینیر بر مأمور ایدی . سائر ایشلری اسیرلر کوروردی . اك فقیر بر یونانی نك بیله لااقل بر ایكى كوله سی اولوردی . حی فلاسفه قدیمه دن مشهور (قسه نوفان Xenophane) ك - كمال فقر و ضرورت سیبیلله سوقاقلرده دستان او قویه رق دیلندیكى وایكى كوله سنی بو صورتله اعاشه ایتكه جالیشدینى تاریخده مقیددر .

سزه بك مختصر و فقط بك واضح و براق بر صورتده عرض ایتدیكم بو صحیفه تاریخیه ده شایان دقت و عبرت بر کیفیت مهمه وار :

آكلاشیلیورکه ده موقراسی اداره سنك حكومت میداننده ، بوتون افراد جماعته وعد ایتدیكى امید موفقیته و الهام ایتدیكى حرص تفوق ، بالضروره بر (arrivisme) جریان ایتاش ؛ یعنی ناصل اولورسه اولسون یوكسك موقعلره ایریشمك ايجون مدهش بر حرص و هوس او یاندیرمش ! . سوفسطائیلر ایشه بو حقیقتی هر فیلسوفدن و هر كسدن ایی آكلامش و بو خصوصده ، موفق اوله بیلمك ايجون ، صحیحاً اك موافق اولان شكل تعلیم و تربیه یی كشف و تمیین ایتمشلر ددر . كنجارك بو آدم لره قوشوب اوسته پاره ده ویره رك درس آملارنده اصل سبب و حكمت - بنم تدقیقاتمه كوره - آنجق بودر .

فی الواقع بعض سوفسطائی معلملر درسلرنده اوقدر یوکسک اجرت المشلر ایدی که ، بوکون هیچ بر یرده هیچ بر دارالفنون مدرسی اوقدر اجرت تدریسه آلمور. زنکین آدملرک ، حکومت رئیسلرینک جوجوقلرینه مربیلک ایدن حکمانک یک چوغی سوفسطاییلردن ایدی که بوده مظهر اولدقلری اعتبارک درجهسنی کوستیر .

درسمره ، بختک بو اخلاقی واجتماعی جهتلری لازم دکل ؛ فقط سوفسطائیه نک مزاجی ، وضعیتی وفلسفه تربیه ملیهده ایقاع ابتدیی انقلاب مهمک ماهیتی آکلایه بیلیمک ایچون الزمدر. چونکه فلسفه ده دخی بو آدملرک طوتومی وکیدشی بوسبوتون باشقه ایدی. اولاهر شبنه ، هرکسه لاعلی التعین معارض ایدیلر . تعریض ایچون (شبهه le doute) برنجی شرطدر. برشی حقیقه شبهه ایدیله میورسه تعریضه قطعاً محل یوقدر، شبهه ایتکده یک حقی بر وضعیت ذهنیه در. چونکه انسانلرک بیلدیکی شیلر هب (اضافی relatif) وهب (تقریبی approximatif) در. بوقدر مراق وحتی شوقایله آرادینمز (حقیقت مطلقه vérité absolue) ی، بالذات کشف ایدن ، بولان برتک آدم یوقدر .

یونان قدیمده فلسفه هنوز تأسس ایتکه باشلادینی بر زمانده (حقیقت اشیا la réalité des choses) یه تعلق ایدن سؤالره قارشی ایلک فیلسوفلرک یک صافدروانه ویک جوجو قجه جوابلر ترتیب ایتمهسی البت طبیعی و ضروری ایدی. [هر شینک اصلی صودر ؛ یاخود آتشدرد ؛ یاخود هوادر. هواو آتش ذیروحدر !...] کیی غریب فکرلر بیان ایدن وسویله دیکنه اینانان ایلک فیلسوفلر ، بوصافیت اعتقادلرنده ، بوقناعت طفولانه لرنده - شبهه یوق که ! - معذور ایدیلر، زیرا او زمانلر هنوز تجربه نک قیمتی آکلشلامشدی وآننجق تجربه دن طوغه بیلن علوم حقیقه ، هنوز یک (رشیمی rudimentaire) وابتهائی بر درکده بولونویوردی .

فقط ، بز کندیمزی اودور قدیمه ارجاع ایدلمده براز دوشونه لم ؛ حتی بر سوفسطائی کیی دوشونه لم :

[هر شینک اصلی صو ایش .. یک اعلا ؛ اویله ایسه بنم وجودم ایله برابر (پارتهنون Parthénon) معبدینک مرمر دیرکلری ، قهرمان (آشیل

(Achilles) ك طونچدن معمول اولان قالغانی ایله قلیجی ده سودر! سودن اولمق لازم کلیلر! ...]

بو ملاحظه ضروریدر. شیمدی بویله غریب بر اعتقاد بیان ایدن و اونی مدافعهیه چالیشان برآدمک شو اداسانی درحال و کور کورینه قبول ایتمهک و بویله بر دعوانک حقه مقرون بولوندوغنه براز شبهه ایتمک - آز جوق - حقلی دگلی در ؟ !.

بناءً علیه ، حقیقت نامنه بویله چوجوقجه فکرلر بیان ایدن فلاسفه اولین نیچون ونه قدر معذور ایدی ایسه لر ، اولره قارشی شبهه و اعتراض ایدنلر دخی اونک ایچون و اوقدر معذور ایدیلر ، دهیه بیلیرم !.

ایشته سوفسطائیلرک اک مشروع و محق معذرتی بوایدی. بویله بر معذرت قارشیننده (اعتراض) ، ذهنک پک طبیعی بر وضعیتی در .

اسکی (فلاسفه نصیون les philosophes dogmatiques) ، یعنی ، (بر حقیقت وارد و بز اوکا قطعاً کسب اطلاع ایده بیلیرلر . اصول تحقیق ده ایشته بودر !.] دیه ادا ایدن فیلسوفلره قارشی بویله بر وضع معترضانه آلان سوفسطائی لر ، اگر پاره و نفوذ قازانمق ایچون ، حینتیلرنی سوء استعمال ایتیه بوبده - بلا غرض و عوض - اعتقادات مؤسسهیه و افکار مسلمهیه تعریض ایتسه لردی ، کیسه نك بو آدملری تقییه حق اوله مازدی. فقط اونلر مغرور و کستاخ طورلریله فیلسوفلرک نفرتنی قازاندیلر. خصوصاً هیچ بر شیشه قطعاً ایمان ایتمهکله برابر ، بر پرنسیپک له و علیهنده عینی شوق و قوتله دعوا سوره بیلیمک عینی شینک هم ایی ، هم کوتی ، هم سیاه ، همد بیاض اولدوغنی ادا و اثبات ایده بیلیمک خصوصنده صوک درجه لره قدر مبالاتسز طاورانه بیلدکاری ایچون بویوک بر سوء شهرت قازاندیلر. صوکره بوشارلاطانلغی مسلك اتخاذ ایتدیلر. بو جماعتک کثرت اعضاسی (بلاغت rhétorique) خواجه لرندن مرکب ایدی و جریزه سایه سنده بوشارلاطانلغه جسارت ایده بیلیرلر و حریم و (هنکامه جو aventurier) کنجلی ده قاندره بیلیرلر ایدی.

ذره قدر معلومات اساسیه سی اولمادینی حالد ، فلسفه نك اک غامض مسائلنی - صرف قدرت بلاغته کوومنه رک - حل ایدن آدملر ، بوکون ده پک

جو قدر و بحث بر (زمین علمی terrain scientifique) به نقل ایدیلوبده آنبحق
اوساحده و اصولی نأثره سنده یوروتولنرسه ، اوآدملرک دائماً خروشان اولان
بلاغته سد جکمک بک متعسدرر. ایشته سوفسطائی لر بونلردر. اسکی زمان
سوفسطائی لری ده طبق بومزاجده وبو قابلیتده آدملردی .

بوکونکی نمونه نی کوز اوکنه کتیرسه کز ، اسکی سنک نه اولدوغنی بک
قولای وبک ای آکلارسکنز .

مع مافیہ - یوقاریده سویله دیکم کیبی - بونلرک جمله سی ده بلیغانه سوز
سویلر ، فقط دکرسز لافزن شارلاطانلردن عبارت دکلدی . ایچلرنده جدآ
فلسوف طوغمنش ، وایجه ایجه تحلیلات و تدقیقات سایه سنده اوزمانکی عقائد
فلسفیه نک نه قدر اساسسز اولدیغنی اثباته موفق اولمش بعضی متفکرین دخی وار.
(پروتاگوراس Protagoras) بلکه بونلرک اک بویوک ایدی . او زمانلر
رئیس حکومت اولان مشهور (پریقلهس Périclès) ک چوجوقلرینه مربی
ومدرس اولمشدی . ابتدا (سوفسطائی) عنوانی طاقینان و ایلک دفعه اوله رق
پاره مقابلنده فلسفه تدریس ایدوب خیلی ثروت و نفوذ قازانان بوآدمدر .
کنیدیسی (انفسیه) مذهبک مؤسسیدر. علم بشرک اضافی اولدوغنی و حقایق
اشیایه کسب اطلاع ایتک انسان ایچون قطعاً امکان خارجنده بولوندوغنی غایت
متین بردستور ایله بیان ایتمش وبو خصوصده بک مهم کتابلر یازمشدی .
مع الناسف ، اوزمان آتته خلقی بوفیلسوفی تکفیر ایده رک اثرلرینی رسماً
یاقشدی . یالکز افلاطونک مستهزیانه روایاتیلر ارسطونک براز طرفدارانه
تنقیداتی سایه سنده پروتاگوراسک بعض فکرلرینی بیلیورز .

کذلک (غورجیاس Gorgias) ، (پرودیقوس Prodicus) ، (مەترودور
Métrodore) ودها بعض کیمسه لرده واردرکه بویوک متفکرلردن معدوددر .
حتی سوفسطائییه قارشى مجادله ایتکله عمرینی صرف ایله یین وعاقبت بوفرقه بی
اعتبار عامه دن دوشورمکه موفق اولان مشهور (سقراط Socrates) بیله بر
جوق وجهله سوفسطائیونه بکزر ؛ چونکه اونلرک ایچنده یتیشمش و (بحث
وجدل) ده اونلرک اصولی ترجیح فقط اصلاح و اکمال ایتشدر .
بو مباحتیه و مجادله دورندن عالم عرفان وفلسفیات ایچون بک بویوک

فائده‌لر ترتیب ابتدی : اولاً ، اصول تنقید تمامیه سربست بر زمین اوزرنده انکشافه باشلادی ؛ صوکره (شك فلسفی) بر حق قازاندی. دها صوکره اصول بحث و مناظره‌نك بر نظام آلتنه آلینایی ضروری کورولمکه باشلادی ایچون ترتیب دلائل ، اقامه براهین و قواعد استدلال حقنده بر چوق تبعات و تدقیقاته کیریشیه‌رك علم منطقک تمللری آتیلدی. فلسفه مباحثی ، یالکیز (اول‌الاول Archée) و (جوهر مطلق substance absolue) مسئله‌سنه منحصر قالمایه‌رق سیاسیات ، اخلاقیات و اجتماعیات عالم‌رینه‌ده تشمیل اولوندی و فلسفه حقوق ، فلسفه اخلاق ایله برابر لایقیله بلیرمکه باشلادی. هله بومراق مدرسه اربابنه خاص قالمایوب لایقیله تعمیم ابتدی .

بومذاه‌بك صورت ظهوری تحقیق اولونورسه کورولورکه کائنات مادییهی ایکنجهی درجه‌یه ارجاع ایدوب نفس انسانییهی و قوای روحیه‌نك طرز فعالیتی تدقیق ایتك ایله ، ایش باشلامش و بالوسيله ، نظر دقتی مغنویت عالنه توجه و دعوت ایله‌مك، بونجده سبب اولمش در .

ایلك فیلسوفلر ، (اساطیر اولین mythologie) دن و دین عوامك عقائد مادیه‌سندن ذهن‌لرینی تخلیص ایدوبده سرآزاده بر وضع و استقلال فکر ایله فلسفه حقیقه‌نك اساسلرینی قورمه تشبث ایتدکری زمان ابتدا کائنات خارجییهی کورمش و اونك حقیقت ذاتیه‌سنی باشلیجه بر مسئله فلسفیه پاه‌رق اورطیه آتمش‌لردی . فقط کندی نفس‌لرینی ، کندی ماهیت مغنویه‌لرینی دوشونه‌مه‌مش‌لردی. بونصادفی براهال دهل، دور طفولیت ایجاباتندن برغفلت ایدی . انسانیتك چوجوقلغی ، انسانك چوجوقلغنه تماماً بکزر . چوجوق کوردوکندن، حس ایتدیکندن شبه ایتمز. صفوت وجدان و جهل، هرشیدن اول عقله اعتماد صورتنده جلوه نمون اولور ؛ و هرشیدن زیاده فکر تنقیده مانع‌در. تنقید، انجیق متناقض تجربه‌لر و متخالف مشاهده‌لر و قوعندن صوکره ذهنه مسلط اولان شبه‌لرله باشلار. یعنی اولغون بر حیات فکریه‌نك لازمه احتیاطی‌در. ایشته ایلك یونان فیلسوفلری‌ده بو حالده ایدیلر. حس وادرا کارندن، عقل و محاکمه‌لرندن- بالطبع- امین ایدیلر. اونك ایچون ، کندی نفس‌لرینك ماهیتی و طرز فعالیتی قطعاً تدقیقه حاجت کورمیلرلردی . کائنات خارجییه نصب

نظر ایتشلر ، مردم متحول اولان مادیاتك حقیقتی، هر شینك اصلی اكلامق مراقه دوشمشلردی . حق كوردكلی شیلرك - نفس الامرده دخی - بویه كوردنكلی كپی اولوب اولمادقلرینه دائر ذره قدر شبهه لری بیه یوقدی . اصل بومهم مسئله یی میدانه چیقارمقله، سوفسطائی لر فلسفیانه وپسیقولوزی به اوبه بویوك بر خدمت ایتدیلركه بونك بر مثلنی دها تاریخ فلسفه و علمده كوره میورز. واقعا خدمت نیتیه دكل، تمریض غیرتیه حركت ایتدیلر؛ فقط بو بر فوق العاده خدمت اولدی .

(هر شینك اصلی شودر، بودرا) ده ین فیلسوفلره قارشى فضولى اعتراض ایتك ایچون : [بکی اما ، دلیلکنز نه در ؟ .. بریکز بویه، دیگر بکزد شویه سویه یور. دنیاده بر حقیقت اولسه یدی، وسزده - ادعا کز وجهله - اوحقیقته کسب اطلاع ایتش بولونسه یدیکز ، نتیجه تحقیقده اتفاق اوزره بولونمقلنکز ایجاب ایدردی . حالوکه هر بریکز باشقه بر پرده دن چالیور . فکر لری بکزد آهنگ یوق !! .. بزهانکی کزى دیکلیه لم و هانکی فکر بکزه اینا نام !! ..] دیورلردی و بونده تماماً حقلی ایدیلر ..

صوکرادها اینی برشی یایدیلر: مشهور (پروتاگوراس Protagoras) ، - که سوفسطائی اولمقله برابر ، دنیاده نام براقان اك بویوك فیلسوفلردن بریدر ، - بوتون فلسفیانك معلومات بشریه جنسندن خارج برشی اولمديغنی و علم انسانى نكده (انفسى و اضافى subjective et relative) اولمقدن قورتوله مایه جفنى لایقيله تعقل و اذعان ایدرك بو عقیده مهمه یی سلیس و واضح بردستور فلسفی شكلنه افراغ ایدوب ، اورطیه فیرلاتدی ، آتدی ؛ و :

[هرشی ایچون معیار ، انساندر. اولان شیرلر ایچونده ، اولمایان شیرلر ایچونده !! .. هرشی اضافی در !! ..] دیدی . شایان دقتدرکه یالکز موجود اولان شیرلر حقنده کی علممرك دكل، حقیقتده موجود اولمایان شیرله دائر واقع اوله بیلن تخیلاتمركده اضافی اولدوغنیده ادعا ایتدی .

دیمك كه یالکز معلوماتمركی دكل ، بوتون معنویاتمركی - بودستور مشهور - انفسیت و اضافیت دائرهنده حبس ایدوب براقیوردی .

او حالده بر طاشك، بر آغاچك اصلی نه در ؟ .. دیوبده كندی بیلمه مك،

البته اساسسز بر مبنای فلسفی بنا ایتك غیرتندن عبارت قالیوردی . چونكه بیلن ، وهر شیتی بیلیمك ادعا-سندمه بولونان ، انساندر .

او، کندیخ بیلیمزه، الكاول بیلیمهسی الزم اولان شیتی بیلیمور دیه کدر. برشیتی ناصل بيله بیلدیکنی دخی آکلایه مامش ایسه، علمك صحت و سلامتندن امین اوله ماماسی لازمکیر . او تقدیرده ، نه حق و صلاحیتله ادعا ایدمه بیلیر که حقیقت شودر ، یاخود بودر ۱۴.

بناء علیه هر هانکی بر مسئلهده (علم یقین *connaissance certaine*) حاصل ایتش اولمق صلاحیتنی قازانه بیلیمك ایچون، حس و ادراک ايله عقل و محاکمه نك ذهن بشرده صورت وقوعنی هر شیدن اول ، بیلیملی ۱۵. خلاصه کندی بیلیملی ۱۶. حالبوکه قدمای فلاسفه - ده مین عرض ایتدیکم اسباب طبعیه دن طولانی - بوجهت مهمه بی هیچ دوشونمه مشلردی. اونلرک وضع ایتش اولدوغی مسئله فلسفیه ايله برابر (مابعد الطبیعیات) طوغغه باشلامشدی. فقط (بسیقولوجی) دن هنوز برشمه بيله حس اولویمیوردی .

سوفسطائیة نك آچش اولدوغی معارضه و مناقشه، بوایکینجی مرحله فکریه یه کلنجه ، (معرفت نفس *connaissance de soi*) لزومی شدتله ابراز و اخطار ایتدی ؟ و فلسفیاتده علمدهده ، اخلاق و سیاسیاتدهده (علم نفس) ک برنجی درجهده (لابد *indispensable*) بر شرط اولدوغنی لایقيله کوستردی .

بروتاغوراس بو زمینی حاضر لادقندن صوکره ، مشهور سقراط : [کندیگی بیل ۱۷.] دستورینی دیلنه طولادی و اونی هر کسه اخطار و توصیه ایتدکدن ماعدا کندی تعلیماتندهده منحصر آ بودستور حکمتی رهبر و مبدأ اتخاذ ایلدیرک پالکیز معنویت انسانیه بی تحقیق ايله اوغراشدی. (عالم طبیعی *le monde physique*) بی کلیاً اهل ایتدی .

بو سایده فلسفیاتك الك مهم موضوعی کائنات جامد نك جوهر اصلی سی دکل، انسان معنوی اولدی . متافیزیک، خیلی اعتباردن دوشدی. هله سقراط اوکا هیچ اهمیت ویرمه دی. لکن بسیقولوجی مسئله لری بلیرمکه و او مسئله لره برابر یکی بر علم طوغغه باشلادی . تنقید اصولی یولنه کیردی ؛ بحث و جدل

غیرتی یاواش یاواش اصول محاکمه‌نک، قیاس واستدلالت قوانینی افشا ایده‌رک منطق علمنک مهد نشأتی حاضرلادی .

بوتون بو انقلاب عظیمده سقراطک اصیل و مستقنا چهره معنویتنی ، اشخاص سائره‌نک کندن واقعاها واضح ودها یوکسک اوله‌رق کوروپورز . فقط - بوکون تدقیقات - عمیقہ - سایه‌سندہ تحقیق ایتمشدرکه - سوفسطائیلر اولماسه‌یدی سقراط - هیچ اولمازسه - شوبیلدیکمز سقراط اولمازدی . بو حکیم مجدد سوفسطائیلردن اوقدر متأثر اولمشدرکه کندیسینی بر جوق نقاط نظرندن بر سوفسطائی عد ایتک ممکن در . نته کیم جوق منقدر و مورخلر صراحتاً بو ادعاہ بولونمقدن چکیمه مشلدر؛ و هیچ اولمازسه اصول تنقید اعتباریلر سقراط بر سوفسطائی صایله بیلیر .

متأخرین فلاسفہ‌دن پک چوقلری بو فکرده در ؛ دیمشدم . اونلرک اک مشهورلندن برینی ، المانیانک اک متمیز فیلسوفلرندن (هگل Hegel) ک بو باده کی ملاحظاتی مختصراً عرض ایتک - مثال ابجون - کافیدر صانیرم . بو ذات دیورکه :

سوفسطائیلر سقراطک رقیبلری اولمقدن زیاده (مبشر ظهور précurseur) ی ایدیلر . فلسفیات عالمده (انفسیه subjectivisme) دورینی فتح ایتش اولمق شرفی (پروتاغوراس) ک حق صریحی در .

بو فیلسوف انسانک افکارنده کورولن تناقضلری و اختلافاتی (نفس متفکر sujet pensant) ک هر زمان عینی وضعیت معنویه بولونه مامسیله تعریف ایدیور و بناءً علیه فلسفه‌ینی معنویت بشریه‌ینی تبعه دعوت ایدیوردی . اونک ایچوندرکه [انسان هر شینک معیاریدر .] دیمشدی . بوسوزندن طولانی پروتاغوراسی شدله مواخذہ وقدح ایدنلر دوشونمه‌یورلرکه سقراطه [کندیکمی بیل !] دستورینی الهام ایدن اوسوزدر . علمده ، (عنصر انفسی élément subjectif) نک یعنی نفس متفکرک ، نه بویوک برامیتی اولدوغنی اک اول آکلایان سوفسطائی لر اولمشدی . روح بشرک ، طبیعت خارجیه‌دن اقتباس قوانین ایتهدیکنی ، بالعکس کندی ماهیته خاص برطاقم قوانین انفسیه ایلہ او طبیعت خارجیه نظام ویردیکنی - بر حقیقت اوله‌رق - هرکسدن اول ادما

واعلان ایتک شرفی اونلره عائددر. معنویت بشرک سلطنت و قدرتی بودرجه عالی بیلمه لرینه سبب بودر. الخ الخ !]

هر حالده شو محقق که سوفسطائییه نك تعریضاتی و تنقیداتی، فلسفه وادیسنده جریان تحقیقاتی کائنات خارجیه دن، عالم انفسی یه چویردی و بو انحراف نظر بر جوق کشفیات مهمه یه موفقیت یولنده ایلك خطوه همتی تشکیل ایتمکله برابر، انفسیه مذهبک ده قطعاً وابدیاً تأسیسه سبب اولدی. بو کون الک معنیدر (ماتریالیست) بیله علممزه اضافی و معلوماتمزه ماهیتاً انفسی اولدوغنی انکاره جسارت ایده میور. چونکه پسقولوجی بو دعوائی - هر وجهله مدلل - بر حقیقت عادیه درک لرینه ایندیرمشددر.

لکن اونو نمایم، بو عقیده یی بردستور واضح شکلنده بیان ایدن (بروناغوراس) ایدی؛ و بو آدمده سوفسطائی لرك المشهوری ایدی. دیمک که زمانمزه تدقیقات علمیه و فلسفیه سی او آدمه تمامیه حق ویرمشددر.

اوله اولونجه فلسفه ده (لدنیات ontologie) بحثی ایکنجی موقعه ترك ایدوبده، الك اول (مبحث معرفت) مسائلنی تدقیق و تنویره چالشمق بر ضرورت طبعیه حکمنی آیر. نته کیم یونان قدیمده سوفسطائیلر زماننده ده اوله اولمش و بوجبوریت شدتله حس ایدلمشدی.

[حقیقت ایشه بودر ! ..] ادعاسنده بولونانلره، سوفسطائی لر : [اوله اولدوغنی ناصل بیلورسک ؟ و بیلدیکگدن ناصل امین اوله بیلورسک ؟ ..] دیه تعریضکارانه بر سؤال ایله مقابله ایدیورلردی.

بونک باشلیجه (نپیسته مولوزی) سؤال اولدوغنی و ذهن متفکری (لدنیات) بحثدن آیروب (کیفیت علم) مسئله سنه سوق و تسلیط ایده چکی طبعی در؛ هم صراحتاً کورولویور. چونکه - یوقاریده عرض ایتدیکم وجهله - مبحث معرفت (حقیقت ندر؟) - سؤال ایله اوغراشماز؛ [بر حقیقت اولدوغنی تقدیرده انسان اوکامطلع اوله بیلیرمی؟.. اوله بیلیرسه یولی ندر؟.. و صحت علمک معیاری ندر؟..] سؤال لرینه جواب تدارک ایتکه چالیشیر. بوه انسانک ذهنی و معنویتنی تدقیق ایتدیکجه بر نمره مفیده ویره من. اونک ایچون مبحث معرفتک ساحه تدقیقاتی پسقولوجی دائره سی در.

اسکی زماندنبری فلسفیاتده تعین ایدن مسلککری بوراده یکان یکان ذکر و تعریف ایتک هم صدمز خارجنده در، همده ممکن دکدر؛ چونکه جلدلر طولوسی یازی یازمق ایجاب ایدر. یازیلان کتاب دخی انجق بر (تاریخ فلسفه) اولور. حالبوکه بزم درسمز و وظیفه مز او دکدر. یالکیز سزه مذاهب فلسفی حقنده مختصر بر فکر ویرمک مجبوریتندیم، زیرا اونلرک وجودینه سبب اولان اختلافات فکریه نك (مبحث معرفت) مسئله لریله هرشیدن زیاده برعلاقه صمیمیه سی واردر.

مورخین فلاسفه نك تنقیداته دکل، یالکیز تاریخ فلسفه نك قیوداته باهه حق اولورسوق، اسکی زمانلرده تشکل و تأسس ایتش اولان مذهبلرک اسملرینی یك فضولی بولورز، وارده لرنده کی رابطه لری اسملرندن اکلایه مایز. او قدر ترتیبسز و تصنیفی کوچ بر شیلردر.

ایلك زمانلرده هر بر فیلسوف - آز چوق تمایز ایدنجه - بر مدرسه آچار واوراده (حسی اوله رق یعنی مجانا) هرکسه درس تقریر ایدردی. مدرسه آچار ده پیشمه باقوبده بر مکتب بناسی یابدیریردی ظن ایتیه سکیز!.. خیر!.. کیمیی آتیه نك بازار برنده، کیمیی بر بویوک بنانک، مثلاً بر معبدک جمله قبوسنی تشکیل ایدن بر کر آلتنده، کیمیی ده بر خصوصی باغچه ده، یاخود بر جیمناستیق خانه ده، کلیشی کوزل او طورور، یوکسک سسله بیان فکرایتمکه باشلاردی. اطرافته بر چوق کشیلر طوبلانیر، بوفیلسوفک تقریری دیکلرلردی. فکیرلرینی طرز تبلیغی تحسین ایدن مراقیلیر، ارتق اوندن آیرلاز واکثریا اونک درسنه دوام ایدرلردی. اصل اوفیلسوفک شاگردانی بونلر صاییلردی. مذاهب قدیمه نك اسملری بو طرز تدریسی و تعلیم ایله صمیمیاً علاقه داردر. مثلاً افلاطون (آقاده میا) نامیه معروف اولان باغچه ده درس ویرمکی عادت ایدینشدی. بوباغچه اساساً بر جیمناستیق خانه ایدی که نیم اساطیری قهرمانلردن (آقاده موس Academus) نامنه نسبتله تأسیس ایدلشدی. صوکره افلاطونک

مسلک فلسفی سنه علم اولدی و اونک بوتون شاگردلریله تابعینه و تبع تابعینه (académiciens) نامی ویرلدی .

ارسطو ، (لی که تون - Lyceum) ده نیلن یرده تدریس ایدردی و درس ویریرکن دایما کزینک عادتق ایدی . (لی که تون) ده بر جیمناستیک یری ایدی . فقط ارسطونک - باشلیجه - نظردقی جلب ایدن حالی ، (درس تقریر ایدرکن کزینک) عادتق اولدوغی ایچون ، مسلکینه (مشائیه péripatétisme) دنیلیدی و اویله قالدی .

(زینون Zénon) آتنده بر بویوک بنانک کمری آلتنده درس ویریردی . مسلکینه (رواقیه stoïcisme) دنیلیدی ؛ چونکه یونانی ده (ستوا - stoa) طاق و رواق دیمکدر .

(دیوژن Diogènes) ، (کی نوسارغوس Cynosargue) نامیله معروف بر مزبله ده درس ویرمکی ترجیح ایتشدی . بوراسی شهر کوپکترینک محل اجتماعی اولدوغی ایچون اویله بر نام قازانمشدی . یونانی قدیم ده (کی نوس) کوپک دیمکدر . بوغریب فیلسوفک مسلکینه ده (کلییه Cynisme) دنیلیدی ، و اویله جه شهرت قازاندی کیتدی .

صوکرده دها بر جوق مذهب و ارادر که مدرسه لک منسوب اولدوغی مملکتلره تسبتله تسمیه ایدلمشلدرد . مثلاً (مدرسه یونانیه école ionique) ، (ایتالیا مدرسه سی école italique) ، (مدرسه قیروانیه école cyrénaique) ، (آبدرا (یعنی کوملجنه) مکتبی école d'Abdéra) ، (مدرسه اسکندرانیه école d'Alexandrie) و الی آخره ، هب بوقیلدندر .

دیگر بر طاقم مذاهب فلسفیه دخی وار که مؤسسلرینک اسمنه تسبتله شهرت آلمشلدرد . فرضا (نه وه مریه Evhémérisme) ، (ئه پیکوریه Epicurisme) ، (قارتیه زینیزم ، یعنی ده قارتک مذهبی Cartésianisme) ، (قانتیزم Kantisme) ، (مه سه ریزم Mésmérisme) ، (قونتیزم Comtisme) ، (لامارکیزم Lamarckisme) ، (داروینیزم Darwinisme) و دها بر جوق امثالی کبی !...

بر قسم مسلک لکرده کورولور که اسملری دها زیاده معنادارد ؛ چونکه اساسات فلسفیه دن آزیجق اولسون بر شمه و بر رنگ ویریر : (هه دونیزم

(Hédonisme) ، (نهوده مونیزم Eudémonisme) ، (مونیزم Monisme) ،
 (Dualisme) ، (پلورالیزم pluralisme) ، (سوفسطائیه Sophisme) ،
 (ره آلیزم Réalisme) ، (نومی نالیزم nominalisme) ، (قون سه پ تو آلیزم
 conceptualisme) ، (آمپی ریزم Empirisme) ، (راسیو نالیزم Rationalisme) ،
 (سوبژه قتیو ریزم subjectivisme) ، (اوبژه قتیو ریزم objectivisme) ، (قری-
 سیزم criticisme) ، (نه ثوقری سیزم Néo-criticisme) ، (ماتریالیزم
 Matérialisme) ، (سپیری تو الیزم spiritualisme) ، (ثوقی لی تاریزم utilitarisme)
 (نهو و لوسیو نیزم évolutionisme) ودها بر چوق انواعی کیبی

شیمدی فلسفه بی حقیله تتبع ایتمک و تاریخ تکاملنی اوکرنمک و اون تکامل
 انساننده محدث و تولد ایدن بر چوق مسائلک ماهیتی آکلا یوب هر برینه بر
 قیمت بیچمک ایسته یین بر شا کرد ، بو غریب اصطلاحاتی کورونجه ، البته
 شاشیریر قالیر ؛ حتی بلکه مایوس اولوب فلسفه ایله اوغرا شمش سودا سندن
 واز کچمک ایستر .

دیمک که بوقدر چوق مذاهب فلسفه وارمش !.. دیمک که اونلرک جمله سنی
 ایجه اوکره نوب اکلا دقدن صو کره - ممکنسه !- یکی بر مسلاک تأسیس ایتمک
 لازم کلیرمش !.. دیه دوشونور و یوتون بومذاهبی ، حسن صورتله (تصنیف
 classifieur) ایده رک ایشک ایچندن چیقہ ییلمک احتمالی بوله ماز ، بلکه !..

واقعا ، بونده معذوردر . بو تعیرلر ، متبدیلره هیچ بر شی سویله مز .
 فلسفه تاریخی لایقيله ییلنر بیله بو مسلکله آره سنده کی رابطه قراتی و یاخود
 جهت ضدیتی ، اسملرندن استدلال ایده مز . بونلر ، کلیشی کوزل قونولش
 و بناء علیه بر (تصنیف طبیعی classification naturelle) لزومی دوشونولیه رک
 ویرلش اسملردر . فقط یا شامش و تاریخده یر طوتمش اولدق لری ایچون
 آتہ میورز ؛ حیثیت قدیمه لری واردر .

بونک بویه اولمسی ده طبیعی ایدی . بر تحف مثال ویریر سه م ، اکلا رسکر
 و دیدیکمی در حال تصدیق ایدرسکر : بک ای بیایر سکر که فرضا (علم نباتات
 la botanique) تأسس ایتمزدن اول بر چوق نباتات و چیچک و آغاچ اسملری
 هرلسانده موجود و معلوم ایدی . بو اسملری وضع ایتمش اولانلر ، تصنیف

لزمونه رطایت ایدہ رک برجیچک و یا خود برنباتہ اسم قویما دیلر . تصنیف ، علم دیمکدر ؛ چونکہ علم اونکله باشلار .

فقط نباتاتک عوامجه معروف اولان اسملرینه باقوبده علمای متخصصین تصنیفدن مایوس اولویورمی ؟.. البتہ اولویور ! مثلاً اہ کومہ جی ، باللی بابا ، آی جیچکی ، ارسلان آغزی ، خاتم الی ، ییلان یاصدینی ودها برجوق عامیانه اسملر ، هب تشبہی تعبیرلردر . بونلرک عددی ده نامحصوردر . لکن بر عالم بونلرہ باقاز . لسان عوامک تعیین ایندیکی بو اسملرہ هیچ اهمیت ویرمز . هله پک ایی بیلیرکہ نباتات عالمنده نه قدر اشخاص منفردہ وارسه او قدر فصیلہ وقیلہ وصف وار دیمک دکادر .

عالمک وظیفه سی اشخاص متنوعه یی تتبع ایدوب آرہ لرندہ مشترک اولان اوصاف اصلیه یی کشف ایتک و اوکا کورہ نباتاتی اجناس وانواعه ، فصیلہ لرہ صنفلرہ آیرمقدر . بو کتابک برنجی بابندہ بوکا دائر ایضاحات ویرلمشدی . بزده بوراده طبقی اومنوال اوزرہ حرکت ایدہ جکمز ؛ او غریب اسملرہ او قدر اهمیت ویرمیه جکمز . چونکہ علم نباتات دہده برتصنیف طبیعی یا پہ بیلیمک ایچون مثلاً (صارماشیق) تعبیری نه قدر معناسز ایسه ، فلسفه دہ ، مذاہبی - اصولنه توفیقاً - تصنیف ایدہ بیلیمک ایچون (مشائیه) تعبیری دہ او قدر فائدہ سزدر . ارستونک درس ویربرکن کزینہ یی اعتیاد ایتیش اولدوغنی بیلیمک ، او حکیمک فلسفه سی بیلیمک دیمک دکادر . بز او حکیمک روح فلسفه سی تشکیل ایدن (عقیدہ اساسیه doctrine fondamentale) یی آکلایوب اوکا کورہ تقدیر مایتنہ چالیشہ جفز ، وسائر مذاہب فلسفیه ایله بونک آرہ سندنہ کی مناسبت و مبانیتی ، بو تصنیفده اساس و معیار اتخاذ ایدہ جکمز . یعنی - ممکنسه - (طبیعی برتصنیف) ک زمین استادی اولہ بیلہ جک برنسیمی بولمہ چالیشہ جفز !...

فقط - برکت ویرسین کہ - بوکا حاجت قالماشدر . اون طوقوزنجی عصر میلادینک اک معلوماتلی فیلسوفلرندن (سر ویلیام هاملتن Sir W. Hamilton) ، بو مسئلہ مهمہ یی نظر ڈقته آلمش و مذاہب فلسفیه یی - طبیعی بر صورتده - تصنیف چارہ لرینی دوشونمشدر . بو کتابده اسمی جوق دفعہ حرمتلہ یاد اولونان بومتمکمر ، تصنیف مذاہبده (وجدان بشرک شهادتی le témoignage de la

(conscience humaine) نی اساس اتخاذ ایدوب پسقولوجی داتره سندن ایرلامدینی ایچون ، اونک تصنیفی (طبیعی naturelle) عد اولونویور ؛ وفی الحقیقه اوپله در ، حتی بوکوندن سوکره نه قدر یکی یکی فلسفه مسلکری احداث اولونورسه اولونسون اونلرک هر بریخده بروجهله بو (تصنیف جدولی Tableau de classification) نك قادروسی داخلنه ادخال ایتمک ممکن در . چونکه (هاملتن) هر هانکی بر فلسفه نك ماهیت ممتازه سنی تعیین اوکا کوره قیمتی تخمین ایچون (نظریه معرفت) ی نه در ؟ . اوکا باقیور ، و او نظریه نك متضمن اولدوغی حکمه کوره فلسفه نك ماهیتی کسدریورکه بوندن طوغروده بر معیار اوله ماز ؛ چونکه بر (ماتریالیست) ایله بر (ایده آلیست) ؛ بر (آمپریست) ایله بر (راسیونالیست) آره سنده کی فرق اعتقاد ، هر برینک عندنده مرجح و معتبر اولان نظریه معرفت فرقدن عبارتدر . یعنی (نهیسته مولوزی) مسئله سنده اظهار ایتدکری اختلاف نظر دن عبارتدر . (مبحث وجود) . متعلق اولان اعتقادات هب مبحث معرفتده حاصل اولان میلان ذهنی یه تابعدر . بناء علیه بوتون اختلافات مذهبی نك منشائی - اومبحث معرفت مسئله سنده - فیلسوفلری اختلاف آرایه دوشورن اسباب نظریه ده آرامالی در .

اواسباب نظریه نك نه اولدوغی یاقیندن تدقیق ایدرسه ک کوروروزکه وجدانمزلک - وجود مکونات حقنده - شهادتی تورلو تورلو تفسیر ایده بیلمک قابلیتدن باشقه برشی دکلددر .

ایشته (سر ویلیام هاملتن) ، بوجهتی پک ابی وپک واضح بر صورتده کورمش واوندن طولایی شهادت وجدانی - بو (اختلافات مذهبی) نك اسبابی تدقیق ایچون - اساس اتخاذ ایتمشدر .

باب آتی ده بو خصوصه دائر ویره حکم ایضاحات سایه سنده لایقیله کلاهی جقسکز - هرکه بوسوزلردن مقصدم نه در ؟ شهادت وجدان نه دیمکدر ؟ .. واسباب اختلاف نروده در ؟ ...

(سر ویلیام هاملتن) ، سقوجیا فیلسوفلرندن (یعنی کندی و طنداشلرندن) مشهور (توماس رید Thomas Reid) ک آثارینی شرح و تنقید ایده رک تکرار طبع ایتدیرمش ایدی . ذاتاً فوق العاده معلومات تاریخیه سیله ممتاز الاقران اولان (هاملتن) ک بوندن مهم اثری یوقدر و بالخاصه اوکتابده کی حواشی و تعلیقاتی

بویوک بر قیمت فلسفیه بی حائز در. بومعلم کامل چوق یازی یازمغه وقت بویه مامشدی. حتی او (شرح eommentaire) بیله ناقصدر؛ اکمال ایدمه دن وفات ایتشدر. بوندن ماعدا (درس تقریرلری lectures) و (مناقشات discussions) نامرله ایکی اثری واردرکه ، صاحب مسلک صاییلان بومتفکر اوکتابلرده کندی اعتقادات فلسفیه سی - پراکنده بر صورتده فقط صریح ومتین بر لسان ایله - عرض ایتشدی. وفاتندن سوکره باشلیجه طلبه لرندن (مهن سل Mansel) عقائد مذکوریه بی ضبط وربطه آله رق ، مدافعه ده غیرت کوستردی .

بواثرلرنده هاملتن بالخاصه (مبحث معرفت) مسائلنه اهمیت ویرمش وکندنبجه بر (نظریه معرفت Théorie de la connaissance) دخی ترتیب ایتشدی. (مبحث وجود ontologie) ده بر حقیقت مطلقه نك وارلغنه قوتله ایمان ایتدیکنی کوسترمکله برابر ، وجود مطلق حقنده - هر نه صورتله اولورسه اولسون - بز فکر تحصیلنک انسان ایچون ممنوع اولدوغنه قانع وقائل بولوندوغندن (علم بشرک اضافتی) دعوی مشهوری بیوک بر قناعتله ایلری سورمش وادعاسنی اثبات ایچون لازمکن دلایلی (épistémologie) دائرة سنده آرایوب بولمشدر. اونک ایچوندرکه بسیقولوزی بی فلسفه مابعدالطبیعه دن آیره مامشدر ؛ چونکه بوتون مبحث معرفت مسائل علم روح مسائلنه منجر اولور. حقیقت مطلقه کسب اطلاع خصوصنده عجیز بشر تماماً اعتراف وتسلیم اولونونجه بوتون فلسفه نك ال فعال دائرة تبیی (مبحث معرفت) ساحه سی اولور. اوراده دخی ال ای رهبر والک صلاحیتلی (حاکم juge) البته علم روحدر .

دیملک هاملتن بویکی مجبوریتلرله بویه بر نتیجه پیوسته اولمش و اوکا کوره بر (نظریه معرفت) ترتیب ایتشدر .

واقعا بوسیله بر چوق فیلسوفلرک وبالخاصه (میل J. S. Mill) لک تنقیدات شدیدسنه معروض قالمش ومسئله مذکور یوزندن اوروپا عالم عرفاننده حرارتلی وسورکلی مناقشه لر آچیلمشدر؛ مع مافیه هر نه اولورسه اولسون هاملتنک ترتیب ایتدیکی نظریه معرفت - معقول بر صورتده - تصنیف مذاهب ایچون بر مبدأ حرکت تعیین ایتدیکی جهنله پک قیمتلی در ، وهله بوبخنده اهمیت قطعاً شبهه کونورمز .

بوفیلسوف نحریر ، اولو وجدانک شهادتی - بلانید احتیاط - شایان اعتماد بر ندای حقیقت عد ایدیور ؛ وادعا ایدیورکه : [هیچ بر فیلسوف وجدانک

حکمی آچقندن آچینه انکار ایتمه مشدر. فیلسوفلرک جمله سی ده تسلیم ایدیورلر که
هر تورلو فلسفه نك منشأی وجداندر ؛ وجدانك حقیقته استناد ایتمه دجه هیچ بر
فلسفه ممکن اوله ماز . [*]

بو کتابمیزك بلکه اك مهم موضوع بحثی بوباب تشکیل ایتدیکی ایچ-ون،
ایستیورم که بوراده آ کلامادیفکنز بر نقطه قالماسین !..

یالکنز بوراده - بوسبتون اساس بحثه گیر مزدن اول - استطراداً بعضی
ایضاحاته لزوم حس ایدیورم. درسلمزك ایلک مباحثه (ده قارت Descartes) ك
مبدأ فلسفی سنی عرض وایضاح ایتمشدم ؛ کوترمشدم که بوفرانسز فیلسوف مجددی
هر شیدین شبهه ایده بیلدیکی حالده کندی وجداندن شبهه ایده مه مش ایدی .
[دوشونویورم !.. دیمک که وارم !..] دستوری اك قوی بر مبدأ فلسفی اولمق
اوزره تلقی ایله مشدی. اونك معاصری اولان قینالی زاده علی افندی مرحوم دخی
همان تماماً عینی اعتقادی کندی لسانیه بر اسلوب دیکرده بیان ایتمش و [اظهر
اشیا ، انسان ایچون کندی حقیقت ذاتیه سی در ؛ وهرکس کندی نفسنك وارلفه
- بالاتحلال واسطه - مطاع اولور. بوبر بدیهه اولی در !..] الی آخره !.. دیمشدی.
ایشته فلسفه لساننده (شهادت وجدانیه le témoignage de la conscience) ،
بودیمکدر. یعنی انسان کندیخی دوشوندوکی زمان ، وجدانك [بن وارم !..]
دیهرك شهادت ایتمه سیدر .

هاملتن ادعا ایدیورکه وجدان ، بوشهادتنده قطعاً و دائماً صادقدر. ده قارتك،
حتی ارسطونك جوق اول دیدیکی کیی وجدانك بونداسندن شبهه ایتك ممکن
دکدر. [بن موجود !] دیدیکی زمان اوکا ایناماق ایچون هیچ بر سبب یوقدر.
بوکا دلیل ایسته مز ، چونکه بوتون دلیللر بوججت انیه واصلیه استناد ایدر .

مع مافیه هاملتن اويله ظن ایدیورکه فیلسوفلر وجدانك بوشهادتنده بعضاً
ویا خود قسماً شبهه ایتدکری ایچون وارلق مسئله سنی تورلو تورلو تفسیر ایدیورلر.
مثلا [ایشلرینه کلدیکی زمان ، (یعنی مبحث معرفتده کندی اثر تصور و تخیللری
اولان فرضیه لره توافق ایتدیکی تقدیرده) وجدانك شهادتیه اعتماد ایدیورلر ؛
عکسی تقدیرده اونی رد ایدیورلر (یعنی اوندن شبهه ایدیورلر !) و بنسأً علیه

[*] بوطوغرو سوزلر ، (فلسفه تقریرلری lectures on philosophy) نامیه مشهور
اولان کتابنده مندرجدر .

اوله صداقتنه اعتماد ایتیش بولونقلری بر شاهد حادلی ، بوسفر یالانچیلقله اتهام ایتیکی روا کورویورلر. حالبوکه بر شیده یالانچی اولان هر شیده یالانچی در . (Falsus in uno falsus in omnibus) دستوری هر خصوصدن زیاده بوراده طوغرودر . [دیور .

هاملتنك بوسوزلرنده شایان دقت بر قید وار : [حافظه یه ، معلومات مکسوبه یه بهمه حال اینانمالی و ذهنه وارد و سانخ اولان هیچ بر فکردن ، هیچ بر حسدن شبهه ایتهمه لی !] دیمور. وجدانك شوآنده سویله دیکی شیلره اینانمقده مجبورز؛ دیمك ایستور . یعنی (حالی actuel) و (تحسینی intuitif) اولان حسیات و حالات روحیه مزدن هیچ بر وجهله و قطعیا شبهه ایدمه یز ! . دیمك چیقور . فلسفه مباحثنده بو کیفیتك نه مهم بر مسئله تشکیل ایتدیکنی یاقینده ایضاح ایدمه جگم . دیمین سویله دیمك کیبی (ده قارت) و حتی (ارسطو) دخی بوکا بکزر بر فکر بیان ایتیشلر و اوکا چوق اهمیت ویرمشلردی . یالکیز آرده ناعحسوس فرقلر واردر . اولنری ابراز و قیصه جه تعریف ایدیم ؛ زیرا (یقینیت علم = certitude de la connaissance) دعوا سنده اساس مسئله هر زمان ایچون بودر . ارسطو ، بونی جداً دوشونمشدی ؛ حتی دوشونمکه مجبور بولونمشدی ؛ چونکه کنیدیسی تحصیل فلسفه ایچون ، آتتهنك مدرسه لرینی طولاشیرکن ، اك مشهور سوفسطائی لرك - فلسفه مدارس علینه - مجاهده لرینه شاهد اولمش و بو سیل اعتراضاتك نهایت (یقینیت علم) اساسلرینی ییقوب خراب ایدمه بیله جگنی پك اعلا ا کلامشدی . منطق قواعدینی ضبط و ربطه آلهرق بو علمی عادتاً بنالیتیش اولماسی ، مناقشات سفسطیه مانع اوله بیله جك بر ضابطه قویه تشکیل ایتدی . او یونان حکیمی قدر بو مقصده چالیشان اولمامشدر ؛ ده یه بیلیرم .

شبهه یوقدرکه ارسطو ، معلوماتز میاننده طوغرودن طوغرویه شایان اعتماد اولانلرینی ، شبهه کوتورون قسمندن قطعیا فرق ایدمه بیلمك ایچون بر چاره دوشونویوردی . طاقت ، بویکی نوع معلومات آرمه سنده بر علامت فارقه بولمشدی . بر محاکمه نتیجه سنده حاصل ایدمه بیله دیمكز فکرلردن شبهه ایدمه بیلمك امکاتی و حقی تسلیم ایدیوردی ، چونکه بو تورلو فکرلری ایلاد واستخراج ایتمکه ذهنك بر خدمتی ، بر روی واردر . ذهن یا کپله بیلیر ؛ انسان ، (لایخطی infallible) دکدر . فقط (احساسات sensations) مزدن شبهه ایتمکه ارسطو هیچ بر

معذرت بوله مادینی کیبی امکان ده کوره میوردی. استدالات منطقیه ایله استخراج و بناء علیه - بالواسطه - تحصیل ایده بیلدیکمز معلوماتك، هر هانکی بروجهله محل شبه اوله بیله جکی بو کون هر کسجه مسلمدر. هیچ اولمازسه او کیبی معلوماتك صحتی - علاقه دار بولونقلری - مبادی نك ماهیتنه تابعدر. چونکه اولنرك استناد ایتدیکی اساسات، ایشته اومبادی در. بواساسلر، چوروك اولونجه، طرز استدلال نه قدر (مشروع) (légitime) و منطق اولورسه اولسون، فائده سی و حکمی یوقدر؛ اوتقدیرده استخراج اولونان نتیجه قواعد منطقیه موافق اوله بیلیرسه ده مطابق حقیقت اوله ماز.

لکن، (آنی و حالی immédiat et actuel) اولان طویغولرمز، (وهی innée) اولان فکر لریمز البته بویه دکلدرد. مثلاً کوزمی آچار آچار ضیا ورنك کورو یورم؛ یا خود طور و ب طور ورکن بو کرمد بر صانجی حس ایدیورم. ارتق بو طویغولرمدن شبه ایتکه بنم ایچون - ذره قدر محل یوقدر. کذلک، فرضاء، چناق قلعه ده محاربه ایدن بر ارقداشمک - عینی زمانده - هم وار، همده یوق اوله مایه جغه، ذهنم بر آنده قناعت کتیریور. ینه - عینی زمانده - هم اوراده همده استانبولده بولنه. مایه جغه ده در حال اینانیورم؛ او قدر که بو خصوصده تحقیقات اجرایی قطعاً عبث کورو یورم. بوتورلو دوشونجه لرده دخی ترده محل یوق!

دیمک که ضیا ورنك کورمک کیبی حواس خارجه مزله تحصیل ایتدیکمز (ادراکات perceptions) دن، و صانجی، یا خود آخلق حس ایتک کیبی (باطنی طویغولرمز nos sensations internes) دن، بحق شبه ایده میه جکز؛ افکار و هییه مزیه ده موضع ترده دوشورده میه جکز. بو شیلری اثبات ایچون دلیل ایسته مز. شو رنکی، بو صانجی بی، بن طویویورسه م، بنم ایچون اولنر واردر و محض حقیقتدر. سن طویویورسه ک سنک ایچون اوله بر شیلر یوقدر. بنده سکا اولنرك وار اولدوغنی - هیچ بروجهله - بیلدیرم! بلکه تعریف ایده رم؛ مع مافیه بوتورلو شیلری حقیله بیلیمک، انحق کندی نفسنده عینی حالاتی حس و تجربه ایتکله اوله بیلیر؛ اونک ایچون سوزله تعریفک - بو خصوصده - حکمی یوقدر. ارسطو، ادعا ایدردی که احساسات، بزم ایچون ابتدائی حقیقتلردر و بوتلر هر تورلو شبه دن بری در. مع مافیه ینه (علم یقین connaissance certaine) بحثنده - باطنی اولسون خارجی اولسون - مدرکات حسیه یه استناد ایتک ایسته مزدی.

چونکه بو (منابع sources) ك وارداتيله تحصيل ایده بیلدیکمز معلومات (عمومی) اوله میوردی. اونك ایچوندرکه بیلگی مزك بو نوعنه (ظن opinion) دیمش دی. بناءً علیه بو فیلسوفك اعتقادنجه (علم صحیح science exacte)، معلومات حسبه وتجربیه اوزرینه مبنی اوله مازدی.

لکن، (افکار وهیه) ده (کلیت universalité) وقطعیت کیبی ایکی خاصیت مهمه کوردوکی ایچون علوم صحیحه وثابته نك انجق او (مبادی* قویمه principes immuables) یه استناد ایده بیله جکئی ادعا ایدیوردی. معلوما تمزك بوتورلوسنده (نهیستی می) دیمش دی که- بو کونکی معنای شاملی ایله دکل، - بالعکس اك طار معناسیله (science) مقابلدر. مثلاً بوتعریفه کوره (هندسه)، ارسطو نظرنده بر (علم صحیح - نهیستی می) در؛ فقط حیوانات، نباتات، فیزیولوژی، پسیقولوژی، دکلدرد. چونکه بو ایکنجی طاقده داخل بولنان شعبات علومك (مبادی* اولا les premiers principes) سی محسوسات و مجربات قیلندن بعضی معلوماندرد، وبونلر (ذوقسا) دن عبارت اوله بیلیر. حالبوکه هندسه نك اساسلری عمومی و یقینی برطاقم مبادی* عقلیه درکه اونلری - بیلیمك و اکلامق شرطیله - هرکس بالضروره قبول ایدرد. اونك ایچونده دلائل هندسیه، نباتات و فیزیولوژی ودها بو کیبی علوم تجربیه نك ابراز ایده بیله جکی براهیندن چوق داها قوتلی ودها قطعی در.

(علوم عملیه sciences pratiques) نك محسوسات و مجرباتدن طوغمش اولدوغنی ده ارسطو قبول و تسلیم ایدردی؛ لکن اونلری (تهخی) تعبیر عمومیسای ایله آییروب علم صحیح عدادینه ادخال ایتزدی. مثلاً طبابت (la médecine) انجق (تهخی) اوله بیلیردی. بزم شرق لسان فلسفی سنده (صناعت) تعبیری ایشته بو کله یونانیه نك تماماً مقابلدر، - واسلاف محررینزجه - بو حیثیت معنا ایله قوللانیله گلشدر. ذاتاً حکمای عرب، استاد یونانی نك بو فکرلرینی عیناً قبول و نقل ایتشلردر. ایلری ده تماماً عرض ایده جکم، کوره جکسکر.

دییمك که ارسطو، (محسوسات ظاهره sensations externes) مزی، (محسوسات باطنه sens internes) مزی و (افکار وهیه) مزی عینی درجه ده شایان اعتماد کوروپور وهیچ برندن ذره قدر شبه ایده میوردی. یالکمز معقولات، (عمومی و کلی) اولوق اعتباریله باشقه جه بر حیثیتی حائر بولوندوغی ایچون علوم صحیحه نك

مبادیسی تشکیل ایتک اوزره اونلری الیق و مرجح کورویوردی؛ یوقسه هپسی ده بدیهی و بناء علیه دلیل و حجت احتیاجدن مستغنی ایدی .

فی الحقیقه عربلر ، بدیهیات تعبیری بو اوج نوع معلوماته تشمیل ایتشلر و استادک (معقولات) دیه تسمیه ایتدیکی صنفه (اولیات (les prem. princ.) ، محسوسات ظاهریه (حسیات (sensations externes) ، محسوسات باطنیه ده (وجدانیات (sensations intimes) دیمشلردر. تفصیلی کله جکدر .

شایان دقتدرکه ارسطونک بو تقسیمی بک اساسلی در؛ (منشأ علم (l'origine de nos connaissances) و (یقینت علم (certitude de la conn.) مسئله لرنده بحث و مناقشه حالا ، ارسطونک چیزمش اولدوغنی بو دائرة خارجه جیقه مامشدر . ینه یاقینده کوره جکز که (افکار وهیه (idées innées) تعبیرله یاد ایتدیکمز معقولات قویعه نك (منشأ l'origine) ی ، مبحث معرفتک اک مهم مسائنندن برینی تشکیل ایدر . بو کبی فکرلرک حقیقتاً محصول تجربه اولوب اولمادیغنی تعیین ایتک دخی (طریق - اصول - méthode) مسئله سیدر . بو ایکی احتمال مستند اوله بیلن ادعالردن برینی (مثلاً محصول تجربه اولدوغنی) قبول ایتک (تدرییه empirisme) اصولی التزام ایتک دیمکدر؛ عکسنی قبول ایتک (عقلیه rationalisme) فلسفه سنه قائل اولق و اونک اصولی ترویج ایله مک دیمکدر . صوکره : معلوماتمزی ، (بالواسطه) یاخود (بلا واسطه محاکمه) تلقی ایتمکده بولوندوغمز تسلیم اولنه جغه کوره دخی عقائد فلسفیه ددکیشیر . خصوصاً عالم خارجی نك و کندی بئلکمزک وارلغنی طوغرودن طوغرویه ادراک ، یاخود بالحاکمه تعقل و تسلیم ایتمکده بولوندوغمز کوره (نظریه معرفت) ترتب ایدر ؛ و ارتق بوتون مسائل متفرعه بی اوسباق نظرله تلقی ایتک مجبور بولونورز. حقیقت خارجه یه طوغرودن طوغرویه تماس ایدرک اونک وارلغنی تسلیم ایتدیکمزه اینانه بیلورسوق (تحسیه intuitionisme) مسلک فلسفینی التزام ایتشز دیمکدرکه بوده (جوهریه substantialisme) اعتقادی استلزام ایدر، و ناتورالیزم، یعنی (طبیعی naturalisme) و (مادیه matérialisme) ایله برابر بوتون بوجنسدن اولان مسالک فلسفیه وجود و رواج اعتبار ویریر . یوق ، اگر عکسنی تسلیم ایدرسه ک ، یعنی : [بز کرک حقیقت خارجه ایله ، کرکه کندی روحزله طوغرودن طوغرویه تماسده دکلز، و اوله میورز. یالکمز خارجدن تلقی ایتدیکمز بعضی (مدرکات حسیه (perceptions sensitives) و

باطناً حس ایتدیکمز بر طاقم (حالات روحیه états d'âme) دلالتی ایله خارجه ده ماده نك وباطنده روحك استقلال وجودینه اینانمقده مجبور بولونویورز . [ديه حکم ایدرسهك sensualisme حسیه) اساسنه مستند بر (انفسیه subjectivisme) اعتقادی بنا ایتمش اولویورز که بهمه حال (استحضاریه représentationisme) فلسفه سنه چیقار ، و (افتکاریه idéalisme) مذهبی ایله برابر بالجله انواعی تولید ایدر .

کوزویورسکمز که اصل حل اولونه حق عقده مبحث معرفت دائره سنده در . اوده (ادراك perception) معماستدن عبارتدر؛ ووده عاقبت (شهادت وجدان) مسئله سنه منجر اولور : بناء علیه - معلومات تاریخی سیله فوق العاده بر صلاحیت تنقید قازانمش اولان - سرویلیام هاملتن ، فلسفه ده (تشدت عقائد diversité des doctrines) یوزندن ظهوره کلن مذاهب مختلفه ومتضاده یی - آز جوق طبیی بر وجهله - تصنیف ایده بیلمك ایچون ، ایشی تام اساسندن طوتدورمشدر؛ ديه ادما ایده بیلیم .

سزه - بوبحث اوزرینه - سویله دکارمی اونوتماییکمز ؛ اونوتورسه کز بیله ، هیچ اولمازسه ، یالکمز شونی ایجه خاطر لاییکمز که ، [فیلسوفلر ، حقیقت ذاتیه و مطلقه یی ادراك وتمقل ایتمکدن مأیوس اولوبده اعتراف عجز ایدنجه ، مابعد الطبیعیاتك (مبحث وجود ontologie) حقنده کی تدقیقاتی - (عدمی négatif) بر نتیجه ویردیکندن طولایی - اسکی اهمیت و اعتبارینی ضایع ایده رك ایکنجی درجه ده دوشمش و (مبحث معرفت) تحقیقاتی اوکا تقدم ایتشدر . او سیبله پسیقولوژی علمی مسائل فلسفه ده فوق العاده بر نفوذ حاکمیت قازانه بیلمشدر ؛ چونکه ناصل حس وادراك و تحصيل معلومات ایتدیکمزی ، نه صورتله ابداع افکاره موفق اوله بیلدیکمزی - کمال صلاحیت ایله - تحقیق ایدوب بزه بیلیدیرن او علمدر .]

مع مافیه بویوله اولقله برابر ، یعنی بوکون فیلسوفلرجه نقطه نظر و وضعیت فکریه ده خیلی دن خیلی تبدلات ضروریه وقوعه کلکله برابر ، بالذات مابعد الطبیعیات مسائل اساسیه سنك اشکال اصلیه سی پك او قدر تغییر ایتمه مشدر . (کیفیت ادراك و یقینیت علم) ، (تحدس و استحضار) ودها بو کیی - برنجی درجه ده مهم - بختلره متفرع ومتعلق اولان مسائل فلسفه ، ارسطو زماننده نه شکل اوزره

موضوع ایدی ایسه - آرز چوق - او شکلی ینه محافظه ایده بيلمکده در . يالکنز بو مسائلی تلقی ایتکده (سیاق نظر *manière de voir*) ، و تتبع ایتکده ده (اصول *méthode*) کلیاً ده کیشمشدر؛ اوقدر که : فلسفیاتده ترقی اک زیاده تعدیل و اصلاح اصول یولنده تحقیق اید. بيلمشدر؛ ده بنلری تصدیق ایتک ضروری کورونور. مجدد مشهور (ده قارت *Descartes*) ک اک بو یوک خدمتی ده اصلاح اصول امرنده واقع اولمشدی ؛ فقط بو بو یوک فیلسوفک - اساسی مسئله لرده - ویردیکی حکم ، ارسطونک کندن پک فرقی بر شی دکلدرد . [شبهه ایدیورم ؛ دیمک که دوشونویورم . اویله ایسه بن موجود *Dubito, Cogito, ergo sum ...*] دیمک (وارلق مسئله سی *la question de l'être*) نده انجق وجدانک شهادتنه اینانمق در. افکار و هییه بی معلومات یقینه نك اساسی اولق اوزره تلقی و قبول ایدوبده (علم صحیح *conn. exacte*) ی او تمل اوزرینه بنا قورمق دخی ، (عقلیه *rationalisme*) فلسفه سنی تأسیس ایتکدر . ارسطو دخی عیناً و تماماً بویله یابمشدی .

دیگر بر مجدد داهی : (قانت *Kant*) ، بر طرفدن ده قارتک تأثیرینه ، دیگر طرفدن ده (هیوم *Hume*) ک نفوذینه طوتولش اولدوغی ایچون ، بو بو یوک متفکرلرک هر ایکیسنه ده - من جهة - حق ویرمه کجور بولوندی . او دور استادلرندن مشهور (لوق *Locke*) ، و طنداشی اولان (بهی قن *Bacon*) ک موفقیتله آچدینی چیغیری تعقیب ایدره ک (تجربه *expérience*) طرفدارلنده هیچ برتورلو قید احتیاطه رعایت ایتمه مشدی . اونک ایچون ده قارتک (افکار و هییه) دعواسی شدتله رد و ابطال خصوصنده آشیری غیرت کوسترمشدی ، که بوده اسکی یونانیلرجه معروف اولان بر اصولی : (ئه پیکور *Epicure*) اصولی ترجیح و اصلاح ایتک دیمکدی .

قانت ، - بوقوتلی جریان تنقیده قارشى - بالطبع ، افکار و هییه بی - اولدوغی کیبی شکل قدیمی اوزره - مدافعه ایده مزیدی . بناء علیه ده قارتک بو اعتقادینی قبول ایتمینلره برابر یوزودی . فقط صمیمیاً اینانیوردی که معلوماتر میاننده تجربه محصولی عد ایدیلهمین بر قسم مهم وارد ؛ و اونلر انجق (معلومات یقینه *connaissances certaines*) مزى تشکیل ایدرلر . ایشه اونلره (معلومات قبل التجربه *conn. aprioriques*) دیدی ؛ بونلری تعریف ایچون واقعا بوسبوتون یکی فکرلر بیان ایتدی که صرف کندی طرز تصویری در . نته کیم - یری کلنجه

– لایقوله ایضاح ایده جکم. فقط نه اولورسه اولسون، ینه ده قارتک (افکاروهیه) سیله قانتک (معلومات قبل التجربه) سی ماهیتاً و حیثیتاً پک او قدر فرقلی بر شیر دکدر . واقعا قانت تحصیل معلوماتده تجربه یده مهم بر پای جیقاریدی ؛ فقط اوندن اول ده قارت دخی عینی صورته حرکت ایتشدی . او قدر که بوفرانسر مجدینک (فلسفه تدریبه philosophie empirique) مؤسس اولدوغنی زمانمز منقدینی قبول ایتماکده حقلی درلر . بو شرف تمامیه (بهی قن) کدر .

خلاصه، مسائل مابعد الطبیعه ، اسکیدن بری نه شکلده ایدسه، ینه اوشکل اوزره قارشیمزده طوروب طورویور . ده کشین یالکزارصول تلقی وتبع در . هر فیلسوف مجدد ، یکی بر نقطه نظر کشف ایتکله اصلاح اصوله خادم اولویور . بویوکلرک الک بویوک موفقیتی باشلیجه بوراده در .

سر ویلیام هاملته کلنجه ، باقیکنز ، ناصل وضعیت آلدی :
بو بابک بدایتده عرض ایتدیکم وجهله ، (شهادت وجدانی) ی اساس اتخاذا ایده رک اوکا همه حال ایناتمی لزومنده اصرار ایلدی . فقط حادثات روحیه وحالات وجدانیه میاننده انحق (حالی actuel) اولانلرینه اعتبار ایتک لازمکله جکنی خاطره کتیره رک بونک اسبابی ده سوبله دی . بومبشده ایراد ایتدیکي ملاخطاتک خلاصه الحلاصه سی شو جمله ایله ادا اولونه بیلیر :

[صحیحاً (حالی actuel) اولان طویغولرمز بلاواسطه تلقی ایده بیلدیکمز معلومات ابتدائیه در ، محاکمات ذهنیه تک بو خصوصده دخلی اولمادینی ایچون بو کبی تلقیات وجدانیه مزده خطاوقوعی ممکن دکدر . بوسبیله اونلردن شبهه ایتکه دخی – هیچ بروجهله – حقمز یوقدر !]

اکلاشیلورکه (سرویلیام هاملتن) ک (حالی) تعبیریه توصیف ایتدیکي ایلک طویغولرمز، وجدانمزک بزه بلاواسطه محاکمه عرض ایتدیکي معلومات بسیطه در . (برغسون Bergson) بونلره (وجدانک معطایات آیه سی les données immédiates de la conscience) دیور . بویکبی (حقایق انفسیه vérités subjectives) همه حال بسیط اولقی لازمکله دیکي جهته ، یعنی بالتحلیل ، دها بسیط بر طاقم (عناصر حسیه éléments de sensation) یه (ارجاع ایدیه مدیکي جهته irréductibles par l'analyse) ، (سپنسر Spencer) اونلره (حقایق تحلیله vérités analytiques) دیمشدی که عینی معنایه دلالت ایدر بر تعبیر دیکر در ؛ و (تحلیل نتیجه سنده ادراک

اولونان بسیط حقیقتلر (دیمک تقدیرنده در . حواس ظاهریه تعلق اعتباریه
(مقاومة) (résistance) (رنگ couleur) ، (صوت son) ، (طعام goût)
و (رایحه odeur) کیبی ...! (ماهیات concepts) و معقولات میاننده (ماده
(la matière) ، (قوت la force) ، (زمان le temps) و (مکان l'espace) ،
(حرکت le mouvement) حقنده کی فکرلر من کیبی ...!

باب مخصوصنده ایضاح ایده جکم وجهله ، بو (احساسات sensations) و افکارک
حقیقتاً بسیط اولوب اولمادینی انجق صوكدورده موضوع بحث اولمش و بو مسئله
بالخاصه (تحسینون les intuitionistes) ایله (استحضاریون - les représentatioe
nistes) آره سنده باشایچه سبب مجادله یی تشکیل ایتشدی . یوقسه کلیت اسلاف ،
بونلرک بسیط ، حتی (آفاقی objectif) حقیقتلر اولدوغنده شبه ایتهمشلردی .
ایدن وارسه ده اندر نادر ایتدندر . زمانمز متفکرینی بو خصوصده شبهه دوشورن
شی ، (تحلیللات یسیقولوزیه analyses psychologiques) نك - بو صوكد زمانلرده کی -
ترقیات فوق العاده سیدر .

بوگون مبحث معرفتده الک مهم مسئله ، کرك ماده نك کرکه روحک وارلقه
دائر حاصل ایتدی کمز (افکارقیمه) نك طوغرودن طوغرویه (تحدسی intuitif)
برصورتده می ؟ . یوقسه بمدالحاکمه (استحضاری représentatif) برطرزده می ؟ .
حصوله کلدیکنی تحقیق ایتکدر . اونك ایچوندركه مبحث معرفت مناقشاتنده
(حالی actuel) تمیری برنجی درجه ده مهم بر حیثیت احراز ایتشدر ؛ چونکه
حادثات وجدانیه میاننده انجق حالی اولانلر (تحدسی) در . دیکرلری بهمه حال
(استحضاری) در .

ایشته ینه بوندن طولایی (سرویلیام هاملتن) ، بجنه کیریشمزدن اول (حالی
اولان حادثات وجدانیه) یی تعیین ایتک ایستور ؛ زیرا تحسینون ایله استحضاریون
آره سنده موجب مناقشه اولان (بویوک دعوا) نك نقطه استنادی اودر .
بك فطینانه طاوارنوب بومبدأ نقطه سندن ایشه کیریشن هاملتن غریب ، لکن
طوغرو بریول تمقیب ایدیور . بو خصوصده سزه براز ایضاحات ویرمک ایسترم .
اویله اعتقاد ایدیورم که ، ایلریده - بالضروره - مناقشه ایده جک اولدوغم مبحث
معرفت مسائلی لایقيله تیقن ایدوب اکلایه بیلیمکک ککرایچون بوايضاحات متقدمه نك
جوق فائده سی اوله جقدر .

یوبابك ابتدا سنده سویله مشدم كه (سقوجیا مدرسه سی Ecole écossaise) نك
اك مشهور ممثلی صایلان (رید Reid) ك کلیات آثارینی ، - ینه اصلاً سقوج
اولان - (سر ویلیام هاملتن) شرح ایدوب باصدیرمشدی . بو مسئله لره دأثر
اوراده تفصیلاً بیان مطالعه ایتمشدر . فقط (مناقشات Discussions) نامیله معروف
اولان دیگر بر اثرینك ایکنجی بابی تشکیل ایدن بر مقاله مستقلمده (هاملتن) ،
(ادراك perception) مسئله سنی ، منحصر آ فلسفی بر نقطه نظر دن تتبع ایدوب
اوکا کوره مذاهب فلسفیه بی تصنیفه کیریشمش اولدوغندن طولای ، ترجیحاً او
مقاله سنی - بچمز ایچون - مأخذ اتخاذ ایدیورم ؛ چونكه دهاموجز ودها
صریحدر . [*]

وسيله بحث ینه سقوج فلسفه سی نامنه (رید) ك نظریه معرفتی مدافعه ایتك
غیرتی اولمشدر . اوزمانلر [یعنی ۹-۱۸۲۸ تاریخلرنده] بوفیسوفك کلیات آثارینی
- فرانسه فلاسفه روحیونندن - (ژوفروآ Th. Jouffroy) تماماً فرانسزجه یه
ترجه ونقل ایتمشدی . هاملتن معهود مقاله تنقیده سنی بومناسبتله قلمه آلمشدر .
(فلسفه ادراك Philosophy of perception) عنوانیله جاذب دقت اولان او
مقاله ده (هاملتن) ، (ژوفروآ) نك شو خدمت مشكوره سنی تقدیر وفرانسزلرك
فلسفیانه آشیری درجه ده رغبتلرینی تحسین وتبريك ایتدكدن صوكره (رید) ك
ترتیبكردمه سی اولان نظریه معرفتی - (دوكتور براون Dr Thomas Brown) ك
تعریضات واقعه سنه قارشى مدافعه ایتكه باشلیور . [**]

(براون کیی فوق العاده مستعد و نافذ النظر بر آدم بیله (رید) ك فلسفه سنی
یاكلش اكلامش ایسه ، البته (رید) ك برقصوری اولمق كركدر : اساساً طوغرو
وبویوك برقیمتی حائز اولان نظریه مشهوره سنی حقیله بسط وعرض ایده مه مشدر .
دهیهرك مناقشه یه وسیله قابی سی آچور ؛ وادما ایدیوركه (رید) (علم تحدسی
[*] بوقیمتلی مقاله (فلسفه ادراك) عنوانیله مشهوردر ، و (مناقشات discussions)
نام كتابك ایکنجی بابی تشکیل ایدر .

[**] (Brown) سقوجیا لیلرك اك بویوك فیلسوفلرندن معدوددر . (۱۷۷۸) تاریخنده
طوغمش ومفهور سبنسرك تاریخ تولدی اولان (۱۸۲۰) سنه سنده انجق قرق ابی یاشنده
ایكن وفات ایتشدی (همدینبری Edinburgh) دارالفنونی فلسفه درسنده (دوغالد استیووت
Dugald Stewart) ی استخلاف ایله مش و (رید) ی شدتله تنقید ایتشدی . هاملتن
(براون) ی استخلاف ابتدی ایدی .

conn. représentative (علم استحضاری) ایله (connaissance intuitive) آره‌سی
 فرق ایتمه‌شدر. بؤکاده سبب، (شعور conscience) ی بر (ملکة خصوصیه
 و مستقله une faculté spéciale et indépendante) اولوق اوزره، تلتی ایتمک
 خصوصنده کی خطاسیدر. فلسفه‌سنگ یا کلش اکلاشلیمه‌سی بوندن ایلری کلیور. [
 هاملتنک خوشنه کیتمه‌ین و (رهید) ه قارشى اعتراضى جلب ایدن نقطه‌نک
 نه اولدوغنی ونه قدر مهم بر مسئله‌یه متعلق بولوندوغنی، سزه - ایکی سطرله -
 اکلاته‌بیلیرم :

رهید (شعور conscience) دن بحث ایدرکن : [بر شینه شعورمن اولورده
 ینه اوشی حقنده علممز اولمایه بیلیر؛ یعنی اوشینک حدذاتنده نه اولدوغنی بیلیمه
 بیلیرز! ..] دیمشدی .

ایشته هاملتنک قطعاً خوشنه کیتمه‌ین و تعریضی جلب ایدن ملاحظه بودر.
 بودا (علم) ایله (شعور) آره‌سی تفریق ایتدیکی ایچون هاملتنی دوشوندورویور.
 قوشقولاندیریور. فی‌الحقیقه انسانی دوشوندوره‌جک بر برزخدر. بو دعوانک
 اهمیتی یکدن اکلاشلاماز؛ متضمن اولدوغنی عقیده فلسفه و اواعقداک - بالضروره -
 تولید ایده‌جکی نتیجه هرکسک کوزینه کورونمز. باقیکز سر نره‌ده‌در :

اگر (رهید) ک ادعاسی طوغروایسه، یعنی بر شینه شعورمن اولمقله برابر
 اوشینک حقیقتی بیله‌مه‌مک ممکن ایسه - درجنگ اول (تحدسیون les intuitionistes)
 مات و مغلوب اولمش اولور و (استحضاریون) دعوائی قازانیر. چونکه اودستوری
 تشمیل ایدرک : [عالم خارجی حقنده شعورمن واردر؛ چونکه وجودینی حس
 ایدیورز. مع‌مایه حقیقت ذاتیه‌سنه علممز یوقدر! ..] دیمک، مشروع و طوغرو
 براددا اولور. بوداعایی فلسفه‌لری ایچون بر (دستور اساسی formule fondamen-
 tale) اتخاذ ایدنلر دخی انجق استحضاریون فرقه‌سی تشکیل ایدن متفکرین‌در.
 حالبوکه هاملتن، اصل بوداعایه معارض و بوفرقيه رقیب‌در. حتی یالکز هاملتن
 دکل، بوتون (سقوج فلسفه‌سی) نک عمده استنادینی تشکیل ایدن (عقیده
 doctrine)، دستور مذکوره - طابان طابانه - ضد بر جمله ایله افاده ایدیه
 بیلیر؛ یعنی :

[بر شینه شعورمن اولورسه، اوشی حقنده‌ده علممز واردر. مادامک عالم
 خارجی نک وجودینی استشعار ایدیورز؛ دیمک که کائنات خارجیه‌نک حقیقتاً وار

اولدوغنی بیلورز. بونده ذره قدر شه ایدمه‌یز، چونکه علم ایله شعور، الفاظ مترادفه‌دندر. باشقه باشقه مغالرافه ایتمز.]

دینه‌یلیر و حقیقتاً هاملتن ایله برابر سقوج فلسفه‌سنه منسوب اولان بالجه متفکرینک - مبحث معرفت ده - اساس ادعاری بودر [*]؛ (حاسة سلیمه bon sens) یاخود (حاسة مشترکه sens commun) فلسفه‌سی تعبیریه تفسیرایدیلن سقوج فلسفه‌سنه بوسبيله او عنوان ویرلشدر. زیرا، بو مذهب اربابنک مقبولى اولان (نظریه معرفت)، عموم انسانلرک حاسة مشترکه سیله ملهم و مصدق اولان اعتقادی دستور اساسی اتخاذ ایتشدر؛ یعنی [مادام که عالم خارجی نامنه بر جوق شیلره شعورمز واردر، اویله ایسه برعالم خارجی واردر؛ و یک اعلا بیلورز که واردر !!] ادعاسنده سقوج فلسفه‌سی اعتقاد عوامه مشارکدر.

ایلریده کوره جکرکه بو اعتقاد، یالکز (ایده آلزم - افکاریه - idéalisme) فلسفه‌سنی رد ایدر، فقط باشقه مذهبلره اویوشه‌ماز دکلدر.

دقت ایدیورسکزی !! ظاهر آ یک اهمیتسز کورون او (قضیه) - بلانتقید و ملاحظه - قبول ایدیلوب ده (ره‌ید) که ادعاسی تصدیق اولونورسه ارتق اوتوسی قولایلاشیر؛ یعنی، مبحث معرفت مسائلی حقیقه ترتیب اولونه بیله جک محاکمات، - طاقیه و بالضروره - اوقضیه‌نک نفوذی آئنده یورور و حکمنه تبعیتدن قورتوله‌ماز. او تقدیرده دخی (تحدسیه) فلسفه‌سنی مدافعه امکان و درمان قالماز. حالبوکه هاملتن تحدسیونک اک بویوکلرندندر و بوفلسفه‌نی هرکسدن ای مدافعه ایتشدر. (جون ستوته میل J. St. Mill) که تنقیدات شدیدنه‌سی جلب ایتمه‌سنده انجق بو اعتقادی و اونی مدافعه خصوصنده کی غیرت فوق‌العاده‌سی سبب اولمشدی. زیرا (میل) بالعکس استحضاریون فرقه‌سنک اک بویوکه واک مقتدرمدافعی ایدی. بناء علیه فلسفیاتده فوق‌العاده معلومات تاریخی‌سی و نفوذ نظریه تمایز ایدن هاملتن - طبیعی - بومهم نقطه‌بی قاجیرماز، و او ادعاکن اوستندن - دقتسزقله - آطالیوب کچه‌مزدی. اونک ایچوندرکه اوقطه‌بی مبدأ حرکت اوله‌رق تلقی ایدوب مسئله‌بی ای دن ای تدقیقه قویولمشدر.

لکن، بوراده برمشکه تصادف ایتدیکنی، کندی ده آکلپور و اعتراف ایتمکدن

[*] یالکز (دوتور بروون) ستوجیالی اولدوغنی حالده سقوج فلسفه‌سنک بوهقیده اساسیه‌سنی شبهه دوشورمش و او سبيله هاملتنک تعریضات شدیدنه‌سی جلب ایتشدر.

چکینیمور؛ اوده (شعور) ایله (حافظه la mémoire) نك عرض ایتدیکی مناسبت و مشابهت ایله (فرق différence) در .

حافظه دخی - نوعما - شعور دیمکدر. بر انسان، بر شئی تخطر ایتسین ده ، اوکا شعوری اولماسین ، یعنی تخطر ایتدیکندن خبردار بولونماسین !... بو، اولماز. خبردار اولسون ده خبردار اولدوغنی بیلیمه سین !... بو ، هله هیچ اولماز !... چونکه (خبردار اولق) ، (بیلیمك) دیمکدر . [*]

حالبوکه اصل مشکلات بوراده در ؛ چونکه : حافظه ، بزه انجق اولوب بیتمش ، کلوب کچمش بر طاقم وقایع و حادثات اخطار ایده بیلیر. زیرا (صحنه شعور seuil de la conscience) مزه عرض ایدوب بزه بیلدیردیکی شیلرک جمله سی ده ماضی به عائددر . ماضی ایسه ، - حقیقته - موجود بر عالم دکدر .

مثلا بن ، مرحوم پدرمی بو کون عیناً خاطر لیورم ؛ وهر حالی بیلورم ، چونکه - اونی - بوتون هویت شخصیه سیله (لوحه خاطر) ده مصور اوله رق کورو یورم. بونکله برابر، شوراسنی ده خاطر لیورم که بن هنوز اون طوقوز یاشمی اکال ایتمش ایکن او، کلیولی ده وفات ایتشدی. یعنی یکریمی سکر سنه دنبری معدوم اولدوغنده ذره قدر شهیم یوقدر . مع مافیه اوکا دائر قطعی معلوماتم وار . ذاتاً معلومات تاریخیه مز هپ بو قیلدن دکلگی یا ؟ !. بونله اینانمده حقلی می یز ؟ .. حقلی ایسه ک ، آلدانمادیغمزی اثبات ایده جك دلیل نه اوله بیلیر ...؟

بوده بر مسئله در ؛ هم بو کون نحدث ایتمش دکل، پك اسکی دن بری موضوع و منظور اولان بر مسئله در ؛ [علم معلومه تعلق ایدر؛ فقط معدومه ده تعلق ایده بیلیرمی؟.

ایده مز می ؟.. معدوم بر (شی objet) می در ؟.. دکلگی در ؟.. [کیبی سوألره جواب ویره بیلیمك ایچون ، حکمای اسلام ، قرون وسطانك بر قسمی اشغال ایتمش و عاقبت فرقه لره آیرلمش لردی . واقعا اونلرک اصول تتبی و سیاق نظری و مقصدی بزمکینک عینی دکلدی !.. فقط ذهنلرینی جدأ مشغول ایدن بومشله لر بزم شو صیره ده تذکر ایتدی کمز مسئله دن - ماهیتاً - پك فرقلی دکدر . نته کیم ،

[*] ذهننرک فعالیتنده بر جوق جریانلرک (غیر مشعور inconscient) اوله رق وقوعه کلدیکنی ادعا ایدن بعضی فیلسوفلر ، بو ادعای - طبیی - تمامیه قبول ایتورلر . تفصیل ایلریده کله جکدر .

[عالم خارجي نك وجودي است شمار ايتكله اونك حقيقت ذاتيه سنه كسب اطلاع ايتش اولوب اوله مایه جغزی دوشوندورن مسئله]، اسلاف حكما نظرند (عمدة المسائل) ایدی. [حقایق الاشياء ثابتة والعلم بها متحقق] ادعاسنده بولونان، یعنی: [شو كوردو كز شيرك حقيقتی ثابتدر، اصلی فصلی واردر؛ واو سایه علم تحقق ایدر. اونلرك حقيقتی اولماسه یدی، علممزه ناصل ایتانه بیلیردك؟!]

دیمك ایسته ين اهل سنت فرقه سی، تماميله (سرویلیام هاملتن) کیي دوشونویوردی. حتی - ینه اصول و طرز تصور اعتباريله - آرده برجوق فرقلر بولونماسه رغماً (تحدس) و (استحضار) مسئله لری دخی اسلافزك و بالخاصه متفكرين عربك تماميله معلومی ایدی و جداً ذهنلرینی یورو یورایدی. (علم ضروری) و (علم نظری) مناقشاتی، بزم بوكونكي (تحدسیون) ایله (استحضاریون) ك مجادله سنه ماهیتاً بکزر؛ شكلاً اونك تماماً عینی در.

بالکز زمانمز حکماسی بو بحثلری بوسبوتون باشقه تورلو تصرف و اداره ایدیورلر.

شیمدی اصل بمخمز رجوع ایده بیلیرز.

هاملتن حافظه ایله شعورك مناسبت و فرقی طولانیسیله تحدث ایدن مشکلاتك ایچندن چيقه بيلمك ایچون (رهید) ك حافظه حقنده ویردیکي تعریضی رد ایدوب چوروتویور. (رهید):

[شعور بلا واسطه حال حاضره علممزددر. حافظه بلا واسطه ماضی به علممزددر.]

دیمشدی. هاملتن بوتعریضی طوغرو بولمادینی ایچون رد ایدیور: [کچمش بر وقعه به بلا واسطه علممز اوله ماز. بو ادعا اساساً متناقض در. بلا واسطه حاصل ایده بیلدیکمز علم، آتی در. بریشنی آتی اوله رق ادراك ایدرسه ك اونك (کندیسینی itself) بيلمش اولورز. کندیسینی بيلمك ایچون اونی (حالی actual) اوله رق یعنی شیمدی شوآنده موجود و (حاضر present) اوله رق بيلمك اقتضا ایدر. حالبوکه حافظه ليله بیلدیکمز شی کچمش بر وقعه در. حاضر دکدر. شیمدی موجود دکدر. حالی دکدر. بناءً علیه حقيقت ذاتيه سیله بیلده مز.. حافظه، بزه ینه آتی اوله رق (حال) ی بیلدیریور و بو حال واسطه سیله بز ماضی یی بیلورز. حافظه شعورك برطور دیگرده جلوه سیدر.] الی اخره .. دیور.

بوراده هان شیمدی هاملتنك بو ادعاسنی تنقید ایده جك دکلم. بالکز بو

فیلسوفك شو مسئله ده نه به اهمیت ویردیکنی وهانکی نقطه یی اساس اتخاذا ایتدیکنی کوسترمک ایچون سزه بو سوزلرینی ذکر ایتدم و بر مقدمه بحث اولسون دیه ذکر ایتدم . البته اکلامش سکزددرکه هاملتن یالکمز آنی و حالی اولان طویغور- لرمزه قطعیا اینانمقلغمزی توصیه ایدیور . یعنی بلاواسطه تحصیل ایتدیکمز بیلکی نك هر تورلو شهیدن وارسته بر (حقیقت ذاتیه *vérité essentielle*) بیان ایتدیکنی ادعا ایدیور . (ندای وجدان) یاخود (شهادت وجدان) دیدیکی بودر . بو ، بر !..

برده دیگر بر ملاحظه مهمه سی وارکه ینه (رهیدك) ك بر ادعاسنی رد ایتك مجبوری ایله بیان اولونمشدر ، و (ادراك *perception*) تعریفنه متعلق برسوزدر ؛ (رهید) ، (شعور *conscience*) ایله (ادراك) ارهسند فرقی کوردوکی ایچون تعریفلرنده او فرقی ابراز ایدیور . معلومدرکه (بیلیمك *connaître*) ، (اضافی *relatif*) در : بر (بیلن) اولمالی ؛ برده (بیلین) شی اولمالی . بیلن بزم (نفس *objet*) مزددر ؛ (بیلیمك *notre moi*) در ؛ (روحمز *notre esprit*) در . بیلین شیلر دخی بیلیمزدن غیری حس ایتدیکمز مکنوناتك جمله سیدر .

شیمدی (رهید) اویله ظن ایدیورکه کندی بیلیمزه طوغوردن طوغوریه اطلاعمز ، علممز واردر . یعنی کندی نفسمزه کسب اطلاع ایدیشمز ، (آنی و تحدسی) بر صورتده ، بلاواسطه محاکمه اولور . ایشه (شعور) بودر . حالبوکه نفسمزدن غیری نه وارسه اونلرك انجق (کیفیات و اوصاف *propriétés et qualités*) نه برآنده و تحدسی اوله رق کسب اطلاع ایده رز ، که (ادراك) دخی بودر . فقط بونکله حقیقت اشایی بیلیمش اولمایز ؛ یالکمز اشیا نك احوال و کیفیاتی اوکرتش اولورز .

او حالده (رهید) ك ادعاسنه کوره انسانك کندی نفسندن خبردار اولماسی (بالشعور) در . یعنی طوغوردن طوغوریه در ؛ حالبوکه نفسندن غیری بوتون موجوداته علمی (بالادراك) در . یعنی او موجوداتك حقایقنی دکل انجق کیفیاتی بیلیمکدن عبارتدر ، دیمك اولور .

بناءً علیه کندی وجدانمز حقنده بالشعور بر علم حاصل ایتدیکمز ایچون اونك حقیقتندن ذره قدر شبهه ایتمه مکلیمز لازم کلیر . اشایی خارجییه علممز یالکمز اونلرك خواص و کیفیات ظاهره لرینی ادراك ایده بیلیمکدن عبارت قالدینی

جهتله حقایق اشیا - حلی مطلوب - برهما اولوق در که سنه دوشر ، و (مختلف
 فيه problematique) بر مسئله شکلی آلیر. هاملتن، ف.ادی بونقطه ده کوروپور.
 شو تقدیرجه (رهید)، معرفت نفس مسئله سنده (تحدیسون intuitionniste)؛
 معرفت اشیا بختنده (استحضاریونندن représentationniste) اولوق ایجاب ایدیور.
 ترتیب ایتمش اولدوغی نظریه معرفتک، بویه ذوالوجهین اولماسی سببیه (رهید)ک
 سوزلرینی هر ایکی مذهب اربابی ده کندی طرفلرینه چکمش و کندی فلسفه لرینه
 منسوب و منتسب کوسترمک ایسته مشلردر. مثلاً (براون Brown) ، اونک
 (ادراک) حقنده کی فکرینه باقورق (رهید) ک (représentation) طرفداری
 اولدوغی ادعا ایتمش ؛ حالبوکه (هاملتن) ، اویله اولمادیغی اثبات ایده بیلیمک
 ایچون (شعور) حقنده کی ملاحظاتی دلیل کتیر مشدر . (رهید) ی تنقید ایدن
 شو ایکی فیلسوفدن هیچ برینک ادعاسی (علی الاطلاق absolutement) طوغرو
 دکلدر؛ یاخود هر برینک کندی نقطه نظرینه کوره ادعاسی (بالاضافه relativement)
 محقدر ، دهنیله بیایر . هبسی بریوله چیقار .

ایشته هاملتن ، بویه ایکی یوزلی بر (نظریه معرفت) دن خوشلانمبور ،
 و (رهید) ی اساساً کندی اعتقادینه مشارک فرض ایتدیکی ایچون یعنی اساساً
 (تحدس intuition) طرفداری اوله رق تلقی ایتدیکی ایچون - کوزه چارپان -
 تناقضلری ، بعضی پسیتولوژی خطالرینه عطف ایده رک قورتارمق و او فیلسوفی
 بوسبوتون کندی طرفه چکیمک ایستیور . [رهید ، شعوری ادراک کن غیری
 برشی اولوق اوزره تلقی ایتمش؛ اونی عادتاً بر (ملکة خصوصیه faculté spéciale)
 عد ایتمش. حالبوکه شعور، ادراکک هر نوغنده وارددر. شعورایله ادراک عینی شیدر.
 رهیدک باشلیجه خطاسی ایشته بوراده در . یوقسه سقوج مدرسه سنک بو استادی،
 او فلسفه نک روحنی جرح ایده چک بر فکر بیان ایده مز؛ او قدر کندی بیلیمز
 ومذهبنی طانیاز بر آدم دکلدر . بوتون سقوج فیلسوفلری کبی او دخی حقایق
 اشیانک ثبوتنه قائلدر؛ تحدیسوندندر!]. دیمک ایستیور؛ و بوتون غیری بودعوایی
 اثبات اوغورنده مصروفدر .

مع مافیه ، مادام که بویه برنجی درجه ده فیلسوفلر بیه نظریه معرفت ده بعضی
 مهم خطالره دوشمکدن توقی ایده میورلر ، او خالده متفکرینک آاغنی قایدیروب
 کریوه تناقضه دوشورن لرلی تعیین ایتمک ایچون، هاملتن، دوشوندوکی سویله یور .

ودیورکه : [وجدانك شهادتیه بلاقید و شرط اینامالی در ؛ اونك دیدیكنی قطعاً شبهه دوشورمه‌م‌لی در ؛ کاهیجه بویه ، کاهیجه‌ده شویله تفسیر ایتیه‌م‌لی در !] نظریه معرفت باینده فیلسوفلری بویه صیقی ومهم بر شرط ایله تقید ایدنجه ، او شرطی حقیله تعین ایتیه‌لی ؛ مبهم بر اقامالی در . یالکز [شهادت وجدانه قطعاً اعتماد ایدیکنز !] دیمك کفایت ایتیز ؛ [وجدانك شهادت ایتدیکی حقیقت ابتدائه نه در ؛ ..] اونی‌ده تصریحاً تعریف ایتیه‌لی در ؛ چونکه بو خصوصده اختلاف افکار و آرا وارد . حتی هاملتن ایله میل آره‌سنده کی اختلاف ، بالخاصه بو نقطه اساسیه‌ده واقع اولمشدر .

هاملتن ، بو جه‌نك‌ده اهمیتی لایقیله تقدیر ایتدیکی ایچون ایضاح ایتهدن کچمور :

بو خصوصده کی فکرلرنی سزه - صریح بر صورتده فقط تلخیصاً - عرض ایتك ایسترم ؛ چونکه (نیپستومولوژی) نك اساسه متعلق بر قیمتی ملاحظه‌در . عیناً و حرفیاً عثمانلیجه‌یه ترجمه‌سندن - مطلوب اولان - معنا لایقیله اکلایشله‌ماز ؛ چونکه بر چوق تعیرات و ترکیبات غریبه ایله افاده‌ مرامه مجبور اولمشدر . بو فیلسوف دیورکه :

[علم بشر اضافی‌در . بیلن انساندر اما ، بهمه‌حال بیلینن بر (شی) دخی‌اولمق کرکدر ؛ یوقسه علم تحقق ایده‌مز . ایشه (نفس مدرک) ایله (شی مدرک) آره‌سنده حاصل اولان بو نسبتبه علم دیرز . هر تورلو نسبتده اولدوغی کبی - کورویورسکنز که - بونده‌ده ایکی (حد) ، ایکی (رکن) وارد : روح و ماده ! .. بونلری یکدیگرندن آیری اولارق ادراک و استشعار ایتك ممکن اولماق‌له برابر ، ایکسینی‌ده برلشدیرمك او درجه‌ده ممشح‌در . بناءً علیه بو ایکی حدی بر برینه باغلایان رابطه دائره‌سنده اونلر ، ینه یکدیگرنه مقابیل و بر بردن آیری برر موجودیتله مشعور اولورلر . فقط ینه (شعور) ، ماهیتاً بر وعینی شیدر . یالکز شعورك تحقیق ، بویه متقابل و ممتاز ایکی رکنك صیقی صیقی به مناسبته بولونماسه محتاج و مفتقدرد . منحصرأ نفس ، کنسینی بیله‌مزدی . منحصرأ ماده بیله‌مزدی . و کندی وارلفنی‌ده حس ایده‌مزدی . شعور ، (عالم اولان نفس) ایله (معلوم اولان شی) ك تماسندن حاصل اولور ، حتی او تماسدن عبارتدر . هم ، حصول

علم ایچون هرایکینسک ده برآنده وعینی زمانده وجدانده (حضور presence) ی
 (شرط لابد condition indispensable) در. برینک دیکرینه تقدیمی ممکن دکلدر.
 هر نه قدر عالم خارجی نك تحقیق بختنده ماده نك ؛ نفسمزك نبوتی مسئله سنده
 روحك دهسا بارز بر صورتده حس اولوندینی شبهه سز ایسه ده. بونلردن هیچ
 بری شو قید اضافت خارجنده - علی الاطلاق - مشعور و معلوم اوله ماز ...
 (رهید) کندی وارلغمزی بیلشمره (شعور) دیور ؛ ماده نك موجودیتی
 بیلشمره دخی (ادراك) دیور ، وبو صورتله علمی ایکی نوعه آیریور. بو
 یا کلهشدر ؛ اولیه ایکی تورلو علم یوقدر. شعور اولسون ادراك اولسون ، همه حال
 ایکی حد متقابل و ممتاز آره سنده بر نسبت تحقق ایتمه دجه ، ممکن اوله ماز. علمد
 ایکی رکن متقابل اوزرینه مستند بولوندوغی شهبدن وارسته اولقله برابر ، حد
 ذاتنده غیر قابل انقسام بر (فعل وجدانی acte de conscience) اولدوغی ده او
 درجه ده محقق در. بیلن ذاتی ، بیلین شیدن آیریگز. بیلکی بیحو ایتش
 اولورسکز ؛ چونکه بیلکی اونلرک تماس و نسبتندن باشقه بر شی دکلدر .
 (رهید) ك تصور ایتدیکی کیبی (علم انفسی conn. subjective) ی، یعنی کندی
 وارلغمزه تعلق ایدن بیلکی بی ، (علم شیئی conn. objective) دن یعنی اشیای
 خارجه نك موجودیته دائر اولان بیلکیدن آیری بر نوع علم عد ایده جك
 اولورسه کز ، بوا یکی تورلو عامی مزج ایدوب - حقیقی معناسیله - بر (علم)
 حاصل ایتك ایچون ، شعورك فوقنده بر شعور قبول ایتمک کککز لازم کله جکدر که
 او سایه ده بو ایکی نوعی بالااضافه توحید ایده بیله سکز. حالبوکه - بك فضولی
 اوله رق - بویه وجدان فوقنده بر وجدان قبول ایتش اوله جقسکز. چونکه
 بو ایکنجی وجدان دخی برنجینسک عینی اوله حق ؛ وعینی خدمتی کوره جك !.
 یالکز شو فرق وارکه بسیط اولدوغی قدر واضح بر نظریه فلسفیه یی - بلا لزوم
 وبلا فائده - قارماقاریشیق ایده رك بك گرفت بر حاله قویدقدن صوکره قبولده مضطر
 قالمش اوله جقسکز. بناء علیه شعور دیمك بلا واسطه علم دیمکدر. بلا واسطه علم
 دیمك ده شعور دیمکدر .

ادراک شعوره مقارن اولماماسی ده ممکن اوله مایه جنی ایچون اوده شعور
 دیمکدر. مادام که نفسمزدن غیری بر طاقم شیر ادراك ایدوب طورویورز ، عالم

خارجی نك مستقلاً موجود بولونداوغنه دائر كركی كیي شعور حاصل ایتدیكمزده
دخی ذره قدر شبهه یوقدر !.]

(نظریه معرفت) بحثنده ها ملتك مقبولى اولان بو مسلكه او فیلسوف
(حقیقه طبیعه réalisme naturel) یاخود (ثنائیه طبیعه dualisme naturel)
دیور. نیچون بویه دیدیكه ده - یوقاریده نقل ایتدیكم ملاحظاتندن - قولایجه
اگلاشیلیر : برنجی تعبیر [خارجده حقیقتاً موجود بر عالمه بالطبع اینانديغمزی]
ایما ایدر. ایکنجیسی روح ایله ماده نك برآنده تماس و تقابلی ایله شعورك حاصل
اولدیفی - ضمناً - ادعا ایدر. هاملتن بو نظریه یی مدافعه خصوصنده کی غیرتیه
شهرت بولمش وفلسفه سنی اونك اوزرینه بنا ایتمشدر. مومی ایله ، بوکیفیتی ،
[یعنی (le moi) ایله برده (غیر انا le non moi) نك صحنه شعورده برآنده
جلوه كر اولماسی] تماماً و عیناً قبول ایتلی در !.. دیور ؛ نظرنده ایلک (حقیقت
وجدانیه vérité de conscience) بودر. حالبوكه بو (شهادت وجدانیه) یی عیناً
قبول ایتیب - کیفرینه كوره تعدیلاته اوغراتدقلرندن وكندی نظریه لرینی
تصویب ایدهك صورتده تفسیر ایتدكلرندن طولای فیلسوفلك اكثریتندن
شكایت ایدیور. اونلك یا كیلدقلرنی اگلائیور .

بناء علیه - بو حقیقت وجدانیه یی عیناً و تماماً قبول و تسلیم ایتدكلرینه كوره
- فیلسوفلری اول امرده ایکی بیوك صنفه تقسیم ایدیور . وجدانك شهادت
واقعه سی بر (حادثه حالیه phénomène actuel) اولق اعتباریه قطعاً رد وانكار
ایدیله مزسده ، وارلق مسئله سنه تعلق حسیله - اوندن چیقاریله ییله ك (معنا
signification) یی تشکیل ایدوب تورلو تورلو تفسیرلره الویریشلی برشكه صوفق
ممکن اوله بیلدیكى ایچون هاملتن ، بو نقطه یه زیاده سیله اهمیت وریور . شوآنده
وجدانده حس ایتدیكم احواله قارشى شبههیه دوشمك حقلی ومشروع بروضعیت
ذهنه دكلدر . بو امنیت ، بو اطمینان ، (حالی actuel) اولان اوکیفیت
وجدانیه نك ذاته عاؤدر. اوندن اوته سنه و ماعداسنه تعلق ایده مز. مثلاً : بن
قارشیمده بوغاز ایچی دكیزینی واوته کی ساحلده كائن وانی کوی کورو یورم. شو
کوردوكم شیلری انكار ایتك ویاخود شبههیه دوشورمك ممکن دكلدر. چونكه
طوغرو دكلدر. شو یارادیلشمزه كوره (اجهزه حسیه appareil des sens) مزك
ادراكاتی بودر ؛ اونلر - سالم اولق شرطیه - قطعاً وقاطبه شایان اعتماددرلر.

(بلا قید و شرط inconditionnellement) اونلرک سؤیله دکلرینه اینانه بیلیرز و اینانمالی یز. لکن بوکا اینانمقله برابر معنالننده شبهه ایده بیلیرز ؛ مثلاً : [شو کوردکلرمنز بلکه بوتون خیالدر! حواسمزک (شعبده illusion) سی در!] یا خود : [بزقار شیمزده بر ده کیز و اوته یا قاده نه ولر و آغاچلر دیدیکمز بعض شیلر کورو یورز ؛ کرچه کوردو کز بوشیلرده ذره قدر شبهه یه محل یوق ، اما عجیبا بوتون او شیلر - حد ذاتنده en soi دخی - کوردو کز کی می در ؟] ده بهرک بداهت وجدانیه نک ماهیتی تشکیک ایده بیلیرز. چونکه حادثه وجدانیه نک انجق کنیدیسی بدیهی در. معناسی و تعاماتی دکل !!.

هاملتن بوجهتلری لایقوله دوشوندکن صوکره (حافظه la mémoire) ایله (غیله l'imagination) نک بو خصوصده هرشیدن زیاده ذهنی شبهه یه القایده جکی اختطار ایده رک اونلره متعلق مثاللر کتیریور :

[مثلاً - هیچ تناقضه دوشمه دن - *] ادعا و یا خود فرض اولونه بیلیرکه حافظه یه تعلق ایدن بر (حادثه ماضیه) حال حاضره دأر اولان شعور مزده (مضمون impliquè) در. بناء علیه بر شعبده در. شعور مزله مناسبتی اولان برشی مجهولک - او نسبت وجدانیه خارجنده - حقیقی یوقدر. خلاصه ، روح و ماده حقنده بوتون معلوما تیز - اصلی فصلی اولمایان - (طاقم طاقم ظواهر faisceaux d'apparences) ی ادراک ایده بیلیمکن عبارتدر ؛ ده به بیلیرز. وجدانمزک شهادتیه موجودیتدن خبردار اولدو غمز حادثاتک (حقیقت جوهریه - réaltié substantielle) سنی انکار ایدن بو عقیده فلسفیه یه (لیسیه - nihilisme) ده نیلیر . [دیور ، واکلا یورسکزکه انجق بو خصوصده شبهه یه مساع اولنه بیله جکی قبول و اعتراف ایتش اولویور . صوکره ؛ کرک (انا) نک کرکسه (غیر انا) نک تظاهراتنه (یعنی کرک حادثات روحیه و کرکسه حادثات مادییه !) ، سبب اولق اوزره بز حقیقت جوهریه نک وجودنی تسلیم ایده بیلیمک ایچون (یعنی روح و ماده مستقلاً موجوددر ده به بیلیمک ایچون !) ذهنه (صلاحیت لازمه autorité nécessaire) و یروب و یرمه دکلرینه کوره فیلسوفلری ایکی بویوک صنفه آیریور: برینه (جوهریون substatcialistes) دیکرینه (لاجوهریون non-substantialistes) دیور . برنجی صنف اربابی حادثاتی ، یالکیز بر کیفیت وجدانیسه اوله رق تلقی ایدوبده اونلرک ضممنده کرک [*] یعنی (بداهت وجدانیه یی انکاره مجبور اوله دن !) دیمک ایستر .

ماده و کرکسه روح نامنه هیچ بر حقیقت جوهریه اولمادیغنی ادعا ایدنلردر . بز
بو نظریه معرفته علی العاده (حادیه phénoménisme) دیرز . ایکنجی صنف
فلسوفلری ده تماماً عکسنه قائل اولانلردر . یعنی حادثات انفسیه یی بر جوهر روحه ،
شئونات آفاقیه یی ده بر جوهر ماده یه اسناد ایدنلردر .

(عقیده لیسیه la doctrine nihiliste) ، جوهریتی انکار اساسنه مستند اولدوغی
ایچون — مابعد الطبیعیات بحثنده — بوتون ادعاسی منفی (négatif) اولوب قالیور
واوندن طولانی بر (فلسفه سیستمی) تشکیل ایده میور . بناءً علیه اونی بوم بحثنده
اهمال ایده بیلیرز .

شیمدی یالکز (حقیقیون les réalistes) یاخود تعبیر دیگرله (جوهریون
les substantialistes) صنفی تتبع ایتک قالیور . بونلر هرتورلو حادثاتی بر جوهر
مستقله اسناد ایتک دعوا سنده بولونقلری ایچون بو خصوصه کی فکر و اعتقاد لرینی
بر نظریه مخصوصه صورتنده اورطه یه قویق مجبوریتدن قورتوله میورلر . بونلرک
نظریاتی هرشیدن زیاده بر مسئله دن متأثر اولویورک اوناک اهمیت و ماهیتی
حقنده — شیمدی یه دکی — لزومی قدر ایضاحات ویرمش ایدم . اوده [حادیه ایله
برابر جوهریت اعتقادینک بر آنده وجدانه سانخ اولوب اولمماسی مسئله سی] در .
یعنی کرک انفسی و کرک آفاقی اوله رق استشعار ایده بیلدیکمز حادثات کبی جوهر
حادثاتک دخی (حالی actuel) اوله رق ادراک اولونوب اولونمادیغنی کس دیرمک
مسئله سیدر .

معلومدرک حادثاتی بر جوهر اساسی یه اسناد ایتک ایکی صورته ممکن اوله بیلیر؛
مثلاً: بن قورشون قلمنی آچارکن الیمی کس یور ییورم . بوراده چاقی ایله قورشون
قلمی یونتمق و یا کشلقله الیمی کسمک آفاقی بر سلسله حادثاتدر . الیمک آجیسنی
طویقمده انفسی بر حادیه در . کرک خارجه ، کرک کندی نفسمده طویدرغم
حادثاتک وقوعنده شهیم یوق . وجدانم اوکا شهادت ایدیور ، وبوقدری کافی !!
لکن [عینی زمانده چاقی نک و قلمک ماده سنی ده در حال ادراک ایدیورم ؛ نته کیم
جانمک آجید یغنی ده در حال کندی بنلکمله برابر طویویورم ؛] دیمک باشقندر ؛
[چاقی وقورشون قلمی نامنه بر شیلر حس ایدیورم ؛ بونلرده بعضی (خواص
آفاقیه propriétés objectives) یه منجر اولویور . او خواص و کیفیات ، مطلقاً
بر (شی objet) ک خواصی اولمق کرکدر . نته کیم آجی حس ایدیورم ؛ او

حاله بر (حادثه الم) وار، برده اونی حس ایدن بر (بن le mol) اولمالی !. دیمکده باشقهدر .

برنجی ادعا (ادراک آنی perception immédiate) اوزرینه مؤسس اولدوغی ایچون بلاواسطه محاکمه - یعنی حالی اوله رق - حاصل اولمش بر (علم ضروری connaissance intuitive) صاییلیر. حالبوکه ایکنجیسی یالکیز حادثاتی آنی اوله رق ادراک ایتدکدن صوکره اونلرک بر جوهریتی متضمن اولمالری لزومی - انجق محاکمه واستدلال raisonnement, inférence - بسایه سنده فهم وجزم ایدمیلدیکنه قناعت کتیردیکندن طولایی بر (علم استحضاری connaissance représentative) نمونه سی اوله بیلیر .

• (فلاسفه لیسیه les philosophes nihilistes) جوهریت حادثاتی انکار ایدوب مابعد الطبیعیات مسائلی ایله علاقه بی کسدکلرندن طولایی میدان مناقشه بی - بالطبع - جوهریون فرقه سنه براقش اولویورلر . بونلر البته حادثاتک ضمنتده بر جوهریت مستقله، بر حقیقت ذاتیه اولدوغنه اظهار قناعت ایتدکلرندن طولایی - شونقظه اساسیه ده - رأی واعتقادجه متفق درلر. یالکیز حقیقت ذاتیه نک طوغرودن طوغروییه شهادت وجدانیه ایله می...؟ یوقسه استدلال و محاکمه طولاییسیله می ادراک اولوندوغنده اختلافاته دوشویورلر . اونک ایچون مناقشات فلسفیه لر یالکیز بومسئله مخصوصه اطرافنده دوران ایدیورلر .

بوندن ماعدا (جوهریون) آره سنده مختلف فیله اولان بر مسئله اساسیه ده ا وار : جوهره اینانقله ایش بیتیمور !.. چونکه یابر ، یاخود ایکی جوهر قبول ایتک ممکندر . برتک جوهر قبول ایدنلره ، هاملتن (وحدتیون les monistes)، یاخود (وحدانیون les unitariens) نامنی ویریور. مع مافیله بونام آلتندیکدیگرینه تماماً ضد، ایکی اعتقاد اوله بیلیر: یکانه جوهر مستقل (ماده la matière) در !.. دیمکده ممکندر . یکانه حقیقت ذاتیه (روح l'esprit) در !.. دیمکده ممکندر. برنجی ادعا اربابی (فلاسفه مادیون les matérialistes) در . بونلر ، عالمده مستقلاً موجود اوله رق یالکیز بر جوهر مادی قبول ایدیورلر . عقل و روحی (یعنی انانی) اونک اثری و نتیجه سی اولمق اوزره تلقی ایدیورلر . ایکنجی ادعا طرفدارلری - بالعکس - روحک یکانه موجودیت مستقله اولدوغنه اینانیورلر . ماده بی اونک اثری و نتیجه سی اولمق اوزره تلقی ایدیورلر . یعنی

ماده - حد ذاتنده - موجود بر شی دکلدر ، روحك - تصوراً - اثبات و ابداع
ابتدیی بر فکدر دیورلر . بونلری ، هاملتن ، (افکاربون les idéalistes)
نامیله یاد ایدیور . بز بونلره - علی العاده - (روحبون les spiritualistes)
دیرز ، و (اید آلیستلر) ایله آزیحق آره لرنده فرق بولورز .

بونلردن ماعدا براوچونجی صنفده واردرکه (انا) ایله (غیرانا) نك یعنی
روح ایله ماده نك ایکیسینده (متعال transcendente) بر حقیقتك مختلف جلوه -
لری اولمق اوزره تنقی ایلور . هاملته کوره : [عینیت مطلقه l'identité absolue]
عقیده سی ایشته بودر . فلاسفه متأخرین میاننده بو اعتقادك اك مشهور (منللری
les représentants) ده (شلینگ Schelling) ، (هگل Hegel) و (قوزن
Cousin) در . [بونلر دخی (مونیسٹ) در ؛ حقیله و حدانیون بونلر اولمق
کرکدر .

دیگر بر فرقه فلاسفه وارکه سائرلردن زیاده هاملتنك مؤآخذات و تنقیدات
شدیده سنه هدف اولدوغی ایچون شایان دقتدر . بونلر روح وماده نك برابر و قیمتجه
مساوی اولدوغی تسلیم ایدیورلر ؛ [*] ماهیتاً آیری غیری شیلر اولدوغنه دخی
قائلدرلر . یعنی (ثنائیون dualistes) دندرلر ، یالکیز ، کرک روحك و کرکسه
ماده نك بلاواسطه ادراك اولونه بیلمه سی احتمالی رد ایدیورلر . هاملتنك بو فرقه
حقنده کی مطالعاتی - کمال اهمیتدن ناشی - سزه لایقيله آکلاتمالیم :

بوفیلسوف ، بالذات (ثنائیه طبیعیه) مذهبك بویوک طرفداری و اك قوتلی
مدافعی اولدوغی حاده دیگر صنفی تشکیل ایدن ثنائیونك اك شدتلی رقیبی و
منقیدی در . بو وضعی غریب کورونور ؛ فقط سببی صریح و آشکاردر : (بر امر
وجدانی fait de conscience) نك ، یعنی قیصه جه (شعور) ك همه حال ایکی
رکن مشترک و متقابل ایله حاصل اوله بیلمه سی دستور اساسی اولمق اوزره وضع
وقبول ایدنلره - علی الاطلاق - (ثنائیون dualistes) دیورز . بونلر نظرند
شعور ، همه حال (بیان بر روح) ایله (بیلن برشی) ك تماس و تقابلی سایه سنده

[*] هاملتن بوراده (égalité simultanée) ترکیبی قوللامشدرکه عیناً لسانزه
ترجه سندن صریح بر معنا چیفماز . بو تعبیر ایله مؤلف شوی مراد ایدیور : [او فرقه
اربابی نظرند روحك کندینی بیلمه سی ، عینی زمانده ماده نك ادراك اولونماسنه مفتردر .
اضافت علمیه ده بوایکی رکن اصلی نك قیمتی مساویدر .] دیمك ایستور .

نمکندر. فقط - بوکون آرتق - شبه قالمشدر که بزم بوتون معلوماًمز ، ماهیتاً (انفسی) در. بزم المده طوتوب قوللانديغ قلم حقنده بيله بيلديکم شيرك جمله سی برطاقم (کیفیات جسمانيه propriétés corporelles) دن عبارتدر. اولری ده تحلیل ایدم جک اولسمم ، کندی محسوساته منجر اولویور. شبه یوقدر که بزم محسوسات ذاتیم (حقایق اشیا) دکلدرد. بویچی کتابمژک ایکنجی بابنده لایقيله شرح وایضاح ایتشدم .

او حالده هر فیلسوف - هانکی مذهبه منسوب بولونورسه بولونسون - بونی بویله جه قبول ایتکده مضطر قاله جقدر. چونکه بو ، بر فرضیه فلسفیه دکل ، بر (حقیقت علمیّه vérité scientifique) در . بستیقولوزی اويله اولدوغنی اثبات ایدیور ؛ وفی الحقیقه هر فیلسوف دخی بو حقیقتی - اول امرده - تسلیم ایتک مجبوریتده بولونویور. لکن - بزی بربریمزه دوشورن - بوجتین بحثک ایچندن چیقهبیلیمک ایچون بوقدری کفایت ایتیمور ؛ چونکه بستیقولوزی نک بو مسئله غامضه حقنده ویردیکی حکمه باقیلیرسه کندی حسیاتمزدن باشقه برشی بیلمدیکمزی تسلیم واعتراف ایتک لازم کلیور . مثلاً : قوللانديغ قلم حقنده کی معلوماتم اونک کیفیاتندن عبارت ایسه ، کیفیات مذکورده دخی بزم کندی محسوساتمدن باشقه برشیلر دکلسه ، بن - قلم نامه ! - کندی طویغولرمدن باشقه برشی بیلیمورم ، دیمک چیقار. اويله اولونجه خارجده بر (ماده) نک ، فرضا او (قلم) ک مستقلاً موجود بولوندوغنه ناصل اینانه بیلیمورم ؛ چونکه (حسبانئون sceptiques) دن دکلسم صحیحاً اینانیورم ، دیمکدر ! اويله ایسه بوجزم واطمئنان بکا نره دن کلیور ؟ .. عجبا قلمی الیه آلیر الماز ، اونک - عالم خارجیده - مستقلاً موجودیتی خواص وکیفیاتيله برابر برآندمی درک ویتقن ایدیورم ؟ ... یوقسه اول امرده و برآنده درک ایدم بیلدیکم اونک انجق خواص وکیفیاتی درده ، صوکره بالاستدلال ماده سنک موجودیتته می حکم ایدیورم ؟ ... [*]

بویکی تورلو دوشونجه - شبه یوق که - بربرندن چوق فرقلی در . حالبوکه

[*] بوملاحظات فلسفیه کتابمژک ایکنجی بابنده اطرافیه بسط اولنوب اینجه دن اینجه تنقید ایدلشدی . بوضریح افاداتم - مختصر اولدوغندن طولانی - قارئینک ذهنتی تمامیه اشباع ایتیمه جک اولورسه ، تکرار ایکنجی بابیه برکوز کزدیرمه لرینی افندیلره توصیه ایدم . اووقت آکلیایه مایه جفیری برنقطه قالمز صانیرم .

ایکسینده دخی عمده، (ثنائیه) اعتقادیدر. فقط برنجیسی مادهیه دائر ایدیندیکمز علمی (تحدسی intuitif) برصورتده تعریف ایدیور. [ماده نك وجودی - خواص و کیفیاتیه برابر - بلاواسطه محاکمه، درك وتیقن ایدیورز؛] دیمك ایستور. ایشته هاملتن بو اعتقاده در، و (ثنائیه طبیعیه) مذهبی دیدیکی بودر. حالوکه ایکنجیسی هم بیلن برروح، همد (ولوکه اشیانك کیفیاتی ویاخود اورو حك كندی محسوساتی اولسون!) بیلن بر (شیء) ك تماس و تقابلی ایه حصول علمی تعریف ایتدیک ایچون، ینه (ثنائیه) مذهبی صاییلیر. لکن ماده نك وجودینه انجق - محاکمه واسطه سیله - بالاستدلال حکم ایده بیلدیکندن طولای، اوتوکی ادعادن چوق فرقلی در. هله، حقیقتك یالکز (حالی actuel) اوله بیله جکنه دائر فیلسوفلرجه عموماً مسلم اولان ظنك اهمیتی دوشونولورسه دهنیله بیلیرکه بویکی نظریه معرفت - عینی اساسه استناد ایتمکه برابر - اك مهم نقطه ده یکدیگرینه شدته معارض وطابان طابانه ضددر. هاملتن، ایشته بو عقیده طرفدارانه (dualistes hypothétiques) و یاخود (idéalists cosmologiques) نامی ویریور؛ فلسفه ده ابطال ایتك ایسته دیک (نظریه معرفت) بالخاصه بودر. اونك ایچون بو فرقه اربانه سائرلرندن زیاده شدته تعریض ایدیور.

البته کوروب آکلیورسکزرکه بو نقطه ده اختلافاتی موجب اولان باشلیجه مسئله ینه شهادت وجدانییه متعلق بر دعوادر. او شهادتك شمول حکمی تعیین ایچون ایکی فرقه نك چیزدیکي حدود، بر دکل، دیمك جیقپور. دائماً ایچنده یاشادیغ حال تماسده بولوندوغم، کوردوكم بوتون شو اشیا و مناظرک (صحیح) اولدوغنه وجدانم شهادت ایدیور؛ چونکه اونلری - بلا محاکمه - تلقی ایدیورم؛ ایشته [شو بنم کوردوكم (منظره) صحیحدر] دیمك برحکم وجدانی در. فقط بو حکمك دائره شمولی او منظره خارچنده قالان بعض مسائلی ده احاطه ایده بیلورمی؟. ایده میورمی؟.. مثلاً [شو کوردوكم منظره صحیحدر!] دیمکه [او منظره نك البت حقیقی واردر!] ویاخود [نفس الامر، مطابق ده محقق در!]

دیه حکم ایتش اولورمی؟.. اولورسه هم بو درجه لره قدر تشمیل حکم ایتك منطقاً مشروع، یعنی حقلی اوله بیلیرمی؟.. اوله مادی نی تقدیرده ناصل اولوبورده، یالکز او منظره نك صحنه حکم ایتمکه، حقیقت ماده یسه دخی قناعت حاصل ایتش بولونوبورم؟

بومرحله فکریه ده بزی قارشیلایان اک مهم مسئله بودر .

هاملتن کوزینی اچقله منظره کائناتک صحنه وعینی زمانده حقیقته قانع اولدوغنی ادعا ایدیور . دیمک که وجدانک حکمنی یالکز صحت معرفته حصر ایتمک ایله قالمیور ؛ وارلق مسئله سنه دخی تشمیل ایدیور ؛ فرضا : [شو کوردو کم (آغاچ صورتی) شعبده و خیال دکل ، صحیحدر . واقع بر (امر وجدانی fait de conscience) . لکن وجدانمک شهادتی یالکز بو قدرله قالمیور ؛ عالم خارجی ده دخی - آغاچ نامه - مادی بر شینک فی الحال استقلال وجودینی قطعاً اثبات ایدیور . اوپله که کوزومی قاپادینم زمان ، او آغاچک کندینسی کورمبورسه مده ، خارجه وار اولدوغنه ذره قدر شبهه ایتیمورم چونکه منظره سنی کورمکله وجودینه حکم ایتمک عینی زمانده وجدانمک شهادتی ایله واقع اولمیور . بناءً علیه ، آغاچک شکله باقار ، استقلال وجودینی - بالحاکه - استدلال ایتش اولمیورم . وارلغه همان او آنده قناعت کنیروب - حکم ایتش اولمیورم . [دیمک ایستور که شوقدیرجه وجود کائنات و حقیقت اشیا ، اوزون اوزادی به محاکات و استدالات ایله اثبات اولونمغه محتاج بر فرضیه دکل ، کوزینی آچقله ، انسانک در حال تسلیمه مجبور قاله جنی بر (حقیقت بدیهیه) اولمش اولور .

(تحدیسیه intuitionisme) فلسفه سنک دستوراساسینسی تشکیل ایدن بوادعاده شهادت وجدانیه نك حکمی (وارلق مسئله سنی la question de l'être) محیط اوله جق قدر شامل و اونی کسوب آته جق قدرده قطعی در . حالبوکه (dualistes) ثنائیون) ک دیگر شعبه سنی تمثیل ایدنلر شهادت وجدانیه نك حکمنی یالکز (صور عامیه) یه حصر و قصر ایتمکله قالمیورلر . مثلاً : [بن کوزومی آچینجه بر منظره کورویورم ؛ فرضا بر آغاچ شکلنی کورویورم . وجدانمک بوخصوصده کی شهادتندن ده اصلاشه ایتیمورم . البت کوردو کم (صحیح) در ، شعبده دکلدر . لکن شهادت وجدانیه نك حکمی بوندن ایلری کیده مز . یالکز بوسورت علمیه نك ، بو حالت انفسیه نك صحنی تصدیق ایتمکدن عبارت قالیر . حالبوکه بنم ادراک ایتدیکم بر طاقم صور محبوسه دن جوهریت مادییه آطالیویوروبده : (شوشکلک خارجه بر حقیقت مادییه سی واردر !) ده یه بیلیمک طوغرو دکلدر . چونکه آرده اوپله بر اوچوروم واردر که محاکمه مز آطالیوب کچم یورز ؛ فقط بالاستدلال حکم ایدیورز . بزده حاصل اولان ادراکاتک بهمه حال بر سبی اولماسی لازمکله چکنه

اینانیورز؛ و او سببی خارجده فرض ایدەرك بر حکم ویریورز. بناءً علیه
 (صورت حسیه forme sensible) دن (حقیقت مادیه réalité matérielle) یه .
 انتقال ایدە بیلەك ایچون - مسلسل متصل - بر سورو محاکات یوروتمش
 اولویورز. واقعا آغاجك - شبكه عینه مزده مرتسم اولان - خیالنه قدر
 اینانیورسەق، خارجده مادتا موجود اولدوغنده اوقدر اینانیورز. كرك كندی
 ادراكات حسیه مزه كركسه حقیقت اشیا یه اعتقاد مزده ذره قدر شبه یوقدر.
 یالکز هاملتەك منسوب اولدوغی (ثنائیه طبیعیه dualisme naturaliste)
 اوبانك عقیده سندن بزمکینك شو قدر بر فرقی وارکه اونلر حکم وجدانی یی -
 بغیر حق - مسئله وجوده دخی تشمیل ایدیورلر، و [رشیک صورت محسوسه سنی
 ادراك ایتکله وجود مادیسنی دخی - بر آنده - تیقن ایتش اولورز،] دیورلر.
 حالبوکه بز یالکز او شیک صورت محسوسه سنی درحال ادراك ایتدیكمزدن
 امیز؛ خارجده مستقلاً و مادتا موجود اولدوغنه انجق بالاستدلال حکم
 ایدە بیلدیكمزه قانعز !.]

دیمك ایستیورلر .

بوفرقة اربانك شو ادعاسنه بافیلیرسه، هاملتەك ایجاد ووضع ایتش اولدوغی
 تعبیرلر بك بلیغ کورونور؛ چونکه ایکی کله ایله فرقه مذکورەك عقیده اساسیه سنی
 ایما ایدیور؛ (cosmothétique) کله سی (قوزموس - cosmos) ایله (تئسیس
 thésis) لغتلرندن مرکبدر. بوتعبیر، کائناتك وجودینی بر (حقیقت بدیهیه) اوله رق
 قبول ایتیموب (اثباتی مطلوب بر مدعا une thèse à démontrer) کیی تلقی ایدن
 فیاسوفلر ایچون بك یرنده قولالانش و موافق دوشمشدر . چونکه بومفکرلر لك
 ظننه کوره انسان، کندیسنی احاطه ایدن کائنات ایله دكل، انجق کندی تأثیراتیه،
 کندی حالات روحیه سیله - طوغرودن طوغرویه - مناسبتده بولنه بیلور .
 بناءً علیه یالکز اونلر حقنده - بلاواسطه - شعور حاصل ایدە بیلور . اوحالده
 اونلر نظرندە حقیقت، یالکز او (احساسات حالیه sensations actuelles) در.
 بونلر ماهیتاً انفسی برطاقم حادثاتدرکه (علت موجه cause déterminante) لری
 عالم خارجی ده اولمق کرکدر. ایشه انجق بو (علاقه سیبیت relation de causalité)
 طولایسیله ذهن، عالم خارجی نك وجودینه انتقال ایدە بیلور و بویه بر استدلال
 سایه سنده کائناتك وار اولدوغنه دخی قناعت کتیزیور .

اگر - براز اول ایضاح ایندیکم وجهله - بزجه بدیهی اولان حقیقت، یالکر
 - (حالی actuel) اولان طویغولرمز ایسه، کائنات وارانی بدیهی بر حقیقت کیی
 قبول ایده مه یز؛ زیرا طوغورودن طوغورویه ودر حال استشعار ایده بیلدیگمز شی
 او دکلدر؛ کندی حسیاتمزدرا حسیاتمزه خارجده برسبب کوسترمک ضروریتله
 کائناتک وجودینی اثبات ایتمک ایستیورز؛ اوحالده کائنات، بدیهی برشی کیی دکل،
 اثباتی مطلوب برمدما کیی ذهنمزی اشغال ایدیور دیمکدر .

ایشته (cosmothétique) کله می بوتون بوملاحظاتی ایماواخطار ایتدیکی ایچون
 اینی برتمیر اصطلاحی در. هاملتن بونکله برابر (ایده آلیست) لفظنی دخی قوللانیور.
 بوکاده سبب، او فیلسوفلرک، (مدرکات perceptions) ی ماهیتاً انفسی اوله رق
 تاقی ایتملریدر. بو کله یه بدل (subjectiviste) دیسه ایدی ده ا اینی اولوردی .
 (ایده آلیست) بر آز فرقلیدر. بن او فرقی مهم اساسلر اوزرینه بنا ایدوب
 کوستره جکم .

شیمدی، ویردیکم ایضاحاتی تاختیص ایدرسبم لایقوله تین ایدرکه
 (dualisme hypothétique) ایله (idéisme cosmothétique)، عینی اعتقاد
 فلسفنیک ایکی مختلف اسمی ایش. بر چوق فیلسوفلرک (استحضاریه
 representationisme) دیدیکی مذهب ینه بودر. مع مافیه، هاملتن بونلره دخی
 (ثنائون dualistes) دیدیکی ایچون، دیگر ثنائون طیبعوندن [یعنی کندیسنک
 بالذات منسوب بولوندوغی فرقه دن !] اونلری تقریق ایدوب التباسه میدان
 ویرمه مک غیریتله بو ایکی فرقه یه دائر خیلی ایضاحات ویریور. بن اونی خلاصه
 سزلره نقل ایدیورم؛ هاملتن دییورکه :

[اوت !. بو فرقلرک ایکیسی ده ثنائوننددر؛ چونکه هر ایکیسی ده حصول
 شعور ایچون ایکی رکن قبول ایدیور : ماده وروحک استقلالنی، وطبیعتاً آیری
 غیری شیلر اولدوغنی تسلیم و بکدیگریله برآنده تقابل و تماس ایتملری شرطیله
 بزده بر (علم شعوری) حصوله کلدیگنی ادعا ایدیور. فقط (ثنائیه طبیعیه)
 مذهبک (ثنائیه فرضیه) ویاخود - تعیردیگرله - [*] (idéisme cosmothétique)

[*] بوترکیک عثمانلیجه یه عیناً ترجمه سی بک کوچدر. (کائناتک وجودینی) محتاج اثبات
 بر مدما (اولوق اوزره تلقی ایدن ایده آلیستلر) دیمکدر. بز بوقدر لاقیردی یی ایکی کله
 ایله سوبلیه مه یز .

مذهبندن اك مهم فرقى شونده دركه ، برنجى فرقه اربابى بر (كائنات ماديه univers matériel) ، برده (كائنات انفسيه un. spirituel) اثبات ايتمكه برابر ، بو ايكي عالمك وجودىنى - (بالتحدس par intuition) - ادراك ايتمكه بولوندىلرينه قطعياً قائمدرلر. حالبوكه ايكنجى طرفدارلرى ادما ايدىيورلر كه كرك عالم آفاقى ، كركسه عالم انفسى نك وجودىنى انجق بالاستدلال وبالواسطه درك واثبات ايتك ممكن اوله بيلير .!

ديمك كه ثنائيه تعبيرينه عيى درجده صالح ومستحق اولان بو ايكي مذهب فلسفى آره سنده اك مهم وسيله منازعه : روح و ماده نك موجوديت مستقله لرى حقنده حاصل ايتديكمز قناعتك بر (نتيجه استدلال la conséquence d'un raisonnement) اولوب اولماماسى مسئله سى در. يعنى عالمك وارلقنه دائر اولان علممذك (حالى actuel) مى ؟ . يوقسه (كسبى acquis) مى ؟ اولديغنى تعيين ايتك مسئله سى در. او حالده :

كائناتك استقلال وجودىنى تسليم ايتك ، يعنى شو كوردوكمز ، طوتدوغمز شيلرك صحيحاً وار اولدوغنه قناعت ايتك بر علم دركه هر ايكي فرقه دخى قبول ايدىيور . آره ده كى اختلاف او قناعتك ، يالكز صورت حصولنده در . فقط بو فرقى بك كوچوك كورمه مى در ؛ بناء عليه اهميتسز طن ايتمه مى در. اكر ، كندى (ادراكات perceptions) و (حسيات sentiments) مزه شعور حاصل ايدر ايتز - بلا تأمل وبلا حاكمه - كرك روحك ، كرك ماده نك وار اولدوغنه دائر ده جازم بر علم و قطعى بر قناعت پيدا ايدىيور يورسوق ، يالكز كندى ادراكات مزله دكل ، ماده ايله ده - طوغرودن طوغرويه تماسده بولونه بيلير ايتمز ، ديمكدر . بويله طوغرودن طوغرويه تماس ايدم بيلديكمز بر شينك حقيقتنده واقف وطارف اولدوغمزى ادعا دن چكينميه بيليورزكه (علم يقين connais. certaine) بو ديمكدر . يوق ، اويله اولمايوده ايلك لمعه شعور ايله كوروب ادراك ايدم بيلديكمز شيلر يالكز كندى احوال انفسيه مز ايسه و احوال مذكوره يه - همه حال - بر سبب دوشونمك مجبوريتى ايله روح و ماده نامنه بر شيلر تصور ايدوب اونلرك برينه خارجه ده ، ديكرينه دخى باطنده وجود و يرييورسوق ، بزجه اصل و حقيقتى تماماً مجهول ، فقط فرض اولونماسى ضرورى اولان بر سببه اسم طاقه رق (روح) و يا خود (ماده) ديمش اولويورز ! او حالده (جوهريت substantialité) مسئله سى

(مبدأ علیت (principe de causalité) اقتضاسندن طوغمش بر (فرضیه (hypothèse) دن عبارت اولوق در کله رینه اینور : (ماده) کله سی مدرکات خارجیه من ایچون وجودینی فرض ایتکه مجبور بولوندوغمر (سبب مفروض (cause supposée) ک اسمی اولمش اولویور. (روح) کله سی ده (مدرکات صمیمیه (perceptions intimes) من ایچون وجودینی فرض ایتکدن قورتوله مادیغمر، دیگر بر سبب مفروضک اسمی اولویور. بویه اولونجه اولنرک حقیقه- هیچ بروجه- ادعای وقوف ایده مه یز؛ چونکه - بو ملاحظات فلسفیه ایله - اعتراف ایتش اولویورزکه - اصلی فصلانی بیلیمه یرک - وجودینی فرض ایتکه مجبور قالدیغمر ایکی تورلو اسبابه بر اسم طاققدن باشقا برشی یا بامامشزدر .

ایشته بو سببله ، هاملتن شو اعتقادده بولونان فیلسوفلره (ثنائیون فرضیون Dualistes hypothétiques) نامنی ویرمش و تعیر اصطلاحی ایجادنده اصابت ایتشدر . طبیعی درکه بویه دوشونلر نظرند کائناتک وارانی بر (حقیقت بدیهیه) قیمتی حائر دکلدرد . حالبوکه هاملتن وامثالی نظرند اوله در . ایشته اونک ایچوندرکه هاملتن بوفرقه یه شدتله تعریض ایدرکن اعتقادلرینی استخفافه قدر بیلله وارییور: [وجدانمز ، بزه ماده نك وجودینی بلاواسطه محاکمه بیلدیردیکی حالده بو فیلسوفلر ، (یعنی ثنائیه فرضیه طرفدارلری !) وجدانک بو خصوصده صدق شهادتی انکار ایدیورلر ؛ (یعنی کائنات مادیه یی تجدسی اوله رق استشعار ایدیورم ، ده ین وجدانک شو شهادتنه اینانیمورلر !) صوکره مجهول بر (عالم مادی) نک موجودیتی- اوزون اوزادییه- استدالات و فرضیات ایله اثباته چالشیورلر !] دییور؛ و [بدهت عالمی، کوزا وکنده طوران برشیئی انکار ایتدکن صوکره، اونک وجودینی عقلاً تکرار اثبات ایده بیلیمک ایچون- طولامباچلی یوللره صاپوب - بیک تورلو زحمتلر اختیار ایدیورلر . حاصلی تحصیل ایچون ، بوصورتله ذهن یورمق واشکنجه یه کیرمک زوزکلك دکلدده ندر ؟] دیمک ایستیور . [*]

فلاسفه متأخرین و معاصرینک قسم کلی سنی - هاملتن - بو صنفه ادخال

[*] هاملتنک استخفا فکارانه بر اسلوب ایله بیان ایتش اولدوغی شوملاحظه پک معقول و منطقی کوروندوکی حالده پکده اوله دکلدرد . (جون ستوته میل) اونی تنقید ایتش ونه کیبی یا ککش دوشونجه لره مستند اولدوغی کوسترمشدر . بنده هاملتنک علیهندیم . کله جک بابلرده (اسباب علم (moyens de conn. دن بحث ایدرکن لایقیله ایضاحات ویره جکم .

ایدیور، واوتن بری ایضاح اولوندوغنه کوره بونلرک - (نظریه معرفت (théorie de la connaissance) بحثنده - (بالواسطه ادراک (perception médiate) یعنی (علم استحضاری (connaissance représentative) طرفداری اولدقلری صراحتاً کوستریورکه پک طوغرودر .

مع مافیه (استحضاریون (les représentationistes) که نظریه اساسیه سی بعضی تبدلاته مستعددر؛ چونکه (استحضار) دیدیکمز عملیه ذهنیه نك وقوعی بر قاج وجهله دوشونمک ممکن در؛ بوده بر مسئله در، اوکا تعلق ایتک اوزره ایکی ادما در میان اولونمش، و (قوزمونه تیق) فرقه سی - بویوزدن - تکرار ایکی حزب تشکیل ایتک صورتیه ایکی به آیرلشدر .

برنجی حزبک اعتقادنجبه - بالتحدس par intuition - (مدرك اولان شی (l'objet perçu)، ذهنده حاصل اولان بر (ماهیت مستحضره. entité représentative) در؛ صرف بر (تطور ذهنی (modification mentale) دکلدرد .

سوزمه دوام ایتزدن اول بو افاده غریبه ایله هاملتک نه دیمک ایسته دیکنی سزه لایقيله آ کلاتمالی یم؛ دیمک ایستیورکه :

استحضاریونک بر قسمک اعتقادنجبه، - کائنات ایله تماس ایتدیکمز زمان - آنی اوله رق ادراک ایده بیلدیکمز شی (ماده) نك کندیمی دکلدرد . بزم حالات روحیه مزده - او تماس ایله - حاصل اولان تغیرات دخی دکلدرد . انجیق بر (تصور (concept) در، بر (فکر (idée) در . بر (ماهیت مجرده) درکه، نه خارجه اشارت ایتدیکی شیته بکزر، نه ده بزم روحزه بکزره . باشلی باشنه بر (عین (entité) در . [*] بناء علیه بو (ماهیت مستحضره) خارجه ده کی (شی

[*] (entité) کله سی فلسفه لساننده بر مهم تعبیر اصطلاحی در . بزم اسلام کتابلرنده بوکا (عین) دیرلرکه کندی کندینه ثابت ومستقلاً موجود برشی دیمکدر . ایسترماده، ایسترسه روح جنسندن اولسون !.. نته کیم تصوف لساننده (اعیان ثابته (entités im- muables) تعبیری افلاطونک (ماهیات اشیا) اولقی اوزره تلقی ایتدیکی (idée) لر حقنده تخصیصاً قوللانیله کلشدر . بو حاشیه نك تعلق ایتدیکی ایضاحانه باقیلیرسه فکر واعتقادی بو صحیفه لرده عرض اولونان حزب اربابی ایله بزم بعضی اسلام فیلسوفلرینک (وجود ذهنی) نظریه سی بر طوتوله بیلیر . هرحالده بواکی نظریه معرفت یکدیگرینه پک بکزرده یته بو کونکی فیلسوفلرک تصوری ایله (وجود ذهنی) نظریه سنی مدافعه ایدن اسکی اسلام فیلسوفلرینک کی آره سنده فرق واردرد . بورای بوندن سوکره کی بابلرده کوستریلوب ایضاح ایدلشدر .

حقیق (objet réel) ایله ذهنمز آره سنده بر (شخصیت ثالثه) تشکیل ایدر .
 فی الحقیقه فیلسوفلر بو صورتله تعریف اولونان ماهیت مجردیه (tertium quid)
 دیرلرکه لاتینجه (اوچونجی ماهیت) دیمکدر .

شیمدی بو ادعایی عادی بر مثال ایله تنویر ایدرسهم متضمن اولدوغی نظریه
 مخصوصه نك ماهیتنی حقیقه آکلار و تقدیر ایدرسکنز ؛ مثلا :

بن ، کتبخانه مه کیرر کیرمز یازی ماصه مک اوزرنده بر کتاب کوروپورم .
 هاملتن ایله برابر بوتون (ثنائیه طبیعیه) فیلسوفلری ادعا ایدیورلرکه کوروب ،
 طوتدوغم او کتابی بر آنده ادراک ایتمش اولویورم . هم یالکز (اوصاف و کیفیات
 propriétés) نی دکل ، اونک خارجه مستقلاً موجود بر (جوهر مادی
 substance matérielle) سی اولدوغی ده - بلا تأمل و محاکمه - درحال ادراک
 ایتمش اولویورم . بناءً علیه او کتاب حقنده بیلمه دیکم برجهت مهمه قالمیور .

حالبوکه (قوزموئه تیق) اولان ایده آلیستلر ادعا ایدیورلرکه بنم یازی ماصه مک
 اوزرنده - کتاب نامه - بر آنده ادراک ایتمش اولدوغم شی او کتابک جوهر
 مادی سی دکلدر . بن اوئی بالحا که وبلاستدلال دوشونوب بولیورم . او حالده
 - کتابی کورور کورمز - آنی اوله رق ادراک ایتدیکم شی ندر ؟..

ایشته بو سوآله (قوزموئه تیق ایده آلیستلر) - کندی آره لرنده - ایکی
 صورتله جواب ویره بیلیورلر و اونک ایچون بو فرقه تکرار ایکی حزبه انقسام
 ایدیور . بر قسمی دیورکه - کتاب نامه - درحال ادراک ایتدیکم شی ، بر
 ماهیت مجرد درکه خارجه کی کتاب ایله نفس مک تماسی و مناسبتی یوزندن ذهنه
 سانح اولمشدر . او بر (کتاب فکری - l'idée de livre) درکه خارجه کی
 شیک ذهنده بر اشارت مخصوصه سی صاییلیر . فقط نه بنم ذهن در ؛ نه ده خارجه کی
 کتابدر . او ، بر اوچونجی شیدرکه نه بنم ذهنه ، نه ده خارجه کی کتابه بکزر .
 ایشته کائنات ایله تماسزده درحال یعنی تحذسی اوله رق ادراک ایده بیلدیکمز شیلر
 هب بو فیلدن بر طاقم ماهیات مجرد در . علممز دخی هب بو تورلو ماهیات
 مجموعه سندن عبارتدر . یالکز بو ماهیات - عالم خارجی ده بالذات موجود - برطاقم
 اشیا حقیقه نك اشارات ذهنه سی اولمق حیثیتله اشیا مذکور مک وجودینه دلالت
 ایتدیکندن ، بزه اونلر واسطه سیله بالاستدلال ، کائنات خارجه نك وارلقی ادراک
 ایده بیلیورز ؛ ده طوغروسی [وار اولماسی لازمکه جکسه قناعت حاصل ایدیورز .]

(قوزموئه تيق ایده آلیستلر) ك ايكنجی حزبی تشكیل ایدن بر طاقم
فیلسوفلرده بو (علم استحضاری) مسئله سنده بر آز باشقه تورلودوشونو یورلر. اولر
دیورلر كه :

[' ذهنك تحدسی اوله رق ادراك و استشعار ایده بیلدیگی شی ، یالکز کندی
حاله عارض اوله بیلن (تغییرات و تطورات changements et modifications) در .]
ینه اولیگی مشالمزی آلوب مسئله یی تنویر ایدلم ؛ اویله ایسه ، او حالد :
ماضه نك اوزرنده کی کتاب - حد ذاتنده هر نه اولورسه اولسون ! - بزم در حال
ادراك ایده بیلدیكم شی ، کندی وجداننده حاصل اولان بر (حال تغییر) در .
یعنی او کتاب حقنده حاصل ایتدیكم فکر ، وجدانندن آری بر (ماهیت نالته)
دكلدر . بزم او آنده در حال (منفعّل affecté) اولان وجداننه بالضروره عارض بر
(حالت مخصوصه) در . فقط بنده بویله بر انفعال حصوله کترین (سبب خارجی
cause extrinsèque) نك وجودینه ، شوانفعالم بر اشارت مخصوصه تشكیل ایتدیگی
ایچون ، [یعنی بنده حاصل اولان انفعالات وجدانیه بر مؤثر خارجی نك اثری اولق
لازم کلدیگی ایچون : .] اژدن مؤثره انتقال صورتیله استدلال ایده رك آکلیورم
وقاعت کتیریورم كه خارجه - کتاب نامنه (بر شی حقیقی) اولق ایجاب ایدر .
کورویورسکزر كه بو حزب اربابی بالخاصه (tertium quid) فرضیه سنی رد
ایتمكه دیکرندن ممتازدر . بناء علیه عالم خارجی ایله وجدانمر آره سنده واسطه علم
اولان بر (شبخص نالک) قبول ایده میور ؛ بالعکس عالمله صحیحاً تماسده
بولوندوغمره قائلدر ؛ لکن شو ادعاده دركه بو تماس ، بزم حقایق اشیادن خبر
ویرمیور ، آنجق او مناسبتدن حاصل اولان انفعالات وجدانیه منری بیلدیریور .
ایشته اوقدر ! ... اویله اولونجه بزم ایچون حصولی ممکن اوله بیلن علم دخی صرف
افسی و اضافی اولق ضروریدر . دیمك كه بو ادعا (آغوستی سیزم Agnosticisme
لادریه) فلسفه سنی مستلزم و حتی متضمن در .

[*] بزم اصطلاحات قدیمه مزدن اولان بو (لادریه) کله سی اسکی لسان فلسفی مزده
(scepticism) مقابلی ایدی . بزم شیمدی او کله یه قارشیلق اولق اوزره (حسابانه) تعبیری
ترجیح ایده رك (لادریه) کله سنی (agnosticisme) معناسنه حصر ایله دك . یونانی الاصل
اولان بو اصطلاحاتك معانی لغویه سنه بو ترجمه ده موافق اوله ونی کبی ، بوکون او ایکی
مسلك آره سنده کی فرقی ده ده ای ابراز ایدر .

هاملتن ، علیهداری بولوندینی بو (ثنائیه فرضیه) فرقه سنک برنجی حزبی
[یعنی بر ماهیت ثالثه قبول ایدنری] ، (فرضیه استحضارک اک قابا صورتی
l'hypothèse la plus grossière de la représentation) نه طرفداراولاندردن عد
ایدیور. ایکنجی حزب اربابنک نظریه سنی دها (اینجه raffinée) بولویور .
صوکره :

[بعضی فیلسوفلرک - بو ایکی صنفدن هانکیسنه - منسوب اولدقلرینی تعیین
ایتمک قولای دکلدرد !] دییور. بونکله برابر (ده موقریت وئ پیکورک پیرولری
ایله) اجناس عقیده عادیه سی (la doctrine vulgaire des espèces) [*] فی تعلیم
ایدن مشائیونی ، و متأخریندن (مالبرانش Malebranche) ، (بارقله Berkeley)
(فلارق Clarke) ، (آبراهام توکر Abraham Tucker) و (نیون) کیی متفکرینی
برنجی صنفه ادخال ایدیور . [مشهور ارسطو - احتمالک - ثنائیه طبعیه دن
ایدی !] دییور. [عجبا (لوق Locke) ده بونلرک آره سنه ادخال ایدیلهمز می ؟ .]
دیه ، مترددانه دوشونویور. نهایت :

[بر چوق (فلاطونی لر platoniciens) ایله برابر ، (لایبنج Leibnitz) ،
(آرنو Arnauld) ، (قروزاز Crousaz) ، (قوندی یاق Condillac) ، (قانت
Kant) و الخ . . . - هیچ شبهه یوقدرکه - ایکنجی صنفده داخلدرلر ؛ (ده قارت
Descartes) ی ده ایشته بو صنفه نسبت ایتمک لازمکلیر ! .] دیه قطعاً حکم
ایدیور .

نظریه معرفت مسئله سنده (شهادت وجدان) ی عمده اتخاذا ایدن هاملتن ،
اوشادنک بلا تغییر و تفسیر، عیناً و تماماً قبول ایدله سی مجبوریتند مصربولوندوغی

[*] بوراده (اجناس) تعبیری پک مبهم بر صورتده ایراد ایدلشدرد ؛ هاملتن ، اثرینی
فلسفیه منسوب اولانلر ایچون یازدیغندن طولای ، بو خصوصده ایضاحات ویرمهک حاجت
کورمه مشدی . بوراده اجناس کله سی ، علوم طبعیه ده کی مناسبله قوللانامشدره . بالعکس
ماهیات مناسبده وارد اولشدر. ذاتاً بر نظریه مشهوره نك اسمی درکه مشائیون عننده پک
معتبردی . تعبیر معروفی (espèces sensibles) در. کویا ذهنمز بر چوق (ماهیات
محسوسه) تلقی ایدیور و اونلری جنسلرینه کوره تصنیف ایله رک معلومات ایدینیورمش .
بو (اجناس ماهیات) ، ذهنمزده ، باشقه بر شیلر اولقله برابر ، خارجه دلالت ایدنکلیری
شیلردن ده آیری درلر. بناء علیه ، علمده بر (رکن ثالث) درلر. اونک ایچون هاملتن بو
عقیده اوبانی برنجی صنفه ادخال ایدیور .

ایچون ، یا تماماً قبول و یا خود تماماً رد ابدنلرک حرکتی مشروع کورویور .
بناءً علیه :

[بر فیلسوفه یاقیشان یکانه سیستم، یا (حقیقه طبیعیه R réalisme naturel) در؛
یا خود (افتکاریه مطلقه idéalisme absolu) در . زیرا آنجق بو ایکی نظریه
وجدانک شهادتنه مستند اولدوغی ایچون تناقضلره دوشمک تهلکه سندن مصوند .
بو ایکی سیستم - فی الحقیقه عینی (امر وجدانی fait de conscience) نی
اساس اتخاذا ایدوب ادعالرینی او اساسه بنا ایدیور . هر ایکی مسـلک اربابی ده
اوله دوشونویورلر و ادعا ایدیورلرکه : (بلا واسطه مدرک اولای شی ایله ،
عالم خارجی ده فی الحال فی الحقیقه موجود اولان شی بردر . باشقه باشقه وارلقلر
دکلدرلر . [*] بونک حقیقتی اثبات ایتک ایچون هر ایکی طرف منسوینی دخی
(انسانیتک حاسه مشترکه سی le sens commun de l'humanité) نی « یعنی طبع
سلیمنی ! » شاهد کتیریور ؛ حتی (بارقله Berkeley) [**] بو خصوصده بلکه
(رید Reid) دن زیاده اعتماد ایله او دلیل صاریلور و بلکه اوندن ده منطق
طاورانیور . (حقیقه فرضیه réalisme hypothétique) و یا خود تعیر دیگرله
(idéalisme cosmothétique) اوله فرض ایدیورکه : ادراک ایتکده اولدوغم
شو اصلسز و پرفسون عالمک ماوراسنده - بو شعبده و خیالاته مقابل - بر عالم
حقیقی کیزی در؛ اوله بر عالم که نه اولدوغنی و ناصل اولدیغنی طانییورم ، بیلمیورم ! .
ایشته بو نظریه یالکز عقائد طبیعیه مزه (کریه répugnant) کورونمکله قالمیور ،
(تناقضلر contradictions) لهده مالی در .]

(حقیقه طبیعیه) سیستمی دخی - احتمالکه - بر طاقم مشکلاته معروض

[*] یعنی حقیقتاً شو آنده موجود اولان عالم ایله ، ادراک ایتدیکم (صورت عالم) عینی
شیدر ؛ دیمک اولویورکه بونی براز اول دخی من کتایده آکلاتمشم . بناءً علیه شو اعتقاده
کوره عالم حقیقی و آفاقی ایله عالم ادراکی و انفسی آره سنده صورتاً بیله فرق قالمیور . ایکیسی
هر وجهله بر اولویور . هاملتک اک ضعیف ادعالرندن بری بودر . پسقولوجی بو طنلک نه قدر
اساسسز اولدوغنی صراحه " کوستریور . بو مسئلهک تفصیلاً مناقشه سنه مان کیریشه جکم .

[**] بو مشهور اسملر چوق دفعه کتایزده کچدی . بارقله (افتکاریه مطلقه) مذهبک
اک بویوک استنادیدر . رید ، (حقیقه طبیعیه) نک اک نامدار ممثلرندندر . برنجیسی بر عالم
مادینک وجودنی انکار ایتدیکی حالده دعواسنی اثبات ایچون شهادت حسیه نی دلیل کتیریور
و حواسک نه قدر شعبده باز اولدوغنی آکلاتیوردی . ایکنجیسی عالم مادی به ایناندینی ایچون
بالطبع حواسی اشهاد ایدیوردی .

بولونه بیلیر؛ زیرا بوتون حقایق ساثره کیی، نهایت (ناقابل تصور inconceivable) بر وجودی تسلیمه واریر. فقط (حقیقه فرضیه) مذهبی فیلسوفلرجه پک مرغوب بر سیستم اولقله برابر - کړك منشأی و اساساتی اعتباریله، کړكسه (تکملاتی ses développements) و نتایجی اعتباریله - فلسفی بر نقطه نظر دن (بدیهی باطل absurde) در. [دیور .

هر حاله، عالم حادثاتی آنحق بر (شعبده حسیه illusion des sens) اولق اوزره تلقی ایدوبده بو ظواهرک وجود حقیقیسی، جوهر مادی سنی قطعاً انکار ایدنلر ایله، حادثاتک بر حقیقت مادییه مسبتند اولدیغنی وهر ایکسیسه بر آنده تحدسی اوله رق ادراک ایده بیلدیکمزی ادعا ایدنلرک اعتقادی مشروع و منطقی کورویور. چونکه یکدیگریله طابان طابانه ضد اولان بو ایکی فلسفه - عینی قوت ایمان ایله - شهادت وجدانه اعتماد و اثبات مدعا ایچون او دلیله استناد ایدیورلر. [*]

هاملتن - تصنیف مذاهب خصوصنده - شهادت وجدانی اساس اتخاذ ایش و اوکا تامایله اینانمهی شرط قوشمش اولدوغندن طولایی بونتیجهیه - بالضروره - پیوسته اولمشدر؛ وینه اوندن طولاییدرکه ایکسی اورطه سی نظریات معرفت دن وقاریشیق ایشدن خوشلانمور .

بو، ای! فقط ایش بورادهده قالسهیدی هاملتنک دیدکلرینه حق ویرمک هیچ بر حقیقت برست فیلسوفک کوجنه کیتمزدی. لکن ایشی قاریشیدیران - حدذاتنده - فیلسوفلر دکل، تدقیقات بسیقولوزیه در. بو وادیده یکی یکی بر بر سورو حادثات کشف اولونویورکه هربری برر مهم مسئله شکلی آلیوریور.

[*] عالم اسلامده علم کلام مناقشاتنده بو ایکی فرقه نك تامایله معادلرینی کوره بیلیرز: (حقایق اشیا ثابتدر، علم آنحق او سایهده تحقق ایده بیلیر!) دین بو دعوای بردستور اساسی اتخاذ ایدن متکلمین اهل سنت، تامایله (حقیقه طبیعی) فیلسوفلری وضعینده درلر. طرز استدلال و اقامه برهان خصوصندهده کیدیشرلی بردر. چونکه شهادت حسیهیه طایانیرلر. حواسک صدق اخبارانی ادعا و اثبات ایله اوغراشیرلر. بونلره قارشى (عناده) فرقه سی طبق (افتکاریه مطلقه) وضعینده در. عالم مادی نك وجودینی قطعاً انکارده اصرار ایدرلر، معافیله دعوالرینی اثبات ایچون بونلرده شهادت حسیهیه مراجعت ایدرلر؛ فقط ترسنه بر نتیجه چقاریرلر: حواسمز شهادت ایدیورکه هب مدرکامز یالاندر، افسانه در، شعبده در. [حواسمز طوغرو سوبله یور. اونلرک بوشهادتنه قطعاً اینانمای بز!] دیرلر. کوز کوره عالمک حقیقتی انکارده تعند سببیه عناده نامی آلملردر.

بونلرك جله سیده - فلسفه ده - بالحاصه (نظریه معرفت) نامنه اوته دنبری ترتیب اولونان سیستم لری تعدیل ایده جك ، حتی بوزوب قیره جق ماهیته در .
 نظریات معرفتی مذاهب فلسفه ده (معیار ممیز) عد ایدن هاملتن ، اصابت ایتشدر . كذلك نظریه معرفت شهادت وجدانی اساس اعتماد و برهان استناد عد ایتش اولماسنده اونسبتده اصابت واردر . بواساسلری هر مذهب اربابی بلاترد قبول ایده بیلیر و ایتمه لی در . حتی بوبلان اوزرینه بنا اولونان تصنیف ده عیناً قبول ایتمکده - هر کیم ایچون اولورسه اولسون - هیچ باس یوقدر . فقط مناقشات فلسفیه سبب اولان عقدۀ معضله و مشکله اوراده دکل ۱۱ .

شهادت وجدانه هب اینانیورز ؛ چونکه - اولجده مکرراً عرض ایتدیکم وجهله - هر هانکی بر بخنده ایراد ایده بیلجکمز بالجمله براهین و دلائلکک صاغلام نقطه استنادی انجق اودر . فقط باقلم شهادت وجدان هاملتنک ایلری سوردوکی ادعای دیمکدر ؟ .. وجدانک شهادتی باشقه تورلو آکلامق ، اوندن بر آز باشقه معنا چیقارمق ممکن دکلی در ؟ ..

ایشته بوراده پک چوق فیلسوفلرک شبهه سی وار ، واونک ایچون اوفیلسوفلر بونقطه ده هاملتدن آریلیورلر ؛ هم اویله ظن ایدیورلرکه وجدانک شهادته معنا ویریکده بو مقتدر و چوق معلوماتی متفکر یکانه ترجان صلاحیتدار دکدر . هاملتنک نه بویوک بر فیلسوف اولدوغنی پک اینی بیلدیکم حالده بن دخی کندیسنی تحظه ایدنلردنم . امینکه اوکا شدتله تعریض ایدن میل چوق حقلی در ؛ وپک اینجه تحلیلالاتیله ، داهیانه استدلالاتیله حقلی اولدوغنی اثبات ایتشدر . هیچ اولمازسه بنجه ثابتدر .

خاطر کزده اولسه کرکدرکه بوتون بو مناقشات ، بردعوای اساسی به منجر اولویور ، و نظریه معرفت مسئله سنک حلی اودعوانک قطعاً حل اولونماسنه وابسته قالیور ؛ اوده [عالمک وار اولدوغنه بزی اقناع ایدن ادراکک - صحیحاً - بر علم تحدسی اولدوغنی] ویاخود [اویله اولمادیغنی] حقنده طرفین رقیبینک مشهور اولان دعوالیدر . اصل گوچلکده بوراددر .

ینه وجدانک شهادتی نظر دفته آلهلم : مثلاً ، وجدانم بکا - فی الواقع - دییورکه ، شو قارشکی تپده کوردوکم بویوک فیستیق اغاچنی بر آنده ادراک ایدیورم . کوزومی آجاز آجاز کوروپورم ؛ هم یالکز کوردوکم ایله قالیورم ؛

اونك بندن خيلي اوزاق بر یرده بولوندوغنی و مستقلاً موجود اولدوغنی ده - درحال وعینی زمانده - ادراك ، تعقل و جزم و اذعان ایدیورم . وجدانك شو آنده سویله دیکنه باقارسم سویله دیکی بودر . بوده اك جاهل و فکرسز آدمیره وارنجیه قدر همان هرکسك ظن و اعتقادیدر . (رمید) و امثالی کیی فیلسوفلرک اك مهم مباحث فلسفیه ده اك صاعلام دلیل اولق اوزره ایراد ایتدکلری برهان عامیانه ده بودرکه اوکا (sens commun) و (bon sens) دیرلر .

لکن بسیقولوژی مسائلی ایله - سویله سطحیجه - الفت ایتش اولانلر بیله قطعاً بیلرلر و تسلیم ایدرلرکه، اوزاقدن بر آغاجی کورمک و اونك اوزاقدن بر آغاج اولدوغنی و باشلی باشنه موجود بولوندوغنی درك و اذعان ایتك بك (معضل complexe) بر (عملیه ذهنیه operation mentale) سایه سنده ممکن اوله بیلور . بونده بالخاصه کیفیت ادراك دن ماعدا (سابقه تجربیه anticipation) ، (تداعی association) ، (قیاس خفی inférence secrète) ، خلاصه - بوتون شمول معناسیله - (تعقل ratiocination) وار ؛ واصل ایشك مشکل جهتی بوک، بوتون قوای ذهنیه مزك فعالیت مشترک سیله ممکن اوله بیلن بو (عملیه مهمه) همان کلیاً (غیر مشعور inconscient) اوله رق وقوعه کلیور ، و او قدر سریع اولویورکه بز اونی (آنی و بناء علیه تحدسی) ظن ایدیورز . حتی وجدانمز دخی اویله اولدوغنه درحال شهادت ایدیور . حالبوکه تحقیقات بسیقولوژیه معامله نك اویله اولمادیغنی کورستیور . بوده بك اعلا اثبات ایدیورکه وجدان - یالان سویله مه سه بیله - یا کبله بیلر مش . دقت ایدیکز ایکی مهم مسئله یی یکدیگریله برطوتوبده ذهنکزی قاریشدر - مایکز !.. بوراده وجدانك معروضاتی ، هیچ موضوع بحث دکل :.. کرچه او خصوصده ده شبهه ایدیه بیلر سه ده ، شیمدیلک اونی بر طرف ایدیورز . وجدانك - آنی اولان - معروضاته اینانیورز . مثلاً : [قارشیکی تپده بر فیستیق آغاجی کورویورم !] دیور ؛ بوندن - شیمدیلک - هیچ شبهه ایتیور ، و ایتك ایسته میورز . فقط کوردوکی شیشی تفسیر ایتمکه قالفنجه وجدان (عقل Raison) نامنی آلیر ؛ او حیثیله نه سویلر سه ، همه حال برحاکمه و استدلال نتیجه سی در . ایشه بوندن بر از شبهه ایتمکه حقمز و اردر ! . دیورز . [بن اوزاقدن کی آغاجی کورویورم اما ، بر آنده کورویورم ؛ و بر آنده جزم ایدیورم که اوراده مستقلاً موجود

اوایله بر ماده وارددر! [دیدیکی زمان،] طور باقالم!، تحقیق ایدلم؛ اوایله می؟. دکلې؟ [دیه تردد ایدیورز. آکلاشلیورکه معروضات وجدانیه قارشې دکل، او معروضاته معنا ویریشنه قارشې براز شبهه ایدیورز. جهت تعلقنه کوره بو شبهه من بوسبوتون فرقلې بر وضعیت ذهنیه در.

بو وضع مزده براز حقلې ز؛ هم تحقیقات علمیه په کیریشمه دن حقلې اولدوغمزی آکلایه بیلورز؛ کوروپورز که معروضات وجدانیه تورلو تورلو معنا ویرمک ممکن. ممکن اولماسه یدی بو قدر متنوع (نظریات معرفت) ترتیب ایدیه من؛ بو قدر مختلف مذاهب فلسفه دخی ظهور ایده مزدی. مثلاً هر فیلسوف عینی. آغاجی کوردوکی حالده، کوردوکندن و کوروشدن باشقه معنار جیقاره بیلور. دیمک که بونلرک جمله سی ده معروضات وجدانیه قطعاً ایناندینی حالده، اوندن ماعداسنه تعلق ایدن شهادت وجدانیه دن شبهه ایدیورز. بو، بزه حق ویریر.

فقط تحقیقات علمیه په کیریشیره ک بوسبوتون - شبهه ایتمکده - حقلې بولوندوغمز تحقّق ایدیور. درین وقاریشیق مسئله لری براقهلم (ادراک بسیط simple perception)، عاقله عادی بر مثال آله مده کوروکمز!...

شو - دهمین موضوع بخدمز اولان - فیستیق آغاجی ناصل کوروپورز؟.. دیه بسیقولوژی علمنه صورتدوغمز زمان، بو علم بزه آکلاتیور و تمامیه قناعت ویریورکه: [هر کوزومز او آغاجک خیالی آیری آیری کوروپور؛ وایکی کوزک قوت و قابلیت بر درجده اوله مادینی ایچون بری او آغاجک خیالی ده. یاقین، دیکری ده براز ده. اوزاقچه بر موقعده کوروپور. حتی بو کیفیتیک عایانه بر لسان ایله سویله دم. او آغاجک (خیال image) ی هر کوزومزک (شبکه rétiné) سی اوزرنده آیری آیری ترسم ایدیور. حسابجه او آغاجک - هر بر کوزومزله - آیری آیری ایکی فوطوغرافیسنی آلمش اولوپورز. لکن بو رسم، عینی سطح مستوی اوزره مرسم بولونموپور. یالکمز بر نقطه ده یکدیگریله تماس ایده بیلور. صوکره ناصل - اولوپور؟. بیلیم!، چونکه بو سری هنوز علم دخی کشف ایده مه مشدر! - اوایکی آغاج رسمنی، ذهنمز تسویه ویکدیگریته ادغام ایدیور. یعنی برسویه کتیرد کدن صوکره برلشدره رک تک بر آغاج رسمی اولمق اوزره عرض ایلور. شیمدی سزله صورارم: بو معلومات دماغیه دن قاج کشی نک خبری وارددر؟.. دقت ایدیکمز!.. [قاج کشی نک معلوماتی وارددر؟.] دیمیورم! بسیقو فیزیولوژی ایله الفتی اولان هرکس بونی بیلیر.

فقط دنیاده هیچ بر کیسه یوقدرکه بر آغاچ کوردوکی زمان فعل رؤیتک بو صورتله واقع اولدوغندن ، او آنده بالذات خبردار اوله ییلسین ! .. هرکس بر وغایت بسیط اوله رق او آغاچی کوردوکنه قانع در . زیرا کوزینی قاپوب آچینه آنجی اوله اونه بیلدیکنی حس ایدر ؛ وجدانی دخی اونی تصدیق ایدر .

او حالده وجدانک هر تصدیق ایتدیکی احوالک حقیقته - بلا تحقیق - اینانمایوبده آزیجی شبه ایتک نهدن حقسن بر حرکت اولسون ؟ ...

صوکره بو عادی وبسیط مثالده بیله نیجه نیجه مسئله لر کوره بیلیرزکه ، هر ایکی طرف دخی کندی لهنده بر دلیل اوله رق قوللانه بیلیر . مثلاً : هر بر شبکه عینه ده آیری آیری ترسم ایدن ایکی خیالک عینی سطح مستویده مرتسم اولمایوب یالکز بر نقطه ده یکدیگرینه تماس بولونماسی علماً مثبت بر کیفیت ، بر حادثه در . شبه کورتورمز ؛ بویله اولویور . فقط عالمک ومکانک حقیقتی انکار ایدن (ایده - آلیستر) بو حادثه نی کندیلیرنه یونته رق معنا چیقارییورلر : [حد ذاتنده مکان ومسافه حسنی ویرن وبالخاصه (بعد ثالث troisième dimension) یعنی (عمق - profondeur) خیالی ویرن ، ایشته او ایکی شبکه عینه مز اوزرنده ترسم ایدن آغاچ رسملرینک ، نقطه سی نقطه سنه یکدیگرینه تطابق ایتمه سی در ! ..] دییورلر : (ره آلیستر) ده عینی کیفیتدن تماماً عکسنه بر معنا چیقارییورلر : [خارجده ذاتاً ومستقلاً برشی اولماسه یدی کوزلرمزک شبکه سی اوزرینه او بشیک خیالی ارتسام ایده بیلیرمی ایدی ؟ .. بر شی اولونجه همه حال بر مکانده اولمق لازمکلیر . واقعا هر ایکی کوزومزک قابلیتی بر درجه ده اولمادینی کیی - فوطوغراف اوبژه قتیقی مقامنده خدمت ایدن - ایکی کوزه مالک بولوندوغمز ایچون دخی ، اولای ایی خیال تلقی ایدیورزکه یکدیگرینه مطابق دکلدر فقط طبیعتمز بونک بر غلط حس اولدوغنی ادراک واذعان ایتدیکی ایچون تصحیح وتسطیح ایدب دوزه لئیور ویر کوسترییور یا ! ..] دییورلر .

کورو یورسکر ! .. اعتراف ایدرم که قولای قولای بوایشک ایچندن چیقوب صیر یلق ممکن دکلدر .



بشنجی باب

(اسباب علم Moyens de connaissance)

مسئله سنک تکامل تاریخچسی

بر اخطار. تاریخ فلسفه به مجله بر نظر رجی . - بر استطراد . - اسباب علم و حصول ادراک حقنده ، سقراطدن اولکی فیلسوفلرک فرضیاتی . - سوفسطائیہنک و بالخاصه پروتاگوراسک افکار مهمه سی ، بوفکر ایله انکشاف ایدن حقیقت . - افلاطونک فکری . - ارسطونک فکری . - تھیکورک فکری . - یاواش یاواش تھپیسته، ولوژی ده مذاهب مخصوصه نک ترسم ایدوب بلیرمه سی . - رواقیونک فکری ؛ بونی بر مسلك اوله رق قبول ایده بیلیرز . - قرون وسطانک آکلایشی . - حکمای عربک مسلکی . - دور انتباه فاعلرندن بالخاصه ده قارتک مسلکی . - (قارته زیهن cartésiens) لردن مالبرانشک مسلکی ؛ بونلرک تصوفله مناسبت و مشابہتی . - سپینوزانک اعتقادی . - (لایب نیچ) ک مسلکی و مشهور (آهنگ ازلی) فرضیه سی . - جون لوفک مسلکی و فلسفه تدریجیه نک کرکی کپی انکشافی وقوت قازانمه سی . - دور اخیرده مسئله نک آلدینی شکل و وضعیت . - بارقله نک مسلکی و (افکاریه انفسیه) مذهبک تاسسی . - (ده ویدهوم) ک ظهوری و مسلکی . - بو ایکی بویوک فیلسوفک هیوم دن شدتله متأثر اولمالری و بو تأثرک اقتضاسنه کوره تعین مسلك ایتمه لرینک اسبابی . - هاملتن دوری و بو فیلسوفک تنقیداتی ، بالخاصه نظریه معرفتله اشتغالی . - اونکله معاصر اولان بعض نامدار فیلسوفلرک افکاری . - تحس و استحضار مسئله سی . - مشهور (ایکی فرقه غوغاسی) . - هاملتن علیهنده جون ستوته میل . - بهین ، سپنسزک مسلکاری . - بو مهم دعوانک خلاصه سی . - عقدہ اختلافات نه در ؟ .. بسیقولوژی نه سویله یور ؟ .. بز ناصل دوشونوب ، نه دیه بیله جکرز ؟ ..

اقدیلر !

دردنچی باده مناقشه ایتدیکم مسئله لرک (نظریه معرفت) ایله جهت تعلقی ، لایقيله - کوروله بیلوردی . فلسفه ده ظهوره کلن اختلافات مذهبیه نک ده ، نظریات معرفت اختلافاتندن نشأت ایتکده بولوندوغنی سویله مشدم . نیچون هر مذهب فلسفی نک عمدہ اعتقادی بر نظریه معرفت تشکیل ایدیور ؟ . بو جهت

مهمی آکلاتمشم. اویله اولونجه شبه یوقدرکه (ماتریالیزم) ، (ایدم الیزم) (ره آلیزم) ودها بویله بر جوق فلسفه مسلکیرینک آره سنده کی فرقلر ویا مشابهلر ویا ضدیتلر، او مسلکیرک اساس حکمتی تمثیل ایدن (نظریات معرفت) آره سنده کی مابینلرک ویاخود مشابهلرک آثار انعکاسی در. او نظریاتک صورت تولدنی وصفحات متعاقبه تکاملنی کورونجه مذاهب فلسفه آره سنده کی روابط مقارنت ویاخود ضدیتک اسبابی ده برابر کوروب هر برینک ماهیتنه کوره قیمتی تقدیر ایدم بیله جکسکزدر. فلسفیاده (محک تنقید) اوله بیلیمک ایچون بویله بر قابلیت برنجی شرطدر. اوده بالخاصه بو نوع معلومات ایل - بر درجه یه قدر - تحقق ایدم بیلیر. یعنی (نظریه معرفت) بحثنه تعلق ایدن بالجله معلوماتی ایدیمکله اوله بیلیر ، دیمک ایسترم .

لکن (نظریه معرفت) بسیط بر شی دکلدر. بالعکس بر جوق نظریات متفرقه نك (منسجم Coordonné) بر هیئت مجموعه سیدر. اونلرک بر قسمی بسیقوفیزیولوژی ، بر قسمی فیزیق وتشریح وحتى تاریخ فلسفه تدقیقاتنه استاد ایدر ؛ یعنی باشقه باشقه علملردن قوت وصلاحیت آلیر ، اوندن ماعدا بوتون بو افکار وملاحظاتک منطقیاً هم آهنگ اولماسی ، یکدیگرینک حکمنی نفی وابطال ایتمه سی بر شرط مهمدر. بو شرط تحقق ایدر سه نظریه مذکوره منسجم اولور وبویله هم آهنگ اولوبده بر برینی طوتان ، تصدیق وتأیید ایدن جمله افکاره اینانه بیلیرز. اعتقاد مزجه دوغرو بر فکر ، بوتون افکار مزله اویغون دوشن بر دوشونجه در .

بر نظریه معرفت ترتیب ایدم بیلیمک ایچون تألیفی لازم کلن نظریات خصوصیه نك مختلف ومتعدد اوله بیلیر. چونکه معرفت دیدیکمز قابلیتک بر جوق حادثات ومسائله تعلق واردر . معافیله (نهیسته مولوژی) نقطه نظرندن باقینجه بز اونلری بر قاج مهم نظریه ارجاع ایدم بیلیرز ؛ حتی ایتمه مجبورز ؛ چونکه بزه علوم مختلفه نك - نك خصوصی حادثات عضویه و روحیه یی تعریف ایدن - فرضیات ونظریاتی لازم دکلدر ؛ ومادامکه یالکتر کیفیت معرفتی تحقیق ایتک صدندمیز ، یعنی [بز بر شیئی ناصل بیله بیلورز ؛ اونک حقنده ناصل اولوبده بر علم حاصل ایدیورز ؟!] سوائه جواب تدارک ایتمه اکتفایه مجبور بولونوبورز ، حقایق اشیایه تعلق ایدن نظریاتک کافه سی بر طرف ایدم رک دها

خصوصی بر دأثرده بر فرضیه عمومی قورمغه چالیشه جغز دیمکدر . او تقدیرده
بالکز معلوماً تمزك منشألری، وسائلی، وادراکک ناصل وقوعه کلدیکی تعریف
ایتمکه چالیشان نظریات خصوصیه اهمیت ویره جکز . فلسفه نظریاتی بر تکامل
فکری نتیجه سی اولدوغی ایچون، تاریخ فلسفه نك شهادتته ده - آره صیره - محتاج
اوله جغز واکا براز اعتبار ایده جکز ، دیمکدر .

(نظریه معرفت) ك بسط بر (عقیده doctrine) اولمادیغی بالالزام
سویله مشدم . فی الحقیقه اوله در ؛ چونکه (بیلیمك) کیفیتده اوله (وسائل علم)
شایان نظر در . مثلاً : یا (حاسه sens) و یا خود عقل ایله تحصیل علم ایتدیکمز ،
دعوا اولوندوغنه کوره (احساسیه sensualisme) و یا خود (عقلیه rationalisme)
فلسفه لرندن بری التزام ایتمش اوله جغز که بونلر باشلی باشنه برر مذهب فلسفی در
و (اصول methode) مسئله سی ایله ده علاقه داردر : [بز ، حواسمز واسطه سیله
هر شئی بیلورز]^۱ دیه ادعا ایدرسه ك (راسیونالیزم) فلسفه نك هیچ بر جهتی
ایله اوپوشامایز ؛ نته کیم اصولده دخی (تدرییه empirisme) طرفدارلغنه غیرت
ایده رز . بناءً علیه راسیونالیزمی شدله رد وابطال ایتمکه چالشمالی بز . دیمك که بو
مختلف نظریه لر آره سنده حقیقتاً مناسبت ویا منافرت وار؛ خلاصه بر منطق وار که
انسجام افکاری تأمین ایدیور . فلسفه بویه ترتیبی ویکدیگرلیه تماماً هم آهنگ
بر طاقم افکار و اعتقاداتك هیئت مجموعه سیدر . اشته (سیستم système) بوکا
دیرز . بناءً علیه بویه بر سیستم بنا ایدرکن ، اونك مالزومه انشائییه سی آره سنده کی
مناسبت منطقیه هر خصوصدن زیاده رعایته مجبورز . بوهنره دخی (معماری
علم l'architectonique) دهنیلدیکنی اولکی بابلرده سویله مش وایضاحات ویرمشدم .
شیمیدی بونلر خاطر کز ده اولسون ده ، اولکی بابلرده - بالخاصه ایکنجی
واوچونجی ده - تذکر و ملاحظه ایتمش اولدوغمز بر سور و مسئله لرندن ناصل بر
نظریه معرفت بنا ایده بیله جکز ؟. اونی دوشونه لم . باقالم ، شیمیدی به قدر کلیشی
کوزل بر طرزده اجرا ایتمش اولدوغمز تبعاتدن تحصیل ایده بیله یکمز معلومات
محیطه نه در ؟. ونه قدر در ؟..

صیره ایله کیده لم : اوله [عالم خارجی ایله انانیتمزك مناسبتی le rapport du
moi avec le monde extérieur] حقنده اك مشهور فیلسوفلرك بیان ایتدکلی
ملاحظات - خلاصه اولسون - بر کورده لم؛ صوکره بز، زمانمز بسیقولوزی سنك

و بر دیکې صلاحیت طایانه رق بر نظریه ترتیب ایتمکه چالیشالم. کندیز برشی یا پامازس ق، هیچ اولمازسه برندن برینی قبول ایدرز .

اونو تمایکیز که بوتون فلسفه ، بوتون علم او مناسبتدن طوغویور ؛ شونی ده اونو تمایکیز که بوکون بو مسئله له متعلق مناقشاده اک صلاحیتدار حکم (بسیقو- لوزی) در .

او حالده بو مسئله نك منشائی و صورت تولدینی آ کلامق ایچون ، تاریخ فلسفه بر (نظر رجی regard retrospectif) عطف ایتمکه مجبورز .

یونان قدیمده یتیشن و فلسفهی (اساطیر mythologie) و (دین religion) و تاریخ و (عنعنات traditions) ك تأثیر ونوژندن قورتاروبده مستقلاً تأسیس ایدن ایلك فیلسوفلر ادراك مسئله سنده پك مشوش فکرلر بیان ایتمشلردی . او و قتلر علوم صحیحه هنوز تولد ، (تعضی وتشكل organiser) ایده مه مش اولدوغی ایچون بوتشوش افکار طبیعی و ضروری ایدی .

(فعل ادراك l'acte de perception) ده (نفس مدرک) ایله (شی مدرک) ك تماس و تقابلی لازمدرکه (شعور conscience) حاصل اوله بیلسین . نته کیم بومهم شرطی ده بوندن اولکی باده ایضاح ایتمشدم. او حالده فعل ادراك ده نفسك دخی مهم بررولی اولق لازمکلیر. بزه برشینه تماس ایدوبده اونك اوصاف و کیفیاتنوع و یاخود وجودندن خبردار اولدوغمز زمان، بو حادثه ده انایتمزك وضعیتی منحصرأ (انفعالی passif) دکلدر ؛ بالعکس (فعلی actif) در . بویه اولدوغندن خبرمز اولسون اولما-ین! بونك حکمی یوقدر. فقط محقق درکه جمله عصیه مزك صورت فعالیتندن خبرمز اوله مادیفی ایچون حکمده خطا واقع اولویور .

ایلك فیلسوفلر بونی بیلیمورلر، و بناء علیه فعل ادراك ده کندی انایتمزك نه بویوك ونه مهم بر رول اوینا دیغی ده تقدیر ایده میورلردی. اونك ایچون بو معامله متقابله ده نفس انسانییه بر پای جیقار میورلردی .

بو جهت او قدر مهمدرکه نه ییسته مولوژی ده دور اخیرك اك بیوك موفقیتی او خطایی تصحیح ایتمك اولمشدر ، ده یه بیلیم. بوتون ترقیات علمیه و تفحصات فلسفیه اثبات ایده کلشدرکه فعل ادراك ده نفس انسانییه نك برنجی درجه ده بر رولی وارددر. حتی بالمله (موجودات حساسه êtres sensibles) ایچون قابل تطبیق بر قانون عمومی صورتنده بو ادعای تعمیم ایده درك بر دستور شکلنه قویان

فلسفه حاضر در . [کیفیت ادراك ، وسائطه تابعدر یعنی اجهزه حسیه ايله متاسبدر .] دستوری بوکون آرتق بر (حقیقت متعارفه *verité axiomatique*) در . بونی قبول ایتهمک ممکن اولمادیی ایچون زمانمزك فلسفه سی علی العموم (انفسیه *subjectivisme*) رنگنی آلمشدر .

[عالم حقنده حاصل ایتدی کمز علم ، آنجق بزم فعالیت ذهنیه مزك اثریدر ؛ حقیقت خارجییه عیناً مطابق اولماسی لازم کلز ۱ .] ده یه بیلورسحق آنجق ، او دستوره طایانه رق بویه بر ادعای مدافعه ایده بیلورز ؛ و کورویورسکزرکه - بویه دیملکه - حصول علمده کندی نفسمزه اك بویوك بر پای چیقارمش اولویورز ، اعتقاد عوامدن زمانمزك نظریات فلسفیه سنی بوسبوتون آیران سبب ینه بو طرز تفکر وبوسیاق نظر در . اسکی فیاسوفلر ، حصول علمده عالم خارجییه اك زیاده عطف اهمیت ایتدکلری ایچون اونلرک افکاری ، اعتقاد عوامه ده زیاده یقین ایدی . پسیقولوزی و فلسفه ترقی ایتدکجه آرده کی فاصله بوسبوتون آچیلدی ؛ نهایت بوکون بر مدھش اوچوروم اولدی .

اك بویوك فیلسوفلر ، بو اوچورومك اوزرینه بر آصمه کو پروقورمق ايله مشغول اوله کیشلر ، یعنی بداهت عالم ايله (انفسیت علم *subjectivité de la connaissance*) دعواسنی تألیف ایتکه چالیشمشلر در . حالا اك کوچ مسئله بودر و تماميله حل اولونما مشدر . فیلسوفلرک کنایه لی لساننده (رویقونی چمک *passer le Rubicon*) تعبیری ، ایشه بو کوچلکی ایما ایدر بر افاده مجازی در . [*]

(ثالہس *Thales*) دن (سقراط *Socrates*) دورینه کلنجیه قدر ظهور ایدن مشهور فیلسوفلر ، ادراك واسباب علم بحثنده پك چو جوجقه بعضی فکر لر بیان ایتمکله قالمشلردی . ذاتاً ، کیفیت حس وشعور حقنده ذره قدر معلومات صحیحیه مالک دکل ایدیلر . نه تجربه ممکن ایدی ، نه ده - بوکونکی معناسيله - علم واردی .

[*] بوتعبیری ومتضمن اولدوغی (رویقون) استعاره سنی اولاستعمال ایدن کیمدی ؟ . بیلدیورم ؛ فقط زمانز فیلسوفلری وبالخاصه (هاملتن) پك قوللانی ، بر جای اسمیدر (رویقون) اولکی فیلسوفلرک نظریه لری (حاسه سلیمه *bon sens*) یه پك یاقین و بناء علیه اعتقاد عوام ايله قابل تألیف اولدوغی ایچون آرده کی اختلاف غایت اهمیتسز ایدی . بناء علیه فلاسفه سالفه رویقونی بر آدیمده آکلایوب کجه بیلیرلردی . بوکون او کوچوک ایرماق مدھش بر نهر اولدی ، اوستنه کوارو قورمق بيله ممکن دکل ؛ ایشه تعبیرک کنایه لی معناسی بودر .

او وقتلر فکر تنقید دخی اویاناماش اولدوغی ایچون هر فیلسوف ، هر هانکی بر مسئله حقنده ، کندی ظننجه بر شی سویلر و اوکا - بلاملاحظه - اینانانلر دخی بولونوردی . اینانانانلر اولسه دخی قولای قولای او تورلو فرضیاتی رد و ابطال ایده منلردی .

او زمانلر ادراک ، یالکز (تماس) ایله تعریف اولونوردی ، و انجق عینی جنسدن اولان شیلرک یکدیگریله تماس کله می سایه سنده شعور حاصل اولویور ، ظن ایدیلردی . حتی بو ظن بر (متعارفه axione) قوتیله اذهان متفکرینه حکمفرما اولمقدی . [نیچون اویله اولسون؟.. نهدن شعور حاصل اوله بیلیمک ایچون عینی جنسندن ایکی شینک تماس ایتمه می لازمکلسین ؟ . ومثلا : انسان اغاچه تماس ایدنجه اونک وجودندن خبردار اولویورسه ، و بوده هر ایکسینک جسمیت اعتباریله عینی جنسندن اولملری اقتضای ایسه نیچون یالکز بزم و ارلغمزه وجودندن - بالئاس par contact - خبردار اولویورده اغاچ بزم وارلغمزه دائر بر فکر حاصل ایده میور ؟!] الی آخره !.. دیه بر دوشون ، بر شبهه ایدن اولمامشدی . حالبوکه فرضا بو آغاچ مثالی اورطه آتوبده اویله برسؤال صوران اولسه یدی ، حصول شعورده نفس انسانیه نک نه بویوک رولی اولماسی لازمکله جکی - هیچ اولمازسه - درحال سه زیله بیلیردی .

اکلاشیلان شوکه بعضی شیلری - وقتندن اول - دوشونه بیلیمک ، ظن اولوندوغی قدر قولای دکدر . (حقایق متعارفه) اولق اوزره تلقی ایدیلن بعضی یا کلش فکرلر دخی - احتمالک - ذهنک سربستی فعالیتنه مانع اولان اسباب قویه دن بری در . [*]

فکر تنقید ، انجق سقراط زماننده ظهور ایدن سوفسطائی فرقه سنک همی ایله اویاندی حتی ، اونلرک اک بویوک فیلسوفی اولان (پروتاگوراس) ، وضع ایتدیککی دستور ، شهر ایل ، هم معلوما تکزک (انفسی subjectif) اولدوغی ، همده

[*] تاریخک بو تورلو خطیئات حقنده کی شهادتی بویوک بر درس عبرتی متضمن در . حقیقی النده طوتمق ادعاسنده اصرار ایدن (دوغماتیزم dogmatisme) اوبانسه ، یعنی یقینونه قارشی شبهه ایدن فیلسوفلره حق و بریر . بوکونده حقایق متعارفه مقوله سندن عد ایتدیکمز بر چوق دستورلر واردرکه اونلری رد و ائسانه مقتدر اوله میورز . فقط اونلر خارچنده دخی دوشونه میورز . کم بیلیر ؟.. بلکه اونلرک بر چوغی ده - هنوز فسادینی کشف ایده مدیکمز - بر بویوک خطادر !..

(اضافی relatif) اولدوغنی بیان و تعلیم ایتدکدن ماعدا ، حصول علمده انایت بشریه‌نک اگ مهم رولی اوینادیغنی‌ده کوسترشمش اولدی . نته‌کیم بو مهم انقلاب افکاری - بوندن اولکی باده - نقل و شرح ایتشدم .

شیمدی دنیاده نام براقان اگ مشهور فیلسوفلرک بوعظیم مسئله حقنده بیان ایتمش اولدقلری افکاری - فلسفه تاریخلرندن تلخیص صورتیله - سزله عرض ، واک مهم نقطه‌لرینی تنویر و ابراز ایده‌جکم .

کیفیت ادراک حقنده ترتیب اولونان فرضیات فلسفیه‌نک اگ اسکیمی ، (آلقمه‌ئون Alcmeon de Croton) نام فیلسوفک تعریفی در . [**]

بو حکیم ، ادعا ایدیوردی که انسانک (cerveau) دماغ (ی (روح âme) ک مقریدر . ادراک‌ایدن اصل روحدر . مدرکات ، عالم خارجی دن کلیر و (احساسات sensations) صورتنده (حواس sens) مزدن کچرک دماغه واصل اولور و انجق اوزمان شعور حاصل اولور . بناءً علیه خواص بشره ، خارجدن وارد اولان احساساتی روحه نقل ایچون یارادلش برطاقم (جدوللر canaux) مثابه‌سنددر . مثلاً تنفس ایدرکن (قووق odor) دیدیکمز احساسات بورنمزک ده‌لیکارندن دماغزه قدر چقیبور و روحز اونی حس ایده‌رک اویله بر شینک وجودندن خبردار اولویور . کذلک قولاغمز دخی اویوق و ایچی بوش بر بورو کیی در . متحرک اولان هوا اوکا چارنجه صدا حاصل ایدیور ؛ قولاغک ده‌لیکندن اوصدا دماغزه قدر کیده‌رک روحزی خبردار ایدیور . فعل رؤیت ، پارلاق و شفاف اولان اجسامک کوزمزه انعکاسندن ایلری کلیور . کوزمزه ایچنده کی مایع اوانعکاساتی دماغه نقل ایدیور . الی آخره !.

بوفرضیه ابتدائیه‌ده شایان دقت اولان برایکی نقطه وار: اولان (آلقمه‌ئون)، احساساتی (آفاق بر شی objectif) ظن ایدیور . حواسمزی دخی دماغزه پیوسته اولان برطاقم بورولر کیی تلقی ایدیور ، و احساسات مذکوره‌نک صورت

[**] بو آدم ، یونان قدیم مستملکاتندن اولان سیجیلیا اطه‌سند (قروتون) شهرنده طوغمشدی . کندیبی مشهور (فیثاغور Pythagore) ک معاصری ، حتی شاگردلرندن بری‌در ، ظن اولونویور . طبیب ایمش ، و اوزمان طبیلری کیی فیلسوف ایمش . (مقولات catégories) حقنده اگ اول بر جدول یابان ینه بو حکیم اولمشددر . افکارینی ارسطو نقل و تنقید ایتشدر . قاموس فلسفه‌ده antinomies کله‌سه باقیکر .

انتقالی تعریفه چالیشیور . شوراسی ده شایان دقتدر که دماغه انتقال ایدن شی ، اشیای خارجیہ نك انجق بعضی کیفیاتی در . کندیلری و یا خود صورتلری دکلدر . بوکون بیلہ بوفکرده اولان آدملر چوقدر .

(فلازومن لی آناقساغور Anaxagore de Clazomène) ، - بالعمس - متجانس اولان شیلرک بربرینه تأثیری اوله مایه جغه قائلدر . اعتقادنجیه ادراک بر (تغییر changement) دن حاصل اولور . عینی جنسدن اولان شیلرک یکدیگریله تماسی اولنرده تغییراتی موجب اوله ماز ؛ مثلاً : ایچنده بولوندوغز محیطک درجه حرارتی وجودمزک کی ایله متساوی ایسه هیچ صیجاقلق حس ایتمیز . کوزمزک اشیایی وضایی کوره بیلیمه سی ده بالذات مظالم اولدوغنددر . یعنی ماهیتاً بربرینه ضد اولدقلری ایچونددر .

بزه قیریق دوکوک برحالده انتقال ایدن شو فکدرلده بر نقطه شایان دقتدر ؛ اوده : [حصول ادراک ایچون تغیرک بر شرط اساسی اولماسی] در . زمانمز یسیقو لوغلری حالا بوفکرده در .

(آمپدوقل Empédocle) ، بوتون اجسامده بر چوق (مسامات pores) اولدوغنی و اجسامدن بر طاقم (سیالات effluve) صدور ایتمکده بولوندوغنی ادعا ایدردی . [غایت لطیف و اثیری اولدوغنی ایچون کوزله کوروله مین او سیالات ، بک کوچوجوک اولان مسامات اجسامدن طیشاری جیقه رق انتشار ایدر و انسان دخی - بر جسم اولق حیثیتله - مساماته مالک اولدوغندن ، سیالات منتشره یی تلقی ایدر و بوضورتله ادراک حاصل اولور .] دیرایدی . اوزاقدن کورولن بر شینک ادراک اولونماسنی آنجق بو وجهله تعریف ایده بیلوردی . مثلاً : اوزاقدہ بر آغاچ کورویورم و اونک مستقلاً موجود بر آغاچ اولدوغنی ادراک ایدیورم ؛ کیفیت ادراک شو صورتله وقوعبولویور : آغاچ دیدیکمز جسمده بر چوق کوچوجوک ده لیکلر وار ؛ بنم وجودمده دخی طبعی اوله کوچوجوک مسامات وار . آغاچدن انتشار ایدن سیالات او ایچہ دلیکدردن جیقوب بنم وجودمک مساماتندن کیریور . ایهمته بوسایه ده بن او آغاچک وجودندن خبردار اولویورم . یعنی آغاچک سیالاتی بنم سیالاتله قاریشدینی ایچون ادراک حاصل اولویور . او حالده انجق عینی جنسدن اولان شیلر یکدیگرینی ادراک ایده بیلیرلر . (آمپدوقل) عناصر اربعه فرضیه باطله سننکده موجدی اولدوغنی ایچون ،

[صو ، صوبی طمانیه بیلیر : طوبراق طوبراخی ، هوا هواپی ، آتش آتشی بیله بیلیر !] دیهرك بو دعواسنی تأیید ایتك ایستور . فقط مادام که سیالات ، جسملردن آیریلوب دیگر جسملرله برله شیرور ، (افتراق و اختلاط séparation et mélange) حادثه سنی کیفیت ادراك ایچون بر شرط اساسی اوله رق قبول ایدیور . شو تقدیرم کوره بو حکیمك فکر نجه اشیا ایله - طوغرودن طوغرویه - بز تماش ایتش اولویورز ؛ اشیدان آیریلان اجزای لطیفه ایله بزم وجود مزدن آیریلان (عناصر متشابهه éléments semblables) یکدیگریله تماش کله رك بزده حصول ادراك که سبب اولویور . هم بعضاً اشیدان بزم سیالات وارد اولدوغی کیی ، بعضاً بزم وجود مزدن سیالات چیقوب اشیا به ملاقی اولویور و اولرك مساماتندن نفوذ ایدرك ، ناصل شی اولدق لرخی آ کلیور . مثلاً فعل رؤیعه ادراك بویه در : کوزومك مساماتندن سیاله لر (صدور émaner) ایدوب قارشیمده طوران آغاجك مساماته نفوذ ایتدکن صوکره بن ، اونك بر آغاج اولدوغی آ کلیورم . [*] حواس آره سنده کی فرقی و احساساتك تنوعاتی ، (آمه دوقل) ، مسامات اجسامك اختلافاتیه تعریف ایدیوردی : [حواس مزدن هر بری کندی مساماتیه (symétrique متناسب) اولان سیالاتی تلقی ایده بیلیر . چونکه آنجق او سیالات ، او حاسه نك ده لیکلرندن نفوذ ایده بیلیر .] دیوردی . بناء علیه آغزیمزدن و بورنمزدن کیره بیلان سیاله لر ، بزده (قوقو odeur) حسنی ویریور . هوا ی متحرك دخی - طبقی بر بوروبه کیرر کیی ! - قولاغزیه نفوذ ایدیور ، و اوراده صدا حصوله کتیریور . کوزمن ایسه بر (قنار lanterne) در . یعنی خارجه ده کوره بیلدیکی پارلاق شیلر دخی - نوعما - اویله اولدوغی ایچون متجانس شیلدر ، اولردن صدور ایدن سیاله لرله دخی متشابهدر ؛ او سبیله یکدیگریله اختلاط ایدنجه حس و ادراك حاصل اولور . الی آخره ! .

[*] بو (نظریه رؤیت thé. de la vision) بوتون قرون وسطاده مقبول اولمشدی . حکمای عرب عنده نده اک زیاده معتبر اولان بو فکر ایدی . عربلر ، بو حکیم یونانی طانیورلردی . اسمی کتب شرقیه ده (امبادلس) دیه مسطور و مشهوردر . عناصر اربعه یی ده اوندن آملرلردی . امر یقالی (ج . و . و . دره ی پر John Will. Draper) ك ادعاسنه کوره آمه دوقلك خطاسنی تصحیح ایله ایلک اوکجه طوغرو بر (نظریه رؤیت) ترتیب ایدن ذات ، (Alhazen) اولمشدر . بو آدمك مشهور ریاضیون عربدن (الحازن بن هیثم) در . اصل اسمی و کتیه سی (ابوعلی محمد بن الحسین) در ؛ حازن ، لقبی در . هجرتك در تیوز اوتوز سنه سنده قاهره مصرده وفات ایتدیکنی (ابن ابی اصیبعه) نقل ایدیور .

(آتومیزم atomisme) یعنی جزء فرد مذهبی نك واضعاری اولان (لوسیپ Leucippe) و (ده موقریت Démocrite) ك ترتیب ایتش اولدقلری (نظریه ادراك théorie de la perception) بوكون دخی اساساً مقبول و معتبردر. (کوملجنه مدرسه سی Ecole d'abdere) فی تأسیس ایدن بوآدملر ادعا ایدیورلردی که :

[بوتون احساسات و تصوراتمز (حادثات جسمانیه phénomènes corporels) یه ارجاع ایدیه بیلیر.] بوكونکی ماتریالیستلرك ادعای حلا بودر. بالخاصه ده موقریت او فکرده ایدی که : [احساسات sensations تأثیرات خارجیه نك بزده حصوله کتیردیکی تغیراتدن عبارتدر !] کوره جکز که ده موقریتك فلسفه سندن متفر اولان بعض متفکرین ایله برابر زمانمzk بوتون معروف بسیقوولوغلری ، بو فکری قبول ایتشلردر. [*] اجسامك یکدیگرینه و بالخاصه بزه تأثیرینی ، ده موقریت ، نهایت بر (صدمه choc) یه ارجاع ایدیور. مع مافیه ینه آمپه دوقلک فرضیاتندن متأثر اولدوغنده هیچ شبهه یوقدر. اولاً متجانس و متشابه اولان اجسامك آنحق یکدیگرینه اجرای تأثیر ایده بیله جکنی بو حکیم دخی بر حقیقت اولق اوزره قبول ایدیور؛ اوندن (صدور فرضیه سی l'hypothèse de l'émanation) فی تعدیل ایدره ك بنمیه یور ؛ (اوزاقدن تأثیر action à distance) ی باشقه تورلو تعریف ایده میور. بزجه (محسوس اولان شیلر objets sensibles) دن بر طاقم رقیق و اثری آتوملر صدور ایدیور ؛ فقط تماماً اوشینك شکلی و هیثنی محافظه ایدرك کوزمزده منعکس و مرئسم اولویور. اوزمان بز اوشینی کوروب وجودینی و شکلی ادراك ایتش اولویور. ده موقریت اشیادن صدور ایدن بوشکل خیالی یه : (ایدولون - idole) تعبرینی تخصیص ایدیور که آتوم نظریه سی ایله برابر بوفرضیه دخی عرفان اسلامه انتقال ایتشدر. حکمای عربك (شیخ) دیدیکی بودر. جمعی (اشباح) کلیر . لغت معناسیله : (بر شینك کولکه سی و صورتی) دیمکدر. کذلک ده موقریت، کیفیت صدایی ده عینی آتوم نظریه سیله تعریف ایدیور : اعتقادنجه صدا ، بر جریان بر (آقینتی - رهوما) در ؛ اشیادن صدور ایدوب هوانك [*] شبهه سز (عیناً قبول ایتشلردر.) دیمک ایسته دیکمه ذاهب اولمازسکز. عصرمن فیلسوفلری ایله ده موقریت آره سنده فکر و نظراعتباریله بویوک فرقلر واردر. فقط معاصرین دخی کندی اعتقادلرینی بوجه ایله افاده ایدیورلر دیمک ایستیورم. نته کم براز سوکره کوره جکز .

آتوملرغی اهتزازه کتیریر و اوسایده حاسه سمعیه من واسطه سیله جسممزه داخل اوله رق روحمزه ذراتی ایله تماسه کلیر کلمز صدا حاصل اولور . یعنی ادراک تحقق ایدر . واقعا اشیان صدور ایدن (اشباح) ، وجودمزه هر طرفدن داخل اولور؛ فقط یالکمز کوزمزه کوروب قولاغمزله ایشیتدیکمه سبب شودر که حواس مذکوره ، اوخیالاتی ده چوق مقداره ودها زیاده قولایقله تلقی ایده بیله جک برصورتده یارادلمش و بو خدمته الیریشلی اوله جق وجهله ترتیب اولونمشدر .

شو غریب (اشباح فرضیه سی l'hypothèse des idoles) عادتا (غالوانوپلاستی galvanoplastie) بی آکدیریور . اشیای مرئیه دن ، نامعدودائیری آتوملر قلوب - او اشیانک اشکالی تماماً و عیناً عرض ایدن کولکلری کیبی - بزم بدنمزه هر طرفدن وبالخاصه اجهزه حسیه مزدن ایچمزه کییریور؛ همشکلی قطعاً بوزولمایه رق کییریور !.. غالباً روحمزه انجق او (شکل ظلی) ایله تماسه کلدیکی ایچون اونی ادراک ایده بیلیور . واحتمالکه بو (شبح) خارجده مستقلاً موجود بولونان (شئی معین l'objet déterminé) ک ، ذهنمزه مرتسم اولان (شکل استحضاری forme representative) سی در . نوعما فوطوغرافی سی در .

ده موقریتک بوفکرلری بزه قیریق دوکوک انتقال ایش و قطره قطره ترشح ایله مش اولدوغی ایچون ناصل دوشوندوکنی پک لایقيله اکلایه میورز . فقط یوقاریده تفسیرایتدیکم وجهله دوشونویور و دوشوندوکندن اومعنائی مرادایدیور ایدی ایسه ، شبه یوقدرکه ده موقریت (استحضاریون representationnistes) دن صایلمق ایجاب ایدر . حتی اونلرک پیری و برنجیسی عد اولونمالی در . چونکه اشیایی ، بالذات دکل ، ذهنده مستحضر بولونان اشباحی واسطه سیله بیایور ایش دیمک چیقار .

بومشله نکه نه قدر مهم اولدوغی آکلایه بیله جک درجهده بوبحث ایله الفتکز واردر ؛ فقط اهمیتنی - دور حاضر فیا سوفرلندن بحث آجدیغمز زمان - لایقيله وتماميله تقدیر ایده جکسکزدرد .

احساساتمزه - حد ذاتنده - عالم خارجی نکه بزه ایقاع ایتدیکی (تأثیرات impressions) در؛ او تأثیرات خارجیه نکه بدنمزه واسطه سیله روحمزه قدر دوامی وانتقالی در . (کیفیات محسوسه propriétés sensibles) آرمسندگی فرق ، خارجدن وجودمزه ووجودمزدن روحمزه انتقال ایدن (حرکات mouvements) آرمسندگی

حس ابتدیکمز (باشقهلق) دن عبارتدر . حواسمز عینی سعه و مرتبهده دکلددر . (لامسه le tact) ، وجودك هر طرفندن منتشر بولوندوغی ایچون (احساسات عمومیہ - sensations générales) ویریر . بونلره فلاطون (تأثرات عمومیہ) نامی ویریور . صیجاقاق، صوغوقلق ، آغیرلق، خفیفلك کبی .! فلاطونك بو مسئلهده غایت مهم برفکری وارکه شایان دقتدر : بو حکیم قطعاً ادعا ایدیورکه، بزده حاصل اولان احساسات ، (عناصر جسمانیہ éléments corporels) مزه طیشاریدن انتقال ایدن برطاقم حرکاتدن باشقه برشیلر دکلددر . نته کم بو کونکی علما دخی عینی ادعاده بولونویورلر . یالکز افلاطون ، حرکات مذکورہنك [یعنی بو کونکی تعبیرہ کولہ اهتزازات vibrations ك .!] طرز انتقالی و صورت تأثیرینی غریب بر وجهله تعریف اتمکه چالیشیورکه زماننده معتبر اولان معلوماته مستند بر فرضیه تشکیل ایدر، و بونده افلاطون معذوردر . مثلاً (حس حرارت sensation de chaleur) ، بو فیلسوفه کوره (اجزای ناریه) نك بدنمه داخل اولماسی و بزم عناصر جسمانیہ مزده (انحلال - décomposition) حصوله کتیرمه سندن ایلری کلیور؛ زیرا آتشك اجزای فردیهسی، غایت کوچوك و نافذ و صوك درجهده (جوال mobile) اولدوغی ایچون وجود مزه بك قولای کیریور و اونك عناصر مادیه سنی تحلیل ایدیور . بر حاسه عمومیہ اولان (لامسه) دن صوکره (ذائقه le goût) ایله (شامه l'odorat) کلیرکه بونلر (حواس متوسطه sens intermédiaires) در؛ بونلر واسطه سیله (حواس عالیہ sens supérieurs) یه ارتقا ایدره رز . اونلر دخی (سامعه l'ouïe) ایله (بصره la vue) در . صدا، هوانك اهتزازندن حاصل اولور؛ او اهتزازاتی قولانمز دامارلرمز واسطه سیله دماغه واورادنده روحه ایصال ایدر . بناء علیه بوراده واسطه انتقال هوادر . فعل رؤیت ، بوندن فرقلی در : اشیای خارجیه دن (صدور émanation) ایدن ضیا ایله بالخاصه کوزمزدن انتشار ایدن نورك یکدیگریله تقابلی و تماسی سایه سنده (کورمك) ممکن اولویور . شو تقدیرجه فعل رؤیتده باشلیجه واسطه هوا دکل ضیادر و یالکز کوزمزدن خارجه چیقان نور ایله برشی کورمك احتمالی یوقدر . بنور بزدن صادر اولوب فضاده یورومه لی، اشیانك نشرایتدیکی ضیا ایله قاوروشوب تماس اتمه لی در . کیجه وقتی بر شی کورمه دیکمزه سبب اشیا دن ضیا انتشار اتمه می در؛ یوقسه بزم کوزمزینه نور اصدار ایدیور؛ فقط ضیای متقابل بوله مادیفی ایچون برشی کورمه میورز .

افلاطونك بالطبع يك چوقچه اولان شو معلومات و ملاحظاتندن
 اكلاشيليوركه ، كندى اعتقادنجه ، بزم كوزمزدن بر نور چيقوب ، فضاذه
 اشيائك نشر ايتديكى ضيائي قارشيليور؛ اونى بولونجه تماس ايدىيور و آلوب دماغنزه
 برابر كتيرييور . دماغنك دامارلى واسطه سيلده روحنزه واصل اولويور ؛
 او وقت روحن ضيائي و اشيائي ادراك ايتش اولويور .

بو كهنه و دكرسز فرضياتك بزم بوكون قطعاً لزومى يوقدر ؛ لكن بونلرى
 مختصراً كوزدن كچيرمك ايسته ديكمزه سبب ، نه يسته مولوزى نك اصل و اساسنى
 تشكيل ايدن (انفسيت ادراكات subjectivité des perceptions) عقیده سنك
 ناصل طوغمش و كيت كیده نه شكللره كيرمش اولدوغنى تحقيق ايتك مجبورتى در .
 هر هانكى بر فيلسوفك مذهب و مسلكى ، كندى ترتيب ايد بيلديكى نظريه معرفته
 تابع بولوندوغى كيى ، او نظريه معرفت دنخى (ادراك perception) مسئله سنه
 دائر بيسان ايدم جكى فرضياتدن شدتله متأثر اولور . بوكون ينه بويله در . اونك
 ايچون بونلرى بيلمك مجبور يتمده يز .

شيمدى افلاطونك - يك مختصراً عرض ايتديكم - شو فكر لرلندن
 آكلاشيليوركه : بو حكيم ، اولاً مكانك استقلال وجودينه اينانييور . صوكره كرك
 بزم كوزمزدن صدور ايدن نورك ، كركسه اشيادن انتشار ايدن ضيائك ده
 (شئيت objectivité) نه يعنى ، اونك ده مستقلاً موجود اولدوغنه اينانييور .
 دماغى روحك بر كرسى سى ، بر (طوراق یرى) اولمق اوزره تاقى ايدىيور .
 اجهزه حسيه من ايله دامارلر منى ده بورولردن و قاناللردن (متشكل) بر طاقم
 و سائط نقله دن عبارت كورويور . مع مافيه اشيائى خارجيه دائماً (كون و فساد)
 يعنى تغير اوزره بولوندوغى ايچون اونلرك حقيقته و بناءً عليه مدركات حسيه نك
 موجودات صحيحه تعلق ايتديكنه اينانييور . كوردو كز البت خيالاتدر . اونلرك
 (عالم عقلى le monde intelligible) ده مكمل اوله رق ايلك نمونه لرى واردر . افلاطونك
 (نمونه نخستين archétype=prototype) ديديكى مكمل موده لار ايشته بونلردر .
 بزم شرق حكما سى بونلرى (مثل فلاطونيه) و (ماهيات) ديه ترجمه و قبول
 ايتشلردر . اونلر مجرد بر طاقم اشكال هندسيه دن عبارتدر . بزم اشيائى حقيقه
 ديديكمز و اويله ظن ايتديكمز موجودات خارجيه ، ايشته او ماهيات مستقله نك
 او (اعيان ثابت) نك قابا صابا (قويه - نسخه - copie) لريدر . فلسفه ، اصل

ماهيات اشيا به انفاذ نظر ايتمکدر. چونکه حقايق اشيا اونلر در. کوروب طوتدوعمز شيلر دکل !. بوکا موفق اولمق ايجون کوروب طوتدوعمز شيلره يعنى بالجله محسوساته اينانامالى ؛ بناء عليه (کثرت ده وحدت l'unité dans la pluralité) آرامالى وبوتون برصنفده داخل اشيا نك ماهيت عموميه ومشرکه سنى - بالتجريد - کشف ايتمهلى در. مثلا حواسمزله بر چوق آغاچلر ادراك ايدهرز. الما آغاچي ، جويژ آغاچي ، سروى آغاچي الى آخره !.. صوکره بويوک الما آغاچي ، کوچوک الما آغاچي ؛ اوراده کى الما آغاچي بوراده کى الما آغاچي ؛ قورومش الما آغاچي ، ياشارمش وکوکرمش الما آغاچي ؛ الى آخره !.. بونلر - که بر سور و افراد مکرره در - محض خيال و جلوۀ فسون در. بونلرک جمله سنك اصلى و مکمل نمونه سى (ماهيت شجر l'idée d'arbre) در. نه قدر اشجار محسوسه وارسه ، هيسنى فکرمز ايجون (مدارج اعتلا) عد ايدهرک على العموم و على الاطلاق (آغاچ فکرى) نه قدر چيقه بيلملى يز که بوتون اشجار ممکنه نك حقيقى ايشته اودر. بوده تجربه ايله اوله ماز ؛ چونکه بر مهم (عمليه ذهنيه opération intellectuelle) در . آنجق عالم محسوساتدن (تنزيه نفس) ايدهرک دوشونمک و کثرتدن وحدته ؛ مادياتدن معنايه ؛ خصوصياتدن مبدأ عمومى يه ، درجه درجه يوکسلمکله اولور . افلاطون لساننده (ديالکتىک dialectique) يعنى (علم کلام) [*] بودر. بو علم مابعدالطبيعاتک (اصول méthode) نى تشکيل ايدر .

درسمز فلسفه تاريخى اولسه يدى و اونى ده بن سزله ايسته دیکم کى اطرافيله ايضاح ايدوب آ کلاته بيلمش اولسه يدم ، افلاطونک شو فکدرلرنده بوتون قرون وسطى فلسفه سنك منابعدن پک مهم بر نى کوروردیکز ؛ آ کلاردیکز که الی يوز سنه مدته بيهوده مناقشاته سبب اولان (ره آليزم Réalisme) دعواى افلاطونک ماهياتى موضوع بحث ايتمکدن طوغمشدر ؛ و بزم شرق فلسفه سنه ده

[*] (علم کلام) ، بزم حکماى شرقک وضع ايتمش اولدوغى بر تعبير مشهور در که بوکون (الهيات théologie) معناسنده تلقى ايديليور . اصل (dialectique) مقابلى در. فقط الهياتده ده اصول آنجق (ديالکتىک) اوله يله جکى ايجون ، اصولک اسمى علم مذکور علم اولمش اولوبور ديمکدر . فى الحقيقه الله تجربه ايله بولونه ماز . اثر دن مؤثره انتقال ايديله رک وجوب ذاتيى ، بر (علت اولى cause première) و (مبدأ اشيا le principe des choses) اولمق صورتيله تصديق اولونور . بوده آنجق محاکات متسلسله يعنى (ديالکتىک) ايله اوله بيلير . قاموس فلسفه ده بو تعبيره باقیکز .

عیناً انتقال ایده‌رك (هویت شخصی) ایله (صورت جنسیه ونوعیه) شكلنده عصر لرحه مباحثه‌سی سورمشدر .

افلاطونك شو مذهب مشهوری ، حد ذاتنده (idée) لری ، یعنی (prototypes) عد ایتدیکی ماهیات مجردیه ، (حقایق اشیا les réalités des choses) اولوق اوزره طانیدینی ایچون (ایده آلزم idéalisme افشاریه) نامنی آملقه برابر ، او ماهیاتی فضا ده ، یا خود بر عالم اعلا ده مستقلاً موجود و (غیر مخلوق non créées) اولورق قبول ایتدیكندن طولانی ده (ره آلزم Réalisme حقیقیه) توصیفنه شایان کورولمشدی .

بوکا قارشى ارسطونك فكر لری بك مهم وضد بر جریان آچمش و بوده عیناً قرون وسطایه انتقال ایده‌رك - بیتمز توكنمز - مناقشه‌له سبیت ویرمشدر .

ارسطو حس واسطه‌سیله حاصل اولان ادراک (نه‌سنی سیس) دیورکه لغت معناسیله (طویغو) بودر ، و بو (حیات حیوانیه la vie animale) نك شاندندر ؛ صفت کاشفه‌سیدر . لکن بو (قابلیت تحسس) ، حد ذاتنده (بالقوه) موجوددر ، و او اعتبار ایله (کیفیات متضاده propriétés contraires) بی تلقی ایده‌بیلیمک اقتدارندن عبارت قالیر . مثلاً (لامسه) مز هم صیجائی همده صوغوغی ، هم (خشین rugueux یعنی پورتوکللی) لکی ، همده (املس poli) یعنی دوزگون وقاییق) لغی حس ایتیمکه مقدردر . کوزومز هم بیاضی ، همده سیاهی کورمبیلیر . ذائقه‌مز هم آجیی هم طاتلی بی حس ایده‌بیلیر . الی آخره ... فقط حواسمزدن بری عالم خارجی ایله مناسبنده بولونماقچه ، هیچ بر نوع ادراک ممکن اوله‌مایه‌جفندن (طویغو) ، آنجق کندیسندنه بالقوه موجود بر قابلیتندن عبارت قالیر . اونك ایچون ارسطو بوکا (دینامیس) تعبیری وضع ایتمشدر . هنوز هیچ بر شیئه تعاق ایتمین بر (قدرت puissance) دیمکدر . لکن شایان دقتدرکه ارسطو اعتقادنجه بو قدرت (عاقل inerte) قائمه محکوم دکلدرد ؛ بالعکس دائماً فعله چیقمنه میال بر قوتدر . استاد یونانی نك بالذات دیدیکی کبی ، [اوکا میل ایدر :] بنساء علیه او قابلیتک قومدن فعله چیقوب تحقق ایتمه‌سی بر (تغیر changement) در . بوتغیر سایه‌سندنه روح ، بر (حالت نقص état d'imperfection) دن بر (حالت کمال état de perfection) کچر ، یعنی آنجق حس ایتیمکه قابلیت واز ایکن بالفعل

(حس ایدر) اولور . طبیعی روحه بو حرکتی افاضه ایدن ، خارجه کی اشیا ی محسوسه در .

ادراك ایچون روحك وسائط مخصوصه سی واردر که اونلره اجهزه حسیه دیرز . فقط بونلر ایکی قسم در . اولاً عمومی بر قابلیت حسیه واردر ، و بوتون وجود مزده منتشر بولونور . بونك مرکزی (قلب cœur) در . بیلدیکمز یوره کدر . کوکل دکل ! .

اوندن ماعدا حواس متنوعه مز واردر : ذائقه ، باصره ، سامعه ، شامه کیبی ! . بونلرک هر بری کندی مدرکات خصوصیه سنی روحه نقل ایدر . چونکه طویغوز (حاسه sens) لر مزك (غایه but) سی در . یعنی کندی قابلیت فطریه سیدر . لکن موجودات محسوسه نك تاثیراتی حواسه و صوکره روحه نقل ایده بیلمک ایچون بر (وسط milieu) ایستر . بو واسطه ارسطویه کوره مادی بر طاقم شیلدر . حاسه عمومی ایچون کندی بدتمزدر . سامعه ایچون هوادر . الی آخره ! . اجهزه حسیه مز ایله ادراك ایده بیلدیکمز طویغوزلری استاد یونانی اوچ صنفه تقسیم ایدیور ، اولاً ، هر حاسه نك مدرکات متنوعه سی و متخالفه سی وار : آجی ایله طاتلی ، سیاهله بیاض ؛ الح ! . کیبی ! بونلر (محسوسات خاصه sensibles propres) دیدیکی شیلدر . بونلر بالخصوص و علی الانفراد ادراك اولونه بیلیر . لکن بوراده شایان دقت بر جهت واردر که تعریف اولونمازسه غریب بر معما تشکیل ایدر : بو محسوسات خاصه نك برینی دیکرندن - روح - ناصل فرق و تعیین ایده بیلور ؟ . ناصل آجی بی طاتلی دن ، هر زمان آیره بیلور ؟ (تفریق سواد و بیاض) بحثنده ناصل اولوبده یا کیلمیور ؟ . البت بونلک ایچون دخی آریجه بر حاسیه مالک اولمالیدر ؛ زیرا محسوساتی ادراك ایچون آنجق بر حاسیه لزوم واردر . عقل ایله محسوسات ادراك اولونه ماز ! .

ایشته شو ملاحظه نك کوستردیکی لزوم اوزرینه ارسطو (حس مشترک sens commun) [*] نامنه بر (حاسه) ده ايجاد ایدیور ، و اونك مدرکاتنده

[*] بو تعبیر و اونك متضمن اولدینی نظریه یسوقولوزیه دخی عیناً و تماماً عربلره کچمش و مظهر قبول اولمشدره . حس مشترک ، بوتون حکمای اسلام طرفندن باشلیجه بر حاسه مستقله اولورق تعریف ایدلش و (حواس خمس باطنه) دن بری عد اولومشدر بوکا (خزینه صور محسوسه) دیرلردی . سقوجا فیلسوفلرینک (sens commun) ی بو دکادره بدهات حسیه دیمکدر . قطعاً کلهیه باقوبده شاشیر مامالی در .

(محسوسات مشترکه sensibles communs) دیور؛ ده‌ا اول بر حاشیه‌ده ذکر ی
 کچن (espèces sensibles) ده بو دیمکدر .

بو (حاسه‌مشرکه) ارسطونک ادعاسنه کوره لامسه ایله لمس اییدیور؛ سامعه
 ایله ایشیدیور ؛ باصره ایله گورو یور ؛ ذائقه ایله طاتیور ؛ شامه ایله قوقلو یور .
 الحاصل - علی الاطلاق هر طویغوی استشعار ایدن ، هر شیئی طویان اودر .
 بناءً علیه بوتون حواس خمسک (معطایات donnés) فی طویلابوب بیریکدیرن ،
 اونلری یکدیگرینه قیاس ایدرهک طانیان ، حواس خمسک - آری آری و علی
 الانفراد - عرض ایندیکی مدرکاتی (اعمال élaborer) ایدرهک (محسوسات
 مشترکه) بی استخراج ایدن ینه اودر . شو تقدیره کوره ارسطونک (sens
 commun) ی عادتاً (روح) کی بی بر شی اولو یور ؛ یالکز (rationelle عقلی)
 دکل ، منحصرأ (احساسی sensuelle) بر روحدر . (حرکت mouvement) ،
 سکون (repos) ، (امتداد étendue) ، (شکل figure) ، (عدد nombre)
 و (وحدت l'unité) کی محسوسات مشترکه بی ادراک ایدر ، [*]

بونلردن ماعدا برده (محسوسات عرضیه les sensibles par accident) صنفی
 واردر . بونلری عارضی اوله رق کندیمز تجارب ذاتیه مزله تحصیل ایدرهز . بناءً
 علیه بونلر (کسبی acquis) اولان مدرکاتمزی تشکیل ایدرلر . ارسطو بو صنف
 مدرکاتی تحلیل و تعریف ایدرکن غایت اهمیتلی بعضی ملاحظه لرده بولونمشدر . اولاً
 (معیت احساسات la simultanéité des sensations) ی نظر دفته آلیور و بوندن
 (تداعی association) حادثه‌سنه انتقال اییدیور؛ صوکره بعضی فیلسوفلر طرفندن
 حواسه اسناد اولونان احتمال غلط و خطایی (تداعی) ایله تعریف اییدیور؛ مثلاً:
 البیزه برکل آلوب قوقلادیغمز زمان اونک رنکینی ده کوروروز . لمس ایله ده بعضی
 کیفیاتی - عینی زمانده - ادراک ایدرهز . (معیت احساسات) بودر . اونک رنکی
 رایحه‌سنی وسائر اوصافی ده برابر اخطار ایدر . (تداعی دیدیکمز حادثه ذهنیه
 دخی بودر . حس ، خطا ایدرسه ، انجق بالتداعی خطا ایدر بیلیر .) بالذات

[*] بزم اسکی فلسفه کتابلرنده (حرکت) ، (سکون) ال آخره ! . کی بی موضوعات آری
 آری مسائل فلسفیه دن صاییلیر و باشلی باشنه (بحث) لر تشکیل ایدر . عرفان اسلامک
 بو یوک آبدلرندن بری صاییلان (شرح مواقف) نام اثر فلسفی ده بویه در . بو تصنیف
 و بو اسلوب تبع ، ارسطونک شرق حکما سی اوزرینه نفوذ معنوی نی اثبات ایدر .

محسوس (sensible par lui-même) اولان شیلرده آلدانماسی، یا کیلماسی ممکن دکلدر. فرضاً: یاغمورلی و مغموم هوالرده اکثریا کوك گورلر. بن، ینه مغموم برهواده او طهمده اوطورورکن کوك کورولتوسنه بکزر بر شی ایشیدیرسم، همان کوك گورله دیکنه حکم ایدرم. بو بر اثر تداعی در. مع مافیه اوزاقدن کلن بر طوب صداسی دخی سامعه مده عینی تأثیری ایقاع ایده بیلیر؛ اکر حقیقتاً ایشیتدیکم کورولتونک بر طوب صداسی اولدوغی تحقیق ایدرده بنم حساً یا کیلمش اولدوغم ثابت اولورسه، تداعی سبيله بویه بر خطایه دوشمش اولدوغمده شبه یوقدر. او تورلو کورولتوی- هوانک مغموم اولماسی طولایسیله- کوك گورله- می ظن ایششم. مغمومیت هوا ایله او کورولتو آره سننده کی نسبت (واجب nécessaire) ایش کیبی دوشونشم؛ حالبوکه اورابطه انجق (عارضی accidentelle) در. بو کیبی احوالده بی یا کیلتان بالذات حواسم دکل، او حواسک معطایاتی یا کلش تفسیر ایدیشم در. دیمک اولویورکه قباحت کوزمک کوردوکنده، یاخود قولانمک ایشیتدیکنده دکل، بنم اونلره - کندی عقلمجه - معنا ویریشمده در. احوالده یا کیلان عقلدر، حس دکل!... نته کیم بونوع خطالری بالحا که تصحیح ایدن ینه عقلدر.

ارسطونک بو دقتلی (تحلیلات analyses) ی، بو طوغرو ملاحظاتی چوق قیمتلی در، چونکه (تداعی) نك غلطات حسیه ده اجرا ایتدیکی فسون تأثیری کوستریور؛ اوندن ماعدا بعضی حادثات آره سننده تلقی ایتدیکمز مناسبات اکثریا عارضی اولدوغی حالده اونی واجب و ضروری ظن ایتمکه میال بولوندوغمزی ده کوستریور. صوکره (حقایق واجبه ایله حقایق تجربیه vérités nécessaires et vér. expérimentales) آره سننده فرق آرامق ایچون ذهنه یول کوستریور. خلاصه بر چوق مسائل مهمیه وجود ویریورکه اونلرک جمله سی ده - ماهیتلری اعتباریه - نه بیسته مولوژی موضوعاتنددر.

ارسطو، هر شیده وهر خصوصده (شکل forme) ایله (ماده matière) بی ده فرق ایتمکده پک ایلری وارمشدی. استادک بو نظریه شخصییه سی ده - افکار سائره سی کیبی - طاقیله اخلافه وقرون وسطایه انتقال ایدره ک زیاده سیله معتبر و مشهور اولوب قالمشدی. اسلام حکما سنک پک اهمیت ویردیکی (هیولی و صورت)

بحثی بودر. [*] ارسطونک فیکرنجه هر شینک اولا بر (ماده ابتدائیه سی) واردرد؛ (ایللی پروتی prima materia-matière première) بودر . بوده هر نوع صورتدن عربی و عوارض تشکلدن بری فرض اولونان (جوهر اشیا la substance des choses) در . بو حالده ماده آنجق (بالقوه in virtus) موجوددر ؛ اونک (بالفعل in actu) تحقق ایده بیلیمه سی شکل ایله ممکن اوله بیلیر . شکله ارسطو (مورفی) و یاخود (ایدوس) دیر ایدی . حکمای اسلام بونی (صورت) لفظی ایله ترجمه ایتشلردر .

استاد یونانی شکله زیاده سیله اهمیت ویریور . (شکل هر شینک روحی در ؛) دیور . مبحث ادرا که دخی بو فکری تطبیق ایدیور و بوسایه ده کندینه خاص بر نظریه معرفت وجوده کتیریور :

بدایت بچده ایضاح ایتدیکم ایچون ، خاطر کزده اولسه کر کدر که بو حکیمک اعتقادنجه - لا علائعین - (طویغو ، نه سنی سیس) بزم حواسم زده (بالقوه !) موجود بر (قابلیت = ذینامیس) دن عبارت ایدی ؛ فقط بو قابلیت (بالفعل !) تحقق ایدوب (معین بر طویغو) اوله بیلیمه سی و بر صورت مخصوصه ده تظاهر ایتمه سی ، یعنی همه حال بر شکل آلماسی شرط ایدی . مثلاً تورلو تورلو رنگر طویمق اقتداری کوزده بر قابلیتدر ، لکن بو قابلیت هنوز قوه ده قالدقجه ، نه قیرمزی در ؛ نه سیاهدر ، نده مائی ویا یشیلدر . بو رنگرک هر بری (کورمک قابلیت) نک - قوه دن فعله جیقارکن - اکتسا ایده جکی اشکال مخصوصه در که طویغو آنجق او شکلله (تعیین se déterminer) و (تشخص se personnifier) ایده بیلیر .

(ارسطو (روح حیوانی l'âme animale) ده بو قابلیت بر خصلت اساسیه عد ایدیور . [**] خارجدن اجرای تأثیر ایدن اشیا روحمه کندی شکلرنی

[*] حکمای اسلام ، یونانک (ایللی) کله سنی (ماده) لفظیه ترجمه ایتک ایسته مه مشلره عیناً آلوب تعریب ایتشلر . (هیولی) یازوب (هیولا) اوقومشلر . بوکاده سبب عربجه ده تماماً بو معنایی افاده ایدر بر لفظ بولونه ماماسیدر ؛ زیرا (هیولا) بیلدیکمز ماده دکل ، هر تورلو اشکالدن معرا بر جوهر ابتدائی در . حقیقته اوله بر شیده یوقدر .

[**] ذوی الحیاتی ارسطو اوج صنفه تقسیم ایتشدی . نباتده (نفس نامیه âme végétative) حیواننده (نفس حساسه âme sensitive) انسانده ده بونلرله برابر (نفس ناطقه âme rationnelle) واردرد ، دیمشدی . فلاسفه اسلام بو فکری ده عیناً قبول ایتشلردر .

ویریور. حکیم یونانی نك كندی تعبیر تشبیهی نتیجه : [بالومی برمهرك - آلتوتی
 ویاخود گوموشنی یعنی بالذات ماده-سنی نقل ایتمهرك - ناصل یازیسك شكلی
 آیورسه، روح دخی اشیای خارجی نك یالکز صور (انطباعات impressions)نی
 تلقی ایدیور. ماده-سنی آیور.] ایشه او انطباعات (اشكال محسوسه formes
 sensibles) دیدیکی شیردر. ایشه بوندن طولاییدرکه او فیلسوف روحی (محل
 صور = طوپوس طون ایدون ، le lieu des formes) عدایدیور. اوحالده اشیایه
 علممز، صور اشیانك روحزده بولونماسدن عبارتدر؛ فقط ماده لری خارجه در.
 روح، ادراك ایتدیكی شكلك - (حالاً actuellement عینی identique) اولویور.
 او تقدیرجه روح، شكلاً هرشیدر : کوردوکی رنكك ، ویاخود آغاچ صورتك
 عینی در. یعنی شوآنده کی احساساتی نه ایسه روح عیناً اودر. او احساساتی ادراك
 واستشعار ایده بيلمك ایچون آریجه بر (روح مستقل) تصور ایتمهك حاجت یوقدر.
 (نفس حساس l'âme sensitive) ی (احساسات حالیه sensations actuelles)
 ایله برطوتان بونظریه غایت داهیانه بردوشونوشدر؛ (اشباح idola) فرضیه-سنی ده
 قطعاً رد وابطال ایدر. بیلورسکزکه :

براز اول بسط وایضاح ایتمش اولدوغم او فرضیه یه کوره : [اشیادن
 بر جوق (ذرات رقیقه atomes subtiles) صدور ایدوب اوشیلر شكلی عیناً -
 بر فوطوغراف کبی - (لوحه خاطر) نقش وروحه عرض ایلردی . بزم
 ایچمزد کیزی بولونان روحز دخی او اشباحه یعنی اشیانك فوطوغرافی لرینه
 باقهرق وارلقلرندن وکیفیاتندن خبردار اولوردی . بو فرضیه نك بك بویوك بر
 قصوری ، بر مهم محظوری واردی . فعل ادراكی تعریف ایچون ترتیب ایدلمش
 اولدوغی حالده اونی هیچ تعریف ایتمش اولوردی .

اشیانك اشكال وخیالاتی عالم خارجی دن قالدیروب - بدنمرك ایچنده مستقلاً
 متمكن فرض اولونان- روحه عرض ایتك، فعل رؤیتی تعریف ایتك صایلماز.
 اوزاقدن کورولن برشيك، یاقیندن خیالی کوردو کمزی ادعا ایتمكدن عبارت قالیر.
 فرضا : طبقی نه وندن طیشاری چیقه مایان بر آدمك ، طانیق ایسته دیکي شیرلی
 کوره بيلمك ایچون فوطوغرافیلرینی کتیرتوب - اوطوردوغی یرده - تماشا ایتمه-
 سه بکزر ؛ ویاخود بك اوزاقد بولونان بر آدمك مثلاً ویلسونك ، غزه لرده

فوطوغرافیسنی کوروب چهره شخصیتی حقنده بر فکر حاصل ایدیشمزه بکزر. لکن (کیفیت رؤیت) ناصل شیدر؟. بونی اوفرضیه ایله هیچ تعریف ایدمه یز. ارسطونك احساسات حاضرینی تغیرات روحیه عطف ایتمه سی، وهله روحی لایقغیر بر جوهر کیبی تلقی ایتمیوب احساسات حاضره نك عینی عد ایتمه سی، البته جوق مهم ودرین بردوشونوشدر؛ بوکون حالابر جوق بویوك فیلسوفلر بو فکر کردن ایی بر فرضیه کشف ایدمه مشلردر.

بوندن اولکی باده سر ویلیام هاملتنك تصنیف مذاهب ایچون ترتیب ایتمش اولدوغی پلانی و اوکا دائر افکار و ملاحظاتی عرض ایدرکن (ماهیت نالته tertium quid) فرضیه سیله بوکا قارشى (تغیرات وجدانیه changements d'état d'âme) نظریه سنی تعریف ایتمشدم. کوروویورسکزه (ماهیت نالته) فرضیه سی، ده موقریتك (اشباح) ندن طوغمشدر. ایکنجی فرضیه نك ده ارسطونك ده ملاحظاتندن طوغدوغی آشکاردر.

شبهه یوق که بو فکرلر - حتی بوکونکیلر بیله! - انجق بر طاقم فرضیات معقوله دن عبارتدر؛ و او سببیه (سرادراك le mystère de la perception) - قارشیمزده - هنوز اصم وایکم طوران مدهش بر معماردر. مع مافیه فرضیات متنوعه نك (قیمت اضافیه valeur relative) لری یوق دکلدرد. کندی لزومسز - لغته بالذات دلیل تشکیل ایدن بر فرضیه البته سائرلرندن قنادر. ایشته (اشباح) فرضیه سی و اساساً اوندن هیچ فرقی اولمایان (ماهیت نالته) فرضیه سی و بوتون امثالی بویه در. نفس مدرك ایله، ادراك اولونان شیرل آره سنه بر اوچونجی شی صیقیشدیره رق، کیفیت ادراکی تعریف ایتمك، هیچ تعریف ایتمك دکلدرد. [بن شوقارشیمده کی آغاجی ناصل اولوبده کوروویورم؟..] دیه صوردوغم زمان: [سن اغاجك کندیسنی طیشاریده کورمیورسك ده موقریتك دیدیکی کیبی اونك شیعی، کولکمه سی لوحه خاطرکده ترسم ایدیور؛ اورسی - ایچریده - روحك کوروویور!.. یاخود بو کونکی لرك دیدیکی کیبی سن او آغاجدن بر (خیال image) آلورسك؛ بالذات آغاجی کورمیورسك؛ ذهنك اوخیالی کوروویور!..] دیه جواب ویریلیرسه، اونكه تشفی ایدمه جکم طبیعی در؛ چونکه بن [ناصل کوروویورم؟..] دیه صوره مشدم. اوسؤالی ینه ایراد ایدمه بیلیرم؛ [اغاجك کندیسنی دکل، شبحی یاخود خیالی روحی یاقیندن وایچریدن کوروویورمش!..] ایی اما

ناصل کوروپور؟ ایچرمده روحك بر خیال کورمه سنی تعریف ایچون ینه بو قضیه یی - ایچرمده وقوعه کلن معامله یه - تطبیق ایتك لازمکلیر ، بو صورتلدهده بهوده بر (دور وتسلسل cercle vicieux) کردابنه قاپیلوب مسئله یی نامتناهی یه قاجیررز . حل ایتش اولما یز !..

بونقطه مهمه یی حقیله آکلاما کری ایستهرم ؛ باقیکز ، اشباح فرضیه سنك لزومسزلنی ناصل ثابت اولور . باقیکز ناصل اتحار ایدر :

خارجده دکل ، لوحه خاطرمدده ترسم ایدن خیال ، البته خارجده طوران (حقیقی آغاج) ك كندی دكلدر . ذهنمزه اودون کیره مزه . بالطبع اونك رسمی در . اکر بورسم ، روحزدن وروحزك هویتنی تشکیل ایدن حسیات وانفعالاتزدن بوسبوتون آیری برشی ایسه ، یعنی بر (ماهیت ثالثه) ایسه ، لوحه خاطرمدده مرتسم اولان او خیالی ، روحزك هانکی کوزله و ناصل کوروپ ادراك ایدم . بیلدیکنی ، یکیدن تعریف ایتك اقتضا ایدر . (tertium quid) فرضیه سنندن باشقه سننده اعتبار و اعتماد ایدمه جك اولورسوق اپك اوجنی قاجیررز : مسئله نامتناهی یه قدر تسلسل ایدر ؛ چونكه لوحه خاطرمدده کی خیالك تکرار بر خیالی فرض ایتك مجبوریتندن قورتوله مایز . حالبوکه بو ایکنجی خیالی روحزك ناصل و هانکی کوزله کوره بیلدیکنی تکرار صوروب آکلامق ضرورتی باقی در . بونك ایچون ده ایلک خیالك خیالئنك خیالئنك خیالی ... الی آخره تکثیر ایتش اوله جغز . برنجی (cliché) دن - بهوده یرم - بر جوق ضعیف قویله لر یامش اوله جغز !.. یوق اکر باشقه بر فرضیه ترجیح ایدم جك ایسه ك (اشباح فرضیه سی) نی - لزومسزلنه بنشاء - آتمش اوله جغز !.. خلاصه ، اشیا ایله (نفس مدرکه) آره سنه بر شخص ثالث صوقق ایله تعریف ، ایشی حل ایتمکدن زیاده قاریشدریور . حالبوکه خارجدن آدیغمز (واردات حسیه وفکریه) نی - براوچونجی نوع موجودیت عد ایتمیوده - (برطاقم تغییرات وتطورات وجدانیه certains changements et modifications de la conscience) اولوق اوزره تلقی ایدرسه ك یوقاریده ماهیتنی ایضاح ایتدیکم محظوره محل قالماز . بو ایکنجی فرضیه معمای وجدانی لایقوله حل ایدر ، دیمك ایسته میورم ، یالکز برنجیسندن ده معقولدر ، دیورم ؛ هر حال دهه موقریتك كنه ترجیح ایدیورم .

بوتون بو استشهادات تاریخیه دن مقصدم ده بو کونکی نه پیسته مولوژی مسائلنک نه زمان و ناصل طوغمش اولدوغنی ، هله نه بیوک صیقینی لرله طوغه بیلیمش اولدوغنی سزلره کوسترمکدر. فلسفه ایله اشتغاله باشلایان طایفه افندیلر ، اک اول شونی ابی بیلیمه لی درلرکه فلسفه مسائلی - جهله خواص و عوامک ظن ایتدیکی کیبی - کبی اوله رق اویدورولمش شیلر دکلدرد. ده ای بشرک بداهت عالم حضورنده فعالیتله کله سندن طوغمش و مدنیتله بویویه رک بر شکل مخصوص آلمش اک مهم (بیلیمجه) لردر .

اوبیلیمجه لری تمامیه حل ایده میور ایسه کده ، هر حالده تقریبی اوله رق ترتیب ایده بیلدیکمز فرضیات ایله کائناتی آ کلامغه چالیشیورز ؛ وظیفه منری تعیین و حیاتی منری - ابی کوتی - اداره ایدیورز .

بویوک و مجدد فیلسوفلرک اک بویوک خدمتی یکی بر نقطه نظر کشف ایتک و (حیات انفسیه vie subjective) جریانه یکی بر (استقطاب polarisation) ویرمکدر . فکرو نظره بویله بر استقامت حدیده ویرن دوشونجه لرک منبی دخی بر (نظریه معرفت) در .

کوروپورسکنزکه ارسطو ، او بویوک فیلسوفلردن ، او داهی مجددلردن بری در. آنجق پک مختصر اوله رق عرض ایده بیلدیکمز ملاحظات و تحلیلات پسقولوجیه سندن بر مهم نتیجه چیقارمشدردک، کندی فلسفه سنک اساسنی تشکیل ایدن (نظریه معرفت) ده عمدده اودر .

(قابلیت حس sensibilité) فطرت عضویه مزک برنجی خصلت حیوانیه سی در. بزده فطرتاً بالقوه موجود بولان بو قابلیت ، هر تورلو تأثیرات و انطباعات خارجیه یی قبول و تلقی به مساعد و حاضر بولونویور . لکن حس ، انجق بر شکل معین اوزره بالفعل تحققی ایده بیلور و (حاسه - sens) نک (کمال perfection) ی بونده در .

ارسطو ، فکرنی هر کسه لایقیه آ کلاده بیلیمک ایچون غایت واضح و مادی بر مثال کتیریورک بزم شرق فیلسوفلری اونی عیناً ترجمه و نقل ایتشلردر : [برالمومی ، ناصل مهرک التوتی و یا کوموشنی آلمادن یالکز انطباعات حروفی عیناً تلقی و ضبط ایدیورسه ، حاسه من دخی کائنات ماده نک یالکز انطباعات اشکالی آلوب ضبط ایدیور . ماده سی روحزه انتقال ایتبور . بناء علیه ده مو-

قرینتک ودها بعضی مشهور اسلافک ادعاسی کبی : [اشباح ماده روحزه انتقال و تماس اتمکله شعور حاصل اولویور ؛ متشابه اولان شیلر انجق یکدیگری سیله بیلیر . کائناتک عناصر ماده سی بزم - بر ماده لطیفه دن عبارت اولان - روحزک ارکان اصلیه سیله تماس ایدوب برله شیورده عالم خارجی حقنده پیدای علم ایدیورزا .]

دیمک غلیظ بریا کلشلق در . موجودات خارجیه نک یالکز (اشکال formes) ی زده در . روح ، هرتورلو (اشکالک محلی le lieu des formes) در . شو آنده نه ایله متحسین بولونویورسه اونک شکلی آلیر . او ، اولور !!] دیور . دیمک اولویورکه کیفیت علمده (فعالیت activité) رولی بزم دوشویور وواسایده شعور حاصل اولویور . واقعا ارسطونک دوشوندوکی کبی : [تحریک ایدن بر شینک (یعنی موجودات خارجیه دن برینک ! .) فعلی ، تحریک اولنان شیده (یعنی روحزده !!) پیدا اولور . بناء علیه کرک محسوس اولان شینک (فعل وتأثیر l'acte) ی ایله برابر بالذات (حساسیت sensibilité) کیفیت ، حس ایدن روحده واقع اولور .] اولیه ایسه (کیفیات محسوسه qualités sensibles) دیدیکمز شیلر هب زده برر تورلو حسیاتدر !! اوحالده کوز اولماسه حدذاتنده رنک یوقدر . قولاق اولماسه صدا یوقدر . الی اخره !! مع مافیه زده صدا ورنک دیدیکمز حسلری ایقاع ایتک ایچون البته اشیا خارجیده بر شیلر اولق لازمکیر . حتی اوشیلر - حدذاتنده - نه اولورسه اولسون ، ینه موجودات خارجیه ده آنجق بالقوه موجود بعضی قابلیتدرن عبارتدر . نه کیم زده کی قابلیت حس دخی انجق بالقوه وارددر . بطویفونک بالفعل حصولی وشعورک تحقیق ایچون طرفینک تماس ومناسبته بولونماسی بر شرط اساسی در . او وقت کائنات خارجیه ده هنوز بالقوه موجود بولونان (احساس قابلیت) ایله زده ده عینی صورتله بالقوه موجود بولونان (احساس قابلیت) فعله کله رک (طویغو) تحقیق ایدر . ارسطونک (هیولا و صورت) فرضیه سی اقتضا - نجه اعتقاد شخصینه باقیلیرسه ، هیوات اشیا ، هیولا اولمایوب (صورادراکات les formes de la perception) دن عبارت کورونویور . بز کائنات ایله تماس سایه سنده موجودات خارجیه نک اشکالنه کسب اطلاع ایتش اولورز .

(سرویلیام هاملتن Sir W. H.) - یوقاریده کی تصنیفده - ارسطویی (ثنائیه طبیعی) فرقه سته ادخال ایتشدی . بوراده فیلسوف یونانی نک ملاحظاته باقینه

هاملته قطعاً حق ویرمکده تردایده مه یز. چونکه ارسطو کی دوشو نورسه که هم عالم خارجی نك حقیقت مادیه سنی همدۀ نفسمزک استقلال وجودی - اول امرده - تسلیم اتمک شرطدر. لکن بن ، بو قدرله قالمق ایسته میورم ؛ اویله آ کلیورم که - معلم اول عنوانه بحق شایان کورولش اولان - بو استاد یونانی (انفسیه subjectivisme) مسلکنه دخی ، هرکسدن اول ، بر شکل صریح و قطعی ویرمشدر. (انفسیه) اعتقادی دخی - بنم تقدیرمه کوره - اک طوغرو بر مسلک فلسفی در. اوتدن ماعدا ، هیولا و صورت فرضیه سی ، طوغرو اولماقله برابر ، هویت اشیانک اشکال محسوسه و صور معقوله دم آرائیسی ادعاسی (formalisme صوریه) و (عقلیه rationalisme) مذهب لرینک اساسنی تشکیل ایدر. کوره جکزه متأخرین فلاسفه میاننده بر مجدد داعی صاییلان (کانت Kant) ، دخی بر نوع فورمالیزم و راسیونالیزمک اک بویوک مدافعی ایدی .

شوقیصه معروضاتم ، شو عجله تنقیداتم سزه - بر درجه یه قدوه - کوستیر که ، نظریات فلسفیه ، کائنات فکریه ده ذی حیات و (متعضی organisé) بر سلسله تشکیل ایدیورمش ..

ارسطودن سوکره کلن ، صاحب مسلک فیلسوفلردن بری ده (نه پیکور Epicure) در [۲۷۰ - ۳۴۱ قبل المیلاد] (مادیه matérialisme) مذهبک مؤسسی اولان بو حکیمک ، ده موقریتدن بک چوق فکرلر اقتباس ایده رک بنمسه مش اولدوغی - بوصوک زمانلرده - اجرا ایدیلن تدقیقات تاریخیه ایله ثابت اولمشدر . بناء علیه بونک ترتیب اتمش اولدینی (نظریه معرفت) ی ده ده موقریتک کندن اساساً بک فرقی بولمایه جقسکزدر .

نه پیکور ، سلفنک (اشباح idoles) فرضیه سنی عیناً و طاقیله قبول ایدیور ؛ اولاً ، بونون موجوداتک ارکان اصلیه سی اولق اوزره بر چوق (اجزای لاتجزا atomes) اولدغنه قطعاً قانعدر . عالمده حقایق اشیا بو آتوملردر. اونلرک شکل اعتباریله بر برندن فرقلی ده واردر. بوتون اجسام ، بوارکان اصلیه نک برر وجه مخصوص اوزره ترکیب و تشککندن حاصل اولمشدر. آره لرنده حس اولونان (خواص و کیفیات propriétés, qualités) فرقی (طرز ترکیب mode de composition) فرقدن عبارتدر. خواص اجسام اساساً ایکی بویوک صنفه تقسیم اولونه بیلیر : بر قسمی (خواص اصلیه propriétés essentielles) در ؛ بونلر (عمومی générales)

درلر: (pesanteur ثقل) ، (dureté صلابت) و امثالی کی . . بونلری مطلقاً حس ایله آکلامغه مفتقر دکلز ، آتوملرک ماهیتی دوشونمکله طوغرودن طوغروه استدلال ایده بیلرز . لکن بر شیئک رنکی ویا (le goût طعم) ی ویاخود حرارت و صوت کی ، بر ایکنجی صنف خواص اجسامده واردرکه اونلری ادراک ایده بیلرک آنجق حواسک وساطتنه محتاجدر . بو کیفیاتک جمله سی دخی (ترتب ذرات arrangement des atomes) دن ایلری کلیور ، و بزم اوترتباتی نه صورتله تلقی ایده بیلدیکمزی کوستریور .

اشیا حقنده حاصل ایتدیکمز علم ایچون واسطه اصلیه حواسدر . حس یالان سویله مزکائات خارجیه نک اشباحی عیناً صدور ایدوب لوحه خاطر مزه رسم ایدر ، واوراده منقوش اولوب قالیر ؛ صوکره عینی شیئک شبحی ، حواسمز واسطه سیله ایکنجی دفعه اوله رق تکرار تلقی ایتدیکمز وقت ، اوشئک ایلك رسمی ایله . بو ایکنجی رسمنی یکدیگرینه قیاس ایده رک طانیرز . ایشته بو (سابقه تجربه) ایله بر شیئک (عینیت identité) نه حکم ایده بیلرز . مثلاً عمر مزده ایلك دفعه اوله رق بر (فیل) کورسه ک ، بو حیوانک (شبح idole) ی ، اوندن صدور ایدوب حواسمز واسطه سیله بزم ایچمزه کیرر و رسمنی لوحه خاطر مزه نقش ایدوب براقیر . بر ایکنجی دفعه ینه بر فیل کورورسه ک ، اونکده عینی وجهله - صورتی خاطر مزه انتقاش وارتمام ایدر . بز ، برنجی (خیال image) ی ایکنجیسی ایله تطبیق ایده رک ، بر حکم ویریرز . و دیرزکه : [شو کوردو کمر شی ، اولجه کورمش اولدوغمز جنس حیوانک بر نمونه سی در !] بو اشباح و خیالات ، اشیانک (تیپوس type - typus) لری در ؛ یعنی ذهن مزده بر افدقلری (ایز trace) لدرکه طبقی کندیلرینه بکزر . اونلرک طبع ایتدکلری صورتلدر . کندی (انموذج) لیدر . شیمدی ایلك خیالی تلقی ایدیشمز بزجه بر (سابقه تجربه anticipation) درکه او ، سائر امثالی طانیق ایچون (معیار و مدار حکم) اولویور . (نه پیکور) بوکا (پرولیپ سیس) دییورکه بوفیلسوفک لسانجه بر مهم کلمه اصطلاحیه اولمشدر .

اوحالده ، عالمده حقیقی موجودات ، یالکز (لایتغیر immuable) آتوملدر . بونلر (سرمدی بر حرکت mouvement éternel) له بی قراردرلر . کندیلرنده (مانئه clinamen) یعنی میل ایده بیلرک قابلیت واردر . بویله اولماسه یدی یکدیگرینه

مصادف اولوبده (کومه agrégats) لر تشکیل ایده رک اجسام مختلفه به وجود ویره مزلردی . روح دخی آتوملردن مرکبدر ؛ یالکز شوقدر بر فرق وارکه ذرات روح دها (لطیف subtil) ودها (جوال mobile) در . چونکه (ناری الماهیه de nature ignée) درلر وشکلری مدور ، بناءً علیه مکملدر .

نُپیکور : [روح اک لطیف بر جسمدر] دیه رک بو اعتقادیخی بر شکل دستوری ده بیان ایتشدی . [*]

علم وشعور ، بزم عالم خارجی ایله تماسزدن تولدايدر ووجدانده حاصل اولور . دیمک که (منشأ علم l'origine de la connaissance) عالم خارجی در ؛ (واسطه علم le moyen de la connais. حس در . اوندن طولایی حواسک برر شاهد صادق وحاکم عادل اولدوغنی اثبات ایتک ایچون نُپیکور ، زیاده سیله غیرت ایتشدر زیرا بوتون فلسفه سی حواسک (صدق شهادت véracité du témoignage) ی دعواسنه مستند بولوندوغنی جهتله ، او دعوا ثابت اوله مازسه قوردوغنی بنای فلسفی - کندی آغیرلنی ایله - ییقیلیر .

بونک ایچون فیلسوف مومی الیه (قانون la Canonique) نامیله - اصوله داث - بر کتاب یازمش واوراده عرض وتوصیه ایتدیکی برنسیلری اوج صنفه آیره رق شرح وایضاح ایله مشدر .

بر طاقم قواعد اصولیه دن عبارت اولان بو مبادینک دردی (احساسات sensations) ایچوندر ؛ دیگر دردی دخی (سابقه تجربه anticipation) حقنده در . باقی قالان دردی اخلاقیاته عائددرکه بوراده اونلری امال ایده رک یالکز اوتله کیلرینی مختصر آ کوسترمک لازمکلیر .

برنجی سلسله نک دستورلری شونلردر :

۱) حواس ، انسانی هیچ برزمان آلداتماز .

۲) خطا ، یالکز (ظن = opinion = ذوقسا) ده واقع اولور . [**]

[*] اشاعره دن ومعتزله دن وسائر فرق مختلفه دن برجوق اسلام فیلسوفلری نُپیکورک بو فکریخی عیناً قبول وعرفان اسلامه نقل ایتشلردی . بو باده تفصیلات آماق آرزو ایدنلر شرح موافقه وبرده مؤلف حقیرله قاموس فلسفه سنده (âme) کله سنه مراجعت ایتسینلر . [**] (آمپه دوقله س Empédocle) نام حکیمه اسناد اولونان بوتیمیری ارسطو قبول ایتش و (نُپیس تی می) یعنی علم جازم دن اونی آیره شدی . یوقاریلرده بوکا داثر ایضاحات ویرلمشدی .

(۳) ظن طوغرودر ، اکر حواسک شهادتی اونی تصدیق ایدرسه ویاخود - هیچ اولمازسه - نقض ایتمزسه .

(۴) ظن باطلدر ، اکر حواسک شهادتی اونی نقض ایدر ویاخود - هیچ اولمازسه - تصدیق ایتمزسه .

ایکنجی سلسلهده شو دستورلر واردر :

(۱) بوتون خیالات سابقه حواسدن کلیر .

(۲) خیالات سابقه (anticipations) ، عائد اولدقلری شیلرک (تعریف definition) لری در ، و او شیلر حقنده ایدینه بیله جکمز (معلومات صحیحه vraie connaissance) بی تشکیل ایدرلر ،

(۳) anticipation ، هر تورلو (استدلال raisonnement) ک (مبدأ principe) ی در .

(۴) (بالذات بدیهی évident par soi-même) اولان بر شی [یعنی نه پیکورک اعتقادنجه حس ایله در حال ادراک اولونماش بر شی !!] بدیهی بر شیئک خیال سابق ایله اثبات اولونمالی در .

خلاصه عرض ایتدیکم نه پیکور نظریه سنده شایان دقت بر جوق شیلر وارکه بوکون مناقشاتنی دوام ایتمکده بولونان بر خیلی مسائل علمییه نك منشائی کوستیر .

ده موقریتک - بوکون صراحتاً مردود اولان - اشباح نظریه سی ایله لوازم منطقیه سندن صرف نظر ، مادی بر طالم خارجییه اعتقاد وار . صوکره منشأ علم اعتباریله ، (تدریبیه empirisme) مسلکی کمال صراحتله تأسیس ومدافعه ایدلمشدر . وسائط علم بحثنده دخی (احساسیه sensualisme) مذهبی اساس طوتولمشدرکه منطقک ایجابی ده بودر . بری دیکرندن آریله ماز . علمک حصوله سبب اولان مناسبته ، حواسمزک منحصرأ (انفعالی passif) بر وضعیتده بولونماشی ده شایان دقتدر : نه پیکور نظرنده حواسمز یالکز (آخذة récepteur) وظیفه سنی کوروپور؛ خارجدن کان تأثیراتی عیناً آلوب (انطباعات - تی بوس - impressions) لری ضبط ایتمکله قالیور . حکیم مومی الیهک بالذات دیدیکی کیی :

[حواس بالذات حرکتیه کلیور . اونلر ، خارجدن تلقی ایتدکلری حرکاتی هیچ بروجهله آرتدیروب اکسیلته مزلر .]

حالبوکه بوکون بو مسئله (انفسیون subjectivistes) ایله اولئرک معارضینی اولان (آفایون ، شیثیون objectivistes) آره سنده پک شدتلی مناقشاتی موجب اولمقده در .

(کائنات حقنده حاصل ایتدی کمز معلوماتی بز (اعمال élaborer) ایدیورمی بز ایتیورمی بز ؟ ..) ایشه بو زمانمزدده اگ غامض مسائلندن بری در . اکر معلوماتمز طاقیله بویله مکمل ، مشکل ، ومعنادار اوله رق خارجدن بزه - اولدوغی کیی - کلیورسه نیپیکورک یردن کوکه قدر حقی وار ؛ همد همرکسدن اول بوادعاده بولونمش اولدوغی ایچون بو حقیقی کشف ایتمکده هرکسه شرف تقدیمی وار ، دیمکدر . بوق ، اکر معلوماتمزد - نوعما - (مواد غیر معموله matières non élaborées, non-manufacturées) یی خارجدن اویله جه آلوده بالذات اعمال ایدرک معلومات شکلنه قویوبورسه ق ، حصول علمده ذهنمز پک مهم بررول اوینبور ، دیمکدر . او حالده قانتک وحقی هیچ قانت طرفدار ی اولمایان دها برچوق بویوک فیلسوفلرک ادعاسی طوغرودر . نیپیکور چوجوچه دوشونمشدر ؛ دیمک چیقار . اکر فی الحقیقه ، ایش بویله اولوبورسه ، بزم ذهنمز بر (فوطوغراف جامی plaque photographique) دکل ، زیاده سیله فعال ، خارق العاده بر (معلومات فابریقه سی) در . اوتهدن بریدن طوبلادینی خام انطباعاتی اعمال ایده بیلیمک ایچون هم زمانه هم واسطه لر محتاجدر . اویله اولونجه حصول علم بر آنده ممکن دکدر . (تحدس intuition) فرضیه سی ماطل در . حالبوکه نیپیکور : [بعضی شیلر حقنده بالکمز تماس ایله بر آنده علم حاصل اولور .] دیه ادعا ایتمشدی . بو ادعا دخی - افکار واعتقادات سائر سیله تماماً هم آهنگ اولمق اعتباریله - تماماً منطقی ایدی . او حالده بوکونکی فیلسوفلری شدتله بر برینه طوتوشدوران وقا بشدیران (تحدسه intuitionisme) و (استحضاریه représentationisme) دعواسنک مهندنشاتی نیپیکورک نظریه معرفتی اولمشدر . بویله اولدوغی صراحتاً کوره بیلورز . نته کیم حواسک شهادتنه اینانوب اینانماق لازکله جکنه دائر دوران ایدوب کیدن مناقشه مشهوره حقنده دخی نیپیکور کند ی فکر واعتقادینی پک کسدرمه بر طرزده بیان ایتش ، و : [حواسک ویردیکی خبرلری محض حقیقت اولمق اوزره قبول ایتمکه مجبورز ؛ چونکه حواسی قوتتول آلتنه آله جق هیچ بر قدرتمز و واسطه منز یوقدر !] دیمشدی .

بك ابى آكلارسكزكه بواڤما (عقلیه rationalisme) مدعاسنك - تماميله -
(ضد نقیضی la thèse contradictoire) در .

مع مافیه ئییکور ، بو نقطه ده شبهه ذره قدر محل برافایه رق فکرنی قطعیا
بیان ایتمش دی :

[بر حاسه ، کندی کنډیسنی قونتزول ایده مز . محاکمه و عقلك معطایات
حسیه بی قونتزول ایده بیلمه سی احتماله کلنجه او هیچ ممکن دکلدر ؛ چونکه
محاکمه و عقلك استناد ایتدیکی اساسلر ، ذاتاً مدرکات حسیه در .]

دیهره ادعالرنی واضح دستورلر شکلنده اورطیه آتوب برافشدی . بوکون
حالا بو مهم مسئله لری حل ایتك ایچون اوغراشوب طورویورز .

پسیقولوزی علمك تدقیقاتی ، کشفیاتی و ترقیاتی سایه سنده بو مسئله لر ، ینه
صحنه مناقشه دعوت اولوندی و اونلره برآزیک بر شکل و براز باشقه وضعیت
ویره بیلمك یوزندن (ئیسته مولوزی) دخی باشلادی .

(رواقیون Les stoiciens) ك نظریه معرفتی عالم عرفانده بك قیمتی برآبد
تاریخیه در . بو فرقه فلاسفه دخی طبی ئییکوره تابع اولان فرقه (مادیون
les matérialistes) کی ، فلسفه ده آنجق (اخلاق moral) (بر مقصد but)
تعقیب ایدرلردی . هر ایکی فرقه نظرنده ده (مابعدالطبیعیات) مقصود بالذات دله
انسانی مسعود ایده بیله جك اخلاق برنسیلرنی تعین ایچون آنجق بر واسطه
ایدی .

ئیهسته مولوزی تدقیقاتنه فضله اهمیت ویرمه لرینه سبب ینه بو طرزده دوشونوشلری
اولدی : [حقیقت ناصل تعین ایدر . بو خصوصده کی معلوما تمزك جازم ، قطعی و شبهه سز
اولدوغندن ناصل امنیت حاصل ایده بیلیرز ؟ .. خلاصه قسطاس حقیقت نه اوله بیلیر ؟]
دیه جدا دوشونمه لری ، قطعی وثابت و حقه تماميله موافق بر مبدأ اخلاقی کشف
ایتمك و اوکا کوره بر (دستور عمل formule de conduite) طوتمق ایچون ایدی .
اوندن طولای به یسته مولوزی نك ترقی سنه پك بویوك خدمتلی اولمشدر .

كره مابعدالطبیعیات ، كركسه ئیهسته مولوزی ده مادیون ایله - فکرو اعتقادجه -
فرقلری آزدی . ده طوغروسى مادیونك (نظریه معرفت) نی بعض وجوه ایله
اصلاح ایتمش اولدقلرندن طولای آرمده بر فرق حاصل اولمش و بر طاقم مسائل
فلسفیه ده حدوث ایتمشدی . فقط رواقیونك فکری ده یوکسکدر .

مادیوندن - مبادی* اخلاقیه اعتباریله - بوسبوتون فرقلی اولان بوفرقه مشهوره اربابی ادراك بختندهده باشقه برنظریه ایله فېكر واعتقادلرینی بیان ایتشلردی. یالکزر وسائط علمو (حقیقت خارجیه *réalité extérieure*) مسئله سنده طبقی مادیون کیبی دوشونویورلردی: رواقیون ایچون حقیقتاً وار اولان شیلر انجق (جسمانی *corporel*) اوله بیلیر وحواس ایله قابل ادراك در. شبهه یوقدرکه بوندن دها زیاده ماتریالیستجه براعتقاد اوله ماز.

مع مافیه بر مهم نقطه واردر: حقیقت خارجیه نك جسمانی اولدوغنی و بناء علیه انجق حس ایله ادراك اولونه بیله جکینی قبول ایتمکله برابر، بزم عضویتك، بزم (جهاز حسی) مزك (امرادراك *l'acte de perception*) ده بوسبوتون عاقل، یاخود فعال بر رول اوینادیغنی قبول و یارد ایتك ممکندر. بوده مبحث معرفتده بك اهمیتلی و اساسلی مسئله لردن بری در. بونقطه بی بر آ ز اول ایضاح ایتشدم. لکن حالا بوکون دخی بویله در؛ مسئله اهمیتلی در؛ چونکه اگر جهاز حسی من تماماً عاقل طاورا نوبده یالکزر بر (آخذ *récepteur*) کیبی، خارجدن کلن تأثیراتی همان اولدوغنی وجهله تلقی ایدیورسه، ادراكات و معلوما تكم حقایق اشیا به مطابقتنه اینامق قولای اولور. یوق، او یله اولما یوبده خارجدن وارد اولان تأثیراتی اجهزة حسیه من (اعمال *élaborer*) ایدیور و مدرکاتمه بر (صورت مخصوصه *forme spécifique*) ویریورسه، موجودات حقنده حاصل ایده بیلدیکمز معلوما تكم حقایق اشیا به تماماً مطابق دوشدو کنه اینامق بك کوچ اولور؛ و کورو یورسکزر که شو ایکی ادمادن برینه طرفدار اولمقله ترتیب ایده بیله جکمز نظریه معرفت - بالضروره - باشقه لاشه جقدر.

ایشته بونقطه ده رواقیون ایله مادیون قطعاً او یوشمیورلردی؛ رواقیون حواسك (عطالت = *relâchement*) اوزره قلمادیغنی ادعا ایدیورلر، و بالعکس (طونوس) یعنی (جهد *effort*) و (کریکنلک *tension*) حالنده بولوندوغنه اینانیورلردی. دیمک که تحصیل ایتدیکمز معلوما تكم حواسمك بر بویوک پای واردر. بویله بر ادعا به کیریشنجه، حصول علمده اجهزة حسیه مزك، عقلمك، معلومات و تجارب سابقه مزك حصه خدمتی آیری آیری تعیین ایتك وظیفه سی و یا مجبوری - بالطبع - رواقیون دوشویوردی. بوفرقه اربابی ایشه بو مجبوریته،

بر نظریه معرفت ترتیب ایتشدی که اوزمانه نسبتله - شهباسز - اک ای سی در .
 بونی خلاصه عرض ایده جکم :

تأثیرات البته خارجدن کلیور و (احساسات sensations) شکننده کلیور .
 روح - فعالیت ارادیه activité volontaire سیله - احساسات مذکورینی (علم
 connaissance) حاله افراغ ایدیور . اشیای خارجیه (روحده بر اثر انطباع =
 une impression dans l'âme) براقیور . رواقیه اصطلاحنده (تی پوسپس نون
 پس هی) تعبیری عیناً بومعنائی افاده ایدر .

بوطرز تفکر ، بر آزدده موقربتك (اشباح = idoles) فرضیه سنی آکدیریر ،
 قابا بر دوشونوشدر . فرفه نك مشاهیرندن (قله آن ثی = Cleanthe) بو تعبیر
 مجازی بی معنای حقیقی سی ایله تلقی ایتمش ، حتی روحده (قبارتمه en relief)
 و (اویمه en creux) انطباعات حاصل اوله بیلدیکنه اینانمشدی . بو چو جوقجه
 دوشونوش روحك مطلقا مادی و بالخاصه بالمومی کیبی برشی اولماسی لازمکلیدیکنه
 قناعتی مستلزمدر ؛ البته باطل و ابتدائی بر فکر نمونه سی در . حالبوکه (خریسپ پوس =
 chrysippe) ك فرضیه سی بك فطینه اندر : بو فیلسوف (کیفیت علم) ی ،
 (حالت روحیه ده بر تغیر = changement d'état dans l'âme) اولقی اوزره
 تعریف ایدیوردی ؛ بو تعبیر مهمی اوندن اول ارسطو قوللانمشدی : (نه تهری یوسیس
 پس هی) دیدیکی بودر ؛ (روحك باشقه لاشماسی) معناسنی افاده ایدر . [*]

اشیای خارجیه نك تأثیریه رحده حاصل اولان انطباعات بر (خیال image)
 در . رواقیون بوکا (فان داسی یا) دیرلردی که اصطلاح اولمشدر . لاتین لر (visum =
 کوروش) دیه ترجمه ایتمشلر ؛ عربلرده (بنطاسیا) دیه درك همان عیناً آلمشلردی .
 فرانسزجه نك (fantaisie) سی و بوتون مشتقاتی بوندن کلمشدر .

شیمدی شوخیالك حصولنده روحك هنوز هیچ بر فعالیت یوقدر . بوانحق
 بر حادثه انفعال در ؛ بر (پاتوس) در یعنی (passif) بر حالدر . بو قدرله علم تحقق
 ایده مز . بو حالیه قانعجه اوخیال ، انحق بر (fantaisie acataleptique) اوله بیلیر ؛

[*] بوندن اولکی بابك نهایترینه طوغرو ، هاملنتك تقسیمندن بحث ایدرکن قوزمونه نبق
 ایده آلیسترك ایکنجی حزینه داثر ایضاحات ویرمشم . اونلر برماهیت ثالته قبول ایتیورلر
 و بالکراحوال روحیه ده تغیر وقوعیله حصول علمی تعریفه چالیشیورلردی . کوروپورسکز که
 بومهم نظریه نك ایلك واضع لری ارسطو و خریسپ پوس ایش . (۲۲۵) نجی بحیفه یه بایکیز .

یعنی هنوز نامعقول و آکلاشلماش بر خیالدر . ذهن او خیالی بر (شیء معین *objet déterminé*) عطف و اسناد ابله ، اصلنه مطابقتی (تسلیم و تصدیق) ایدرسه ، اووقت (*fantaisie cataleptique*) ، یعنی (خیال ، معقول) اولور ، و انجق اوزمان یقیناً علم تحقّق ایدمبیلیر .

ایشته بو (تسلیم و تصدیق = *assentiment*) معامله سی یالککز ذهنک اثر فعالیتی در . حواسک ، یاخود عالم خارجی نک بوخصوصده ذره قدر دخلی یوقدر . برشیک خیالی او شیک کندیسنه عطف و اضافت ایدوب دوشوندکن صوکره کوردو کم خیالک (محض شعبده *pure illusion*) اولمایوب ، برتمثال حقیقت اولدوغنه حکم ایدن وبوحکمی تصدیق ایله بن یالککز ذهنمدر .

کوردیورسکزکه فلسفه رواقیه ده بو (*assentiment*) تعمیری مهم بر فرضیه بنی ناطق برکله در . بوکا رواقیون (سین غاثانه سیس) دیر ایدی [*] فلاسفه رواقیون اویله ادعا ایدرلردی که : [ضیا ناصل هم کندی ماهیتی اظهار ، همد اشیا بنی تنویر ایدیورسه ، ذهنک فعالیت سابه سنده (معقول *cataleptique*) اولان بر خیال دخی هم کندی ماهیتی میدان قویار ، همده سینی - یعنی کندیسنی روحزده ایقاع ایدن مؤثر خارجی بی - کوستریر .] اوخیالک بر حقیقت خارجییه دلالت ایتدیکی بونکه آکلاشیلیر ؛ چونکه بو تورلو خیالات برطاقم (کیفیات مخصوصه *qualités propres* = ایدیومانا) افاده ایتکده در . بر شیتی اشیا بنی سائردن فرق وتمیزه خادم اولان علامات بوکیفیات مخصوصه در . ایشته اصلی اولمایان بر (شعبده حسیه *illusion de sens*) بی ، بر خیال باطلی ، مدرکات حقیقه دن بوسایده فرق ایدمبیلیرز . چونکه معقول اولان ، یعنی بر مؤثر خارجییه اسناد اولونه بیلن بر خیال ، وجدانمزه قوتله جارباز وبوصدمه شدید بدهانتک اک قوی دلیلی در . (واضح و صریح) در .

بوانجه ملاحظات اوزرینه (خریسپ پوس) ، نظریه سنه ده قطع بر شکل ویرمک ایچون کلمات اصطلاحیه ده انجه فرقلر تعیین ایتشدی : خارجه بر مؤثر حقیقییه عطف اولونه بیلن خیالات صحیحیه (فان داسیا) تعبیری تخصیص ایتشدی . روحزده (تی پوسیس) یعنی بر اثر انطباع بر اقوب تغیرات وجدانییه و بناءً علیه [*] بو رواقیه فلسفه سی حقه ده تفصیلی معلومات آتی ایچون قاموس فلسفه ده (*stoicism*) و (*assentiment*) تعبیرلینه مراجعت ایدیکیز .

علم صحیحہ سبب اولان انجق بوتورلو خیالات ایدی. اصلی فصلی اولمایان خیالات باطلہ یه ده (فانداس ما) دیوردی که فرانسزجه نك (fantôme) و انکلیزجه نك (phantasm) کله سی بوندن ، عیناً آلمشدر . بزم لسان عادی ده بوکا خیال دکل ، (خیالت) دیرلر .

شیمدی انسان کرک رؤیاده کرکسه بیدارایکن برخیال کورسه مثلاً اوزاقلرده بولونان بر دوستنک خیالی کورسه ، فقط حواس سائر دسنک شهادتنه و اعانتنه مراجعت ایتدکن صوکره ، اوخیالی خارجدہ بر (شیء حقیقی) یه اسناد ایتک ممکن اولمایه جفنی و یاخود طوغرو اولمایه جفنی - تجربه حسیه سنه بناءً - بالحا که اکلاسه ، اوکوردوکی خیال - شبه یوقدرکه - (فانداس ما) در . (فانداسی یا) دکلدر . حالبوکه نه پیکور احساساتک کافه سنی اجسام خارجه یه اسنادایدن وهپسنک خارجدہ متعلق الیهی اولدوغنه اینانیردی .

هر حالده پک مختصراً عرض ایتکله اکتفایه مجبور بولوندوغم بو فرضیه نك امثال سابقه سنه نسبتله ، چوق ایشلمش واینجہ دوشونولمش اولدوغی کوروله بیلور . مشهور رومالی (چیچرو Cicero) رواقیون فلسفه سنی ترجیحاً قبول ولاتین عالم عرفانه نقل ایتش ایدی . مومی الیهک آثاری مضبوط اولدوغی ایچون رواقیه مذهبک اینجه تفصیلاتنه بیله واقف اوله بیلورز .

یالکیز رواقیونه رقیب اوله رق - اوزمانلر - یکیدن تأسس ایتش بولونان (یکی اقاده میا la nouvelle académie) مدرسه سی اربانی واردی .

(آرکسیلاس Arcesilas) واونی متعاقب (قارنه آدهس Carneade) عظم شهرت قازانه رق بومدرسه نك ریاستنی احراز ایتشلردی . هله ایکنجیسی پک فطین برفیلسوف وپک جرزه لی بربحاث ایدی . بو آدم باشلی باشنه او مدرسه ارباننک عقائدینه برشکل معین ویردی وبوصورتله برمسلاک فلسفی احداث ایتش اولدی که اسمنه (احتمالیه probabilisme) دیرلر .

بدایت بخنده سویله مشدم که رواقیونک وبوتون مذاهب سائر ارباننک بویله برر نظریه معرفت ترتیب ایتمکدن باشلیجه مقصدلری ، (یقینیت علم certitude de la connaissance) مسئله سنی حل ایتک و معلوما تمزک حقیقتندن امین اوله بیلیمک ایدی .

احتمالیونک دعواسی ایسه بوسبوتون بوادعایک علمینده ایدی . (قارنه آدهس)

فكر نجه خطا و صواب ايکيز قارداشلر قدر يکديکرينه بکيزر ؛ بناءً عليه کسب يقينه امکان يوقدر ؛ هر شيء حقهده علممز احتمال دائره سنده قالير اوندن اوتنه کيدهمز ديوردی .

بزم ضيا پاشا :

کسب يقينه آدم ايجرته يوقدر احتمال ،
هر اعتقاد - عقد کوره - غايانه در .
ديه رک بواعتقاده بر شکل دستوری و بر مشدی .

عبدالحق حامد :

بردر بو ؛ شبه نيکمر يك ؛
سيانه کيبي بيامر مظه بيلمک .
قارداشلردنه زياده بکيزر ؛
يکديکرينه يالانگه کریمک .

بیتلریله قارنه آده سک اعتقاد اصلی سنه بلیغ بر صورتده تماماً ترجمان اولمشدر .

او زمانلر ، رواقیه ، - ریجی لکدن پک آز فرقی اولان - بو جریان افکاره قارشى جهاد آجش و حقیقتک امکان ثبوتی کوس-ترمک ایچون (فانداسی یا قاتاله بیتیکی) فرضیه سنی ترتیب ایتیش اولدوغی جهته ، یکدیگرینه فطرتاً معارض اولان بو ایکی فرقه فیلسوفلری اک زیاده بو (فانداسی یا) نظریه سی اوزرینه شدتلی و سورکللی مناقشه لره کیریشمشلر ایدی .

باقلسه (قارنه آده س) ، رواقیونک اصطلاحات و تعبیراتی ، حتی بوتون معلومات بسیقولوزیه سنی قبول ایدرکی کورونویور . عینی مسئله لری ، عینی زمین بحث اوزرنده تدقیق ایدیور . یالکیز رواقیونک یقینیت علم دعوا سنه اساس اتخاذا ایتدیکی مبدأ فلسفی قبول ایتیمه رک شدتله و صراحتله چوروتوب آتیور .

(cataleptique) و (acateptique) فرقنی قطعی کورمیور : [حواسک ، کیفیت تحسس و امر ادراکده وضعی منحصرأ (انفعالی) در . (سچیله مهین indiscernables) برچوق احوال و حادثات واردر . اونلریکدیگرینه اوقدر بکیزر که خطایی صوابدن فرق ایده ییلمک ممکن دکلدرد . (سین غاثانه سیس assentiment)

ایله ذهك حكيم ايتمه سی دخی بر (ضمان قوی *garantie solide*) تشکیل ایده منر. ذهن، بر خیالک مطابق نفس الامر اولدوغنه اینانیرده ینه پک فاحش بر صورتده یا کیلمش اوله بیلیر. [دیور .

بودورده آچیلان مناقشه فلسفیه نك اك مهم جهتی خطایی صوابدن تمیزه خادم اوله جق (قسطاس حقیقت *citerium de la verité*) ی بولق ، قبول ویا رد ایتك مسئله سی اولدیغی ایچون ، تاریخ فلسفه ده بو مناقشه یه :
(*discussion sur le principe des indiscernables*) دیرلرکه [بربرندن تمیز اولونامایان شیلرک مبدآنه دائر واقع اولان مناقشه] دیمك اولور .

زمانمزده (سنسر، میل ، یوول ، هاملتن) ودها بر جوق اعظم متفکرین آره سنده جدی مناقشاته میدان آجان (*le critère de la verité*) بحثی ینه او مسئله تاریخیه نك ، دهایی بر شکله مناقشه سیدر. باشقه برشی دکل !!

بوندن سوکره قرون وسطی فیلسوفلرینه کلیورز. قرون وسطانک بوتون مذاهب فلسفیه سنه حاکم اولان برسیستم واردی که اوکا (سقولاستیق یعنی مدرسه اصولی) دیرلر. (*scholastique*) ، مدرسه معناسنه موضوع اولان (*schola*) کله سندن مشتق بر (صفت) در .

بو سیستم ، بر صفت فارقه ایله بوتون فلسفه سیستملرندن فرقلی در ؛ اوده نصوص دینه نك فلسفه اوزرینه اجرا ایتش اولدوغی نفوذ قاهرانه در. بو سببله بوتون قرون وسطی فلسفه سی عجائب بر طرز تشکیل ایتش و هر مسئله دین نقطه نظرندن تاقی و تتبع اولوندوغی جهته باشقه بر صورت ، باشقه بر قیمت و باشقه حیثیت آلمشدی .

حکمای یونانیه نك - یالان یا کلس - عالم خرستیانیته ترشح ایده بیلن بر جوق افکاری ، قرون وسطاده مناقشات فلسفیه نك ینه باشلیجه موضوعاتی تشکیل ایتش فقط هر مسئله آقیری و چار بوق بر وضعیتله اله آلمشدی. بناء علیه (بداعی *original*) هیچ بر فکر یوقدر ؛ دهیه بیلیرم. اونك ایچون ، بو مختصر کتابده سزه بو دوردك بیتمز توکنمز اصلمز مباحثاتندن بحث آچایه جغم. یالکز (سقولاستیق) سیستمی ، پک مهمدر. اونك ایچون آیرجه بر رساله ده یازدم ؛ ایلریده اونی تتبع ایدرسکمز. اوراده ایضاحات و امثله کافیله بو سیستمک

ماهیتی ، با نتیجه احکام اعتقادیه‌سی ، اصولی و احداث ایتش اولدوغی مسائل غریبه ، اطرافیه کوسترلمش و شرح ایدلمشدر . [*]

بناء علیه بر سور و اولماز مسئلهلر احداث ایدوب اونلرک مناقشه‌سیله سکز ، حتی اون عصر بهوده یره اضاعه وقت ایدن بو دوری آطالایه‌بیلیرز . واقعا باشقه نقاط نظردن باقیانجه ، قرون و سطلانک بویوک بر اهمیتی ، معناسی و قیمیتی وارددر . فقط موضوع بحثمز اولان نه‌پیسته‌مولوزی ایچون بو اهالاک بر ضرری اولماز .

مع مافیه بوبابک فهرستنده مندرج اولان موضوعاتک سلسله‌جریانی سکنه‌دار ایتمه‌ک ایچون بر ایکی سوز سویله‌یوب کچیوره‌جکم .

میلاد عیسان تقریباً یکرمی یکرمی ایکی سنه اول ، اسکندریه شهری احتمالک دنیاک ال بارلاق مرکز مدنی ایدی . آتنه رومانک سطوت عسکریه‌سنه طایانه‌مرق استیلا به اوغرامش و سونمش ایدی . مصر دخی رومالیرک مستملکاتندن اولمشدی . فقط عرفان یونانی ینه مدنیت نامنه دنیا به حاکم ایدی . فلسفه و علوم اسکندریه به انتقال ایتمشدی .

او و قتلر یک مهم بر تجارت مرکزی اولان بو شهرده بر چوق موسوی یاشیوردی . لیکن لسان ، علم ، الحاصل عرفان تماماً یونانی ایدی . آتنه‌ک اضمحلالی اوزرینه اورادن آیری لان متفکرین ، دونه طولاشه اسکندریه به و بعضری ده رومایه کیدوب توطن ایتمشلردی . رومالیر فطرتاً عسکر و قانون پرور بر ملت ایدی . لیکن فلسفه به مستعد دکل ایدی ؛ او سیبله اسکندریه ، علوم و فلسفیاته بوتون روما سلطنت جسیمه‌سک پای تخت حقیقیسی اولمشدی . بو شهرده یتیشن علما و حکما رومایه کیدر ، قونفرانس لر و درس لر و یریر کلیردی . (اسکندریه مدرسه‌سی l'école d'Alexandrie) تعبری فلسفه و علومده یک مهم و بارلاق بر دور ممتازک اسمی در .

ایشته میلاددن یکرمی ایکی سنه اول اسکندریه ده طوفان موسویلردن (فیلون Philon) نامنده بر ذات ، بویوک بردهای فلسفی ایله بارلامش و بر مذهب

[*] قاموس فلسفه ده (scholastique) کله‌سنه دخی مراجعت ایدیکز ؛ اوراده بوکله ایچون باشلی باشنه بر رساله تشکیل ایده‌جک قدر ایضاحات و یراشدر .

فلسفی تأسیس ایتشدی که بزم (صوفیه شرق le soufisme oriental) اوندن پک متأثر اولمشدر . لکن خرسیتانلق دها زیاده اوکا مدیوندر .

(نوفلاطونیه neoplatonisme) مذهبی ایشه بودر .

فیلون بوتون آثارینی یونان لسانی اوزره قلمه آلمشدی؛ چونکه مکمل اولان تربیه فکریه سی تمامیه یونانی اولدوغی کیی اسکندریه خلقتک - هر نه دین وملتن اولورسه اولسون - لسان عادیهی ورسمیهی دخی یونانی ایدی .

فیلون ، مزاج فلسفی سی اعتباریه مشهور فلاطونه پک بکزرردی ؛ حتی اوکا پک مفتون اولدوغی ایچون اسلوب اعتباریه بیله کندیهی استادینه او قدر بکزتمشدی که : [فیلون می افلاطونلاشمشدر ؟ افلاطون می فیلونلاشمشدر ؟] سیوالی تاریخ فلسفه یه کچمش برمنقد سوزی در .

مع مافیه عرفان و فلسفیات ایچون یونان قدیمه بو درجه لرده مفتون اولان فیلون ، وجدانده اودرجه یهودی ایدی . نصوص اسرائیلیه دن قطعاً شه ایتمه مشدی . فقط عینی زمانده افلاطون وارسطو کیی داهیلرک افکار اساسیه سی دخی محض حقیقت اولقی اوزره قبول ایتکدن کندینی آله میوردی . حالبوکه تورانک تعلیماتی ایله اساتذده یونانک نظریات فلسفه سی آره سنده مباینت ، حتی تناقض آشکاردر . ایشه ، (حقیقت تعدد ایده من !) دیه دوشون وهر ایکی جهته صدق و خلوص ایله حق و یرن فیلون ، نصوص دینه ایله احکام فلسفه یی تألیف ایتک غیرته دوشدی . بونک ایچون ده (کتاب مقدس) ک (le texte) نی تاویل ایتکدن باشقه چاره بوله مادی . بوغریب اصول سایه سنده فلسفه ، دین ایله ازدواج ایدیور و بومناسبت صمیمیه دن دخی (تصوف mysticism) طوغو یوردی . سزه بوراده اوندن بحث ایده جک دکلم . او ، کتابمک پروگرامی خارچنده قالان بر مهم موضوعدر . فقط نظر دقتکزه شونی عرض و ابراز ایده جکم که : اگر (سقولاستیق) دمنیلن سیستمده اساس و اصول ، فلسفیات عقائد دینه ایله تألیف ایده رک هر مسئله یی اونقطه نظر دن کورمک ایسه ، فیلونک تأسیس ایتش اولدوغی مذهب فلسفی (سقولاستیق) دن باشقه برشی دکلدر . نته کیم زمانمز منقدرلرندن وتاریخ فلسفه محررلرندن پک چوغی بوادعاده بولونمشدر وادعالری ده پک او قدر قولایلقله رد ایدیه جک کیی دکلدر .

اوله ایسه فلسفیات اعتباریله قرون وسطی دوری حقیقتاً فیلوندن باشلیور ، دیمکدر . زیرا تکمیل اودور فلسفیاتک صفت کاشفیه سی سقولاستیق طرزیدر . اوندن سوکره بر ایکنجی نقطه وارکه اونیده یالکز بر اشارتله کوستروب کچمک ایسترم : خرسیتانلق ظهور ایدوبده ، حواریونک جهد و غیرت فوق العاده سیله تعلیمات عیسویه - کرکی کیی - یول آلهرق اهمیتلی جه بر جریان افکار وحشیات وجوده کتیرنجیه قدر ایجه بر زمان کچمشدی . بر کره حضرت عیسا فیلوندن یکریمی ایکی سنه صکره طوغمشدی ؛ وظییی درکه دعوت ناس ایچون ظهوری ده سن کاله وصولنده ایدی . انسانیت اوغرینه فداکارانی اوزرینه روما حکومتنک وکندی ملتک ظلم و جنایتندن سوکره بر آووج خرسیتان فقراسی خیلی مشکلات ایچنده درمانده و بریشان قالمشردی . نهایت جماعتندن آیریلوب یکی مذهبی قبول ایدن مشهور (پاولوس Paul) ک ایمان و بلاغت فوق العاده سی سایه سنده امت خرسیتانیه ایله برابر یکی دینک عقه ائدی دخی تعین ایدوب وجود بولمغه باشلادی و سریرعاً بو بودی . فقط نصوص متفرقه نک بر (منسجم coordonné) (مجموعه عقائد système de doctrines) تشکیل ایده بیللمه سی ایچون - بو کجن زماندن ماعدا - لا اقل بر عصر اقتضا ایتدی ایدی .

دیمک اولویورکه عقائد خرسیتانیه ده بر (نوؤ فلسفیه nouveau philosophique) شکل ایدوبده متفکرین آردسند موضوع بحث اولونجیه قدر بر یچق عصر کچمش ایدی . حالبوکه فیلون بر یچق عصر اول پک یوکسک بر سلسله آثار یازوب براقش وکندیسنه تابع اولان بر چوق متفکرینک انضمام همت و معاوتی ایله بر جریان فلسفی آچمشدی .

بناءً علیه خرسیتانلق بالذات موجودیت فکریه سنه کسب شعور ایدر ایتمز ، نوفلاطونیه مذهبک قوجاغنده بولوندوغنی حس ایتمشدی . طوغروسی ، ذاتاً قوجاغنده طوغمش و اوندن چوق شیلر آلمشدی . [*]

طبیعی درکه - صحیحاً اجتماعی و معنوی بر دور فرت تشکیل ایدن - او

[*] موسویلرک اعتقادنجیه فیلونک فلسفه سی خرسیتانلق امکان ظهوری ایچون الک موافق بر زمین حاضرلامشدر . اوندن طولانی بو فیلونک خاطره سنه لعنت ایدنلری بالذات کوردوم . دیگر طرفدن (ژه زوئیت باباسلری) نک مکتبیر ایچون یازمش اولوغنی فلسفه تاریخلنده فیلون و نوفلاطونیه واسکندرانیه نامنه نک برکله یوقدرکه بوده شایان دقتدر .

عصر لرده بو یکی فلسفه ایله بو یکی دین شدله یکدیگرینه رقیب اوله رق قارشی قارشی به بولوندیله ؛ تردد بحرالمری ایله بیقرار اولان وجدان انسانیتی تسخیر ایچون مدھش بر مجاهده یه کیریشدیله .

خرستیانلق واقعا غلبه ایتدی وسکنه دنیانک بویوک بر قسمی قازاندی .
خرستیان محرری منققدین بو کیفیتی ایضاح وتعلیف ایچون خرستیانلغ محض حقیقت اولدوغنی ایلمی سوردرک بر چوق شیلر سویلو یورلرکه قولای قولای قبول اولونه ماز . یالکنز بر شی سویله یورلرکه چوق مهمدر وانحق او ادعا طوغرودر :

[خرستیانلق اعتقادنده بر حرارت حیات ، بر نشئه امل و بر نور امید واردی ؛ نوفلاطونیه فلسفه سی ایسه معمولات فکریه دن عبارت ، جانسز بر اثر معرفت ایدی . اونک ایچون بو مضحمل اولدی ؛ اوتنه کی یاشادی ، بویودی انسانیتک بر مهم قسمی استیلا ایتدی .] دیورلر .

بو افاده نه قرر شاعرانه اولسه بیله ضمننده بر حقیقت وارکه اونو بن تمامیه عربان اوله رق ایکی سطر ایچنده کوستره بیلمر ؛ باقیکنز ، او جمله لر ؛ بیان ایتک ایسته دیکی حقیقی تبعات تاریخیه دائره سنده نه صورت اوزره کوره بیلیورز ؛ بن کوردو کی سویلیه یم :

« وجدان انامی استیلا و بناء علیه (جمهور انسانیت la majorité de l'humanité) ی بر بویوک وقدمی امید ایله احیا ایده بیلمک امرنده . بن اعتراف ایدیورم که - هیچ بر فلسفه ، دین قدر قدرت ساحرانه کوستره مز . ویریلن امیدک قابل تحق اولوب اولماسی قطعاً وقاطبة حکمسز و اهمیتسز بر مسئله تالیه تشکیل ایده بیلمر . اصل خارق عاده اولان جهت - هر دورده ، هر مدیتده ، هر یرده مقهور سفالت یاشایان و حرمان و خسران ایچنده حق و مساوات و حتی انتقام حرصیه بر عدالت مستقبلیه منتظر اوله رق افنای عمر ایدن - اکثریت انسانیه ایله بر امید ویره بیلمک و او امیدک البته ، عدالت و عنایت الهیه ایله نهایت الامر تحق ایه چکنه دائر شدتلی بر حس ایمان نفخ ایده بیلمکدر . دینک انسانلر اوزرنده دائماً اجرا ایتدیکی سحر تأثیر ایسته بویله بر الهام ویره بیلمه سنده در .

بو نقطه نظر دن باقیلیر سه شبهه بو قدرکه (نوفلاطونیه) فلسفه سی ایله (دین عیسوی) آره سنده - قیاس قبول ایتیه چک قدر - بویوک بر فرق واردی .

نوفلاطونيك ، سفالته مایوس ودرمانده اولان انسان سورولرینه ، هیچ برشی سویله میه جك قدر اصم و ابكم بر فلسفه سیستمی ایدی . هم هر فلسفه سیستمی اویله در . غایت آریستوقرات بر ذكانك محصول فکیر و نظری در . حسیات ناسه سویله مز . درین درین دوشونمکه مستعد اولان ذهنله آشناق ایدر ؛ فضله اوله رق بو محرمته مظهر اوله سیلمك ایچون خیلی معلومات کسب ایتن بولونمالی در . حالبوکه دین - خصوصا حین ظهورنده سفالت انسانیه چاره ساز اولق نیتی ایله بر حرارت عشق ایکن - (معلومات بشریه محصول تحری می در ؟ .. دکل در ؟ . معقولات ثانیه لك عالم خارجی ده متعلق الیهی وارمی در ؟ یوقمی در ؟) کیی مسئله لرله اوغراشماز . اونلری کوره مز که بیلسین ! .. انسانلرک سفالت حاله باقار ؛ حقسزلقلره عصیان ایتمکه مظلومینك وجدانه حیات نفج ایدر ؛ غیرت جهد ویریر ؛ علوی هیجانلر الهام ایدر . خلاصه جمهور انسانیتك لسان وجدانی يك ایی بیلیر . يك ایی بیلیر دیمك یا کلدشدر ! دین بالذات ، او وجدان ناسك قدسی بر الهام ایله او یانان لسان معنویسندن آیری برشی دکادر . اونك منطقی ، کتابلرده او قودوغمز علم معروفك قواعدینه موافق اولسون اولماسین ، بونك حکمی یوقدر ؛ چونکه قوتی اوراده دکادر . دینك اك قوی برهانی قیاس منطقی دکل شفقت در ؛ اونك ده نقطه استنادی عقل دکل ، کول در . دین ، حقیر و نومید اولان انسانیتك ذلت و سفالتهی دعواسنه دلیل کتیر ؛ اونك دلشنه امید اولماسندن قوت آلر و بناء عایه خارق عاده بر قدرت اقناعیه ایله دعواسنی قازانیر . ایشه [دینك حیاتی واردی ، نوفلاطونیه مذهبی جانسز معمولات فکریه دندی .] دیمه لك معنای صحیحی بودر . یعنی [دین ، حیات انسانیتله (لاینفك inseparable) اولان (مسائل اجتماعیه و اولاقیه ques. sociologico-morales) بی (حسی sentimental) و (هیجانی émotionnel) بر نقطه نظر دن تلقی ایدره لك مایوس و نومید اولان اکثریت انسانیه لك لسان حسیاتیه ، صمیم وجدانه تلقین ایمان و بخش امید ایدر ؛] دیمکدر که يك طوغرودر ؛ و بو خصوصده هیچ بر فلسفه دین ایله مسابقه ایده مز . بنم اعتقاد بودر ، وطن ایده رم که او قدر یا کلدش بر فکدره دکل .

نوفلاطونی مذهبه کمنجه خرسیتیاناق جریانه قارشی مغلوب اولمش ایسه ده اکثر مورخین مدنیتك و منقدین فلسفه لك ظن ابتدیک کیی بوسهوتون مضمحل اولماشدر . بالعکس دینه شدته تأثیر ایتشدر . دیندار اولقله برابر عقائد عامیانه دن

نقرت ایدنلرک هان جمله سی - بیلهرک بیلیمیه رک - اوکا میل ایدیور . شرق و غربده بوتون (باطنیه esotérisme) اعتقادی نوفلاطونیلکدن باشقه بر شی دکلدر . بالذات عقائد خرستیانییه نك اك اساسلی اولانلری بیله عقائد نوفلاطونییه دن ماهیتاً هیچ فرقلی دکلدر . درسمزك بوبخشلره تعلقی اولسه ییدی ، بوخصوصده يك فائده لی تفصیلات ویره رك شوادعامه يك قوتلی دلیللر کتیره بیلیردم . [*]

لکن بوراده سزه کوسترمك ایسته دیکم جهت بودکلدر . نوفلاطونی مذهب فلسفه سنك نظریاتی ایضاح ایتكده دکلدر . هر نه قدر ، نوفلاطونیلرک ، غایت منسجم بر نظریه معرفتی وارسه ده اونى بحثه ادخال ایتیمورم ؛ چونكه حقیقه آکلاشیله بیلیمه سی ایچون بعضی مقدمات ایستركه علمى - فلسفه دن زواده تصوفه تعلقی وارددر . حالبوکه درسمز تصوف دکلدر .
یالکیز شو برایکی جمله ایله عرض ایده جکم ملاحظات مخصوصه بی نظر دفته آلیکیز :

(۱) سقولاستیق سیستمی دیدیکمز فلسفه نك - یکانه دکلسه ده - باشلیجه علامت فارقه سی نصوص دینییه تبعیتله تسکمی او تاثیره کوره بر ییچ آلمش اولماسیدر .

(۲) نوفلاطونی فلسفه سی واوندن اول موجودیتی برازحس اولونان (یهودی قبالیزمی = le cabalisme juif) ذاتاً برسقولاستیق سیستمندن باشقه برشی دکلدر ؛ چونكه عقائد دینییه ایله فکر فلسفه فی تالیف ایتك غیرتدن طوغمش ونهایت (متون مقدسه les textes sacrés) بی تأویل مجبوریتنه وارمشدی ؛ که بوندن ده مدهش مخاصمات وقوعه کلدی وغریب غریب مذاهب تالیه تفرع ایتدی ایدی .
(۳) خرستیاناق ظهور ایتدیکی زمان ، اك معتبر ومزاج عصره موافق اولان

[*] مشروطیتدن بر سنه اول مستشرق مشهور متعرفی (باربیيه دومهینار Barbier de Meynard) ك تكلیفی وپروفسور (براونون P. Browne) ك التامی اوزرینه (حروفی) مذهبه دائر برائر یازمشم . فرانسز لسانی اوزره قلمه آلمش اولدوغم بواثر ، (مسترکب Gibb) وقفیه سی حسابنه طبع اولونان سلسله آثارك طوقوزمچی جلدیخی تشکیل ایدر . اوندی بوتون باطنیه اعتقادینك یهودی قبالیزمی ایله نوفلاطونی فلسفه سنه استناد ایتدیکی دلائل قطعیه ووثائق معتبره ایله کوسترمشم . ادعالمک یاکلش اولدوغنه دائر ، هیچ بر متخصص بکا اخطارنده بولونماقدن ماعدا ملاحظاتی موافق حقیقت بولدیلر وتصدیق ایتیلردی .

فلسفه انجق نوفلاطونی لك ایدی. دین عیسوی بو محیط معنوی ایچنده طوغدی ایدی؛ اوندن تقریباً بر عصر صوكره كندیني استشعار ایتدیكي زمان ، (یعنی احكام اعتقادیه سنی ملاحظه ایتمكه باشلادیني وقت) ، نوفلاطونی فلسفه سی علی الاطلاق اذهان متفکرینه حاکم ایدی. بوتون روما ایمپراطورلغك مرا كز عرفاننده ، مدرسه لرده - اصولی ایله - تعلیم اولونویوردی . اوندن صوكره ده نوله دی ؟ بالعكس ده ا زیاده تكمل ایتدی. چونكه بومذهبك اك بويوك داهی سی ومتفكرين انسانيتك اندر مشاهيرندن بری اولان (پلوتی نوس = Plotinus) میلاد عيسادن (۲۰۵) سنه صوكره طوغمش و (۲۳۲) تاریخ میلاديسنده ، (یعنی يكرمی يدي ياخنده) اسکندريه يه كیده رك (آمونیوس ساق قاس = Ammonius Saccas) دن بالخاصه نوفلاطونی فلسفه سنی تحقيق وتحصيل ایتشدی. بو فلسفه (پلوتی نوس) ك سلسله آثاری وهله تعلیمات شفاهی سی سایه سنده اوج اعلاي اعتباره صعود ایتدی. اونك اك مشهور شاكردی (پورفیریوس Porphyrus) - كه منطق ده ایساغوجی رساله سنك مؤلفی در - پلوتی نوسك تعلیماته موفقیته دوام ایتدی . بناء علیه بر جوق محرر لك ادعا ایتدیكي كي نوفلاطونی فلسفه سی خرسیتیانلغه بر آنده مغلوب اولوب نوله دی ؛ یالكیز خاقی - خرسیتیانلق كبی - تسخیر ایده مه دی كه بوده بك طبیعی بر جاده عد ایدلك لازمكلیر ؛ چونكه بك اریستوقرات بك اینجه ونازك - وهله بك (معضل compliquée) - بر فاسفدر . خلق ایچون دكلدر .

(۴) انسانیتك تكاملنده بر طاقم ادوار متعاقبه وار ؛ و ذی حیات اولانلر ایچون بویه دورلر كچیرمك طبیعی در . قرون وسطی بر مهم دور ایدی . انسانیت او زمانلر حیات معنویه نك بوتون هیجانلرینی حس واستشعار ایتمكه باشلامشدی . (اندیشه غیب) ایله ، یعنی كوزه كورونمین بر (حقیقت متعالیه - vérité transcendante) ایله قارشى قارشى یه بولوندوغنی - اسکیدن زیاده - او زمان حس ایتمكه باشلامشدی . بو حقیقتك سرینی عقل ایله كشف ایدوب ایده میه جكینی ده درشونمكه ده اوزمان قویولمشدی . الحاصل قرون وسطی ، انسانیت متمدنه نك وجداننده (حس دینی le sentiment religieux) نك اك زیاده شدتله (تهیج exaltation) ایده رك حمزه سبب اولدوغی دور ایدی . تام مناسیله (بحران معنوی crise spirituelle) دوری ایدی . بناء علیه هیج (غیر طبیعی anormal) صایلمامالی در .

(۵) هر نه تورلوحسیاته منقاد اولورسه اولسون - استیکنه حقیقت بچشده - ذهن بشر الك مهم خدمته قابل اولدوغندن طولایی، عاطل قالماز. قرون وسطاده دخی فعال ایدی؛ فقط حسیات دینیته نك تاثیراته و تمایلاتنه تمامیه تابع بولونوردی. بو حالت روحیه وبو وضعیت ذهنیه دن تولد ایدن سقولاستیق سیستمی ده - او زمانلر ایچون - طبیعی عد ایدلمه لی در. شو قدر وارکه سالم بر مسلك دكلدر. عجائب مخلوقات کیبی طبیعی در. البت بزه عجیب کورونز، حادثاتك جمله سی ده بر طاقم اسبابك محصنه سیدر. او اسبابی کشف و تحقیق ایتك وظیفه مزدور. ا کر اونلری بولوب تعیین ایدرسك، بزه غریب كلن بر شیتك غرابتی قالماز.

شیمدی خرسیتان سقولاستیق فیلسوفلرینك علی الاطلاق ناصل دوشونه بیلمش اولدقربی یالکز اشارتاً ذکر ایدوب کچه حکم. اسلام فیلسوفلرندن بر آز ده تفصیل لیجه معلومات وبره بیلیمك ایچون بو فدا کارلغه مجبور اولویورم. فضله ایضاحاته یریمز یوق !.

خرسیتان متفکرینی هنوز لایقيله لاتین آثارینی تتبع ایتزدن اول یونان فلسفه سندن کلیاً بی خبر ایدیلر. یالکز قیریق دوکوک بر قاج فکر ترشح ایده بیلمش ایدی. لکن - جهل سیيله - فکرلر تشویش ایدیلور؛ یا کلاش آکلاشیلور؛ وصاحب حقیقیلرینه ده اسناد اولونه میوردی. سقولاستیق فلسفه سنك اقطاعیه (eclectisme) شکلی آلمش اولماسنده، یعنی (ده وشیرمه) صورتيله التقاط افکار ایده رک یکدیگرینه معارض اولان فرضیات و ملاحظاتی تألیفه چالیشوب بر مناسبتر ضابطه یا پاماسنده، جهلک ده پک بویوک بر دخلی اولمشدر.

سقولاستیق حکمای خرسیتانیه سی، ارتق بر نظریه معرفت ترتیب ایده بیله جک قدر صلاحیت احراز ایدنجه، دم موقریت و نه پیکورک (اشباح idoles) نظریه سنی ترجیح ایتشلر. فقط بو فکر ارسطونک در ظن ایده رک المشر؛ ارسطوی ده کلیسانک تعلیمات دینیه سنه الک زیاده موافق - و بناء علیه (orthodoxe) یعنی اعتقادی طوغری - بر فیاسوف صائمشردر.

ارسطو، هر شیده (هیولا و صورت) یعنی (ماده و شکل) فرقه پک اهمیت و یریزدی. ناصل که اولجه عرض ایتشدم. استاد یونانی نك بو خصوصده کی فکرینی ایجه آکلامق و کندیسنك - فی الحقیقه - ناصل دوشونمش و شکل و ماده تعبیاریله نه دیمك ایسته مش اولدوغنی کشف ایتك قولای برشی دكلدر. حالبوکه

ارسطونك بونظريه سی انقلاب افكاری موجب اوله جق قدر یکی ومهم بردوشونوش - در. حکیم مومی الیه استادی افلاطونك (اوسی یا) یعنی (جوهر - substance) فرضیه سنی رد و ابطال ایچون ، او نظریه بی احداث ایتشدی .
افلاطون و اوندن اول كن فیلسوفلك همان هبسی (مبدأ حادثات) اولق اوزره ، (بالذات لایتغیر immuable en soi) بر جوهر اولدوغنه قناعت ایدیورلر واونی حادثاتك آلتنده یاخود ماوراسنده آریورلردی .

ارسطو اویله بر جوهر اوله مایه جفی ادعا ایتدی . وارانی (بالقوه = ذینامیس) برده (بالفعل = نهزگی یا) اولق اوزره ایکی تورلو دوشوندی . موجود حقیقی تأثیر یله ثابت اولور . بالقوه وار اولان بر شینك هنوز تأثیری اوله ماز ؛ چونكه تأثیر انجق فعلاً تحقّق ایده بیلیر بر حالدر . بناءً علیه بالقوه موجود اولان برشی هنوز حقیقاً موجود دکلدر . او ، هنوز بر (شكل ایله تعین ایده مه مش بر استعداد) در ؛ دیوردی ؛ و بوسیله صورته فوق العاده براهیت ویرهك : (برشینك صورتی اونك روحی در) دیه ادعا ایدیوردی . زیرا برشینك فی الحال و بالفعل تحقّق ، انجق برشكل ایله تعیننه وابسته ایدی . ایشه - انجق بر نقطه اساسیه سنی عرض ایده بیلدیکم - بونظریه ایله ارسطو او (لایتغیر جوهر) اعتقادینی ابطال ایدیوردی .
بونون بو طولاً مباحلی دوشونوشلر - كه استاد یونانیك فلسفه سنده تمل طاشنی مثابه سنده ایدی - هب یا كلش آكلاشیلدی . کیمیسی : (روح شكل ایش ! . دیمك كه مشكل ایش ! .) دیه بر عجیب فکرة ذاهب اولدی . کیمیسی اشباح فرضیه سنی ارسطویه اسناد ایتدیکی ایچون (استادك شکلدن مرادی ، ایشه بو اشباح اولق کر کدر . ذاتاً اشباح اشیانك کندی شکللی ، کندی صورتلری دگی یا ؟) دیهرك ، مسئله بی بوسبوتون قاریشیدردی . و بو عجیب خلیطه افكار ، اوزون مدت سورن مناقشات سایه سنده یوغوروله یوغوروله ، عاقبت بر قیافته قونولدی و بر حقیقت مسلمه کی قبول اولوندی . چونكه (Magister dixit) یعنی (قال الاستاد) دهنیلدیمی ؟ . هیچ شبهه و ترده محل قالمیوردی . و مادام كه ارسطو بویله سویله مش دهنیلوردی ، ارتق اویله اولوب اولمادیغنی تحقیقه کیمسه لزوم کورمیوردی .

بو حالت غریبه سقولاستیق تربیه فکریه سنجه (autorité = صلاحیت) نك اك مهم و واجب الرعایه بر برنسیب اولدوغنی بك كوزل کوستریر .

شیمدی زواللی ارسطویه اسناد اولونان بو فکر عجیبی، خرسیتیانلک (روح àme) حقنده کی اعتقادیله تألیف و عقائد مؤسسه ایله توفیق ایتک لازم کلیوردی.

خرسیتیانلق - هر دین کیبی - روحک غیر مادی بر جوهر نورانی اولدوغنی تعلیم ایدر. (معنویت روح la spiritualité de l'âme) نامیله مشهور اولان دعوا بودر.

بونک ایچون اولاشویه دوشونولدی :

اشیای مادیه دن بر طاقم اشباح (صدور émaner) ایدر. بونلر اشیای مذکورەنک (خیالات images) ی در؛ (شکللر formes) ی در. حتی عینی جنسدن اولان (افراد متشابهه individus semblables) نک اشکال مجرده سی یکدیگر ندن یک فرقلی اولمادینی ایچون اشباح صادره یه (اجناس = espèces) دیدیلر.

بوراده ایضاحاته کیریشمه یه وقتم یوق؛ فقط دقت ایدر سه کز قولایلقاه اکلار سکز که بر محیی جمله نک ناطق اولدوغنی فکر تمامیه ده موقریتک اعتقاد ایدر. ایکنجی جمله ده کی ملاحظات، یعنی (افراد متشابهه نک اشکال مشترک سنی اجناس اولمق اوزره تلقی ایتک) افلاطونک ماهیات نظریه سنه بگزر بردوشونوشدر.

بونلر اثبات ایدیور که افکار یونانیه سرپنتی سی قارما قاریشیق اوله رق انتقال ایتمشدر. بو (اشباح = idoles)، (espèces = species)، یعنی - معنای خصوصی سی ایله - ماهیات جنسیه اوله رق قبول ایدلکدن صوکره اشیای حقیقیه نک (ویکلری vicarios) [*] عد اولرندی. دیمک اولو بور که (استحضاریه representationisme) مسلککنجه بر نظریه معرفت قبول ایدلمش اولدی. زیرا بز اشیانک طوغرودن طوغرویه کندیلرینه مطلع اولمه یورز؛ اونلرک - نوعما - وکیللری اولان اشباحنی ادراک ایدیورز. صوکره بو خیالات واسطه سیله آکلیورز که او خیالات مدر که نک خارجه حقیقتلری واردر.

بناء علیه بالذات اشیا یه علممز - (تحدسی intuitive) دکل - انجق اشیا ی مذکورەنک خیالاتی دلاتیله در؛ دیمک جیقار. یعنی واسطه علم اولمق اوزره اشیا خارجه ایله نفسمز آره سنده بر (ماهیت ثالثه tertium quid) واردر؛ دیمک اولور.

[*] vicaire کله سی، لاتیجه (vicarios) لفظدن مشتق در و (خلیفه) دیمکدر.

بك انی بیلیر سـكـنـكـز كه هاملتنك تعیرنجـه (استحضاریه نك اك قابا نظریه یی)
بودر. فقط قرون وسطی حکما سنك ظن و اعتقادینه کوره مادی الطبیعه اولان
بر شیدن صدور ایده بیان هر شینك ده بهمه حال مای اولمای لازمه کلیردی .
بناءً علیه اشباح دخی بر طاقم اشیا مادیه نك اشکالندن عبارت اولدوغی ایچون
مادی الطبیعه صاییلوردی. غیر مادی اولان روحزه بو اشباح مادیه نك نه وجهله
تأثیر ایده بیلدیکنه - بر تورلو - عقل ایردیر یله میوردی . بو ظن باطل ده اسکی
یونانیلردن انتقال ایتشدی .

آ کلاسیلیورکه (آمپه دو قله س) ك دیدیکی کیی (انحق طبیعتاً متشابه اولان
شیلر یکدیگری ادر اك ایدوب بیله بیلرلر) ظن اولونوبوردی .
فقط قرون وسطا حکما سنك بر غریب حالت ذهینه سی واردی که بو کون بزده
یوقدر. اولر، بر مسئله غامضه حضورنده صیقینی به دوچار اولدقلری زمان مایوس
اولمازلردی ؛ همان بعضی الفاظ و تعییرات ایله بر فرضیه ایدور یوریرلر و مشکلاتی
بو صورتله حل ایتش بولوندقلرینه قناعت کتیریرلردی . بو مسئله ده دخی او یله
یایدیلر ؛ شویله دوشوندیلر :

اشباح - که اشیا خارجیه نك وکیلاری عد ایدلمشدی - اعضای وجودمزی
میخانیکی بر صورتده تحریک ایدرلر. اوتقدیرده کندی ماهیتلری کیی تأثیرلری ده
مادی اولمش اولور. بو حالده اشباح مذ کوره یه (species impressae) ده نیلیردی که
عضویت بشریه انحق میخانیکی و مادی بر تأثیر اجرا ایده بیان اجناس خیالات
معناسنه کلیر . صـوـکـره بونلری روح ، فعالیت ذاتیه سی ایله تبدیل ایدرک
(species expressae) یاپاردی که بوده عضویت بشریه دن آلمش و بناءً علیه
روحانی برشکه کیرمش اجناس خیالات دیمک اولوبوردی. ایشه بوسایه ده معهود
برنسبب محافظه ایدلمش بولونوبوردی ؛ یعنی مادی شیلرک روح اوزرینه اجرای
تأثیر ایده میجککه دائر مسلم اولان او ادعا تصدیق اولونمقله برابر ، خیالات
و اشباح مادیه نك روحه تأثیری ، لفظی بر صورتده تعریف ایدلمش اولوبوردی .
عادتاً روح، اشباح مذ کوره یی کو با هضم ایدرک کندی طبیعتنه (تمثیل assimilier)
ایدیور و روحانی برشکه قوبوبوردی .

تعریف نامنه بویله بوش لافلرله مسترخ وقانع اولان ذهنلر بزلر ، بو کون
حیرت ایده رز. چونکه بولا قیدیلرله هیچ برشی تنویر و تعریف ایدلمش اولوبور.

• مسئله نك اصل محتاج تعريف اولان جهتی: (اشكال ماده بی روح، ناصل اولویورده تلقی ایدم بیلور ؟ ..) واونلری کندی طبیعتیه اویدوروب روحانی بر شکله قویا بیلور ؟. ایشته بوسری حل ایتمکدی . اشكال ماده اولو عضویتیزه (یعنی ینه مادی بر شینه !) تأثیر ایدیور ! . دیمکله مشکلاتدن یاقه بی قورتارمق ممکن دکل که ! .. عضویتیز ، ناصل او اشکالی روحیزه نقل ایدیور ؟ ... (species impressae) شکلنده ، یعنی ینه مادی بر شکله نقل ایدیور ؟. دکلکی یا ؟ .. فرضمز اقتضاسی بودر ، چونکه (مادی شیلردن آنجق مادی شیلر صادر اوله بیلر !) دستوری سقولاستیق فلسفه منجه بر قانوندر . عضویتیز دخی مادیدر . روحه نقل وتودیع ایتدیکی خیالات دخی مادیدر . احوالده - بوتون بوتعبیراته رغماً مسئله نك نه وضعیتی ده کیشمش اولویور ، نه ده ماهیتی ! .. دیمک ، بومادی خیالاتی روح - طوغرودن طوغرویه - تلقی ایدم بیلور ایش که ، اونلری آلوبده (species expressae) شکلنه صوقورق کندینه مال ایدیور و کندی ماهیت ذاتیه سینه بکیزه تیور .

او حالده سوألك حکمی ینه باقی ! .. روح بونی ناصل یابه بیایور ؟ .. ذاتاً صورولان شی بوایدی ! (فعالیت ذاتیه سیله !) سوزی بوسؤاله جواب اوله ماز . چونکه بر کره معناسزدر ؛ مبهمدر . (فعالیت ذاتیه سی) نه دیمکدر ؟ بوتون (سرتتمیل le mystère de l'assimilation) ذاتاً اوراده مند مجدر . اونی تصریحاً بیان ایتملی در . تصریح ایدیه بیلدیکی تقدیرده ده اصل سقولاستیق فلسفه سنك حل ایتمک ایسته دیکی مسئله یه تماس بیاه ایتمز . روحك فعالیت ذاتیه سی شودر ؛ بودر ؛ دیسهك بیله برشی چیقماز . چونکه مسئله اساسیه ، ماده نك روحه تأثیر ایدمیه . جکئی ادعا ایتمکه برابر ، او تأثیرك بداهت وقوعنه بر معنا ویرمکه چاشمقدر . بو تأثیر انکار اولونونجه مسئله حل اولونه ماز ؛ زیرا ماده ایله روح آره سنده واسطه اوله بیله جك براو چونجی شی یوقدر . بناء علیه تأثیرات خارجیه بی طوغرودن طوغرویه روحه توجیه ایتمیوبده اولو عضویتیزه عطف ایتمک ، صوکره او واسطه ایله روحه نقل ایتمک - مسئله نك عقده اساسیه سی تشکیل ایدن - کوچلکی حل ایتمز . روح ، اشباح ماده بی ، خارجه کی اشیادن آلمایوب عضویتیزدن آلیورسه ، ینه مادی برشیدن آلیور دیمکدر ؛ چونکه عضویتیزك مادی اولو وغنده - هر کسه

برابر - سقولاستيق حکماسی دخی متفق الرأی درلر . اولیه ایسه ناصل آله بیلور؟.. اصل سؤال بودر .

بوکافارشی جواب اولمق اوزره (expresse) (impresse) کیی کلمات اصطلاحیه ایجاد ایتک ، بر مهم معمای لاف ایله حل ایتک دیمکدر . (impressae) دیدکلری شیر خیالات ماده در؛ بونلر واقعا روحک فعالیت ذاتیه سیله (expressae) شکلنه کیروب بر حیثیت معنویه کسب ایدیورلر . فقط بو غریب تحول ناصل اولویور؟.. ناصل ممکن اوله بیلور؟ مادامکه ماده نك روح اوزرینه اجرای تأثیر ایتیه سی ممنوع ایش !. چونکه ماده دن صادر اوله بیان شیر انحق مادی الطبیعه اوله بیلیرمش ...! بو عقده اساسیه ینه باقی ...!

اگر بو ادعای برر دستور حقیقت عد ایدرسه ک روح ایله ماده نك و بناءً علیه نفس مزایله کائناتک مناسبتنی تعریف ایتک ایچون هیچ بر فکر بیان ایده مه یز، هیچ برشی سویله مه یز که معقول و مقبول اوله بیلسین . چونکه آره برده - هر هانکی بر - واسطه اوله بیلیمه سی قطعاً و قاطباً انکار ایدیورز؛ دیمکدر . حالبوکه دیگر طرفدن بویله بر تأثیرک بالفعل وقوعی (بدهات محضه pure evidence) در . اونی ده همه حال تعریفه مجبورز؛ و کورد و کز که سقولاستیقار تعریف لفظی ایله یعنی لاف ایله یک اعلا قناعت ایده بیلورلر ایش ...!

سقولاستیق ، هر تورلو مسائلی ایشته بو صورتله حل ایده ردی . حالبوکه روح مزله عالم مادی نك صورت تماس و کیفیت مناسبتی و یکدیگرینه قارشی تأثیرات متقابله سی، هنوز حل اولونه مامش قالان ک بویوک معمالردن بریدر؛ حتی - شیمدی دورا خیره کلدیکمز زمان - کوره جکز که نه بیسته مولوزی مباحثی، صوک زمانلرده یاواش یاواش بومسئله اساسیه اطرافنده دوران ایتک باشلایه رق بر باشقه جریان آلیور . ده قارت بالخاصه بومسئله یی حل ایتک ایستور .

فقط دورا خیره کلزدن اول اسلام فیاسو فلرنجه - علی الا کثر - معتبر اولان نظریات حقنده دخی بر ایکی سوز سویله یوب قرون وسطی فلسفه سینه نهایت ویره میم .

بو دورده اذهان متفکرینی مشغول ایدن مباحثک مواد ابتداییه سی ، یعنی عناصرینی تشکیل ایدن افکار و مفهومات ، یک متشتت بر صورتده یونانیلردن ترشح وانتقال ایش اولدوغی ایچون - همان غیر محصور دهنیله جک درجه ده -

متنوع و متعدد بر چوق مسائله وجود و پرمشددی . معین بر مسئله بی تذکر و مناقشه ایدرکن ، بحثی بوسبوتون چیغیرندن چیقاروب آلابیلدیکسنه جانالاندیریق دخی سقولاستیق اصولک الک بویوک هنری اولدوغندن طولای فلسفه ، عجیب بر خلیطه حالی آلمش قالمشدی ؛ او درجه ده که بو کون بر بحثک حدودینی تعیین ایدوبده حصراً تبعه کیریشمک غایت کوچ بر ایشدر . ادنی بر مسئله نک هرشیله اوقدر گرفت مناسباتی واردرکه بر کره انسان بوفلسفه نک بر طرفندن کیردیمی ؟ . قولای قولای ایشک ایچندن چیقاماز . برکت ویرسین که ارسطونک (مقولات عشره les dix catégories) سی - علی الاطلاق - قبول ایدلمش اولدوغی ایچون بوتون موضوعات مسائل او عمومی (قادرو cadre) داخلنده تتبع ایدیلرکه سلسله مباحثه از چوق انتظام گوزهدیله بیلمشدر .

عالم اسلامده فلسفه دایر یازلمش اولان کتب مشهوره معتبره نک اکثریت کلیه سی اولای (علمک تعریفی le définition de la conn.) ایله بحثه کیریشیر و اسلوب مذاکره منحصرأ منطقی در . فقط مقصد ، اصل نصوص دینی بی احکام فلسفه ایله توفیق وتالیف ایتمکدر . اونک ایچون ، استدلاله بویوک بر صیقتی به معروض قالدجه ، همه حال جناب واجب الوجودک قدرت کلیه سی الک قوی و جلی بر برهان اوله رق ایراد و اقامه ایدیلیر ، و مسئله او صورتله حل اولونور . (لان سبحانه وتعالی قادر علی ذلک !) یعنی (زیرا حق سبحانه وتعالی حضرتلری بوکا قادردر !) جمله سیله بیان اولونان ادعا ، هر نوع براهین و ادله به - قدرت اقتناعیه اعتباریله - فائق و راجح عد ایدلمشدر .

بوکون اصول فلسفه جه سقولاستیق سیستمه نسبتله شو فرق واردرکه ، الک دیندار بر متفکر بیلله فلسفه مسائل مناقشه سنده بویله بر دلیل کتیرمز ؛ حتی کتیرمکدن قطعاً امتناع ایدر . سببی ده شودرکه (ایمان la foi) ه تعلق ایدن امور ایله ، معقولات نوعندن اولان شیلر یکدیگرندن بوسبوتون باشقه ماهیتلرله ممتازعد ایدلمش ، وفی الحقیقه اوله اولدوغنه آرتق قویاً اینالمشدر . اونک ایچوندرکه زمانمزک اعتقاداتجه کیفیت ایمانک دلائل عقلیه ایله ثبوتی لازم کلر . عقلک ایمانه تعلق اوله مایه جنی ایچون ، فلسفه کبی منحصرأ معقولاته مناسبتی اولان مباحثه ایمانه مستند بر دلیل کتیرمک طوغرو بر طرز استدلال عد ایدیله میور . هیچ اولمازسه بو کبی دلائلک بوتون متفکرین عنندنه معتبر اوله مایه جنی شبهه سزدر .

نته کیم ایمانی اولمایان بر متفکر بوتورلو براهینی - جف القلم - رد ایدیوریر :
چونکه کندیسنه قارشى موجه دکدر .

دور مرکز صلابت دینه ایله شهرت شعار اولان متفکرینی بیله بوقاعدهیه تمامیله
رعایت ایدمک دین بحثی فلسفه بحثدن آیری طونارلر. اولجه (الهیات theologie)
فلسفیانک الک عالی قسمی تشکیل اتمک اوزره اونده داخل ایدی. حتی یاقین زمانه
قدر بوترتیب دوام ایتدی. فقط بوکون باشلی باشنه بر (علم science) در. فلسفه،
آیری بر شیدر. دینه موافق اولسون، اولماسین؛ الهیات ایله اویوشسون،
اویوشماسین، ماهیتی ده کیشمز. احتمالکه مذاهب مختلفیه کوره قیمتی ده کیش بیلیر!
فقط، او باشقه !.

نته کیم، علم چوقدن عقائد دینه نیک تاثیراتندن آزاد اولدی؛ و - طوغروسی
سویله مک لازم کلیرسه - آنجق او زمان، کشفیات مفیدهیه موفق اوله رق ترقی
ایده بیلدی .

علمک اصل غایه سی، حادثات طبیعییه - اویله اولدوغی کیمی - تتبع اتمک
(تسلسل اسباب l'enchaînement des causes) طولایسیله طبیعته بر (آهنک
harmonie) وشونات عالمده بر جریان (اطراد uniformité) کشف ایلمکدر .
بوتون بو تحقیقات دخی جلب منفعت و دفع مضرت امر مهمنده عوارض کونییه
فائز اوله بیلیمک ایچون (اسرار طبیعت les mystères de la Nature) انفاد
نظر مجبوریتی در. علمک مقصدی بوندن ایلری کیده مز. بناء علیه الهیاتک موضوع
خاصی تشکیل ایدن مسائل ممتازه ایله قطعاً علاقه سی اولمادیفی کیمی، هر هانکی
بر دین ایله ده ذره قدر مناسبی یوقدر. اولسه ایدی، - تام مغناسیله - (علم
Science) اولمادی .

ایشته الک متدین علمانک بیله : (علم، لامذهبدر !) دیمکدن مقصدلری
بودر. فلسفهیه کلنجه - اوتهدنبری ویرمش اولدوغم ایضاحاته بناء - یک ای
آکلامش سکزدرکه : علوم ممتازه و مستقله نیک حل ایدمه یوبده اورطیه آتدینی
معمالره بر معنا ویرد بیلیمک ایچون، اصولی دائره سنده نظریات عمومییه ترتیب
ایتمکدر. طبیعی درکه او کیمی نظریات - آز چوق معقول اولمقله برابر - آنجق
(تقریبی approximatif) دوشونجه لدر. بوفرضیات عمومییه نیک ایمان ایله اوقدر

مناسبتی یوقدرکه دائماً ده کیشیر و اصلاح و تغیر اولونمقله تکمل ایدرلر . بر فیلسوفک، عمرنده بر قاج کره نظریاتی تبدیل و یا تعدیل ایتدیکی وقوعات نادره دن دکدر . حتی بزجه معتبر اولان نظریه معرفت بر مهم حادثه علمیه ایله قابل توفیق کورولمه یورسه ، درحال ار نظریه یی ترك و اهاال ایدرز ؛ و - توصیه ایدرم - ایتیمیز ! نظریات فلسفیه نك حیثیت و اعتباری انسانله کائناتك مناسبتنه تعلق ایدن حادثات عمومیه یی تعریف ایده بیلدیکی قدردر ؛ و - معقول بر صورنده - تعریف ایده بیلدیکی مدتیجه دوام ایدر . لکن دینك - اربابی غندنه - حیثیت و اعتباری بویله می دریا ؟ .. عوارض فکریه و ایجابات نظریه یه کوره حیثیت و قیمتی تبدل ایدن دین ، - معنای صحیحیله - دین اوله بیلیرمی ؟ .

ایشته اولا علمی ، صوکره فلسفه یی دیندن کلیاً آیروب هراییکی طرفك دخی حق استقلالنی تصدیق و تأمین ایدن زمان حاضر ، بوملا حظانه تبعاً بویله بر قرار اتخاذ ایتشدر . حتی قرار دکل ترقیات فکریه بونی اقضا ایتشدر .

حالبوکه قرون وسطی بویله دوشونه میوردی . دوشونه مه مکده ده جدأ معذور ایدی . دین او وقتلر ائک مهم مسئله حیاتیه یی تشکیل ایدیوردی . او زمانك متفکرینی دین یخشده (راسیونالیست rationaliste) ایدیلر ؛ یعنی ایمان قوی ایله قبول ایتدکری احکام اعتقادیه یی (معقول rationnel) بر شکلده دخی کورمک ایتسورلر ، و بناءً علیه ایمانی منطق ایله ده تقویه و تحکیم ایتک خصوصنده فرط غیرت ایدیورلردی که بهوده در ؛ عبشدر .

قیاس منطقی هیچ بر وقت ، ایمان درجه سنده متین بر قناعت وجدانیه الهام ایده مز . حتی بن دها ایلری کیده جکم ؛ او یله ادعا ایده جکم که دینده ، علومده اخلاقیانده و فلسفیانده او یله بر طاقم مبادی مهمه واردر که اونلری حقایق واجبه و اساسیه اولق اوزره قبول ایتشزدر . حالبوکه اونلرک حقیقتنی منطقاً اثبات ایتک مستحیل و ممنوع در . مع مافیه صورسه لر حقیقتنه قویاً (ایمان) مز واردر ؛ لکن نیچون ؟ .. ده نیلیرسه اثبات ایده مز . بوتون (متعارف لر axiomes) له برابر ، (سببیت مبدای le principe de causalité) و (حادثات عالمك دوام اطرا دی) حقنده کی . اعتقاد مز و دها بر جوق امثالی هب یوقیلدن در . کذلک اخلاق یخشده ده او یله در ؛ مثلاً : تأمین منفعت و ذوق ایدن حرکات غیر مشروعه نك ، حقیقتاً فنا اولدوغنی - عقلاً - اثبات ایچون ایراد اولونان بونجه دلائل منطقیه نك همان

هیچ بریسی بنجه قناعت بخش دکدر . بونلرک هپسینی بن - کندی حسابمه - ملاحظه ایتدم ؛ آنجق ایی لکه ایمان ایتک شرطیله اوکی دلائل منطقیه نك عقل اوزرینه حکمی اوله بیلیر . فقط خیره ایمان ایدیله میورسه قطعاً حکمی یوقدر . ذاتاً ایمان وارسه دلائل منطقیه اوکا فضله قوت و قناعت بخش ایده من . بوتون براهین ودلائلک زمین استنادی ایماندر . کذلک فلسفه ده دخی پک ایی بیلورسکیز که فیلسوفلرک بعضیلری کائنات خارجیه نك استقلال وجودینه اینانیرلر ؛ بعضیلری ده اینانه مازلر . ذاتاً بوتون مسائل مابعدالطبیعیه بوکا منجر اولور . اینانانلرک ابراز ایتدکاری دلائل منطقیه قطعاً بر قناعت جازمه ویره بیله جک بر قوتی حائر اولسه یدی ، بو مهم مسئله حل اولونور کیدر وما بعدالطبیعیات دخی ابدیاً اورطه دن قالداری . حالبوکه هیچ اویله دکل ! . نته کیم فلسفه یه بیگانه اولان (خلق) قویاً ایمان ایدیورکه بر عالم خارجی واردر ؛ و کوردوکی شیلر یالان دکدر . فقط بو اعتقادی عوام ناس دکل ، اک مهم فیلسوفلر قطعی بر صورتده اثبات ایدوبده هرکسی صوصدوره میورلر .

بیلورسکیز که بو خصوصده ایراد اولونه بیلن ادله نك جمله سی (مبدأ علیت principe de causalité) . منجرا اولور . خلاصه سی : [بن ، برطاقم تأثرات حس ایدیورم ؛ بو انفعالاتک البت بر سبب موجبی اولمالی در . کورو یورم و بالتجربه بیلورم که بو تأثرات بنم کندی ارادتمله اولویور . دیمک که اونلرک سبی بن دکلم و او سبب بنده دکدر . مادام که خارجدن کلدیکنی حس ایدیورم ؛ اویله ایسه تأثرات واحساساتک سبی خارجه در . خارجه ده شو عالم وار . اویله ایسه سبب اودر ، و بنه علیه بو کوردو کم عالم فی الحقیقه موجوددر .] دیمکدن عبارت قالیر . لکن سببیت مبدأ نك تنقید ایدیله بیله جک جهتلری اولدوغنی سز ، پک ایی بیلیر . سکیز . [نه دن بر حادثه نك مطلقاً سبی اولمق لازمکسین ؟ .. بو ادعا قبول اولونونجه اسباب ، نامتناهی بر صورتده تسلسل ایدر . تسلسل - هرکس نظرنده باطل دکلی ؟] ده نیلسه ، بوکا قطعی بر جواب منطقی یوقدر . یالکز ایمان یله استدلالدن باشقه چاره قالمیور : [مبدأ علیت اک بویوک ، اک اساسی متعارفدر . نه یایلم ؟ . بوکا اینانیورز . اینانماق الیزدن کلیور . بونک عکسینی دوشونه بیلیمک ممنوع کورونویور .] دیمکدن باشقه یول یوقدر ؛ و بوتون متعارفلر حقنده صوک سوزمنر بودر .

کورویورسکرکه (ایمان) ، قناعت بچنده الک بویوک رولی اوینویور . بو مسئله انکیز فلاسفه حاضره سنی جداً مشغول ایتکده در . وقیله دخی اهمیتی سزیشدی . مشهور (پاسقال) ، (مرقاتک نقطه استنادی ایمان در ؟) دیمشدی وبوفکری (وولتر) کمال استخفاف ایله تلقی ایتشدی . دیمک که حقیله معناسی اکلاماشدی .

واقعا بو حیثیله قوللانیلان (ایمان) لفظنک معنای اصطلاحیسی دینده وارد اولان معناسندن چوق کنیش در . فقط بآس بوقینه اساس ، (هیچ بر دلیل اولمقسزین بر شینه اعقاد ایتک) دکلکی ؟ . شبه یوقدرکه الک اساسی ومهم شیلر حنده اعتقاد من بویه بر ایمانه مستنددر ؛ چونکه قناعت من هیچ بر دلیل مقارن دکدر . ایشته قرون وسطی طرز تفکرینک باشایچه قصوری بو حقیقه قارشی غافل طاور انمائی وانجق ایمانه مستند اوله بیلن معتقدات منی قضای عقل ایله تحکیم ومنطق ایله اثباته قالمیشما . سی در . او دور عرفانک خصایص معنویه سندن باشلیجه برینی تشکیل ایدن (راسیونالیزم) ک - یعنی دین ایله فلسفه بی تألیف ایتک غیرتک - الک مبرم سبی ایشته بوایدی .

شو مختصر مطالعه بی استطراداً بوراده سزه عرض ایتک ایستهدم . امید ایدرم که قرون وسطی فلسفه سنی دهایی آکلایه بیلمه کزه خیلی یاردیم ایده جکدر . بزم اسلام فیلسوفلری ایله برابر متکلمین اول (علم) حقنده کی نظریاتی بسط ومناقشه ایله فاسفه بچنه کیریشیرلر ؟ دیمشدم . بو اوزون ومتشتت مباحثی تماماً بورایه نقل ایتک ممکن دکدر ؛ یالکیز بچمنز ایچون شایان دقت واعتبار اولان جهتلرینی - برقاج چیزکی ایله - کوسترمک ایستیورم .

اولا علمک تعریفی وار . صوکر ا صیره سیله موضوعی ، فائده سی ، مرتبه سی مسائل ، مبادیسی وتسمیه سی حقنده بحثلر وار . هر بچنده بر چوق مناقشه لر ومعارضه لر ظهور ایدیور ، وایجه دن اینجه به بعضی مسئله لر احداث ایدیلوب افکار تفرقه دوشورولویور . مثلاً (بر علم ایکی معلومه تعلق ایده بیلیرمی ؟) کیی سؤالر - جریان بحث ایله - خاطره وارد اولویور ، وبویه کله لر اوزرینه آچیلان بر اصل من بحث اوزرینه بوضاً فرقه لر ، مذهبلر تشکل ایدیور .

فقط تفصیلات تالییه تعلق ایدن بوسقولاستیق مناقشاتنی بر اقوبده اساس بحثی تشکیل ایدن مسائل مه حقنده بیان اولونان ملاحظاته باقارسه ق شایان

تقدیر و تحسین بر چوق افکار مهمه کورورزکه متفکرین اسلامک ، اساسلی مسئله لرده اصابت نظرینی بارلاق بر صورتده اثبات ایدر. چونکه بوباده ویردکاری حکم ، بوکونده عیناً معدوقدر. فقط تفصیلاتنه باقامالی ...

اولا علمک ماهیتی حقنه کی تعریف معتبر پک طوغرودر : (علم . عالم ایله معلوم آره سنده تحقق ایدن رنسبت) دن عبارت عد اولونویور و بناء علیه (العلم اضافۀ محضه) ديه حکم ایدیلیر ؛ و حقیقتاً بوکون هر فیلسوف تسلیم ایدرکه علم محض اضافتدر .

آرتق بوا اساس اوزربنه کیفیت علم مذا کرمه سی جریان ایدیور ، بر چوق متفکرینک رأیلریله ماهیت علم تحقیق اولونونجه بر طاقم تقسیمانه ضرورت الوریور : اولاً علم (قدیم) و یا (حادث) اوله بیلیر . بوراده بر اشارت مهمه وار؛ مشهور (مواقف) نام کتابک مؤلفی (قاضی عضدالایچی) نک شارحی (سید شریف جرجانی) دیورکه :

[قیده بالحدوث لیخرج عنه علمه تعالی ؛ فانه قدیم ولایوسف بضروره ولاکسب .] یعنی [علمک حدوث ایله قید اولونماسدن مقصد ، الله تعالی نک علمی خارج قالسین دیده در ؛ زیرا اونک علمی قدیم در ؛ نه ضرورتله توصیف اولونه بیلیر ، نه ده کسب ایله !] دیمکدر .

انسانلره خاص اولان بو علم حادث ، ضروری و مکتسب و نظری اولوق اوزره باشلیجه اوج نوجه انقسام ایدیورکه بوگونکی اروپا اصطلاح فلسفینسجه (conn. intuitive) ، (conn. acquise) و (conn. speculative) معنانه وارد اولمشدر .

بونلر حقنه بر چوق مناقشات آجیلیورکه اونلری بورایه نقل ایچون امکان اولمادیکی کبی لزومده یوقدر. یالکیز تعریفلردن بعضیسی پک ایی در. علم ضروری بلاا کتساب و نظر حاصل اولان بیلکی در. هرکسک کندی وارلغه علمی کبی ! . بونده اساس و علامت فارقه (انیت intuition) در. علم کسبی هر هانکی بروجمله تحصیل اولونه بیلن معلوماتدر. علم نظری دخی اعمال نظرو محاکمه ایله بالاستدلال حاصل اولان علمدر .

بونلردن هانکی نوع علمک اصل اولدوغنه دائر - کتب اسلامیه ده - غایت

متشنت بر طاقم مباحثات واوزون اوزادی به تفصیلات وارکه اوروپاده دورا خیرک
ابتداسندن زمانمزه کلنجیه قدر مناقشاتی دوام ایدن مسائلی تماماً آکدبریور ؛
وجمله سی ده - ماهیتلری اعتباریله - (نه پیسته مولوژی) یعنی (مبحث معرفت)
مسائلندندر .

علم نظری تعریفنده بر قید وارکه سقولا سبتیق فلسفه سنک غایه حقیقه سی
صراحتاً کوستریور ؛ وفلسفه نك - صیتی صیتی به - الیهاته تابع طوتولدوغنی
اثبات ایدیور :

[حصولی اعمال نظره متوقف اولان معلوماتی ، عبد (یعنی اللهك قولى اولان
ادم) ، تحصیل ایله مکلفدر ؛ اونکله شرایع واحکام تکلیفیه اثبات اولونه بیلسین
دیه ... وجود صانی وصفاتی ونیوتلری اثبات ایتک کبی ...] بو علم نظریدن
غافل اولانلرک (مکلف) اولوب اولمادینی دخی عینی زنده مناقشه ایدیلیور واهل
سنک اعتقادنجیه صیان و مجاین دن ماعدا هرکسک اجماعاً مکلف اولدوغنه حکم
ایدیلیور . سلیم الطبع ورشید اولان هرکس ، احکام وشرایعی تسلیم وجناب
حقق وارلغنی عقلاً اثبات ونیوتک لزومی تصدیق ایده بیلیمک ایچون اعمال نظر
ایله مکلف طوتولویور . مع مافیه علم ضروری نك اصل اولدوغنی ادعا ایدنلر ،
(معرفه الله la connaissance de Dieu) ک ضروری اولدوغنی و بناء علیه اعمال
نظر و محاکمه ایله تحصیل اولونماغه محتاج بولونمادیغنی ادعا ایدرک تکرار براینکجه
بحث آجیورلر .

بو مذاکره لر ، بو مباحثه لر ، بو کون اوروپاده بر چوق (سپریتوآلیست
spiritualistes) فیلسوفلرک - عینی مسئله اوزرینه عینی وادیده - یوروتدکلری
بحثی تماماً آکدبریور .

نهایت بر چوق تعریفات آردسندنه بعضی مهم سوزلره نصادف ایدیلیورکه
اونلرک ضمننده برر بویوک مسئله کیزلی در . مثلاً : [العلم اعتقاد الشئ علی ماهویه]
یعنی علم ، [برشیه - اولدوغنی کبی - اعتقاد ایتک] در . فقط برشیتی - حد ذاتنده
اولدوغنی اوزره - بیلدیکمزی ناسل بیله جکزکه اوکا اعتقاد ایده بیللم ؟ . بوتعریف
دائرة سندنه بحث یوروتولورسه علمک معلومه مطابقتی و علم یقین ایله - اوندن
آیرلمایان (اعتقاد جازم) حسنک ماهیت وقوتی ، و (صحت علمک ضمانی

اولورز؛ وېك اېي بيليرسكز كه بو مسئله لر نه پسته مولوژي نك موضوعات اساسيه. سندنډر .

كذلك، (قاضى ابوبكر باقلاڼى) به عطفاً ذكر اولونان شو تعريف: [معرفة المعلوم على ماهو به] يعنى [بيلين شيدى - حدذاتنده اولدوغى وجه اوزره - بيلمك] دخى بوقاريكنه بگر؛ يالكز بعضى مهم فرقلى وار: اولاعلم يرينه معرفت كلمه سى قوللانلىش اولدوغى ايچون بو، حادث اولان معلوماته خاص بر تعريف در؛ و او حيثيله الله تعالانك علمى بو دائره دن خارج قاليور؛ چونكه الله معرفت اسناد ايتك بويوك خطادر . نه اجمالاً، نه لغتاً نه ده اصطلاحاً بو كله يي قوللانمغه جواز اوله بيلير . الله تعالانك علمى قديمدر و برآن زائل اولماز . ذاتاً لغت معنالريجه علم ايله عرفانك فرقى برنجيسنك قديم اولماسى، جهل ايله مسبون بولونماسى در. ثانياً بو تعريفده (اعتقاد) تعبيرينه مقابل (معرفت) قوللانلشدر . بو تقديرجه اوته كى كيي (dogmatique) دكلدر .

فيلسوف مشهور فخرالدين رازى نك ده بر تعريفى وار كه قيمتلى در . اوده [علم موجب مطابق بر اعتقاد جازمدر] دييور؛ (موجب) دن مقصدى ده ياضرورت، طبيعى، يا خود دليل در. بو تعريف - بوكونكى نطفه نظره كوره بك (formaliste صورى) اولمله جالب دقتدر . چونكه بر شينك حقيقتنه دكل، ايجابات منطقيه مطابق بر اعتقاد اولمق اوزره علمى تلقى ايدييور . (منطق اويسونده نه اولورسه اولسون) ديمكه وارير .

صوكره على العموم فرقه حكمايه عطف اولونان تعريف مشهور وار كه اوده: [حصول صورة الشئ في العقل] يعنى [بر شينك صورتك عقلده حاصل اولماسى در.] جمله سيله ادا ايدلشدر .

فقط بو تعريف تفسير ايديليركن بك بويوك بر ياكلشلق وقوعه كلش و افلاطونك (ماهيات idées) نظريه مشهوره سيله ده موقريتك (اشباح idoles) نظريه سى بر بريله هرج و مرج ايديلوب عيسى شى ظن اولونمش ! حالبوكه بوايكي فيلسوف قدر - فكر و نظر و مزاج عقلى اعتباريله - يكديكرينه ضد ايكي مفكره ده بولمق بك كوچدر .

بو خطانك صورت وقوعنی بوتون تفصیلاتیله آكلاته یله جك قدر زمان
 ومكان اولسه یدی متفکرین شرقی ، سزلرده بنم کیی معذور کوروردیکیز . یالکیز
 اشرارته اکتفا ایده جکم . باقیکیز بو یا ککشلق - بنم تحقیقه کوره - نره دن
 ککشد: بر (شینک صورتك عقلده حاصل اولماسی) ، تماماً اشباح نظریه سنك
 دستور افاده سیدر . فقط (عقل ، جزئیات اموری ، هویات ومشخصات وافراد
 خارجییه یی ادراك ایده مز . آنجق کلیاتی تعقل ایدر . جزئیاتی ادراك ایدن
 حواسدر .) دیه بر اعتقاد وار . او حالده [بر شینك صورتی عقلده حاصل
 اولوبورسه ، او صورت یالکیز او شینك دکل ، امثال متعدده سنك صورتی در .
 او تقدیرجه بر (صورت جنسیه) ویاخود بر (صورت نوعیه) اولماسی لازم
 کلیر .] دیه دوشونولمش . بناء علیه بر شینك صورتی یرینه (ماهیتی) دهنلره
 تعریف سابق اساساً تعدیل ایدلمشدر .

ذاتاً (ماهیات) اینجه دن اینجه مناقشه اولوندوغی صیره لرده اونلرك بسیط
 و مرکب اولوب اولمادینی ، صورت اشیا به مطابق اولوب اولمادینی ؛ ذات اوزرینه
 زائد (یعنی اشیا نك کنیدیلرندن غیری بر شیلر) اولوب اولمادینی تدقیق ایدیلیرکه
 مسئله خیل دیدیکلنمش بولوندوغی ایچون (ماهیت) ، (شبح) (صورت
 ذهنیه) (وجود ذهنی) تعبیرلری یکدیگریله هرچ و مرج ایدیلرک افلاطونك
 وده موقریتك نظریاتی صفوت اصلیه لرینی ضایع ایتمشدی که بو حال او یا ککشفه بر
 زمین مساعد حاضرلامشدر .

بناء علیه برنجی تعریفی تفسیر ایچون کلیاته تخصیص ایده رک : [هو تمثل
 ماهیه المدرك فی نفس المدرك وهو : ای کون العلم ! . حصول الصورة او تمثل الماهیه
 مبنی علی الوجود للذهنی وكون العلم عندهم عبارة عنه] دیه حکم ایدلمش که : [علم ،
 ادراك اولونان شینك مدرک اولان نفس ده ماهیتله تمثل ایتمی در ؛ اوده وجود
 ذهنی به مبنی صورتك حصولی و ماهیتك تمثلی دیمکدر . حکماً عندنده علم بوندن
 عبارتدر .] دیمک اولور .

حکماً ، افکار یونانییه یی قطره قطره تلقی ایتمش واونی ده یوغوره یوغوره بر
 معجون حائه کتیرمش ایدیلر . اهل سنت دخی اونلرك ادعاسنی بو صورتله تفسیر
 ایتدکنن صوکره رد ایدیورکه بک محقدر .

اهل سنت اساساً (وجود ذهنی) یی بر حقیقت اوله رق قبول ایده میور .

(معقولات ثانیه) نك خارجده متعلق الیهی یوقدرا دیبورکه فلسفه افلاطونیة نك اساسنه معارض و تمامیلہ (اسمیه nominalisme) ادعاسنه موافق بر ادعادر .
بوداعاسنده بحق اولدوغنی اثبات ایدہ بیلیمک ایچون بوفرقة نك تعقیب ایتدیکی طریق استدلال دخی جالب دقتدر .

او دورده بسبقولوزی و فیزبولوزی نامنه معلومات صحیحہ اولمادینی جهتلہ ادراك مسئله سنی تعریف ایچون (صور اشیا) نظریه سندن واز کچمک ممکن اوله میوردی . بناء علیہ - هاملتیک تعیرنجہ - استحضاریه اعتقادینک الک قاباشکلی الک زیاده معتبر کورونوردی ؛ چونکه حقیقته موافق ظن اولونوردی . مادام که عقل نك ادراك ایتدیکی شیلر ، خارجده حقیقتاً موحد اولان کائناتک کندیس دکلدر ، چونکه طاع طاش ، بما ، دکر ذهنمه بالذات کبره مز ؛ و مادام که علممز - صحیح ایه - واقعه مطابق در ، او حالده بزم عقلاً تلقی ایتدیکمز شی آنجق اشیای خارجیه نك صورتلری در ؛ و آنجق اونلر اوله بیلیر !.. دیه دوشونمک یک طبیعی ایدی ؛ و شو دوشونجهیه باقیلیرسه صور اشیانک بر (ماهیت ناله) tertium quid) تشکیل ایدوب عالم ایله معلوم آرسنده یکانه واسطه اولدوغنه ایناعقدن باشقه چاره قالماز . بو واسطهیه ، بواضافته اشته علم دهنیلورایدی .

فی الحقیقه بو مباحثه اثناسنده بر شیک کندی موجودیت خارجیه سی ایله موجودیت ذهنیه سی ، شبیحی ، صورتی ، ماهیتی هرج و مرج ایدلمش اولویور . حالبوکه آره لرندہ فرق واردر . متکلمین بوفرقی حس ایدیور و اونی تعیین ایدرکن وجود ذهنی فرضیه سنه قارشى تعریضه کیریشیور . اولان نظر دفته چاربان جهت ، وجود خارجی ایله وجود ذهنی نك عینی شی اوله مامسی در . بز خارجده سمایی کورویورز ؛ طاغری کورویورز ؛ ناصل اولویورده بونلری تخطر ، تصور و تذکر ایدہ بیلورز ؟ . البته بو شیلر هیئت اصلیه لرلیه ذهنمه کیرمیور . اگر کیرسیدی مثلاً کونش و یا خود آتش تصور ایتدیکمز زمان ذهنمز یاناردی . قاضی و شارحی ، وجود ذهنی بحثنده بالخاصه بوجهتی ایضاح و تعبیات اصطلاحیه نك قیمتی تعیین ایدیورلر :

[شبهه یوقدرکه مثلاً آتشک بر موجودیت حقیقیه سی واردر ؛ واضانت یعنی ضیا و یرمک و احراق ایتک و دهها بوکیبی بعض احکام و آثار اوندن صدور و ظهور ایدر . اشته بو وارلغه (وجود عینی) ، (وجود خارجی) ، (وجود

اصل ده نیلیر. بونده نزاع یوقدر ؛ نزاع شو نقطه ده در : عجبا آتشك وجود حقیقیندن باشقه بر وجودی و رمیدرکه او آثار و احکام اوکا ترتب ایتمه سین ؛ « یعنی اونده ضیا و یرمك و یاقق کیبی خاصیتلر اولماسین ؟.. دیمك ایستیور » ایشته بو ایکنجی وارلقه (وجود ذهنی) ، (وجود ظلی) یاخود (وجود غیر اصل) ده نیلیور. بو تقدیره کوره (موجود) ، ذهنده (نفس ماهیت) اولمش اولویور ؛ (نفس ماهیت l'idée-même) دخی وجود خارجی ايله توصیف ایدلمش بولونویور دیمکدر. آرده ده کی اختلاف ماهیتدن (آیری) بر وارلق مسئله سنه تعلق ایدیور. اونك ایچوندركه بعض افاضل (اشیا خارجه اعیاندر. یعنی مستقلاً موجود شیلردر ؛ ذهنده (صور formes) در ؛) دیمشلردر !.. [الی آخره ..]

شو ذکر ایتدیكم ملاحظاتك بویوك بر قیمتی واردر ؛ ذهن متفكرك یاواش یاواش (افاتی objectif) و (انفس subjectif) فرقنی ناصل ادراك ایتمكه باشلادیغنی ونه کی ضرورات منطقیه ايله بومرحله تفكره واردیغنی صراحتاً عرض ایدیور. چونكه اختلافات - سیدك دیدیكی کیبی - وجود حقیقی ايله وجود ذهنی آرده سنده در. بو ایکی نوع وارلق برمی ؟.. دلكلی ؟. وجود ذهنی همه حال وجود حقیقی بی استلزام ایدرمی ؟. ایتزمی ؟. ایدرسه ، ینه ایکیسی آیری غیری شیلر اولق لازم کلیر ؛ چونكه کائنات طاقیله ذهنمه کیرمه مز. ایتزمه وجود ذهنی نك اصلی یوقدر. چونكه حقیقی وارلق ، عالم خارجی ده بالذات وبلاستقلال قائم اولان وارلق در. ایشته اهل سنت آنجق بویله بر وارلقی حقیقت اوله رق تسلیم ایدیور ؛ وجود ذهنی بی قبول ایده میور .

مسئله نك كهنه انفاذ نظر ایدوبده بحثك طرز جریانه دقتله باقارسه كز بوراده فلسفه فلاطونیه ايله (یعنی حقیقیه réalisme ايله !) فلسفه (ارسطاییسیه aristotélicienne) نك وبالخاصه (اسمیه nominalisme) اعتقادینك مجادله سنی کورررسكز. بیلیررسكزكه افلاطون ماهیاتك خارجه مستقلاً موجود اولدوغنی ادعا ایدر واونلری (حقایق اشیا) صانیردی. بو فکری اك اول ابطاله چالیشان دخی ارسطو اولمشدی . مشهور (کلیات les universaux) مناقشه سنك منشائی بودر. نته کیم اولجه ده عرض ایتمش ایدم . متفکرین اسلام بو کیفیتدن تمایله ولایقیله خبردار کورونویورلر ؛ یالکمز بر شی وار :

قرون وسطی فلسفه سنده تشوش افکار ، ذهنلری تعجیز ایده جك مرتبه یه

وارمشدی. اوسبيله هيچ بر فيلسوف اسانده يونانيه دن منحصرأ برينه تماماً اتباع ايتش دكدر. مسائل اسانيه ده كندی ملاحظه لرينه كوره صاغه صوله بر مين كوستيرلر. بوراده اهل سنتك ميلاني صراحتاً (نوميناليزم) جريانه طوغرودر. چونكه بو فرقه اربابي اولاه مايتك خارجه. وجوديني انكار ايديبورلر؛ حالبوكه حكما عكسني اثباته چاليشيور. مسئله - اعتراضات متقابله يوزندن اراد اولونان يكي يكي مثالر طولاييسيله تورلو تورلو شكلره كيريور ونهايت حكماي اسلامك مشاهيرندن اولان فخرالدين رازينك ملاحظاتي صراحتاً اثبات ايديبوركه بو وجود ذهني بحني افلاطون ايله ارسطو آره ننده تحدث ايدن (ماهيات مناقشه سي) نك دوامندن باشقه بر شي دكدر. يوقارنده كي فقره ده سويله ديكم سوزلره تماميله حق ويرير. قاضي نك موافقندن او پارچه لري - برر وثيقه اولق اوزره - بورايه مختصرأ نقل ايديبورم. اوراده اولاه ذهنه موجود اولان شيلرك (تصورات concepts) دن عبارت اولدوغنه دائر بر خيلي بحث جريان ايتدكدن صوكره : [عجيبا خارجه ده اصلي اولمليان شيلري تصور ايده بيليرمي يز : ايده مزمي يز؟ ..] سوآلي اورطه يه آتيليور وم مسئله بوشنكلي آليور. حكما : [نه وت !. تصور ايده بيلير : (l'impossible) ي (اجتماع التقيضين le néant contre عدم le principe de la contradiction) ي (تصور ايتيورمي يز ؟ !] ديور . لكن اهل سنت نامنه قاضي بوكا اعتراض ايديبور. (بوكي امور اوزرينه سلباً حكم ايديلير ؛ ايجاباً دكل ! ..) ديور. بو تعريض مهم ايله مسئله ينه بر باشقه شكله قونوله رق موضوع بحث اولويور : [ذهنده موجود اولان تصورات (امور ثبوتيه faits positifs) دن مي در؟ (امور عدميه faits négatifs) دن مي در؟] سؤاله جواب ويرمك ايچون يكي بر مناقشه آجيليور . [*]

[*] بو مناقشه بو كون دخي دوام ايتكده در . مثلاً زمانكزك فلاسفه (روحون spiritualistes) ي (نامتناهي l'Infini) نك خارجه ده وجوديني اثبات ايتك ايچون اوزون بر بحث آچيورلر ؛ بوندن مقصدلري ، طولاييسيله الهك وجوديني اثبات ايتكدر؛ چونكه اولرك تلقي ايتديكي وجهله نامتناهي ، الله در. حالبوكه حسب المذهب منكر اولان (مادبون materialistes) ، بو نامتناهي تصويرنك (مفهومات عدميه) ن اولدوغني و بناء عليه بر موجود مسئله دلالت ايدهميه چكني ادعا ايديبورلر. (نامتناهي ، تناهي انكاردر. بر شينك وارغني اثبات ايتز !) ديورلر .

اهل سنتك ملاحظاتی بودعوالرده دها قوتلی در ؛ مثالری ده چوق ای در ؛
 فرضا بوتورلو مفهوماتك امور عدمیه دن اولدوغنی اثبات. ایچون (معدوم مطلق
 le non-être absolu) تصویرینی مثال کتیریورلر که بر (مفهوم عدمی
 négative) اولدوغنده کیمسه نك شبهه سی اوله ماز . بناء علیه بز خارجده بویه قطماً
 اصلی فصلی اولمایان شیرلی انجیق - عدمی اوله رق - تصور ایده بیلورمشز ؛ بو
 تقدیرجه مفهومات عدمیه نك ذهنده موجود اوله بیلمله لر (مستحیل inconceivable)
 دهل ایمش ، دیمك اولویور ، که پکده طوغرودر .

بوکا قارشی حکمای اسلامیة نك اک بویوکلرندن اولان ایرانلی (فخرالدین
 رازی Razès) اعتراض ایدیور : [خارجده وجود اصلیمی اولمایان شیرلی تصور
 ایده میز . بالعکس هر نه تصور ایده بیلیرسه نك اونك خارجده وجودی واردر ،
 فقط بزدن غائبدر !] دیور ؛ ودقت ایدیورسککز که ینه فلسفه فلاتونیة نك
 اساسنی تشکیل ایدن (حقیقیه réalisme) عقیده سنه رجوع ایدیور . بونك بویه
 اولدوغنی مواقف مؤلف نخریری پک ایی بیلور وشو صورتله سوزینه دوام ایله
 بونزاعك منبعی ایما و کشف ایدیور :

[.. و متصور اولان اوئی (یعنی مفهوم عدمی ..) یا - افلاطونك دیدیکی
 کیبی - بنفسه قائمدر ؛ (یعنی خارجده مستقلاً موجود برماهیتدر دیمك ایستور ..)
 یاخود - حکمانك دیدیکی کیبی - بوتون مفهوماتك (عقل فعال intellect actif)
 ده مرتبم صورتلیردر . [*] زیرا عقل فعال حکما عننده - شو بزم عالمز
 ایچون - مبدأ حوادندر ؛ بناء علیه عقل فعالده صور اشیانك ارتسامی بر (شرط
 لابد condition indispensable) در ؛ اویله بر طاقم صور مرتسمه اولمالی در که ،
 نفس اونلره التفات ایتدیکی زمان اونلری هان مشاهده ایده بیلسین ! . حالبوکه
 افلاطون شوکا ذاهب اولویوردی که هر (طبیعت نوعیه) ایچون بر (شخص مجرد)
 [یعنی مجرد و منفرد بر فکر !] اولقی ضروریدر ؛ اوده باقی در ؛ ازلی وابدی در .
 ارسطو بورای غیر صحیحی ابطال ایتك ایچون استدلال ایتدی که ..] الی آخره . ا.
 کورویورسکزیا ؛ متفکرین اسلام مذاکره ایتدکلی مسئله نك نره دن کلیدیکی

[*] ارسطو انسانده ایکی نوع عقل تصور ایدردی ؛ برینه عقل فعال ، دبکرینه ده
 (عقل منفعل int. passif) بردی . برنجیمی مع لات و مجرداتی ادراک ایدردی . بو
 عقلک کالی ایله انسانك الله اصال ایده بیله جکنه حکما قانع ایدی . (قاموسه باقیکز [۱]

ونه اولدوغنی بك اعلا بیلورلر . ماهیات فلاطونیه یی - اوتهدنبری - رد ایدن اهل نت دخی، بو رأیی غیر صحیح کوروپور . وارسطونك فلسفه سنه اتباع ایتمه . مکه برابر، بومشله ده (نومینالیست) لره میال بولونوپور .

بك مختصر بر صورتده اقتطاف ایدوب اشارتاً عرض ایتدیکم بو ملاحظات ، بر آرز یوقاریده سرد ایتدیکم ادعا یه تمامیه حق ویریر، وسقولاستیق اصوله خاص اولان بر چوق شیلری ده کوستریر : اولاً موضوعات بحثک یونان استادلرندن انتقال ایتمش اولدوغنی صراحتاً کورورسکز؛ صوکره بر مسئله نك - بیک تورلو تمریضات تأثیریه - ناصل اولوبده وضعیت ابتدائیه وشکل حقیقیسنی ده کیشدیرمکه اولدوغنه بالذات شاهد اولورسکز . عینی زمانده ده - تعریض غیرتی و (مناقضه controverse) مراقیله - داللدن داله سه کن قرون وسطا (ذهنیت mentalité) نك نه اولدوغنی وموضوع بحثی ناصل ، وضع اصلی سندن وجیغیرندن چیقاروب چاتالاندیردیغنی اكلارسکز . نهایت کورورسکز که اوزمانلر پسیقولوژی علمنك ابتدائی بر درکده بولونماسندن طولایی - بو (صور مرتسمه) فرضیه سندن فراغت ایتك قطعاً ممکن اوله میورمش؛ و، دونه طولاشه هان بوتون فیلسوفلر، ینه اوکا رجوع ایدیورلرمش : [مادام که اشیا ی خارجییه علممز، اواشیایی - طاقیله - ذهنمزه المی دکلدر ، او حالده اونلرک صورتلری عقل فعاله یاخود لوحه خیالمره (هرزیه اولورسه اولسون! . ذهنمزه بریره!) . ترسم ایتك لازم کلیور؛ تا که نفسمز اورایه باقسن ده خیالات وصوراشیایی اوراده مرتسم اوله رق کوروب ماهیتلرندن خبردار اولسون وهم بوسایه ده ، همد بوضورتله (علم) تحقق ایده . بیلسین !] دیه دوشونولوبورمش .

کورمك ایسته دیکی اشیانك رسملری کثیرتوبده کندی اوطه سنده اوطورورکن سیر ایدن برکیمسه نك حالی - بوفرضیه - بك زیاده آکدیریور؛ فقط کیفیت ادراکی هیچ تعریف ایده میور. نه کیم بوجهت مهمه یی اوچ بش صحیفه اول سزه لایقیله آکلامشدم .

ارتق بحث بو وادیده جریان ایدیور. حتی اهل سنت اعتقادی کال حیثیته تمثیل ومدافعه ایدن (قاضی عضد) بیله - ماهیات فلاطونیه یی وبناء علیه وجود ذهنی نك حقیقتی قطعاً رد ایتدیکی حالده - (صور مرتسمه) فرضیه سنه دشمن کورونمهور . بالکنز [غایت واسع ومنتوع معلومات فلسفیه یه وبویوک بر (دهای

جدلی (génie éristique) به مالک اولان بوتوجه متفکر [، برهم نقطهیه حصر دقت ایدیور : ذهنمزد و یا خود عقل فعالده مرتسم بولوندوغی ادعا اولونان (صور اشیا) نك (هویات ipsitès) قیلندن اولمادیغنی اثباته غیرت ایدیور . (هویت) خارجده مشخص اوله رق منفرداً و مستقلاً موجود بولونان شیلره دیرلرکه امل سنت انجیق اولنلرک حقیقته اینانیر .

بونك ایچون (قاضی) دییورکه : [اصلی بزدن غائب و کیزی اولوبده شکلی عقل فعالده مرتسم اولان (امور les faits) ، اکر (هویات) قیلندن ایسه « یعنی خارجده فرداً موجود اولان (مشخصات choses concrètes) دن ایسه (منته) كده هویتاً تحققی لازمکیر؛ چونکه اونیده تصور ایده بیلیورز. حالبوکه بودعوا، بطلانی ظاهر بر (سفسطه sophisme) در. اویله اولمایوبده، بزم- وجود ذهنی دن مراد ایندیگمز - (ماهیات کلیه idées générales) ایسه ، صرف معقولاندندر؛ معقولاتک برنوع اوزره تمیزی در. اکر [وجود ذهنیه دلالت ایدن امور ، (مفهومات میاننده کلی اولانلر celles qui sont universelles parmi les notions) در؛ و بناء علیه بونلر مفهومات ثبوتیه دندر؛ یعنی اویله شیلر واردر!]. دهنلیسه ، کلیت صفتی ایه توصیف اولونان اومفهومات کلیه نك ، عالم خارجده بر موصوفی وجود اولمالی در. (یعنی صفت مذکورده موضوع اوله جق حقیقی بر شی بولونمالیدر !... دیمك ایستیور...) حالبوکه خارجده اویله برشی یوقدر؛ زیرا خارجده موجود اولان هرشی (مشخص concert) در. [دیور. یعنی (مجرد abstrait) و (کلی général) اوله ماز. معقولات ایسه مشخص اوله ماز؛ دیمك ایستیور .

افندیلر :. بو حده وارنجه (universeaux) مجادلہ سنك تام مرکزنده یز. بو مهم دعوا دخی ، سقولا ستیق فلسفه سنك اك جدی واك خطیر مذهب منازعه یی ایدی. عقائد دینییه نك نفوذی بومسئله نك اهمیتنی زیاده سیله آتیریور ایدی .

بوراده آلهیات بحثه کیریشمك وظیفه من دکل واولسه بیله - مع التأسف - بو ابتدائی درس کتابنك تفصیلاته تحملی یوق !... یالکنز مسئلہ نك آلهیاته تعلقی اعتباریله کسب ابتدیی اهمیت فوق العاده حقنده سزه بر فکر ویره بیلمك ایچون شو قدر ده بهیم که :

بو کلیات مسئله سیله (حق تعالی) یه دائر ، ادیانك تعلیم ایتدیکی افکار وعقائد آره سنده بر مناسبت صمیمیه وار. اکر حقیقتاً کلیاتك اصلی یوقده ، اونلرك آنجق ذهنمزمده موجود مفهومات مجرددن عبارت اولدینی محقق ایسه ، الله حقنمده کی فکر و اعتقادمنك قیمت و حقیقتی نه اولمق لازمکلیر ؟. دیه دوشونمك طبیعی در. اللهی ذهنمزمده موجود بر (فکر) دن عبارت عد ایتك متشرعین نظرند (کفر impiété) دن فرقلی برشی دکلدر. اویله دوشونمده یوقده مفهوماتی خارجه بر (وجود مشخص être concret) ومنفرد عطف ایدرسهك ، ینه اولماز ؛ چونكه جناب حقّی موجودات ماده کیبی خارجه (تشخیص personifier) ایتك ، صفات سلیبه یی انکارایدرك (مشبهه = anthropomorphisme) اعتقادینه دوشمکدر که ضالانده کفردن بك فرقلی دکلدر . صیقینی یی کورو بورسکیز ! هر حاله دینك قطعاً تبلیغ وتعلیم ایتدیکی عقائد منصوصه ایله ، تدقیقات علمیه نك تولید ویا کشف ایتدیکی مسائل فلسفیه یی توزین وتالیف ایتك لازم کلیور .

بویحك دها بدایتنده سزه سویله مشدم که سقولاستیق فلسفه نك (وجودینه سبب raison d'être) ایشه بوضرورت اولمشدی .

شیمدی -ظن ایدرم!- بوفلسفه نك بر ضرورت مهمه الجاسیله ، یعنی کیبی دکل ، بك طبیعی بر صورتده طوغمنش وتأسس ایتش بولوندوغنه تمامیه قناعت ایدجکسکیز ولایقوله اکلایه جقسکیز که : [سقولاستیق ، وجدان بشریخی تحت تحکمه آلوب ازمك ایسته بن رهبانیتك ، کندی ایجادی در.] دینلر یمان ویالان سویله مشلدر. تاریخ مدنیتك معناسنی آکلایه مایان سطحی نظرلر در. (سقولاستیق سیستمی) باطل اولمقله برابر ، - باطل اولان دها نیجه نیجه وقایع کیبی - عالم مغنویتده برحادثه عمومیه وطبیعیه در؛ وقوعی برچوق اسبابه باغلی در که بن اونلردن اك مهمنی سزه کوستردم. خرسیتیانلغه مخصوص دکلدر. قرون وسطایه مخصوصدر. بزده دخی عیناً واردر. بویله هر یرده عینی زمانده ، عینی اسباب طولایسیله ، عینی صورتده واقع اولان تجلیات مغنویه ، امور کیفیه دن اوله ماز ؛ امور طبیعیه دندر . رهبانلق ایله دخی علاقه سی - طوغرودن طوغرویه دکل - آنجق بالوسیله وبالواسطه در . نته کیم بزده - حداولسون!- رهبانیت اولمادینی حاله مکمل بر سقولاستیق فلسفه می واردر که یالکیز اصول اعتباریله دکل ، تفرعات م. سائله

وارنجیه قدر ، دیکرینک عینی در . یو ایسه یکدیگرلرینی علی الانفراد طانیالری امکان خارچنده بولونان ایکی جماعت عظیمه افرادینک بالاتفاق بویه بر جریان فکری وجوده کتیردکلیسه حمل اولونه ماز . یعنی سبیلرک عینی نتیجه لر حصوله کتیرمش اولدوغنه اسناد ایدیله بیلیرکه یو ، بر (قانون) در .

بو قیصه ملاحظاتی عرض ایتدکدن سوکره اسلام متفکرینی حقنده دها بر ایکی شی سوبله یوب دور حاضره کلک ایسترم . بزه تعلقی اعتباره بوبخی براز تفصیل ایتدم . اعظم متفکرینک بومسئله ده ناصل دوشونمش اولدرقلرینی بیلیمه لی . سکنز ؛ مع الناسف بو کونه قدر ، هیچ کیمسه بومباحثه یاناشمامش و عثمانلیجه بر شی یازلاماشدر .

قرون وسطی فیلسوفلری ، بوتون مسائل فلسفیه یی ارسطونک (مقولات عشره les dix catégories) قادروسنه درج ایتک صورتیله ضبط وربطه آلهرق - بر درجه یه قدر - تشتت دن قورتارمغه چالیشیورلردی . (ادراک مسئله) ، (کیفیات) مقوله سنده داخل بولونویور و (کیفیات نفسانیه) نامیله بر فصل مخصوصده تتبع اولونویوردی . [*]

کوردیکرکه - دونه طولاشه - (صور مرتسمه) فرضیه سنه پیوسته اولدق . مع مافیله ارسطونک بو نظریه سنی ، ده موقریتک (اشباح idoles) فرضیه سیله بر طوتماییکرز . اشباح ، اشیای خارجه دن صدور ایدوب ذهنمزه - اینجه بر توز کبی - توضع ایده رک اشیای مذکورهنک عیناً قالبی برافان غایت نازک فقطینه مادی آتوملردی . اونک ایچون بو طرز ادراکی (غالوانوپلاستی) یه بکیزه تمشدم . صور مرتسمه اوپله دکدر ؛ یالکیز شکدر . شکلاً حسک تعینی وادراکک بو سایه ده بالفعل تحقیقی در . بونلری ارسطو بختنده ایضاح ایتشدم .

[*] شرح ، واقفده علی العموم کیفیات بحثی یوز صحیفه اشغال ایدیور و بو فصلده ضیا الوان ، ملاست ، خشونت ، صوت ، حروف ، حرک ، سرع ، ادراک ، حواس خمس ، قوه نامیه قوه هاضمه ودها بر چوق مسئله لر داخل بولونویور . ملموسات ، مبصرات ، مسمرات ، مشومات ، ولی آخره ! . کبی تقسیماته تابعدر . علم ، جبل مسئله لرله ادراک بحثی ده کیفیات نفسانیه دن اولقی حیثیتیه بوراده در . حالوکه بوکون بو مسائلک بر قسمی فیزیقی و میخانیک علملرینک دیکر قسملری ده فیزبولوژی و پسیکولوژی علملرینک موضوعات خاصه سنی تشکیل ایدر .

شیمدی مسئله بو شکلده مناقشه اولونویور وارسطو فلسفه سینه اتباع ایتمکله اهل سنت دن آریلان حکمای اسلام، بو خصوصده صلاحیتله بیان رأی ایدیور. بزده حکمانک صحیحاً اک بو یوکی اولان (ابن سینا Avicenna) نك سوزلریله اکثریا استشهاد اولونویور. بو بحثی تفصیل ایدمک دکم. یالکیزی نه بر نقطه مهمه به اشارت ایچون (تفتازانی) نك (شرح مقصد) نام کتابندن بعض فقره لر نقل ایدمک. چونکه، مشهور تیمورلنکک (قاضی) سی اولان بو حکیم متشرع بحثی اختصاراً عرض ایتشدر. زمانمزک (نویسنه مولوژی) تدقیقاتنده اک مهم مسائلدن بری تمثیل ایدن (بالواسطه و بلاواسطه علم *con. médiate et immédiate*) دعواسنک مهد نشاتی، سزمه عیناً کوسترمک ایچون، بعضی سوزلر آلوب استشهاد ایدیورم؛ مومی الیه دیورکه :

[کیفیات نفسانیه دن اولان ادراک مسئله سی حقنده اولجه بر نبذه سوز کچمشدی. فلاسفه تحقیقنک بو خصوصده مستقر اولان رأیبری شودرکه: حقیقته برشیک ادراک اولونما سی اوشیک عقل غندنده حضوری در؛ کرک بنفسه اولسون کرکه ابتداء عقده مرتسم اولان (صورت متزعه *forme abstraite*) سیله اولسون، و یا خود (صورت حاصله سیله اولسون .. ایشته (درك *perception*) بودر؛ و یا خود، او، صورت ادراکک تحقیقنه واسطه اولان (آلت *organe*) در. نته کیم (ابن سینا) نك (اشارات) نام اثرنده سویله دیکي بودر: برشینی ادراک ایتمک، او شیک حقیقتی - مدرك اولان ذات غندنده - (تمثل *représenté*) اولمق دیمکدرکه ادراک اولونان شی انجق اوسایده مشاهده اولونه بیلیر. بوراده (حقیقتک تمثلی *la représentation de la réalité*) تعبیرندن مراد، یا بنفسها، و یا خود مثالی ایله حقیقت مذکور نك عقده حاضر اولما سی در. ایسترا (مثال *image, représentation*) بر (امر خارجی دن متزعه *tirée par abstraction d'un fait extrinsèque*) اولسون، ایسترسه (ابتداء متحصل *un produit de première intention*) اولسون. ایستر ذات مدرك (le sujet percevant) ده منطبع اولسون، ایسترسه اونک آلت حسیه سنده منطبع اولسون؛ مشاهده دن مراد، اومثالك مطلقا عقده حاضر اولما سیدر.]

الی آخره!.. بوقدری یت.

دقت ایدیورسکزرکه بوراده بر چوق اینجه مسئله لر کورولمش، فقط بلا اهمیت اجمال ایدلمشدر. بوکون بز (مثال و خیال) دن بحث ایدرکن، ایستر

شویله اولسون ، ایستر بویله اولسون ! ده بوب کچمه یز . خاطر کزده درکه ، خیالات اشیانک ذهنزده ابتداء حاصل اولماسی باشقه ، خارجدن عیناً و یا شکللاً انتقالی بوسبوتون باشقه بردهواردر ؛ واکا کوره مذاهب خصوصیه تعین ایدر وایتمشدرده ... بو جهتلری آکلاتمش اولدوغم ایچون کچورم . یالکیز بوراده بر مهم نقطه اوزرینه ینه نظر دقتکزی دعوت ایتک املندهیم :

ابن سینانک فکرنجه ادراک . صور اشیانک طوغرودن طوغروه عقلمه ارتسامی ایله تحقق ایده بیلدیکی کیبی آلت حسیه واسطه سیله دخی ممکن اوله بیلور . فقط مادام که ادراک کیفیتده (مشاهده) بر شرط اساسی اوله رق ایلری سوروله کلشدر . البته او (صور مرتسمه) یی - یابانجی برشی کیبی - مشاهده ایدوب ماهیته مطلع اوله بیلجک بر (روح مدرک) اولماسی لزومی دوشونمک ضروریدر . بو نظریه وهر هانکی بر (ماهیت ثالثه tertium quid) فرضیه سینه مستند اولان بالجمله نظریات معرفت ، روح نامنه مستقل بر (جوهر مدرک) ک وجودینی قطعاً استلزام ایدر . بوندن قورتولمق ایچون آرده کی واسطه بی قالدیرمق چاره سنی ارامالی در . اوده : کیفیت ادراکی ، روحک بالذات تغیراته عطف ایتمکه اوله بیلرکه بو صورته صور علمیه من ، اشیانک کندی رسملری دکل ، بزم طوبوشمزک و دوشونوشمزک (تطورات modalités) ی یعنی (طرز) لری اولمش اولور . بویله اولونجه دخی ادراک مسئله سنی بوسبتون (انفسی subjectif) بر نقطه نظردن تلقی ایتمش اولورزکه عظیم بر خطوه ترقی در . ارسطونک بو خصوصده نه بیوک بر خدمتی سبق ایتدیکنی کوسترمک ایچون سزه استادک بوباده کی فکرلرینی ایضاح ایتشدم .

بو تورلو دوشونوش - ینه سوژه قتیویزم دائرة سنده - علمک بلا واسطه حاصل اولوب اولمادیغنی حل ایده من . هر نوع معلوماتمز ، وارسین انفسی اولسون ! . روح او معلوماتی ایستر حواس واسطه سیله تحصیل ایتسین ، ایسترسه (معقولات صرفه notions purement intellectuelles) دن تلقی ایتسین . بومنازعه (حسیون sensualistes) ایله (عقلیون rationalistes) آره سنده محصور بر خصوصی دعوادر . کیفیت ادراک مسئله سیله دکل ، (منشأ علم l'origine de la connaissance) مسئله سیله آننجق علاقه داردر .

لیکن روح ناصل ادراک ایدیور؟ . هله کنديسنى ناصل بیایور؟ . ديه بر سوال خاطره کلزمی؟ حتی کنديسنى بالواسطه می، یوقسه بلاواسطه می بیلیور؟ . ديه دوش-ونولزمی؟ ... البته بونلر هپ متفكرينك خاطرينه کلیر . چونكه اولاً بحتك جریان طبیعی ایله طوغار؛ ثانیاً بك اهمییل دوشونجهلردر؛ همه حال سلسله تفكراتمه بارز بر (استقطاب polarisation) ومعین بر استقامت ویریر . ایشه بوتون بو فكلرلر فلاسفه اسلامك ذهنده - بالضروره - طوغمش یوقاریکی سؤالر شكلنده قارشیلرینه دیکلیمشدر .

شایان حیرت و تبریکدرکه ، اوزمانلر (بسیقولوجی) نامنه بر علم یوق کیی لیکن متفكرین اسلام، یالکیز ذکا ومنطق قوتیه ومنحصراً (کلام dialectique) اصولی ایله بك ایجه یوللر آچمشلر وبوکون بزى جداً مش غول ایدن (مبحث معرفت) مسئله لرینی کشف ایتشلردی. حتی ویردکاری حکملره باقیلیرسه بوکون حالا بعضی فیلسوفلر ویا فرقه لر غندنده معتبر طوتولان اعتقاداندندر. مختصراً بر ایکی مثال ویرهیم!

شرح مواقف ادراک مسئله سی تذکر اولونور ایکن ، نفس انسانیه نك (محل لذت والـ le lieu du plaisir et de la peine) اولوب اولمادیغنه دائر بر چوق متفكرينك ملاحظات متعارضه ومتناقضه سی - خلاصه قید وتنفید ایدیلیور . متکلمین متفقاً ادعا ایدیورلرکه : انسان لذت والی بالذات ادراک ایدر؛ و (علوم ضروریه conn. intuitive) نك برنجی سی [انسانك كندی نفسی بیلمه سی] والنه، لذته ، آچلغنه ، صوسزلغنه - طوغرودن طوغرویه - مطلع اوله بیلمه سی در . حکما ادعا ایدیورکه : بوتون بو احوال وکیفیات ادراک ایدن (ذات انسان l'homme même) دکل ، انجق (قواسی ses facultés) در . ذات انسان ، یعنی انسان حقیقی ، انجق (نفس ناطقه l'âme rationnelle) در . ملکات وقوای طبیعی سی (آلات organes) ی در وکندینه تابعدر ...! الی آخره ...!

عیناً نقل ایتدیکم شوبرقاج سطرالق سوز اثبات ایدرکه بوکونکی فیلسوفلری اشغال ایدن اك مهم مسائل معرفتدن برینی متفكرین اسلام ، طبق بزم کیی تلقی ایدیورلر ایش و بودعواده (بلاواسطه علم conn. immédiate) طرفدارى اولان متکلمین عیناً بوکونکی (تحسینون intuitionnistes) کیی حکم ایدیورلر ایش . حکما دخی (طوغرودن طوغرویه علم) امکائی انکار ایدرک ملکات واسطه سیله

ادراک و قوعنی قبول ایتدکارندن طولانی ، (بالواسطه علم conn. médiate) نظریه-نه طرفدار اولان بوکونکی (استحضاریون representationnistes) کیی دوشونوبورلر .

حتی تفصیلات مسأله-دخی بومهم مناقشه-ک ایکی معارض فرقه-نی کورویورز . و بویوک اسلام فیلسوفلرینک جبلی اولان فطانت خارق العاده-سه حیران اولویورز . اکر بو آدملرک اصولی فنا و یا کلش اولماسه-یدی ، کیم بیلیر او جوال دهالری ، اونا فذ نظرلری ایله نه لر کشف ایده-بیله جکلر و ترقیات . فکریه-یه دهانه قدر خدمته موفق اوله جقلر ایدی ! هر حالده مجددین متأخریندن (بهی قن) و (ده قارت) کیی بویوک آدملرک اثر لرنده-دخی موضوع بحث اولان غامض ومهم مسائل فلسفیه بونلردر . فقط بودور ابتناء فیلسوفلرینک بر بویوک موفقیتی وارکه اوده (اصول methode) ده اجرا ایتدکلری تعدیلات اساسیه-در . ایشه اوسایه-ده درکه -هن بشر ، بشقه تورلو دوشونه بیلیمک ایچون یکی بر یول بولمش وایولدن انکین افقلره ، واسع میدانلره چیه-بیلیمشدر . یوقسه - بو کونکی کوزله باقارسق - (بهی قن) ک هله (ده قارت) ک آثارنده اوقدر غریب خطالر ، اوبله سقولاستیق دوشونجهلر بوله بیلیرزکه بو مجدد داهیملری قرون وسطی متفکرینندن آیری طوتماق لازمکیر . فقط اصوللری بوسبوتون یکی در . طوغر واولان کشفلری ده اصوللری در ، فلان وفلان مسئله حقه-ده بیان ایتدکلری ملاحظات مخصوصه دکلدر . ایشه اونلری دور ابتناء فاتحی وفلسفه مجددی عد ایتدیکمزه سبب بودر .

ابن سینا ، فخرالدین رازی ، نصیرطوسی ، ابن رشد کیی حقیقتاً مستثنا بر دهای فلسفی ایله تمایز ایتمش وزمانلرنده مدون اولان علوم مختلفه-یی قفاسنه صیفیرمش آدملرمنز ، قابلیت ذاتیه وعلمیه اعتباریه اوروپا فلاسفه مشهوره-سندن هیچ آشاغی دکلدرلر .

دوشونمکدن و - مع التأسف منطق قوانین رسمیه-سه اتباع مجبورچی آلتنده دوشونمکدن! - باشقه واسطه تحقیقلری یوق ایکن ، یالکز قدرت ذکا ایله بر جوق مسائل خصوصیه-یی تدقیق ایتشلر ، و او موضوعاتی شو یروب چه ویریرکن بوکونکی (نه یسته مولوزی) مسألنی کشف ایده-بیلیمشدر . مثلاً : (ضیا) و (الوان) ک بالذات موجود برشی اولوب اولمادیغنی ، بو کیفیاتک بالواسطه می یا خود بلاواسطه می ادراک ایده-بیلدیکنی فخرالدین رازی (مباحث المشرقیه) نام اثر معروفند . ابن

سینا - مشهور (شفا) سنك طبيعيات قسمنده - اوزون اوزادی به مذا کره ایتش ؛
 كذلك (طعموم les saveurs) حقنده عینی شهرلر سائقه سیله عینی بحث تازه له نتیجه
 بوتون بو حادثاتك انفسی اولدوغی حس اولونمشدر . امام رازی : [هللی
 کیفیات حقیقه ، اوتخیلیه ؛] دیه بر سوال وضع ایدیور ؟ ... یعنی ضیاء الوان
 وطعموم ودها بوکی مدرکات ومحسوسات - که بز اولنری خارجه کی اجسامه عیناً
 عطف ایده رک حقیقی بر شلر ظن ایدیورز - عجبا صحیحاً (حقیقی réelles) بر
 طاقم (کیفیات qualités) می در ؟ . یوقسه (تخیلی imaginaires یعنی representa
 tives) اوصاف می در ؟ . دیه سورویور .

بوندن اولکی بابلرده ویردیکم ایضاحاته بناءً بك قولای آکلار سکیز که بوراده
 حکمای اسلام (کیفیات ثانیه propriétés secondaires) نك (انفسی الماهیه
 de nature subjective) اولوب اولمادیغی تدقیق ومناقشه ایدیورلر . ینه بك ای
 بیلر سکیز که بو کون حالا (جون ستونث میل J. S. Mill) ایله (سر ویلیام
 Sir W. Hamilton) باشده اولق اوزره ایکی فرقه فلاسفه عینی مسئله یی حل
 وفصل ایتک اوزره عینی مناقشه ده دوام ایدیورلر . یالکز یکانه برفرق واردر که
 مناقشه یی اداره ایدن اصول ، قرون وسطانك منطق دکل ، بو یخنده معتبر وبلکده
 یکانه (حکم arbitre) اولان پسقو لوزی علمنك اصول منطقیه می در . [*]

بو کتابدن مقصدم ، سزه نه پیسته مولوژی حقنده بك مختصر فقط طوغرو
 برفکر ویرمکدر ؛ وهله اونك موضوعاتی تشکیل ایدن مسائلک نره دن ، ناصل
 ونه . ببله طوغمش اولدوغی کوسترمکدر .

افندیلر ! کورویور سکیز که بومسئله لر زمانمزه طوغماشدر . آکلیور سکیز که
 اسلام فیلسوفلری اونلرله جدأ اوغراشمش واونلری حل ایده مه مش ایسه ده
 یوغوره یوغوره بوکون موضوع بحث اولدقلری وکوروندکلری شکه صوقش
 براقشدر . اسلاملرک فلسفیاته نه بویوک بر خدمتلی سبق ایتش اولدوغنه دائر بو بر

[*] عثمانلی دولتنك ظهورندن غیلی اول عالم اسلامیه شان وشرف ویرمش اولان
 بوداهیلرک ، دها اوزمانلر یالکز کندی قدرت ذکالریله بومسئله تفکره صعود ایده یلمش
 اولملری شایان حیرتدر . بو آدملر ، شو مسئله لر واسطه سیله عادتاً بزمله تماسه درلر ، بزه
 فکراً متصلدرلر . حالبوکه نیجه زماندنبری ممکنه زجه جریان افکار طورمش وقوروش
 اولدوغی ایچون بوکون ببله شو مسئله لری بزده دوشونه بیان اندردر .

وثیقه مهمه و معتبره تشکیل ایدر. فقط امثالی چوقدر، درسمنك تخملى اولمادینی
ایچون سائرلرینی ترك واهمال ایتدم .

شیمدی دورانتباه فیلسوفلرینه کجه بیلیرز؛ وکوره جکسک زکه بودور جدیدده
عینی نئییسته مولوژی مسائلنی اسلام متفکرلرینك براقیدینی شکلده بوله جغز .

بوتون اصول مدینتی و حیات فکریه ایله برابر طرز معامله و قواعد مدینتی
ده کیشدیرن بو یکی دورك اك بویوك (عامللر agents . facteurs) ندن (بهی قن
Bacon) ایله (ده قارت Descartes) ك بخدمزه مناسبتی وارددر . چونكه بونلر او
زمانك وحتى هر زمانك الكعالی - نظر فیلسوفلرندندر . بویاکی آدمك شخصیتلرینه
وبعضی (ملاحظات اصولیه considérations systématiques) سنه دائر ، سزله
اولجه دخی - مختصر مفید - بر ایکی سوز سویله مشدم .

بوراده (بهی قن) ی براقوب (ده قارت) دن براز بحث ایدم جكم . واقعا
انکلیز فیلسوفی ده قارتدن اوتوز سنه قدر اول طوغمش و اصول بخدمده
طوغرو ده شونرك تجربه دورینی فتح ایتمش ایسه ده بالخاصه مبحث معرفله علاقدار
بخدملر آچان ده قارت در . (بهی قن) ی یری کلنجه - یعنی اصول بخدمده - آیرجه
تدقیق ایدم رز .

ده قارت فطرتاً (ریاضی mathématicien) طوغمش بر فیلسوفدی؛ طور تفکرند
بو مزاجك میلان طبیعیسی واضحاً کورولوبور . نقطه حرکتی عقلدر . سویله
دوشونوبوردی : [معلوماتك موضوعی هر نه اولورسه اولسون ، عقلمز بو
خصوصده اك مهم رولی اوینوبور ، یعنی اك بویوك باشلیجه ایثی کوروبور .
بناء علیه بر نظریه معرفت ترتیب ایتزدن اول عقلی ایجه تدقیق و امتحانه قویولمالی در .
عقل هر خصوصده و هر شیده عینی صورتله حرکت و استدلال ایدیور . دیمك كه
كشف حقیقت ایچون انجق بر طاریق یعنی بر (اصول méthode) اوله بیلیر . و مادام كه
هر علمده عقلك خدمتی برنجی درجه ده در ، او حالده بوتون علوم ، عقل علمك
مشمولاتی اولمش اولور .] بودوشونوش تماماً (بستیقولوژیق) در .

[اویكانه صاغلام اصولی بولمق ایچون اك بسیط ، اك واضح و بالذات بدیی
بر مبدأ آرامالی ، و بالاخره اونك دلالتی ایله ده قاریشیق ، ده (معضل
complexe) و ده مظلّم ، حادثاتی تنویر و تفسیره یول بولمالی در . بویکی مبادی بی،
بز (تحسسات intuitions) مزده بوله بیلیرز . زیرا انجق اونلر - دهمین تعداد

ایتدیکمز- اوصافی حائر اولان معلوماتزدندر. مثلا بر مثلثک اوج خط ایله محدود بر شکل معین اولدوغنی بر آند- بالتجدس- اکلار وتسليم ایده رز. بو، اوقدر واضح بر حقیقتدر. کذلک بر نیک عینی زمانده هم وار، همد یوق اوله مایه جغنی دفعه اکلار وتصدیق ایده رز. بونک ایچون ذهن یورمق لازم دکل، بر لحه نظر کافی! بر فکر دن دیکرینه ذهنک انتقالی دخی بویله در. بلاواسطه و آنی اولور: [*] بو (تجدسات آیه) ایله مبادی* اولایی تصور ایده رز. حتی اوکی مبادی بی ناطق بمضی قضایای بسیطه واردرکه اولنری ادراک ایدر ایتمز محض حقیقت اولدقلرینه اینانماق ممکن دکلدر. مثلا [عینی شی عینی زمانده ایکی چیز اشغال ایده مز]؛ [یوقدن هیچ بر شی اوله ماز]؛ [معلولده یعنی (مسبب effet) ده علت دن، یعنی سیدن فضله بر شی بولونه ماز]؛ [جزؤ کلدن اصغر در]؛ والی آخره کیی قضیه لر بویله در.

بو دها زیاده ریاضی بر دوشونوشدر. مبادی علمیه مسئله سنی بو صورتله تأمل ایتدکن سوکره ده قارت، اعتقادی اوج کله ایله بیان ایدوب بر دستور شکله قویوبور: [simplici mentis intuitu] دیورکه [حدسیات عقلیه بسیطه] مناسبه کلیر، و بو فیلسوفک فکر نجه حقیقت بدیهیه نک اوصافی بوندر در. ایچو دقت ایدیورسه کز اکلار سکز که بوزایه قدر ده قارت (عقلیه rationalisme) وادیسند یورومش و انحق بر ریاضی کیی دوشونمشدر. معافیه بر نقطه مهمیه دخی دقت ایده یلمشدر که اصل عقده صحیحاً اوراده در اوده شودر: بوتون حدسیات (احوال خصوصیه cas particuliers) یه تعلق ایده ییلیر!... حالبوکه (مبادی* معقوله les principes rationnels) عمومی و واجب اولقله ممتازدر. مسئله نک حلنی تصعب ایدن عقده مشکله بی کورو یور سکز دکل؟... اولاحقیقت، بسیط بر (حدس عقلی) اولمالی وبالذات بدیهی کورونملی در. دیوردی. حالبوکه بوتون معلوماتنک و علی الخصوص (منسجم coordonné و تشکیلاته مظهر اولمنش organisé) اولانلرینک- یعنی (علوم sciences) ک اساسلرینی، تمل طاشلرینی تشکیل ایده جک اولان مبادی* بدیهیه نک- (کلیات [*]) اسکی زماندن بری اسلام فیلسوفلرنجه معلوم ومستعمل اولان (حدس) تعبیر اصطلاحی سنک ذاتاً معنایی (بلاواسطه انتقال transition immédiate) در. بوانتقال سریمک (غیر مشعور inconscient) بر (قیاس خفی inférence secrète) اولوب اولمادیی زمانمزی اشغال ایدن بر مسئله غامضه در.

واجبه) دن اولماسی برنجی شرطدر. مادام که بونلر - ده قارتک ظننجه - ماهیتاً حدسیات قبلندن در. ناصل کلی و واجب حقیقتلر اوله بیایرلر؟.. تجددس ایله انجق حقایق جزئیله ادراک اولونه بیلیر!.. ایشه بو ریاضی فیلسوفک ذهنی راحتسز ایدن کوچلک بوراده ایدی. طبیعیات علماسندن اولسه ایدی، بویه بر کوچلک احداث ایتزدی؛ چونکه بویه دوشونمزدی. مع مافیه ددقارت بومشکلای در حال بر طرف ایدیور: [بر خصوصی حال، بر جزئی حادثه، حقایق کلیه دن برنجی متضمن بر مثال اوله بیلیر!..] دییور. اوکی جزئیاته بر شکل دستوری ویردک برر (قضیه کلیه proposition universelle) صورتنده عرض ایتک کوچ دکلدرد. فقط حقایق جزئیله و منفردده دن مبادی کلیه ناصل استخراج ایدیه بیلیر...؟ (استقرا) بختنده اک بویوک مسئله بودر. حقایق استقرائییه علوم صحیحه نك مبادیسی اولمق اوزره قبول ایدمه، این فیلسوفلر، بونک امکاننه قائل اوله مادقلری ایچون او دعوائی رد ایتملردر که بونلر میاننده ارسطودن سوکره اک مشهورلری ینه ده قارت ایله قانتدر. ده قارت شیمدیلک بونی حل ایچون اوغراشمیور. بالکسز مبادی علمیه نك بسیط و بدیهی حقیقتلردن اولماسی لزومنده اصرار ایتمکه برابر، اونلری کشف خصوصنده بویوک بر بصیرت - قبول خصوصنده فوق العاده بر احتیاط توصیه ایدیور. بو داهی متفکرک (شک اصولی doute methodique) ایله تحقیقاته کیریشمه سنه سبب بودر. شک اصولی یی ده سزه بوندن اول لایقيله ایضاح ایتش و تنقیدات فلسفیه ده نه مهم نتیجه لر ویردیکنی کو سترمشدم.

بورایه قدر ده قارتک فلسفه سیله (فلسفه تدریبه phil. empirique) نك هیچ برمناسبتی یوقدر. حتی (اصول تعلیلی méthode déductive) یی تصویب و تحکیم ایدر بر فلسفه در. چونکه ده قارت [واضح و بسیط برر قضیه عقلیه صورتنده معروض اولان او مبادی اولانی تعیین ایتدکن سوکره، اونلردن (قیاسی ر استدلال ایله par déduction) بر جوق نتایج استخراج ایدیه بیله جکنی] سولویور. ذهنک او مبادی دن بر طاقم نتایج واصل اولمق صورتيله حرکتی دخی بر (حد terme) دن دیگر برینه لایق قطع (انتقال حدسی transition intuitive) سی سایه سزه اوله بیلدیور؛ و مبادی ایله نتایج آره سنده جایگیر اولان روابط خفیه بو سایه ده انکشاف ایدیه بیلدیکی ایچون - بر حقیقت کلیه یی متضمن بولونان - بر قضیه جزئیله نك حکمی. بو صورتله بر جوق احواله تشمیل ایدیه لرک اونک ماهیت

کلیه‌ی افشا ایدلش اولویور . بواسطه‌ی دلالاته دوام ایدرکن ذهنمزم برمانعه عقلیه مصادف اولوبده طور ویریرسه ، یا تجربه من اکسیکدر ، یعنی بر رابطه خفیه کشف ایدوب ایلری کیده جک بولی بوله میورز ؛ و یا خود ذهنمزمک - شو طبیعت تشکله کوره - حل ایدمه جکی بر حقیقت بسیطه قارشیننده بولونویو زه ، دیمکدر که اونئی آرتق قبول ایتمکدن غیری بزجه چاره یوقدر .

شیمدی بوتون بو (وتیره محاکمه procédé de raisonnement) ریاضینونک قاعده استدلاله کوزل بر مثال تشکیل ایدر . (منطق صوری logique formelle) ده دخی دوشونمه نیک (قلاسیک classique) بولی بودر . یالکیز بوراده شایان نظر بر جهت وارکه ده قارتک ، استقرایی اساس طوندوغنی حس ایتدیره بیلیر . اوده استدلالات و محاکمات تعلیلده ده بیله (حدسیات vérités d'intuition) ی مبدأ ورکن اصلی اتخوذ ایتمه سی در . ارسطودن بری همان هر فیلسوف ، حدسیاتی ده بدییاتدن عد ایدیور و فقط اوکا (اولیات) قدر قیمت ویرمیوردی . چونکه حدسیات ، جزئیات اموره متعلق معلوماتدن عبارت اولدوغنی ایچون اوکی شیلرک بر حقیقت کلیه افاده ایدمه جکنی و بو سبدن طولایی مبادی علمیه دن صایله مایه . جفنی ادعا ایدیور لرلردی . حالبوکه ده قارت بوتون مبنای علمی - ریاضیات دخی داخل اولدوغنی حاده - او حدسیات اوزرینه قوروب او طور تدقندن ماعدا ، ذهنک بر (حد) دن دیکرینه ، بر فککردن بر باشقه سنه انتقالاتی دخی انجیق (بالحدس par intuition) تعریف ایدیور که بوسیاق نظر بوسبوتون یکی در . زمانمزمده استقرایی شدت و موفقیته مدافعه ایدن فیلسوف و منطقی مشهور (جون ستوتات میل J. S. Mill) دخی [حین استدلالده ذهن ، جزؤدن جزئه انتقال ایدر .] دیور که تماما ده قارتک دوشونوشونه موافق بر ادعادر .

شایان دقت درکه (ده قارت) ، یالکیز تحدسی اوله رق ایدینه بیلدیکمز حقایق بینه و بدیهیه یی مبدأ و اساس علم اتخوذ ایدیور . شو قدر وارکه (حدس intuition) کیفیتنی (احساس sensation) ایله علاقه دار کورویور . بو طویغو ، بزه ایستر خار جدن کلسین ، ایستره کندی ایچمزدن کلسین ! . شیمدیک اوراسی لازم دکل ! . کمال بداهت اوزره بردنبره کلیوریا ؟ . ایشه ده قارت اوکا باقبور ؛ و بونی حقیقتک (علامت فارقه la caractéristique) سی عد ایدیور .

دیمک که بوتون (نظریه معرفت) ی (بداهت évidence) اوزره بنا ایدیور .

بدها (حدسیات *vérités intuitives*) ده کوروپور، حدسیاتی ده (احساسات) ده بولوپور .

(قانت Kant) دن بحث ایده جکم زمان کورده جکسکزر که او آلمان فیلسوف مجددی ، فلسفه منی ده قارتک بواعقادات اساسیه سی اوزرینه بنا ایتمش و حقیقت حالده همان اونی تفسیر واکمال ایتمکدن باشقه - هیچ اولمازسه بوبابده - برشی پانامشدر .

اوده - طبقی ده قارت کیبی - حدسیاتی معلوما تمزده مبدأ و اساس اوله رق قبول ایتمش ؛ یالکزر زمانی (تحدسات باطنیه *intuitions internes*) مزک، مکانی دخی (تحدسات ظاهریه *intuitions externes*) مزک (شکل ابتدائی *forme primitive*) سی عدایده رک اونلری ذهنمزک (تشکل طبیعی *constitution naturelle*) سنه ، یعنی (عضویت خصوصیه *organisation spéciale*) سنه عطف ایتمش دی ؛ و بوسبیلله حقایق بدیهیه و (متعارفات ریاضیه *axiomes mathématiques*) نک محصول تجربه اولمایوب معلوما تمزک اکتسا ایده بیلدیکی (صور عمومی *formes générales*) دن عبارت بولوندوغنی ادعا ایده بیلمشدر . حتی حقایق ریاضیه حقهده کی ملاحظات و بیساناتی بیلله طبقی ده قارتک کی کیبی در . بو خصوصده اتباع ایتدیکی (اصول *méthode*) دخی - ینه سلفنک کی کیبی - (تعلیلی *déductive*) در ؛ (استقرائی *inductive*) دکل ..!

ده قارت - اصول اعتباریله بک مهم اولان - بو مسئله ده فکر و اعتقادی صراحت کامله ایله بیان ایده رک ذره قدر شبهیه میدان بر اقامشدر .

[ذهنمزک تلقی ایده بیلدیکی معلومات ، اویله غریب رابطه لرله یکدیگرینه مربوطدر و (علی طریق الاستدلال *par voie de raisonnement*) بر برلرندن اوقدر ایی استخراج اولونه بیلیرلرکه ، همان یالکزر اک بسیط معلوما تدن حرکت ایدوبده درجه درجه ایلریله مکله دیکرلری انکشاف ایده بیلیر !] دیپور .

او حالده تجربه مشهوره ایله هیچ مناسبتی اولمایان حدسیات بدیهیه دن برایکی متعارفیه استناد ایده رک بوتون حقایق - استدالات ذهنیه مزله - کشف ایده بیلله جکمزدن امین ایسه ک ، تجربه به نه لزوم قالیر ؟ . فضله بر زحمت اولماز می ؟ .. ده قارتک بوملاحظات و ده بر جوق امثالی ، تجربه نک فائده منی و لزومنی قطعاً انکار ایتمکه بر در . حالبوکه ارسطونک نفوذ مغربسی قیروب سلطنت فلسفیه منی بر بادیدن وقرون

وسطی عرفانه نهایت و یروب بردور انتباه آجان داهیلردن - فیلسوف اوله رق -
 (بهی قن) ایله (ده قارت) دن بویوکفی بیلدیورز . انکلیز فیلسوف مجددی حقدنه
 کیمسه نك شبهه سی یوقدر . مرکس (بهی قن) ی (اصول تدریبه methode
 empirique) نك مؤسسی و پیری عد ایدیور چونکه بلاقید احتیاط او اصولی
 صحیح بولمش ، قواعدینی وضع و تعریف ایتش و کال جساتر ایله مدافعه سینه
 صرف عمر ایله مشدر . او یله اولونجه ده قارتك بوشرف تجدده حصه سی اولماق
 لازمکلی ، چونکه تعلیمات و اعتقادات فلسفه سی صراحتاً (تدریبه) مسلک نك
 علینده کیی کورونویور . مع مافیه - انکلهزه استئنا ایدیایر سه بوتون اوروپا فلسفه سینه
 بر جریان قطعی ورن بو بویوک فیلسوف ، کندی عصر نده ارسطونك مقامنه
 کجه جك قدر اعتبار و اعتماد قازانمش و (بهی قن) دن زیاده مشهور اولمشدی .

بو غریبه ، تاریخ فلسفه ده حلی مطلوب بر مسئله در : (ده قارت تجربه به
 طرفدارمی ایدی ؟ دکلی ایدی ؟ .. مدنیت حاضره یی تولید ایدن کشفیات ، اصول
 تدریبه نك غلبه سی ثمر ایدر . ده قارت اصول تدریبه یی ترصین و تأسیس چالشیدی ؟ .
 چالش مادی ؟ .)

بوسؤالره ، طوغرو جوابلر و بر مک ایچون ده قارتك فلسفه سی لایقی وجهله
 تتبع ایدلش ، و بو ابده بک مهم کتابلر یازیلوب بک چوق شیلر سوبلنمشدر که
 اونلری سزه بوراده نقل ایده م . یالکیز بحثك جدیدی لایقيله تقدیر ایده بیلیمه کزی
 تسهیل ایچون معاصریندن برایکی متفکر مشهورك بوخصوصده ویردکاری حکمی
 - ینه مختصراً و اشارتاً - سزه عرض ایده م :
 بعضی مدققین دییوراکه :

[ده قارت (عقلیه rationalisme) جریاننه اوروپاده صوک شکل کالی ورن
 واکا تازه حیات بخش ایدن الکبویوک فیلسوفدر . ماده و روحی ماهیتاً یکدیگر ندن
 آیری طوتمقله (ثنائیه dualisme) مذهبی - یکی اساسلر اوزرینه بنا - و تأکید ایدن ینه
 اودر .] بونده کیمسه نك شبهه سی یوق ! .. [مع مافیه منشأ علم و تاقی معلومات
 مسئله سنده تجربه به دخی - حدنجه و حقیجه - پای چیقارمش و بعضی معلومات
 استحصالی ایچون تجربه لزومی تسلیم ایتمشدر . حتی کنیدیسی دخی بالذات تجربه لر
 یابتنی سوردی .]

مکمل بر (فلسفه حاضره تاریخی) یازان (هوفدینگ Hoefding) دخی

ده قارتك عقلیه وادیسنی احیا ابتدیکنی و مسائل فلسفیهی رباضی بر سیاق نظاره حوزۀ ملاحظه آلدیغنی - اسبابیله - تعریف ایتدکدن صوکره بوفیلسوف لهنده شو سوزلری ده سولوبور :

[قیاس (deduction) ی یعنی - استدلالات تعلیلیه یی - تحدسی، بسیط و تجربی بر طاقم اضافانه تابع طوماسنه باقیلیرسه، کورولور که ده قارت اصول تدرییه به دشمن دکلدر . ذاتاً کندیمی لاینقطع بر جهد ایله تجربه لر یاپار و معلومات طولیلاردی . فقط ادعا ایدردی که (معلومات فیه conn. scientifiques) انجق قطعی و صریح بر (فکر pensée) ایله اکتساب ایدیله بیلیر؛ تجربه نك اهمیت مخصوصه سنی تشکیل ایدن کیفیت ، اوپله بر فکری دعوت و تولید ایتمه سیدر . بویله دیدیکی حالده استدلالات تعلیلیه ایله استخراج ایتدیکی نتایجی (تحقیق vérifier) ایتك لزومه يك اوقدر قولاق آصمازدی . اونك نظرنده (علم science)، معطایات تدرییه (données empiriques) دن [یعنی تجربه نك و یردیکی معلوماتدن!] استخراج اولنان فکرا لرایدی . اونلر دخی بعضی مقدماتدن منطقاً ، استنتاج ایدلمش (فرضیات hypotheses) دن باشقه برشی دکلدی .]

بومهمجه بر ملاحظه در . ديمك اولوبور که ده قارت تجربه یی مبدأ و منبع معلومات اتخاذ ایدورمش؛ شوقدر وار که حدسیات دیدیکمز ارکان بسیطه علمیه، یعنی حواسمزك تدارك ایتدیکی پراکنده معلومات ایله (علم science) تشکیل ایتك امکانه قائل دکلش . عقلک محاکات و استدلالاتی ایله اوپراکنده معلومات آره سنده کی روابط خفیه یی کشف ایدوب ارکان و عناصر علمیه یی یکدیگرینه باغلا یه رق بر فرضیه تشکیل ایتدیکمز زمان انجق - معنای صحیحیله - بر علم وجوده کلیرمش .

کوره جکسکمز که قانت ، عیناً بو ادعاده بولونمشدر . [معلوماتمزك مواد ابتدائیه سنی حواسمز واسطه سیله عالم خارجی دن آلیرز؛ فقط او عناصر علمیه یی تنسيق وتنظیم ایدرک اولنره بر شکل معماری و یرن انجق بزم عقلمزدر . الی آخره !] دیمکدن مقصدی بوایدی .

ارسطو دخی اساساً بو اعتقاده ایدی : (بدییات les vérités évidentes) نام عمومیهی آلتنده (وجدانیات sensations intimes) و (حسیات sensations externes) و (اولیات premiers principes aprioriques) ی جمع ایدیور ، فقط - معنای صحیحی ایله - علمی یالکمز اولیات اوزرینه بنا ایدیوردی . چونکه

(علم صحیح science exacte) ك حيثيت اصلیه سنی تشكيل ایدن باشلیجه شرطلری ، یعنی (وجوب necessity) و (کلیت universalité) صفتلری انحق او ایساتده بوله بیلوردی که بو کونکی لسان فلسفی اصطلاحنجه دخی اونلره اولیات دیورز؛ (قانت) ك (مبادی قبلیه principes apriori) دیدیکی ده باشقه برشی دکلدر .

دیمك اولویورکه بو اعتقاد - واضحاً - ارسطوده ، حتی اونك استادی افلاطونده پیدا اولمش ؛ ده قارت ظهور ایدنجه او اعتقادی رد ائمه دکن ماعدا بنسه مش ؛ صوکره قانت کلنجه بوسوتون اوکا قیمت واهمیت ووروب تحکیم اتمش و فلسفه سنی اونك اوزرینه قورمشدر . نته کیم بوکون بیله - اصول تدرییه نك حاکمیت مطلقه سینه رغماً - ینه بو اعتقادك بك چوق طرفدارلری واردر .

بویله ، بونجه انقلابات مدنییه و فکریه به قارشی محافظه موجودیت ایدن بر عقیده فلسفییه ده البته بر حقیقت اساسیه واردر ؛ هیچ اولمازسه بر جهت حق واردر ؛ دیه بر ملاحظه خاطره کله بیلیرکه هیچده بی وجه دکلدر . اونك ایچوندرك بومشله نك مناقشه سی (نه بیسته مولوژی) نك باشلیجه مباحثندن برینی تشکیل اتمکده در ، و حالاً مجادله سی نهایت بولامشدر . ینه اوسبیلهدرکه اسلافك بو خصوصده کی افکارینه دائر یعنی تاریخ فلسفه به متعلق اولان مباحثات بیله حرارتلیجه اولویور ؛ چونکه حالا بومهم عقیده نك طرفدارانی و علمدارانی واردر . بوجهت خاطر کزده قالسین ؛ (مه تود) بحثنده بومشله بی حل اتمکک چالیشه رق بو کتابة نهایت ویره جکم .

شیمدی ده قارت فلسفه تجربه ایله علاقه سنی و بو خصوصده خدمتی انکار ایدنلردن بك بویوک بر متفکر ك رأینی سزه نقل ایدیم :

(کبریج Cambridge دارالفنوننده بروقتلر (ترینی تی قولهج Trinity College) مدیری بولونان (دو قور هیو وول D. William Whewel) ، علوم استنقرایشه فلسفه سی) [*] نامیله معروف کتاینده بو مسئله بی تذکر ایدرکن - بالعلاقه - ده قارتی آکوب شو سوزلری سویلویور .

اونك اثره متنی - بر فلسفه سیستمی اوله رق - نظراً اعتباره آلیسه ق کورورز که بوتون خدمتی ، یالکیز کندی افکارمنزه استناداً بالحاکمه تحصیل معلومات اتمک اصولی احیاء و اونی (مشاهده observation) و تجربه اصولنه قارشی اقامه ایله مک

[*] کتاینزده اسمی بر قاج کره کچن بوفیل سوف ایله ده قارت حقده (۸۲) نجی صحیفه حاشیه سینه باقیکیز .

غیرتنه منحصر اولمشدر. (ده قارت فلسفه سی Cartesian philosophy) بر (ارتجاع counter revolution) تشبثی متضمن ایدی. [*] اولیه که بو فیلسوف (مبادی فلسفیات principia philosophiae) نام اثرنده: «حادثات عالمدن مختصر بر فکر ویره جکم، فقط بونلری برشی اثبات ایتک اوغورنده برهار اوله رق قوللانه یلمک ایچون دکل!... دیور؛ صوکره شوسوزلری علاوه ایدیور: «زیرا بز سیلردن مسیلر استخراج ایتک آرزو ایدیور. سیلردن سیلری چیقارمق دکل؛ حادثات عالمی نظر اعتباره آلمقدن مقصدمز انحق شودرکه: عینی سیلردن انبعات ایده سیلدیکنی کوردو کمز نامعدود مسیلر آره سنده بعضلری بر اقوب انحق بر قسم جزئیستی تلقی به عقلمزی مجبور ایتک املنده یز!.. الخ!.. الخ!..] دو قور هیوومل ده بر قاج جمله نقل ایده رک ده قارتک باشلیجه اعتقادینی تشبیر ایتدکن صوکره اصول تجربیه نک مؤسسی اولمق خدمتنده بو فیلسوفک حصصی اوله مایه جغنی ادعا ایدیور؛ بوشرفی انحق (بهی قن) ویریور.

دو قور هیوومل اصرار ایدیور که ده قارت مسلکینه ادعای منسوبیت ایدن بر چوق فیلسوفلر، او استادک نامنه اصول تجربیه یی کرکی کبی نشر وتعمیم ایتدیلر؛ چونکه زمانک کیدیشی وطونومی ذاتاً او ایدی. قورینق، غالبه، کپلر، له نوناردو داوینچی، تیقوبراهه، هاروهی ودها بویه دهاته نلمانک همق ایله ذاتاً اصول تجربیه تأسس ایتش واعتبار قازانمش دی!.. الی آخره، هیوومل بونی بر مسئله یاپوب تحقیقاته کیریشیور که اوراسی شیمدیلک بزه لازم دکل!.

نیم فکرمی صورارسه کز براز باشقه در. نبجه ده قارت خارق العاده بر داهی ایدی؛ او درجه ده محیط بر ذکایه مالک ایدی که اونی بر تک شخصیت اولمق اوزره تاقی ایتک طوغرو اولماز. فلسفه ده ریاضیاتده، فنون میخانیکه ده، الهیاتده، اصولده، عظیم تبدلاته موفق اولمش بر آری آری ده قارت وارددر. بونلری یکدیگریله قاریشدیر مامالی! اصول تجربیه قارشى کلک دکل، او اصولک حدینی تعیین ایتک وحقایق عقلیه یی و اولیاتی مبنای علم ایچون اساس اتخاذ ایتک صورتیه سوز سوبله بن فیلسوف، (ریاضی ده قارت) در. اللهک وجودینی اثبات ایتک

[*] یعنی: (بهی قن) ک ارسطوی حکمدن اسقاط ایدوب راسیونالیزم اصولی ابطال ایتیه سی واکا بدل غایت متمر اولان اصول تجربیه یی تأسیسه موفق اولماسی دور تجددی فتح ایدن برانقلاب فکری ایدی. ده قارتک فلسفه سنده راسیونالیزم اساس اولدرغی ایچون بر فکر ارتجاعی متضمن ایدی؛ دیمک ایدیور.

غیرتیلہ براہین مشہورہ ترتیب ایدن والہیہاندہ اصلاحات اجراسنہ موفق اولان
 دہ قارت دہ باشقہ در. فقط بوتون حادثات طبعیہ و شئونات کونیہ بی میخانیکی بر
 طرز دہ - یعنی تسلسل اسباب قانونہ کورہ - تفسیر ایتک بولنی تعلیم و بواسولی ہر
 شے ترجیح ایدن بر دیگر دہ قارت دخی وار ایدی کہ اصل تجربہ لرلہ اوغراشان
 طبعی مشاہدہ ایلہ تتبعہ چالیشان ایشہ بو آدمدر. اصول تجربیہ نک تعمیم
 وانتشارینہ، متفکرین و علما نظرندہ کسب رواج و اعتبار ایتہسنہ بو آدمک
 خدمت و غیرتی انکار اولونہ ماز. ہر شی - کائناتہ اک بسیط حادثاندن طو تو کوزدہ
 موجودات عضویہ دہ سر حیاتیہ وارنجیہ قدر ہر شی - میخانیکی بر طرز دہ
 تعریفہ چالشمق، تجربہ لزومی اقرار ایتکملہ اولہ بیلیر. بر شینک میخانیکی آکلامق
 ایچون اونک میخانیزماسنی بیلمہ لی درکہ، ناصل ایشلہ دبکنی، نہ کی عواملہ تبعاً
 حرکت ایتدیکنی آکلامق و او حادثہ بی - اسباب و مؤثراتہ عطفاً - معقول بر
 صورتہ تعریف ایتک ممکن اولہ بیلین! دہ قارت اولہ یابوردی. حتی لابوراتواری
 واردی. بر کون کنڈیسنی زبارتہ کلن دوستلرندن بری (بو کونلردہ نہ ایلہ
 مشغولسکمز؟) دیہ صور دوغنی زمان، (یکی و مہم بر کتاب مطالعہ سیلہ
 مشغولم!) دیہ بر جواب آلجہ حیرت ایتش؛ بونک اوزرینہ دہ قارت، دوستک
 لندن طرہ رق عملیاتخانہ سنہ کوتورمش؛ اورادہ تشریح ایتکملہ مشغول بولوندوغنی
 بوزاغنی کوسترہ رک: [ایشہ بو کتابی، کتاب طبعی تتبع ایدیورم!].
 دیمشدی. تدریوندن اولان دہ قارتک اصل چہرہ سنی بولا بوراتواردہ کورہ بیلیرز.
 معاصریندن متوفی (پروفیسور ہکسلی P. Huxley) دہ قارتی بو نقطہ نظرندن
 مطالعہ ایدہ رک پک مہم بر مقالہ یازمشدی. کنڈی تعبیرنجہ (قوجہ فرانسیز
 le grand Français) اوروپادہ یکی یکی وادیلر آچان افکار جریانلرینک همان
 ہپسنی احداث ایتمشدر؛ دیور.

واقعا اصولہ (بہی قن) بلا قید احتیاط تدریجی ایدی؛ و بو یکی اصول ایلہ
 یکی بر دور آچقدہ اولدوغند. لایقلہ خبردار ایدی. بو اصول ایلہ صنایع
 و احتیاجات مدنیہ مزدہ نہ بویوک موفقیتلر احراز ایدیلہ سیلہ جکنی فوق العادہ بر
 نفوذ نظرلہ سویلہ مش و کشفیات اخیرہ و ترقیات مدنیہ ہر خصوصہ کنڈیسنہ
 حق ویرمشدر. انگلیز فلسفہ سی تمامیلہ بو استاد مجددک آجدینی جیغیری تعقیب
 ایتکملہ کالی بولمش و اوروپانک کنڈن برازفر قلی برسیستم صورتندہ تمثیل ایلہ مشدر.

لكن اوروپاده حالا معتبر اولان باشليجه مذاهب فلسفيه هب ددقارتك افكارندن طوغمشدر. كنديسنه پيرو اولان بونجه فياسوفلردن هر برى اونی بر خصوصى نقطه نظردن تتبع وتلقى ايدرك بر مسلك وجوده كتيرمشدر. قانت كيبي مثلى اندر كلير بر داهى بيله اساساً ددقارتك فلسفه سنى قبول ايتمش فقط بعض جهنلرنده بر درجهيه قدر اصلاحاته موفق اوله يلممشدر .

فرانسمز فيلسوفنك تاسيس ايتديكى (نظريه معرفت) بوكون معتبر اولان بر جوق مسالك فلسفيه نك صحيحاً مهد نشأتى در .

بو آدم اولاهر شيدن شبهه ايدىور. (يقينون les dogmatiques) كيبي اول امرده - فضولى اوله رق - بعض برنسيپلر وضع ايدوبده اولنرى زار زور اثباته كيريشميور. ذهنى هر تورلوافكار و اعتقاداتدن تېريه وتصفيه ايتك صورتيله ايشه باشليور وبونك ايچون (شك اصولى le doute methodique) يرهبرتحقيق اتخاذ ايدىور. (جون لوق) ك و (قانت) ك بالاآخره تعقيب و اكال ايتديكى (تنقيديه critique) طرزى بوندن طوغمشدر . نه يسته مولوژى نك كركى كيبي انكشافنه بو طرزك نه درجه لرده خدمت ايتديكى ده اولجه سويله مشدم .

بو شبهه نك دلالتى قبول ايدنجه (برهان وجود) ي عالم خارجى ده آرامغه امكان قالمايه جنى جهنله كندىنى [ابتدائى امرده يقيناً ثابت بر حقيقت اولان فكريك منشأتى ، يعنى وجدانى] تحقيقه قويولوبور كه بوكون بيله بسيقولوزيده بر خيلى متفكرينك طرفدار اولدوغى (اصول مراقبه methode introspective) نك مبدائى بودر .

بو سايله كوروپور و تحقيق ايدىيور كه نه قدر شبهه ايتسه بيله ينه دوشوندو- كندن امين اوله بيلير ؛ چونكه شبهه دخى انجق بر دوشونجه در . بو سايله (حسبانیه scepticisme) مسلكنى انتخابه مجبور ايدىيور . زيرا شبهه يى ، شبهه نك كندى وارنغيله رد ايتمش اولوبور. يعنى شبهه حداذاتنده بر فكدردن عبارت اولمق حيثيتيله - هيچ اولمازسه - بر فكريك وجودى ، واونكله برابر متفكر ك وارنغى ثابت اولوبور . بو حده كلنجه (انفسيه subjectivism) مسلكى تحقق ايدىيور ؛ چونكه - بيم اعتقادجه - بو طوغرو مسلكك نقطه استنادى وجدانى ، وارنك برنجى دليلى اولمق اوزره تلقى ايتكدر . بوده اك اول كندى روحنك وارنغى

تحقیق ایدوب اساس طوتمقله اوله بیلیر. ایشه بوملا حظه دن طولانی [دوشونویورم! - دیمک که وارم!] دستوری انفسیه اعتقادینک تمّل طاشی در .

کندیسنه اوتنه دئبری تلقین ایدلمش اولان اعتقادادن ودها - اثر افکاردن تبری وتیری ایتدکن صوکر. بانیورکه بعضی افکار واضحه و صریحده دن ذهنی بوشالتمق ممکن اولمویور . بو کیمی افکارک تجربه ایله ده حاصل اوله میه جغنی یقیناً جزم ایدیور ؛ وانجق اونلری حقیقت اوله رق قبول ایتمکده مضطر بولونویور . (عقلیه rationalisme) مذهبک اساسی بودر .

کورویوزکه (فکرکمال l'idée de perfection) دخی - ذهنک تبری ایده میه - جکی - افکار واضحه و (قبلیه apriorique) دندر. بونی، کندی نقصانی ادرک ایتمکه دخی استدلال ایده بیلدور. حالبوکه فکرکمال ، (فکرالله l'idée de Dieu) در . مادام که بو فکر ، ذهنه - بالضروره وکمال وضوح ایله - سانخ اولویور ؛ دیمک که محض حقیقتدر . طبقی شبه . وجدانی اثبات ایتدیکیمی کبی ، فکرکمال دخی اللهک برهان ثبوتی اولمق کرکدر. شوتقدیرجه : [دوشونویورم ؛ بناء علیه موجودم Cogito, ergo sum] دستورندن نه قدر امین ایسه م. [الله دوشونولویور ؛ دیمک که الله واردر . Deus cogitatur: Deus est =] قضیه سندن ده اودرجه امین اولمقلغم لازم کلیر .!] دییور، وبوصورتله اللهک وارلغنی وجدانک شهادتیه اثبات ایدیورکه، زمانمز آلهیونینک جمله سی بودلیله قطعاً تمسک ایتشلردر ؛ زیرا بوندن ابی سنی حالا کشف ایتمک ممکن اوله مامشدر . شوراسی ده شایان دقتدرکه اثبات الوهیت بختنده بودلیل (انفسیه) اسلوبجه یکانه برهان قوی در . چونکه الهی طاغلرله طاشلرله. ده کیزلرله بیلدیزلرله خلاصه خارجه مادیات ایله دکل ، کندی وجدانمزله اثبات ایتمک یولی در .

ده قارت بودلیله استناداً وارلق عالنده کندیسینک یالکزجه موجود اولمدیغه - منطقاً - حکم ایدیور . زبرا - بو فیلسوفک اعتقادنجه - ذهنه واضحا سانخ اولان اولیات آره سنده غایت دیمیعی و اساسی رابطه لر واردر . اوقدرکه بژندن دیکرلرینی - تعلیلی بر صورتده d'une façon déductive - استخراج ایتمک ممکندر. نته کیم (سببیت مبدأئ principe de causalité) یی بوجهله بالاستدلال چیقارییور .

آ کلیورسکیزکه بودوشونوشلردخی هپ (ریاضی ده قارت) ک طرز تفکریدر.

بوراده (حقایق معقوله *vérités rationnelles*) ، طبقی (هندسه متعارف‌لری
axiomes géométriques) کیبی برحیثیله تلقی ایدلمش اولویور . ناصلیه متعارف‌لر
آرەسندە صیقی بر رابطه منطقیه وارسه . ناصل برندن دیکرینی استدلال ایتک
ممکن اولویورسه ، بوتون بو متعارف‌لر ناصل یکدیگریله هم آهنگ بر (مجمعه
احکام) تشکیل ایدیورسه ، اولیاتی ده بوفیلسوف طبقی اویله کوروپور .
ایشته ده قازتک استقرایه طرفدار اولمادیغنی ادعا ایدنلر – ماهیتاً ریاضی اولان
– بو (محاکات تملیلیه *jugements déductifs*) سنه باقورق ، علیهنده بویله بر حکم
ویریورلر . بو حکمک یالان دکل یا کلش اولدوغنی سزه یك قولای اکلانه بیایرم .
بن شدتله استقرا طرفداریم ! اعتراف ایدیورم که تدریبیون اعتقادینه اک زیاده
حق ویرنلردنم ! .. بونکله برابر : [هندسه متعارف‌لرینی حقیقت اوله رق قبول
ایدرمی سسک ؟] دیر ایسه کز ، [ثبوت ! .] دیرم ؛ ذره قدر تردد ایتم ! ..
[بومتعارف‌لر آرەسندە رابطه منطقیه وارمی ؟ .] بعضلرندن دیکرلرینی تعلیلاً استدلال
ایتمک ممکنمی ؟ ..] دیه تکرار صورارسه کز ، عینی قناعت وعینی صدق اعتقاد
ایله : [ثبوت ! . البته وار ! . شبه یوق که وار ؛ اکر اولماسه یدی هیچ بر هندسه
دعوائی اثبات ایتک ممکن اولمازدی . بوتون دعوالرده اسلوب استدلال ، بویله
تعلیل برطرز محاکمه ایله مسائل معضله‌یی اوبسیط متعارف‌لره (ارجاع *réduire*)
ایتمک ، و اوسایده (حل *résolution*) نه یول بولمقدور . اویله بر رابطه منطقیه
اولماسه یدی بوطرز استدلال ایله مسائل هندسیه نك حلنه یول بولونه بیلیرمی ایدی ؟ ..
متعارف‌لر آرەسندە ماهیتاً موجود اولان بورابطه منطقیه‌یی انکار ایتک ، هندسه
کیبی – اک صحیح وثابت – بر علمی انکار ایتکه واریر .] دیمکده ینه ذره قدر
تردد ایتمزدم . بویله بر ادعاده بولونمقله دخی (تدریبیه) فلسفه‌سنی رد ایتش
اولمازدم ؛ چونکه بوکون صحیحاً متعارفه نامیله بر جوق معلوماته مالک بولوندوغمزرده
شبه یوقدر ؛ اولنری ده صرف کندی تجربه منزله کشف ایتهدیکمز محقق در .
دیمک که بوادعالرده هنوز یا کلش برشی یوق ! .. ها ! .. [متعارف‌لرک – بوکونکی
شکل قطعی لرندن صرف نظر – منشألری نه در ؟ . عقل می ؟ . تجربه می ؟ ..] دیه جک
اولورسه کز : [بن ظن ایدرم که تجربه در ! ..] دیه رک ، سزه تدریبیوندن اولدوغنی
او وقت اعتراف ایده رم . فقط بونک ایچون – بوکونکی حالیه – متعارف‌لری
قبول ایتهمک ، یا خود ارنلرک استدالات تعلیاییه مبدأ اولدوغنی انکاره قالدیشمق

ایجاب ایتر. بونده مجبوریت یوقدر. ایشته دهقارت علیهنه ویریلن حکمده - صانیرم - یا کاشلغه سبب بودر .

دهقارتک دوشونجه سی ده - ینہ بنم ایله برابر بعضی متفکرینک ظننجه - بو سوبله دکلرمدن پک فرقلی دکلدر . نته کیم بر قاق صحیفه اول عرض ایتمش ایدم که بو آدم (افکار وهیه *idées limées*) حقنده بویه دوشوندوکی وبویه ادعالزده بولوندوغی حالده مبحث علمده (حدسیات *intuitions*) ی اساس ومبدأ اوله رق طانیشدی. هر نه اولورسه اولسون، ایستر باطنی، ایستر ظاهری اولسون، حدسیات تجربہ نك منبعی در ؛ بو خصوصده بوتون متفکرین متفق درلر .

دهقارتک الله دیدیکی (فکرکال) ایله قانولایق اعتقادنجه معتبر و مسلم اولان (آله مشخص *Dieu personifié*) نك هیچ برمناسبتی یوق. فکرکال، هروجهله آهنگدار اولان هیئت طبیعتک جامعۀ کلیه سی درکه دهقارتک اعتقادنجه وجدان دخی اوندن برجزؤدر . سقراطده الهی باشقه تورلو دوشونمه مشدی .

دهقارت شوفکردن ملهم اوله رق - بالتحدس - سیبیت مبدائی کشف ایدیور. غایت فیاض بر عقله مالک اولان بو فیلسوفک بوتون محاکماتی سلسله منطقیه سیله سزلره عرض ایتمکه - بو مختصر وابتدائی کتابده - امکان یوقدر؛ فقط دهابر نقطه سی کوستریم : بافیکز فیلسوف بونقطه یه کلنجه ناصل دوشونویور :

[بن محدود وناقص *limité et imparfait* بر موجودم . محدود اولدوغم بدیهی !. ناقص اولدوغمه ده ، امکان اشنا هم قطعاً دلالت ایدیور. حالبوکه بنم ذهنده - واضح وصریح برحقیقت اولمق اوزره - بر (فکر کال) وار . برده (سیبیت فکری *l'idée de causalité*) وار. بوایکنجی فکردن شو حقیقتلری - بالتعلیل - استدلال ایدیورم که ، (هیچ بر شی سببیز اوله ماز.) و (مسببده سبیدن فضله بر شی بولونه ماز .) او حالده بن که ناقص اولدوغمی قطعاً تعقل واذعان ایدیورم؛ ناصل اولویور که بویه بر (فکر کال) مالک بولونه بیلیورم؟. (بوفکری بن ابداع ایتم؛ بن یاراتدم بن طوغوردیم !.) ده یه م !. ناقص برشی کاله مصدر ومنشأ اوله ماز ؛ چونکه مسبب ، کندی سبیدن زیاده برشی احاطه واحتوا ایده مز . بن مناهی بر وجودم ؛ بن ده نامتناهی بر فکر وارسه ، اونى البته بنم ذهنم تولید ایتمه مشدر . او فکر کال ، بکا اللهدن کلشدر. دیمک که شو وارلق عالمنده بن یالکیز دکلم [۱ .] دیور . بو محاکمه (طوغامش فکرلر -

idées innées - افکار وهیه) تعبیر مشهورینک سبب تسمیه نی کو ستردیکی کیبی ده قارتک مشهور (دلیل تکوینی (preuve ontologique) سنک ناصل بر زم-ین محاکمه استناد ایتدیکی ده میدان قویوور .

اللهی بومعنا ایلہ آ کلادقن و فکر الوهیتی ده بو طرز استدلال سایه سنده بر (حقیقت واجبه (vérité nécessaire) اوله رق اثبات ایتدکن صوکره ، ذهنمه لایح اوله بیلن معقولات واضحه و واجبه نی اوفکر کاله نسبت ایدیور . [نه بیلیر ونه اوکره نیرسم ، او فکر کالک افاده و اظهار ایتدیکی حقیقت نامتناهی دن بر جزو در . بناء علیه ذهنمه - ارادتمک قطعاً دخلی و تجربه مک اصلاً علاقہ می اولمایه رق - - جلوه نمون سنوح والهام اولان افکار وهیه ، یعنی حقایق قبله یا کلش اوله ماز . یا کلشلق ، نم کیبی ناقص بر وجودک عوارضنددر . آلدانمق ، آلدانمق بزه مخصوص احوالنددر . کال مطلق ، نه آلدانیر ، نه ده الدانه بیلیر .] دیور . و - دقت ایدیورسکزرکه - بوسفر بوسوزلری سویله بن آدم (عالم الهی (théologien) اولان ده قارتدر . آ کلیورسکزرکه [قسطاس علم (criterium de la conn. علم یقین (conn. certaine) ک مبادیسی و اساساتی تشکیل ایدر .] دیمک ایستور . قانتدن بری ینه بک چوق متفکر لریک اعتقادی حالا بودر .

ده قارت ، عالم مادینک وارلقنه ، بالاستدلال حکم ایدیور ؛ طوغرودن طوغرویه شهادت حسیه اینانوبده بدهتی ، صاغلام بر دلیل اتخاذا تمک ایسته میور . بو خصوصده کی محاکماتی ده ده مین عرض ایتدیکم دوشونجه لره مستنددر ؛ حتی او ملاحظاتک - نوعما - ذیلی و نتیجه سیدر . باقیکنز ، ناصل دوشونویور : [ثبوت ! . کال مطلق فکری بنده وار ؛ و بویه بر فکر بالذات بدن صادر اوله ماز ، چونکه بن ناقص . دیمک که حقیقته اوله بر وجود وار ؛ بن دنیاده یالکنز دکلم . حتی نم کیبی باشقه موجودیتلر ایلہ برابر بر چوق اشیای ماده دخی اولدوغنی کوروورم . اکر نم تصوراتم طوغرو ایسه ، کوردو کم شیلرک اصلی اولمق لازم کلیر . اکر بن ، اوشیلری واضحاً و صراحته تصور ایده بیلورده ، بو تصورمه یا کیلمیورسم ، اشیای خارجیہ - حقیقت حاله - دوشوندو کم کیبی اولمق کرکدر . اونلر ، بکا بر طاقم (اجسام مستقله) کیبی کوروونویور . بو کوروونوش ، صاقین نم کنندی کنیدیمی آلدایشتم قیلندن بر (شعبده (illusion)

اولماسین؟! حقیقتاً اجسام واری عجیب؟. شبه یوق که (صور اشیا) نامنه ذهننده بر طاقم رسملر وار؛ وین اولرله اجسامک موجودیتی (تصور و تخیل). (imaginer) ایدیورم. اگر بنم یالکز فکرم بو تخیلاته سببایسه، فکر و تخیل عینی شیدر دیمک اولور، و او تقدیرده دخی تخیلاتی خارجه بر سببه عطف ایتک طوغرو اولماز. یعنی: بن بر طاقم اشیا و اجسام تصور و تخیل ایده بیلورسم، خارجهده اویله بر شیلرک مطلقا وجودی اولمق لازمکمز؛ چونکه بو تخیلات منحصر آ بنم اثر ابداعمدر. بو حیثیتله انجق بنمله قائم و دائم اوله بیلیر. لکن (فکر صرف *idée pure*) باشقه (خیالات) باشقه کورونویور. بونک بویله اولدوغنی بالتجربه دخی آکلایه بیلورم: عینی شیئی تفکر ایتک ایله تخیل ایتک آرمسندمه هم برفرق بولویورم. مثلاً بیک وجهی بر شکل هندسی تخیل ایتک بک کوچ برشی در. حالبوکه بویله برشی تفکر ایتک، بر مثک تفکر ایتک قدر قولایدیر. [یعنی، بز مثلاً (ن بعدلی) بر مکان یا خود بر جسم اولماسی احتمالی بک اعلا دوشونه بیلیرز؛ فقط ایش اوراده دکل! بویله بر دوشونجه بی ذهنمزده (احضار *représenter*) ایده مه بز؛ اوکا (تخیله *imagination*) مزده صورت و برمه میر!.. دیمک ایستیور!..] حالبوکه ذهنک ماهیت اصلیه سی فکدر. (ملکة تخیل *la faculté d'imagination*) فکره تابع اولماقدن ماعدا جسم ایله هممه حال متحد و علاقه دار کورونویور؛ یعنی بز م کندی ذهنمک، یالکز باشنه اثر فعالیت دکلدر؛ خارجدن کلن بعضی اسبابک تأثیریدر. بناء علیه نفس الامرده جسم اولماسه یدی، بزده اونک خیالی اوله مازدی. چونکه یالکز عقل، ساده فکر تولید ایدر؛ خیالات ابداع ایده مز. دیمک که بزده بو خیالاتی ایقاع ایتک اوزره، خارجه بر شیلر وار!..]

بوتون بوملاحظاتک استناد ایتدیکی برهان - دقت ایدیورسکوزیا! - ماهیتاً بسیقولوزیق در. چونکه (فکر و خیال *idée et image*) فرقی اوزرینه مبنی بر نوع استدلال در. بوکون فکر ایله خیال آرمسندمه بودرجه قطعی فرقلر اولما دیغنه قناعت وارددر. هر حالده ده قارتک ظن ایتدیکی قدر فرق اولسه بیله ینه بو دلیل، اشیا ی خارجه نك وجودنی اویله قطعی بر صورتده اثبات ایده مز؛ انجق اویله بر شیلر اوله بیلیمه سی احتمالی دوشوندوره بیلیر. اونک ایچون ده قارت بو قدرله قناعت ایتیمور. (احساسات *sensations*) و (انطباعات *impressions*) مزک منشائی

واو مناسبتله دخی اسبابی آرییور؛ و بونلرک بزم اثر ابداعمز اولوب اولمادقلری
آکلامق ایچون ارادتیزی نظردقته آلیورکه، او (قوجه فرانسز) ک پک جدی
بر ملاحظه فیلسوفانه سی ده بودر، دیسه م یالان اولماز. هم بوکون حالا بویله
دوشونویورز. باشقه یول بولونه مادی. تعریف ایدیم!... چونکه پک قیمتی
بر عقیده فلسفیه در:

ده قارت انحق عقلاً بدیهی اولان شیلری حقیقت اولق اوزره قبول ایتشدی.
بو حقیقت، یالکز کندی نفسنک بداهت وجودینی اثبات ایدیوردی. فقط
شبه دن قورتوله ماماسی، محدود و متناهی اولماسی ده - عینی زمانده - (بر موجودیت
ناقصه *une existence imparfaite*) اولدوغنه صاغلام بر دلیل تشکیل ایتشدی.
حالبوکه کنا یسنده بر فکر کال اولدوغنی ده کورویوردی، چونکه قطعاً ذهنده
موجود ایدی. کندی ماهیت ناقصه سنه عطف ایدمه دیکی بو فکر، حقیقتک
بوتون اوصاف اصلیه و ممتازه سنی حائزدی؛ یعنی بسیط، واضح و یقینی ایدی.
ایشته کال مطلق بونکه ثابت اولویوردی. دیمک که بداهت اولی، خارجده کی اشیا
دکل، الله در و او فکره مقر اولان نفس بشر در. بونکه ده ثابت اولویوردی که
انسان بو وارلق عالمنده یالکز دکلدر. لکن بزده بر طاقم خیالات دخی وارکه
خارجده بر طاقم اشیا نک وجودینی استلزام ایدر کیی کورونویور. تخیلات،
معقولات واضحه کیی حقایق بدیهیه و صریحه دن صایله ماز. مع مافیة احساسات
و خیالاتمک وار اولدوغنی کندی نفسمز (بالحدس *par intuition*) تصدیق
ایدیور. بونده هیچ شبه ایدمه میز. لکن مسئله شیمدی اودکل! بو احساسات
و خیالاتمک - وجدانمز خارجنده - بر نقطه استنادی (بر متعلق الیه) ی وارمی؟
یوقی؟ بزم بوتانرا تمزده مقابل، بر حقیقت خارجییه وارمی؟ یوقی؟.. کوجلک
بوراده! شیمدی بو عقده یی حل ایتک، بو سؤاله بر جواب قطعی و یرمک
لازمکلیور. [وار!..] دیرسه ک [عالم خارجی نک حقیقی و استقلال وجودی
ثابت] اوله جق! [یوق!..] دیرسه ک [عالم خارجی بزم کندی اثر تخیلمز در!] دیمک
چیقہ جق! بر ننجی احتمالہ کوره (réaliste-substantialiste) بر فیلسوف اولمش
اوله جقز! ایکنجی احتمالہ کوره (idéaliste-nihiliste) اولمقدن قورتوله مایه جقز!
دیمک که بو ملاحظاته اساس کندی حیاتمز و تانرا تمز در. اک اول اونلرک

بزده موجودیتنی ادراك ايديورز ؛ واینایورز . چونکه بزم ایچون (ایلک بدهات première évidence) ایشته بودر . خارجده کی کائنات ماده نکل ...! کوروپورسکیزکه ده قارتک بو سیاق نظری تماماً (انفسیه) فلسفه سنک اسمایی در . بو کون - هانکی مذهبه ادعای منسوبیت ایدرسه ایتمسین - هر فیلسوف ایچون (نه بیسته مولوزی) ده مبدأ حرکت بودر . کندی نفسمزی بلا واسطه ادراك واستشعار ایدوب ایتمه دیکمز ، هنوز فلاسفه معاصرین آره سنده مختلفیه بر مسئله اولمقله برابر ، عالم مادی و خارجی نی انجق بالواسطه و (بالاستحضار par représentation) ادراك ایتمه دیکمزده شبه قالمشدر . چونکه طوغرودن طوغرویه انجق حسیات و تأثرات ذاتیه مزه واقف اوله یلیدیکمزی بسیقولوزی علمی - اولانجه صلاحیتله - ادعا و اثبات ایديورز . بو کافارشی الک مصر ماتریالیستلر بیله اعتراض ایدم میورلر . بو جهتی سزه اولجده ایضاح ایتمشدم .

اولحاله ده قارت صحیحاً (فلسفه حاضره نکل پیری le père de la philosophie moderne) در . کوره جکسکیزکه کائنات ماده نکل استقلال وجودینه قائل اولان فلاسفه متأخرینک جمله سی ، بو دعوالرینی اثبات ایدم بیلمک ایچون ده قارتک ملاحظاتی اساس اتخاذ ایتلر و اعمال واکال ایله مشلردر . کذلک (بارقله Berkeley) و بعضی امثالی کبی ، - عالمک وجودینی قطعاً انکار ایدن - فیلسوفلرده یته اونک دوشونجه لرینی (فقط ترسنه چویرمک صورتیه) دعوالرینه دلیل کتیرم مشلردر . شو تقدیرجه بو ایکی صنف متفکریندن بریسی ده قارتک ملاحظاتنده یالکر بر جهتی قبول ایتش ، دیکری اوبر جهتی تلقی ایله مشدر . حسیات و تأثراتمزده ارادتمزک دخلی اولوب اولمادیغی بر معیار صحیح اتخاذ ایدوب اوکا کوره عالم خارجی نکل وجودینی نفی و اثبات ایتک اسلوبی ده تماماً او قوجه فرانسز حکیم نکل طور تفکری در ؛ و بوکون یته پک معتبردر . شیمدی ده قارتک بوندن ناصل بر نتیجه چیقاردیغی عرض ایدم جکم .

[بزده احساسات نامنه بر طاقم خیالات اشیا واردر . بونلر حقنده شبهه ایدمه یز . اولسه اولسه ، یالکزا و خیالاتک حقایق خارجییه (تطابق adaptation) ایدوب ایدمه جکنه دائر شبهه مزاوله ییلیر . دیمک که شیمدی حل ایدم جکمز مسئله بوشه نکل ضمننده کیزی در . اوله ایسه ایجه دوشونه لم ...! اولجه خیالاتک عقل صرفدن متولد اوله میه جغنی اثبات ایتک ایچون افکاردن آیری غیری بر طاقم شیلر

اولدقلرینی کوسترمش ایدک . حتی مطلقاً اجسامک صورتلری اولدقلرینه اینانمق مجبوریتندن قورتوله مامشدق . فی الحقیقه ، دوشونهلم اجسام اولمادقجه (لذت و الم plaisir et peine) کبی حسیات ناصل کندی کندنه حاصل اوله بیلیر ؟ ... آجلق و صوسزلق کبی (اشتهاال appetits) ؛ خشونت و ملاست ، حرارت و برودت ، رنگ و صدا کبی (احساسات sensations) ؛ غم و نشاط کبی (حالات روحیه états d'âme) ناصل بلا سبب وقوعه کله بیلیر ؟ .. بزم بونلری حس ایتدیکمز بالتجربه محقق در ؛ حتی تجاربمز میاننده بونلر قدر مؤثر و شدید اولانلری یوقدر ؟ . دیه بیلیرز !.. لکن ایشک مهم جهتی شوراسی درکه بو حسیاتک کندی ارادتمزله حاصل اولمادینی یقیناً بزم معلومدر . او حالده بونلر بزدن دکل ، بزم خارجدن کلیور دیمکدر . او تقدیردهده خارجهده همه حال - بوتورلو تأثیراتی وجدانمزده ایقاعه مقتدر - بر شیلر اولق کرکدر . ایشه اونک ایچوندکرکه بزم ، کندی حسیات و ادراکاتمز بر طاقم مؤثرات خارجهیه - ایستر ایسته مز - عطف ایتک مجبوریتنده بولونویورز .

خارجده کی اشیایان بزم آنجق احساسات صورتنده بر طاقم معلومات وارد اولدوغی ایچون بزم او احساساتمز اشیای حقنده اک طوغرو خبرلر اولق اوزره تاقی ایدیورز . حتی ظن ایدیورز که ، کندی طوبوغولرمز ، طیشاریده کی موجوداتک صور حقیقه سنی عرض ایدیور ؛ و اول امرده تدارک ایتدیکمز بو احساسات ، معلوماتمزک عناصرینی تشکیل ایتدیک ایچون اوله دوشونویورز که بوتون معلوماتمز خارجدن کلمشدر . حالبوکه بو طرز تفکر مزله فاحش بر خطانک قربانی اولویورز . بزم رؤیاده دخی بویه بر طاقم احساسات ایله متأثر اوله بیدیورز ؛ فقط اویقودن اویانجه او کوردو کمز خیالاتک نه قدر اصلمز اولدوغی آ کلیورز . اویانیق ایکن بیه حواسمزک بزی آلداندینی چوق اولویور . بنسأ علیه حواسمزک شهادتندن دخی قطعاً امین اوله مایز] .

بوراده (ده قاربت) کرک مخیله نک ، کرکه حواسک برر (مخبر صادق) اوله مایه جفته بیان قناعت ایدیور ؛ واصل بو سبیلده درکه افکار بشریه یی اوج قسمه آپیرمغه مجبوریت کورمشدر . اولاً شوراسی شایان قید و اخطاردکرکه بو فیلسوف نه قادار حادثات معنویه وارسه ، اونلرک جمله سنه افکار تعیرینی اطلاق ایدردی . یعنی (احساسات sensations) ، (حسیات sentiments) (خیالات

(images) و (افکار صرفه *idées pures*) بی طاقیله (*idées*) عد ایدردی .
 بوکون بز بونلری طاقم طاقم آییوریوز و آره لرنده مختلف فرقلر بولویورز .
 بوفرقلری اویلمیور دکل ایدی . [بک ای بیلدیکی شیمدی کوره جکز]
 یالکز ، او زمانلر اصطلاحات فلسفیه حقیله تعین ایده مه مشدی . مع مافیه
 ده قارت - ده مین عرض ایتدیکم مجبوریته سائقه سیله - اوچ نوع افکار قبول
 ایتشدز . برینه (افکار وارده *idées adventices*) دیر ایدی که عالم خارچیدن بزه
 کلن بعضی معلوماتک عناصری بونلردر؛ و بوکونکی تعبیر مزه کوره (احساسات
sensations) صنفه توافقی ایدر . ایکنجیسی (*idées factices*) دیدیکی قسمدر که
 بزم مخیله مزده ابداع ایتدیکمز خیالات صرفه در . بن بونی (افکار مجموعه
 تعبیریه ترجمه ایتدم که عیناً او معنایی ادا ایدر . اوچونجیسی ده (افکار وهیه
id. innées) درکه ، بزم عقلمزک کندی ماهیتندن منبعث در وایشته اصل بونلر
 بر حقیقت افاده ایده بیلیر . اونلردن یوقاریده بحث کچمشدی .
 شیمدی قانت (افکار وارده) ایله (افکار مجموعه) بی قبول ایتیور دکل ؛
 اونلرک (قسطاس حقیقت *critère*) اوله بیلمسی حقیقته اینانه میور . بوسالاحتی
 رد ایدیور . یوقسه (احساسات) ک بالذات بدیهی بر حقیقت اولدوغنی تسلیم
 ایتدکدن ماعدا بونک اوزرینه بر سلسله محاکمه کبریشیور :
 [شبهه یوقدرکه بزده بر طاقم احساسات وار ، و اونلرک ایقاع ایتدیکی
 (استحضارات یعنی تصورات *représentations*) وار : برشی کوروب طوتویورم ،
 حواسمه اونی ادراک ایدیورم . صوکره او شیء تخطر ایدنجه عینی شکل اوزره
 تصور ایدیورم . نم بو احساسات و استحضاراتمه البته بر سبب اولق کرکدر ،
 اوتدنبیری واقع اولان ملاحظاتدن آکلاشیلدی که سببیت اعتقادندن وارسته
 اولق انسان ایچون محالدر . شو تقدیرده بو حادثات مغنویته سببی یا خارجده در ،
 یاخود بزم کندی نفسمزده در . خارجده دکل ایسه یا (عاقله *entendement*) مز ،
 ویاخود (ارادت *volonté*) مز بوکا سبب اولق لازمکلیر . عاقله مز سبب ایسه ،
 بز احساساتمز - دوشونمک سایه سنده - خلق ایدیورز ، دیمکدر . یوق ، اگر
 ارادتمز سبب ایسه ایستیورزده ایجاد ایدیورز ؛ دیمکدر . حالبوکه حقیقت ، نه
 اویله در ، نه ده بویله در . کاشنات خارچیه نک وجودندن بزی خبردار ایدن
 (مدرکات) حسیه و استحضارات ذهنیه مز ، عقل و ارادتمزه رغماً واقع اولویور .

مثلاً ، بن سوفاقدہ کیدرکن ، باشمہ دوشوبده جانمی یاقان کیرمید بارچه سند
 بنم عقل و ارادتمله نه مناسبتی وار ؟ . نه عقلمدن کچردی ، نه ده اوپله بر حادنه نک
 وقوعی مراد ایدہ بیلیردم . بونی بر استننا عد ایتمه ملی ..! کورمکله ، طوتمقله ،
 طاتمقله حاصل ایتدیکم ادرا کاندن عقل و ارادته تبری ایدوب قورتولمق ممکنمی ؟ .
 البته دکل ..! او حالده بو احساساتک سببی بنده دکلدرد ؟ مطلقاً خارجده در .
 او تقدیردهده یا (الله Dieu) دہدر ؟ یا خود - اللهدن ویزم نفسمزدن بوسوتون
 آیری بر شی اولماسی لازم کلن - (طبیعت la Nature) دہدر . فرض ایدہ لم که
 الله او لسون ..! اوپله اولونجه ، الله اونلری ، یا طوغرودن طوغری به خلق
 وابداع ایتمشدر ؟ یا خود - بزم طبیعتمه نسبتله بکعالی - بعضی اسباب طولایسیله
 خلق ایدوب طورمقدہ در . اکر محیحاً بویله ایسه ، بز ادرا کاتمزک اسباب
 حقیقیه سنی بوسوتون یا کلش تلقی ایدیورز ؟ هیچ اولمادق بر طرفده آبیورز ؟
 و هیچ بر وقت بولوب کشف ایدہ میه جکیز ؟ ایداً بویله کور کورینه آریوب
 طوره جفز و دائماً یا کیله جفز و ، الی غیرالنهایه آلدانوب قاله جفز دیمکدر ؟ ویزی الله
 آلداتمش اوله جقدر ، حالبوکه - ده ا بدایتده عرض ایدلیدیکی وجهله - کال مطلق
 عد ایتدیکمز الله بویله بر نیت اسناد ایتمک بوسوتون محالدر ، آلداتمق و آلداتمق
 اونک شانندن دکلدرد . شو محاکمه ایله ثابت اولویورکه کائناتک وجودندن بزی
 خبردار ایدن ادراکات و استحضاراتمزک سببی نه بزم کندی نفسمزدرد ؟ نه ده الله در ؟
 فقط عالم خارجی بی تشکیل ایدن اشیا و اجسامدر . دیمک که اشیا و اجسام ،
 مستقلاً موجوددر .]

بوسوزلری سویله بن و بو محاکمه لری یوروتن غالباً (عالم الہی theologien)
 ده قارتدر . مع مافیه بوراده یه قید و اشارت ایدہ جکمز بک مهم نقطه لر واردرد .
 اولاً ؛ ده قارت احساساتک باشلی باشنه بر حقیقت انفسیه تشکیل ایتدیکنه
 قناعت کوستریورکه بو ، (subjectivisme) ک اساسی و نقطه حرکتی اولان بر
 عقیده در ؛ و بوکون مرکس بو نقطه ده متفق در . ایستر (بارقله Berkeley) کی
 مفرط بر ایدہ آلیست اولسون ؛ ایسترسه (رید Reid) کی صریح بر ره آلیست
 اولسون ! .

ثانیاً بو ادرا کاتک حصولده عقل و ارادتمزک دخلی اودلایغنی ادعا ایتمکله
 (ایدہ آلیم) مذهبی قطعبارد و صراحاً انکار ایتمش اولویور . چونکه ادرا کاتمزک

کندی اثر ایجاد من اولمادینی ثابت اولونجه وجدانم خارچنده برشینک وجودی تحقیق ایدر؛ و بو اعتقاد صراحتاً بیان ایدله مش اولسه بیله ضمناً مسلم بولونور. حالبوکه ده قارتک بو خصوصده کی بیاناتی پک صریحدر. بوکون حالا بودعوا سورولویور و ده قارتک ابراز ایتدیکی نقطه اطرافنده مناقشه دوام ایدیور: [کیفیت ادرا کده عقل و ارادتمزك دخلی واری؟. یوقی؟.] ایشته بوکونچ مسئله حل ایدلمک ایسته نیلیور.

بو بابک بدایتده تعریف ایتدیکم وجهله (نه بیسته مولوزی) ده الک مهم مسئله لردن بری ده بودر. اگر ادرا کده ارادتمزك دخلی وارسه، کائنات حقنده کی معلوما تمزه بز- بالذات (بیچیم ویرمک faconner) ایله برشی دوشونویورز دیمکدر. بستیقولوزی واقعا بوکون ده قارته حق ویرمیور؛ اثبات ایدیورکه ذهنمز حین ادراک و احساسده عاقل طورمیور، بالعکس فعال بولونویور. حتی پک سریع (قیاس خفی) لر یاپه رق حکم ایدن عقمز دخی بویوک بر رول اوینویور. لکن ذهنمزك بوفعالیتی غیر مشعور قالدینی ایچون، بز بوندن خبردار اوله میورز. نته کیم بو بخی ایضاح ایتشدم. مع مافیه - بن امینم که - مفرط ایده آلیستلر، بستیقولوزی نك شهادتندن فضله معنار استخراج ایدوب یا کلش و حقسنز استدلالاتده بولونویورلر. ذهنمزك انهای ادراک و احساسده فعال بولونوب بولونما ماسی دعواسنک (وجود مسئله سی question ontologique) نه تعلقی یوقدر؛ و بناء علیه فعالیتی تحقیق ایتمکه عالم خارجینک وجودینی انکار ایچون صلاحیت قازانمش اولماز. یالکنز - کائنات حقنده - حاصل ایده بیلدیکمز معلوماتک (استحضاری representatif) اولماسی لازمکه چکی اکلایلیر. بونک ایسه برطرفدن (مطابقت adéquation) دیکر طرفنده (علم بلا واسطه con. immed.) و (علم بالواسطه con. mediate) دعوالریله علاقه سی واردر. بوتون بو خصوصاتده بستیقولوزینک عرض ایتدیکی معلومات آنجق سو-بوژه قیویز مه حق ویرر، ایده آلیز مه دکل؛ [ادرا کاتمزه ذهنمز فعال بولونویور.] دیدکدن صوکره [او یله ایسه معلوما تمزه بر بیچیم ویرن بز؛ اشیا دکل!] دیمک طوغرو اولور. بوکا بناء هم [معلوما تمزك حقایق اشیا به تطابق ایتمه سی لازم کلز]، همد [بز، طوغرو دن طوغرو به دکل آنجق محساکات و قیاسات خفیه واسطه سیله کسب علم ایدیورز.] دیه ادعا ایده بیلیرز؛ و بو ایکی ادعا یکدیگرینک سندی و متممی در. نهایت: [او یله ایسه حقایق اشیا بی بیه مه بز!]

دیه اعتراف عجز ایده رک (آغوستی سیزم) مذهبیه قانع اوله بیلیرز. لکن اوقدر! .
 بوندن ایلری واروبده کائنات ماده یی انکار ایتک و [ماده یوقدر ؛ بوتون بو
 احساسات و ادراکات بنم کندی عقلکم اختراعاتی، کندی خلیله مک مخلوقاتی در!]
 دیمک ایچون منطقاً مساع یوقدر؛ چونکه او مقدمات سلسله محاکمهی بو نتیجه یه
 ایصال ایده من. نته کیم قانت ، بو نتیجه یه کله مش ؛ بر مرحله اولکی حد اوزره
 طورمشدر .

ثالثاً : شایان نظر درکه ده قارت [احساساتمز طوغرودن طوغرویه اللهمن کلپور؛
 اشیادن کلپور ؛ طویغولرمزک (سبب یقین cause prochaine) ی مادیا تدر.]
 دیمکه خالق مخلوقاتدن آیری طومش وادرا کاتمز (انفسی subjectif) بوجود
 ویرمش ؛ ادرا کاتمزک سبیلری اولان مکونات خارجه یه ده (آفاقی objectif) بر
 وارلق اسناد ایتشدی. بونک اهمیت ی پک بویوکدر. چونکه (بانته نیزم یعنی وحدت
 وجود) اعتقادی رد ایتک دیمکدر . حالبوکه ده قارتک پیرولرندن (سبب نیوزا
 Spinoza) یه او فیلسوفک آجدیفی جیغیری تعقیب ایده رک وحدت وجوده قدر
 کیتمش ؛ و (مالبراننش Malebranche) نام باباس دخی ده قارتی رهبر ایدیمکله برابر
 هم بانته نیزم همده ایده آلیزمه دهنتی قایدیروب عاقبت استادندن آیرلمشدر. یاقینه
 کوره جکزر .

الحاصل ، ده قارت بوتون فلسفه سنی وجوه مختلفه اوزره عرض ایتش
 وهرکس اونک بر وجهه سنده کندی تمثال اعتقادی کوروب او نقطه نظر دن
 بر فرضیه معرفت وجوده کتیرمشدر . او سبیلهدرکه عینی منبعدن یکدیگرینه
 مخالف بر جوق جریانر صادر اولمشدر. یوقسه اونک عمده عقایدینه باقیلیرسه ،
 بوفیلسوف - سرویلیام هاملتنک تعبیرنجه - شبهه سز (ثنائیه طبیعی dualisme naturel)
 مذهبیه صراحتاً و قطعاً طرفداردر. حتی او فلسفه یه یکی بر شکل افاضه ایده رک
 تازم حیات ویرمشدر. اونک ایچون صحیحاً مجدددر .

ترتیب ایتش اولدوغی نظریه معرفتدن چیقان نتیجه اولیه اولدوغنده هیچ
 شبهه براقیور . ماده یه وروحه آیری آیری اینانیور. بونلری - مستقلاً موجود
 و یکدیگرندن ماهیتاً ممتاز - برر جوهر کبی قبول ایدیور . مع مافیه بوجوهرلر
 مطلقیت صفتی حائز دکدرلر . روح و ماده یکدیگری (تحدید limiter)
 ایدرلر ؛ دیمک که آنجق (اضافی relatif) معناسیله جوهر صاییه بیلیر . مع مافیه

جوهر ، بالذات قائم اولان بر شی در . الله هر شیئك اصل سبب وجودیدر . شو تقدیرجه كرك (اشیا choses) ، كركسه (ارواح les esprits) الله ایله قائم موجودات اضافیه دندر ؛ و محدود و منتهای درلر . بونكه برابرینه اللهه جوهر ديمك طوغرو اولماز . چونكه الله ایله اشیا آره سنده - حقیقت اعتباریله - هیچ بر مناسبت هیچ بر مشابته یوقدركه جوهر كلمه سی (علی وجه الاشتراك) براسم جنس اوله رق اولنرك هپسنه بردن اطلاق ایدیله بیلسین !..

فكرمزی (الهیات théologie) وادیسنه سوق ایدن بو ملاحظات غایت صریحدر ؛ وکال صراحتی ایله (ثنائی dualiste) در . (سیننوزا Spinoza) بو ملاحظاتك بر قسمی ، مبدأ اتخاذ ایدهرك فلسفه سی اواساس اوزرینه قورمشدر . لیکن ایکیك محدودنده قالمایه رق ارواح ایله اجسامی اللهك ایکی مختلف تجلیسی اولوق اوزره تاقی ایتمش و بر خطوه تفکرده (وحدت وجود) و وارمشدر . (مالبراناش Malebranche) دخی روح و ماده نك الله ایله قائم اولماسی اعتقادی اساس طوته رق خصوصی بر نظریه معرفت ترتیب ایتمشدركه بزم تصوف ایله نه یوزدن مناسبتی اولدوغنی بوندن براز سویله مشدم . [*] نته کیم یاقینده ده زیاده تفصیل ایدم جكم .

بوتون بو تفکرات و ملاحظاتك ، مابعدالطبیعیات ، الهیات و تصوف ایله یاقیندن علاقہ سی واردر ؛ فقط ، تجربه اصولی ایله صحیحاً هیچ بر تورلو مناسبتی یوقدر * چونكه ذهن بو طبقات افکاره تجربه ایله چیقامایه جنی کیچی چیقیدنی - فرض محال اوله رق - قبول ایدلسه بیله تجربه ایله کشف اولونه بیلیر هیچ بر حقیقت بوله ماز .

ده قارتی یالکز بو جهتمدن کوروب طانیانلر ، اونك اصول تجربیه ایله

[*] شرقك عرفای صوفیه سی میاننده بلکه اك بویوك موقع حیثیتی اشغال ایدن (شیخ الاکبر محی الدین بن العربی) دخی عینی سوزلرله بو بابده کی فکر و اعتقادی بیان ایتمشدی . ده قارتدن بر قاچ عصر اول کلوب کوچن بو صوفی شهر دخی موجوداتی ایکی صنفه آیرییور . کندی کندینه قائم و دائم اولان وارلقه (وجود حقیقی) ، (وجود ذاتی existence essentielle) دییورکه (وجود مطلق) و (حق) بودر . قیام ودوای ایچون باشقه بر سببه باشقه بر قوته محتاج اولان موجودیته دخی (وجود کیانی) ، (وجود ظلی) دییورکه عالم ارواح و اجسامك وارانی هپ بوقیلدندر ؛ اولنر شیخ اکبرك تعبیرنجه (آننجق اقامه جقله قائمدرلر) متصوفین عثمانیه دن بروسه لی اسماعیل حق (شرح حضرات خمس) نام رساله سنده بو فرق اوزون اوزادی به ایضاح ایتمشدر .

علاقه‌سی اولمادیغنه ، حتی او اصوله قارشی ارتجاعی برطور آلدیغنه حکم ایدر لر سه یا کلش اولماز. چونکه دکل ، او عصرده ، حتی بو عصرده بیله الهیاتک وتصوفک تجربه ایله هیچ برآلیشی ویریشی یوقدر. اونلرک اصولی بوسبوتون باشقه ، علومک اصولی باشقه در .

فقط - بدایت بچنده سویله دیکم کیی - برده ، بوتون حادثات عالمی میخانیک بر طرزده تدقیق و تعریف ایتک ایستهین ده قارت واردر که وقوعاتی تفسیر خصوصنده یالکیز اسباب متسلله آرامایی توصیه ایتش وهر تورلو (عوامل مافوق الطبیعه agents surnaturels) یی قطعاً حسابدن خارج طومتق لزومی اصول اتخاذ ایله مشدر. ده قارتک اثرنده ترقیات علمیه به زیاده سیله خدمت ایدن بوجهت اولمشدر. چونکه علمک حقیقتاً اصولی اودر .

غریبدر که ، مابعدالطبیعات دوشونجه لرندن فارغ اولوبده علم دائره سنه رجوع ایدنجه ، بو فیلسوف ، بعضاً او یله ملاحظات بیسان ایدیور که اونلری اوتکی فکر لریله توفیق ایده بیلمک قولای دکلدر. مثلاً : عالم مادی حقنده کی افکاری او قیلدنر :

جسم ایله (امتداد extension) ی برطوتویور. اوحالده مکان ایله جسم عینی شی اولمش اولویور. بوفکر ، بزه - اول امرده - یک غریب کورونور. نته کیم (لایب نیچ Leibnitz) . او یله کوروندو کی ایچون بو آلمان فیلسوفی ، اوفکری بر تورلو قبول ایده مه مش و مکان ایله ماده نك فرقنی کوسترمشدی : [مکان یالکیز امتداددر. حالبوکه ماده ده ابعاد نئه ایله برابر (مقاومت résistance) دخی واردر.] دیمشدی. [*] ده قارت (خلا vacuum) قبول ایده میور و بالنتیجه آتوملرک وجودینه ده اینانه میوردی. اونک اعتقادنجه ناقابل تجزی و (امتدادسز sans extension) عناصر ماده اوله مازدی. موجود اولان بر شینک مطلقاً قابل تقسیم اوله بیله جکنه قانع ایدی که باقیسه بو دوشونجه لر، ینه عقلیون اسلوبنجه تفکرایدن ریاضی ده قارتک فکر لریدر. اوسبیلله عالمده بوشلق اوله بیلمه سی امکاتی بر تورلو ذهنی آله میوردی. [بزه ده مکان وارسه ، اوراده جسم واردر ؛ هر طرف (مالی plein) در. بناء علیه مکان ، امتداد

[*] لایب نیچ مقاومت ده به جکنه (antitypie) دیوردی . کندیسنک اویدور مش اولدوغی بو کله نك اصطلاحده باشقه مناسی یوقدر. بو کله یکی برشی افاده ایتدی کی عینی معنایه موضوع اوله رق ذاتاً لسان ناسده باشقه برکله جاری ومشهور بولوندوغی ایچون او تعبیر غریب چارچاقو استعمالدن ساقط و متروک اولمشدر. قاموس فلسفه به باقیکیز .

امتداد ایتدیکی نسبتنده جسمیت دخی امتداد ایدر. مکانه حدود تعیین ایتک ممکن دکلدر ؛ او مطلقاً (نا محدود illimité) در ؛ ماده مکانک هر نقطه سنی املا ایتدیکی ایچون اوده عینی سبب وعینی صورتله نا محدوددر. کرك ماده کرك مکان مادامکه هیچ بر نقطه سنده بر بوشلق عرض ایتبور ، دیمک که بلا فاصله متایدرد . اویله اولونجه جسمیت (یکپاره و متادی برشی continuum) تشکیل ایدر ، اونک ایچون تورلوتورلو امتداد ، ویامواد اوله ماز . بناء علیه تورلو تورلو عوالم ماده دخی یوقدر . جهان مادی ، یالکز (تمتد étendu) در ؛ (نا محدود) در . و (بر un) در . (فکر pensée) دن ماعدا یالکز براوعالم مادی واردرد . [دیوردی . حالبوکه آلهیون طرزنده محاکمه ایدوب دوشونورکن ماده پیده روحی ده متاهی اولق اوزره قبول ایتشدی [*] .

بوملاحظه لریکنظرده عجیب کورونور و صحیح آده اویله در . مع مافیه بوکون (فیزیک) علماسنک (اثر ether) حقنده کی اعتقادی ده او نسبتنده غریب در . همه عینی دوشونجه در ؛ اوقدرکه زمانزده حکمت طبیعه نک فرضیه اساسیه سی تماماً ده قارتک فکریدر ؛ ده به بیلیم ! . اثر ، - علمای متخصصینک ضروری اولان اعتقاداتنه کوره - مکانی تمامیه طول دوران و بلافاصله تمتد اولقله برابر ، اجسامه و (ذرات Molécules) نفوذ ایدن بر ماده در ؛ هیچ بر نقطه سنده بوشلق اولمادی حالده (یعنی مکانی کاملاً املا ایتدیکی حالده !) اوقدر لطیف ، اوقدر نه لاستیقی ، یکپاره و (متجانس homogène) بر جسمدرکه نه ثقلی ، نه مقاومتی ، نه ده کثافتی واردرد . اوقدر جوال و سیالدر ! . ادنی درجه ده بویه بر طاقم (خواص propriété) ی اولسهیدی ، قیامت قوباردی . چونکه اونک ایچنده دور و حرکت ایدن اجرام سماویه - اثر ایله دلك و تماس ایده رک - نهایت سرعتلری ضایع ایدرلر و عاقبت جاذبه سببیه بر برلرینک اوزرینه دوشوب اوصدمه شدیده ایله طوتوشورلردی . حالبوکه هیچ اویله برشینک وقوعنه احتمال ویره جک ذره قدر اماره کوروله مه مش و حسابات ریاضیه ایله دخی بولونه مامشدر . چونکه اثر دیدیکمز او یکپاره و متجانس و نا محدود اولان جسم مفروض ، او قدر

[*] بوکون بعض مابعدالطبیعیون ، نامتاهی ایله نا محدود تعبیرلرینک معنایری برآز تفریق ایتک ایتبورلرسه ده ممکن دکلدر . نامتاهی دیمک نهایتمز دیمکدر ، نهایتمز دیمکده حدودسز دیمکدن عبارتدر . حالبوکه (مطلق) ایله (نامتاهی) فرقندر .

لطیف‌درکه عادتاً (هیچ) در. اگر (خواص میخانیکه propriétés mécaniques) سی صوک درجه‌ده اولماسه‌یدی، و بو سبیله هر حادثه کونیه‌یی تعریف ایچون لابد بر (وسط milieu) و بر فرضیه تشکیل ایتسه‌یدی!.. [*]

مع‌مافیه هر نه اولورسه اولسون - ایی دوشونولورده درت کله‌ایله ماهیتی بیان ایدلک ایسته‌نیلیرسه ده‌نیله بیلیرکه: [هر تورلو خواص میخانیکه ایله متکیف بر مکان تصور ایدیکیز؛ ایشته اثر اودر!..]

بو نامتناهی عمارت ایچنده (مادی و ثقیل matériels et pesants)، اجسام و ذرات یو وارلانونب طور و یور. ایشته بوفکر لر زمان‌زده تماماً معتبردر. حالبوکه بونلری - بو ترتیب اوزره ایلک اول دوشوننینه او (قوجه فرانسز) در؛ و بوتون بوشیلراثبات ایدیورکه حالا بو آدمک تأثیرات معنویه‌سی دوام ایتکده‌در. [**]
(مالبرانش)، (سپینوزا)، (لایبنیچ) کیی اک نامدار (قارته‌زیه‌ن Cartésien) لره کچمه‌دن ده‌قارت فلسفه‌سنگ پیوسته اولدوغی مزعج مسئله حقنده‌ده براییکی سوز سویله‌م‌لی‌یم:

بو فیلسوفک الله‌مدن ماعدا ایکی جوهر قبول ایتدیکنی و روح و ماده‌نک استقلال وجودینه بناء بر نظریه معرفت ترتیب ایدوب (ثنائیه dualisme) اعتقادنه قرار قیلدیغنی کورمشدک. بیلدورسکیزکه هر تورلو حادثاتی اسباب میخانیکه‌سیله تعریف ایتک اصولی جداً التزام ایدن بو حکیم عالم، آجدینی شو چیغیرده بوتون

[*] اثر، واقعا بر (فرضیه hypothèse) در؛ فقط علوم صحیحه و ثابت‌نک و بالجه اعتقادات مؤیده‌م‌نک زمین استنادینی تشکیل ایدن فرضیاتک هپسی کیی ضروریدر. واقعا بر چوق تناقضلرله مالی بر فرضیه‌در. مثلاً خارق العاده بر نه‌لاستیقیته مالک اولقله برابرینه یکپاره و متادی اولماسی کیی!.. فقط حادثات عالمک میخانیکیتی و قوای طبیعیه‌نک انتقال و فعالیتی تعریف ایدمیلماک ایچون (لابد indispensable) بر فرضیه‌در. فیزیقی علمی اوندن کچمه‌ور. کچرسه هیچ بر حادثه‌یی تعریف ایده‌میور.

[**] حتی اون طوقوزنجی عصرک نصف اخیرینه شرف و یرن ده‌اه علمادان مشهور (لورد کلون Lord Kelvin) آتوم نظریه‌سنه بدل (دواره tourbillon) نظریه‌سی ترجیح و قبول ایتش و بونکله بر چوق حادثاتی تعریفه چالشم‌شدی. بونظریه دخی اساساً ده‌قارتک‌در. اوندن صوکره آتوملرک بسیط اولمادینی (ئون Eons) و (تله‌کترون electrons) نظریه‌لرله ثابت اولدی. تحلیل طینی analyse spectrale) دخی بونظریه‌یی تصدیق ایتدی. بونلر هپ ده‌قارته حق و یربر.

علوم اربابی پیشنه طاقش سور وکله مشدی . بوجریان (ایجابیه determinisme)
 فلسفه سنه تقویت ویردی . پسیقولوژی مسئله لرنده دخی (میخانیکیه mecanisme)
 نظریه سنی موقع اعتباره کتیردی ؛ بناءً علیه (ارواحیه animisme) فلسفه سنی
 چوروتدی . چونکه ایکینسی یکدیگریله طابان طابانه ضد ادعالرده بولونورلر . [*]
 مع مافیه - اسکیردن بری معلوم اولوبده هیچ بر وجهله حل ایدیلهمه یین -
 بر معمایی یکی دن اورته یه آتدی که اوده (روح ایله جسمك مناسبت متقابلیه سی
 le rapport réciproque du corps et de l'âme) مسئله سیدر . فی الحقیقه بو
 اوته دنبری ذهنی عاجز براقان بر حادثه بدیهیه در ، کورویورز که بویه بر مناسبت
 وار ؛ فقط معقول بر صورتده بو بدیهیه یی تعریفه چاره بوله میورز . يك اسکي
 زمانلردنبری (روحیون les spiritualistes) ، ماده یی بوسبوتون عاقل برکته
 فرض ایدرک ، مستقل و عاقل بر روح ایله جسمك - بیلم ناصل ؟! - تحریک
 وتصرف ایدلمکده بولوندوغنی ادعا ایدوب طورویورلر . (مادیون les matérialistes)
 بالعکس روحك مستقل بر شی اولمایوب (فعالیت دماغیه activité cérébrale)
 نتیجه سند - یه بیلم ناصل ؟! - تجلی ایتدیکنی دعوان بر وجهله واز
 کچمیورلر . روحیونك نظریه سنی - بوخصوصده اك زیاده صلاحیتدار حکم اولان
 - (پسیقوفیزیولوژی Psycho-physiologie) هیچ طوتمویور ؛ حتی باطل بدیهی
 اونه رق رد ایدیور . ایتسه بیله اونظریه یه (کیفیت شعور) ی تعریف ایتش
 اولمازدی ؛ چونکه بدایت امرده - فضولی اوله رق - بر روح قبول ایدوبده
 اوکا عقل وشعور وادراك اسناد ایتدکدن صوکره احوال وجدانییه یی تعریف
 ایتک بر (دورفاسد cerele vicieux) اوزرینه مستند بر دلیل ایجاد واستعمال
 ایتکدرکه ، اصطلاحده (تصدر علی المطلوب petition de principe) دیه مشهور
 [*] بوراده (آتی میزم) دن مراد ، (میتولوژی) و (آنتروپولوژی) ده کی
 معناسی دکلدر . پسیقولوژیده کی معناسیدر ؛ یعنی [مادهك و جسمك بالطبع عاقل اولوب
 روح طرفندن کیف مایثا تحریک واداره اولوندوغنی ادعا ایدن نظریه] دیمکدر . بواءتقاد
 اربابك دستوری : (روح ماده یی تحریک ایدر Mens agitāt molem) جمله سیله ادا
 اولونور .
 (میخانیکیه) دهواسی بونك تماماً ضدی در .

اولان برهان سفسطی بودر . بوتورلو برهان ایله هر شیئی تعریف ایتک قولایدر . [*]

مادیونک نظریه سی واقعا بسیقوفیزیولوژی به اویغون دوشویور ؛ لکن (شعور conscience) ك نظامی ایچون لازم اولان بعضی (شرائط غریزه conditions physiologiques) بی کوسترمکه قالیور . فقط بالذات وجدانك ماهیتی حقیقه هیچ برشی سویله به میور . حتی زردن و ناصل پیدا اولدوغنه دائر بر فکر ویره میور . هر حالده بر طاقم ایضاحات ایله بو کیفیتی تعریفه چالیشیور سه ذره قدر ذهنی اقتضای ایدمك قوتی حائز د کدر . چونکه سفسطه اوزرینه مبنی اولدوغی ظاهر در . باقیکنز نیچون :

اگر عناصر مادی به اساساً و بدایتاً قابلیت شعور اولمایوبده اولنرك بالاخره تركب و (تعضی s'organiser) ایتمه سی و فعالیت کلمه سی سایه سنده پیدا اولویور سه ، بو بر تعریف معقول صایله ماز . زیرا عناصر اساسیه ده موجود اولمایان بر شینك تركیبانده وجوده کلمه سی ، هیچ یوقدن وارا اولماسی دیمكدر كه بونی قطعياً عقل قبول ایتمز . ایتسه بیله هر حالده شعورك ینه صورت تولد و نشأتی آیریمجه تعریف ایتك اقتضایدر . یوق اكر ، [ذاتاً عناصرك هر برنده ، مثلاً هر آتومده بر آز شعوره قابلیت واردی ؛ او آتوملرك تركبی ایله حاصل اولان روح ، ایشته او اجزای شعورك (محصله سی la résultante) در !] ده نیله ك اولور سه ، او وقت ینه بر دور فاسد اوزرینه بر محاکمه قورلمش و (تصدر علی المطلوب) صورتیله استدلال ایدلمش اولور . او حالده دخی (ماده غیر عضویه matière inorganique) بی ذی حیات و ذی شعور اوله رق قبول ایتك لازم کیر كه بوده سر حیات و شعوری ذره قدر تعریف ایتمز . زیرا انسانده شعورك موجودیتی

[۹] محرر مشهور (مولیهر Molière) ك بونوع برهان سفسطی بی استحقاقاً سویله دیکی سوز و کتیردیکی مثال هیندن کوزلدر . تیارولرینك برنده (آفیون نیچون انسانی او بوتویور ؟) . سؤاله قارشی علمای زمانه [چونكه اونده بر خاصه منومه وار !] دیمكده مسئله بی حل ایتمش اولدولرینه قاعت کتیریورلر . حالو كه بوجواب ، سؤال مذکور ك عینی در ؛ زیرا [آفیون انسانی او بوتویور] دیمك ، [اونده بر خاصه منومه وار] دیمكدر ، اصل حل ملزم و مطلوب اولان معما او خاصه ك نه دن عبارت اولدوغنی كشف و ایضاح ایتكدر . بته علیه سؤال او خاصه به متعلق و جواب دخی ، عینی سؤالك اعاده ایدلمسندن عبارت بولوندوغندن ، هیچ برشی سویله نلمش اولویور ، یا کتر اثباتی مطلوب اولان مسئله ، کندی نفسنه دلیل اوله رق ایراد اولونمش بولویور .

بدهاتاً ثابت ایکن تعریفده امکان کوروله مه دیکی حالده ، قطعاً اثر حیات و شعور عرض ایدمه مهین مواد معدنییه اویله بر شی عطف ایدوبده صوکره اونی تعریفده چالشق البته دهامعقول دکلدر. زوزک بردوشونجه در ؛ بویله هر مسئله قولایجه حل اولونه بیلیر .

بناءً علیه ، بو نهج نامعقول ایله شعور مسئله سی - فی الحقیقه - حل ایدلمش اولموبور ؛ یرینی ده کیشدیرمش اولوبور : بزم جسممزه روح ندر ؟.. سؤاله قارشى هیچ بر شی دهیه میوبده او معمای روحی ، جسممزه عناصر ابتدائیه - نه ارجاع ایتک ، مسئله یی حل ایتک دکل ، جسمدن قالدیروب عناصره کوتورمک یعنی - بهوده یره - موقعی ده کیشدیرمک در. اوتقدیرده مشکلات ایکیله شیر. چونکه اولا ده میر ، کومور ، کوکورت کیی عناصر بسیطده قابلیت شعور اولدوغنی اثبات ایتک لازمکیر. فرض محال اوله رق بویله بر شی اثبات اولوندقدن صوکره ، اولکی سؤال ینه کلیر ، قارشیمزه دیکیلیر : [یک اعلا ، شیمدی عناصرده وجودی ثابت اولان بوروح ندر؟. نره دن کلشدر ؟. ومواد سائر ایله تماسندن نه وجهله ونه سببله شعور حاصل اوله بیلیر ؟] دیه ینه صوره بیلیر. بو حقمز باقی در؛ چونکه مسئله اصلیه ماده ایله روحک مناسبتی در وهنوز حل اولونما مشدر. [انسانلر ، یک چوق دفعه لر ، حل ایدمه مدکلری مشکلاتی - هیچ اولمازسه بر آزرکری به تهرک - ذهنلرندن تبعید ایدیورلر وبو سایه ده فکرلرینه بر ساحه جولان آچیورلر. تاریخ فلسفه ، بونی یک واضح بر صورتده کوستریور. بو عادتا (یولمزه اوکنده طوران وایلری به حرکت مزه مانع اولان بر طاشی یرندن بوسبوتون محو ابده میوبده بر آزدها کری به ایتهرک کند مزه بر میدان آجامزه) بکزر. بونی بر (صورت حل) فرض ایتکه میالز. نته کیم بو مسئله ده دخی اویله اولمشدر. روح مزله جسممزه مناسبتنه دائر ذهن مزه معروض اولان معمای - اولدوغنی شکل اوزره - حل ایدمه نیجه ، عناصر جسمانییه حیات و شعور عطف ایدبویروب ، او مزعج بیلمه جه یی حل ایتش اولدوغزه قناعت کتیر مشر. ایشته بو (بهوده فرضیه) به (hylozoisme) دیرلر. [*] کیفیت شعور

[*] (hylo) ، یونانی ده (ایلی) لفظندن ، (zoisme) دخی (زوئی) کله سندن کلیر. برنجیسی (ماده) ، ایکنجیسی (حیات) دیکدر. ترکیبک معنایی : (ماده به اسناد حیات ایدن) مسلک یاخود فرضیه دیک اولور .

بخشنده ، ماتریالیزم ، صیقینتی به اوغرادینی کیمی بو فرضیه به قاچبور . او فرضیه دخی کندی کندینه یاشایه مایوب نهایت ینه ماتریالیزمه منجر اوله جق صورتده انحلال ایدیور .

ذهنک بوتون بو چیرپنمه لری (ثنائیه) اعتقادیه قناعت ایدمه مه سندن ایلری کلیور . عقلمز وحدته متمایدر . ثنائیه اعتقادنده دخی اک زیاده صیقینتی بی موجب اولان جهت ، ماهیتاً بربرینه هیچ بکزمه مین ایکی جوهرک : ماده ایله روحک مناسبتی و تأثیرات متقابله سی در . یکدیگرینه فطرتاً یابانجی اولان شیلرک مناسبتی غالباً قبول ایدمه میوز . حالبوکه بو بحثک بدایتده (آمپه دوقله س Empédoce) ک بو فکرینی استخفاف ایتشدک . بن ظن ایدیورم که باطل کوردو کز او فکرک حالات تحت تأثیرنده بولنه رق دوشوندو کزدن بک خبردار دکز !..

ده قارت ، ثنائیه حدنده قالمای ترجیح ایتشدی . فقط بو وضعیتی (روح ایله جسمک مناسبتی) نی ، اک دهم و مبرم بر مسئله فلسفیه اولق اوزره ابراز وانظار دفته عرض ایتشدی . حل اولونه جق باشلیجه معما بو اولمشدی . جداً دخی اویله در ؛ چونکه (نه پیسته مولوژی) نک بوتون مسائلی اوکا راجع ومنجر اولور . شعور ، ادراک کندی نفسمزک عالم خارجی ایله تماسه کلمسندن حاصل اولمویورمی یا ! . آرتق احوال وجدانیه و حادثات معنویه نک کافه سنک منشائی او تماس و او مناسبتدر .

ده قارت هر نوع حادثائی ، سلسله اسبابی ایله تعریف ایتک اصوله فوق العاده بر رواج و اعتبار ویره بیلدیکی ایچون ، بو مسئله حضورنده تماماً بر (فیزیق physique) عالمی وضعیتی آلمش بولونویوردی . بو نقطه نظردن حرکت ایتدی ؛ قطعاً او یولدن آیرلادی ؛ نتیجه ده (میخانیزم) مسلکته واردی .

ایکی نوعه آیردینی جوهر اضافی نک بریسنه (ens cogitans = دوشونن جوهر) ، یعنی روح ؛ دیگرینه دخی (ens extensa = تمتد اولان جوهر) ، یعنی ماده دیمشدی که بو تعبیرلر ، (قارته زیانیزم cartésianisme) ایله برابر ایجه بر زمان یاشادی .

لکن ، ده قارت موجودات عضویه بی منحصرأ میخانیک بر نقطه نظردن تقدیر وتلق ایتکله ، عادما قورولمش بر ما کنه کیمی کوروپوردی . حیرت بخش

اولان بو خارق‌العاده ماکنه ، (گندی گندینه automatiquement) حرکت ایدیوردی. قورولمش بر ساعتدن هیچ فرقی یوقدی. فیلسوف بو تشبیهی بالذات قوللانیور ؛ بافیکیز نه سویله یور :

(بلا سبب معقول (sans raison) ظن اولوندی که بزم حرارت غریزه من، جسممک حرکاتی روحه تابع در ، و اوندن کلیر. [*] ذی حیات بر آدمک وجودی ایله ئولمش بر آدمک وجودی آره‌سندمه‌کی فرق ، قورولمش بر ساعت و [یاخود باشقه بر (منساق automate) یعنی گندی گندینه ایشله‌ین بر ماکنه] ایله قورولماش بر ساعت آره‌سندمه‌کی فرق کیی در . ساعت قورولمش اولوبده حرکات جسمانیسی ایچون اقتضا ایدن (مبدأ principe) ی گندمه بولونجه ، ایشله .! چونکه فعالیت کله‌یلمه‌سی ایچون لازمکن بالجه شرائطی جامع اوله‌جق صورتده یاییلمش و ترتیب اولونمشدر. فقط عینی ساعت - و یاخود سائر هر هانکی بر ماکنه - قیریلنجه ایشله‌یه من ؛ چونکه او مبدأ حرکت ، آرتق اجرای تاثیر ایده من اولور .]

دیمک که ذی حیات بر انسان و یا حیوان - آلات و اقسامی تام و اویغون - قورولمش بر ساعتدن فرقی دکلدر. ئولمش بر انسان و یا حیوان دخی - قیرلمش ، بوزولمش بر ساعتدن فرقی دکلدر .

ده‌قارتک بو سیاق نظری دور اخیر ماتریالیستلرینک تعقیب ایده‌جکلری یولی کوسترمشدر. بونی پک اینی آ کلاویه‌یلیرسکیز صانیم . زیرا کورویورسکیز که ایشی بوتورلو تعریف ایدنجه اول امرده (ارادت volonté) انکار ایدلمش و (ایجابیه déterminisme) مذهبی قطعاً و صراحتاً تصویب و تصدیق اولونمش اولویور. روحه‌ده لزوم قالیور ؛ چونکه روحک لزومی ارادتی و شعوری تعریف ایچوندن ؛ قورولمش بر ماکنه کیی ایشله‌ین بر جسمده ارادت اوله‌ماز ، ارادت روحک اک بویوک واک صاغلام دلیلی در. بلکه (شعور اوله‌یلیر!) دهنیلسه بیله اثباتی و تعریفی پک کوچدر. واقعا ده‌قارتک بو فکرلرینی قبول ایتسه‌ک دخی ، [ذی حیات اولان او (انسان - ماکنه‌سی) نی قوران کیمدر ؟ ..] دیه دوشونمک

[۹] ده‌قارت بوسوزلریله (آنیمیزم animisme) اعتقادنی قطعاً و صراحتاً رد اتمش اولویور. یوقاریده عرض ایتدیم که ایرواحیونک اعتادی (روح ماده‌یی تحریک ایدرا .) دستورینک ادعای ایدی. حالبوکه ده‌قارت بو ادعای قطعاً چوروتویور .

مجبوریتدن قورتوله مایز!.. فقط ده قارت او سؤاله بر کله ایله قولایجه جواب ووروب کیور: (الله!) دیور. شو تقدیرجه الله بدایت امرده خارق العاده برما کنه ایجادایتدن صوکره اونق قوروب بر اقیور. اوما کنه قیریلوب بوزولونجیه قدر، یاخود زه نبره کنک قوه محرکه سی توک نتیجه قدر ایشلیوب نهایت طور ووروب؛ دیمک در. نه دیسه که اراده، شعوره لزوم کوستره بیله جک بر جهت بوله میور. بو (میخانیکیت نظریه سی) نه، ارادت قطعاً تعلق ایده میور؛ چونکه صراحتاً اونکله متناقص در. شعور، اوکا تماس ایتمه رک اوستنده طولاشیور. (فکر الوهیت *l'idée de Dieu*) ایسه اوکا آنجق - تعیر معذور کورولسون! - پاموق ایپلکی ایله باغلی در. زیرا (اوما کنه نی الله یادی!) ده یه جکنه (طبیعت یادی!) تصادف یادی؛ قوای طبیعی که ایجابیله عناصر ترتب ایدوب، بویه کندی کندینه ایشله مکه قابل بر ما کنه وجوده کتیدی!) دینلر اوله بیلیر. ایشه او پاموق ایپلکنی قوپاریور ویده بویه دینلر ماتریالیستلر اولمشر.

اونک ایچون - نروع اعتباریله - اسکی نه یکوریزم اعتقادندن فرقلی اولان زمانمز ماتریالیزمنک ده منشأی ده قارتک (میخانیکیت نظریه سی) در؛ ده یه بیلیرم. حتی اون سکزنجی عصرک الک معروف ماتریالیستلرندن (دولامه تری *De Lamettrie*)، ده قارتک فکرلرندن ملهم اوله رق (انسان - ما کنه *l'homme-machine*) و (انسان نبات *l'homme-plant*) نامیله ایکی اثر یازمش و حیات و حادثات مغنوبی صرف میخانیکی بر صورتده تعریفه کیریشمشدی که بوتون بو وقایع نیم دیدکلریمی بارلاق بر وجهله اثبات ایدر. ذاتاً مورخین فلسفه که یک چوغی بوطنه مائلدر.

ده قارتک ثنائیه حدنده قالماسی بوکا سبب اولمشدی؛ چونکه روح ایله جسمک مناسبت بدیهه سی - بوسبوتون کوزه چارپه جق بر صورتده - ابراز ایتمکه برابر تعریف ایتوب بر اقیوردی. حتی بو مناسبتک ناصل تأسس ایده بیلدیکی و ناصل ممکن اوله بیلدیکی آکلاشلق ایچون هر کسدن زیاده ده قارتک فکری صورولمش ایدی. فقط فیلسوف بومزعج سؤاله جواب ویره مدیکی ایچون مسئله یی بر طرف ایدیور. (پرنسس نه لیزابت *Princesse Elisabeth*) . بو خصوص ایچون یازدینی بر مکتوبده:

[غیر جسمانی اولان روحک، جسمی تحریک ایده بیلدیکنی قبول ایچون نه بر

طرز استدلال وار ؛ نه‌ده باشقه شیلره قیاساً اونی بزه اوکرمه بیلجهك بر بول وار ؛ مع مافیه بوندن شبهه ایدمه‌یز ؛ چونکه يك قطعی و يك بدیهی بر طاقم تجربه‌لر بونك بویله اولدوغنی (یعنی جسمك روح ایله متحرك بولندوغنی .۱) بزه هر کون آچیقدن آجیغه بیلدیریور . بو مناسبت بزه بالذات معلوم اولان شیلردندر . بناءً علیه ، اونی باشقه شیلره تعریفه قالدیشوبده بوسبوتون اغلاق وتشویش ایتمك ایچون چوق دقت ایتمه‌لی‌یز .۱] وصوکره :

[جسم ایله روحك مناسبتی نه‌در ؟ . بونی بیلمك ایچون ، یاشامالی‌در و بو مسئله‌ینی دوشونمكدن توقی ایتمه‌لی‌در .۱] دییور . مع مافیه بعض یرلرده بو مناسبت متقابله‌نك طوغرودن طوغرویه وقوعنه اینانیور .۱

آکلاشیلدورکه بومسئله ، مدهش بر معمار ؛ وده‌قارت اونك بویله اولدوغنی هر کسدن ایی بیلدیکی ایچون یرندن قیمیلداتمق ایسته‌میور . کندیسینی بوخصوصده تعجیزایدوبده بیان فکر مجبوریتنده براقیرلرسه ، او وقت خیلی متناقض شیلر سوبولیورکه اونلری ایضاح ایتك بوراده ممکن دکلدر . یالکیز بر سوزی وار ونبجه يك طوغزو کورونور :

[بو مناسبت کندی کندینه بر مسئله‌در . نه (فکر مفهومی notion de la pensée) ایله حل اونه‌بیلیر ؛ نه‌ده (امتدادینی مکان و ماده étendu) مفهوميله .۱ . آنجق (مشتهیات appetits) و (احتراصات passions) ده بونك مفتاح حانی آرامالی‌در .] دییور .

ومسئله حل اولونمامش و فقط واضح ومعین بر شکل آلمش اولدوغنی حالده اویله‌جه‌قالیور . آرتق بو بویوك فیلسوفك معقلری ، اك اول اومسئله‌یه صاناشیورلر ؛ هر بری بر طرفه چکیور و بر مسلك یاییور . شیمدی اونلری يك مختصرجه کوزدن کچیریز ؛ وبوقدر جقله اکتفا ایدر ، نه دیدیکمی آکلار سکیز ؛ چونکه بوتون او فکرلرک منبعی ایجه آچوب سزه کوستردم .

(مالبرانش) اولاده‌قارتك تکمیل فکرلرینی قبول ایدیور ؛ طبقی اونك کچی دوشونمکله ایشه باشلیور : روح ایله ماده‌نك جواهر مستقله‌دن اولدوغنی وفطرتاً یکدیگرینه هیچ بر وجهله بکزمه‌دیکنی بدایت امرده اساس اتخاذا ایتدکدن صوکره (معرفت) مسئله‌سنی بو اعتقاد اساسی‌یه تطبیق ایدرک حلی چاره‌لرینی آرییور . بویله یکدیگریله اصلاً و قطعاً بروجه مناسبتی اولمایان ایکی شیدك

تمامی ناصل اولورده علم حاصل ایدم بیلیر؟ روح ماده نك وجودنی بداهتاً بیلور!..
بو ناصل ممکندر...؟

[جوامر مستقله دن برینی (متمد) ، دیکری ده (متفکر) در. امتداد قابل
انقسامدر و اقسامی جمع و فصل اولونه بیلیر. مکانه متعلق اولان تحولات و نسبتلر بو
صورتله وقوعه کلیر؛ و طاقم طاقم حادثات منتظمه تشکیل ایدر. اقسام ماده نك
طرز ترتبی (شکل forme) حصوله کتیریر. اقسام مذکورده نك فضا ده تبدلی
(حرکت mouvement) صورتنده اولور. شو تقدیرده کوره امتدادک باشلیجه
تحولاتی آنجق شکل و حرکتدر. روحده حاصل اولان تغییرات ، اولا (فکر
idée) و (آرزو désir) نکلنده کورولور. فکر دخی اوچ وجهله جلوه نمون
اولور: (ادراکات حواس perceptions de sens) ، (تخیل imagination) ،
و برده (عقل صرف raison pure) !.. آرزو ، (تمایلات inclinations) و
(احتراسات passions) شکلنده تظاهر ایدر. بو درجه تحولاته معروض و مستعد
اولان معلومات بشریه ایله حقیقت اشیا به ناصل کب اطلاع اولونه بیلیر؟. البت
خارجده متمد (یعنی ابعاد ثلاثی حائز!) و مستقلاً موجود اولان برشی ، شو
تغیرات معنویه مزك ایجابنه کوره ده کیشمز. عقل و فکر مزك ، ادراکات و تخیلات مزك ،
تمایلات و احتراصات مزك عینی ده اوله ماز. حالبوکه بز اشیا یی بو (وسائط علمیه
moyens de connaissance) ایله بیلوروز. دیمک که ایدم باشنده برخطایه دوشو یوروز.
بر شیتی حقیقتاً بیلیمک ، او شیتی اولدوغنی کیی بیلیمکدر. اونك طبیعت و ماهیت
ذاتییه سنه یا بانجی اوله رق - کندی عقل و حس و خیال مزك - ذات اشیا به ضم و علاوه
ایتدیکی شیلر ، فضلده در؛ اصل بز خطایه دوشورن ویر (شعبده illusion) یه
قربان ایدن او شیلر در. دیمک اولویورکه بز اشیا یی حواسمز و یا خود منجیله مز
واسطه سیله تلقی ایتدی کمز زمان اونلری - حد ذاتنده en soi یعنی نفس الامرده -
اولدقلری کیی بیلیمش اولویوروز؛ بزه تأثیر ایتدکلری صورت اوزره بیلوروز.
هله احتراصات و تمایلات مزك شدتله تحت تفوذنده بولوندوغمز زمانلر حقیقت اشیا به
مطلع اوله بیلیمک قابلیتی بزده بوسه بوتون آزالمش اولور. او یله بر حالت روحیه
انساننده ، بز ، برشیمک - کندنجه - ناصل اولدوغنی دکل ، اوکا قارشی بزم نه
صورتله متحس بولوندوغمزی ، اونی ناصل تلقی ایتدی کمزی و حیات مزك نسبتله نه
قیمت ویره بیلدی کمزی آ کلامش اولوروز. بناء علیه حواسمز و منجیله مز و تمایلات

واحتراصاتر واسطه سیله آله بیلدیکمز معلومات ، آنجیق اشیانک بزمله واقع اولان مناسبانه دأردر؛ حقایق وطبیعه هیچ بر وجهه تعلق ایده مز. (نهایت تحلیلده en dernière analyse) ، بزم آنجیق کندی تغیرات وحالات روحیه مزدن خبردار اوله بیلدیکمز ثابت اولویور. بونکله برابر بزده وقوعه کلن بو تبدلات مغنویه یی - همه حال - بر سیبه اسناد ایتک مجبوریتدن قورتوله مادیغمز ایچون ، عینی زمانده ده ، عالم خارجی ده بعض شیلرک - علی الاطلاق - موجود اولماسی لازم کله جگنی تسلیم و اذعان ایتش اولویورز .]

شیمدی (مالبرانش) ک پک جدی اولان شو ملاحظاتی کوستریورکه بوآدم ، وسائط علم بحثنده (ملکات faculté) مزک هیچ برینه قابیلترندن زیاده قیمت ویرمه مش ، امید باغلاماش . بونلرله حقیقت اشیایه مطلع اوله مایه جغمزی صراحتاً ادعا ایتش . او واسطه لرله حاصل ایده بیلدیکمز معلوماتک منحصرأ احوال روحیه مزه عأد اوله سیله جگنی وحقیقت اشیادن برشمه علم سیله ویره میه جگنی پک ایی آکلامش وپک کوزل سویله مش ؛ یعنی (اضافیت علم relativité de la conn.) عقیده سنی متین اساسلر اوزرینه بنا ایتشدر . براز صوکره کوره جکزکه (قانت) وامثالنه بوخصوصده تقدم ایله مشدر . فقط (عقل صرف) حقنده دخی مالبرانشک فضله برامیدی یوق . بائیکز ناصل دوشونویور :

[حس ، ادراک ، خیال ، تمایلات واحتراسات کیی وسائط مناسبتدن وآلادن معرا اوله رق (روح صرف esprit pur) ، ماده مستقله دن هیچ بر صورتله خبردار اوله ماز . طبیعت ذاتیه لری اعتباریله بو ایی جوهر مستقل یکدیکرینه تماماً ضد اولدقلری ایچون آرهلرنده هیچ بر مناسبت هیچ بروجه اشتراک یوقدرکه بر برینی سیله بیلسینلر . یالکز ملکات روحیه مز آرده واسطه اوله بیلیور ؛ فقط او سایه ده دخی ماده نک حقیقت ذاتیه سنی دکل ، آنجیق بزه صورت تأثیرنی اوکره نه بیلیورز . یعنی محضاً کندی احوال روحیه وتغیرات انفسیه مزدن خبردار اوله بیلیورز . ایشته اوقدر !...]

آکلیورسککزکه بوتورلو دوشونمکله (مالبرانش) ، (آمپه دوقله س) ک پرنسپینه پک زیاده قیمت واهمیت ویرمش اولویور . یعنی (یکدیکرینه بکزمه یین شیلر آرهنده مناسبت علمیه اوله مایه جفی) نه کمال قوت واطمئنان ایله اینانیور .

فصله اوله رق ، بو نقطه ده ده تارتدن ده برآز آریلیور ؛ چونکه حقیقت اشیایه مطلع اوله بیلیمک قابلیتینی عقل صرفه دخی ویره مبور .

بیم تقدیرجه مالبرانشک مسلکی اصل بو نقطه دن باشلار ؛ وعینی زمانده راسیونالیزی وسانسو آلیزیمی انکار ایتسکه ماشلار . کرک ملکات حسیه ، کرکه ملکات عقلیه نک بزه ویردیکی علم ، کندی کیفیات وجه انیه مزدرد . یالکیز ، بو احواله برطاقم سبیلراولماسی لزومی ده بیلدیریور . او حالده مالبرانش ، نظردقتی اسباب خارجه یه یعنی مادیات عالمه توجه ایدوب برده او استقامنده دوشونویور :

[کائنات ماده نک بزه معلوم اوله بیلن طبیعت اصلیه سی (امتداد extension) یعنی ابعاد ثلثیه قابلیت در . او - ببله درکه (انقسام divisibilité) و بناء علیه بر شکل معین آلمه وحرکنه دخی استعدادی واردر . اجسام تحریک ایدیله بیلیر ؛ فقط کندی کندیلرینه حرکت ایده مزلر ؛ ارادتلری یوقدر . البته اجسام (قوای متحرکه forces mobiles) صایله ماز . اونلر ماده در . مکان وامتداد کلنجه ، اوده قوتدن بری و محرومدر . لکن ، باقیلسه . دیات عالمده وقوعه کلن بالجمله حادثات ، حرکاته منجر اولور . هیچ بر جسم حرکت حصوله کتیرمک اقتدارینی حائز دکلدرد . یعنی هیچ یوقدن حرکت یاراداماز . او یله اولونجه هیچ بر جسم ، حرکتک (علت موجب cause efficiente) سی دکلدرد . حالبوکه بزه اجسام انجق حرکتلریله اجرای تأثیر ایده بیلیرلر . دیمک که بز - یا کلش اوله رق ؛ - او تأثیراتی اجسامه عطف واسناد ایدیورز ؛ چونکه حرکتک اسباب حقیقیه سی اونلر اولمادیفی حالده اونلردر ظن ایدیورز . مادام که ماده تمامیه (عاقل inerte ، inactive) در ؛ و (قدرت وقوت énergie) دن کاملاً محرومدر ؛ او یله ایسه روحزه هیچ ر وجهله تأثیر ایده مز . چونکه کندی کندینه حرکت . مقتدر دکلدرد . بناء علیه روح ده حاصل اولان تغییراتی ایقاع ایدن بالذات اودکلدرد . مادام که کائنات ارواح ایله اجسامدن مرکب و بویکی تورلو وارقلردن عبارتدر ؛ و مادام که بو ایکی جوهرک - مغایرت طبیعت اقتضا سندن طولایی - یکدیگرینه اجرای تأثیر ایده بیللملری ممکن و متصور دکلدرد ؛ او یله ایسه واقع اولان تأثیرات متقابله کرک روحز ، کرکه ماده (علت حقیقیه و فاعلیه cause réelle et actuelle) صایله ماز . اونلر انجق (وسیله) در . اصل اظهار قدرت و اجرای تأثیر ایدن

سبب بوسبوتون باشقه در : (الله) در. قدرت ذاتیه سی اظهار ایتک ایچون ارواحی ده اجسامی ده واسطه و وسیله اوله رق قوللانیور.

ایشته (پاپاس مالبراناش Le père Malebranche) بو مهم دوشونجه لری و بو استدلالیله (théorie des causes occasionnelles) نظریه مشهوره سی تأسیس ایدیورکه (اوق قازیونالیزم occasionnalisme) نامیله تاریخ فلسفه ده مشهور برمسلك مخصوصك اساسی تشکیل ایدر .

بزم تصوفك نظریه معرفتیه بونك نه قدر تطابق و توافق ایتدیکنی کوسترمك ایچون ، براز دها تفصیلات ویرمکه مجبورم :

مالبراناش ، اجسامك ایقاع حرکته مقتدر اولمادقلرنی - بروجه مشروح - اثبات ایتدکن صوکره روحك بلکه تحریک مادهیه مقتدر اوله بیله جکنه دائر خاطره کله بیلن ایکنجی بر احتمالی ده رد ایدیور. یعنی (روح مادهی تحریک ایدر Mens agitāt molem) دعواسنی ده جوروتهرک (آنیمیزم animisme) اعتقادی ابطال ایدیور . باقیکنز فاصل دوشونویور ، فاصل حکم ایدیور :

[ماده روحه نه قدر یابانجی ایسه ، روح ده مادهیه فطرتاً اونستبدنه بیگانه در. انسان بوایکی جوهردن مرکبدر . فقط ترکی ایچون ذاتاً قوت و قدرت لازم ؛ بناء علیه بوایکی جوهری ترکیب ایدوبده انسانی وجوده کترین قوت و حرکت انسانه مقدم در. باشلی باشنه نه روح جسمه تعلق ایده بیلیردی ؛ نه ده جسم روحی بولوب اونکله برلشه بیلیردی . بونلری البت بر (برلشدیرن) واردر . بناء علیه انسانك علت وجودی نه (طبیعت Nature) ده یعنی مادیات عالمده ، نه ده کندی روحنده آرانیلی در . انسانك ارادی ، هیچ بریشی تحریک ایده من . بوتون ارادتمزده وحرکاتمزده سبب حقیقی الله در .]

بوراده مالبراناش ارادت و جبر مسئله لرینه بالضروره تماس ایتش بولونویور ؛ وتماماً (جبری) کیبی حکم ایدیور . (ارادت) دیدیکمز قابلیت ایله حرکتمز آرمسده یالکنز بر (توافق و اتفاق connection) وار ؛ (رابطه علیت rapport de causalité) یوق !. دیور. شوتقدیرجه کندیتمزده حس ایتدیکمزاردات، افعال وحرکاتمزك سببی اولمش اولویور؛ افعال وحرکاتمزله مترافق دیگر برحادثه معنویه اولویورکه هر ایکیسنك ده منبئی و مصدری - طوغرودن طوغرویه دکل - فقط روح و جسم واسطه سیله ، الله در .

واقعا بن مثلاً : قولی بر استقامت مخصوصه اوزره تحريك ایتك ایسترم و همان او حرکت حصوله کلیر ؛ فقط اگر بنم بوارادتم حرکتیه سبب اولسهیدی ایکیسنگ آره سنده : (علاقه واجبہ connection nécessaire) اولقی لازمکلیردی؛ چونکه رابطه علینده اولیه بر (حیثیت وجوب) واردر . اولیه اولونجه دخی بز او علاقینی بیله بیلیردک؛ و بوتقدیرده دخی حرکت - بالواسطه اولسون بلاواسطه اولسون - ارادتمزه تابع واوندن صادر اولمش اولوردی؛ بناءً علیه اوکاشعورمن اولوردی. زیرا ارادت دائماً مشعوردر. اگر حقیقت حال صحیحاً بویه اولسهیدی بز ، ارادتمزله حرکاتمز آره سنده کی رابطهیی دهـا زیاده آکلادجیه دهـا چوق حرکت ابداعنه قادر اولوردق. اوزمان (بر مشرح anatomiste) - ایستبنجه - اک قوتلی پهلوان اوله بیلیردی. حالبوکه هیچده اولیه دکلدر .

واقعا ظاهر حاله نظراً ایسته دیکم زمان قولی قیمیلداته بیلورم؛ او تقدیرده ظن ایدیورم که اصل سبب حرکت ، بنم کندی ارادتمدر . حالبوکه اشیاى ماده تصادم ایندیکی زمان حرکتلری واستقامتلری تبدل ایدیور و بوتبدلاتک قطعی وعمومی قوانین میخانیکیه سی واردر. برنجی مثالده حرکتک سببی ارادتمدر کیبی کورونویور. ایکنجیسنده سبب ماده در ظن اولونویور. هر حالده حادثات طبیعیه نک هانکیسنی نظر دفته آیرسق بر طاقم اسباب طبیعیه تبعیتله وقوع بولدق لری تسلیم ایتک لازمکلیر . بو (سببیت طبیعیه causalité naturelle) واقعا تسلیم ایدله لی در؛ فقط اشیانک وبالجمله مخلوقاتک بذاته فعال اولمالری اعتقادی قطعاً رد ایدله لی در ، چونکه اونلر (اسباب موجبہ caus. efficientes) دکلدرلر ؛ علت حقیقه نک شانی ، بالذات فعال اولمقددر . آنجق اوکا علت فاعلیه و علت موجبہ دیرز .

فاعلیت ذاتیه سی اولمایان بر شی - معنای حقیقیسیله - مصدر افعال اوله ماز. و بناءً علیه علت صاییه ماز. آنجق بر واسطه ویا بر وسیله در. ایشته بز لر بونقطه ده یا گیلدورز. بالجمله حادثات کونیه ده مادیات ایله برابر بزم روحز دخی آنجق قدرت الهک ظهورینه وسیله و واسطه در. علت حقیقه ویکانه بالکمز اللهدر.]
مالبرانیشک بو دوشونجه لری تمامیه (منسجم coordonné) بر سلسله افکار تشکیل ایندیکی ایچون بر (سیستم système) صاییلر ؛ صحیحاده اولیه در .

اولا ادیان حقیقیه به یاقیدشان یکانه فلسفه سیستمی بود. نته کیم مالبرانش دخی بونی بویه جه ادعا ایدیور. نته کیم اوندن یک چوق زمان اول بزده ده بو (اوق قازیونالیزم occasionalisme) لایقیله تأسس ایتشدی . ذاتاً (سبب) کلمه سنک معنای حقیقیسی بوادعای اثبات ایدر؛ چونکه اوکله نك معناسی - ظن اولوندوغی کیبی - (علت cause) دیمک دکلدر؛ وسیله ، آلت واسطه ، بهانه) دیمکدر . بز دائما وسیله بی بهانه بی علت حقیقیه ظن ایدرک یا کلش دوشونه کلشز، و بناء علیه (علت) ایله (سبب) تعبیرلری الفاظ مترادفه کیبی قولانمشزدرکه ، مالبرانشک ادعاسنی اثبات ایدر. تعریف ایدیم :

[الله بر شیئی اراده ایتدیکی زمان اسبابی تهیه ایدر.] جمله سندن مراد اولونان معنا : [وسیله حاضرلار ، بهانه خلق ایدر] دیمکدر . علت یعنی (cause) حاضرلار دیمک دکلدر. چونکه - هر هانکی دینه مذسوب اولورسه اولسون - الله اینانانلر ، اونک یکانه خالق یعنی (علت فاعلیه) اولدوغنه دخی اینانق مجبوریتنده درلر. اولیه اولونجه باشقه علت حاجت قالماز؛ فقط اللهک وسیله و بهانه خلق ایتهمسی احتمالی بواعتقاده مانع دکلدر.

صوکره بز حالا سبب کلمه سنی - بعض شیلرده - معنای حقیقیسیله دخی قولانمقده دوام ایدوب طورویورز : [تأمین اسباب معیشت] دیوروز . هله لسان رسمی بوکله بی اکثریا طوغرو معناسیله استعمال ایدیور : [.... اسبابنک استکمالی صمننده ایجابنک اجراسی] دیورکه بوجهلرده کی سبب کلمه سنی - هیچ بروقت (cause) دیه ترجمه ایدر مه بز؛ چونکه بوراده (condition) و (occasion) معناسه موضوعدر، واصل لغت معناسه کلنجه (ایب، اورغان) دیمکدر. شیمدی بوتون مخلوقات لغت معناسیله سبب تلقی ایدوب یکانه علت فاعلیه نامنه یالکز بر الله قبول ایتک ، ایشه مالبرانشک اسمنه نسبتله - اوروپاده - مشهور اولان (اوق قازیونالیزم occasionalisme) فلسفه سنی سنک عقیده اساسیه سی در . بن ادعا ایدرم که هر دینک اساسنده بواعتقاد فلسفی وازدر؛ مالبرانش دن عصرلرجه اول کلوب کچن اسلام فیلسوفلرینک جمله سی بواعتقاده ایدی . ایستر متکلمیندن اولسون ، ایستر حکمادان اولسون ، هر فیلسوف بو نقطه اساسیه ده متفق ایدی. حتی ده یبیلیم که یالکز هر دینک دکل (توحید) . واران هر فلسفه نك نهایت الامر پیوسته اوله جنی عقیده بودر. شوققدرجه یالکز (کثریه pluralisme)

بوعتقادایله او یوشه ماز. چونکه بومذهب بر (علت مطلقه *une cause absolue*) یه اعتبار ایتمز. یوقسه بوتون کائناتی وموجوداتی یکانه بر فاعل مختاره عطف ایله تعریف ایدن هر دین و هر فلسفه نك نهایت واره جفی عقیده (اوق قازیونا بزم) در. اونک ایچون مالبرانك نظریه معرفتی فلسفه تار یخنده بوبك بر موقع اهمیت احراز ایله مشدر.

بویاپاس اولا بویله فیلسوفانه براسلوب اوزره دوشونوبده برنظریه معرفت ترتیب ایتدکن صوکره ، برده عقائد خرسیتانییه قیاساً دوشونویور ؛ و - کندی ادعاسنجه - دین ایله بوندن غیر بر عقیده فلسفیه نك او یوشه مایه جفی سوبلویور. [اللهدن غیر شیلرده (علیت) آرامق، اونلره (ارادت) اسناد ایتك اك بویوك بر (ضلالت *aberration*) در. (بت پرستك *paganisme*) ایله خرسیتانلق آده سنده اك مهم واساسلی اعتقاد فرق بودر. (عالی قالیه *causes secondaires*) نامنه برشی اوله ماز. هانکی حیثیتله تاقی ایدیلبرسه ایدلسین ، ایستر (شکل *forme*) ، ایستر (ملکات *facultés*) و یا خود (قوا *forces energies*) عد ایدلسین ، مخلوقات ، (علل وعوامل *causes at agents*) اوله رق قبول ایدیلنجه فلسفه ، اك مضر و مدھش بر خطایه دوشمش اولور. چونکه علت اولق ایچون بالذات اجرای تأثیر ایده بیلمه لی ، برشی یاراده بیلمه لی در، حالبوکه موجودات محدوده و ممکنه دن هیچ برینه بویله بر صفت و بر یله مز اونلردن هیچ بری کندی ارادت یله تغیر و تبدل ایده مدیکی کیبی سائر بر شیئتک تأثیر یله دخی حالی ده کیشدیرمز. (قدرت علیت *pouvoirs de causalité*) اجرا ایتك خالق اولق دیمکدر . بوقدرت یالکز الله مخصوصدر و بناء علیه علت حقیقه یالکز اودر. اوده انحق (بر) یعنی یکانه اوله بیلیر. اکر اشیاده حیثیت علیت وارسه ، اونلرده صفت الوهیت دخی اولق لازم کلیر. مادام که اشیا ایکنجی درجه ده سیبلردر ؛ اونلری ایکنجی درجه ده آلهلر کیبی تلقی ایتك ایجاب ایدر. اوتقدیرده طبیعت بوکوجو جوك آلهلر و (جن *démons*) لرله مالی اولمش اولور . بوعتقاد سخیف بت پرستك دکلدردده نهدر ؟. اسکی فیلسوفلرک اك باطل فکری بوایدی. بوده اشیا یه علیت اسناد ایتمکدن کلیردی !!] دییور و دیندارانه بر نقطه نظر دن دها برچوق ملاحظاته کیریشیور که بزه اونلرک بوراده هیچ لزومی بوقدر . یالکز اختصار ایدلش اوله رق نقل ایتدیکم شو ملاحظاته شایان دقت بر قاج نقطه مهمه وار . اولا مالبرانك (علت حقیقه)

اوله رق يالکيز (علت فاعليه cause efficiente) بي قبول ايده بيلور . وخالفتي بونک صفت ممتازه سي عد ايديور ؛ بوصفتي وبوقدرتي ده انجق الله ده کورويور . ديمک که کيمسه ده وهبچ بر شيدنه ارادت يوقدر . ثانياً اوله ظن ايديور که (اسباب تاليه) قبول ايتک (شرک) در ، کفر در ؛ بت پرستکدر . مثلاً : [برکت و برسين ياغمور ياغدي ده مزروعاتي احيايتري ، بغدايلر باشاقلاندي !] ديمک کنه اوله جقدر . [*]

بوندن مالبرانش کندنجه مهم بتيجه لر چيقاريور که اونلره ناصل بر ضرورت منطقيه ايله ونه بوللر تعقيب ايده رک واصل اوله ييلديکني بوراده کوسترميه جکم ؛ يالکيز اوتيجه لري نظردقتکزه عرض ايده جکم .

(١) [مادام که وقوع حادثه يالکيز الله علت فاعليه در ؛ او حاليه (قانون طبيعت loi de la Nature) (مشيت الله la Volonté divine) دن عبارتدر . باشقه کيمسه ده ارادت يوقدر . اجسام وارواح اقامه حقله قائم ودائمدرلر . بالذات اشيا ، نه حرکتده در ؛ نه ده سکون اوزره در . قولکي قيميلداتان دخي سن دکلسک ! . ارادت الله اولمادقجه بر بارماغکي اوينده مازسک ! .]

بزم عرفاي صوفيه دخي تماماً بوفکرده در . حتي ارادت بشريه بي قطعياً انکار ، وبو اعتقادي تأييد ايجون بر آيت جليله ايله استشهاد ايدرلر که معنای منيفي [آتدک ايسه سن آتدک ؛ لکن الله آتدي ! .] جمله سيله ادا اولونور .

(٢) [جسم ايله روحک بکديکرينه تعلقينه اراده آلميه ايله واقع اولمشدر . بومناستکده علت ازليه سي الله در .]

بوفکري (لايبنيتز Leibnitz) اساس اتخاذايده رک اوکا بناءً (آهنگ ازلي l'harmonie préétablie) فرضيه سي قورمشدر .

(٣) [دنيا ده هر آن بر (شأن يعني بر حادثه بروقه) واردر . عالم ، لابنقطع بوتغيرات وتبدلات اوزره بر سيل کبي دوام ايدوب کيديور ؛ بر آن ، بر لحظه طوروب ديکنتمک يوقدر . شئون وحادثات هب (مخلوقات créatures) در .

[*] بزده دخي بوانجه تنقيدلره کيريشيلمش وهان عيني نتيجه لره واريلشدر . فرضا (بوستانده کي بقله لري الله ييتيردي وکاله کتيردي ؟ . بوقسه فصل ربيع سي ؟ .) سؤاله قارشي [نيت الله البقل] ديمک ، ياغموري وسيله کبي تلقى اتمکدر . [آيت الربيع البقل] ده بن طبعيون الله بن غيري برسب قبول ايتش اولور . الي آخره . . .

اللهك - آن بآن - ياراتدینی شیلردز. دیمك كه اللهك اراده سی و قدرت خالق سی بر لحظه طور مایوب لاینقطع دوام ایدیور . [

مالبرانك بو فكري (خلقت متماديه *création continue*) نظریه سی تولید ایتشدز .

(٤) [مادام كه اراده الله بوتون موجودات ممكنه نك (واسطه ظهور) ی در ؛ بوتون او موجوداتك عینی زماندهده (رابطه قوام) ی در . [كائنات اللهدهدر . فقط الله كائنات دیمك دكلدر .] كائنات وارخنده دوام ایدیورسه الله اولیه اراده بیوریورده اونك ایچوندز ؛ یوقسه عكسی تقدیرده لحه بضرده یوق اولووریردی .] بوفكرده عیناً و تماماً بزم تصوفده واردز . حتی (واسطه ظهور) ودها بو كبی تعبیرات ، اصطلاحات صوفیه دندز . كذا لك عرفای صوفیه متفقاً ادعا ایدیورلر كه (ماسوی الله - اللهدن ماعدا هر نه وارسه) یعنی بوتون موجودات ممكنه ، وجود مطلقك جلوه سی در ؛ واوندستهلكدهدر . اوندن باشقه موجود حقیقی یوقدر . خلاصه ، الله كائناتی محیطدر فقط عكس قضیه طوغرو اوله ماز ؛ یعنی هیئت مجموعه كائنات الله دیمك دكلدر . مشیت الهیه هر کون بر (شأن) اوزره جلوه کوسترز ؛ البته بوموجودات اضافیه اونكه قائم ودائمدز . زمان ، بو حالك دوامندن حاصل اولان بر (شعبده *illusion*) در ؛ یوقسه باشلی باشنه زمان و مکان نامنه بر شی یوقدر . حالا ارادت الهیه (منسبط) بر حالده بولونویور ؛ بو مستعار وارلقلر بزم بر اثر فسون اوله رق کورونویور و بزلر دخی بالذات بو خیالات باطلده داخلز . بر کره بوسلسله ظهورات توقف ایده جك اولسه دنیا و مافیها دبديکمز خیالات بر آنده محو و مضمحل اولوردی . چونكه اونلرك اصلي یوقدر . بناءً علیه (عالم بردم) در ، تعبیری ایشه بومعنايه اشارتدر . [ازل الاز الذبری الله واردی واونكه برابر هیچ بر شی یوقدی . الآن کماکان ! . یعنی اولجه ناصل ایدی ایسه شیمدی ینه حالا اولیه در .] [*]

[اوحالده کورن ، ایشیدن ، حس وادراك و تعقل ایدن بز دكلز ! .] بزم صوفیه نكده اعتقادی عیناً بودز : [.. و بی یناطق و بی بصیر ! .. و بی یسمع الخ ! . الخ ! .

[*] تصوف حقندن پك منصل و امثله متنوعه و وثائق متبره ایله مدال بر اثر حاضر لا مقدمه ؛ اوراده بوتون بو نظریات و عقاید قیاساً مطالعه اولوغنی و روابط اساسیه سی کوسترلش اوله چقدز .

دیمکدن مقصدلری اودر ؛ [الله بنم واسطه مله نطق ایدیور و کوروپور . الخ ..
بنم بنلکم یوقدر !] دیمکدر .

شو وضعیت کوره (نظریه معرفت) نه اوله بیلیر ؟ .. هله (منشأ و واسطه علم
origine et moyen de connaissance) ندر ؟ ..

بو سوآله دخی مالبرانش صوفیانه بر جواب ویریور ؛ [علم اشراق
illumination) در ؛] یعنی - بزم عرفای صوفیه مک دیدیکی کیبی - [کشف ضمیر
ایله الهام الہی نک تلاؤی در .] دیور . (نوفلاطونیون les néoplatoniciens)
فکر واعتقادی دخی طبق بوایدی و بوسبیله اوفلسفیه (اشراقیه la philosophie
illuminative) ده نیلمشدی . صوفیه اعتقادی اوندن ذره قدر فرقلی دکدر .

مالبرانش بوراده قالدیور ؛ (تارک دنیالقی ascétisme) اعتقادی ده اوملاحظه لر
دن جیقاریور ؛ فقط ارتق بوراده کسه جکم ؛ چونکه تفصیلاته کیریش جک
اولسم بودر - لری بیتیره میزه . اونک ایچون بو قدر جق بر اشارتله اکتفا ایتمه کزی
رجا ایده رم . مالبران شک (رؤیت فی الله vision en Dieu) نامنی آلا ن نظریه معرفتی
- خلاصه - ایسته بودر . مع مافیه تصوف ایله بونی قیاس ایدوب سزه شو بخی
لایقیه تفصیل ایده مه دیکمه تأسف ایدیورم عینی مبادی دن حرکت ایدوب عینی
سیاق نظرله کاشانی کورن غرب قفاسی ایله شرق قفاسنک ناصل عینی اعتقاده
بالضروره پیوسته اولدوغنی کوسترمک ایچون بوندن کوزل بر بحث اوله مازدی .
ذاتاً ده قارت پیورلرندن یالکیز بو آدمی ذکر ایله قناعت ایتدم . یوقسه بوندن
اول (Geulinx گوله نکس) ، (Cordemoy قوردوموا) بوکا بکرر فکر لر بیان
ایتمش ایدی . فقط بو عقائده خصوصی ومعین بر شکل فلسفی ویرن بو (پاپاس)
اولدی . اونک ایچون اونی مثال اوله رق ترجیح ایتدم . ذاتاً بر جوق بو یوک
فیلسوفلری کچورم . درسمز تاریخ فلسفه اولمادی نی ایچون کیمک ملاحظاتنده
درسزه ده موافق مثالر بولورسم اونی عرض ایدیورم .

شیمدی برداهی فیلسوفک اساسلی فکر لرینی خلاصه عرض ایده جکم که بر
چوق منقدین معاصرینک ادعاسنجه (اون یدنجی عصر متفکریننک قطبی
le penseur central) در . [*] اوده مشهور فیلسوف یهودی (باروخ سپینوزا

[*] بوتعبیری قوللانان (هو فدیخ Høffding) ادعا ایدیور که او عصرک فلسفی جریانلری
هپ سپینوزانک افکارندن نیعان ایتشد ، ذاتاً اکثریت منقدینک ظنی بودر .

Baruch Spinoza) در . بو آدم فقر ایچنده بویوک بر صفای روح ایله یاشامش ،
بك درین دوشونمش وانجق قرق بش باشنده ٹولمشدی [*]

هولاندان هیچ چیقماش اولان بو آدمده بر شرقی قفاسی واردی که
فلسفه‌سنه بوسوتون خصوصی برشکل ویرمشد. فضله اوله رق موسوی مکینده
آلدینی ایلك تربیه دخی تمامأ شرقی ایدی. اصل خواجه‌سی (طالمود) علامه لرندن
(سائول لهوی مورتیه را Saul Levy Morteira) ایدی. بونك تعلیماتی ایله سینوزا،
مشهور حکیم اندلسی (موسی بن میمونید Moïse Maïmonides) ك بوتون آثار
وافکارینه واقف اولمش ویهودیلرک حقیقتاً ك بویوک فیلسوفی اولان بو آدمی بك
بکنمشدی . [**] عینی زمانده (ده قارت) و (بهی قن) افکارعاله حکمفرما
اولویور ، و (هوبس Hobbes) ، (لایب‌نیچ) ، (مالبرانش) ، (غاسساندی)
ودها بر جوق بویوک فیلسوفلر یاشیورلردی .

سینوزانك آناری تدقیق اولونجه آکلاشیلیورکه بوخارق الماده آدم اونلرک

[*] سینوزا اصلاً اسپنیا یهودیلرنددر . عائله‌سی انکیزیسیون بلاسنندن قورتولق
ایچون هولانده به قاجش وحریتی ایله تمناز اولان آمستردام شهرنده توطن ایتمشدی. فیلسوف
اوراده میلادی (۱۶۳۲) سنه‌سی تشرینانی سنك یکریمی دردنجی کونی طوغمشدر .
مکمل بر تحصیل کورمشدی و خاхам اولق اوزره حاضرلاندینی ایچون بالخاصه (طالمود
Talmud) او قومشدی. حالبوکه او، جداً ربویوک فیلسوف اولق اوزره دنیا به کلش و بك
کوچوك باشندن بری دوشونمکه باشلامشدی. زمانه‌ك فیلسوفلرینی وسفولاستیقلری لایقيله تنبع
ایندی و خاхам اوله مایه جفتی هر حاله کوستردی . تعصب دینی دن بر تورلو قورتوله مایان
موسوی جماعتی کندیسینی طردایدی . حتی قتل ایله تهدید ایدی . تأثیری اوله مادی. فیلسوف
رسماً خرسستیان اولدی. خرسستیانلردن ده بعض وعداوت کوردی. دوستلری حمایت ایتدیلر.
نهایت (۱۶۷۲) شباطنده ارثی بر ورمدن وفات ایدی .

[**] اسپانیاده (قرطبه Cordoue) شهرنده طوغمش وبارلاق برمدنیت اسلامیه‌ك
سینه تریتمنده یه تیشمش ولان بو حکم شهرک عربجه اسحی، کنیه‌سی، شهرتی (ابو عمران
موسی بن میمون بن عبدالله) در . اکثر آثارینی عربجه یازمشد . مشهور ابن الرشديك
بك دوستی وحی بر آزده شا کردی ایدی دیرلر . ابن الرشديك منکوب اولدوغی زمان ابن
میمون نزدنده برمدت اختفا ایتمشدر ده روایت وار. موسویلرجه (موشه بن میمون) ،
(رابی موشه) ناملرله فوق الماده میجل اولان بو ذات اولا پدردن تحصیل کورمشدی .
اسباب سیاسیه دن طولانی منکوب اولدی. عائله‌سی ایله برابر فاس شهرینه ، سوکره عکایه
هجرت ایدی. نهایت قاهره مصرده یرلشدی. جواهر تجارتی ایدردی. طابنده ده عصرینك
فریدی ایدی . میلادی (۱۳۱) ده طوغمش (۲۰۴) ده وفات ایتمشد. تفصیلات
ایچون بخور اسرائیلک تاریخ فلسفه‌سنه باقیکز.

بوتون افکار و آثار به واقف اولمش، حتی بعض مواد جزئی به بیه اقتباس ایش فقط کندی باشنه - و شرق اسلوبی اوزره - بر فلسفه بناسی قورمشدر. الک زیاده ده قارت فلسفه سندن متأثر اولدوغی شبهه کورتورمز؛ فقط ده قارتی اولدوغی کی قبول ایتیه رک نثایه مذهبی بوزمش وتوحیده کیتمشدر. سینوزا اولا (جوهر substance) ی نظر دفته آیور؛ و اونی مبدأ فلسفی اتخاذ ایدیور؛ اولا بر تعریف ویریور: [جوهر اویله بر وجود در که وارلغنده باشقه بر شینه محتاج اولماز. (۱) برده (مخلوق جوهر substance créée) وار؛ او [اویله بر وجود در که انجق الیهک یاردیمیه وار اوله ییلیر (۲)

بو تعریف لر کوستریور که - بوندن اول ذکر ایتدیکم - مالبرانش ایله سینوزا آره سنده بو خصوصیه بر فرق یوقدر .

سینوزا، برده (حقیقت محضه) اولان او جوهر که عقلمزه نسبتله تعریفی ویریور: [بذاته موجود و بذاته متصور بر وارلقار . یعنی کندی کندینه عقله لایح و سانخ اولور؛ تصویری، بانقه بر شینک تصویرینه محتاج دکدر . (۳) دیور . بو تعریفک متضمن اولدوغی فکر دخی ده قارتک اعتقادینه عیناً بکزر . (جوهر حقیقی وارلغنده ناصل غیره محتاج دکسه. تصورنده دخی سائر افکارک معاونه مفتقر دکدر؛) دیمک (کما وضوح و صراحتله کندی کندینه یعنی تحدسی اوله رق ذهنه سوح ایدن بر حقیقت) دیمکدر که - خاطر کزده ایسه - ده قارتک اعتقادی دخی عیناً بوایدی و [حکیم مومی الیه انجق بویه بر حقیقتی (مبدأ principe) اتخاذ ایدرهک بوتون معلومات صحیحه مزی - (تعلیلی بر صورتده déductivement) - اوندن استخراج ایتکه چالیشیوردی . حتی (بو طرز تفکر و بو اسلوب استدلال) ریاضی و منطقی در؛ حصول علمده تجربه لزومه حاجت بر اقرار؛] دیمشدم .

ایشته عینی فکری صورتا براز باشقه تورلو سویله مش اولان سینوزاناک ملاحظاتی حقنده اولکی مطالعات تنقیدیه قابل تطبیق در . حتی بو فیلسوف

Res quæ ita existit, ut nulla alia re indigeat ad existendum (۰)

Res quæ solo Dei concurso eget ad existendum (۲)

Per substantiam intelligo id, quod in se est et per se concipitur, hoc est id, cujus conceptus non indiget conceptu alterius rei, et quo formari debeat (۳)

یهودی (اصول تعلیلی *méthode déductive*) تطبیقده او قدر مبالغه ایتمشدرکه -
کندیسنک الک مهم آبدۀ دهاسی صاییلان - (اخلاق *Ethica*) نامنده کی اثری عادتاً
(اقلیدس *Euclide*) ک هندسه کتابنه بکنزر و هیچ بر اثر فلسفی یوقدرکه بو
ترتیب اوزره یازلمش اولسون !! [*]

شیمدی بو (جوهر مطلق *substance absolue*) یکانه (حقیقت لدنیه) در .
یعنی الله در . فقط - اوتۀ نبری شرق حکمت صوفیه سیله ذهنی پرورده اولمش
بولونان سینیوزا نظرندۀ ، طبیعت والله باشقه باشقه شیلر دکلدۀ ؛ طبیعت ، اللهک
(جلوه ظهوری) درکه اوده علی العموم ایکی (طوور *modalité*) اوزره انکشاف
ایدیور : (جوهر متفکر) و (جوهر تمتد) !! [**]

کورپورسکزرکه بوراده سینیوزا ده قارتک - جوهر حقنده کی - تعریفاتی
تقسیماتی ، حتی اصطلاحاتی عیناً قبول ایتمکه برابر ، جوهرک حیثیتی تصورده
اوندن کلیاً آریلوب مالبرانشه یا فلاشیور فقط اونک فیکرلرینی ده عیناً قبول ایتیمور ؛
چونکه جوهر مطلق الله طانیقده برابر ، الهی کائناتدن ونجموع کائناتی اللهدن
فرقلی کورمیورکه (وجودیه *panthéisme*) مذهبک اساس ادعاسی بودر . واقعا
اوده طبقی ده قارت کی بر جوهر اضافی قبول ایدیور و کرک (فکر *la pensée*)
و کرکه (امتداد *l'étendue*) ی جوهر مطلقک (تطورات *modalités*) ی عد
ایتمکه مخلوقات نوعندن فرض ایدیور ؛ فقط - طبقی بزم صوفیه کیی - خلقتۀ
(صدور *emanation*) معناسی وریبور . بو صورتاه خالق خلق ایله ، سبب مسبب ایله
برطوتولمش اولویور . حالبوکه ده قارت ، الهی مخلوقاتندن بو سبوتون منزۀ و مقدس
طوته رق آیرمش ایدی . حتی مخلوقاتدن عد ایدیکی (جوهر تمتد) ایله (جوهر
متفکر) ی دخی بر بردن آیرمشدی ؛ او قدرکه جسم ایله روحک مناسبت متقابله سنی

[*] بو کتابده مؤلف ، کندیسنجه مسلم اولان هر حقیقی اولاً بر متعارفه هندسیه کیی
بر قضیه صورتندۀ وضع ایدیور ، سوکره اوندن - صرف تعلیلی بر طرزده - بر جوق نتایج
استخراج ایدیور . ده قارتک دیدیکی کیی اولاً نخدسی اوله رق کمال وضوح ایله ذهنه طوغان
بر فیکری مبدأ اتخاذ ایدرک - تجربه به حاجت کورمده دن - اوندن بر جوق حقایق تالیه
استخراج ایدیور ، دیمکدر .

[**] تبعات تاریخچه ایله ثابت اولویورکه سینیوزا (جه نوردانو برونو *Geordano Bruno*)
دن جوق متأثر اولمش ؛ هله بالخاصه (طبیعت) حقنده کی فیکرلرینی اوندن انبثاس ایتمشدر .
واسیونالیزم اصولی ده قارتدن ، عقائد صوفیه سنی ده (ظالمود) دن آلمشدر .

بر تئولو تعریف ایده میوب بر اتمشدی. صوکره مالبرانش بر ازدها ایلری به کیده می
دیرکن وحدت وجوده واردی. جسم ایله روحك یکدیگریته احتمال تأثیرینی انکار
ایله هم مخلوقاتدن، سببیتی یعنی قدرت فاعلیه یی. همده انداندن قدرت ارادتی
انکار ایتدی.

سینوزا هر شیشی توحید ایدیور. متناقض کورون بو افکار واعتقاداتی تألیفه
موفق اولویور: [اللهدن غیری جوهر حقیقی یوقدر؛ فکر و امتداد اونك ایکی
(صفت اساسیه *qualités fondamentales*) سی در؛ ویا لکنز بزم ادراك ایده بیله -
جکمز ایکی صفتی در. جوهر متفکردن آیری بر جوهر تمتد یوقدر. چونکه
وجود اللهدن خالی بر یر اولق احتمالی منصور دکدر. [*] بناءً علیه الله کائناتك
وهر شیتك (علت مندمجه *cause immanente*) سی در. هر شیتك ضمنتده واردر؛
چونکه هر نه وارسه اونك بروجله وسیله ظهوری در [**].

الله، طبیعت ذاتیه سنك اقتضاسنه کوره اظهار ارادت ایدر. مشیت الهیه
ایشته بو (اقتضا) در. الله طوغرودن طوغرویه بر طاقم غایه لر تعقیب ایده رك

[*] (ما خلا الله باطل) دیمك ایستورکه بو اعتقاده متمسك اولان متفکرلر ایمون
الهی کائناتدن، خانی مخلوقاتدن آیری تصور ایده بیلمك ایمون یول یوقدر. و بو ادعا تمامیه
صوفیه نك اعتقادینه موافقدر. او تقدیرجه مخلوقات دیدکمز شیلر، صحیح هیچ یوقدن
خلاق اولونمش کیی تلقی ایدیله منزه. اللهك کندی جلوه ظهوری اولق اوزره قبول ایدیلر.
بواعقادی، مشهور شاعر صوفی (محمد شبرین مغربی) بریت ایله غایت بایغ بر صورتده
ادا اعتقددر:

[ظهور تو، بمنست و وجود من از تو. فلست تظهر لولای، لم اکن لولاك] یعنی،
اللهه خطاباً: [سنك ظهورك بمله در؛ بنم وجودم دخی سندندر. بن اولماسه یدم سن ظهور
ایده مزدك؛ سن اولماسه یدك بن اولمازدم !] دیمشدر.

[**] بو (علت مندمجه) تعبیری ده عینی اعتقادی متضمن در. صوفیه بوی قبول ایدر.
نته کم بزم توجه صوفی ای یونس ایمه 'و کوزل ساده و کتانه لی لاسیله: [بودکانی یاسایان
اوش بودکان ایچمه در.] یعنی (بودکانی یاپان، ایشته ینه بودکانك ایچمه در.] دیمکه
عینی اعتقادی بیان اتمش اولویور. بوراده دکان تعبیردن مراد جسم بشردر. اونی یاپان ده
الله در. الله بزدن خارج دکل، بزده مندمجر دیمك چیقارکه تصوفده وحدت وجود
عفیه سنك اساسی بودر. قیفسزده بوکادائر جوق سوزلر واردر. اورپا سان فلسفیسنده
(*immanence de Dieu*) تعبیری بواعقاده اشارت ایدر. بونك ضدی (*transcendence*
de Dieu) نظریه سی در. بو ادعایه کوره الله مخلوقاتدن بوسوتون آیری، بوسوتون
باشقه و (منعالی) بر علت مستقله در. یوقدن هر شیشی وجوده کتیرمشدر. اشیا اونك
آثار ظهوری دکدر. بونون عقائد شرعی ده اساس بودر.

دکل (اسباب مناهیه causes finies) واسطه سیله قدرت کوستریر . بناء علیه ارادت الهیه ، ذات الوهیتک (قانون اقتضائی la loi de la nécessité) در . حریت بشریه دخی (علاقه سببیت rapport de causalité) دن مبرا و آزاده دکلدر . [*]
 بو ملاحظات ، ده قارتک حل ایده میوب براقدینی مسئله یی (یعنی روح ایله جسمک مناسبتی مسئله سی) باشقه بر نقطه نظر دن حل ایده بیلیمک ایچون بر طریق احتمال کوستریر و بر مقدمه تشکیل ایدر . فی الحقیقه سیدینوزا اونی - کندنجیه - حل ایتمشدر ؛ حتی اوسایه ده بر جوق مسائل تالیه یی ده تنویر ایله مشدر که ترتیب ایتدیکی نظریه معرفتک شکل مخصوصی بوراده کوره بیلیرز . باقیکنز ناصل دوشونو یور ، وده قارتدن تلقی ایتدیکی فکر لری ناصل اداره ایدوب نه نتیجه لر چیقاریبور :

[مادام که فکر و امتداد - یعنی قارته زیه نلرک لسانجه ، طولایسیله روح و جسم - بکانه موجود حقیقی اولان اللهک ایکی (طور تجلیسی modes de manifestation) در . اونلرک مناسبتی ازلی در ؛ چونکه حد ذاتنده آری غیر ی شیر دکل ، عینی شینک مختلف جلوه لریدر ؛ و مادام که ارادت الهیه ، ذات ازلیه سنک تجلی ایجابی و اقتضائی در ؛ هر شی قانونی در . ایشته اونک ایچوندر که بالکنز روح ایله جسم آره سننده دکل ، حادثات انفسیه ایله حادثات آفاقیه آره سننده دخی توافق تام و اطراد و انتظام واردر . سلسله افکار من ایله سلسله وقوعات (موازات کامله parallélisme parfait) عرض ایدر . طوغرو دوشونمک و طوغرو استدلال اینک شرطیله ، نه دوشونور و نه استدلال ایدر سه ک حادثات آفاقیه ، استدلالا تمزک طوغرو اولدوغنی بالفعل اثبات ایدر . چونکه هر ایکی سلسله نک (یعنی بزم افکار منزه و قایع خارجییه سلسله سنک) جریانی و رابطه منطقیه سی بر در : عینی قانون قویم الهی در . عینی مشیت الهیه عالم خارجی ده وقوعاتک (تسلسل علی enchainement causal) سی صورتنده جلوه کوستریبور ، عالم انفسی ده دخی افکارک (تسلسل

[*] سیدینوزانک بومهم مطالعاتی (ایمانیه مطلقه déterminisme absolu) اعتقادیه واریر ، و للهک بیله ، ایجاب ذاتینسه کوره اظهار ارادت ایتدیکنی قبول ایدر ؛ علت فائیه یی انکار ایتمه سنه سبب ده اودر . چونکه مشیت الهیه دخی قانون ازلی مقتضائی اوزره تجلی ایدیورسه اونده کیفی بر نیت ، تصور اینک ممکن دکلدر . بو فکر لر بزده اهل سنت ایله حکمای اسلام آره سننده خیل مناقشات موجب اولمندی . اونک ایچون اهل سنت ، الهیه (فاعل مختار) ، حکما دخی (فاعل موجب) دیمشدر . بونلر (الهیات) بحثلری اولدوغندن تفصیل ایتمه دم . ذاتاً بو ابتدائی کتابده هر بحثه بر بوقدر .

منطقی (enchaînement logique) سی شکلنده جلوه نمون اولویور . عینی (قانون اقتضا loi de nécessité) موازات اوزره کیدن ایکی سلسلهٔ حادثاته حکمفرما اولویور ؛ واونلر - حدذاتنده - باشقه باشقه شیلر دکل ، عینی حقیقتک - که اللهرد - ایکی وجهه تجلیسی درکه یکدیگرینه مقابل دوشمشدر . [*]

فقط بو تورلو دوشونوشه بدتله اعتراض ایدیله بیلیر : [اوبله اولسهیدی بزم دوشونجه لرمن وقوعاتک جریان طبیعیه تنامیه توافقی ایدردی و اوتقدیرده دخی (تصادف chance) اولمازدی . حالبوکه واردر . بز ، انسانلر وقوعات طبیعیه نک جرباتی نه قدرایی تعقیب ایدرسهک ، اوکا نه درجه صمیمی بر صورتده توفیق حرکت ایلرسهک اوقدرایی یاشامش اولورز . بوده نجق دوشونجه لرمن وقوعات طبیعیه ایله (مطابق adéquat) بولونما سی سایه سنده اوله بیلیر . حالبوکه هیچده اوبله اولویور . خسته اولویورز ، قضالره معروض بولونویورز ، تصادفلر حسابلرمزی شاشیرتیور . الخ الخ] ده نیله بیلیر . یعنی سینینوزانک او ادعاسی (مطابقت adéquation) و (تصادف hasard ، chance) مسئله لرینی تولید ایدر و برر (معما énigme) کیکی اورطیه آثار بر اقایر . اوندن ماعدا (راسیونالیزم) ک الک یوکسک ومفرط برشکلی اولان بوبله بر عقیده (تجربه) و (استقرا) اصولی ده بالضروره رد ایدر . بوتون بومسئله لره جواب ویرمک وظیفه سی ده سینوزایه دوشر .

مع مافیه بوداهی موسوی ، بوتون بو احتمالاتی ابلدن دوشونویور و بومسئله لره میدان ویرمیور . تجربه و اصول مسئله سنی ده - کندی نقطه نظر نیجه - حل ایدیور . هم (ده قارت) ک ایلمک بر نیسینه رجوع ایتمکه بر چاره حل بولویور . باقیکنر ناصل :

[سلسلهٔ تفکراتمزله سلسلهٔ وقوعات آره سند . فی الحقیقه - مطابقت واردر . لکن بز خطا ایدر . دوشونجه مزه مشتبهات و احتراصاتمز قاریشوب منطقه تحکم

[*] بزم مشهور شاعرمن نفی ، - بر فکر فلسفی ایله دکل ، فقط برحس غرور ایله (هر نه سوبلرسم قضا مضمونی اثبات ایدر ؛ آی بیلیمز کم خطاب امتحانیدر سوزم .) دیمشدی . شیمدی بز : (هر نه دوشونورسهک ، طوغرودوشونمک شرطیله وقوعات طبیعیه بزم دوشوندوکز کیکی چیقار ، چونکه ایکیمی ده عینی قانون اقتضایه تابعدر ، او قانونده تناقض اوله مازکه دوشونجه مز ایله وقوعات آره سنده تناقض اوله بیلین !) دیرسهک تنامیه سینینوزانک اعتقادی بیان ایتش اولورز . بو اعتقادی ، متأخریندن (هگل Hegel) بنه مش و بر فلسفه سیستمی شکلنه بومشدر . مع مافیه بو آلمان فیلسوفی بک ابی تدقیق یدن (لورد هولده بن Lord Holdane) ده غلک بو فکرده بولوندوغنی انکار ایدیور .

ایدر . [*] حالبوکه تمثال حقیقت اولان فکرلرمن ، تحدسی در ؛ واضیحدر ؛ وبالذات (واجب nécessaire) در . بونلر وقوعات خارجیه ایله تماماً متطابقدر . اوایله اولماسهیدی مثلاً هندسه باطل اولوردی الخ ؛ بناءً علیه بالذات بدیهی اولان فکرلرمن حقیقتک تمثالی ودلیل یقینی سی در . انفس و آفاقد حقیقت بر در . اونک ایچون توافق واردر . موضوعنه مطابق دوشمه ین فکرلرمن مشوشدر ، مبهمدر . اونلره (جهل) قاریشمش وماهیتریخی افساد ایتشددر . او سیله درکه اونلرده حیثیت وجوب اوله ماز . تصادف دخی بوقیلدندر ؛ زیرا بو فکر ، - بوتون اسباب وعوارض وقوعاتی مستجمع اوله حق صورته - بر معنای واضح وبر (مفهوم تام notion parfaite) افاده ایده میور . بو فکر مزده جهل وخطا قاریشیدر . فی الحقیقه تصادف دیدیکمز احوالک وقوعنده قطعاً ذیمدخل برچوق عوارض ، شروط واسباب وارکه بیلسیورز . اوندن طولایی بوفکر (واقعه تماماً مطابق) دوشمیور . اگر تصادفک ناصل وقوعبولمقده او . وغنی بالجمله اسبابیله واک دکرسز شرائطیله بیاسه ایدک ، او وقت مهیتی تشکیل ایدن (امکان contigence) ایله برابر تشوش دخی زائل اوله رق مفهومنده (وجوب) وبداهت حصوله کلیددی . لکن او حالدهده (تصادف) اولمازدی ؛ چونکه اسباب وشرائطنی وزمان وقوعنی اولدن کشف وتقدير ایده بیلردک !... الخ دییورکه جنأ مهم بر ملاحظه در ، وکندیسنندن بر عصر صوکره وضع اولونان (حساب احتمالی calcul de probabilité) تماماً بورنسیب اوزرینه تؤسس برسیستمدر . [**]

[*] بوادعا اساساً (صوفیانه mystique) کورونور . مالبرانش دخی بوفکرده در . بوتون ، نوظلونیلر ایله برابر بزم صوفیه دخی بوتورلودوشونمشلردر . معماییه پک طوغرودر . سینیوزا (اخلاق) نام اثر مشهورنده ، حسیات ومشتباهاتک محافظه حیات امرنده نه مهم روللر اوینادیغنی واحتراساتمکز - الجای منفعتله - منظممه ناصل تاثیر ایدوب ذهنزی حقیقت صرفیه توجهدن منع ایتدیکنی داهیانه برنظرله شرح وایضاح ایدیورکه بر غسونه کلنجیه ندر بو حقیقتی ارتق هرکس تسلیم ایتشددر . طبیی ، بوخصوصده تفصیلات ویره میورم . [**] عبدالحق حامد ، (تولو) نام اثرنده : (تصادفکده - دیرم - ناموشنی قانوندر ؛ بوکونکی نامی تصادفیه - نیلیم - قدرک .] دییور وبومشله غامضهده سینیوزا پیرولرندن اولدوغنی کوسترییور . حتی قدرک تصادف ایله بر طوتولاسی وتصادفک قانون اولاسی (ایجابیه مطلقه) مذهبک عمده اعتقادیدر . حامد بوسوزلری سائقه الهام ایله دهاطوغروسی (صاعقه آلام) ایله سویله مشدر . سینیوزایی طایماز ، واقوسه بلکهده فنا دله صیقیلر وپورولوردی ، اوقدر جتیندر .

سبب وزانك تصور ايتديكى وجهله (جوهر) ، هم فكر يعنى روح ، همده امتداد يعنى جسمى شاملدى . ذاتاً روح ايله جسم او جوهر حقيقى نك (اطوار تجلى modes de manifestation) سندن عبارت در . بناءً عليه ايكي سى ده عيى وجودك باشقه باشقه كورونوشلى در . اويله اولماسه يدى ، يكديكر ايله مناسبته بولونه مازلر و بربرينه اجراى تاثير ايده مزلردى . نته كيم سلسله افكار مزلر سلسله حادئات ايله متوازى و متوافق اولماسه ده سبب اودر . مادام كه جوهر بالذات قائم (يعنى علت وجودى كنديسنده مندىج) بر حقيقى وارلق در ، و مادام كه بوتون (موجودات ممكنه êtres contingents) نك سبب وجوديدر ، هر حادئه منفرد نك هر (موجوديت مشخصه existence concrète) لك ضمننده كيزلى اولقى كرك در . (اندماج immanence) نظريه سنك نقطه استنادى ايسته بو عقیده در ؛ و بوده (وحدت وجود panthéisme) فلسفه سنك اساسى تشكيل ايدر . [*] شوا اعتقاده كوره (عرفان حقيقى la vraie connaissance) ، هر بر حادئه جزئيه ده او حقيقت كلي يى كورمك ، هر موجود ممكنك ضمننده وجود مطلقى كشف ايتكدر . بونك ايچون بالجمه حادئانى احاطه ايتك لازم دكل ، هر حادئه زئيه يى (سرمديت نقطه نظرندن) تلقى و مشاهده ايتك لازمدر . سببوزانك (sous le point de vue de l'éternité = sub specie aeterni) ديديكى بودر . بوده حادئانى تكرر تكرر تمداد ايدوب (دؤر و دراز دوشونمك واستدلانه كيريشمك صورتيله d'une façon discursive) دكل ، بر كشف آنى ايله بر (تحدىس intuition) ايله آنجق ممكندر .

بن ، موسوى فيلسوفنك بو فكر لر بنى سزه آ كلامغه چاليشيركن ، ذهنم شرقك ، هله ايرانك ، اولاي موت شعراى صوفيه سنى خاطر ليور . اونلرك بو فلسفه يى - بوتون اطرافيله و تقليدى ناقابل بر علويت اسلوب و بر بلاغت شاعرانه ايله -

[*] بو اعتقاد ، صوفيه ده احكام اساسيه دندر . حتى عرفاى شرق امام على حضرت لر بنه اضافه برسوز روايت ايدر لكه تماميله (اندماج نظريه سى) نك صريح بردستور افاده سى در : [ومارأيت شيئاً الا ورأيت الله فيه !] يعنى [هيچ برشى كورمه دم كه اونك ايچنده الهى كوره ش اولماييم !] ديتكدر . ذاتاً بوفكر اولمازسه تصوف اوله ماز . حتى ، صوفى اولمايان بعض محرر لر دنخى بو اعتقاده ميل ايده بيلدورلر ؛ مثلاً عبدالحق حامد (ثولو) نامنده كى اثر بهمنده : [بوتون مظاهرى تدقيق ايدك ، خدا ظاهر ! . بوتون حق - بى تعميق ايدك ، خدا مضمون ! .] بيقى ايله (immanence de Dieu) اعتقادينك بليخ بردستور بنى و بردكدن صوكره ، مقبره بوجيه نظر ايديبورده : (اونك ايچنده - باندم - بوكون اودر مدفون ! .) ديبور . سببوزا حامدك بوسوز لر بنى ايده بيلسه يدى جداً ممنون اولوردى .

ادا ایتش اولدقلرینی دوشونوبوردم نکرار حیران اولوبورم . بو خاطرات ایله تحصیل ایتکده بولوندوغم ذوق معنوییه سزلیرده حصه دار ایتک و بوفکرلرک - سینیوزا طوغمازدن - عصرلرجه اول شرق دها سندن نشأت ایتش واحسن تقویم اوزره طوغمش اولدوغنی کوسترمک ایچون یالکیز بر مثال ویرمکه اکتفا ایدم جکم؛ یوقسه بوتون ادبیات فارسیه نیک ثلثانی دلیل اوله رق ایراد ایدم بیلیردم . امین اولوکیزکه هیچ برملنک ادبیاتنده بن ، او قیمتده صوفیانه شعرلر بوله مادم . سلاست بیان و مظهریت شاعرانه اعتباریله مثلی اندر اولان (محمود شبستری) بوفکرلری - فی الحقیقه - سینیوزادن بر قاج عصر اول پک کوزل براسلوب اوزره تعلیم ایتشدی . (کلشن راز) نامیله مشهور و بعضی اوروپا لسانلرته مترجم اولان اثرنده (اصول تحقیق *méthode d'investigation*) ک صوفیه غندنده فاصل اولماسی ایجاب ایدم جکندن بحث آجدیغنی صروده :

تفکر : رفتن از باطل سوی صحره ... بمزئ اندر بربرده (کل مظهر)

دیورکه [تفکر باطلدن (یعنی کثندن)] حقه (یعنی وحدته) طوغرو کینمک و جزؤک ایچنده کل مطلق کورمک در !] دیمک اولور . سینیوزانکده مرادی آنجق بودر . بوراده (تفکر) ، تعبیری ، یهودی فیلسوفنک (ratio) کله سنه تماماً معادل و اونک عینی در .

متعاقباً (تفکر استدلالی *pensée discursive*) بی فلاسفه اسلوبنجه مراتب مختلفه سیله تعریف ایتدکن صوکره ، بو اوزون و طولامباج یولدن حقیقته وصول ممکن اولمادیغنی بیان ایدمک (لمة اشراق) یعنی الهامه مظهریت لازم کلدیکنی آکلاتیور :

ره دور دراز است این ، رها که !...
 در آرد رادی ایمنی که ناگاه
 درختی کربست انی انالته !...
 محققه را که از رحمت شهروست ،
 نخستین نظره بر نور و هودست .
 دل کز معرفت نور و صفا دیر ،
 زهر چیزی که دیر ، ازل خبر ایدر !...
 بر فکر ناگرا شرط ، تجربه
 پس آنک طبعی از (بره تأیید) .
 هر آنکس را که ایزد راه نمور
 ز استعمال منطق هیچ نکشود ! الخ !...
 هر موسی بلزمانه ترک نمک کن !...

یعنی : [بو ، اوزون اوزادی به کیدر بر یولدر ؛ اوندن واز کچ !.. سنده حضرت موسی کبی ، عصایی [°] بر زمان ایچون الندن براق!.. (وادی ایمن) . کل که ، سسکا - بردنبره - بر اغاج (بن ، اللهم !..) دیسین !.. محقق اولان آدم که - وحدتی کوره تیلیلر - اولیه بر کیمسه نك ايلك نظره سی وارلاق نوری اوزرینه معطوف اولور .

بروجدان که معرفتده نور وصافیت کورور؛ هر کوردوکی شیده اک اول اللهی کورور . ائی بر فکر ایچون برنجی شرط (تجرید abstraction) در ؛ اوندن صوکره دخی (بارقه تأیید) ک برلمه سی لازمدر . اکر رب متعال ، بر کیمسه به بوخصوصده (یعنی الهام ایل) رهبر اولمازسه استعمال منطق ایله هیچ یول آچه ماز ؛ (یعنی حقه واصل اوله ماز ا) الخ الخ !]

محمود شبستری نك بوكوزل سوزلری هیچ تفسیر ایسته مز . [معرفت ، یعنی (حقیقی معرفت vraie connaissance) نور و معرفت در !..] دیمک ، ده قارت نظرندمه مقبول اولان شرط حقیقتک دستورینی عرض ایتمکدر : [حقیقتی تمثیل ایدن بر فکر واضح ، بسیط برلمه تحسدر : simplici mentis intuitu] دیمکدر . ایران شاعری بو فکری برهاله نور ایچنده عرض ایدیور . سپینوزا دخی ده قارتک بوفکرینی - شرق اسلوبجه - نور ایله تشبیه ایده رک سویله مشدی ؛ مورخ نافذ النظر (هوفدینخ Hœffding) (دور اخیر فلسفه سنک تاریخی His. de la philos. moderne) نام اثر معتبرنده سپینوزانك (معرفت) دن نه قصد ایتمدیکنی ایضاح ایدرکن :

[اونك نظرندمه معرفتك (شكل اعلا forme suprême) سی (شكل تحسسی forme intuitive) در . (حادثات منفرده phénomènes individuels) اوشکلده - نظام عمومی نك نور یله مشبوع اوله رق - در حال وضوح تام اوزره کورونور .]

[*] بوراده شاعر نه ظریف کنایه لرله فکرنی سویلوبور !.. حضرت موسانك طور سیناده شاهد اولدوغی تجلیاتی ، تشبیهات شاعرانه سنه زمین اتخاذ ایدیور . موسا الهی عصا ایله بوله مادی ؛ عصایی براقدی . عصا منطق در ؛ سنده منطق براق !.. اکر محقق ایسه ک (وادی ایمن) یعنی صاغلام بر زمین تحقیقه کل ! الهامه کل که براغاج بیله بردنبره نور ایله لمان ایتسینده : (باق الله بنده و ارده در !..) دیسین . محقق اولان کثرت اشیاده وحدت حق کورور و ایلک نظره سی نور وجوده معطوندر !.. دیور . بوراده (وادی ایمن) استعاره سی صوکره درجه ده فطینانه در !..

دیور. ذاتاً فیلسوف یهودی، [حقیقتی تمثیل ایدن بر فکر تحدسی، نورکی در؛ هم ظلمت‌ری تنویر ایدر، همدکندینی اظهار ایلر !] دیمشدی. حالبوکه بونلری ایران شعرای صوفیه‌سندن دها ظریف، دها شاعرانه بر اسلوده سویلیه بیلمک ممکن دکلدر.

صوکره محمود شبستری (طریق احتجاج methode discursive) ی قطعاً رد ایدیور، حوادث جزئیده کل مطلق کورمکه (معرفت) دیور. بو معرفت منطق دکل، حیثیت و ماهیت اعتباریه بر نور حقیقت درکه بر آنده بیلدیریم کیی سریع و ضیا کیی واضح اوله رق وارد اولور. اوزون اوزادی به تفکر ایله حاصل اولماز. برلمه الهامدرکه بر آنده (اشراق illuminer) ایدر. بونورک لمعانی سایه‌سند هرنه کورولورسه اوند - اک اول - الله کورولور. ذاتاً اوله الهام (بارقه تأیید آلهی) در. بناءً علیه، بر حادثه جزئیده - بر حمله‌ده و بالتجربده - حقیقت مطلقه وصول، انجق بوسایه‌ده ممکندر. [*]

کورویورسکنز! سینوزانک اساس فلسفه‌نی تشکیل ایدن بواعقادی شرق دهای شاعرانه‌سی ایله بر بلاغت علویه ایله سویله‌مندرکه - شرقدن آلدیغی غربده صاتان - بوفیلسوف، محمود شبستری‌نک شوسوزلرینی دیکله‌مش اولسه‌یدی شبه‌سز مفتون و حیران اولوردی. چونکه ارنک بویوک کوکلنک عاشق اولدوغی شیلردر. ایران شاعرینک هریتی سینوزانک (اخلاق) کتابندن برفصلی تلخیص ایدر بر دستوردر. یالکیز بر فرق وار: سینوزا بودستورلردن، بوفکرلردن برچوق نتایج استخراج ایدرک بر (سیستم) وجوده کتیرمش در حالبوکه اکثر شعرای صوفیه بو حکمتی یالکیز ترم ایتمکه قالمشلردر. فقط سیستم یابانلری‌ده یوق دکلدر. احوالده (تجربه experience) مسئله‌سند سینوزانک فکری نه اولویور؟.. بوفیلسوف (اسباب علم) بحثنده (تدریبه empirisme) طرفداری می؟. یوقسه (عقلیه rationalisme) و یا خود (تحدسیه intuitionnisme) طرفداری می اولویور؟..

آیری آیری هیچ بری دکل، فقط هپنی توحید ایدر بر اعتقادی وار. ذاتاً

[*] حالا بوفکر مقبولدر. هله حقیقی شاعرلر بالتحدس تحصیل فکر ابتدکاری ایچون حقیقتک الهام ایله انکشاف ایده‌بیله‌جکته ایشانورلر. بزم حق برست و ملهم شاعرمن مرحوم فکرت: [براوروجک کوتورور حقه بی ا.] دیورکه سینوزانک تقدیر و تحسین ایله تلقی ایده‌جکی برسوزدر.

- بدایت بخنده سوله دبکم کبی - بو آدمک دهاسی (تألیف اضداد) ایدم بیلیمک قابلیتندم تجبی ایتشدرد. او، بومسلککک جملهنک اوسته جقمشدر: دربیله اصولی (جزوذن کله du particulier au général) کیمک دکلی؟ . اوده بو کیدیشی طوغرو بولوب توصیه ایدیور؛ فقط (ا-تقرا induction) طرفدارلری نک حرکتی وجهله، بر چوق حادثات جزئییه بی تعداد ایدوب، نهایت اونلردن بر (حکم کلی judgement universel) چیقارمق صورتیله دکل! . بوتورلوسنی بکنمیور؛ چونکه بو کیدیشه انجق بر (استقراء ناقص) پایله بیلیر. اوکا سینوزا (مهم تجربه expérence vague) دییورکه (بهی فن Bacon) ک (ساده جه تعداد ایله پایلان استقرا inductio per enumerationem simplicem) دیدیکی اصولدر. بر برینه مشابه بر چوق شیلری صابوب دیزمکه پایلان استقرا بو قییلندرد. فرضا تورلو تورلو اغاچلری علی الانفراد نظر مطالعه به آلوب، نهایت اونلک جملهنسندن - ماهیت جنسیه به دلالت ایتک اوزره - (آغاچ l'arbre) معناسنی استخراج ایتک کبی که، غیرمعین بر مفهومدر. اونک ایچون بوتورلو تجربه به، فیدوف مومی الیه (مهم) دیمشدر. او ایسته بوکا اعتبار ایتبور. نک بر آغاچ - اونک نظرند - کافی در. طوغرودن طوغرویه وبر آنده اوندن نظام عالمه، حقیقت مطلقه به - الهام ایله - واصل اوله بیلیمک ادعاکنده ر.

بوترز تفکر بر آزا افلاطونک دوشونوشنی ده آکدیرر؛ چونکه او حکیم یونانی دخی (ناقص imparfait) اولان بر (شیئ objet) دن (ماهیت کامله l'idée parfaite) سنه انتقال ایتک یوانی طوغرو بولور و بو طریق التزام وتعلیم ایدردی. فقط برندن دیکرینه بر آنده - الهام ایله - آطلامازی. محاسبات تدریجیه ایله (فکرکال l'idée de perfection) قدر اعتلا ایدردی که (dialectique) دیالکتیق) اصولی بودر. بوده (طریق احتجاج méthde discursive) دیمکدر. سینوزا برنجی ادعایی حقیقی بولویور؛ فقط ایکنجی سی یعنی (تدریجی محاکمه ایله حقیقه وصول) طریقی رد ایدیور. الهام ایله بر آنده حقه واصل اولویور. شو تقدیرجه، یعنی: عالم خارجی ده کی اشیای منفردی مبدأ حرکت اتخاذ ایتهمی اعتباریله، تدریپوندن صایلیر؛ چونکه تجربه حسیه ایله بانلیور دیمکدر. بر (شیئ) دن بر آنده حقیقت کلویه انتقال ایتهمی اعتباریله ده تحدسبونندرد. حقیقی - واجب، واضح و ساده بر فکر - عد ایتهمی، یعنی

(معقول بر مبدأ بدیهی (un principe rationnel evident) طائیفی طولانیسیله
دخی عقلیوندن صاییله بیایر .

تجربه لزومه - آری مجده اهمیت وریور. هم ینه جوهر تصورندن کیده رک
علمک انجق تجربه ایله تحقق ایده بیله جکنی اثبات ایدیور :

[وجود مطلق ایکی طور تجلیسی اولق اوزره یالکز روح ایله ماده یی
(یعنی ده قارتک تعبیرنجه فکر و امتدادی) بیله بیلیور. بوایکی (طور modalité)
عادتا وجود مطلق (صفات attributs) ی در. بونلری یکدیگرینه ارجاع اتمک
نمکن دکدر. روحدن ماده یی ماده دن روحی استخراج ایده مه یز. [*] موجوداتی
(حادثات روحیه phénomènes spirituels) کیی تلقی ایتدی کمز مدنجه (نظام
طبیعت l'ordre de la Nature) ی یعنی علاقه سبیتی ، وجود مطلق یالکز
(صفت روحیه attribut de l'esprit) سی ایله تعریف اتمه لی یز. طبیعتی (حادثات
ماده یی phénomènes matériels) کیی تلقی ایتدی کمز مدنجه دخی ، علاقه سبیتی
وجود مطلق یالکز (صفت امتداد attribut de l'extension) ی ایله تعریف
ایتمه لی یز ! .] دیور که بونک ترکیه سی :

[کائنات ، بزه روح و ماده اولق اوزره وجود مطلق ایکی طرز جلوه سی
عرض ایدیور. [**] یکدیگرینه ارجاعی قابل اوله مایان بوایکی عالمده اطراد
و انتظامی تأمین ایدن عینی (مبدأ علیت principe de causalité) در . فقط بز
حادثات معنویه یی تتبع ایده جکمز زمان قوانین روحیه یی رهبر ایدینه لی یز ؛ حادثات
ماده یی تتبع ایده جکمز زمان دخی قوانین ماده آرامالی یز !] دیمکدر . بوده -
اک واسع معناسیله - تجربه یی التزام و توصیه اتمکدر .

کور و بورسکمز که بوفوق العاده آدم ، بوتون مسالک متناقضه یی تألیف و توحید

[*] بوا دعا ماتریالیزمی ده رد ایدر ؛ سپریتوآلیزمی ده ! .

[**] سبینوزا بوکا چوق اهمیت وریور : (modi cogitandi) یعنی (اطوار
متفکره) دیدیکی شیلر منحصرأ معنویات عالمک حادثاتی در. الله بو حادثاتده صفت متفکره . یله
جلوه لر کوستریور. دیگر دخی (modi extensionis) یعنی (اطوار متمد) دیدیکی
حادثات ماده در که وقوعی بچون مکانه محتاج و مفتقدرد. الله بو حادثاتده صفت امتداد ایله قدرتی
کوستریور ، وبالطبع کائنات ماده و معنویه یی ذات ازلی و صمدانیسند و محیط و شامل
بولونبور. فقط اوتجلیاتی تتبع ایدر کن هر عالی کنندی قانون علیتنه کوره تدقیقه مجررز ؛
تجربه بو دیمکدر .

ایده رک پک کنیش بر فلسفه بناسی قورمشدر. چوق کشیلر کندی نقطه نظرلرینه کوره سپینوزا فلسفه سنه - رجتهدن - ادعای منسوبیت ایده بیلرلر. اونک ایچون آثار و افکاری بر چوق مختلف جریانلرک منجی اولمشدر. بواحاطه کلیه سندن طولایی درکه اکثر منقدرلر کندیسنه (عصرینک قطب متفکری) نظریله باقیورلر. هر حالده بو قدر جقله بویه بر متفکر داهی نك فلسفه سی ایضاح ایداش اولماز؛ لکن درسزک موضوعی تشکیل ایدن مسئله خصوصیه ایچون بو قدری کفایت ایدر.

بوفیلسوف (طبیعت Nature) حقدن کی فکر و اعتقادنی (جه نوردانو ورونو Geordano Bruno) دن آلمشدر. (عقلیه rationalisme) ایله (میخانیکیه mécanique) نظریاتی ده قارتدن تاقی ایتمشدر. فقط ایل کندی فلسفه سنک روحی (وحدت وجود) اعتقادیدر. ایشته بواعقادی شرقک دهایی عرفانندن آلمشدر. طوغرودن طوغرویه بزم صوفیه بی طانیوردی ظن ایتمه ییکز. (طالمود) ی او قومقله دهایی فلسفی سی انکشاف ایتشدی. بو وحدت وجود اعتقادی شرقده نورانی برادییات ایله لمعان ایتزدن اول، یهودی (قابالیزم cabalisme) ی تأسس ایتشدی. قابالیزم باشدن باشه تصوفدر. فقط تصوفه بوتون رنگ فسوتنی بخش ایدن ایرانک لایموت شعراسی اولمشدر.

آلمان فیلسوف مشهوری (لایب نیچ Leibnitz)، ده قارت کیچی عمومی و واسع بر دهاییه مالکدی. سپینوزا ایله کروشودکی وقتلر هنوز کنج ایدی. اونک افکارندن طوغرودن طوغرویه متأراولمش، فقط فلسفه سی قبول ایتمه دکدن ماعدا اوکا قارش قویق ایچون چالیشمش وکندی نامنه نسبتله مشهور اولان سیستمی وجوده کتیرمشدی.

(لایب نیچ) هنوز چو چوق ایکن فلسفه عالمده د قارتک تأثیریه بر طاقم مهم پرنسیپلر تعین ایتش و اکثریت متفکرین غندنده قبول و مسلم اولمشدی. ده قارتک میخانیکیت نظریه سی (حرکتک دوام و بقای - continuité et conser vation du mouvement) نی بر حقیقت اساسیه اولمق اوزره متضمن بولونوبوردی. (منساقیت automatisme) فرضیه سی ده ذهنلری راحتسز ایدیور؛ فقط میخانیکیت نظریه سنه مربوط بولوندوغی ایچون قولای قولای رد اولونه میوردی. حاجوکه بومبادی، ارادتی، علت غاییه بی تعریف ایتک شویه طور سسون، اونلری قطعاً

وصراحتاً رد ایدیوردی . کائناده (علت غایه cause finale) ی انکار ایتک (مقصد خلقت but de la création) ی انکار ایتک دیمکدر . اوپله اولنجه بر خالقك وجودینه لزوم قالماز . نته کیم ئه بیکوردن متأثر اولان مشهوراولان انکلیز فیلسوفی (هوبس Hobbes) ایله فرانسمز (لامهتری Lamettherié) بوتیجه بیوسته اولمش و ماتریالیزم اوزره قرار قيلمشدی لر . [۰]

صوکره سپینوزانك جوهر و (اطوار وجود modalités d'existence) حقیقه کی فکر لری ونه ایت (وحدت وجود panthéisme) اعتقادی ، الهی طبیعتک ایچنده مستغرق کوستره رک عاقت انکاره قاپی آجیوردی . هیچ اولمازسه الله ایله طبیعتی بر طوتمق خطاسنه میدان ویریوردی . دیگر طرفدن روح ایله جسمک مناسبتی مسئله سی - سپینوزانك توحیدینه رغماً - لایب نیچ نظرند بر (معما) اوله رق معلقده قالمشیدی . بو آلمان فیلسوفی کائناده بر آهنك علوی کوروپور و روح ایله جسمک علاقهنده او آهنك بر جلوه سی عد ایدیوردی . بک ای بیایوردی که بونی انکار ایتک بر خالق مدبرك عاقل و علیم صفتلرنی انکاره واره جق در . حالبوکه کندیسی (ادیان موضوعه و رسمیه religions positives) به - بک اوقدر - منسوب اولماقله برابر (دین طبیعی religion naturelle) به اینسانور ، و - بهمه حال - دین ایله فلسفه احکامنی تألیف ایتک املندن واز کچه میوردی . اونك ایچون (سقولاستیق) فیلسوفلرنك اصولنی ویتنی مستحسن کورمیور دکلدی .

دیگر طرفدن انکلترده (جون لوق John Locke) (بهی قن Bacon) ک آجیدینی چیغیری کمال جساتله تعقیب ایده رک بوتون معلومات بشریه نك محصول تجارب اولدوغنی قطعاً ادعا ، و بالتیجه ده قارتک (افکار وهیه idées innées) نظریه سنی وراسیونالیزم فلسفه سنی طاقیله رد وابطال ایدیوردی .

[*] بو انکلیز فیلسوفی ده زماننك داهیلرندن وهر زمانك بیوک متفکرینندن در . حسب فلسفه سندن متأثر اوله رق ماتریالیزمه قدر وارمشدر . نته کیم (پاپاس غاسساندی le Père Gassendi) دخی عینی نقطه دن حرکت ایده رک (آتومیزم) ده قرار قیامشیدی . بو مهم فیلسوفلردن - مع التأسف - بوراده بحث آچادم . مقصدم تاریخ فلسفه یازمق دیکل ، انجق او تاریخدن سزه - بالکز بر بحث ایچون - بعضی مثاللر عرض ایتکدر . تعقیب ایتدیکم سلسله ملاحظات ایچون هانکیسی ایشمه کلدیسه آنجق اونك افکارنی بک مختصر بر صورتده کوسترمه کچالیشدم . معافیله لایب نیچ (هوبس) دن متأثر اولمش فقط اونك ماتریالیست فلسفه سنه قارشو بوسبتون (سپیریتو آلیست) بر سیستم ایله مقابله ایتمشدر ..

كذلك فرانسز فيلسوفى (بهيل Pierre Bayle) ، كان وقدرة آلهيه ايله
(شر اخلاقى mal moral) نك وجوديى تأليف و حسن صورته تعريف ايتك
ايچون علمای آلهيونك بيان ايتديكى افكار و اعتقاداتى - هيئت مجموعء سيله - رد
و ابطال ايده رك ، عيى زمانده مقدرات ، ثناته حاكم بر (مبدأ خير = principe
du bien) برده (مبدأ شر = principe du mal) اوله مایه جغنى كوستريور و
(لايب نيچ) ك - هر مسئله يى احاطه ايتك ايستين - دهاسنه بر مهم و سيله تفكر
احضار ايدىوردى. بوتون بوجريانلردن ماعدا بر سور و مسائل تاليه دخى واردى.
حقيقتاً بودور ، تاريخ فلسفه ده بك پارلاقدر : افكارك شدته چالقا ذيقى زمانلردن بريدور.
ايسته لايب نيچ بويله بر زمانده يتيشدى و بويله جريانلر قارشينده بولوندى
بولرك جمله سنده كندنجه جوابلر بولدى كه اونلردن يالكز بر قسمى بوراده
بزى علاقه دار ايدر .

اولا - ده قارتك ميخانيكيت نظريه سنى ناقص بولوب بكنمى بن - بو فيلسوف
حركت بدل بر (قوت force) قبول ايدىيور كه حركتك علت مستقلة و غير
ماديه سى در . بنساء عليه لايب نيچك فكر نجه باقى و دائم اولان حركت دكل
(قوت) در . [°] نته كيم يالكز امتداد ، حيزت مادى افاده كه كافى دكلدر . امتداد
مكان مجردك خاصيت اصليه سى در . اساساً ماده نك كيفيت ذاتيه سى (مقاومت =
antitypie يعنى = resistance) ايله در .

لايب نيچ ، ده قارتك بو (ثنائى dualiste) اعتقادينه يعنى بوسبوتون عاطل
بر جوهر ممتد ايله بر (جوهر متفكر) اينانما سنه تعريف ايدر كن قدرت دهاسنى
اثبات ايدىيور ؛ چونكه اوزمانه قدر كي مسكه سيله مدبكي و بوله مادى يى بر حقيقت كشف
ايدىيور كه بوكونكى بسيقولوژى تدقيقاى ايله مصدق در ، و اهميتى بك بويوكدر .
ملاحظات اعتراضيه سنى ، سزه بوراده بر قاچ سطرله مختصرأ عرض ايتكه چاليشيم :

[*] بوكون حالا بوايكى مختلف اعتقاد ، ايكى مهم سيستمك . اساسى تشكيل ايده ر ، و هر
ايكيسنك دخى طرفدارى واردر . برينه (نظريه حر كيه = theorie cinétique) ديرلر كه
واضع اولى ده قارتدر . ديكرى (نظريه قوانين = theorie dynamique) در كه الملك مؤسسى -
كورولوبور كه - لايب نيچ در . فن ما كنده معاصر ن علماء لك بويوكلرندن و (بون Bonn)
دارالفنونى علماء سندن آلمان (كلاوزيوس Clausius) برنجى نظريه يى مدافعه ايتمشدر كه
علم ما كنده ماترياليست اعتقادى بونظريه تمثيل ايدر . بلچيقا هاماى كاشفينندن (غوستاو
آدولف هيرن G. A. Hirn) او كافارشى (نظريه قوانين) يى شدته مدافعه ايله مشدر كه
بوده - بيريتر آيزمك ممثلى در . زمان ، كيتدكه (نظريه حر كيه) به حق و برييور .

[جوهر متفكر وجوه متمد فرضیه سی باطل و ناقص در . كرك مغنویات ، و كركه مادیات عالمند بر سورو حادثات متسلله وارد كرك نه منحصرأ فكر ایله ندهه یالكنزجه ماده ایله تعریف اولونه ییلیر . اكر روح تعبیرندن مقصد ، (مشعور conscience) اولان فكر لر مترك هیئت مجموعه سی ایسه و بلكمز بوندن عبارت ایسه ، او بیلكرجه (مینی مینی ادراكات petites perceptions) ك [*] وقوعی ناصل تعریف ایده ییله جكنز ؟ . بو (مبهم و مشوش حسیات sentiments vagues et confus) قطعاً تحلیلله کلیور ؛ بر دستورده باغلانوب تعریف اولونه میور . نظر شعور مزدن مخفی قالان و یا خود قاچان بو مبهمات ایله روح مز طولودر . او یله بر طاقم (احوال روحیه états d'âme) مز وارد كرك اونلرك هیچ بریسی (معین و متمساز بر صورتده d'une façon distincte et déterminée) ادراك ایده میورز . و ایده مییز . چونكه اونلر شعور مز بوقدر . مثلاً دهرین بر اویقویه طلوب قالان و رؤیاده كورمه یین بر آدمده ؛ و یا خود باییلوبده بیوش یاتان بر کیسه دهه - علامم حیات signes de vie - اولدوغی حالدیه هیچ بر طویغویوقدر ! . ده یه بیله جكمییز ؟ . ده یه بیله جك ایسه ك او حاده روحی ده یوقدر ! . دیملییز . [*] وارد ! . ده یه جك ایسه ك او تقدیرده دهه - تمامیه (حیات جسمانی vie corporelle) یه مشابهه - بی شعور بر روحی اولماسی لازم كله جكمی قبول ایتهمك الدن كلز ! . وجدانمرك اعماق مظلمه سنده حصوله كلن پوحادثات روحیه یی (جوهر متمد) ایله تعریف ایده مییز ؛ چونكه مادیات متعلق شیلر دكلدر . (جوهر متفكر) ایله ده تعریف

[*] بوتعبیر ، باللات (لایب نیچ) ك در . جون لوفك فلسفه سی تنید ورد ایچون یازمش اولدوغی : (nouveaux essais) نام اثرنده وارد . بو آلمان فیلسوفی ا كثر اثرلری و اك مهملری فرانسیزجه یازمشدی .

[**] غربیدركه بو كفیت ، (یعنی دهرین و بقو و بایغینلق اشناسنده ، كندندن بوسهوتون كچن آدمرك حان) فرون وسیطی سقولا ستنق لرینكده نظر دقتی جلب ایتمش و احوالده (روح) ك نه اولدوغی و نزهه كیتدیكى بر مهم مسئله اولمشدی فقط سقولا ستنقلر روحی (بر جوهر بسیط نورانی) اولقی اوزره تلقی ایده كلكلاری ایچون بر تورلو ایشك ایچندن چیقه مامشلدی . اسلاف مقدمینك بو باده كی نظریاتی قبول ایده رك (نفس نباتیه) ، (نفس حیوانیه) و (نفس ناطقه) ناملریله بر روح مثالت فرض ایتمكله دخی او حادثه یه بر معنا و بر مكممكنی دكل ایدی . چونكه ماهیئت مسئله : (بایغینلق اشناسنده كیدوب صوركه ینه كلن نفس ناطقه ك . نیچون ، ناصل و نزهه كیتدیكنی) تعریف ایتكدر . بعضی فرضیه لر بعضی حادثاتی تعریف ایده مه مكمله چورورلر . بو ایشته اوكا بر كوزل مثالدر .

ایده‌مه‌یز ؛ زیرا تفکرله مناسب‌تری یوقدر ؛ (غیر مشعور *inconscient*) ، حتی
(غیر قابل ادراک *imperceptible*) درلر . [

بو ملاحظات جدیده کوس‌تری‌یورکه (لایب نیچ) روح بشرک - حدودی نا
معین و قمری نایاب - بر عمان اولدوغنی هرکسدن اول دوشونمش و هرکسدن
ابی آ کلامشدر. شبهه بوق که ایلك دفعه اوله‌رق بو حقیقت روحیه‌یی کشف‌ایدن
کندیسی‌در. هم بو کشفنک اولانجه قیمت و اهمیتنی لایقله ادراک ایتش اولسه
کرکدر. چونکه - بنم تحقیقمه کوره - بوتون فلسفه‌سی اورادن نبعان ایدیور.
مثلا حقیقت بدیهیه وصول ایچون ده‌قارت طرفدن ترصیه اولونان (لوح املس
table rase) اصلونه اعتراض ابتدیی زمان (لایب نیچ) وجدانی بالمله افکار
و اعتقاددن تبریه و تخلیه ایتک امکانه نیچون اینانانه مدینه‌نی کال صراحتله سویله‌یور:
[وجدانمزی بالمله افکار و اعتقاددن بوسبوتون تخلیه ایتک امکانی یوقدر.
فرض ایدلسه بیله بونک حکمی یوقدر. چونکه وجدانمزا فکار و حسیاتدن عبارت
دکدر. نیجه نیجه (تمایلات *tendances*) ، (مشتهبات *appetitions*) ، واردرکه
روح‌زک اعماق مظلمه‌سنی تشکیل‌ایدن (حالات غیر مشعوره *états inconscients*) -
دندر. بونلر ادراک اولونه‌مازکه اولردن تبری ایتک ممکن اوله‌بیلرین !. ادراک
اولونه‌بیلن حالات و حسیات ایسه حادثات وجدانیه‌نک یک محدود بر (قسم
عالی) سی‌در. بنسأ علیه وجدانمزی (محتویات *le contenu*) ندن تخلیه ایدرک بر
(لوح املس) کبی دومدوز و صاف بر حاله کتیره بیلمک ادعاسی برظن باطلدر. [
دیور و یردن کوکه قدرحق وار. عصر من فیلسوفلرندن (هارتمان *E. Hartman*) ،
بوفکری (اعمال *élaborer*) و (اکال *perfectionner*) ایدرک (*la philosophie*
de l'inconscient) نامیله بر واسع ساحه تبیع آچدی . پی‌یقولوزی بو ساحه
مجهوله‌ده کشفیاتنی تعقیب ایدیور .

دیمک اولویورکه (لایب نیچ) ک بالذات - *nouveaux essais* نام اثرنده -
ادعا ایندیکی کبی: [روحده] شعوره مقارر اولان فکر (*pensée consciente*) دن
ماعدای باشقه بر شیده وار: غیر مشعور بر حیات وارکه فکر ایله عالم طبیعت
آره‌سنده بر (خط اتصال *trait d'union*) تشکیل ایدیور !

کذلک جوهر ممتد فرضیه‌سی‌ده ماده‌یه تعلق ایدن حادثات متنوعه‌نک هیچ
برخی ایضاحه مقتدر اوله‌میور . اگر ماده صحیحاً (عاقل بر امتداد *étendue*

(inerte) ایسه (جاذبه attraction) ، (حرارت chaleur) ، (ضیا lumière) ودها بوکچی شیلر ندر؟ ده قارتک فلسفه سی بو کیفیات و حادثاتی انکارایدن من ، چونکه بدیهیاتدندر. حالبوکه تعریف ایدن من ، زیرا ماده یی تماماً عاطل فرض ایدن رک اوندن بر (کیفیت اصلیه propriété essentielle) اولمق اوزره آننجق (امتداد) دن باشقه بر صفت کورنمبور. بالکنز امتداد ایله جاذبه ، حرارت ، ضیا البته تعریف اولونه اوزه اولونمق ایستنیلیرسه ثولو بر ماده دن حیاتک ظهوری هیج یوقدن بر شینک وار اولدوغنی قبول ایتمک صورتیه اوله ییلیرکه بونی ده عقل تسلیم ایدن من .]

بو ملاحظاته اتباع ایتمکندن طولانی درکه (لایب نیچ) ، (تمادی واتصال continuité) اعتقاد ایدیور. یعنی ماده جامدند. انسانه کلنجیه یه قدر بوتون موجوداتده - علی مراتبهم درجه درجه یو کلمک اوزره - اثر حیات کورویور؛ [*] وینه بو سببله ده قارتک تعلیمات میخانیکیه سنده تصور کورویور: (علم ماکنه la science mécanique) ایچون عاطل بر ماده ایله (حرکت mouvement) کفایت ایدر. فقط طبیعتی آکلامق و حادثاتنه معنا ویرمیلیمک ایچون دها ایلری یه کیملی یز؛ کوزه کورون (کننه masse) ایله حرکت مفهومندن دها عالی برفکره ارتقا ایتیملی یز. حرکت و ماده بختده قالدجه ریاضیات و ماکنه علملرینک دائره سندن چیقما یز. حالبوکه اوحدودی آشمالی ، بو حادثات میخانیکیه نک علت حقیقیه سی مابعدالطبیعانه آرامالی! . [*] - بالذات عاطل ظن اولونان - مادنک ایله حرکتکده [*] بو ادعایه مقابل اراق اوزره بوکون بعض فیلسوفلر بر جریان افکار آجدیلر . (phil. de la discontinuité) دیدکلری اودر .

[**] لایب نیچ ایله علامه شهیر (نیوتن Sir Isaac Newton) معاصره وشدنله یکدیگریه رقیب ایدیلر. حساب تمامی و تقاضایی اول (نیوتن) و برارصورکه لایب نیچ مستقل کشف ایتشلدی. انگلیز عاتک مابعدالطبیعیه اعتمادی یو ندی. هله مفهومات مابعدالطبیعیه یی علوم طبیعی مسائلنه هیچ قاریشدر ماقمق لزونی توصیه ایدردی. (ای طبیعیات! مابعدالطبیعیاتن صافین! oh physics, beware of metaphysics) دیدیکی مشهوردر. بوی ، تحقیقات علمییه ده رهبر اوله جق بر دستور اتخاذ ایتشدی. بوکون علوم ، بودستوره رعایتی بر لازمه احتیاط اوله رق تلقی ایدیور. حالبوکه (لایب نیچ) ک ادعایه طبیعیات ، مابعدالطبیعیات ایله اکلاشیله ییلیر. یوقسه بالکنز باشنه مناسبز قالب - معاصریندن مشهور (میل Mill) دخی بوکا یاقین برفکر بیان ایتشدر: (هر حادثه طبیعیه نک ضمننده بر مسئله مابعدالطبیعیه واردر!) ایدیور. بوا یکی فکر ، حالا اعتقادات فلسفیه منک ایکی قطبی تشکیل ایتکده در.

وجودینه سبب اولان عامل حقیقی بی ، یعنی (علت قیمه cause permanente) و حقیقیه بی انجق مابعدالطبیعیاتده بوله بیلیرز. ایشه او ، (قوت force) در. قوت حرکتک سبب حقیقیسی اولدوغی کیی ماده نکه ده عامل صحیحی در . امتداد ایله توصیف و عطالت ذاتیه سیله تعریف اولونان ماده ، هیچ مادی برشی دکلدر . قوتک انکشاف و انتشارندن عبارتدر. چونکه ماده ده اصل اولان (صفت qualité) ده قوتک ادعاسی و طرفدارانک ظنی وجهله (امتداد) دکلدر ، (مقاومت antitype = résistance) در . اوله اولماسیدی ، (مکان مجرد) ایله ماده نکه هیچ فرقی قالمادی . حالبوکه بویوک برفرقی واردر. ماده بزه مقاومت ایدر . مقاومت دیمک ، قوت دیمکدر . ماده نکه اصلی قوتدر . مکانه یایلان و هرجهته انتشار ایدن قوت بزه ماده شکنده محسوس اولویور ؛ بو حسی بزه القسا ایدن ، اوقوتک (جهد effort) ی درکه مقاومت صورتنده اجرای تأثیر ایدیور . (مادیت matérialité) یوقدر ؛ او یا ککش بر فکدردر . بر ظن در . مادیت - نفس الامرده - (قوت منتشره force extensive) دن عبارتدر. خلاصه عوام ناسک و اکثر فیلسوفلرک آکلادینی کیی ماده یوقدر . یالکز فعال و جوال ، کندی کندینه قائم ، دائم و (مقاوم resistant) بر قوت واردر. ایشه (جوهر حقیقی vraie substance) اودر . خطادن سالم و صحیح بر فلسفه مابعدالطبیعه (قارتیهن cartésiens) لرک قبول ایتدکلری (عاقل کتلهل masses inertes) ی [*]

یهوده و لزومسز بولدوغی ایچون طانیاز. عطالت یوقدر . [

[هر طرفده فعالیت واردر . حرکتسز جسم اوله ماز . جهدسزده جوهر اوله ماز.] [**]

قوت ، المان فیلسوفک فکرنجه ، بر (مفهوم مابعدالطبیعی notion métaphysique) در؛ چونکه اونی طوغرودن طوغرویه تلقی ایده مهیز ، طوته مایز . یالکز (تأثیرات effets) ندن استدلالاً وجودینه حکم ایده بیلیرز. ایشه ماده دیدیکمز شی ، اونک تأثیریدر ؛ (تأثیر جهدی l'effet de son effort) در . بنسأ علیه ماده - حقیقت حالده (غیری مادی immatérielle) در . ایشه خلاصه و بک قیریق دوکوک بر صورتده عرض ایتدیکم شو فکدرلر (لایب نیچ) فلسفه سنک عمده

[*] یعنی هرکسک آکلادینی وجهله مادیات .

[**] بوسوزلر فیلسوفک کندی بیاناتی در .

اعتقادیدر؛ وشوماهیته نظراً اوکا (ایده آلزم متافیزیکی *idéalisme métaphysique*) نامی ویرلشدركه (افكاریه مابعدالطبیعیه) ترکیب غریبی ایله ترجمه ایده بیلیرز. جوهر حقیقی قوت اولونجه ، سینوزانك بوخصوصده کی تعریف مشهورینی دخی تبدیل واصلاح ایتك ضروریدر . بناءً علیه لایب نیچك اعتقادنجه (جوهر ، کندی کندینه موجود وتصوری باشقه برشینك تصویرینه غیر محتاج اولان بروارلق) دکلدر . موجود حقیقی - واقعا - جوهردر؛ فقط جوهر بالذات فعالدر . (وار اولوق فعال اولوق دیمکدر *exister c'est agir*) . [هر جوهر فاعل موثردر . هر (فاعل مؤثر *agent*) . دخی جوهر ده نیلیر .] [*]

بوتون بوملاحظات شخصی و (بداعیه *originales*) سنه رغماً ینه پك چوق معاصر فیلسوفلر (لایب نیچ) ی (سبنیوزیست *spinoziste*) یعنی سبنیوزا طرفداری ظن ایدیورلردی ؛ چونکه جوهر حقنده هر ایکسینك ملاحظاتی آره سنده پك فرق اولمادیفی بیلورلردی .

آلمان فیلسوفی کندی حقنده ویریلن بویا کلتش حکمه شاشیور وفلسفه سنك اصل (سیستم *systeme*) نی تشکیل ایدن (مونادولوژی *monadologie*) بی اشهاد ایله بویا کلتش فی تصحیح ایچون غیرت ایدیور . [*] فی الحقیقه بوتون مونادولوژی ، شیمدی یه قدر مختصراً عرض ایتدیکم تفکرات مابعدالطبیعیه ک نتیجه سی در ؛ وسبنیوزانك مذهبندن اساساً وقطعاً فرقلی بر فلسفه نمونه سیدر .

سبنیوزانك الله تسمیه ایندیکی جوهر حقیقی ، (ماده) نوعندن برشی دکلدی ؛ کائنات ماده ینه کضمنده مکمون برقوت ایدی . طبیعتک نوعما روحی ایدی . بو حیثیتله (یکانه ونا مناهی *unique et infinie*) اولوق ضروری در . [* * *]

حالبوکه لایب نیچك (موناد *Monade*) لری بردانه دکلدر . برچوقدر وهیچ

[*] لایب نیچك کندی دستور : *Omnem substantiam agere; et omne agens substantiam appellari.*

[* *] بالخاصه (آرنود *Arnaud*) یه یازدینی بر مکتوبده بیان حیرت ایدیور وسبنیوزایه ایچون ونه قدر بکزمه دیکنی ایضاح ایلور . ده قارت طرفدارلرندن اولان بو (آرنو) پك کوزل بر منطق مؤلنی در .

[* * *] (فلاسفه رواقیون *les stoiciens*) دخی برازبوکا بکرزبر اعتقاد بیان ایتشلردی . اولنرده سبنیوزا کیبی طبیعتی یکپاره وحی جانلی بر وجود حد ایدرلی . والهی اوجسم طبیعتک روسی اوانق اوزره تلقی ایدرلردی . بو اعتقاد دخی عرفان اسلامه انتقال ایتشدو . اضروملی ابراهیم حقیک (معرفتنامه) سنده بن عیناً کوردوم .

نامتناهی دکلدرلر. حتی بررلریله مناسبته بولونه مازلر. بناءً علیه برلشوب یکوجود اولمالرینه قطعاً احتمال یوقدر. اگر سینیوزانک ظن ایتدیکی کیی حقیقته یالکیز برقوت، بر جوهر یکانه موجود اولسه یدی، بوتون موجودات سائر عاطل اولماق اقتضا ایدردی. حالبوکه عالمده کوردو کمز موجودات تمامیه بونک عکسفی اثبات ایدیور. بوتون مادیات وجادات یکدیگرینه قارشى مقاومت ایدن برر (قوت منفرد و مستقله *force individuelle et indépendante*) در. ذوی الحیانه دخی - ینه عینی صورتله - بر طاقم ارواح منفرد و مستقله کورو یورز که هر بری کندی ارادتیه و کندی مسئولیتی ادراک ایده رک فعال بولون یور. بونلرک جمله سیده آیری آیری ارواح مستقله در. فردی و غیر مادی (وارقلر *êtres*) در.

[وحدت وجود اعتقادینه پیوسته اولان سینیوزا بو (موجودات فربه *existences individuelles*) بی (برکل مجموعی *un tout compacte*) ده محو و افسا ایتدیکی ایچون اک یا کلس و قسا بر عقیده وجود ویرمش در؛ چونکه حقیقت حالک عکسغه بر حکم ویرمش در] دیه حکم ایدیور.

بوراده کورولویورکه (لایب نیچ) شدله و قطعیا (*individualiste*) در. حالبوکه (سینیوزا)، صراحتاً (*panthéiste*) ایدی. (فردانیه) ایله (وجودیه) مذهبی - شیمدیلک - تألیف ایتک ممکن دکلدر.

بو (موناد) لرک ماهیتی تعریف ایدرکن، (لایب نیچ) کندنبه معتبر اولان نظریه معرفتی ایضاح ایتش اولویور.

موناد دیدیکمز بو منفرد موجودیتلر بر طاقم (قوای ابتدایه *forces primitives*) در. اونلری (نقاط هندسیه و فیزیکیه *points mathématiques et physiques*) یه تشبیه ایده یلیرز؛ ابعاد نلته دن قطعاً محروم اولدقلى ایچون، نقاط فیزیقه دن متمسازدرلر، آنجق نقاط هندسیه یه بکزرلر. فقط بالذات (فعال و مختار *actif et libre*) برر روح اولدقلى ایچون دخی نقاط هندسیه دن اساساً فرقلی درلر؛ و عالم خارجیده فی الحقیقه موجود بولونمەلری حیثیتله نقاط فیزیکیه یه بکزرلر. خلاصه مونادلر (روحانی و غیر تمتد آتوملر *des atomes spirituels inétendus*) درلر. لایب نیچ اونلره (نقاط مابعد الطبیعه و جوهریه *points métaphysiques* ou de substance) دیور. بو مونادلرک عالم خارجی ایله هیچ بر مناسبتلری یوقدر. اونلرک بوتون تبدلاتی، حسیاتی افکاری، لدنی در؛ یعنی منحصرأ کندیلک لرندن

حاصل اولور. برمودادک دیکر لرله قطعاً (تأثيرات متقابله actions réciproques) سی
اولوق ممکن دکدر. آلمان فیلسوفی بوغریب فکرینی لایقيله آکلایمیلک ایچون
تشبیهی برطرز بیان اختیار ایدیور :

[مودادک هیچ بر بنجره سی یوقدرکه اورادن بر شی کروب چیقہ بیلسین]
دیورن . [*]

اوندن طولاییدرکه کاشانده بر برینه مشابه ایکی (موداد) یوقدر . هر موداد
باشلی باشنه بر عالم ، بر (کاشات univers) در . اونلرک هر بری بر (دائرة
مسدوده cycle fermé) تشکیل ایدر . ننه کیم فیلسوف ، (اونلرک بنجره لری
یوقدر .!) ده یه رک مناسبته بولونه بیلمه لری احتمالی انکار ایتشدی .

بویله غریب بر نتیجه یه پیوسته اولونجه ، مبحث معرفت مسئله لرینه فاصل
جواب ویریه بیلیر ؟.. اولاً بو اعتقاد - حقیقت حاله نظراً - (باطل بدیهی
absurde) کورونور ، چونکه بالعکس یکدیگریمزله مناسبته بولوندوغمز ،
بر بریمزک معنویتی ، حتی فکر ویتنی آکلایه بیلدیگمز بیله تجربه عایه ایله ثابت
ومتحقق در . قوانین طبیعیک و نظام مالک دلالت ایتدیکی وجهله ، یکپاره بیلدیگمز
بوکاشاتی ، (مودادلر) نامیله نامعدود (نقاط مابعدالطبیعه) یه ارجاع ایدوب
اوقالارسق و اونقطه لر آرمسده هیچ بر تماس ، هیچ بر مناسبت اوله مایه جغنی
ادعا ایدرسک هیچ بریشی تعریف ایدمه یز . علمک تحقق ایدیه بیلمه سنه دخی قطعاً
امکان قلماز . حالبوکه بو بداهتاً باطلدر . بونک اک بویوک دلیل ده بالذات (لایب
نیچ) در . چونکه فلسفه سنی ، دوشونجه لرینی یازمش و بزلره (نقل ایتک
communiquer) ایچون یازمش . دیمک که مودادلر (یعنی بوراده بزم روحلرمز!)
آرمسده (مناسبت communication) امکانه قطعاً اینامش ..!

سپینوزایه بوتورلو اعتراض ایتکه حقمز اوله مازدی . اوفیلسوف کثرت اشیا
وتنوع افرادی ، (وحدت اصلیه unité originelle) یه ارجاع ایدوب وجودیه
فلسفه سنده قرار قیلدینی ایچون ، - اونک رأینه کوره - حقیقتده سنک بنم وجودم ،
سنک بنم ادراکاتم یوقدی . بزمه کورن ، حس و ادراک ایدن هب (وجود

[*] مودادولوژی ده مدرج بولونان بو جمله مشهوره ک اصل عیناً شودر :

[elle, (la monade) n'a point de fenêtres par lesquelles quelque chose puisse
entrer ou sortir.]

مطلق) ایدی؛ طبیعی در که بزم کبی واسطه لک عرض ایتدیکی تنوعات واختلافات
 صوریه نظر آگورگو وحس وادراک عینی شی ایدی. اونک ایچون ادراکات شخصیه
 آره سنده ائتلاف نام واردی. حالبوکه سینیوزا طرفداری اولوق شویله طورسون،
 اونک تماماً ضد نفیضی اولان لایب نیچ (بوفردانیه individualisme) اعتقادیه
 بداهتی، یعنی یکدیگر مزله (و کائنات محیطه l'Univers ambiant) ایله مناسبت
 صریحه مزی ناصل تعریف ایده بیله جک ۱۱.

باقیکز ناصل تعریف ایدیور:

[اوت ۱. هرشی مونادلردن متشکلدر. ماده دیدیکمز شیر بیله او (قوت -
 نقطه لری points de force) ندن مرکبدر. قوتک مکان مجردده انکشاف
 وانتشاری، مادیاتده حس ایتدیکمز و (ماده نك کیفیت ذاتیه سی la propriété
 essentielle de la matière) عد ایتدیکمز (مقاومت résistance) ک باشلیجه
 سبی در. یوقسه حقیقته ماده، قوتک جلوۂ انکشافی در. هرکسک ظن ایلدیکی
 کبی (مادی ماده) یوقدر. فقط مونادلر یالکیز یوقدر دکل، اونلرک انواع
 نامعدوده سی واردر. ذوی الحیاتک کافه سی ده عینی صورته مونادلردن متشکلدر.
 ساسله حیاتده قابلیت حس وادراک ادنی درجه سندن طوتوکزده اک اعلا
 مرتبه سنه. مثلاً بر افلاطونک بر ارسطونک (دها le génie) سنه وارنجیه قدر
 هر درجه یی تمثیل ایدر مونادلر واردر. بونلرک بعض اوصافی وقابلیات ذانیه لری دخی
 واردر. هربری (perception ادراک)، (tendance میل) و (appetition
 اشتها) قابلیت مالکدر. بوقابلیات مفظوره درجات ساقله ده بولونان مونادلرک
 جله سنده موجوددر. فقط درجات عالییه یی تمثیل ایدن مونادلرده قابلیت مذکوره دن
 ماعدا برده (aperception) [*] واردر. اولکی مونادلر (esprits نفس لر) در.
 اینکنجی نوع مونادلر ارواح (âmes) در. بونلرک هربری ده بر (قدردت energie) در.
 دنیاده بونلردن باشقه موجودات یوقدر. بونلر باشلی باشنه برر کائنات اولدوغی
 ایچون وهله یکدیگر لریله مناسبتده بولونه مادقلری ایچون بوتون (حسیات وافکار) لری
 کندی کندیلرندن تلقی ایدرلر؛ کندی سرمایه هویتلرندن آلیرلر. بناء علیه سنک
 ایله نم، شونک ایله بونک هیچ برمناسبتی و تماسی یوقدر. مع مافیه سن وین برچوق
 [*] آلمان فیلسوفنک بوکله یه ویردیکی معنا (تعقل ratiocination) و (تخیل
 imagination) و (تصور واستحضار représentation) در.

احواله - بوقاری آشانی - عینی صورتله دوشونوب، عینی صورتله حرکت ایدیورسه ق بونک سبب حقیقی می شودر که ازلی اولان موندلری ابتداء خلق ایتیش اولان الله عینی قابیلرله مفسور اوله رق یاراشددر . ایشته بر بر مزی آکلایشمزه سبب (بواهنک ازلی Harmonie préetablie) در . یوقسه آره مزده بالفعل مناسبت یوقدر . [*] اوندن صوکر اهر بریمز هر خصوصده (بانتمیل یعنی قیاس نفس ایله (par analogie) حکم ایدرز ؛ بو حکم میانه ده اوته دنبری جایگیر اولان (آهنک ازلی) سبیلله متوافق دوشر [ح .

ایشته موندلولوزی نك اساسی و خلاصه سی بودر ، و کوروپور - کز که لایب نیچ مبحث معرفت مسئله لینگ عمده سی تشکیل ایدن (معمای ادراک l'énigme de la perception) ی ناصل حل ایدیور . هیچ بر (موند) عالم خارجی ایله (یعنی بو تقدیرده سائر ارواح و انفس ایله .) تماسده بولونه ادینی حالده ینه بر جوق حسیات و افکاره مالک اوله بیلورسه اونلرک هپسنی کندی ماهیتدن استخراج ایدیور ، خارجه قطعاً محتاج بولونمور دیمکدر . موندلر آره سندنه توافق علم و ادراکه کلنجه ، اوده (آهنک ازلی) دن نشأت ایدیور . هر بریمزک ویردیکی حکملر دخی آنجق تمیل و قیاس نفس ایله واقع اوله بیلور [*] ایشته اونک ایچون بر بریمزی آکلیورز و (علم) ممکن اوله بیلور .

(ایده آلیم) و (نه ندیوید و آلیم) بوندن ایلری به کیده مز . . . مابعد الطبیعیات ده جوق غریب دوشونجه لر واردر ؛ لکن بوندن غریبی اوله ماز . مع مافیه ، افندیلر . . . بن بو فیلسوفه هیچ بکزه مده بکم حالده ، افکارینی

[*] لایب نیچ هیچ صوفی بر متفکره بکزه مرفقط شر آهنک ازلی نظریه سی بزم صوفیه شرقک بر فرضیه سنه پک بکزر : (بزم آره مزده استعداد محبت و ائتلاف) ، (بزم الست) ده ارواح آره سندنه جایگیر اولان وفاق و واداک نمره سی و نتیجه ضروریه سیدر (دهن عرفای صوفیه دخی ارواح آره سندنه بر آهنک ازلی فرض ایدیور .

[**] بوراده (تمیل) دن نه تصدایتدیکنی بر مثال ایله آکلاتیم ؛ فرضا : بن سانجی به معروض اولدوغم زمان چهره مک عضلاتنده (تقلص contraction) وقوعه کلدیکنی بو سبیلله شمائل وجهیه مده تغیر و اش حتراز حاصل اولدوغنی کندی تجربه لرمله بیلیم ؛ سنک چهره کده دخی عینی علامات اشمترازی کوروورسم ، بانتمیل و کندی نفسه قیاس ایدره رک آکلارم و حکم ایدرم که سن دخی شوآنده الم طویعده سک . یوقسه طوغردن طوغریه سنک حس ایتدیکنی سانجی بی بنم ادراکه ایتکلمکه هیچ بر وجهله احتمال یوقدر .

چوق بكنيرم . ده‌اى فلسفيستى هم بك عالي ، همد بك تحيط بولورم . بو (مونادولوژى Monadologie) سى بيله تاريخ فلسفه ده يگانه بر تصوردر ؛ و نقاط استنادى موهوم اولماسه يدى بو سيستمى سائرلرینه ترجيح ايتمكده تردد كوستر مزدم . (فيزيق) ده مشهور (بوسقوويچ Boscowicz) لك نظريه سى نه ايسه ، (منافيزيق) ده بو اونك همان عيى در . [*] فقط - مع التأسف - بنم فكر بجه اساسى قبول اولونور بر شى دكلدر . بونكله برابر زمانزده پيدا اولان بعضى يكي (افكار جريانلرى) لايب نيچ لك (مونادولوژى) سته طوغرو كيدييور . مثلاً ماده نك انحلالى وقوته منجر اولماسى اعتقادى ، يعنى مادى آتوملرك انحلالى ايله ايجندن ميلونلرجه (ئئون éons) ، (ئلكترون électrons) لرك چيقوب انتشار ايتمى كيبى ! . بو (ئئون) و (ئلكترون) لرك تعريفى موناد تعريفندن بك فرقلى دكلدر .

صوكره (inconscient) فاسفه سى ، لايب نيچ لك اثردها سى در ؛ و - يوقا ريده براز سويله دبكيم كيبى - بسيقولوزيده بو ، بك بويوك بر كشفدر .

دها صوكره ، آلمان فيلسوفنك فوق العاده اهميت ويرديكى (analogie) برنسيبى دى ياكلس بر شى دكلدر ؛ (وجدانيات faits de conscience) خصوصنده بز حقيقتاً اويله حكيم ايدهرز . باشقارلرينك نه حس ايدوب طويدوغنى بز - طوغرودن طوغرويه - ادراك ايدهميز . طويغولرمزك عيى احواله يكديكريشك عيى اولدوغنه دائره هيج بر دليل يوقدر و اوله ماز چونكه بر برمذك وجدانه كيره ميز . يالكز بوكيبى احواله قياس نفس و تمثيل ايله حكيم ايدم بيليرز . بو حقيقتى بزم عرب فيلسوفلرى ده بك ابي بيليرلدى . اونك ايجوندركه وجدانياتى (بديهيات faits évidents par eux-mêmes) دن عد ايتدكلى حالده : [وجدانيات ، باشقارلرى ايجون مابه الاحتجاج اوله ماز !] ديه قرار ويرمشلر و (حس صميمى sens intime) يه استناداً اقامه برهان ايتك حقى منطقاً رد ايتمشلردى . [موناد ، يعنى - بوكونكى لسانمزه وجدان - بر (دائره مسدوده cycle fermé

*) (بوسقوويچ) دى مادى انكار ايدردى . وهرسك (آتوم atome) ديديكى عناصر ماديه يى (مركز قوا centre des forces) عد ايدردى . شو تقديرجه ماده فى الاصل (غير مادى immatériel) و ينه مستقلاً موجود بر (شى objet) اولمش اولوبور ، واجسام منحصرأ بويله شيلردن مركب بولونوبوردى . بواظرية رياضياتده برچوق مسائل فاضه لك حلى تسهيل ايتدكي حالده (عطائات inertie) ي قطعاً تعريف ايدميور . اك فنا قصورى بودر .

در! [دیمك، ایشه بودیمكدر. بز، عالم خارجی ایله حقیقتاً تماسده بولوندوغمزی و بالجله معلومات و مدرکاتمزی خارجدن التقاط و تلقی ایندیکمزی ادعا ایتسهك بيله (لایب نیچ) ك شودعواسنی رد ایتش اوله مایز. چونكه مدرکاتمزله ماهیتاً و کلیاً انفسی اولدوغنده شبهه یوقدر. (خواص اجسام propriétés des corps) دیدیکمز و عالم خارجی به عطف ایده طور دوغمز (کیفیات ماده) بيله کندی حالات روحیه مزدن عبارتدر. کندی طویغولر مزدن باشقه بر شیلر دکلدر. شو تقدیرجه نه ایله تماسده بولونسهق و کائنات خارجیتهك هر هانکی نقطه سه اماله نظر ایتسهك و یا خود الیمزی اوزاتسهق، ینه کندی وجدانمزلک افقیرنی آشمش اولمویورز. ینه (کندی دائرة انفسیتمزده Dans le cercle de notre propre subjectivité) محبوس و - کندی حالات و انفعالاتمزدن باشقه - بر شینی ادراک ایده بیلیمك امیدندن مأیوس بولونویورز؛ دیمكدر .

ذاتاً (لایب نیچ) دخی باشقه بر شی دیمیوركه ...! (cycle fermé) ایشه بودر ...!

اوندن ماعدا ، مادام كه روحمز - قمر و كناره سی نایاب - بر عمان بی پایاندز؛ بزم نور شعور مزله پارلایوب تعین ایدن افكار و حسیات ، اونك آنجق سطحده یوزن جزئی بر قسم حادثاتی در . او حالد الهام ، امل ، امید ، عشق ، ایمان ، اطمینان کبی - مناسبات خارجییه عطفاً تعریفی ممکن اوله مایان - بر جوق حادثات معنویه بزم اعماق روحمزدن ، (یعنی بنلكمزلک غیر مشعور منبعندن!) فوران ایدوب چیقیر دیمكدر . و مادام كه بز - بر ماضی مجهولدن بری - لاینقطع دوام ایدوب كلن بر سه - مسله حیاتك نتیجه سی بز ، اویه ایسه بزم كوكلز (یعنی روحمزلک غیر مشعور اولان قسمی و حسیاتمزلک منبعی) توکمز و اسرار انکیز بر حزینه معنویاتدر. لایب نیچ ، (بوتون معلوماتمزی اورادن آلیورز) ؛ دیور. هر حالدك چوق شیلری اورادن آلدیمزدهده شبهه یوقدر.

دیمك كه بورادهده آلمان فیلسوفك داهیانه ملاحظه سی اساساً حقه موافق دوشویور.

ایده آلیستلره صورارسه كز ، اونلر تماماً بو فیلسوفه حق و بریورلر . حتی معاصرینمزدن (جون ستوته میل J. S. Mill) کبی صاحب مسلک و خارق العاده بر داعی (series de sensations) نظریه سی وضع ایتك ، و (اما le moi, le sujet)

ایله برابر (غیرانا le non-moi, l'objet) بی وجدانده بولمقله ، (لایب نیچ) ك مونا دولوزی سنی بر از تعدیلات ایله تفسیر ایتمکدن باشقه برشی یامش اولمویور، صانیرم. نته کیم اجله معاصریندن (بهین Bain) و (برادله Bradley) کبی آدملرده عینی فکرده درلر.

هرجهنده مهم کشفیاتنه موفق اولان ، حساب تفاضلی بی بولان بو آلمان فیلسوفی احتماله ریاضیاتده (اصغر نامتناهی سلسله لری séries des infinitésimales) نظریه - سندن متأثر اولمشدر . نته کیم مونا د فکرنده ده (لیووه نهوق Leeuwenhoek) و (سوامردام Swammerdam) کبی علمای مجرینك کشف ایتدیکی حوینات ابتدائی وعضویات خرده بی نك دخلی اولمشدر ؛ ده نیلیور . لکن نه ده نیلیورسه ده نیلسین ، فلسفه ایله برابر ، ریاضیاتی و سیاسیاتی و حقوقی والهاتی احاطه ایدن وهر علمده کشفیاتنه موفق اولان بودهای محیطه تحسین خوان اولماق ممکن دکلدرد . بوفلسفه سیستمی دخی شبهه سز بویوك بر اثر ذکادر . لکن - اولجده سوبلدیکم کبی - اساسی فضولی بر اعتقاد مستند اولماسه ..!

مونادلری اثبات ایده بيله جك هیچ بر دلیل مقبول و معقول یوق !.. واقعا وجودی فرض اولونان بو عناصر اصلیه ، فضولی اوله زق قبول ایدیلیرسه اوتوسی قولایدرد . فقط بدایت امرده بوتون مخلوقاتك بویله بر طاقم مونادلردن مرکب اولدوغنی ناصل تسلیم ایده لم ؟. مادی آتوملری انکار ایدن (لایب نیچ) ، او ارکان مادی بی نیچون قبول ایتدیکنی ایضاح صدندنه دیورکه : [ذهن بشر تحلیلاننده یورولمغه مستعد و بر موقف استراحت بولوب دیکنمکه میالدر . ایشه آتوم ، ذهنك پیوسته اولدوغنی نقطه استراحتدر . اونك اصلی فصلی یوقدر .] بن ظن ایده رم که آلمان فیلسوفك بوطوغرو سوزلرینی کمال صلاحیتله کندینه رد ایده رك اونی صوصودورمق ممکن وحقی در . زیرا مونادلر، ینه آتوملردن باشقه برشی دکلدردلر . یالکز مادی اوله جغه روحانی آتوملردرد . (آتومیزم) باطل ایسه (ماتریالیزم) دده (سپریتوآلیزم) دده عینی حیثیتله وعینی سببله او قدر باطلدر . اوندن صوکره ، حادثات وجدانیه حقهده ویردیکی تعریف - حقیقته بر (تعریف دوری) در . چونکه وجودی هرکسجه بداهتاً ثابت اولان جسم ایله روحك وآرهلرنده جایگیر اولان مناسبت وتأثیرات متقابله نك سیرینی ایضاح ایچون ، بوسبوتون فضولی بر صورتده بر طاقم (نقاط مابعد الطبیعه) په وجود ویرمک

وصوکره روحرك بوتون اوصاف وقابلیاتی نقاط مذکوریه - غریب بر صورتده - اسناد ایتمکله اومعمایی حل ایتمش اولمق ادعایی (دورفاسد Cercle vicieux) دهنیلن سفسطه مشهوره نك اك كوزل بر نموه سیدر .

سزه بر ایکی مثال ایله نه دیمك ایسته دیکمی عرض ایدیم که بك قولای آکلایه - بیله سکزه؛ مثلاً بر آینه نك - ناصل اولوبده - خیالات اشایی عکس ایتدیره بیلدیکنی، و بر اودونك، نه دن دولای صواوزرنده یوزوب باطمادیغنی بدنن صوره کز!.. بنده بو ایکی حادثه یی تعریف ایچون ، آینه یی قیرسم وهر بر پارچه سنك عینی قابلیتده اولدوغنی یعنی خیالات اشایی عکس ایتدیره بیلدیکنی کوسترسم؛ سوکره اودونو ده اوافق اوافق پارچه لاسم وهر پارچه سنك صوده یوزوب دیبه چوکه دیکنی بالفعل اثبات ایچون صویه آتسم؛ بو حرکنمله حادثه انعکاسی و اودونك صواوزرنده ایچون یوزدیکنی تعریف ایتمش اولورمییم؟ سز اوپارچه لر حقنده ینه عینی سوآلی تکرار ایدیه بیلیرسکزه . چونکه مسئله هنوز حل اولونماشدر . سز، بکا : [عجبا اودونك اجزاسی ده طبقی کتله سی کیی صوده یوزه بیلیرمی؟] . ، [آینه نك اقسامی ده خیالات اشایی عکس ایتدیره بیلیرمی؟] دیه صوره ایدیکزه ، نیم حرکت واقعه سوآلکزه بر جواب کافی اولوردی . حالبوکه اسبابی صوردوغکزه کیفیتری تعریف ایدیه بیلیمك ایچون (انعکاس قانونی) ایله (آرشیمد قانونی) نه توفیقاً او حادثه لری سزه ایضاح ایتمه لییم که تعریف مقبول اوله بیلسین . لایب نیچک - موداولوژی یه بناء - ویردیکنی تعریف، هیچ بوندن - ماهیتاً - فرقلی دکلدیر .

آمریکا متفکریندن و فلسفه مقیدیندن (ستالو Stallo) دییورکه : [مابعد الطبیعیات مباحثنده همان بوتون تعریفلر بو (دورفاسد) ایله معلولدر.] وبالطبع بوندن طولای درکه منطقاً مدخولدر . زمانمك اك بویوك كاشفین علماسندن متوفی (دوبوا ریموند Dubois Reymond) دخی بك محق اوله رق ادعا ایدیورکه : [بر شیك اوصاف و کیفیاتی تعریف ایتمك ایچون اوصاف و کیفیات مذکوریه یی اوشيك اجزاسنه عطف ایتمك بر تعریف صحیح دکلدیر . بر سفسطه در.] [*]

[*] Stallo ، بك طوغرو دوشونور و روح علمه آشنا معلوماتی بر متفکر در . (زمانمك فیزیق علمنه کوره ماده) نامیله السنه مدنییه مترجم اولان اثر معروفنده مابعد الطبیعیونك باشلیجه خطیئات استدلالیه سی تتبع ایدرکن بوخطای ده اهمیتله ذکر وایضاح ایلور . (دوبوا ریموند) ، فرانسه اصلندن کله بر آلمان عالی در . فیزیولوژی علمنده کی کشفیات مهمه سیله دهاته عصردن اولدوغنی کوسترمشدی . افکار فلسفیه سی ده بك قیمتداردر .

(لایب نیچ) ك لسان غریبی بوكونی سادە لسانمزلە ترجمە ومونادولوژی سی تلخیصاً اولسانلە فکرینی ادا ایتك ایسترسەك شو عجیب ادعا یە واریركە :

[ماده یوقدر ؛ قوت واردر . اوده (جهد effort) دیمکدر . بواعتبار ایلە امتداد ، جهد سبیلە قوتك هرجهته اتساعی ومکانی املایدوب مقاومت کوسترمە سی در . مع مافیە قوت دخی یکپارە برشی دکلدرد . برچوق نقاطدن عبارتدرکە بونلر - غیر مادی اولق حیثیتلە - نقاط هندسیە بەکزر . فقط مکانده مستقلاً موجود بولونق حیثیتلە دخی (نقاط طبیعیە points physiques) یە بەکزر . بو ایکی خاصیتی جامع اولدقلری ایچون اونلر نقاط مابعد الطبیعیە دە نیلیور . بونلرک هر بریدە باشلی باشنە بر عالمدر ، ویکدیگریلە قطعاً تماس ومناسبتده بولونمایدیجق صورتهده مسدوددر . مع مافیە کرک جسممز کرک روحمز بونلرک اجتماعندن حاصل اولمشدر . مونادلر - بویلە جسممز - بر نقطه اولدقلری حالده تمایلات ومشتبات وحی ادراکات وارادات ومعلومات صاحبی درلر . چونکە - قابلیتجه - سفلی وعلوی مونادلر واردر . حتی جملە سندن اعلا اولق اوزره (مونادلرک سلطانی la monade Reine) واردر . او هپسندن یوکسکک دوشونور . هر موناد ، بوتون سرمایە علمی کندندن آلیر . الی آخره ! الی آخره !!]

شبه یوق که تاریخ فلسفه ده بوندن زیاده (fantaisiste) یعنی کیفی ومخیل بر بر فرضیه اوله ماز . باقیلسه فیثاغورک (نظریه اعداد théorie des nombres) ی ، یاخود (قابالیزم cabalisme) نامیلە مشهور اولان فلسفه عبرانیە نک (نظریه حروف théorie des lettres) ی بومونادولوژیدن چوق دها معقولدر . [*]

اکثر منقیدین وایده آلیست فیاسوفلر (لایب نیچ) ک مونادولوژیسی بکنیورلر .

[*] فیثاغور ، اسلام عالمدهده یک مشهور بر فیلسوف یونانی ایدی . کندیسی فلسفه ریاضیونک اشهریدر . ایتالیا ده بر مدرسه تأسیس ایتدی . کرات جدولنی ترتیب ایدن ، موسیقی ده پردلر آره سنده کی نسب ریاضیه یی کشف ایدن اودر . کائناده هر شئیک اصلی (عدد) در ، یە ادعا ایدردی . الله (عدد واحد) یعنی (۱) ایدی وبوکا قیاساً عدالت ، حس ، واشیای مادیه بیلە برر عدد معین ایدی . میلاددن تقریباً بش عصر اول ظهور ایدن بوفیلسوفک نامنه نسبتله مشهور اولان (نظریه اعداد) بو عقیده در . قابالیزم ، صوفیه یهودک فلسفه سیدر . بوراده عدده بدل حروف ، عناصر کائنات اوله رق قبول ایلدیوردی . بناءً علیه عبرانی الفبائی عناصر وارکان موجودات عد ایدلشدی . شو تقدیرجه اجسام و ارواحدن هر بری برکله ، یعنی بر مجموعه حروف صاییلردی . تاریخ اسلامده مشهور اولان (فضل الله نیمی) نک (حروفی مذهبی) یهودی قابالیزمندن باشقه برشی دکلدرد .

حالبوکه سه یوقاریلرده ابضاح ایتدیکم وجهله - بو آلمان فیلسوفنک دهاسنی ، بن اصل کشفیات خصوصیه سنده کوروپورم و اونلری بک زیاده تحسین و تصویب ایدیورم . بو آدم ده قارتی وسپینوزایی رد ایتک غیرتیه بک مهم حقیقتلر کشف ایتشدرکه بو کون پسقولوزی نظرندۀ تمامیه صدقدر؛ و بالخاصه حادثات روحیه ده نفوذ نظری داهیانۀ در. [لکن اوکشفیات و تعریفاتۀ بر زمین استناد کوستره بیلیمک ایچون مونادولوزی و آهنگ ازلی فرضیه لرینی احداث و ترتیه مجبور اولمشدر :] ده نیلیرسه ، بوبله بر مجبوری قطعاً انکار ایدرم ؛ چونکه بو کون لایب نیچ قدر ایدۀ آلیشت اولان فیلسوفلر واردرکه حادثات وجدانیۀ ده معقول بر صورتده تعریف ایدۀ بیلورلر و هیچ مونادولوزی و آهنگ ازلی فرضیه سنک معاونته احتیاج کورمورلر .

بن هیچ ایدۀ آلیست دکلم . مع مافیه (inconscient غیر مشـمور) حالات وجدانیۀ تمامیه قبول ایدرم . حتی وجدانز خارجه جیقاما به جغمزی لایب نیچ قدر ادعا ایدۀ بیلیم . فقط بونی تسلیم ایدۀ بیلیمک ایچون مونادولوزی به حاجت کورمیورم او ادعایی باشقه تورلو انباته چالیشیم .

مع مافیه لایب نیچ ایدۀ آلیزم فلسفه سنی صوک درجه کائنه ایصال ایتش اولدوغی ایچون ، بو کون بیلۀ بر چوق ایدۀ آلیستلر - صیقی به کلنجه - اوکا التجا ایدیورلر . بو حیثیه حقیقتاً مذهبده امام در. [*]

شیمدی بو جریان فلسفی نک ضدینه کیدن تدریپونک افکار و اعتقاداتندن بر نمونه ویرمک ایچون ، (جون لوق John Locke) نام انگلیز فیلسوف مشهورینی مثال اوله رق تتبع ایدۀ حکم . واقعا بو ذات ، لایب نیچ دن ایجه یاشلی ایدی و اوندن اول ذکر اولونمالی ایدی . فقط مذاهب متضاده یی متقابلاً کوسترمد آرزو ایتدیکم ایچون (ترتیب زمان chronologie) . رعایت ایدوب ایتمه مکده بئس کورمدم .

جون لوق دنخی ده قارته اعتراض ایدنلردندر . زماننده احاطۀ علمیه سیله ممتاز اولان و دنیانک اک بویوک فیلسوفلرندن صاییلان بو ذات ، طوغزودن طوغزویه (بهی قن) ک آجدینی چیغیری تعقیب ایدۀ رک اصل انگلیز فلسفه سنک یغنعاتنه اعتبار قازاندرمشدر . دوراخبرده (فلسفۀ تدریپیه phil. empirique) نک اک

[*] امام ، پیشدار یعنی اوکده کیدن وریاست ایدن دیمکدر .

مقتدر مروجانندند. [*] حتی مورخلر ، بومسلکک مؤسس حقیقی سی اودر ، دیرلر .

بو آدمک فکرنبجه کړک فلسفه نظریه ده ، کرکسه اصوله ذهنی اضلال ایدن زاسیونالیزم ایدی . (لوق) بوخصوصده بالخاصه افلاطونی اتهام ایدیورواونک (اعیان ثابتہ نظریه سی théories des idées) فی مسئول طوتویوردی . قرون وسطانک (ره آلزم) نده فلاطونیلک خطاسنک برجلوه مخصوصه سنی عیاناً کوردوکی کیی ده قارت ودها اونک کعبنده برچوق اعظم متفکرینک یا کشفلنه سبب اولمق اوزره عینی تأثیری کوریور ، حتی بونی سقولاستیق فلسفه سنه خاص بر (طور تفلسف manière de philosopher) عد ایدیور ، و (راسیونالیزم) ایله (سقولاستیق) آره سنده اساسی برفرق بوله میور . [عالم حقیقی به قارشی کوزینی یوموب قولاغنی طیقامق واوندن سوکره دوشونمکه باشلایوب حقیقی کنندی ذهنندن بولوب چیقارمق] هر ایکی مذهبک دخی واز کچمه دیکی یا ککش اصولدر . چیقماز یوله صابان بوفیلسوفلر [کوزلرینی عالم حقیقی به آجسینلر] دیه لوق ، اک اول ده قارتک (افکار وهیه idées innées) نظریه سنی ابطال ایله ایشه کیریشمکی ده موافق یولیور ؛ چونکه راسیونالیستلر کوزلرینی یوموبده حقیقی کنندی وجدانلرنده آریورلر سه بوکا سبب ، بالخاصه افکار وهیه به ایمان ایتمه لبردر . بناءً علیه بوانکلین فیلسوفی اک اول او اعتقادک بطلانی اثبات ایتمک لزومنه بحق قناعت کتیریور . شو تقدیرجه تخیالات بسیقولوجیه یی (مبحث وجود ontologie) مسائلنه قطعياً تقدیم ایتمک فلسفه سنی ایضاحه باشلیور . اونک ایچوندرکه تاریخ فلسفه کنندیسنی (تنقید یون les criticistes) ک دخی مؤسسی وامامی عد ایتمکده در . بو اسلوبی

[*] لوق ، انگلتره تک (سومرست شایر Somersetshire) ایالتک (رینگن Wrington) شهرنده (۱۶۳۲) سنه میلادیه سنده طوغمشدر . بناءً علیه مشهور (روجر بهی فن Roger Bacon) ایله (لورد بهی فن Bacon of verulam) و (اوق قام Occam) ک همشیرسی در . لوندره و اوقسفورد دارالفنونلرنده تربیه ایدلشدر . علامه شایر (نیوتن Newton) ایله (لورد شافتسبری L. Shaftesbury) تک پک دوستی و بوسیاسی آدمک مرئی اولادی ایدی . برلین ده فرانسه ده هولانداده ایتالیا ده خبی زمانلر بولونمش ونهایت (۱۷۰۴) سنه سنده انگلتره تک (شس هس Essex) ایالتده (ووتس Oates) شهرنده وفات ایتمشدر . طوقوز جلد اولق اوزره آثاری مطبوعدر و برچوق لسانلره ترجمه ایدلشدر . (۱۱۱) نجی صحیفه تک حاشیه سنده بایکیز .

ترویج و اصلاح ایده رک برمسلك یابان (كانت Kant) ، بووادیده - تماماً لوتك آجدینی یولی تمقیب ایتشدر .

بناء علیه ، بوفیلسوف - اول امرده - شورقاج مسئله یی حل ایتك ایستورکه - کوره جککیز وجهله - اولنرك جمله سیده پسیقو لوزی ساحه سنده تدقیق و تتبع اولونه بیلیر ، و حیثیتاً (مبحث معرفت épistémologie) مسائلنددر :

(۱) افكارمرك منشائی تعیین ایتك .

(۲) علممرك درجه بدهات و یقینتی نی وساحه شمولی اثبات ایتك .

(۳) ذهن بشرك دائرة (احاطه compréhension) سی خارجنده قالان مسئله لر حقنده رأی ویرمه مکه فیلسوفلری مجبور ایتك و بونك ایچون ده ذهنمرك (حدود صلاحیتی les limites de la compétence) نی لایقوله چیزوب کوسترمك . آکلورسکزرکه مبحث معرفت مسائلنی - شمده یه قدر - بوندن زیاده اهمیتله تلقی ایدن اولمامشدر . لوق اولا قوتله ادعا ایدیورکه افكار وهیه نامه برشی یوقدر . ذهنمرك سرمایه سنی تشکیل ایدن نه قدر فکرلرمز وارسه جمله سیده کسبی در ؛ وجهله سیده حواس واسطه سیله عالم خارجی دن بزه انتقال ایتشدر . اولجه سویله مش بولوندوغم ایچون خاطرکزده قالش اولسه کرکدرکه اسکی ماتریالیستلر ، یعنی تئیکوریستلرک و - (فلسفیات صرفه philosophie pure) ده اولنردن اعتقادجه قطعاً فرقلی اولماپان - (رواقیون les stoïciens) ك دستور اعتقادی دخی بو ، وهان تماماً بوایدی . [ذهنده هیچ برشی یوقدرکه اولجه حسده بولونمش اولماسین ا .] دیورلردی . حس ایسه آلدیغنی هب عالم خارجی دن آلیر ؛ چونکه وظیفه سی اودر ، یالکیز عالم خارجی ایله تماسده در . [*]

لوق بو دعوائی اثبات ایتك ایچون یکی طوغان چوجوقلرک ، (بلید idiot) لرك یعنی فطرتاً آبدال اولانلرك حالت روحیه وذهنیه سنی مثال اوله رق اله آلوب تحلیل و تتبع ایدیور . حتی تربیه فکریه دن محروم اولان اکثریت ناسیده بو حصابه ادخال ایدیور . نتیجه ده (حقایق یینه vérités évidentes par elles-mêmes) و (متعارفه axiome) قیلندن هیچ برشی بولویورکه اساساً

[*] ماده ورواقیه مذهبی عیناً لاینلره انتقال ایتش اولدوغی جهته لاتین فیلسوفلری بدستورمه یی عیناً شوصورتله ترجمه ایتشلردی : [Nihil est in intellectu quod non fuerit prior in sensu . اولجه بونی ذکر ایتهدیم .

محصول تجربه و (کسی *acquis*) اولماسین ! . بوکا قارشى (افکار وهیه) طرفدارلری حالا ادعالرنده اصرار ایدرلرسه او زمان [بزجه مشعور اولمادقلری حالده ذهنمزدده برطاقم افکارک وجودینی قبول ایتمک مجبوریتدن قورتوله مازلر.] دییور ؛ بومهم وجسورانه ادعا ، حادثات معنویه نك وجودینی ذهنده مشعور اولمالری شرطیله تقید ایتدیکی ایچون ، بهمه حال (غیر مشعور *inconscient*) فلسفه سنی انکاره واریر . حالبوکه وجدان بشرک بویله غیر مشعور بر چوق حالات و تمایلاتدن مرکب اولدوغنی - ایلك دفعه اوله رق - کشف وادعا ایدن لایب نیچ ایدی . نته کیم بوندن اولکی فصلده بو کشفک درجه اهمیتی مختصراً تعریف ایتمشدم .

دیمک که لوقک بو ادعاسی ، طوغرودن طوغرویه لایب نیچک اک مهم عقیده فلسفیه سنی تعریض کیی واقع اولمشدی . فی الحقیقه لوق (*essais sur l'entendement humain*) نام اثرنده بویله بر ادعا ایله عالم افکاری چالقامش و لایب نیچ (*nouveaux essais*) نام اثرینی بالاتزام قلمه آله رق اوکا جواب ویرمشدی . فقط بو رساله نك یازیلوب بیتمه سی لوقک وفاتی هنکامنه مصادف اولوویردیکی ایچون المان فیلسوفی اوکتابی نشر ایتیه رک بر اثر نزاکت و حرمت ابراز ایتشد . بوکون مسئله نك ماهیتی ده ا زیاده صریحدر ؛ فلسفه زمانه نك بو خصوصده ویردیکی حکم دخی ده ا زیاده بیطرفانه در . خصوصاً سبندرک اثر دهاسی اولان (تکامل نظریه سی *la théorie de l'évolution*) بویکی ضد فیلسوفک غیر قابل تألیف اولمادیغنی اثبات ایتشد :

شبه یوقدرکه وجدانمک هویتی تشکیل ایدن حادثات معنویه نك پک بویوک و مجهول اولان برقسیمی (غیر مشعور اولان حالات روحیه *états d'âmes inconscients*) در ، و بزم مزاج و تمایلاتمزدده ، حسیاتمزدده و بعض اعتقاداتمزدده حالات مذکورده نك پک مهم بررولی واردر . نته کیم اراداتمزدده و الهاماتمزدده دخی اوده رین قاراکاقلردن نبعان ایدوب کلیور . برچوق و اراداتمزدده اورادن و ببناء علیه - عالم خارجی دن دکل - ، کندی وجدانمزدده آلیورز . بوتون بوفکرلری بزه تعلیم ایدن لایب نیچ در ؛ و بوقدرنده حقلی در . او حالده (وجدان فردی *conscience individuelle*) نظر اعتباره آلیبرسه - لوقک علی الاطلاق ادعا ایتدیکی کیی - بالجمله واردات حسیه نك و افکارک بزه طوغرودن طوغرویه عالم خارجیدن کلمه سی و بونک ایچون ده ذهنک

وساطت حواسه محتاج اولماسی ، بوکون قوتله مدافعه اولونه بیایر برظن دکلدرد . دیمک که (وجدان فردی) یه منحصر قالمق اوزره بویخنده لوقه دئل ، لایب نیجه - ترجیحاً - حق ویربرز . فقط انسانک بالتکامل بودرجه کاله ایرمش وخارق العاده برثروت مغنوبیه وارث اوله رق دنیایه کلمش اولدوغی ده بوکون قطعاً محقق در . بناء علیه - ینه فی الاصل - بوتون واحالات غیر مشعوره ایله برابر بوتون معلومات وحسابتمزک ، حتی - جمله سنک محصله سی اولان - وجدانتمزک بیلله محصول تجربه اولدوغی ده عینی زمانده قبول ایده بیلنیرز .

مع مافیه لوقک ترتیب ایتدیکی نظریه معرفت (تدریجی empirique) اولمقله برابر ، اسکی ماتریالیستلرک نظریه سنه نسبتله چوق مکملدر . هله سقولاستیق سیستمه قارشو فلسفه حدیده نک موفقیتی تأمین خصوصنده پک بویوک بررول اوینامشدرکه تاریخ افکارده بوفیلسوفک اصل خدمت مشکوره سی ، اودر . [*]

لوق ، (فکر idée) ده نیجه وجدان بشرک بوتون محتویات مشعوره سی مراد ایدیور . ده قارت دخی بوکله یی اومعناده تلقی ایدردی . حتی (table rase) فرضیه سی ده قبول ایتشدی فقط بلااستثنا بوتون فکرلرک تجربه ایله کسب اولوندوغنه قائل بولوندوغندن ده قارت وتوابی ایله بوراده طابان طابانه ضد بر اعتقادده بولونویورده . فکر الوهیت ومبادی اخلاقیه ایله بوتون (حقایق متعارفه vérités axiomatiques) دخی محصول تجربه ایدی . یالکثر فیلسوفک ادعاسنجه ایکی تورلو تجربه واردر : بری خارجی ، دیکری داخلی در . برنجیسنه (احساس sensation) ، ایکنجیسنه (دوشونجه réflexion) دییور . تجربه خارجه ، بر طاقم عوامل خارجه نک عضویمزه تأثیری ایله وجودمزک بر قسمنده (تنیهات excitations) حصوله کتیرمه سیدرکه ، بونک نتیجه سننده روخده (ادراک perception) وقوعه کلیر . (مدرکات خارجه perceptions externes) دن حاصل اولان فکرلری ، روح (اعمال élaborer) ایدرکن ، کندی فعالینندن دخی

[*] اثر مشهورینک اوچنجی کتانبده لسانک فکر اوزرینه تأثیرینی تبیع ایدرکن پک مهم شیلر کوستریبور وکلانک روابط اشتقاقیه سنه بانوب اشیا وحادثات آده سننده دخی عینی صورته برطاقم مناسبانک وجودینه قانع اوله رق وخیم برصورتده یاکیلدیمیزی سویلوپور ، اوندن موکوره سقولاستیق فلسفه سنه نقل بحث ایده رک بو سیستمک یالکثر لاف اوزرینه مؤسس وکلیاً باطل بر فلسفه اولدوغی کمال جسارتله ادعا ایدیور . اک بویوک خدمتی بودر .

متأثر اولور . مثلاً بغضی شیلری تخطر ایدر ، تخیل ایدر و اونلری یکدیگریله قیاس ایلر . ایشته لوقک تجربه باطنیه دیدیکی دخی بو عملیات ذهنیه درکه ، بالذات بونلر واردات خارجه دن صایيله ماز . شو تقدیرجه ، دوشوندوکمز زمان بز ، کندی احوال روحیه مزدن و کندی فعالیت مزدن خبردار اولورز . احساسات مزله دخی اشیای سائر نک بزه اجرا ایتدکلی تأثیرات و انطباقاتی ادراک ایدررز . بویله طوغرودن طوغرویه ادراک ایده بیلدیکمز افکار بسیطه ده علی الاکثر وجدان ، (انفعالی passive) بز حالده بولونور .

بو نقطه ده لوق ، نه پیسته مولوزی نک الک مهم مسائلندن ایکی سنه بردن تماس ایدیور . بونلرک بریسی (بلاواسطه علم *connaissance immédiate*) درکه مدرکات بسیطه ایچون ، فیلسوف بوکا احتمال و بریور . ایکنجیسی ، وجدانک - حین ادراکده - بوسبوتون انفعالی بروضعیتده بولونوب بولونما می در . کورو یورسکیزکه بوراده دخی - هیچ اولمازسه بسیط فکرلر تحصیل ایدرکن - وجدانک تماماً انفعالی بر طور و وضعیتده بولوندوغنه قائلدر .

اوندن ماعدا دیگر بر مهم مسئلهیه تماس ایدیور : (کیفیات اولی *qualités premières*) و (کیفیات تالیه *qual. secon.*) بحثنده برقرار قطعی و بریور : تجربه خارجه ایله کیفیات اولایی ادراک ایدررز . تجربه باطنیه ایله دخی کیفیات ثانییه تلتی و حس ایدررز ؛ دیور . خواص اجسامک بویله ایکی صنفه تقسیمی واقعاً لوقک دکلدور . (هوبس *Hobbes*) دخی بو تصنیفی قبول ایتمشدی . تاریخ فلسفه ظن ایدیورکه بوتقسیمی ابتدایان علامه شهیر (غالیله *Galileo*) در . (سرویلیام هاملتن) ارسطوده بیله بوفکری بولدوغنی سویلویور . هر نه اولورسه اولسون شوراسی محقق درکه لوق ، بومهم تصنیفه بسیقولوزیق براساس و برجئیت فلسفه ویرمشدر . حتی اوقدرکه بو کون بیله بر چوق فیلسوفلر (انفسیه *subjectivisme*) اعتقادی ایله (کیفیات اولی) دعواسنی تألیف و توفیق ایتک ایچون مناقشه ایدوب طورویورلر . هله لوقک آجدینی چیغیردن پک آیرلایان انکلیز فلاسفه حاضر سی بومسئلهیه هیچ اونوتمویورلر . اهامل ایتیمورلر . یاقینده - مختصرآ - عرض ایده جکم و کوره جکسکیزکه (میل) ، (هاملتن) ی اصل بو نقطه ده صیقیشدیرمشدر . کذلک انکلیزلرک صوک بطن فیلسوفلرندن متوفی (برادله *Bradley*) بیله (ظواهر و حقیقت *Appearances and Reality*) نام اثر

مهمنده بو کیفیات مسئله سنی تتبع ایتک ایچون بر باب مخصوص آچمشدر . بونلر
هپ لوقک دوام تأثیرینی اثبات ایدر .

فی الحقیقه اگر بوتون مدرکات و معلوماتز ماهیتاً انفسی ایسه ، شبهه یوق که
(قوقو l'odeur) ، (طعم le goût) (صدا le son) والحاصل کیفیات تالیه
دیدیکمز خواصک جمله سی اول امرده انفسی در . ذاتاً بو خصوصده اختلاف
یوق ! هرکس قانعدر که قوللانذینی ماصه نک رنکی خارجده طوران او ماصده
مستقلاً موجود بر (شی) دکلدردر . او ، بر (sensation حس) در . فقط کیفیات
اولی نهدن او یله اولماسین !.. ماصه نک شکلی ومقاومت ماده سی ده بزم ایچون برر
نوع حس دن عبارت اولدوغی حالده نیچون بونلر ماصه نک کنديسنه عائد کیفیاتدن
وبناء علیه (اعیان entités) دن معدود اولسونده اونه کیلر ، یالکز بزدده حاصل
وبزده موجود بر طاقم حسیاتدن عبارت قالسین ؟ ... بالجمله مدرکاتمزک انفسی
اولدوغی قبول وتسلمیم ایتدکن صوکر کیفیاتی بو صورتله ایکیه تفریق ایتک
ایچون نه کیبی بر صلاحیت منطقیه به استناد ایده بیلیمورز . شوایدیمز مشروع می ؟
دکلی ؟ . البته بو بر مسئله در !.. ویک مهم بر مسئله در ؟ چونکه بر طرفدن
(یقینیت علم) دعواسنه صیقی صیقی به تعلق ظاهر اولدوغی کیبی - هرایکی احتماله
کوره - ویریله بیله جک حکمک دخی اودعوا به قطعاً تأثیری واردر . اگر کیفیات
اولی دیدیکمز مدرکات دخی دیکر لری کیبی تماماً انفسی ایسه ، اونلرده بزدده در ؛
اشیاده دکل !.. او یله اولونجه اونلری ادراک ایتمکله ذوات اشیایی ادراک ایتمش
اولمویورز ، دیمکدر . او حالده حقیقت اشیا به کسب اطلاع ایده بیلیمک دعواسنه
مستند اولان (یقینه dogmatisme) اعتقادی محض مکابر ، محض - فسطه اولوق
لازمکلیر . هپ بیلدیکمز کندی انفعالات وجدانیه مز ایسه ، اشیانک کنکدیلرینه
دائر هیچ برشی بیلیمورز دیمکدر ؟ والسلام !. [*]

دقت بیوریکمز که مسئله نک الهمهم نقطه سی نره سی در و ذهن منفکری نره به
سور وکله یوب کوتورو یور ؟ . لایقوله آ کلا به بیله سکز !..

اگر - قیمت وماهیت علمیه مزی تدقیق ایدرکن - بوراده به واروبده قالیرساق ،

[*] کتابمزک ابکنجهی بانی تشکیل ایدن (مبحث حادثات) قسمنده بومشله بی اطرافیه
منافشه ایتمشدک . مقصد ، - بوراده چیقاره بیله جکمز نتیجه لری تقدیر ایده بیلیمک ایچون -
ذهنکیزی حاضر لاق ایدی .

طوغرودن طوغرویه (حادییه phénomérisme) فلسفه‌سنده قرار قیلارز . چونکه حادثاتدن باشقه برشیئه مطلع اوله‌مایه‌جغمزی - قناعت کامله‌ایله - اعتراف ایتیش اولورز . بونی اعتراف‌ایله ، (لادریه agnosticisme) اعتقادینی ده‌تسلیم ایتیش اولورز ؛ زیرا حادییه دعواسی ذاتاً بو اعتقادی متضمندر . [بیلدیگمز یالکیز حادثاتدر !] دیمک [حقایق اشیا به‌دائر هیج بر علممز یوقدر !] . دیمه‌نک بر باشقه تورلوسی در . ایشته آغوستی-سیرم دعواسی ده بوندن عبارتدر و (متافیزیق) دیدیگمز علمک یالکیز لزومسزلغنی دکل ، - عینی زمانده - اصلسز وموه-وم بر (قبل وقال) دن باشقه بر شی اولمادیغنی ده ادعایه واریر . بناء علیه علوم صحیحیه قیمت ویردرک ، فلسفه‌یی مباحث ومسائل روحیه تدقیقانه حصر ایدر . ارتق هیج شبه یوقدرکه (سقولاستیق) سیستمه بوداثرده ذره قدر یرقالماز . چونکه بو (پوزیتیویزم positivisme) دائرة‌سی در .

صوکره بر نقطه مهمه ده وار : بز (حادییه) فلسفه‌سنی ، بوتون تعلقاتیله وتفرعاتیله یعنی (انفسیه) و (لادریه) اعتقادیله برابر قبول ابدیه‌بیلیرزده-ینه خارجهده مستقلاً موجود بر علمک حقیقته اینانه‌بیلیرز . اصل (سوبژه‌تیویزم) بوراده طورور وقایر . فقط بونک ایچوند مدركات حسیه مزك اسبابی خارجهده مستقلاً موجود بیلیر ؛ ارادتمزك اسباب مذکوریه تأثیری اوله‌مادیغنی نظر دفته آله‌رق بویه بر حکم ویریر . نته‌کیم بوندن اول - ینه بوبشنجی بابده - او بحثه دائر سوزچمشدی ؛ یعنی عالم‌خارجی‌نک وجودینی قبول و یارد ایتکده بزم‌کندی ارادتمز و یردیگمز معنا وجیئتک نه‌بویوک بر دخلی اولدوغنی سوبله‌مشدم . فضله اوله‌رق اثر ایله مؤثرک یکدیگرینه بکیزه‌بوب بکیزه‌مه‌می ایله علمک معلومه (مطابقت adéquation) ی مسئله‌سنک نه‌درجه‌لرده علاقه‌دار اولدوغنه دائردخی ایجه سوزلر کچمشدی . شیمدی اونلرک هپسنی بوراده خاطرلاییکز ..

اگر مدركات مزك سببی خارجهده عوامل مستقليه عطف ایتیبوده یالکیز ارادتکزله بوتون بومسئله‌یه تعلق ایدیه‌بیلن حادثاتی تعریف ایدیه‌بیلیرسه‌کیز (سوبژه‌تیویزم) دن درحال - همده بر آدیمده ! - ایدیه‌آلیزمه‌آطالارسکیز ؛ وسوبژه‌تیویزم حدودنده ارتق طوره‌ماز-کیز ؛ مجبوراً آطالارسکیز . مکانی ده اساساً انفسی بر ماهیتله تلقی ایتدیگکیز کی (انیه solipsisme) فلسفه غریبه‌سنه واریرسکیز که آرتق ایدیه‌آلیزم ایله سوبژه‌تیویزمک ال اله و یروب کیت-دکری چیمماز صوقاق

بودر . بوندن ایلری کیتمکده ممکن دکلدر ؛ چونکه (باطل بدیهی *évidemment* absurde) بر اعتقاد فلسفی در : [یالکز بن وارم ؛ حتی بنم جسمم دکل یالکز روحم واردر . اوندن ماعدا موجود کورونور هر نه وارسنه هب بنم کندی روحم فسون ابدایی در ؛ اونک ایجادیتدیکی خیالاتدر !] [*] دیه ادما ایتمکدن باطل وصاچه برشی اوله ماز . آکلاشیلدورکه هر تورلو معلوماً *تک* انفسی اولدوغنی قبول ایتدکدن سوکره ایده آلیم اعتقادینه قایم ایچون چوق احتمال واردر . ایده آلیزمدن (*solipisme*) غرابته دوشمکده *یک* قولایدر . بویولر *یک* میل لی در . انسانی دوشورور ؛ دقت ایتلی ..!

مبحث معرفتده اکمهم ایش بویولری تحقیقه کیریشوب ذهنزی بویله برکردابه دوشورن تهلمکلی کچیدلری تعین ایتک ویمکنسه اونقطه لرده طوتونه جق صاغلان بریر واریمی ؟ . یوقی ؟ . اونی کشف ایتکدر . یوقسه بدایت امرده غایت معقول اولان و حتی تحقیقات علمیه به مستند بولونان بر نظریه معرفت - سائرلرینه ترجیحاً - قبول اولوندوغنی حالده ، یاواش یاواش ذهنلر قیملدادقجه ، یعنی تفکر وملاحظه ایتدیکجه ، نهایت قایه قایه اوچوقوره دوشه بیلیر .

تاریخ فلسفه ده آده صره اسملرینی کوردوکمز بعضی داهیلر واردرکه ، اسکیدن بری معلوم اولان (چیکتنمش یولار *sentiers battus*) دن ، کیتمه رک بالجه مسائلی خصوصی و صرف شخصی برنقطه نظر دن تاقی ایتشلر ، وهیسنی بروجله حل ایتک چاره لرینه توسل ایچون ، برده (اصول) قویمشلر در . ایشنه فلسفه ده بحق یکی جریانلر آجان و (مجدد) عنوانه شایان کورولنلر بوللدر . لوق دخی - بوندن اول ذکر ایتدیکم اعظم کیی - او مجد دین صنفنددر . بولر بر نقطه ده توقف ایتسه لر بیلله ، اونلرک آجدینی چیغری تعقیب ایدنلر اونقطه ده طوتونه مایوب ایلری کیدیورلر و دوشویورلر . فقط بونده ضرر وار ظن ایتیه ییکز ! .. هر مسلکک ضعیف نقطه لری واردر ؛ چونکه حقیقی (کاهی *telle quelle*) بیله میورز .

[*] بزم صوفیه شرق ، نهایت بوداعیه وارمشدر . بونی سزه بوراده ایضاحه بریوق فقط تصوف حقنده یازدینم مفصل براردره بوتون تفصیلات و سلسله محاکماتیه کوستردم . یالکز بوراده شو قدر سوبلیه م که بزم (قیفوسز) مهم بر رساله سنده ، (بر چوجوق دلائله غریب شهرلره سیاحت ایتدیکنی و نیجه نیجه شیلر کوردوکنی) سوبله دکلن سوکره : { کوزومی قاپادم ، آچدم باقدم که بدن باشقه برشی یوقش ! } دیور ، دیک که بوعلی کندی وجدانده سیران ایتدیکنی کنایه ایلله سویلویور .

بیلسه ایدك، مناقشه قاپانیر و فلسفه یه حاجت قالمازدی. حالبوکه حالا لزومی درکادر. ایشه برمسلكده ایلری وارهرق نهایت قدر سوروب کیدنلر اومسلكك چوروك جهتلرینی كشف ایدنلردر. کندی فلسفه لری باطل بدیهی یه پیوسته اولمق اعتبارله فدا وهدر اولویورسه ده بویه برکشف مهمه وسیله احضار ایتیش اولدقلری ایچون اونلرك دخی افکار و اعتقادات انسانییه ایتدکلی خدمت آز دکلدر.

لوقك فلسفه سی بودیدکلمه بك كوزل برمشال عرض ایدر. بو فیلسوفك مبحث معرفت مسائلی حل و - هیچ اولمازسه - تدقیق ایچون، استناد ایتدیکی زمین بك صاغلانمدر. بسیقولوزی زمینی در. اصولی ده - حالا اك زیاده طوغرو بیلوب - رغبت کوستردیکمز بر اصولدر: عالم حادثاته قارشی کوزینی دقتله قاپمق دکل، دقتله آچق و تدقیقات و تحقیقاتی رهبر ایتك اصولی در. کندیسی دخی قطعاً (حادثیه وانفسیه) دائره سی آشماشدر. فقط - همان بونی متعاقب فکرلری عرض ایدمك اولدوغم - مشهور (پیسقوبوس بارقله Bishop Berkeley)، لوقك یولنی تمقیب ایدمك (افتکاریه مطلقه idéalisme absolu) فلسفه سنه وارمش و کذلک بو آدمك سلاحیله ایدم آلیمه قارشی تعرض ایدن (هیوم Hume)، (حادثیه phénoménisme) دائره سنه ذهنلری بئکرار ارجاع ایدمك مابعدالطبیعاتك بطلاتی و لزوم سزلغنی کوسترمشدر. دهنیله بیلیر که عالم عرفانده اوزمانلر بویه مهم مناقشه لر ایله بویوك و درین بر چالقاتی وقوعه ککش اولماسه یدی، بوکونکی (پوزیتیویزم positivisme) ك تولدی ایچون ذهنلرده راستعداد حاصل اوله مازدی. لوق هیچ تهلكلی یوللره کتیمور و طورولماسی لازم کلن یرده طورویور. اولو بر مهم مسئله ده هیچ شبهه سی یوقدر: تمامیه قانعدر که بوتون معلوما تمزی حواسمز واسطه سیله عالم خارجی دن تلقی ایدیورز. دیمك که عالم خارجی نك وجودی محقق در؛ و بزم طوغرو دن طوغرویه احساس آتمزه و بالواسطه تفکرات و تخیلاتمزه سبب اودر. فقط بو ادعا، عالم خارجی نك حقیقته مطلع اوله بیلدیکمز دائره هیچ بر اعتقادی متضمن دکلدر؛ چونکه مسبب، سببه بکزه مز. بر اثرک مؤثرینه بکزه مه سی ایچون هیچ بر ضرورت یوقدر. حتی تجربه عکسینی اثبات ایدیور. کسيلمش بر آغاچ بالطیه بکزه میور. نته کم طوغرامه جی نك یابدینی ماصه، کندیسنه بکزه میور. بزم علممز دخی بزه کندی تأثر آتمزی بیلدیرمکدن عبارت قالیور؛ کورویورز که کندی ارادتمز اولمادینی حالد برطاقم تأثیراته معروض

بولونبورز. یالکز بزدہ حاصل اولان حسیات ایله خارجدہ کی عوامل آرہ سندہ بر مناسبت وارکہ هر تورلو تجربہ ایله تحقق ایدیور. ایشته بوکا (سببیت causality) دیورز. دیمک کہ بوفکر، (اضافہ متعلق افکار ideas of relation) مزدندر. بناء علیہ سبب نامندہ مستقل برشی یوقدر. یالکز مناسبتدہ بولوندوغز بر جوقر شیر واردرکہ اونلرک هیئت مجموعہ سی - طبیعت دیدیکمز - عالم خارجی تشکیل ایدر. او تقدیرجہ بزم خارجدن آلدیغمز تأثرات ابتدائیہ و انطباعات بسیطہ او عالمہ بکزمہ مز، آنجق (تمثالی symbolique) بر قیمتی حائزدر. یازی ناصل ایسہ اولہدر. مثلاً (انسان) کلہ سی کاغد اوزرنده ناصل انسان حقیقی بہ بکزمہ مزہ، تلقی ایتدیکمز احساسات دخی هیچ بروجهلہ عوامل مذکورہ بہ بکزمہ مز؛ فقط کاغد اوزرنده یازیلی اولان او (انسان) کلہ سی ناصل - ذہنزدہ بر مفہوم مخصوص او یاندیرہ رق - انسان حقیقی بہ اشارت ایدیورسہ، طبقی اونک کبی، بزم احساساتمز دخی خارجدہ موجود و معین بر شدہ - اشارتاً - دلالت ایدیور. بوتون معلوماًمز بویلہدر.

ایشته لوق بو بختلر حقندہ بویلہ دیور، وشو ملاحظاتیلہ تماماً و قطعاً (انفسیہ) فاسفہ سنک دائرہ اعتقادندہ قالور.

بو فکر معاصریمزدن مشہور سپنسرده و دہا پاک چوق کشیلردہدہ واردر. اونلردہ علممزک حقایق اشیایہ هیچ بر وجہلہ بکزمہ مدیکفی و یازی کبی اشارت تمثالیہ دن عبارت اولدوغنی ادعا ایدیور.

لوقک اعتقادنجہ طوغرودن طوغرویہ حواسمزله خارجدن تلقی ایتدیکمز (افکار بسیطہ) وجدانک (مالمزہ انشائیہ matériel) سیدر. ذہن اونلری مختلف صورتلرلہ (اعمال elaborer) و ترتیب ایدہرک (مرکب complexe) فکرلر وجودہ کتیرر. بعضاً او افکار بسیطہ یی بر (نسبت متقابلہ rapport réciproque) اوزرہ ملاحظہ ایدہرک اضافات حقندہ فکرلر حاصل ایدر؛ مثلاً دہمین عرض ایتدیکمز سببیت فکری ایله مبادی اخلاقیہ و قانون فکری بو قیلنددر. بعضاً دخی افکاری تحلیل و یکدیگرندن فصل و تفریق ایدہرک (افکار مجردہ idées abstraites) استخراج ایدر. الی آخرہ !.

لوقک ظننہ کورہ (زمان و مکان مفہوملری notions de temps et d'espace) دخی اضافات قیلندن و افکار مرکبہ دندر. ذہن بو مفہومی حاصل ایدہ بیلیمک

ایچون (احساسات لمسیه sensations tactiles) ایله (احساسات بصریه sensations visuelles) بی ترکیب و اعمال ایدیور؛ اوندن سوکره بعض افکاری دخی تجربید ایتمک لازمکیور. مثلا (صلابت solidité) و (مقاومت résistance) دن (مکان صرف espace pure) ی آیریور. زمان مفهومی دخی (حاشه باطنه sens interne) منزله استخراج و تعادل ایدیور. دوشوندوکرز وقت، افکارک متسلسلاً توالی ایتدیکنی طویویور. ینه بوراده یالکرز (توالی succession) کیفیتنی نظر اعتباره آلهرق افکاری تجربید ایدیور؛ زمان و مکانی ذهنمزده بویوتمک پک قولای اولدوغی کیبی بوترقی به برحد منتها تصور ایدیله مادیکی ایچون (نامتناهی فکری l'idée de l'infini) نه پیوسته اولویور. (عینیت identité) و (غیریت diversité) فکریله اضا فاندندر و مرکب کاتدر.

کذلک (کیفیات مفهومی les notions de propriété) ده (قوت force) و (حرکت mouvement) فکریلندن مرکب کاتدر. نته کیم تجربه باطنیه منزله حاصل ایتدیکنمز (خاطرات souvenirs) (تفکرات pensées) هپ بو قیلدن اولمق اوزره بر طاقم بسیط احساسات باطنیه دن مؤلف در.

(اشیا choses)، (ایمان entités) و (جواهر substances) حقنده حاصل ایده بیلدبکمز مفهومات، دخی مرکب کاتدر؛ فقط بونلر ده قاریشیق در. واقعا جومر مفهومی، بدابتاً ادراک ایتدیکنمز قوا و کیفیاتک هیئت مرکب سندن حاصل اولویور؛ مع مافیه غریبدرکه ینه کیفیات اشیا بی جواهر اشیا دن بوسبوتون آیری اولهرق دوشونمکه میالز؛ جومری بوتون اوکیفاتک (مستندالیه support) ی کیبی تلقی ایدر. بنسأ علیه جومریت مفهومی ده محصول تجربه در؛ زیرا اونک (عناصر مترکبه éléments constitutifs) سنی تشکیل ایدن بالجمله افکار بسیطه هپ تجربه ایله ادراک اولونمشدر.

(فکر الوهیت l'idée de Dieu) بیله بو قیلندن. چونکه بونک ده اساسی بر (جومر مفهومی) در؛ یالکرز حاشه باطنیه مزدن استعاره ایتش اولدوغمز کیفیات روحیه بی اعظام و اوکا علاوه ایتمکله فکر الوهیتی حاصل ایتشمزدر. الی آخره!

بوراده زیاده سیله مهم وشایان دقت اولمق اوزره بر قاق نقطه وار. اولاً زمان و مکان مفهومیلرینک بالخاصه احساسات لمسیه و بصریه دن مرکب اولماسی، بوکون

بسیقولوژی نك تصدیق ایتدیكى ادعالدندردر. صوكره بومفهومك ذهنده صورت تولدینه دائر لوقك بیان ایتدیكى ملاحظات ، تماميله تدریدیونك بوکونكى اعتقادینی عرض ایدر. سنسر ودها برچوق امثالی ، بونی عیناً تکرار ایتشلر و هیچ تعدیله لزوم کورمه مشلر ، زیرا اوکا هیچ بر شی علاوه ایدمه مشلردر .

ثانیاً : مكانك حواس خارجیه ايله زمانك ده حاسه باطنیه ايله تلقی اولونان مدرکادن - بالتجربید- تحصیل ایدلمش اولماسی تدریدیوندن غیری فرقه لراربابی طرفندن قبول ایدلمه مكله برابر، مكانك حواس خارجیه ايله، زمانك ده حاسه باطنیه ايله علاقه خصوصیه سنی بوکون همان هرکس قبول ایتکده در . هانكى فرقهیه منسوب بولونورسه بولونسون ! .. (برغسون Bergson) ه کلنجیه قدر همان هر فیلسوف بوفکرده بولونمشدر .

ثالثاً جوهریت مفهومك اساساً وماهیتاً کیفیات وقوای محسوسه فکترلرندن مرکب بولونماسی بك اهمیتی بر ادعادر ، و حادیه مذهبك اك صاغلام زمین استنادیدر . حقیقت اشیایی شبهیه دوشورور . واقعا بو طرز تاقی خیلی اسکی در . بزم شرقده ائمه معتزله دن مشهور (نظام) [الاجسام اعراض مجتمعه !] دیمکله جوهریتی انکار ایتشدی . جسم دیدیکمز شیلر ، اعراضدن و یا خود ، بوکونكى فلاسفه نك و بالخاصه لوقك دیدیکى کبی کیفیات محسوسه دن مؤلف اولونجه ، [حذراتنده جسم یوقدر !] دیمک چیقار . او حالده جسم دیدیکمز (شیء موهوم) ك وجودی انحق بزم وار لغمزله قائم اوله بیلیر . چونکه کیفیات ، بزم کندیمزده حس ایتدیکمز احوال و تغیرات روحیه دن عبارتدر . بناء علیه بزاولمایجه اونلرده اولماق لازمکلیر . اکر جسم دیدیکمز شیء حقیقتاً اولیله بر طاقم کیفیاتك هیئت مجموعه سنه ویردیکمز یراسمدن عبارت ایسه ، البته بزمه برابر محو اولوق کر کدر .

کورویورسکیزکه ایده آلیم فلسفه سنی انکار ایدن و اوکا تماماً ضد بر سیستم قوران لوقك افکار و اعتقاد اتندن ایده آلیمه - بر آیدمه - کچه بیلیمک ایچون بر قومشو قاپی سی واردر . (بارکله Berkeley) لوقك (حادیه و انفسیه) مذهبی قبول ایتکله برابر ، اوقاپی دن ایده آلیمه کچویورمشدر . نه کیم شیمدی کورمه جکر . یالکیزبوکا - اولسه اولسه - سبیت اعتقادی مانع اوله بیلیر . زیرا بومعولوماتك کیفیات محسوسه دن عبارت بولوندوغی تحقیق ایتسه بيله مادام که او کیفیاتك بزده بر طاقم تأثرات و انفعالات قیلندن اولدوغنده هیچ شبهه یوقدر ، چونکه مسلمدر ؛ البته

شو انفعالاتمزه برفاعل، شو تاثراتمزه بر مؤثر آرامق مجبوریتندن قورتوله مایه جفمنز بدیهی در . مع مافیله بوفاعل موثری خارجده آرامق ممکن اوده و غی کیی کندی وجدانمزه کورمک ده ممکندر . خارجده بولانر، اصل (انفیسون subjectivistes) در؛ بوتقدیرده - هیچ اولمازسه - مکانک وقوتک مستقلاً موجود بولوندوغنه اینانق بهمه حال ضروریدر . موثری وجدانده کورنلر اصل (افتکاریون idéalistes) در . اوتقدیرده دخی - هیچ اولمازسه - روحک استقلال وجودینی و، اردات صاحبی اولدوغنی - اول امرده - تسلیم وقبول ایتک (لابد indispensable) در .

ایشته بنم آکلادیغمه کوره (حادثیه) اعتقادی اوزرینه استناد واتکا ایدن و، (حسیه sensualisme) مذهبی عینی صورته قبول واستمثاله مستعد بولونان بو ایکی نوع فلسفه نك [یعنی افنکاریه ایله انفسیه مذهبیرنك !] آره سنده - بنم تحقیقمه کوره - اك مهم ، اك قطعی واسالی فرق بودر . بك چوق متفكرلر ومنقدرلر ، حتی بك بوبوك فیلسوفلر بو خصوصده یا کیلمشالر ایده آلزیم ایله سوبزه قتیویزم وسپیریتوآلزیم مذهبیرینی برطوتمشلردر .

قانت کیی برداهی بیله عادی ایده آلزیمی رد ایتدیکی حالده کندی مسلکنه بر اسم بوله میور ؛ اول (افنکاریه متعالیه idéalisme transcendente) دیور ؛ موکره بولگه نك یا کلاش ومناسبتسزالتباسلره میدان ویردیکی کورونجه، اوتعبیری بکنمیه وک اوکا بدل (تنقیدیه criticisme) اسمنی ترجیح ایتشدرد . حالبوکه - چوق دفعه سسویه مش اولدوغم کیی - لدنیات مسائلنه کیریشمزدن اول وسائط علم وادرا کمز حقنده تتبعاته قویولوبده فرق مشهوره عنندده مسلم بولونان مختلف نظریات معرفتی تنقید ، وبالخاصه وسائط علمیه مزی تحقیق ایله ایشه کیریشن هر فیلسوفه - اصطلاحده - منقدوشومسلکنه ده تنقیدیه دیرلر . بناء علیه بوتعبیرلری قانتیه وانك مسلکنه تخصیص ایده بیلمک ایچون هیچ برحق ، هیچ برمجبوریت یوقدر .

(ایده آلزیم ترانس ساندان تال) تعبیرینه کلنجه اوده بك اوقدر طوغرو دکلدرد ؛ چونکه بوراده صفت حیثیتی حائر اولان (متعالی transcendental) کلمه بی، مدرکات انفسیه مزخارجنده وحادثات عالمنك ماوراسنده بر (وجودمطلق) اولدوغنه قناعتی متضمن برمعنا افاده ایدر ؛ واد قناعته دلالت ایتک اوزره ایراد اولونمش برکلمه توصیفیه در . اویله برشی وارسه اونی بزکندی فعالیت روحیه مزله

ایجاد ایتمش اوله مایز. نته کیم قانتک فکری ده بودر. بواولونجه ایده آلیم تعبیری-
هرنه تورلو توصیف ایدیلیرسه ایدیلین - بویه بر مسلکی تسمیه ایچون یاقیشیق
آلیر بر کله دکلدر. خلاصه قانت، هاملتک کوزل و معقول تصنیفه کوره
(جوهریون substantialistes) دندر. ناصل ایده آلیست اوله بیلیر؟! [*]

بویا کلسلفلر، بئم کوستردیکم اینجه نقطه لرك اولانجه اهمیتنی تقدیر ایتک شرطیله
تظاهر ایده بیلیر. او اینجه نقطه لر دخی مسالک و مذاهب فلسفیه آره سنده نه قدر
کیزی و صمیمی تماسلر اولدوغنی کوستریر.

فقط کوروپورسکز که لوق، قطعاً ابطال ایتک ایسته دیکی بر مذهبه، مهد
ظهور اوله بیه جک بر آجیق قاپی بر افش، و عرض ایتدیکم نقطه یی لایقيله تحکیم
ایتمه مشدر.

رابعاً فکر الوهیتک جوهریت مفهومندن طوغدوغنی ادما ایدیشی بک مهمدر؛
زیرا جوهریت فکری - بو فیلسوفک ظننه کوره - ذاتاً تجربه محصولی در
و کیفیات محسوسه دن مؤلفدر.

شیمدی بونک اوزرینه صرف تندی تجربه وجدانیه منزله تلقی ایده بیلدیکم
بعضی اوصاف و قابلیت - صوک درجه یه قدر اعظام ایله - جوهر مفهومه ضم
و علاوه ایلرسک مثلاً علیم بصیر، سمیع، فعال المایرید، حی، قادر الی آخره !.
دیرسک فکر الوهیتی تحصیل ایتمش اولورز. بویه اولونجه بوفکر تجربه محصولیدر !.
دیور.

لوقک بوا دما سی تاریخ انسانیت ایله واقعا مصدق در؛ چونکه هر تورلو تحقیقات
کوستریور که (دور جاهلیت) دور دیانت و مدنیت هر زمان هر یرده تقدم
ایتمشدر؛ هر حالده انسانلرده حس دین و فکر الوهیت، یاواش یاواش انکشاف

[*] حقیق بر ایده آلیست، حقایق اشیا نک غیر مادی بر طاقم (اعیان ثابته entités
immuables) و (مثل مکمله archétypes parfaits) اوله رق (عالم معنا le monde
intelligible) ده وجودینه قائل اولان واونلری جواهر وجود اولقی اوزره تلقی ایدن در.
شو حیثیتله افلاطون اک مکمل بر نمونه در. ذاتاً بو مذهبک واضی ده اودر. جوهریت
حیثیتی روحه و یا خود ارواح متکثره به اسناد ایدن دخی سپیریو آلیست در. عقل وادرا کزک
ایرمیه جکی بر حقیقته اینانان (ترانس ساندن تالیست) در. قانت بویه بر حقیقته ایمان
ایتدیکی ایچون وانسا متعالیوندن در. فقط نظریه معرفت اعتباریله بر نوع سویره قتیوبزم
موجدی در؛ هیچ ایده آلیست دکلدر.

ایده یلمشدر. اوبله اولماسه یدی بعثت پیغمبرانه وخلقى حقه دعوت ایچون دینی تعلیمه حاجت اولمازدی .

سپنسر ، (سوسیولوژی) کتانبنده بومهم مسئله یی بوسیاق نظرله تقبعا یتش وبناء علیه ینه لوفک مسلکندن آیرلماشدر، دیمک اولور . حالبوکه بو طرز تلقی نصوص دینییه و اعتقادات مسلمله ایله - قولای قولای - قابل تألیف دکلدر . اونک ایچون اولمالیدرکه (حکمای ملیون *les philosophes religieux*) و فرقه رهایی ، کرک لوفک و کرکسه سپنسرک دین و فکر الوهیت حقنده کی ملاحظاته قارشى شدتله نفرت کوسر مشلر و بوفلسوفلرک پک یا کلش دوشوندکلرینی ادعا ایدم طور مشلردر . حالبوکه لوفک ادعاسی اشاعره اعتقادیه پک اویفون دوشر . خامساً مبادی اخلاقیه یی اضافات قیلندن اولان افکار مؤلفه دن عد ایتمکه لوق، اوتهدن بری مؤسس و مسلم بولونان اعتقاداته برباشقه ضربه دهاوورمشدر . اکر مبادی اخلاقیه دیدیکمز قضایای معتبره - اوتهدنبری ظن اولوندوغی اوزره - (حقایق عقلیه *vérités rationnelles*) دن اولما یوبده مناسبات بین البشریه دن بالتجربه تحصیل ایتش بولوندوغمز حقایق تدرییه قیلندن ایسه ، اولنرک (واجب *nécessaire*) و (لایتغیر *immuable*) اولماسی قبول ایدمه یز . چونکه بالتجربه کشف و استحصال ایدم بیلدیکمز (حقایق تدرییه *vérités empiriques*) ده بویله بر حیثیت یوقدر . حالبوکه حکمای متشرعینه بو خصوصده ظهیر اولان (فلاسفه عقلیون *les ph. rationalistes*) ک ادعاسی تماماً بونک ضدی در . بو ضدیت نتایج عملیه اعتباریه پک مهم اختلافاته سببیت ویررکه اولنری بوراده تعیین و تعداد ایتک پک وظیفه منر دکلدر . فقط بو ادعا فلسفه اخلاقیه ده (اضافیه *relativisme*) وبالخاصه (نفعیه *utilitarisme*) مسلکینه چیقار .

واقعا اخلاقده (نفعیه) مذهبی اک اول انکلترده (بن تام *Bentham*) تأسیس ایتش و صوکره (جون ستنوت میل *J. S. Mill*) اونی اصلاح و اکمال ایتشدر . بوکون چوق کشی اخلاق بحثده بو اعتقاده مائلدر .

او حالده بومذهبکده مهد نشأتی لوفک فلسفه سی وبالخاصه مبادی اخلاقیه حقنده کی نظریاتی اولمشدر دیسه ک پک یا کلش بر ادعا اولمایه بیله جکدر صانیم . لوق، بوملاحظاته بناء (یقینیت علم *certitude de la connaissance*) حقنده

امین بردستور بولق ایستور ؛ (علمك قیمتی la valeur de la connais.) انجق
 بوسایده تعین ایدهبیلهجکی ایچون بو تشبثك اهمیتی شبهه کورتورمز .
 اوتدنبیری یعنی ، الك اسکی حکمدان بو انکلز فیلسوفنه کلنجیه قدر ، همان
 هر کس ادعا ایتشدی که (معطایات حواس les données des sens) ، (یقین
 certitude) افاده ایده جک قدر صاغلام وقناعت بخش بر (معیار علم) دکدر ؛
 دکدر ، چونکه هر شی ایچون علی الانفراد بر (رأی opinion) ویره بیلیر . همد
 - مع التأسف - او شیثك لدینته یعنی حقیقته دائر معلومات ویره مز ؛ انجق
 بعضی خواص وکیفیاتندن خبر ویره بیلیر .

(شهادت حسیه témoignage des sens) نك کفایتسزلیکی بوندن ایلری
 کلور . بونك بر چوق دها محظورلری وار: هر شیئی فرداً فرداً تدقیق وتقبیع
 ایتك لازم کلدیکندن و بوکاده انسان ایچون قطعاً احتمال اوله مادیفندن ، بووادیده
 بایله جق تدقیقات و (تفحصات تجربیه investigations expérimentales) اوزرینه
 ویره بیله جک حکم ، (استقراء ناقص) حدودینی آشامور . بوکی حکملر
 اوقدر ضعیف درکه برتک استتسا اونق نقض وابطال ایده بیلیر . بناءً علیه تجربه
 ایله تحصیل ایدهبیله جکمز معطایات حسیه ، یقین افاده ایده مز واوندن طولانی
 (قسطاس حقیقت critérium de la Vérité) اولق حیثیتیه قبول ایدیه مز .
 حالبوکه (لوق) ، - دهمیندن بری کوردوکز وجهه - هر کسك معقولاتندن
 بیلدیکی مبادی نك ، مثلاً (فکرسبیت) و (فکر الوهیت) ودها برچوق اشالی
 کیی (مفهومات قبلیه notions aprioriques) نك محصولات تجربیه دن اولدوغنی
 قطعاً ادعا ایدیور و (هندسه متعارفه لری axiomes géométriques) نی بیله بونلردن
 آیری طوتمو یوردی ، تجربه دعواسی - (اسباب علم moyens de connaissance)
 ده - (حسیه sensualisme) دعواسنه طایانیر . نته کیم بو انکلز فیلسوفی ، بوتون
 (نظریه معرفت) نی حسیه اعتقادی اوزرینه بنا ایدیور ، اولدهده تجربه یه
 توفیق حرکت لزومنی توصیه دن هیچ کری قالمیوردی .

شوالده (یقینیت و قیمت علم) ایله (مطابقت علم adéquation de la connais.)
 کیی مهم واساسلی مسئله لرده ناصل بر حکم ویره بیله جک وشبهه دن یاقه سنی قورتارده .
 بیله جکدر ؟! زیاده بیله موجب مراق اولان بو بختلرده اکر بو فیلسوف اثبات

موفقیت ایده بیلیرسه، (فلسفه تجربه)، (یقینیت علم) دعواسنده سوزسویله مک
ایچون بر (حق مشروع) قازانمش اولور .

لوقک بوخصوصده افکاری شووجهله تاختیص ایدیه بیلیر :

[شبهه سز ، بوتون معلوماتز تجربه دن حاصل اولمش وحواسمزک وساطتیه
تلقی ایدلمشدر . لکن بوصورتله - یعنی طوغرودن طوغرویه - واقع اولان واردات
انجق (عناصر علمیه les éléments de la con.) در . بونلری (تحسسی
intuitif) اوله رق آلیرز و بومعامله ده ذهنمزک وضعیتی تماماً (انفعالی passif) در .
بوجسندن اولان فکرلرک حقیقتنده ذره قدر شبهه ایدمه یز . چونکه اونلر بزم
اثر صنعمز دکدر . واقعا (انفسی الماهیه de nature subjective) بر طاقم
حادثاندرلر؛ بزه وقوعه کلن تغییرات روحیه دن عبارتدرلر؛ فقط اونلرک حصولنده
ذهنمزک ذره قدر فعالیت و نفسمزک ارادت و اولمادینی ایچون، بزه بواحواله باعث
اولان اشیایی عالم خارجی ده آرامعه مجبورز . بناء علیه افکار بسیطه مزک، خارجه ده
(ایلک نمونه لر archetypes) ی، نوعا (قابلر patterns) ی بالذات موجود اولق
کر کدر . (سبیت مبدای principe de causalité) نه بناء بویه بر حکم ویرمک
مجبوریتنده یز . وجدانمزده طویدوغمز حقایق انفسیه بعضی مؤثر اتک اثرلریدر .
ا کر خارجه ده اویه بر طاقم مؤثرات موجود اولماسه یدی ، بو اثرلر بزه فاصل
حاصل اوله بیلیردی ؟ دیمک که عالم خارجی مستقلا موجوددرکه وجدانمزده بو
تأثیراتی ایقاع ایدیور . وجودی اولمایان برشی حقیقی بر وارلق حصوله کتیره مز[*]
حواسمز بزه - بر علم تحسسی ایه ! - یالکز کیفیات اشیان خبر ویریور .
کیفیات اشیاء بالذات اشیانک وجودینی اثبات ایدر . واقعا کیفیات قالیه بوسبوتون
بزم احوال روحیه مزدندر؛ فقط ینه برشینک کندیسنده بر علت مؤثره اولمالی درکه
روحمزده اوکی احوالک حصولنه باعث اوله بیلسین !... مثلا لمون رایحه سنی کل
رایحه سندن فرق ایدیورسم بکا قوقوحسنی ویرن شینک لمیونده باشقه، کلده باشقه
اولماسی لازم کلیر . [بوکی کیفیات - حقیقت حالده - بالذات اشیاده موجود بر
شیلر دکدر؛ یالکز او اشیانک حائر اولدوغی کیفیات اولی واسطه سیله بزه تورلو
تورلو (احساسات sensations) ایقاع ایده بیلیمک (قابلیت power) لرندن

[*] کندی سوزلری شودر: [non-entity cannot produce any real being]

عبارت در [*] کیفیات اولی ، (صلابت solidity) ، (امتداد extension) ، (شکل figure) ، (حرکت motion) و (عدد number) در . [اجسامك]
 کیفیات اولی حقیقه کی فکر لرمزك اجسام مذکور ایله مشابیهتی وارد. اونلرك
 قالب لری اصل نمونه لری بالذات اشیاده موجود در . حالوکه کیفیات تالیه نك بزده
 ایقاع ایتدکلری فکر لرك اشیایله هیچ برنوع مشابیهت لری یوقدر. الخ ! فکر مزجه
 طائلی ، مائی یاخود صیجاق اولان بر شی ، اجسامك (غیر محسوس اقسامی
 insensible parts) نده شکل و حرکت کیبی برشیلردر که ، بز اونلرك ایقاع ایتدیکی
 احساساته کیفیات ثانیه دیورز. [**]
 بوراده براز طوروب دوشونم لری یز .

اگر او یله ایسه ، یعنی بز - لوفك دیدیکی کیبی - یالکز کیفیات اشیایه مطلع
 اوله بیلورسقی ، حقیقت اشیایه علم حاصل ایده بیلیمکدن الی الابد مایوس اوله جقز
 دیمکدر. احوالده روحزله عالم خارجی نك مناسبتی و بومناسبتله تحصیل ایده بیلدیکمز
 علمك صحتی ، قیمتی حقیقه نه ده یه بیله جکمز؟ .. بویه برعلمك نفس الامر تامی
 مطابقتی ناصل تحقیق ونه ایله اثبات ایده جکمز؟ .. جواهر اشیایی بیلیمه دجکه بوکا
 امکان اوله بیلیرمی؟ ..

انکلز فیلسوفی بیان ایتدیکی ملاحظاته کوره ، بویه سؤال لره معروض وجوابه
 مجبور قاله جفتی - بالطبع بزلردن اول - دوشونمش ایدی . ویردیکی جوابلرده
 يك صریحدر : اولاً تجربیه یی علمده اساس ، عالم خارجی بی منبع و حواسی واسطه
 استحصال عد ایتمش اولدوغی ایچون - مابعدالطبیعیون کیبی - جوهر دن بحث
 ایتمکله ایشه باشلامبور. ابتدا تجربه حسیه یی نظرتدقیقه آلیور ؛ احساساتی مطالعه
 ایدیور. سوکره تجربه باطنیه ایله افکار مرکبه یی ناصل وجوده کتیردیکمزی
 [*] معترضه اینجده وارد اولان ملاحظات لوفك بالذات سویله دیکی سوزلرله هیناً
 ترجمه سیدر .

[**] بوفکرلر ، بوکون تحقیقات علمیه ایله تماماً مضددر. طم ، بعضی اهتزازاتک حلیات
 لسانیه من واسطه سیله ایقاع ایتدیکی برنوع حسدر. رنکلرك معین اهتزازات اثیری دن حاصل
 اوله برر نوع طویف اولدوغیده شبهه سزدر ؛ چونکه برنانه ده واقم اولان عدد اهتزاز
 حساب اولونمش وهانکی رنکی احساس ایتدیکی آ کلاشلمشدر . حتی شایان دقتدر که -
 حرارتك ماده نوعندن برشی اولدوغنه علی الاطلاق اعتقاد ایدلیکی - او یله بر زمانده ،
 لوف : [حرارت ، اجسامك غیر محسوس اقسامنده براهتزاز سربعدر !] - ده یه رنك حقیقی
 سویله مشدر ،

تدقیق و تتبعه کیریشیور. بوتون مرکبات فکریه بی (احوال modes)، (جواهر substances) و (اضافات relations) نامریله اوج بویوک صنفه ارجاع ایدیور که (سبیت مفهومی) اضافات صنفنده، ماده و روح دخی جواهر صنفنده داخلدر؛ و مادام که حد ذاتنده مرکب اولان شو فکری بالذات ذهنمز بر طاقم بسیط فکری لرلدن تألیف ایتشد، بدیهی در که اونلر بر محاکمه نتیجه سنده حاصل اولمش فکری لر مز دندر. بناء علیه کائنات خارجییه طوغرودن طوغرییه دکل آنجق بالواسطه علممز تعاق ایده بیلدیور. بلاواسطه بیلدیکمز کندی بسیط طویغورلر مزدن، یعنی (تحدسی اولان افکار idées intuitives) مزدن عبارتدر. جوهر دبدیکمز - باشلی باشنه موجود برشی دکل - فی الحال موجود اولان اشیا نك ماهیاتنه تقابل ایدن فکر واعتقاد مزدر. یوقسه، لوقک کندی دیدیکی کیی [جواهر حقنده علی الاطلاق صریح بر فکر مز یوقدر. او او یله بر (بیلیم نه؟ ! un je ne sais quoi) در که خصوصی بر جمله اوصاف و کیفیاته بر هویت مشخصه ویره بیلیمک ایچون اوکا استناد ایدیور. مثلاً ثقلات، رنگ، قوقو، طعم کیی اوصافه محل استناد اولان شی نه در؟.. دیه تحقیقاته کیریشد یکمز زمان، صلب و ابعاد ثلاثیه بی حائر بر شینک وجودینه محتاج اولویورز که - طوغرودن طوغرییه - حقنده بر علم حاصل ایده بیلیمک کمزه امکان یوقدر. احاصل جوهریت حقنده کی افکار مز نك جمله سی ده بسیط بر طاقم فکری لک (هیئت مجموعہ collections) سیله برابر اونلره بر نقطه استناد اوله بیله جک مجهول الاصل برشی (فرض supposition) ایتکدن عبارتدر. [بویله بر شی فرضنه مجبوریته، سببیت علاقه سندن ایلری کلیور؛ حالبوکه بوده - حد ذاتنده - بسیط دکل، مرکب بر فکری در؛ تجربه باطنیه منزله تلقی ایتمش اولدوغمز بر اعتقاد در.

شو بیانات مهمه و اعترافات صریحه سنه نظراً لوق، اولاً: اضافیت علم بشری و بالنتیجه علم مز نك انفسی و وسائط ادراک مز محدود اولدوغنی قبول ایتمش بولونیور. ثالثاً - وینه بودوشونجه لرینک بر نتیجه ضرورییه سی اوله رق - حقایق اشیا یه مطلع اوله بیلیمک امیدندن مایوس کورونوب اظهار عجز ایدیور؛ یعنی (آغوستی سنزم) اعتقادینه پیوسته اولویور. فقط تجربه حسیه بی اساس اتخاذ ایتمش اولدوغنی ایچون عالم خارجی نك استقلال وجودینه اینانیور؛ حتی ایتاندینی

ایچون تجربه حسیه بی اساس انخاذا ایدیورکه، بو بر (دور فاسد cercle vicieux) در؛ وایچندن چیقماق قولای دکلدر. مع مافیه هر نه اولورسه اولسون - مادام که کندی وجدانی خارجنده مستقلاً موجود بر وارانه ایمان ایدیور، - لوقک آغوستی سیزمی (وجودی positif) در؛ (عدمی négatif) دکل ...! چونکه: [هیچ شبهه- یوقدرکه برشی واردر؛ فقط نه اولدوغنی بیلمم ...!] دیمک ایستور، صوکره حقیقتی هیچ بیله مدیکی اوشیک وجودینه حکم ایتکده (استحضاریه représentationisme) اعتقادینه قائلدر. یالکز کندی احساسات وادرا کاتی طوغرودن طوغری به تلقی و استشعار ایتدیکنه قانع بولوندوغنی ایچون ساده (امور وجدانیه faits de conscience) بحثنده (تحدسیه intuitionnisme) طرفداریدر.

(اصول methode) مسئله سنده علی الاطلاق وبلا احتیاط تجربه طرفداری اولدوغنی سونلشدم و فکر الوهیت ایله مبادی اخلاقیه وحقایق ریاضیه مک بیله محصول تجربه اولدوغنده شبهه سی یوقدر دیمشدم.

بناء علیه بو آدم (انفسیه)، (تدرییه)، (اضافیه)، (لادریه) اعتقادلری آره سنده اساسلی و متین رابطه لر کشف ایده رک بودرت مذهبک مبادیسی برلشدر ووب یکپاره و آهنگدار بر سیستم وجوده کتیرمش بو یوک بر فیلسوفدر. زمانمزه علی العموم اذهان متفکرینه حاکم اولان فلسفه اساساً بودر. یالکز مباحث فرعیده اختلاف واردر. نته کیم هیوم، بارقله، قانت، قونت، هاملتن، میل، سپنسر، ودها بر چوق امثالی کیی برنجی درجه ده فیلسوفلر، - اساساً - بو اعتقادده درلر. اولاهیبسی (سوژه قتیویست) در؛ هیبسی (رولاتی ویست) در؛ هیبسی (آغوستیق) در. یالکز هربری بر نقطه ده قالمش ویاخود بو فلسفه بی بر وجهله تلقی ایتمشدر.

مثلا هیوم صرف (حادثیه phénoménisme) دائره سنده قالمش و (عدمی négatif) بر (آغوستی سیزم) طرفداری اولدوغنی کوسترمشدر. قانت، حقایق اشیانک نبوتنه اینسانمش فقط اوکا کسب اطلاع امکاتی انکار ایتمش اولدوغنی ایچون (وجودی بر آغوستی سیزم) طرفداریدر. نته کیم هاملتن و سپنسرده او یله در. کذلک قانت مبادی عقلیه مک تجربه محصولی اوله مایه جغنی ادعا ایتکله برابر، او (مبادی قبلیه principes aprioriques) بی آنجق (صور علمیه formes

(de la conn.) عد ایتد کدن سوکره (مواد علمیّه . matières de la conn.) نك آنجق تجربه ایله تحصیل امکاتی معترف بولوندوغندن یالکز بوداؤه وسیعه ده تدریبون ایله اتفاق ایتشدر. زمانمزه (هاملتن) ، (هیوول) ، (مه نسل) ، کیی مشهور فیلسوفلره برابر بر جوق آلمان وفرانسز و آمریقائی متفکرلر هب بو اعتقادده درلر. فقط هر نه اولورسه اولسون ، بونلرک جمله سی ده اساساً (انفییه ، اضافیه ، تدریبه ، لادریه) عقائدنده یکدیگرینه مشار کدرلر .

(بالواسطه وبلا واسطه علم) بحثه کلنجه ، زمانمزه فیلسوفلرک اک کنیش مصارعه میدانی اودر . هاملتن (تحدسیه) طرفداری ایدی . اوکا شدته معارض و معترض اولان (میل) ، (استحضاریه) اعتقادنده مصر بولونویور وبو فلسفه یه کالیه رواج وبرمک ایچون اوغراشیوردی . اک سوکره کلن مشاهیدن (برغسون Bergson) ، ینه تحدسیه اعتقادینی بر باشقه شکله عرض ایده رک اونی مدافعه ایتدی . عالم حقه ده حاصل ایتدیکمز معلوماتده ذهنمزه یک بویوک بر رول اوینسادینی تسلیم و تعریف ایتمکه برابر ، اساساً (واردات ابتدائیه) نك تحدسی اولدوغنی ادعا ایله دی که لوقک اساس ادعاسی ده بوندن باشقه برشی دکدی . [اولاً (احساس sensation) ، سوکره (تفکر reflexion) ایله معلومات حاصل ایده رز .] دیمکدن مقصدی آنجق او ایدی .

لوقک تاریخ وفاتی اولان (۱۷۰۴) سنه میلادیه سندن بوکونه قدر ایکی یوز اون اوچ سنه لک بر زمان مرور ایتش اولدوغنی ایچون ، ایکی عصر دن براز زیاده سورن بو دور اخیرده کرک فنون و صنایع ، کرکه علوم و فلسفیاتده خیلی مهم کشفیاته موفقیت الیرمشدر . بونده شبه یوقدر ؛ چونکه بو موفقیاتک بر قسمنه بالذات شاهد اولدوغمز کیی ، یک چوغنکده تاریخی بیلورز . لکن فلسفیاتک بویوک جریانیا حالا لوقک آجیدینی چیغیردن چیقه مامشدر . بو آدمک - ذهن انسانیت ایچون - یک مفید اولان اثرلری دقتله تتبع ایدیلیرسه کورولورکه اک طوغری بوللری بزه جوق زمان اول کوسترن کندسی اولمشدر .

حتی بو بوللری - کندسی بیله - بالتجربه کشف ایتدیکنی سویلویور : بعضی صمیمی دوستلریله (ظن ایده رم هیوم وبارقله ایله ؟) فلسفه مباحثانه کیریشمش و یالکز (دیالکتیک dialectique) طرزنده یعنی قوری لاف ایله بحث ایتمکدن هیچ بر نتیجه چیقه مدیغنی یک ای آکلامش و اونک اوزدینه وسائط علمیّه مزک قابلیاتی

قصور لرڻي، ساحهٔ فعاليتي وحدود استقصا آتي - بالذات - تحقيق ايتڪ مجبوريتنه دوشمشدرد. ڪنديسني بالذات شو سوزلري سويلوپور :

[معما حل اوغورنده برخيلي دوشونوب ذهن يوردقدن صوکره ، کوردم که عقل وفکر مزي آلت اوست ايدوب بزي حيران براقان او شهبه لري حل ايدوبيلهک ايچون بر قراره بيله ياناشامامشز. عقله اوله کلدی که يا کلش بر يوله صابمشنزدربوتورلو تحقيقاته کيريشمزدن اول ، ڪندي قابليت مزي تدقيق و امتحان ايتڪ ، وعافله مزك هانكي شيلرله مشغول اولوب اوله مایه جفني کوردمک وآ کلامق لازم کله جکدر.]

کورويورسکيز که تنقيديه اصولي رهبر ايديشمدر .

صوکره بوتدقيقاتک بسبقولوزي زميننده اجرا ايدلمه سي ايجاب ايدجکني بک اي آ کلامش وحق بسبقولوزي ي فيزيولوزيدن بوسوتون آيرمقدمه اصابت ايتمشدر . چونکه علم روحک اساساً بر (فيزيولوزي دماغي physiologie cérébrale) دن عبارت اولدوغی قطعياً قبول اولونسه بيله فيزيولوزي ، تظاهرات حسيه وفکر يه نک آنجق (شرائط عضويه conditions organiques) سندن بزم بعض معلومات هيجه ويره بيلير. حالبوکه بر فيلسوفک آراديني نوع معلومات يالکيز اونلر دکدر؛ چونکه - بالفرض - اهتزازات اثريه نک فاصل اولوبده الوان صورتنده حس ايديله بيلديکني وياخود او اهتزازاتک مرا کز مخصوصه يه انتقال ايتمه سيله شعورک فاصل حصوله کله بيلديکني ، فيزيولوزي ذره قدر تعريف ايدم. هم وظيفه سي دکدر، هم بو حادثاتي تحقيقه الويريشلي وساطتي يوقدر. فيزيولوزي يالکيز بسبقولوزي يه صاغلام بر زمين حاضرلار و بسبقولوغلرک - يا کلش يوللره صابوب مباحثات بيهوده ايله - ضلالته دوشمه لهريته خادم اوله بيلير. اونک ايچون لوقک حرکت واقعه سي طوغرودر وبو خصوصده بيان ايتمش اولدوغی سوزلر دخي همدرد .

او - تعقيب ايتديکي مقصده ايرمک ايچون - يالکيز انسانک علاقه دار اولدوغی شيلرله اشتغال ايدن (قابليات ممیزه discerning faculties) سني نظراعتباره آليور. بو قدريني شيمديکک کافي کورويور. روحک لدنياتي وحادثات معنويه نک شرائط غريزه سيله اوغراشمغه لزوم حس ايتيور .

فقط [قابليت مزك حنودی خارجه جيقما مالي يز !] دييور .

[ذهنمرك قابلياتى لايقيه تتبع و تدقيق ايدردہ (علممرك ساحة اتساعى
 the extent of our Knowledge) کشف ايدوب افقلىرى بولورسقى، اشيا نك - بزم
 نظر مزده - منور اولان قسميله قارا كلق قالان قسمنى فصل ايدن حدود قطميه ي
 تعيين ايتمش اولورز. آ كلاشيله بيلن شيلر ايله آ كلاشيله مايان شيلر آره سنى آيرمش
 اولورز. بله او زمان انسانلر ، او قارا كلقدہ قالان جهت ايجون اعتراف جهل
 ايتمكدن يك او قدر صيغيلمزلر ؛ وفكر ولسانلرى ، منور اولان جهته - دها
 زياده مفيد و ممنونيت بخش بر صورتده - صرف و استعمال ايدہ بيلرلر !]

ديه يك پراتيق بر ملاحظه بيسان ايدىيوركه ، زمانمز بومهم نصيحتى تماميله
 قبول ايتمش در . فضله اوله رق زمانمزدن چوق اول (قانت) ، بو سوزلره هر
 كسدن زياده قيمت ويره رك (عقل صرف Raison pure) ى وقابليات ذهنيه ي تدقيق
 ايله صاغلام بر مسلك فلسفى ياييله بيله جكنه قناعت كتيرمشدى . بوسورتله تشبث
 ايتك تنقيد ايله ايشه باشلامق در ؛ ديمشدم . قانت بونى اصول اتخا ايتمشدر . فقط
 بوتون بوفكر و نيتنده لوقك نصيحتلرندن ماهم اولمشدر ؛ دهنيله بيلر . واقعا نتيجه
 تدقيقاننده كندينه خاص بر مسلكك موجديدر . فقط لوق اولماسه يدى قانت بو
 استفامته توجه ايدرمى ايدى بيلمم ؟ .. بن ظن ايدىيورم كه زمانمرك جريان فلسفى سته
 قطعى بر استفامات ورن (لوق) در . خصوصا آجدينى مباحثه لرله بوتون
 (نپيسته مولوزى) مسائلى يوغوروله يوغوروله هم بر شكل قطعى كسب ايتمش
 همده براق و صاف اولمشدر . بوكون اونلرى او حالده مطالعه ايتمكده يز ؛ واك
 باشايجه لرى ندر ؟ . بيلورز . يعنى تصنيف خصوصنده دخى دها زياده موفقيت
 حاصل اولمشدر .

بوكون (نپيسته مولوزى) ده اك مهم واساسى ح . واقعا يته (نفسمزله
 عالم خارجى نك مناسبى) در ؛ فقط بو خصوصده اك اول حل اولونماسى لازم
 و مطلوب اولان مسئله اصليله (بلاواسطه مى ؛ يوقسه بالواسطه مى ؟) علم حاصل
 ايتديكمز عائد اولان سؤالدر . سائر مسائل هپ بوندن تفرع ايدہ بيلر . فى الحقيقه
 زمانمز فيلسوفلرى هرشيدن زياده بونكله اوغراشيورلر و برقسى تحديسه ، ديكر
 برقسى ده استحضاربه اعتقادىنى تصويب و ترجيح ايدىيور .

لوق ، نفسمزله عالم خارجى نك مناسبته دائر مهم بر شى سويليه ميور . فقط
 سويليه بيلمش اولانى ده كوره مادك ! بناء عليه اومعما اولانجه ظلميته مههم طور و يور .

الله نامنه بر قدرت کلاهیه اعتقاد ایدنلر شومناسیتی - بالطبع - اونک علم و ارادت ازلیه سیهلہ تعریف ایدیورلر . ده قارت ، بو خصوصده بیان رأیدن استتکاف ایتشدی . سینیوزا ، مالبرانش و لایب نیچ بومستله دایر برسوز سویله بیلیمک ایچون باشقه چاره بوله مامشلر و هریری بروجله نیت و ارادت الوهیتی ایلری سورده رک او معمای حل ایتش اولمق ظننه بولونمشلردی . حالبوکه بو طرز تعریفی زمانمزک حکمای ملیونی و مشاهیر آلهیونی بیهلہ مقبول عد ایتیورلر . ذاتاً ارسطودنبری (Deus ex machina) دیه معروف اولان دلیل غیر معقول بودر . [۱] . اولاً جناب حلق نیتہ هیچ بر کیمسه ادعای وقوف ایدمیز ؛ ایتسه عظیم کسنا خلق و حدناشاسلق اولور .

همده یهوده اولور؛ چونکه تعریفی مطلوب اولان جهتی تنویر ایچون ذره قدر یاردیم ایدمه مکله برابر مسئلهیه فضله اوله رق بر باشقه کوچک ده ا انضمام ایدر . نیت الوهیتک - فی الحقیقه - اویله اولدوغنی اثبات و نیچون اویله اولدوغنی تعریف ایتک لازمکلیرکه - شیمدی سویله دیکم وجهله - بویله شیلر حقتده هیچ بر انسانک علمی اوله ماز .

لوق ، غایت حر فکری اولقله برابر صدق و صمیمیتله دیندار و مؤمن بر متفکر اولدوغنی ایچون ، ناچار بومعما قارشینسندہ عقیده الوهیتدن استمداداً بر بر تعریف ویریورکه - اسبابیلہ ایضاح ایتدیکم کیی - بر تعریف صحیح و مقبول دکدر . ایشته بوراده یه وارنجه بو انکلیز فیلسوفی دخی طبقی ده قارت ، مالبرانش و بونلرہ اقتدا ایدن بر جوق متفکرلرک دوشدوکی ضرورت و مجبوریته دوشویور :

[فکدرلرمن - طبعی بر صورتده - روحزه تأثیر ایدن اشیانک (محصولات products) ی در . بو وجهله اویله بر طاقم ادراکات ایقاع ایدیورلرکه اونلر

[*] بو تعبیر مشهور ارسطونک کندی ایمادیدر . استاد یونانی ، فعالیت عضویه یی و حادثات کونیہ یی ، کندی ماهیتری داخلنده ، و کندی قوانین طبیعیہ لر یله تعریف ایدمه بیلیمک معرفتی ، علمک مقصدی بیلیردی که تمایله حق واردر . بناءً علیه کاشانک میخانیکیتی تعریفدن عاجز و قاصر قالوبده : (الله بویله تقدیر و اراده ایتشدر !) . ده یرک ایشک ایچندن قولایقله چیتوب شومظفریتله مفرور اولانلرک بودایلنه (نهئوس آپو میخانی) دیرایدی که (ماکنه خارچنده الله) دیمکدر . اونی صوکره لاینلر ترجمه ایتشلردر . بو تعبیر تشبیهی ده کی نکته ، او طرز ایله ایراد اولونان دلیلک یهوده ولزومسز بر صورتده ماکنه خارچنده قالدیغنی و ماکنه نک ناصل حرکت ایتدیکنی ده تعریفه موفق اوله مادیغنی ایما ایتمه سی در .

(بزى وجوده كڤيرن ذات بارى نك ارادت و حكمت سبحانيه سيله by the will and wisdom of our maker) تنظيم ايدلمشدر ويكديكريله - اونك ايجون - متطابق دوشويور. الى آخره .! [ديور .

بوسوزلرى سوبله ين لوق، لايب نيچ دن باشجه خيلى بويوك بولندوغى ايدى ظن ايدرم كه (آهنگ ازلى) فرضيه سي ، آلمان فيلسوفنه الهام ايدن فكرلردن برى ده بو اولمشدر. هر حالده شو خصوصده شبهه يوقدر كه لوقك بوسوزلرنده (آهنگ ازلى) فرضيه سي ضمناً فقط عيناً ، وجوددر. ينه ظن ايدرم كه بو اعتقاد انگليز فيلسوفى ، تىكرار ده قارته قدر سوروكه يوب براز ارتجاعه مجبور ايتمشدر. بونك بعض علاماتى كورده بيلبورز : معلوماتز ، وبوتون معلوماتز انفسى ايسه حقايق اشيا ايله علممز آره سنده ، يعنى كائنات خارجيه ايله روحز آره سنده برخط اتصال اوله ماز. لو حالده نه ايشيانك ماهيتنى بيله بيليرز، نه ده اللهمك حقيقتى .! مكر كه ذهنمزه (قبلى (apriori) اوله رق برطاسم نمونه لر، (archetype) لر موجود بولونمش اولسون .!.. لوقك بويله شيلره اينانديغى يوقا ريده ذكر ايتشمدم. واقعا بو خصوصده اعتقادي پك او قدر صريح كورونمويور ؛ چونكه (او نمونه لر ذهنمزه موجود دكلدر . تجربه ايله حاصل اولمشدر .) ديدكدن صوكره ، (موجود اولسه بيله غير مشعور اولوق لازم كليز ؛ و ينه تجربه ايله انكشاف ايدم بيلير. بناء عليه غير مشعور اوله رق ذهنده موجود فرض اولونان برشى معدوم اولمقله بردر.) كيى ملاحظه لر بيان ايتمشدى .

بوكون (مبادى قبله (princ. apriori) طرفدارى اولان معاصرين، تدريبيونك اعتراضه قارشى طبقى بويله سوزلرله مدافعه ايدويورلر. مثلاً مشهور (هيومول Whewell) اويله يامشدر .

او كا قارشى تريض ايدن (آلكساندريه ين) دخى :
[قبل التجربة وجودندن اصلاً خبردار اوله ماديعمز و آنجق اوزون بر تجربه واسطه سيله ذهنمزه انكشافنه شاهد بولندوغمز معهود مبادى قبله نك - شو حاله نظراً - حقايق تدريبيه دن نه فرقى قالر ؟ !] ديه هيوموله جواب ويريور؛ وبو تقديرده حقايق تدريبيه نك ثابت اولدوغنى وبو معارضه نك نزاع لفظى دن عبارت قالدوغنى ايما ايدويور. مع مافيه كورويورسكنز كه يكديكرينه معارض دوشن بوفكرلرك ايكي سني ده لوقك - ده بين ذكر ايتديكم - ملاحظه سي شاملدر .

خلاصه دور اخیرك افكار فلسفیه‌سنه (استقطاب polarisation) ویرن ویر
استقامت معینه سوق ایدن بوآدمدر. افکارندن - کیف ماتفق - برقاچ قیرینی
عرض ایتدم ، وانجق بزم بحث مخصوصمه موافق بر ایکی مثال ویرمک ایچون
ایستدیکم پارچه‌لری آلم . یوقسه حریرتور بر رجل سیاسی ، (هم اداره
مستبدی ییقبوبملکتنده سربستی اداره‌ی تأسیس اوغورنده بالفعل اوغراشمش
ومستشار سلطنت اولمش بر رجل سیاسی !) هم حقوقشناس ، هم طیب ، هم
اخلاقون زمانه‌نك اك بویوکلرندن بری اولان بو فیلسوفك بر چوق نظریاتی
واردر که فلسفه تدریبه طرفدارلری یعنی کندی پیرولری هنوز تعدیل
ایده‌مهمشدر. اونلره دائر جزئی بر اشارت بیله ویرمه‌دم. چونکه يك خصوصی
بر بحث تعقیب ایتکده‌یز. یالکیز بوآدمه بر قباحث بولویورم ؛ اوده کندی جمله
عقائیده اوپوشه‌مایه‌جق ، کندی فلسفه‌سنه یاقیشه‌مایه‌جق بعض اسکی ویاخود
یابانچی تعیراتی بی‌محابا قوللانمش و بو دقتسز لغندن طولای ، آز چوق تناقضه
دوشمش اولماسی در. مثلاً ده‌قارتك (table rase) ی‌ایله افلاطونك (archetype)
تعیرلری کی‌کی که بویوکلر معنای تاریخیلری ایله تلقی ایدیه‌جك اولورسه فلسفه
تدریبه‌نك اساساتی تشکیل ایدن مبادی اعتقادیه ایله قطعاً ائتلاف ایده‌مزلر.
اوندن ماعدا - اعتقادات دینه‌سی نه قدر احرارانه اولورسه اولسون - فلسفه
تدریبه ایله خرسیتیانلق نصوصنی تألیف غیرتنه طوتولوب تناقضه دوشمشدر .
شیمدی بوندن اوتوسی آرتق سزه قولای کلیر صانیرم ؛ چونکه بوآنه قدر
ویردیکم معلومات تاریخیه نه قدر قیریق دوکوک اولسه بیله ، عصر حاضر فلسفه‌سنی
اشغال ایدن مسائل اساسیه‌نك نه کی‌کی شیلردن عبارت اولدوغنی آکلامش سکزدرد.
اونلرک ناصل طوغدوغنی ونه شکلله کیردیکنی ده شو ملاحظات تنقیدیه سزه
کوسترمشدر. بناء علیه اسمی بو مبخده یاد ایتمدن کچمک ایسته‌مه‌دیکم بر ایکی
بویوک فیلسوف حقنده ارتق بر رمحیفه‌لك ملاحظات ایله اکتفا ایده‌بیله‌جکم صانیرم.
اونك ایچون بوراده هیوم، بارقله، قانت کی‌کی - اون سکزنجی عصره شرف
ویرن - بویوک استادلرک فکرندن انجق بر نشانه ویرمکه اکتفا ایدوب کچه‌جکم.
اولا شونی سویلیه‌یم که لوفک آجیدینی چیغیرده فوق العاده رواج واعتبار
قازانان (فلسفه تدریبه) نك نفوذیه نظریه معرفت بر شکل مخصوص آلمشدی .
زمانك اك بویوک فیلسوفلری تجربه‌ی (مبدأ اصول principe de la méth.)

اولق اوزره قبول ایدیورلردی . صوفیه اعتقادینه میال کورونن تک توك برایکی کشیدن ماعدا همان مرکس، (عالم حسی le monde sensible) نك وجودینه اینانیور ویاالکزاونی (حادثه وی phénoménal) بر وارلق اوله رق تلقی ایدیوردی که علممزلکه ده ماهیتاً و حیثیتاً انفسی اولدوغنی تسلیم اتمک مجبوریتله برابر کیدر بر اعتقاددر . آرتق بوتون مبحث معرفت مسئله لری ایشته لوقک چیزدیکی بود اثره داخلنده موضوع مناقشه اولویوردی .

مشهور (وولتر Voltaire) بو انکلز حکیمک فکرلربی فرانسه ده نشر و ترویج ایتدیکی کبی رهایین صنفندن اولان فرانسر فیلسوفی (قوندی یاق Condilliac) دخی او فلسفه یی - مملکتنده - تمثیل ایدیوردی . بو دائره ده تصادم ایدن افکار فلسفه دن برچوق جریانلر حاصل اوله رق هریری بر استقامته توجهله یول آچدی؛ وزمانمزده حالا معتبر اولان مذاهب مشهوره اوجریانلردن حاصل اولدی . ذاتاً - یوقاریده سوبله دیکم کبی - ده قارتک (فلسفه میخانیکیه philosophie mécaniste) سنی تعقیب ایدنلر ، حقیقی ماتریالیزمک طلوعندن اول بر فجرکاذب کبی پارلادیلر ، اسمی اولجه کچن (لامه تری Lamettrie) برنوع (مادیه میخانیکیه matérialisme mécaniste) سیدتمی قورمشدی . اصلاً المان اولدوغنی حالده فرانسه یی وطن اتخاذا ایدوب فرانسر لاشان (بارون دولباخ Baron d'Holbach) ، (منظومه طبیعت système de la Nature) نامیله یازدیغنی ائزده صراحتاً (ملحد athée) اولدوغنی کمال جسارتله اظهار ایتمکدن چکیمه دیکی کبی ، احداث ایتدیکی (مادیه طبیعه matérialisme naturaliste) مذهبنک فکر الوهیت و تعلیمات دینه ایله قطعاً قابل تألیف اولمادیغنی ده کوستردی . عینی زمانده فرانسه ده بک مشهور اولان (دیدرو Diderot) دخی صراحتاً ماتریالیست ایدی . اون طوقوزنجی عصرده افکاره زیاده سیله تحکیم ایدن ماتریالیستلر، مثلاً المانیاده (یاقوب موله شوت Jacob Moleschott) لر ، (کارل فوخت Karl Vogt) لر (لودویق بوخنر Ludovic Büchner) لر ؛ فرانسه ده (دوکتور شارل لوتورنو Letourneau) لر ، (آندره لوفه ور André Lefèvre) لر واونلرله همفکر اولان حزب علما و محررین ، هب (دولباخ) و امثالک اولاد معنویه سی صاییه بیلیر . تاریخ کوسترییورکه اون سکزنجی عصرده حسیه زمینی اوزرینه ماتریالیزم کرکی کبی کوك صالمش بولونویوردی . حتی بعضی مورخلر (فرانسه انقلاب

عظیمی (la grande Rev. Fr.) فی بیلله ماتریالیزم جریانتک اثری عدایدیورلرکه یا کلسددر. او جریانتک بعضی وجوه ایله بوتبدلات عظیمه ده دخلی منکر اولماقله برابر، بوخصوصده (ژان ژاق روسو J. J. Rousseau) نك شخصیت معنویسی عوامل فکریه نك اك مهمی ومؤثری اولمشدی. بو محقق در. حالبوکه (روسو) ، هیچ ماتریالیست دکل ، بالهکس (théiste یعنی اللهه بیلدیکی کیبی اینانیر) (سانتیپانتالیست sentimentaliste) بر فیلسوفدی. ایدم آلیستلر، سپریتوآلیستلر دخی واردی . فقط حسیه فلسفهسی میدان آلمش اولدوغی ایچون ماتریالیزم ، انکشافنه مساعد اولان اوزمین اوزرنده سریع فتوحاته موفق اولیوردی .

فوق العاده برطور کستاخانه ایله وبویوک برجسارنله دخی انکار وعقائد مؤسسینی ابطال ایدن بوفلسفه نك سرعت انتشارندن طولانی - فیلسوفلرایچنده - اك زیاده اندیشهیه دوشن ایرلندا یسقوطوسی (بارقله Berkeley) ایدی. کندیس یك خالص بر مؤمن اولدوغی کیبی دنیا به مثلی نادر کلیر بر استمداد فلسفی ایله طوغمشدی. نك باشنه ماتریالیزمی ابطال ایتمک وهرشیئی بیقان بوجریانی طور دورمق عزمنه دوشدی . یازدیغی اثرلره نظراً (لایبنیچ Leibnitz) کیبی برنجی درجه ده مابعد لطیعیوندن اولدوغنه حکم ایدیلیور، وطوغرودر. ذاتاً ایکینسك افکاری آره سنده صمیمی برقرابت واردر. فقط مستقلاً دوشونه رك بوتنیجه لره وارمش اولدق لرنده شبهه قالمامشدر . بارقله، حسیه مذهبی اولاقبول ایدیور. فقط اوندن ماتریالیزم علینه بر نتیجه چیقاریيور. لوقك تعلیماتی اساس اتخاذایتدیکنده هیچ شبهه یوقدر. (علم بشرک مبادیسی principles of human Knowledge) نامیله مشهور اولان اثرینه شو سوزلرله باشلامش اولماسی ادعای اثبات ایدر !

[علم بشرک تعاق ایتدیکی شیرلی دقتله معاینه ایدن هرکس نظر ننده بدیهی درکه اونلر یا درحال حواسه منطیج بر طاقم (فکترلر ideas) در ، یاخود (روح Mind) ك عملیات و (احتراصات passions) ی نمره سی اولان دیگر بر نوع فکترلدر . ویاخود ، نهایت ، (حافظه Memory) و (تخیله imagination) یاردیمیه حاصل اولمش فکترلدر .]* فقط (علمك موضوعاتی object

[*] لوقك دیدکاری ایله بوسوزلری قیاس ایدیکز . بوتون اذکار بمزك محصول تجربه اولدوغی ادعا ایدن بو فیلسوف برنجی طاقدن اولان اذکاری (تجربه خارجه) ایله ، ایکنجیلرینده (تجربه باطنیه) یعنی عملیات ذهنیه ایله تحصیل ایتدیکنزه لامع بولونویور و آبریمده بر (روح مدرک) قبول ایدیوردی .

(of Knowledge) نی تشکیل ایدن بوتون بونه‌ایتنسز تنوعات افکار ایله برابر ، بر شی داهارک اونلری بیلور وادراک ایدیور ؛ اونلری تخیل و تحطار ایتمک ، ارادت ایتمک کبی (عمليات opérations) بایور . بو (مدرك و فعال و اراق perceiving, active being) . بن ، (ذهن ، نفس ، روح ، وبنلکم mind, spirit, soul, Myself) دیورم . ه (دوشونجهلر thoughts) مز ، نه حسابمز ، نده مخیله ایله تشکیل ابتدیکمز فکرلر ، ذهن اولمادقجه موجود اولهیلیر . بونی هرکس تسلیم ایدر . [*] اوله کورونورکه حواسمز اوزرینه (منطبع imprinted) اولان احساسات ، یاخود افکارک دخی بر (ذهن مدرك perceiving mind) اولقمسزین موجود اوله‌مایه‌جنی عینی درجه‌ده بدیی‌در . بو افکار و احساسات ، هر نه قدر یکدیگریله مربوط ومؤلف اولسه‌لر بیله ...! [

(بارقله) مبحث معرفت مسئله‌سنده لوقدن فرقلی اولمایان شوشو ملاحظاتی بر موضوعه اساسیه اوله‌رق ایلری سوردکدن صوکره بوتون معطایات حسیه‌یه وذهنک فعالیت ذانیه‌سندن متولد اولان فکرلری تحلیل ایده‌رک کیفیات وحالات روحیه‌یه ارجاع ایدیور ؛ و - اولجه ایضاح ایتمش اولدوغم وجهله - [*] اونلرک ضمنتده اله آووجه صیغار بر شی بوله‌میور . (جوهریت ماده) بی - سبیت علاقه‌سندن طولایی ابداع ایتمش اولدوغمز - بر (فکرت مجرد) کبی تلقی ایدیور .

بوصورتله یوروتولن بر محاکمه ، ماده‌یی هیچه جیقاردینی ایچون کائنات محسوسه‌یی‌ده انکاره وادیر ، دیه بارقله بر جوق طرفلردن اعتراضات شدیدیه معروض قالیور . (دوقورجونسن Dr. Johnson) باستونخی یره ووره‌رق بارقله‌یه خطاباً [بو طاشی ناصل انکار ایده‌بیلورسکمز ؟ !] دیور ؛ بر دیگری : [مادامکه عالم شهود بر خیال ایتمش ، باشکی شوطاش دیواره ووروده بر تجربه ایتسه‌که نه ! . باقایم ! .] ده‌یه‌رک میدان اوقویور . حتی شاعر شهر (لورد بایرن Lord Byron) بیله شعرلرینک برنده بو نظریه معرفتی استخفاف ایتمک

[*] بالعمکس ده‌قارت اوله اعتقاد ایدیوردی‌که انسان نفس‌الامرده اولمایان بر شی* تعقل ایده‌بیلیر . فقط تخیل ایده‌مز . حتی عالم خارجی‌نک استقلال وجودینی بو دعوایه بناء اثبات ایدردی . بو باده ده‌قارت بحثه بالیکز !
[**] کتابم‌رک حادثات بحثنده ایدی .

ایچون برظریف جناس یایور. [*] الحاصل بو آدجفزك شو غریب ادعای هم
آلپون، همد ماتریالیستلری و هرکی ایاغه قالدیروب اعتراضاتی دعوت ایدیور.
برقمه متفکرین دخی کندیسنی (ریی، حسبانی sceptique) عد ایدرهك نصوص
دینه صدق اعتقادی بیله شبهه دوشورویور. فقط بونلرك جمله سنه قارشى
(پیسقوبوس بارقله) کال نزا کتله و متائله جواب ویریور.

ذکای خارق العاده سی و نزاهت ادبیانه سیله هرکی مقتون ایدن بو آدمک
معارضلری او عصرده معرفت مسئله سنك نه شکله کیروب نه وضعیت آندیفندن
غافل بولونقلرینی کوسترمش اولیلر. لوقک تأثیرله حسیه فلسفه سنك غلبه سی
- منطقی بر ضرورته تبعاً - شونتایچی تسلیم ایچون ذهنلره آرزوق قناعت بخش
ایتمشدی :

[معلوما تمز حواس واسطه سیله عالم خارجیدن کلیر؛ فقط اونلر - لدی التحلیل -
کیفیات اجسامه منجر اولور. حالبوکه کیفیات خارجه دکل، بزده برطاقم حالات
روحیه در. اویله اولونجه علممز هم انفسی همد اضافی در. کوروب بیلدیکمزعالم،
حادثات عالمدر. حقیقت عالمی دکل !!]

ایشته لوقک - خلاصه الخلاصه - تعلیمات فلسفیه سی شو بر قاج قضیه یه منجر
اولمشدی که بسیط کورونمکله برابر، (آغوستی سیزم)، (فهنومه نیزم)،
(relativisme اضافیه) حتی طرز تفسیره کوره، (ماتریالیزم) و (پوزیتیویزم)
مذهبلرینک اساس اعتقادی متضمن اولدوغی کبی قانتک (ترانس ساندانتالیزم)
فلسفه سیله بارقله نك (افتکاریه انفسیه idéalisme subjectiviste) مذهبنی ده تولید
ایده بیله جک بر ماهیتی حائز بولونویورایدی. ذاتالوق بیله ماده یه هرکس کبی اینانه میور
ایدی. ماده یحیی کچدکجه : (the unknown something) دیوردی که (مجهول
اولان او بیلیم نه ؟ ! le je ne sais quoi inconnu) معناسنه کلیر. اوندن ماعدا
لوق بالذات بر اللهه، برده روح مستقل وجودینه صدق و خلوص ایله اینانیوردی.

[*] شاعرك بارقله حقنده کی بیقی حقیقتاً ظریف بر نکته یی متضمندر. او نکته ده
بر جناس اوزرینه مستندر : انگلیزجه ده (no matter) ماده یوق، دیکدر، فقط عینی
زمانده (حکمی یوق) و (ضرری یوق) معناسنه دخی دائماتوالانیلیر. (بایرن) اوبیت معروفنده
[پیسقوبوس بارقله ماده یوق دیدی] دیور، اوندن سوکره [no matter what the said]
سوزلریله ایکنجی مصرای تشکیل ایدیورکه بونك معناسی : (سویله دیک سوزك حکمی
یوق، ضرری یوق) دیکدر.

پیسقوبوس بارقله بالخاصه بو فیلسوفك شاكرد ، معرفتی ایدی . و بناءً علیه شو
اعتقادجه آره لرنده ذره قدر فرق یوقدی . یالکز بارقله ، بو ادعایی کمال جساترله
نتیجه قصواسنه قدر سوروكله دی کوتوردی . (مجهول اولان اویلمم نه) بی
- بونظریه معرفت ایچون - لزومسز کوروب قالدیردی ، آندی . شو تقدیرجه
لوقك مسلكینی کندی وادی طبعییسنده نهایتنه قدر تعقیب ایتمش اولدی . لکن
بو اعتقاد ، عالم شهودی انکار ایچون ذهنی مجبور ایتمز . هله وارلغه قارشی وجدانی قطعاً
شبهیه دوشوره مز . بر انسان ماده نك حقیقتی انکار ایده یلیر ؛ فقط روحك
استقلال وجودی اقرار ایدرسه (ریپی sceptique) صایله ماز .

ایشته بارقله بویله بر متفکر ایدی . نته کیم لایب نیچك ده بو مزاجده بر
فیلسوف اولدوغنی اولجه کورمشك .

اونك ایچون : [سن عالم خارجی بی انکار ایتمکله بداهتی انکار ایدیورسك ! .]
ده یئرله قارشی ، بارقله ، [یا ککش آکلیورسکز ! ..] بن شو عالم شهودی قطعاً
انکار ایتدم . حتی حسیه مذهبی بدایتاً تصویب و قبول ایتشمدر . بناءً علیه قطعاً
ایمان ایدیورم که شو کوردوكم (حادثات - عالمی) موجوددر . نته کیم بن دخی
موجودیمه عینی درجه قناعتله اینانیورم . فقط باشقه بر شی یوقدر . شو حادثاتك
ضمننده بر جوهریت مادیه یوقدر !] دییوردی .

[سن وارلغه قارشی شبهه ایدیورسك ! .] دیه تعریض ایدئرله قارشی دخی
بوسوزلری سویله دکدن ماعدا شونی ده علاوه ایدیور ، و : [بن مادیتی انکار
ایدیورم ؛ موجودیتی دکل ! . الله ایله برابر انحق ارواح وارددر ! . بنم اعتقادجه
باشقه برشی یوقدر ! ..] دییوردی . اصل کندی سوزلرندن اولق اوزره نقل
ایتدیکم شو ایکی جمله پك صریحدر :

[کوروب حس ایتدیکم ایتامقده قناعتم سزك کندن آز دکلدر . فقط بنم
انکار ایتدیکم شی ، کوروب حس ایتدیکمدن باشقه برشینك احتمال موجودیتی در .
(مجهول اولان اویلمم نه) انحق بر فکر مجرددر که حقیقتی یوقدر ، اصلی یوقدر .]
دیمك او عصرده انفسیت و اضافیت علم دعوالرنده اختلاف قالمش ، و آنحق
علممرك باعنی اولان حقیقتی تعیین ایتمکده تباین و تعارض افکار قالمشدی . یعنی
احساساتمرك سببی تعیین ایتمکده هرکس باشقه باشقه دوشونویوردی . کیمیسی
اونی خارجه بر ماده اوله رق قبول ایدیور . کیمیسی اللهدر ؛ دیور ؛ کیمیسی ده

ارواح در دیه ادعا ایدیوردی . بارقله نك ادعای و طرز محاکمه سی ، لایب نیچ ایله مالبرانش آره سنده برشیدر . هر ایکسیله قرابت صمیمیه سی ظاهر در .

[تجربه ایله تلقی ایده بیلدیکمز مدرکاتی دریش ملاحظه ایدرسه نك بوتون بیلدیکمز کندی احساساتمزدن و بناء علیه انحق حالات روحیه مزدن خبردار اوله بیلدیکمزی واونك خارجنده هیچ برشئك وجودینه مطلع اوله مدیفمزی اثبات ایدر . مادی برکتله یه تماس ایتدیکم زمان حس ایتدیکم شی اونك جوهریت مادییه سی دکل ، بکا ذوق و الم احساس ایده بیلکم قابلیته مالک برطاقم فکرلردر . اوفکرلری بن حالا حس ایدیورسه م اونلر واردر . و انحق بنده واردر . ایتورسه م ، یوقدر . ذهنده خاطره سی ، اونك حقیقته و ارلغی و یاخود وار اولماسی لزومی اثبات ایتمز . مثلاً اوزرنده یازی یازدیغ شوماصه موجوددر ، دیورم ؛ چونکه اونی کوروب حس ایدیورم . اوطه دن طیشاری چیققدن صوکرده حالا موجوددر دیدیکم زمان شونی مراد ایدیورم که بن ، اگر اوطه مده اولسه یدم ، ینه ماصه نامه عینی احساساتی طویه جق ایدم ؛ و یاخود طبق بنم کبی (دیگر بر روح another spirit) اوماصه یی ادراک ایدیور . ایشه بن ، غایبده ماصه نك موجودیتنه حکم ایدرسه م انحق بو احتمالی مراد ایدیورم ، یعنی عینی احساساتی بکا القا ایده بیله جك شرائطك تکرری احتمالی قصد ایدیورم . یوقسه حقیقته طویدوغم شیلر ، صدا ، ضیا ، رایحه ، ملاست ، خشونت ، برودت ، یبوست کبی احساساتدر . فقط بونلر بنم کندی حالات روحیه مدر . ماده دکلدر . بنم بو طویغولرمله قطعاً مناسبی اولمایه رق بر شئك و ارلغی تصور ایتك قطعاً نا معقول و بناء علیه غیر منطقی و باطل برظن در . اوحالده (واراوملق ادراک ایتك و ادراک اولونه بیلیمکدر . esse est percipi) . بن بروح مدرک اوله رق و ارارم . مدرک اولان و ارلقلر دخی بنم کندی افکار و حسیات و احساساتمدر . بن بونلری - بالتداعی par association - ترتیب ایده رک [*] بر کائنات پانوراماسی وجوده کتیریورم و سیر ایدیورم . سیر [*] جون ستوئته میلک اعتقادی ده عیناً بودر . ذاتاً کندیبی بونی ادعا و اعتراف ایدیور . (تداعی) تدبیری لولك ایجاد ایتدیکی بر کله اصطلاحیه در . واقعا لوق ، بو کیفیتك تصور و استحضارده و بناء علیه کیفیت علمده نه بویوک بر رول وینسادیفنی بارقله و هیوم قدر آکلاویه مامشدی . صوکره بو برهمه مسلك اولدی . بوکا میلک باباسی و صوکره کندیبی هرکدن زیاده اهمیت ویردی . قاموسده (association) کله سته بالیکز .

ایتدیکم منظره طوغرودر ؛ واردر ؛ لکن اونک بر جوهریت مادیه واستنادی و بناءً علیه مستقلاً موجودیتی یا کلتش برظن در . [

بارقله ، شو ملاحظاتندن بر طاقم نتیجه لر چیقاروب فلسفه سینه بر شکل تام و معین و یریورکه بوراده اونلری یالکیز برر دستور کیی ذکر ایده جکم ؛ تنقیده کیریشمیه جکم :

[یالکیز روحانی موجودیتلر واردر . فکرلری الله یاراتیر ، الله روح بطلق در . فکرلری ادراک ایدن ارواح مستقله یعنی انسانلر ، البته فکر نوغندن برشی اوله مازلر . علم بشر اوفکرلردن عبارتدر . فکرلرک ترتیبی و آدرلرنده کی مناسباتک تعینی انجیق تجربه ایله اوله بیلیر . تجربه بزه بر نوع نفوذ نظر و یریورکه اعمالزده منافع حیانیه مزه توفیق حرکت ایتک اوسایده ممکن اوله بیلیر .] الی آخره ...

تجربه یه حیاته بویه بر قیمت و بر مسهیدی و حسیه اعتقادی ملاحظات فلسفیه سی ایچون (مبدأ حرکت point de départ) اتخاذ ایتسهیدی ، بزم صوفیه یه الک زیاده بکزمین متفکر بارقله در ... دیه ادعا ایده بیلیردم . فقط غریب و فطین بر دهایه مالک اولان بو آدم ، یک متناقض کورون بر جوق اعتقادی تألیف یولی بولش و ماتریالیزمه قارشى شدت و نفرت و غیرتی حسیله خرنستیان اعتقادی قورتارمق ایچون چاره ساز اولمشدر . حتی طبق ماتریالیستلر کی : [کوردو کم و حس ایتدیکم شیلرک وجودینه اینانه بیلیرم ؛ باشقه شیئه اینانام !] دستوریله دعوایه باشلامای و صوکره [بن انجیق شو آنده حس ایتمکده بولوندوغم شیلره اینانه بیلیرم . شو آنده حس ایدوب کورمکده بولوندوغم شیلردخی یالکیز کندی حالات روحیه مدره ؛ ماده دکلدر !] دیمه سی ، صوک درجه فطینانه بر ملاحظه در ؛ کرچه رد اولونه ماز برادعا دکلهده ...

او زمانلر برده (دهی وید هیوم David Hume) واردری . بو ، سفوچالی فیلسوف یالکیز زماننک دکل ، دنیائک الک بویوک مقیدیندن صایلیور . او قدر نفوذ نظره مالکدر . هم تنقیدی (مخرب destructeur) در . اونک ایچون هرکی اورکوتمش وعصرك افکارینه بلکه هر کسدن زیاده اجرای تأثیر ایتشدی . مسئله معرفتک نه شکله کیردیکفی کوردو کز . تکرار ایضاح ایتیمیم ...

بزم مطلع اوله بیلدیکمز انجیق عالم حادثاتدر ؛ اونک ضمنتده (مجهول بریلمنه ؟) تصور ایتمکدن قورتوله میورساق ، احساسات و افکار مزه بر سبب موجب دوشونمکدن

فراغت ایدمه‌دیکمز دندر . ده‌نیلیوردی . اوسپی ده - یوقاریده عرض ایتدیکمز کیبی - هر فیلسوف کندی مذهبه ملایم و اعتقاداته موافق بر صورتده تفسیر و تعمیر ایدیوردی . فقط کیمسه (علاقه علیت rapport de causalité) دیدیکمز اعتقادک قیمت و ماهیتی تدقیق ، والله ، و یاخود کائنات مادییه اینامغلغمزده ، (یعنی مستقل پروازلنه قناعتمزده) اوبنادینی رولی و بوفکرک منشائی تحقیق ایتیکی خاطرینه کتیزمه‌مشدی . هیوم ، اک اول اومسئله‌ینی تحقیق ایتکم لزومنی دوشوندی . بارقله‌نک ماتریالیزم علینه ترتیب ایتدیکمی دلایل ایله آجدینی تنقید یولی ، کندیسنه کوزل بر وسیله احضار ایتیش اولدی . بناءً علیه اک اول بارقله‌نک ملاحظاته صاناشدی . اونی اسا - آ پک طوغرو فقط ناقص بولدی .

ذاتاً مهم برسلسله آثار ایله چوقدن تمایز ایتیش و فلسفه‌سنی تعیین ایله‌مشدی . بومسلکی سزهاوچ بش صحیفه‌لق سوز ایچنده کوسترهم ، چوق مهمدر . یالکمز نه اولدوغنی بر اسم تعیین ایدره‌ک سوبیلیه‌یم : کندیسنی (ریپي sceptique) طانیشاردی . بارقله‌ایله هیومک سیستمی جمع ایدره‌ک بر فلسفه وجوده کتیردیکمی اعتراف ایدن (جون ستونوت میل J. S. Mill) ک اداسنه کوره ، هیوم تام مناسیله ریپي دکلدی ، (تدریپی) ایدی ؛ فقط مفرط بر درجه‌ده تدریپی ایدی . اونک ایچون فلسفه‌سنه (empirisme radical) ده‌ینلر اولمشدر و بوتعیر ، هیومک ماهیت اعتقادی‌سنه موافق دوشمه‌مش دکلدر .

علممزمک محصول تجربه اولدوغنه ؛ معطایات حواسک صرف انفسی بر طاقم حالاتدن عبارت بولوندوغنه ؛ بونلرک تداعی سایه‌سنده ترکیب و (تجرید abstraction) صورتیله انحلاله و الحاصل (تجربه‌نک پسیقولوزی سی la psychologie de l'expérience) نه‌دارلرولقک بیان ایتدیکمی ملاحظات اساسیه‌یه تماماً مشارک بولونیوردی . اشیانک وضعیت و تناظرندن آلدیغمز حسیاتی - بالتجرید - مکان فکری حاصل ایتدیکمز ؛ و (تعاقب حادثات succession des phénomènes) دن‌ده‌ینه بالتجرید زمان فکرینی استخراج ایتدیکمز قائل ایدی . الحاصل تجربیه‌ینی منبع وقسطاس علم طانیقمده بلکه هیچ کیمسه بو فیلسوف قدر ایلری کیده‌مه‌مشدی . بوندن طولانی منحصراً حادثات عالمی قبول ایدیوردی ، فقط بزم کندی طویغولرمزک جلوه . سندن عبارت اولان بو حادثاتی (مقدمات قیاس prémisses) اتخاذ ایدوبده بر وجود مطلق اثبات ایدمه‌ییامک ایچون هیچ بر طریق منطق کوره‌میور و بناءً علیه وجود

مطلق حقانده معاصرین فلاسفه نك استدلالاتی طاقيله (سفسطیات sophismes) نوعندن عدايده رك غير مشروع و مردود بولوبوردی. اونك اعتقادنجه انجق (بلا واسطه و شو آنده تجربه ایدوب طویدوغمز شیرلك وجودنی قبول ایدم بیلیرز.) ماباقیسی اساسسز برظن در. (احتمالی و مشکوك problematique) شیرلدرکه ضعیف فرضیاته زمین استناد اوله بیلیر. (علوم Sciences) ایچون منحصرأ حادثات عالمی بتر؛ اصول تحقیق اولمق اوزره دخی یالکزنجره کافیدر. ذاتاً اوندن ماعداسنك اصلسز و حکمسز اولدوغی اونه دنبری تحقیق و تأید ایتشد. اوحالده ماده و روح بر اساسسز فرضیه در. حادثات عالمنده اجرا ایدم بیلدیكمز تجربه لرك بزى بویکی فرضیاته ایصال ایدم بیللمسی ایچون، هیچ بر معقول و مشروع یول یوقدر. واقعا بر علاقه سببیت وار؛ فقط اوده بر حقیقت دكل، بر (اعتیاد ذهنی habitude mentale) درکه (لاینفك بر تداعی une association inséparable) دن ایلری کلیور؛ خصوصاً سبب دیدیكمز شی، خارجه موجود دكل - انجق بزده بر (فکر و اعتقاد) اولمق اعتباریله - بالذات (انفسی subjectif) بر ماهیتی حازر بر فکدر. یوقسه عالمنده سبب نامه برشی یوقدر. (بلافاصله تعاقب immediate succession) و اردر. [*]

[بناءً علیه بزم طویغولرمزى وجود مطلق اعتقادینه مربوط طوتان (سببیت علاقه سی) بر (تخیل باموق ایبلکی) در. اونی قوباردیگنکزیکی بوتون بوتون منای مابعدالطبیعیات ایله برابر موضوعاتی و حقایق موهومه سی ده بیقیلیر کیدر. [دیوردی. اوسبیلهدرکه ماده نك موهوم برشیدن، بر ظن باطلدن عبارت اولدوغی اثبات ایدوب کوسترمك ایچون (بارقله) نك ترتیب ایتمش اولدوغی برهانی و طرز استدلالی - بکندیکی حالده - ناقص و یک جهت بولمشدی. (یقینیت علم certainty of knowledge) آنجق (بلا واسطه تجربه immediate experience) ده در. اوده بزه آنجق طاقم طاقم حادثات عرض ایدم بیلیرکه اونلرك هپسی ده بزم کندی (احساسات sensations) و (ادراکات perceptions) مزدرد بارقله، ماده بی هیچه چیقارییور؛ فقط روحی ناصل و زده دن بولوب چیقارییور؟. [مادامکه ذهنده ادراکندن باشقه هیچ برشی (حاضر present) دکدر؛ و مادامکه بوتون فکرلر مقدماً ذهنده حاضر بولونان احساساتدن (مشتقدرد

[*] بو خصوصاتده تفصیلات آلمق ایچون قاموس فلسفه ده اونه برانه بانیکنز،

(derived) لر؛ بوندن شو نتیجه چيقارکه انطباعاتمز و افکارمزدن - خصوصی بر صورتله - ممتاز بر شی حقننده بر فکر حاصل ایده بيلمک ممتنع در. [ماده بر ظن باطلک تولید ايتديکی موهوم بر شی ايسه ، روح نهدن اويله اولماسين؟! بز روح نامنه طوغرودن طوغرويه بر جوهرک وجودینی ادراك ایده بيلورمی بز؟.. قطعاً... وجدانزده درحال ادراك ايتديکمز ، آنجق حادثات مغنویه درکه اولنرک جمله بی ده حسیات ، افکار وازادات کی صنفله تفریق ایديله بیلیر. بز بو حادثاته بر سبب دوشونمک مجبوریتی ايله روحی بر (جوهر substratum) اوله رق قبول ایدیورز. حالوکه بو استدلال غیر مشروعدر. اگر بارقله نك ماده علیه توجیه ايتديکی تنقیدات و اعتراضات حقی ایشه - نته کیم اویلدر! - عینی طرز استدلال ، روح علیه ده دخی قیمتلی و مشروع بر دلیل منطقی در، و اویل اولمق لازمکیر!] دیمشدی. بوايکی جوهر هیچه چيقاریلنجه دخی یالکز حادثات عالمی قابلر. ایشه (phénomenisme absolu حادیه مطلقه) عقیده سی بودر. بو اعتقاد آغوستی سیزمی دخی متضمن در. فقط بو (آغوستی سیزم) آنجق (انکاری négatif) اوله بیلیر. نته کیم یالکز عالم حادثاته استناد ایدوب مابعدالطبیعیاتی کلیاً حکمدن اسقاط ايتديکی ایچون ده بو اعتقاد (پوزیتی ویزم positivisme) مذهبک مهده نشاتی اولمشدر ده نیله بیلیر.

شیمدی شو نتیجه پیوسته اولوبده هم ماتریالیستلرک اک صاغلام نقطه استنادینی همده الهونک و روحیونک و مابعدالطبیعیونک اک مقدس اعتقاداتی موهومات و ظنون باطله دن اولق درکه لرینه ایندیرن بومنقدک تاثیرینی دوشونوکز... اک دیندار آدملرک سلاحی قوللانهرق بونتیجه پی و اردیغنی ده اونو تماییزکیر! ایشه بو طرز بو تنقید ، هر فیلسوفی مدهش بر حیرته القا ایتش و ده رین ده رین دوشوندورمکه باشلامشدی. قانت وره یدکی یك بویوک متفکرلر هر کسدن زیاده متأثر اولدیلر. هم مابعدالطبیعیاتک حیثیتی اعاده ، همده ماده ايله روحک وجودینی انبات ایچون بر چاره تخریسنه فوق العاده صرف ذهن ایتدیلر. بوسایه ده ایکی بویوک مذهب فلسفی ده اظهوره کلدی.

مشهور قانت دخی ، هیومک - هر سیستمی تخریب ایدن - فلسفه سنه تنقیدیه سندن متأثر اوله رق غیرته کلشدی. بر طاقم اصلسز دستورلرله قناعت ایدن (یقینه dogmatisme) اعتقادی تنقید ایتک ایچون عقانی باشنه آلمق ویکی

باشدن تحقیقاته کیریشمک لزومنی قطعاً حس ایتشدی. قانت بونی بالذات اعتراف ایتمکدن چکنیمور. [بنی یقینون او یقوسندن او یاندیران و فلسفه نظریه ساحه سنده یکی وادی تحقیقاته سوق ایدن هیوم اولدی !] دییور .

فی الحقیقه هیومک تنقیدات مخربانه سیله مابعدالطبیعیاتک لزومسنلنی ، هیچلمکی ثابت اولسه سیله اونه دنبری ذهن متفکرنی اشغال ایدن وحیرتده براقان بویوک مسئله لر برر معما کییینه عقلک حضورنده پابرجای استطاق اوله رق طور و یور و عظیم صیقیتی و بریوردی. حتی معهود مسئله لر - بونجه ترقیات فکریه به رغماً - حیثیتاً ذره قدر تبدل ایتمه مشدی. ینه اک مهم معما ، نفس انسانیه ایله عالم خارجینک مناسبتی ، و بو مناسبتدن حاصل اولان (علم *connaissance*) کیفیتده شو ایکی عاملک خدمتنی ، درجه دخل و فعالیتنی تعیین ایده بیلمک مسئله سی ایدی. دیمک که (نه بیسته مولوزی) نک اک مهم موضوعات اساسیه سنی تشکیل ایدن بحثلر ایدی. کرک عالم خارجی نک کرکه نفس انسانیه نک وجودی ، ادراک و شعورک تحقیقه وابسته اولدوغی کیی بونک تحقیقی او ایکی عاملک ، (یعنی روح بشر ایله عالم خارجی نک ۱) نک تقابلنه و تماسده بولونمائه محتاج قالدیغندن ، بونون (مبحث وجود *ontologie*) مسائل (سببیت علاقه سی ایله واقع اولان تدقیقات و تفحصات فلسفه مسئله سنک صورت حلنه تابع بولونویوردی: تدقیقات واقعه عالم خارجی نک حقیقته طوغرودن طوغروه کسب اطاع ایتمک امکاتی انکاره وارمش اولدوغندن ، نهایت سوژه قتیوزم اعتقادنده قراره مجبوریته حاصل اولمش وزمانک بویوک متفکرلری ، حقیقت اشیا به وقوف بحثنده اعتراف عجز ایتمکدن هیچ چکینه مشدی؛ فقط بزده حاصل اولان حادثات وجدانیه به - بهمه حال - بر (علت موجه *c. effe.*) آرامق ضرورتی علی الاطلاق مسلم بر برنسبب صاییلدینی ایچون ، سوژه قتیوزم فلسفه سی وارلنی هیچ انکار ایتش اولویوردی ، یالکز جهلنی اعتراف ایتمکه قالییوردی. یوقسه سببیت مبدانه استناد ایده رک ادعا ایده بیلیوردی که مطلقا بر شی اولقی لازمکلیر ، و او شی ، هر نه ایسه ، بزده کی تأثرات و انفعالاتک و بنسائه علیه علمک سببی در . بو صورتله تأسس ایدن آغوستی سیزم (انکاری *negatif*) دکلدی ، چونکه وارلنی اقرار ایدیور ، یالکز اونک حقیقتنی بیله مەدیکنی اعتراف ایتمکه قالییوردی .

دیمك كه بوتون (مبحث معرفت) مسئله لری بر مهم عقده نك حل اولونماسنه وابسته قالمش كورونویوردی : انسانله عالم خارجي نك مناسبتندن حاصل اولان (علم) ده ذهن بشر قطعاً و صحیحاً عاقل می در ؟ . دكلی در ؟ . دكلسه ، درجه دخلی و صورت فعالیتی نه در ؟ . بو اسکی سؤالی ، یكی دن نظر دفته آلق و بوكا آدم عقلی بر جواب ویرمك لازمكلی .

كذلك بوتون (مبحث وجود) مسئله لری ده ینه يك مهم برعقده نك صورت حلقه تابع كورونویوردی كه اوده (مبدأ علیت *princi. de causalité*) در . زیرا ، طوغرودن طوغرویه تلقی ایدهمدیکمز بر عالم خارجي نك موجودیتی ، آنجق بزده حاصل اولان حادثات وجدانییه بر سبب دوشونمك مجبوری ايله تسلیم ایدیوردق !! .

كرك بارقله يك ، كركسه هیوم ولوقك بو سیبیت مبدأنه نه معنا ونه حیثیت ویردكلینی كوردك . و فلسفه نك اساسلی سؤالترینه ویریلن جوابلر اومعنایه واور حیثیه كوره ناصل ده كیشیور ونه قدر باشقه لاشیور ! . اونیده كوردك . لوق عالم خارجي نك موجودیتنه و (مادی الطیمه *de nature matérielle*) اولدوغنه قناعت كیتیمشدی . بارقله مادی کلیاً انكار ایتمش ، ارواحدن باشقه موجودات یوقدر دیمشیدی . بوتون معلوما تمزك انفسی اولدوغنی اساس اتخاذایدن هیوم سیبیت مبدأنك دخی معلومات انفسیه مزدن محدود و اعتیاددن متولد بر (اعتقاد *croissance*) اولدوغنه اینانمقله ، نفس ايله عالم خارجي آره سنده وجودی ادعا اولونان رابطه نك خارجه اصلی اولمادیغنی - بالجبوریه - تسلیم ایتمش ، سیبیت رابطه سی قویونجه دخی او فیلسوفك نظرنده عالم هیچه منجر اولوب كیتیمشدی . وضعیتی يك ای آ کلیورسكز !! . ده قارتك یكیدن اورطیه قویوب بر اقدینی مسئله غامضه (یعنی نفس ايله عالم خارجي نك مناسبتی ! .) نه شكلره كیرمش وقاچ تورلو حل اولونه بیلیمش ؟ . كورویورسكز !! .

ایشته (قانت) بو جوابلرك هیچ بریسنی بكنمه مشدی . بو مسئله نی برده كندیسی ، كندی نقطه نظرندن حل ایتك ایستیوردی ؛ حتی هیومك تنقیداتندن زیاده سیله ثوركش اولدوغنی ایچون مابعد الطبیعیاتی ، اخلاقیاتی وهر شیئی نیلیزم یعنی (لیه *nihilisme*) كردابنه دوشمكدن قورتارمق غیرتیله او مسئله نی حل ایتمكه مجبور بولوندوغنی - كركی کیی - حس ابتدی .

ارسطو، افلاطون، ده قارت کیی مستننا بردهای فلسفی به مالک اولان بو آدم، نرمدن ایشه کیریشمک و مسئله بی ناصل قاورامق لازم کله جگنی - بالطبع - بک ایی دوشوندی و بک کوزل آکلادی. کوردی که (مبحث وجود) مسئله سنده (لیسیه) اعتقادینه دوشمه مک ایچون (مبادی علمیه من. principes de nos con.) کله ماهیتی - اول بول - تعیین ایتک لازم کله جکدر. (مبحث معرفت) مسئله سنده دخی نفسمزه نه درجه لرده دیمدخل بولوندوغنی کوسترمک اقتضا ایده جکدر. بناء علیه - کندی تعیر معنادار نهجه ۱ - (یقینه dogmatisme) اویقوسندن اویانه رق هرشیدن اول (عقل صرف Raison pure) کله ماهیت و قابیلیاتی تدقیقه قویولدی. بو طرز تشبث تنقید یونک کیدیشی در ؛ و بیلورسکیز که لوق دخی بورادن باشلامش و بویه حرکت ایتمشدی. دیمک که بو خصوصده قانت لوقک اصوله اتباع ایتمشدر. جیقاردینی نتیجه لر دخی بک مهمدر. چونکه حصول علمده نفس انسانی به دخی بر بویوک حصه و یردیکی ایچون بر طرفدن عقلیونه دیگر طرفدن ده تدریبیونه حق و بریور :

تجربه نك حصول علمده خدمتی انكار ایتبور. بولوندوغنی عصرک موفقیات علمیه سنه قارش ایده مزیدی ده ! [عقل صرف ، عالمه قطعاً تماسده بولونماسه یدی، یعنی تجربه حسیه ده بولونماسه یدی، او عالم حقنده ناصل معلومات حاصل ایده بیلیدی؟. حاصل ایتدیکمز معلوماتده البته تجربه نك دخلی واردر. فقط تجربه ایله تحصیل ایتدیکمز شیلر ، علمک یالکز (مواد انشائیسی) در. اونلری تنظیم و ترتیب، تنقیح و تصحیح و بالذات تجربه بی اداره ایتک اوزره بزده بر طاقم (مبادی قبلیه principes apriori) دخی واردر؛ و اولق ضروریدر. ایشه اومبادی، منحصرأ (عقل صرف Raison pure) کله ماهیت ذاتیه سندن منبعث در. بناء علیه تجربه دن کله مشدر؛ چونکه هر تورلو تجربه دن مقدم در. بالخاصه (سببیت مبدای) او حقایق قبلیه و نظریه دن بریدر.] دیمشدی.

مبحث معرفت مسئله سنده قانتک اعتقادیخی خلاصه ایدن بو ادعا، بر طرفدن لوقه حق و بریور ؛ فقط لوقک ادعاسنی تحدید ایدیور. دیگر طرفدن ده قارت ایله برابر کیش کچمش اولان بوتون (عقلیون rationalistes) کله ادعاسنی تصدیق ایدیور ؛ لکن من جهة تصدیق ایدیور !!!

واقعا ده قارتک (افکار و هییه idées innées) نظریه سنی شدتله رد و ابطال

ایدن لوقك آناری هنوز ایادی اعتبارده طورورکن ، او نظریه‌ی مدافعه ایتك کوچ اولوردی. نته کیم عقلیون عقیده‌سنی - هیچ اولمازسه من جهة - حقلی بولوب تصویب ایدن قانت بیله شکل قدیمی اوزره او حالده مدافعه ایده‌مه‌مش ، و اوکا بدل (حقایق قبله *vérités aprioriques*) نظریه‌سنی اقامه وتصاحب ایله‌مشدی . مع‌مافیة بو ایکی نظریه آراسنده پك اساسلی بر فرق اولمادینی ایچون ایکیسی‌ده بر بوله‌جیقایلیر . بناءً علیه قانت (افکار وهییه) نظریه‌سنك شکلی ده کیشدبروب مدافعه ایده‌رك یکیدن اوکا رواج ویرمش اولوبور ؛ وبو صورتله حصول علمده عقل بشرک دخی کایاً ذیمد خل بولوندوغنی اثبات ایتمش بولونوبور . [مواد علمیه تجربه‌ایله عالم خارجیدن کلیور . فقط علمه صورت ویرن ، تجربه‌ی ترتیب واداره ایله‌ین بزم عقلمزدردر ! ..] دیملکه نه‌پیسته مولوژی مسئله‌سنی کندنجه حل ایتمش اولوبور .

(مبحث وجود) مسئله‌سنه کلنجه ، اونك ماهیتی ویریلن شو قراره تابع بولونه‌جنی ایچون اونی‌ده ینته نتایج تنقیدییه تبعاً حل ایتك چاره‌سی بولونمش اولدی دیملکردر .

فی‌الحقیقه ، اگر اویله ایسه ، [یعنی قانتك دیدیکی کیبی تجربه‌ایله عالم خارجیدن یالکمز موادعلمیه نامنه برطاقم (احساسات *sensations*) تاقی ایدیورده اونلری - بعضی مبادی عقلیه‌من دلاتی‌ایله - ترتیب ایده‌رك علمه انجق بر صورت و قیمت ویریورسه ق: ..] علممزم ، حیثیت اعتباریله تماماً انفسی‌در ؛ تعلقی اعتباریله دخی تماماً (محدود *limité*) در . ملکات عقلیه‌من وقابلیت فطریه‌منزله ابدأ محدوددر . هیچ بر وجهله حقایق اشیایه مطلع اوله‌مايز . فقط سببیت اعتقادی ، اك قوی ولایتزلز مبادی عقلیه‌منزدن اولدوغنی ایچون حقایق اشیایی‌ده انکار ایده‌میز . بناءً علیه شوکوردوکز وحس ایتدیکمزشیلر محض شعبده وخیال دکلدر . بونلرك اصلی واردر ، لکن ناصل شیلردر ؟ .. ایشته اونی بیله‌میز ، وغالباً هیچ بیله‌میه جکمز ! .. دیملک چیقار . نته کیم قانت تماماً بو نتیجه‌ره پیوسته اولارق (آغوستی‌سیزم) اعتقادی‌ده لایقيله تأیید و تشیید ایتمش و (اضافیه *relativisme*) دعواسنده نابتقدم قالمشدر . چونکه بوایکی اعتقاد یکدیگرنی منطقاً مستلزمدر .

ایشته قانت (مبحث وجود و دلنیات) مسئله‌سنی‌ده بوبله‌جه حل ایتمش بولونوبور . فقط بو وضعیت فکرییه کوره مابعد الطبیعیاتك حیثیتی کایاً ده کیشیور : [اگر

حقایق اشیاى ابدیاً بیله میه جك ایسهك ، حتى - قانتك دوشوندوكی کیى - باشقا طبیعتده یارادلمش مخلوقات علویه ایچون بزجه معتبر اولان حقایق قبلهك هیج حکمى اوله مامانی پك محتمل ایسه ، حقیقت مطلقه یی موضوع بحث ایدن مابعد الطبیعیاتك آرتق نه وظیفه سى قالیر ؟..] ده یه بیله جك اولان معترضلره قانت : [اونك اك مهم وظیفه سى معلومات صحیحه مزك ماهیت و حیثیتنى تحقیق ایتمك ، قابایات علمیه مزك حدود حقیقه سى بولوب کوسترمکدر !] دیه بر جواب حاضرلیور . عقاید مقدسه و (نصوص دینه dogmes religieux) ینى - تعرض شهیدن - قورنارمق ایچون ده (ایمان la foi) قانی سى آرائق برافور . (تنقید عقل صرف critique de la Raison pure) ده : (بزم ایچون حقایق اشیا یه کسب اطلاع ایتمك ممنوع و بمنوعدر !..) دیدیکى حالده (تنقید عقل عملی cr. de la Rais pratique) نام اثرنده بودعوانك عکسنى اثباته همت ایدیور . یعنی (حقایق اشیا یی و بناء علیه الهی بیله میز اما انجق عقل ایله بیله میز !. فقط ایمان ایله حس و تصدیق ایده بیلیز !..) دیمك ایستیور . نته کیم اخلاق عملیه برنسبیلر ینى ده (وظیفه le devoir) حسنه بنا ایدیور که بونك قیمتی دخی ایمانك حکم وقوته تابعدر . هر حالده بومهر ذکادن سزه انجق برلمه ، برشراره عرض ایدم . بو آدمك زمانمز فلسفه سینه خارق العاده برتائیری اولمشدر . بن یالکز بوا اعتقاد ینى طوغرو بولماقوله برابر قدرت احاطه سینه وفوذ نظرینه حیرانم .

اونك معاصریندن اولان (توماس رید Thomas Reid) که حقوج مدرسه سنك اك بویوك فیلسوفی صایلیور ، - او دخی عینى صورتله و عینى انسبابدن طولای هیومك تنقید اتندن ثورکمش وبوکا قارشى مابعد الطبیعیاتی واوکا استناد ایدن ، یاخود سیغینان عقائد مسلمه و مقدسه یی قورنارمق غیرتیله اساسلری یکیدن تدقیق ایتمك و صاغلام مبادى اوزرینه فلسفه یی تکراراً بنا وتشید ایتمك ایستیوردی . خلاصه هرکس اینانیوردی که لوقك فلسفه سى هر وجهله قبول ایدیلوبده نهایتنه قدر سورر لورسه - تعقیب اولونه جق وجهه استقامته کوره - بر حسده واریر که استدلال ، منطقی اولدوغى حالده نتیجه (بدیهى باطل absurde) در . بناء علیه همان هرکس هیومك استدلالات واقعه سى منطقی بولویور و اونك ایچون تلاش ایدیوردی . [دیمك که مبدأ استدلالات اولان مقدمات اساسیه بر یاکلشلق ، بر بوزوقلق وار ایمش که بویله آقیری بر طاقم یوللرده ذهنی سوروکه یهرك بداهتاً

باطل نتیجه لره پیوسته اولویور . [دیه دوشونمک پک طبیی ایدی . اونک ایچون هرکس وجدان بشری - کندی حسابنه - بردها تدقیق ایتمکله یکیدن ایشه باشلامقده بر لزوم مبرم کورووردی . او زمانک بر (دور تنقید و تنور (âge de critique et d'illumination) اولماسنه بو مجبوریّت و بو وضعیت سببیت و برمشدر .

رهید دخی وجدانی و ملکات ذهنیهیی تحلیل ایله - تنقیدی بر صورتده - فلسفهیه تشبث ایتمشدی . اوده سوژه قتیوزمی قبوله مجبور بولونمش و لکن عالم خارجی نك استقلال موجودیتتی - تنقیدیون ایله بونلرک اولادی صاییلان - ریپونک صدمه اعتراضاتندن قورنارم بیلیمک ایچون (حاسه سایمه bon sens) و (عقل سلیم sens commun) [*] ادعاسنه صیغینمقدن باشقه برچاره سلامت بوله مامشدی . اصل سقوج فلسفه سنک خصوصیت ممتازه سنی و - عینی زمانده - ضعیف نقطه سنی عرض ایدن جهت بودر؛ یعنی انسانلرک (حس مشترک) نی بر مسئله - مابعدالطبیعهیی حل ایچون - معتبر بر دلیل عدایتمه سنده در . حالبوکه بودلیل ، نهایت بر نوع (تواتر بینه سی) نه واریر که فلسفیانه بو کیی براهینک پک او قدر اعتباری یوقدر . مع مافیّه (رهید) ک دخی (sensualisme) اساسی اوزرینه بر (subjectivisme) فلسفه سی قورمق و عصرک جریان اعتقاداتنه اساساً اویقمی مجبوریتندن قور توله مادیغنی کوستیرر .

(رهید) ، - بوندن اولکی بایده مذاکره سی کچن و بشنجی بابک مقدماتنده اطرافیه تنقید ایدیلن - (idoles) و (ماهیت ثالثه tertium quid) فرضیه لرله اوزون اوزادی به مشغول اولمش و اوکا کوره بر مهم (نظریه معرفت) دخی وضع ایتمشدی . بونک ماهیتنه و قیمتنه دائر مختصر بر فکر و برمش اولدوغم ایچون تکرار و تفصیله لزوم کورمیورم . یالکز شومهم جهتی نظر دقتکزمه عرض ایدیم که ارتق یوفوق العاده وضعیت دخی لایقوله تعین بولمشدی . ارتق اکلاشلمشدی که بزم شو تشکلاتمزه کوره آلات ادراک و وسائط علممز حقایق اشیایی آکلاویه بیلجهک برقابلیتی حائر دکلددر . شو محدودیت ایچنده عاجز و کندی ماهیتندن بی خبر اولان عقلمزک حدی دکلددر که (وجود مطلق l'être absolu) دن بر فکر ویره بیلسین ده (حقیقت لدنیه) به اوفکرک تمامیه ترجمان اوله بیلسین ! ..

[*] بوتیمیرک اصل معناسی (حس مشترک) ایشه ده بوراده عقل سلیم معناسنه وارد اولمشدر .

صوکره هر کسجه قبول ایدلشددرکه ، حال ووضیعت بویله اولونجه عالم حادثاتی تدقیق ایتمک و (نظام کائنات l'ordre de l'Univers) ک (قوانین قیمه lois immuables) سنی کشف ایلده بیلیمک ایچون تجربه دن باشقه یول یوقدر .

خلاصه ، هر کس آ کلامشدی که انفسیه و (لادریه agnosticisme) مذهبلری یکدیگرینه صیقی صیقی به مربوط و بربرینی منطقاً مستلزمدر . تجربه - عقل ایلده اداره اولونمق لزومندن وارسته قالماسه بیلده - اک صاغلام (اصول تفحص methode d'investigation) در . بناءً علیه فی مابعد فلسفیات عالمنده فائده لی تحقیقات اجرانسه کیریشوب ، یکی یکی کشفیات موفق اولمق ایستین هر کس بوساحده و بو اصوله تمسک ایدرک تدقیقاته مجبور اوله جق و موفیقی نسبتنده حدود و معلوماتی توسیع ایدیه بیلده جکدر .

ایشته بو (بطن متفکرین génération de penseurs) ی متعاقب ظهورایدن و فلسفه یه چوق رواج و اعتبار قازاندران (سرویلیام هاملتن Sir Will. Hamilton) ده مین سویله دیکم حقیقتلری - عرض ایتدیکم وضعیت ذهنیه دائره سنده - لایقوله تعلیم و تأییده همت ایتدی . خصوصاً نظریه معرفت مسئله سیله چوق اوغراشدی . نته کیم دردنجی باده کندی فکرلری و معقول تصنیفی حقنده خیلی معلومات ویرمشدم . بالذات (نثائیة طبیعی Dualisme naturel) اعتقادنده قرار قیلمش اولدوغی ده کورمشدیکز .

آنار و افکاری لایقوله تدقیق ایدیلنجه واضحاً آ کلاسیلیورکه ، بوفیلسوف ، بر طرفدن قانتک ، دیکر طرفدن ده ریدک نفوذینه شدتله طوتولمش و اوایی استادک نظریاتی - همه حال - تألیف ایتمک ایسته مشدر . نته کیم لوقک تأثیراتندن دخی ذهنی قورتار . مامش اولدوغنه بر چوق دلیلار واردر . بوتون بو افکاری حقیله توفیق و تألیفه موفق اوله مادیفی ایچون (جون ستونوت میل Mill) ک اعتراضات شدیدنه اوغراشدی . میل اک مهم اثرینی بو آدم علیهنده یازمشددرکه غایت قیمتی ، یک دهرین و ایجه دوشونولمش قوجه برکتایدر .

هاملتن (لادریه agnosticisme) فلسفه سنی تماماً قانتک عرض ایتدیکی شکل مخصوص اوزره تلقی ایدرک بر چوق ملاحظات شخصییه علاوه سیله تأییده موفق اولدقدن صوکره اوکا (فلسفه لاشرطیه la philosophie de l'inconditionné) دیورکه قانتک (متعالی transcendental) نامنی ویردیکی نظریه معرفت دن

باشقه برشی دکلدر . شوقدر وارکه هاملتن بو عقیده یی باشلی باشه بر مسلك
شکلنده عرض ایتشددر . نته کیم بو عقیده نك لازم غیر مفارقی اولان (اضافیت
علم بشر *relativité de la connais. humaine*) دعواسنی ده بر مسلك یا یمش - و بو
دائرة داخلنده تصویری ممکن اولان - مختلف نظریات معرفتی تدقیق ، تنقید ،
ونهایت معقول بر صورتده تصنیف ایتشددر . ره یدك نفوذینه - من جهة مغلوب
قالدینی دخی بو خصوصده کی ملاحظات و تمایلاتندن آشکار اوله یلمیر .

هر حالده کندندن بر آزاو کلن اساتذه درجه سنده (بداعی *original*) اولما مقله
برابر معلومات و وثائق تاریخی اعتباریه بلکه جمله سنه فائق بر (تحریر متبحر *érudit*
profond) اولدوغی ایچون (تعلیمات فلسفیه *enseignement philosophique*) به
پك چوق خدمتی اولمش و بر چوق مسائل مشوشه یی تحلیل و تصفیه ایله مشدر .
(نظریه معرفت) بختنده اك مهم دعوانك (کیفیت ادراك) مسئله سنه مستند
بولوندوغنی اساس اتخاذ ایتهمی ، اونك ده نهایت (علم بلا واسطه *connaissance*
immédiate) دعواسنه منجر اوله بیله جکنی کوسترمه سی بر بو بوك خدمت اولمشدر ؛
چونکه بو مهم بحث نقطه استنادی کشف ایدرك مناقشه سی - نسبتاً ساده لشدیر مشدر .
هاملتنك منسوب بولوندوغی دور فلسفی بالخاصه نظریه معرفتله اشتغال ایدیوردی .
بونك سببی ده قولایجه آکلار سکز صانیم . لوقك نفوذیه (اصول تدریسیه
methode empirique) لایق له تأسس و تعمم ایتدکدن سوکره ؛ قانتك فلسفه سیله
(اضافیت علم بشر) عقیده سی اذهان متفکرینه تحکیم ایتدکدن سوکره . متافیزیک
بالضروره بر باشقه حیثیت اکتساب ایتمش و بر باشقه وضعیت آلمشدی . حقایق
اشیادن اسکیزی کیی - بی محابا - دم و وروله میوردی . طبعی درکه ذهنلر بوتون
قوتی نظریه معرفت اوغورنده تدقیقات و حتی تنسیقات اجرا سنه صرف ایدیوردی .
خصوصاً بو بحثه تعلق ایدن مسائل اساسیه دخی ده ها زیاده واضح و بللوری بر
شکل اوزره موضوع بولون یوردی : پك ایی آکلا شلمشدی که (ام المسائل
la question mere) اولان ادراك معما سنده ، علم بشرک (تحدسی *intuitive*
ویا خود (استحضاری *représentative*) اولماسی احتمالی - اك اول حل اولونماسی
ایجاب ایدن - عقده اساسیه یی تشکیل ایتکده در . عینی زمانده علم تحدسی نك
(صفت کاشفه *la caractéristique*) سی ده تعین ایتمش و بو خصوصده بوتون

فیلسوف لر متفق دوشمشردی : [تحدی اولان بر علم ، مطلقاً (حالی actuel)
اولان بر ادراك دیمكدر . حالی اوله رق ادراك ایدم بیلدیمكز شی البته (حقیقی réel
و آفاق objectif) در .] ده نیلور و بو ادایی هر کس قبول ایدیوردی .
هاملتن بالخاصه ریدك نظریه معرفتی تنقید ایدرکن بودستوری هم رهبر همه
میار اتخاذا ایدمك تحلیلاته کیریشمشدی . فقط بر طرفدن - لوق ایله باشلایان -
انکلیز جریان فلسفی سنه طوتولمش و دیگر طرفندن قانتك نفوذ غالبندن کندینی
قورتارده مامش اولماسندن طولانی کندییسی دخی مشکل بر موقعده بولونویوردی که
معذوردر . لوق وقانت کپی آدلردن سوکره دنیایه کلوبده فلسفه تبعاتنه حصر
عمر ایتك وافکار عالمه یکی بر جریان ویرن بو استادلرک اثرلرینی اوقوماق ممکن
اوله مازدی . اوقودقدن سوکره ده نفوذ معنویلردن آزاده قالمق بك کوچ برشی
اوله بیلیردی .

هاملتن لادریه اعتقادی قانندن تاقی ایتدی ؛ فقط اوکا دها قطعی ودها واضح
بر صورت معینه ویردی ؛ عادتاً بر مسلک پایدی . (la philosophie de l'inconditionné)
عنوانیله مشهور اولان مذهب فلسفی بودر . (لاشرط inconditionnellement
هیچ بر شی دوشونه میه جکمز بر (مدعا these) اوله رق اورطیه آتوب ،
اوی بك قوی دلائل بسیقولوژی و منطقیه ایله تحکیم ایتدی . نتیجه ده (وجود
مطلق) ی ادراك ایدم بیلیمكدن عقل بشرک فطرتاً عاجز و قاصر بولوندوغنی
- بر طاقم براهین جدیده ایله - اثبات ایتدی . یوقسه بو اعتقاد ، شرق و غربده
اوتدنبیری مشهور و معتبر بر فلسفه ایدی . یانکز عقل وحسمزک بو خصوصده
عجزی قطعاً مسلم و مقله برابر اکثریتله امید اولونویوردی که تصفیة باطن سایه سنده
وارد اوله بیله جک لمعاً الهام ، وجود مطلقه دائر بر علم یقین ویره بیلیر . هاملتن بو
امیدی ده تولدورده رك اضافیت علم بشر دعواسنی علی الاطلاق وبلا احتیاط قطعی
بر صورتده تأسیس و مدافعه ایتدی .

تاریخ فلسفه کوستریورکه یاقین زمانلره قدر اوروپا فیلسوفلردن بعض
کیمسه لر بو امیده کوکل باغلامقدن قورتوله مامشردی . مثلاً هاملتنک معاصری
واودورده فرانسه نك المعروف فیلسوفی اولان (ویكتور قوزن Victor Cousin)
وجود مطلقك عقل و حسن ایله بیلنه میه جکنی قوتله ادعا ایتدیکی حالده الهام ایله
وجدانده منجلی اوله بیله جکسه اینانیردی ؛ بو اعتقاد نوفلاطونی در . مشهور

(فلوطينوس Plotinus) بوفكرى اساس اتخاذ ايدەرك اونك اوزرينە بك شاعرانە
برفلسفە بنا ايتمشدى كە تصوفك عىنى در .

ھاملتن ، قوزەن ايلە بو خصوصە مباحثە كيريشيور ، وقطعياً بويلە برنشئە
علميە ھەتھال اولەمايە جفنى كوسترەرك فرانسز فيلسوفك او ادعاسنى شدتلە رد
رد ايدىيور . [وجدانكە كوردوكل تجليات ، ھب كندى تصورات وحالاتكدر ؛
وجودمطلقك اونلرلە ھېچ بر مشابھتى ، حتى ھېچ بر مناسبتى يوقدر !] دىيور .
بزم عرفاي صوفىە دخى - نہایت - بو تورلو اعترافاتە مجبور اولمشدى . بو
معنادە يازلمش اولان شعرلر اوقدر چوق و اوقدر كوزلدر كە امثالنى سائر السنە
متمدنە - بن - بولە مادم . بناءً عليه بۇدە بك يكي بر فكر دكلدر . سزە بر
(رباعى) عرض ايدىم كە ديدكريمى اثبات ايچون ھم مثال ، ھمدە دليل اولە بيلسين !
منيع شعر ومهبط الھام اولان ايرانك مشهور شعرا سندن (بابا افضل كاشى) نك
شو دلبر رباعىسى ھاملتنك بوتون بر مقالەسى جامعدر :

كفتم لھم ملك حسن ، سرمايە نىست !
مورشير فلک ، موزرە درمايە نىست !
كفتا : غلطى !.. زمانشاه غواہ يافت ،
ازما ، نوھر آنج دېرە يايە نىست !

يعنى ، وجود مطلقە خطاباً :

[ديدم كە : بوتون ملك حسن ، سنك سرمايە كدر !. فللكدە كى خورشيد
سنك كولكە كدە برزە كېي در !. ديدىكە : ياكاش سىك !.. بزدن نشان بولمق قابل
دكلدر . بزدن نە كوردكسە كندى پايە كدر !..]

شبه يوق كە اويلە در . اويلە اولماسە بيلە نہایت وجدانمزدە الھام ايلە جلوہ كر
اولان بالذات وجود مطلق دكل ، انجق اونك نورحسنى در كە تعريفە بيلە كلز .
حتى بن بيلە كنجلكم دئبرى بو اعتقاد شاعرانە ايلە نشئە ياب اولشمدر . بوندن اون
اوج اون درت سنە اول يازمش اولدوغم (رباعى) لردن سزە ايكي دانەسى مثال
اولەرق عرض ايتمكلكمە مساعده بيوريكز وشو جر كتمى فضوللغمە ويرمە بيكز
رجا ايدەرم . مقصدم - اعتقادمە دائر اوتە دئبرى حاصل اولان - سوء ظنى تصحيح

ایتمک واونک اساسسنز اولدوغنی کوسترمکدر. الک صمیمی فکرلرله محرم اولان
شاگردلرمک بو اعترافاته دخی شاهد اولمالرینی ایسترم . اوقدر !..

بر دایره عاشقم که کورمک مشکل !
دامانه دست قدرت ایرمک مشکل !
تابشکه نور مـخی در دل ؛ لکن ،
نا محرم بر نشانه برمک مشکل !..

شو فارسی رباعی ایله دخی انفسیه عقیده سنی ادا ایتمک ایسته مشمدر !

از نور وجود حق ؛ که تابی دیرم ؛
بر جهره روشنیه نقابی دیرم .
سرکشته شدم برشت هستی ؛ آخر
در افق بصیرتم سرابی دیرم !.. [*]

یعنی [حقک نور وجودندن آنجق برلله کوره بیلدم. اونک روشن چهره سنده
بر نقاب کوردم. بو وارلق صحراسنده سرکشته بر حالده طولاشدم ؛ نهایت افق
بصیرتمده بر سراب کوره بیلدم !..]

دیلمدن مقصدم ! (حقیقی اولدوغنی کبی کورمک ممکن دکدر. اونک لمعان
نوری بیله کندی چهره سنک نقابی در. وارلق عالنده نه قدر تحقیقات اجرا
ایدلسه ینه ادراک ایده بیله جکمز آنجق سراب حادئاتدر.) دیلمکدی. بزه ، اسلاف
عظامزک میراث عرفانی اولان بو فکری عبدالحق حامد دخی بر بیت ایله بلیغ
بر صورتده ادا ایتمش ، و :

کوردمور بوز بزه شمس مفیقنک نوری ؛
نقط سمائی عیامر نقاب شکطنده !..

دیلمشدر .

[*] بیلم نه کیی بر ساقه وجدانیه ایله او زمانلر بویله بر اوتوز قدر رباعی یازمشم
وبر قسمی فارسی لسانیه یازمشم؟! تصوف اوزرینه تحقیقات متادهده بولونویور وبرجوق
وسائق طولویوردم. احتمالکه کوردوک کوزل و بی بدل نمونه لک بکا الهام ایندیکی شوق
فوق العاده ، بوتسنز عکس صدایه سبب اولمشدر .

یا لکتر بر شی وار : بونلر هب شعر در . نه قدر حکیمانه اولسه بیله شعر در .
 هاملتن و امثالک اثرلرنده بویکی ادعالر، دلائل پسیقولوجیه و منطقیه اوزرینه
 مستقدر . اوله اولماسه ، فلسفه جه مقبول اوله مازدی . آرده کی فرق بودر ؛
 یوقسه بوموضوعات علویه ارتقا ایدن فکر بشر ماهیت شعر و حکمتی کندی
 معنویتنده جمع ایده بیلیر .

ایشته هاملتن عرفای شرق پری الهام ایله تالق ایلوب آهنگ شعر ایله ترنم
 ایده طور دوغی بو حقیقی بر مسئله علمیه صورتنده اورطیه آتوب اوزون
 اوزادی به بخلرله پسیقولوجیدن دلیلر کتیره دک کوسترمش و اضافیت علم بشر
 بدائی کرکی کبی تحکیم ایتشدی . لکن کندیسنگ بوقوتلی اعتقادیه بمضی افکار
 فلسفیه سی آرسنده ناقابل تألیف تناقضلر کورن اولدی . (جون ستوته میل
 J. S. Mill) بو تناقضلری چوقدن قید ایتش اولدوغی حالده ابراز و تنقیده جسارت
 کوسترمه مش ایش ؛ بونی بالذات اعتراف ایدیور ؛ هاملتنک فلسفه سنی تنقید و ابطال
 ایچون وجوده کنیردیکي اهمیت اثرینی ، اوفیل سوفک و فانتدن صوکره باصدیروب
 نشر ایتدیرمشدی . تولن بر آدمک کندیسنه جواب ویرمکدن عاجز قاله جنی بدیهی
 اوله جنی جهته بویله برحرکنک پکده عالیجنایانه بر طور صایله مایه جفندن بحث
 ایدرکن غریب برسبیله بیان اعتذار ایدیور : [هاملتن اوقدرشدید و متحکم بر مبارز
 ایدی که صاغلفنده کندیسبله بحثه کیریشمکه کیسه جسارت ایده مزدی !] دیور .
 هیوم ایله بارقله بی تألیف ایده دک بر مکمل ایده آلیزم سیستمی قوران جون
 ستوته میلک اک زیاده (سقوج فلسفه سی la philosophie écossaise) نه معترض
 اولماسی پک طبیعی و ضروری ایدی . هاملتن ایسه او فلسفه نک بلکه اک مقتدر
 مدافعی ایدی . بو مذهبک زمین استنادی (طبع سلیم = حس مشترک = sens
 commun) ک شهادت معتبره سی در . سقوج فلسفه سی بوسایده بوتون انسانیتی
 کندینه طرفدار اوله رق قازانیور و (وارلق) عالمک ایکی رکن اصلیمی راییلان
 روح ایله ماده نک استقلال وجودینی تعرض اشتباهدن قورتاریوردی .

واقعا هیوم و بارقله دنبری ایده آلستلر (حسیه sensualisme) اعتقادینه استناد
 ایتمکه ، (عالم شهود le monde visible) ک وجودینی تصدیق ایده بیلیمک وینه
 ایده آلیزم برنسپلرینه صادق قاله بیلیمک بولنی بولمشلردی . اونرله برابر میل دخی
 شو کوردوکر کائناتک وارلقی تسلیم ایتمکدن قطعاً چکینمیور و فقط [طوغروندن

طوغرویه تلقی ابتدیکمز بو علم ، آنجق (انفسی) در ؛ اونی تحلیل ایدرسهک
 یالکز کندی حالات روحیه مزه کسب وقوف ایده بیلیمکه قالدیمز تحقق ایدیور.
 ماده وروح دیدیکمز شیلر حقنده کی علممز - نه قدر حس اطمئنان ایله مترافق
 اولسه ده - بر فرضیه دن عبارت قالیور؛ بر (علم یقین connate, certaine) حیثیتی
 حائر اوله میور . چونکه عالمه تماسمزدن در حال آلدیمز معلومات ذات ماده یه
 وذات روحه عائد بر خبر دکلدر . برینک اوصاف و کیفیاته ، دیکرینک ده حالات
 وتغیراته دائر بعضی حادثاتدر . [دیوردی .

دقت ایدرسه کز یک چابوقا کلارسکمز که بوا دعه ده ، آنجق حالی اولان علم ، یقینی
 اوله رق تلقی ایدلش اولویور . بویله بالتحس ادراک ایده بیلدیکمز شیلرک حادثاتدن
 و بناء علیه کندی حالات روحیه مزدن عبارت اولدوغی ادعا اولونونجه (اضافیت
 و انفسیت عام دعواسنه بناء) ماده وروحک حقیقی علم بشرک دائره تعلقی خارجنده
 یعنی یک مبهم ومظلم بر موقعده قالیور . واقعا اونلرک وجودنی ینه هر مذهب اربابی
 تصدیق و تسلیم ایدیور . فقط طوغرودن طوغرویه مطلع اوله بیلدیکمز بر حقیقت
 کیبی دکل ، از جوق معقول بر فرضیه کیبی تصدیق و تسلیم ایتش اولویور .

آکلاشیلدیور که ایکی فرقه رقیبه آره سنده قیامتار قوپاران بومسئله ، تحس
 واستحضار دعواسی در . اونک ده نقطه استنادی ، روح وماده حقنده کی علممزک (حالی
 actuel) اولوب اولماسی مسئله سیدر . دیمک که اوتنه دئیری سویله دیکم شی بوراده ده
 تحقق ایدیور : دیمک که صحیحاً زمانمزد مسائل معرفتک (کورد و کوم) اولدوغی
 مسئله بودر . میل ، اوخارق العاده اثرنی بونک ایچون یعنی (هاملتن فلسفه سنی
 تدقیق exam in de la ph. de S. W. H.) ایچون یازمشدر . [*]

بو مهم اثردن بوراده برفکر ویرمک امکائی یوقدز واونک غوامضی ادراک
 ایده بیلیمک ایچون حاضر دکلسکمز صانیرم . [*] لکن هاملتنک ضعیف نقطه سنی
 میل نروده بولمشدر ؟ اونی سزه آکلاده بیلیرم :

[*] زمانک بوتون فیلسوفلرنی ایکی فرقه آیروبله وعلیهنده شهادته دعوت ایدن بومهم
 کتابک اسمی اودر . بویوک برجله تشکیل ایدن بواثر دها اوتوز قدر کتاب ومقاله یازلامنه سبب
 اولمشدر . میلک اعتراضاتی کتابکزک (۲۰۴) نجی صحیفه سنده مندر جدر . بائیکز .

[**] میل هاملتن فلسفه سنک هر نقطه سنه - اصولی دائره سنده - اعتراض ایتمشدر . یالکز
 بو مهم مناقشه یه دائر بر رساله یازمق نیتندیم . انشالله وقتم مساعد اولورده بوکا موفق
 اولورسم بوتون تفصیلاتی ایله اومباحث مهمه یی اوقور ، و آکلارسکمز .

هاماتن ، انفسیه اعتقادینه شدتله طرافدارلق کوسترمش واوندن طولای - ممکن اوله بیلدیکی قدر - اضافیه دستوری تحکیم ایتشدی . بناء علیه علم نامنه حادثانندن باشقه برشی بیلهمه دیکمزی وحادثاتک دخی - لدی التحلیل - کیفیات اشیا به منجر اولوب قالدیغنی کمال قطعیه اده ایدیوردی . (کیفیات اولی *qualité primaires*) و (کیفیات ثانیه *qual. secondaires*) نظریه سنی قبول ایتدکدن ماعدا (حرکت *mouvement*) ی تعریف ایده بیلیمک ایچون برده (*secondo-primaires*) نامیه ایکیسی آره سنده دیکر بر صنف کیفیات احداث ایتشدی . بو نظریه ، لوقک آجدیغنی جریان ایله هاملتنه قدر کلش واونک تعلیماتیه قوت بولمشدی . حالبوکه اواعقاده کوره کیفیاتک حالی اوله رق ادراک اولوندوغنی و کیفیات اولانک بالذات اشیا به ، کیفیات ثانیه نکده یالکز بزه عائد اوصاف و حالاتدن بولوندوغنی قبول ایتک لازمکیوردی . (مبحث حادثات *phénoménologie*) بابتده سزله بو خصوصاته دائر خیلی تفصیلات ویرمشم . اونلری خاطر لایکمز !..

شیمدی میل کیفیات اولادن طوتدوروب هاملتنی خیر بالبور . بوتون تعریضاتی برجه له ایله اختصار ایده بیلیرم ؟

[کیفیات اولی بالذات اشیا به عائد ایسه حقیقت اشیا به کسب اطلاع ایده بیلوروز ، دیمکدر . چونکه کیفیات مذکور ه بی (حالی *actuel*) اوله رق ادراک ایدیوروز . حالی اوله رق ادراک ایده بیلدیکمز علم ، یقین افاده ایدر . بو خصوصده هر کس متفق الرأی در . اويله ایسه هاملتنک بودرجه قوت و قطعیه ایلری به سوروب مدافعه ایتدیکی (لادریه *agnosticisme*) ادعاسی ، بو آدمک فلسفه سنی اساسندن بیقه بیله جک بر تناقض تشکیل ایدر !..] دیور .

واقعا بونده تناقض واردر . میل ، تماماً ایده آلیست اولدوغنی ایچون کیفیات تقسیمی - اساساً - رد ایده بیلیمش و او تناقضنه دوشمکدن قورتوله بیلیمشدی .

ینه تمایله ایده آلیست اولان (آلیکساندر بهین *Alex. Bain*) دخی - بو خصوصده - عیناً میلک فکرنده در . ذاتاً بوتون ایده آلیستلر بو فکرده در ، و اويله اولملری لازمکلیر . نته کیم کیفیاتدن بحث ایدرکن ، آلمان جریان فکریسنگ (قانت) دن صوکره بومستله به ناصل بر شکل ویردیکی کوسترمک ایچون مشهور شوپنهاورک افکار خصوصیه سنی بر مثال مهم اوله رق عرض ایتشم .

ایشته (ایکی فرقه مجاهده سی la guerre de deux écoles) ديه تاريخ فلسفه ده معروف اولان وقعه مشهوره بو مناقشه شديده ومديده دركه (انفسيه) ادعای خارجيه حيقه مامش اولقله شایان دقتدر .

بوتون بو وقوعات اثبات ایدیورکه ارتق انفسیه اعتقادی ، هر مذهب فلسفی نك زمین استنادی اولمش ، وفلاسفه متأخرین آره سنده وقوعه کلن مجادلات ، نظریه معرفتده انجق تفصیلات خصوصیه ومتمایزه دایر جریان ایتشددر .

صوك بر مثال وبر ای مثال ویرمك اوزره فیلسوف صاحب مسلك هر برت سببیرك بو باده کی ملاحظاتی ده - مختصراً - عرض ایدوب ارتق بو اوزون بجنه قطعاً نهایت ویریم :

بو کون جهان افکاره علی الاطلاق حاکم اولان (تکامل فلسفه سی) نك موجودی ومؤسسی بو بویوك آدمدر ؛ بیلورسکیز !.. بو اعتقاد مرور زمانه نه قدر تمذیلاته اوغرامش اولسه بيله اساسی طوغرو وصاغلامدر .

سببیر ، هر شئی بو سیاق نظردن تلقی و- ممکن اوله بیلدیکی قدر - حسن صورته تعریف ایده بیلور . الكاول کیفیت ادراکی (شرائط غریزه conditions physiologiques) سنه نظراً تتبع ایدیور . بوتبعائی - بیک بشیور صحیفه تشکیل ایدن - (بسیقولوجی مبادیسی principles of psychology) سنك همان اوچ ربعی اشغال ایدر . نهایت بوتون بو تحقیقاتندن بر نتیجه چیقارمق ایچون ترتیب ایشدیکی (نظریه معرفت) ، (réalisme transfiguré) نامی ویریور . بسیقولوجی کتابنك ایکنجی جلدنده بو عنوان ایله جالب دقت اولان باب مخصوص اونظریه بی عرض ومدافعه ایدر .

بوفیلسوف ، بدایت امرده عضویمز ایله برابر (اجهزه حسیه appareils sensitifs) مزك تأثیرات وعوامل محیطه ایله حاصل اولدوغنی وبال تکامل تقسیم اعماله مظهر اوله رق بو حاله کلدیکنی قبول ایدیور (حادثات روحیه phénomènes psychiques) نك کولرینی (شرائط حیاتیة condit. biologiques) ده بولویور . (احساساتمزك اضافیتی relativité de nos sensations) فی بورادن استدلال ایدرک همان شو نتیجه بی چیقاریور : [ماده نك هر هانکی بر کیفیتی حتی ثقلت ومقاومته بيله تعلق ایدن خواصی حقنده بيله حاصل ایده بيله یکمز (شعور consciousness) ، انجق انفسی بر (جمله انفعالات ensemble d'affections) درکه

بزجه مجهول اولان و بيلنه مه ين برطاقم (عوامل آفقيه agents objectifs) تأثيريله حاصل اولمشدر. [دييور . *]

فقط [كيفيتك بو صورته نابت اولماسي اضافيت احساساتمزي تصديق ايتمكه برابر ، خارجه مستقلاً موجود بر شينك وجوديني دخي قبوله مجبور ايدر .] كذلك ، احساساتمز آره سنده كي نسبتلرك دخي اضافي اولدوغني تعريف ايجون حصر ايتديكي باب مخصوصده سرد اولونان دلائلده مستبان اولويوركه [عالم خارجي ايله وجدانمزه طويدوغمز مناسبلردن هيچ بريسي وجدان خارجه كي منبغه (يعني سينه ديمك ايسيتور .) بكمزه مز ، حتي هيچ بروجله يافلاشه ماز .] فضله اوله رق [بومناسبتك في الحال وقوعي اثبات ايجون بزجه سندا اولان (موضوعه postulat) ، مناسبات مذكوره نك و بناء عليه علم بشرك اضافيتيني اثبات اوغورنده اجرا ايتديكمز استدلالانك جمله سنده بالضروره داخل و اساساً (مضمون impliqué contenu) در .] يعني انسان ، عالم خارجي ايله مناسبتم بولوندوغني في الحال ادراك واستفهام ايدر ايتمز ، او عالم خارجينك استقلال وجوديني دخي بالضروره قبول و ضمناً تسليم ايتمش اولور ؛ ديمك ايسيتور . او حاليه قطعياً شوتيجه چيقيوركه : [وجدانم خارجه مستقلاً موجود برشي واردكه حقيقت ذاتيه سي بزم ايجون دائماً بر مجهول مطلق و بر معماي مغلق اوله رق قاله جقدر . اونك (شرائط تجليسي conditions de manifestation) انجق بزم وجدانمزه حس و تصور ايده بيلديكمز مناسبات ايله تمثيل ايده بيله جقدر .]

سنبشرك بو نظريه معرفتي (انفسيه اعتقادينك تمثالي بز شكلي une forme symboliste de la doctrine subjectiviste) در . شو جيئيله وجدان خارجه مستقلاً موجود بر (شي مطابق) و يا خود - بزم شرق فيلسوفلرينك تعبير معروفجه - بر (وجود البحت) قبول ايدويور . فقط بويه بر شينك يالكز وارلغي تسليم ايتمكه قالييور . حقنده هيچ برشي سويله ميور ؛ هيچ بر تعريف و بر مكه جسارت ايده ميور ؛ چونكه اونك حقيقتنه مطلع اولاييله امكانني قطعاً انساندن رد و انكار ايدويور . اونكه دائمي بر تماسده بولوندوغمزي ، حتي بالذات وجدانمك بو مناسبتن طوغمش اولدوغني اعترافدن چكينييور . فقط قوتله ادعا ايدويوركه او مناسبتن بزه حاصل اولان احساسات و افكار وجود مطلق حقيقت ذاتيه سندن بر خبر ويره بيله جك قيمت و ماهيته دكلدر ؛ اولر او حقيقتك وجدانمزه تمثيل

[*] قوس ايجنده كي جمله لر فيلسوفك كندى سوزليردر .

تجلیاتی عرض ایدر، اوندن باشقه برحیثیتی یوقدر!.. بوتون بوادعالری تحکیم ایچون برطاقم استدلالاته کیریشوب بر هانلر اقامه ایتدکدن صوکره : قطعاً شو اعتقاده باغلانوب قالیور :

[باشقه یوللردن واصل اولدوغمز شو نتیجه یه ینه کلدک : بالجمله تظاهرات باطنیه و خارجیه آرقه سنده جلوه نمون اولان بر (قدرت ، قوت power) وار . اولجه اولدوغی کیمی شیمدی ده آکلیورز و بدیهی بر صورتده کورویورز که بوقدر - تک طبیعتی بیله مدیکمز حالده ، حتی بو خصوصده الک مهم بر تصور حاصل ایده بیلیمک قابلیتدن بیله محروم بولوندوغمز حالده ، اونک هر یرده هر زمان حاضر بولوندوغی اویله بر (امر مطلق fait absolu) تشکیل ایدیور که اونمز هیچ بر نوع (امور اضافیه faits relatifs) اوله ماز . بزم هر فکر و حسمز (کلیجی کچی transitoire) بر حادثه دن باشقه برشی دکلدر . کذلک حیاتک صحنه جریانی تشکیل ایدن شیلر دخی - نسبتاً دهآ آزمونبر اولمقله برابر - عاقبت ایر کچ شخصیتلرنی غائب ایتیمکه محکوم بولوندقلرندن ، شو آکلاشیلور که (یکانه باقی اولان شی la seule chose permanente) بوتون شو (ظواهر متغیره apparences changeantes) آردنده (کزلی caché) طوران و بیلنمه یین حقیقت در ۱ .]

افندیلر !..

بو طوغرو سوزلری کمال خلوس و صدق اعتقاد ایله سویله یین بو بویوک حکیم ، انکلتزه کیمی مدنیتک ، علم و عرفانک حریت و انصافک الک پارلاق جلوه کاهی اولان بر برده - مع التأسف - بعضی پاپاسلر طرفندن دینسر لکله اتهام ایدلمشدی . حتی وفاتندن صوکره اعظم علما و فضلادن و کبار امتدن یوزی متجاوز کیمسهر ، بو بویوک آدمک (وه ستمینستر کلیسای Westminster abbey) داخلنده بر هزاره نائل اولماسنی - باتقریر و بالامضا - رجا و التماس ایتدکلری حالده او مرقد اعظمک ناظری اولان (پک محترم دی نین آرمی تیچ روبنسون Very Rev. Dean J. Armitage Robinson) بورجانی قطعاً رد ایتش و بیان ایتدیکی اسباب صیره سنده سبسرک اوقدر بویوک بر فیلسوف اولمادیغنی و انکلیز عرفانه پک مهم بر خدمتی سبق ایتمه دیکنی وهله عقائد دینییه قارشى پک مبالانسز طاوور آندیغنی ده ادعا ایتمشدی . [*]

[*] سبسر ، وفاتندن صوکره احراق اولونماسنی وصیت ایتمشدی . بو وصیتی دوستلری حرفیاً اجرا ایتدیلر . بوراده دوستلرنک مقصدی او بویوک فیلسوفک بقایای وجودی اولان خاکستر فانی تربه اعظم صاییلان او کلیسایه نقل ایتکدن عبارت ایدی .

بز بو آدمی مع المنونیه قبول ایده بیلردک ، زیرا سویله دیکی سوزلر : (کل شیء هالک الا وجهه) ، [لاموجود الاهی] ، [لیس کئله شی] و [هوالباقی !] کیی کلمات جلیله نك تماماً عینی در . فقط کجه لم !. دونه طولاشه نزمه کلدک ..؟ خاطر لیور می سکزر ..؟

فیلسوفلرک پیری طانیدیفمز (تالهس Thalés) ک واوندن بری هر فیلسوفک آرادینی حقیقت متعالیه نه ایدی ؟ . سر مدی الجریان اولان بو سیل حوادث ارقه سنده باقی وقیوم بر وجود مطلق دگلی ایدی ..؟

او حالده (تالهس) دن . (سنسره) . ککنجه قدر واقع اولان ترقیات فکریه مزدن نه نتیجه قطعیه ادراک ایده بیلدک ..؟ نه اوکرنده ..؟ (هیچ !...) دگلی ...؟

دیماک که شو بیکرمی بش عصر سورن تفکرات متاده دن صوکره دهای انسانیت ، ینه ایلاک نقطه حرکتی اولان مبدأ فلسفی به رجوع ایتش !.. دیماک که ماصالرده سویله نیلیدیکی کیی ، شو ایکی بیک بشیوز سنه ظرفندمکی سیاحت فکریه مزده :

[آذ کیتمش ، اوز کیتمش ، دره تبه دومدوز کیتمش ؛ برده آردیمزه باقشمز که آریه بویی بر کیده مه مشز !.] او یله دگلی ..؟ البت او یله !..

فقط بزم - حقیقت اشیا و معمای وجود بحثنده - عجز طبیعی مزی اثبات ایدن وعینی زمانده بزه خدمزی بیلدیرن بو اوزون تجربهدن یا کلش بر معنا جیقاروب یأسه دوشمه کزی تنیه ایتماک ایسترم . ژان ژاق روسو ایله برابر :

بزمه سیر ایلمیوب بر بنیادی ،

آراز طرهنه نه درباری ؟ .

خالقی . خلقی ، سر اجمادی ،

همدبی بلماک ایسترمز حاله ؟ ..

لیک بوسر نمبرمک ملی ،

عقله نیسیر اولونمماسه . بلی !..

آدره عجز و غفلت دمه برلی

ایندیر بر هب خطا ایمنده خطا ...

دیماکه کسمه ییکز !.. حافظ شیرازی ایله دخی :

[*] روسونک منظومه سنی بو صورتله ترجمه ایدن پرتو پاشا در .

مهریت از مطرب رمی کو ، و راز دهر کنر هوا ..
 که کسی ننگشور و ننگه ابر . حکمت این معمارا ... [*]

ده یوده آواره لکله امرار حیانه قرار ویرمه بیکز؟ .. عجز من - فطرتاً ممنوع
 اولدوغمز - سرائر خلقت مسئله لرنده تحق ایدیور که بوده طبیعی در . لکن امکان
 دائره سنده واقع اولان تدقیقاتمز ، کندمزی تربیه ایدوب شو برقاچ کونلک عمرمزی
 بختیار کچیره بیلیمک ایچون تعایات مفیده ایله مالیدر . حتی مابعد الطبیعیات مسئله لرینی
 حل ایتک خصوصنده برکزه ده تحق ایدن شو عجز مزدن بیله بردرس اخلاقی
 آله بیلیرز :

یقیناً آ کلارز که بزی و کائناتی کیف مایشا اداره ایدن بر قدرت مطلقه وار ؛
 انحق اولنک ارادت ازلیه سی نه ایسه ظهوره کلیر . بز ، ایچنده بولوندوغمز شو
 کائناتک قوانین قیمة سی نه قدر ای تدقیق ایدرسه ک او قدر ارادات ازلیه نک
 معناسنه ایره رز و خطادن کندیمزی صاقینیرز که هم اراده جزئیة نک همد بختیارلنک
 شرط تحق بودر . محی الدین ابن عربی نک دیدیکی کی [القضاء والقدر ، حکم الله
 فی الاشیا = قضا وقدر ، اللهم اشیا اوزرنده جاری اولان حکمی در !] بو
 دستوری قبول ایتدکن صوکره ، او حکم ازلی نک اشیا اوزرنده ناصل جاری
 اوله کلدیکنی تدقیق ایتک بز وظیفه اولور . ایشته بویول بز کاملاً آجیق
 براقیلش وسادات حیاتمز ایچون اولنک کافل و کافی اولدوغی تبین ایتمشدر . بوتون
 کشفیات علمیه بویولده کیدر کن بولدوغمز حقایق اضافیه در .

سزه قیریق دوکوک بر صورتده عرض ایتدیکم بوبخی التزاماً بویله اداره ایتدم .
 عادتا بر ساعتک ناصل ایشله دیکنی تفصیلات میخانیکه سیله کوسرتوب تعریف
 ایده بیلیمک ایچون او ساعتی بوزان بر آدم کی حرکت ایتدم . یوقسه بوبخی
 دهادوزکون - ودها زیاده تمامیتی محافظه ایده رک - عرض ایتک ممکن ایدی . فقط
 کیزلی نقطه لری بوقدر ای آکلاشیه مازدی ، بن اونلری تشریح ایتک ایسته دیکم
 ایچون بویله یایدیم . - اوزمان -

[*] حافظ دیورکه : [سن بکا مطربدن و شرابدن بحث آج ودهمک سرائرخی اوقدر
 آرامه ، چونکه کیمسه او معنایی حکمتله آچادی و آیه ماز !] پک طوغرو ! فقط بویله
 اولدوغی ایچون اکنجه و عشرتله وقت کچیرمک لازمکمز .

بو خصوصه اكه زياده صلاحيتدار اولان پسيقولوجى علمنك حكىمى ايبكى
 جمله ده تلخيص اولونه بيلير . اونى ده سويله يمه ده خاطر كزده . صيقى طوتوكز ...
 [اجهزه عصيه مزه ، عوامل خارجيه نك تاثيرات متماديه سيله و - كيم بيلير قاج
 عصر دنبرى لايىنقطع دوام ايدن تكامل سايه سنده - يوغوروله يوغوروله بوتشكيلات
 عضويه مظهر اولمشدر . بناءً عليه - بوتون اوروپا دارالفنونلرنده تعليم ايدلدېكى
 وجهله - يالكز آلات ادراك دكلدر . بالذات ادراك ماكنه سيدر . جمله عصيه مزك
 دائرة محيطه سنى تشكيل ايدن و عالم خارجى ايله بزي دائمى بر تماسده بولوندوران
 (حليماى مختلفه papilles diverses) تلقياى خارجيه مزه ، اصل اشكال ابتدائيه سنى
 و يران اعضاى مهمه مزدر . اونلر اول امرده مسدركا تمزه بر صورت مخصوصه
 و ير دكدن سوكره اعصاب ناقله ، اوصور محسوسه يى مرا كز عصيه يه ايصال ايدبيور .
 و تجارب سابقه سنده بناءً اوصورتلر ك اسكيلرينه مشابه و يا خود مغاير اولدوغنى مرا كز
 عصيه مز فرق ايدبيور كه شعورك منشائى بودر . عوامل مؤثره اجهزه حسيه مزى
 يالكز فعاليت كتيبيور ؛ فقط بو فعاليت انجق او جهازلر مزك قابليت عضويه سنده
 كوره عكس عملى موجب اولدوغنى ايجون ، عوامل خارجيه نك ماهيتدن بر خبر
 ويره ميور . بناءً عليه عالم خارجى ايله صميميا و دائمياً تماسده بولوندوغمزده شبهه
 اولما مقله برابر ، بوتماسك تاثيريله او كرنديكمز شى ، كندى عضويتك نه كيبى عكس
 عمللره قابل اولدوغنى استشعار ايدوب بيلمكدن عبارت قاليور . ايشته علم بشرك
 ماهيتى - خلاصه الحلاصه - بوندن عبارتدر . بوندن چيقان نتيجه صريحه شودر كه
 بيلديكمز و بيله جكمز انجق حادثاته متعلق اموردر . بو واديد موفقياتمزه هيچ
 بر مانع اولما دېني ده محققدر . حادثاتك اصل حقيقتى و مستند اليبى اولان وجود
 مطلق حقنده ذره قدر معلومات صحيحه ايدنك احتمالى يوقدر . ايشته بو قدر جق
 بر حقيقتى او كره نوبده نريه واره بيله جكنى دوشونه بيليرسه كز بودستور ، تحقيقات
 آتیه كزده رهبر اولقى ايجون سزه كفايت ايدر . سزله بو قدر جق بر شى
 او كره نه بيلمش اولمقله بيله نمون و مسعودم . [*]

ازناوود كويى ل ۲۰ حزينان سنه ۱۲۳۳

رضا توفيق

[*] بوسوك صحيفه لرده خلاصه عرض ابتدكم فكرلرى ابي آكلامق ايجون (مبعيث
 حادثات) بابنه و بالخاصه (۲۳۱) و (۳۳۱) نجى صحيفه لرده ينه آبريجه بايىكر .

فهرست

بعضی ایضاحات مقدمه .

برنجی باب . — فلسفه و فیلسوف تعبرلرینک معناسی و منشای . — فلسفه نك تعريفات متنوعه سنی . — فلسفه دیدیکمز مشغله ذنیه نك اسباب ظهوری . — جستجوی حقیقت صراق برطرفدن علوی و برطرفندن ده فلسفه بی تولید ایتشدر . علوم ، پاشماق احتیاجندن ، فلسفه تولوم اندیشه سندن طوغمشدر . بناء علیه هر ایکسی ده حیات سمات مسئله لرله علانده دارد . — علم ایله فلسفه نك فرق و حدود متقابله سی . علوم شقی ایله روابطی . اساطیر اولین ایله ، دین ایله ، اخلاق ایله ، صنعت ایله مناسباتی . — فلسفه نك موضوعنه و غایه منه نسبتله تعریفی . — فلسفه نك لزومی و حیثیتی . — فلسفه مسائلی ، شعباتی ، اصولی . [مجمیفه (۶) دن (۱۰۴) . قدر .]

ایکنجی باب . — مبحث حادثات . — عالم حادثات نه دیکدر ؟ — بز اوئی اولای حواسمز واسطه سیله ادراک آیده رز . — حواسمز هم معدود ، همه هر برینک ساحه شمول و احاطه سی محدوددر . — بو واسطه لرله تلقی ایتدیکمز معلومات عنصریه و ابتدائیه به اصطلاحده (مدرکات حواس) دیرلر ، مبادی معلوماتز انجق بونلردر . — اجسامده استشعار ایتدیکمز کیفیات ، مدرکات حواس نوعندندر . — بونلرکده ماهیتی تحقیق ایدرسه ک آکلارز که کیفیات دیدیکمز شیلر بزده بعضی سبیلرله حاصل اولان (احوال روحیه) دن عبارتدر . — بونون ادراکاتز جنسلینه نظراً بر قاج بوبوک صنفه تقسیم ایده بیلیرز . — بو تقسیم ، عندی و کینی بر شی دکلدر ، بنیه تشریحیه منه تابع و حواسمزک تنوعاته موافقدر . — بو صورتله بالضروره بعضی مبادی به پیوسته اولورز . — اسکی فیلسوفلرک مقولات دیدیکی شیلر ، ایشه بویه عینی جنسندن اولان ناهصور حادثات و کیفیاتک ائمی جامعده و عمومیه سدر . — عناصر معلوماتی تلقی ایتکده حسک ، اولری ترتیب ایتکده مدرکک ، بو ترتیباته معنا و یرمکده هالته نك باشلیجه رولاری وارددر . فقط ، حاسه ، مدرک ، هاله دیدیکمز قابیلر (faculté) نامیله آیری آیری و مستقل اوای روحیه دن اولمایوب ، عینی روحک عینی ذهنک مراتب فعالیتندن عبارتدر . [مجمیفه (۱۰۷) دن (۲۶۳) . قدر .]

اوچنجی باب . — وجدانک بوکونکی حالی بر نتیجه در . — بونتیجه بی حقیله تنبع ایتک بوکونکی کالزه معنا و یرمک اچون شعورضک تاریخ حیاتی تدقیق ایتک لازمکدر . — تکامل فلسفه منه سیاق نظری بودر . — بو خصوصده مشکلات : بی شعور بر حالدن ذی شعور برحاله ناصل یکمیشز ؟ — بوی آکلامق اچون قیود ابتدائیه بوی ! — مقایسه اصولی : السانک و انسانیتک طرز تکامل اراستنده موازات و مشابهت . — بوندن نه نتیجه چیقاره بیلیرز ؟ — اوانک قیمی نه اوله بیلیر ؟ — بر مسئله ده ! . حواسمزک صورت شکل وتمینده قوای طبیعی نك تأثیری . — بو تأثیرک موضعی و خصوصی اولماسنک سبی . — بو میجنده بعضی ملاحظات معتبره . — اضافیت علم مسئله سنی تأیید ایدن جهتلر . — وجدان و شعور معناسی بونتیقات حل ایده بیله جکمی ؟ — نتیجه .

فهرست اسامی

بو کتابده ذکر اولونان مشاهیرک هانکی صحیفه لوده اسملری بجدیکنی
کوستیرر جدولدرکه الفبا صره سیله ترتیب اولونمشدر . فرنکجه اسملرک ترکیجه ده
املاسی و تلفظی یک کوچ اولدوغندن طولایی یا کلسلفه میدان ویرمه مک ایچون
فرنک الفباسنک ترتیبی - بالضروره - مرجع کورولندی . صحیفه لر نومرو ایله
اشارت ایدلمشدر .

A

- ۱ — Abou-bekr-i-Bâkilânî
(قاضی ابوبکر باقلانی) متکلمیندن .
عرب .
(۱۱۹) .
- ۲ — Abou-Djaber
(ابو جابر ابن حیان الصوفی) عرب .
(۱۳) . الکیمیائی .
- ۳ — Abou-Bekr-i-Râzi
(ابو بکر رازی الطیب) ایرانی .
(۶۵) .
- ۴ — (Abou-Bekr ibn Tofaïl)
فیلسوف اندلسی . عرب
(۲۲) .
- ۵ — Abraham Tucker
(آبراهام توکر) فیلسوف .
(۳۵۶) .
- ۶ — Academus
(آکادموس . اساطیر یونان قهرمانلرندن)
(۳۱۷) .
- ۷ — Achilles
(آخیلهفس اساطیر یونان قهرمانلرندن)
(۳۰۹) .

A — Aleméon de Grotone

- (آلفمه تون - قروتون شهرندن ، قدمای
فلاسفه دن . یونانی .
(۲۶۹) .
- ۹ — Adam Smith
(آدام سمیت . مشهور ، علم ثروت
مؤسس . انگلیز .
(۱۰۴) .
- ۱۰ — Adoud, al-idji
(قاضی عضدالاجی متکلمیندن . ترک .
۴۱۷ — ۴۲۳ — ۴۲۵ — ۴۲۶)
(۴۲۹) —
- ۱۱ — Alexandre le grand
(اسکندر کبیر .) یونانی .
(۴۵) .
- ۱۲ — Alhazen
(ابوعلی محمد بن الحسین الحزن بن هینم)
مشهور مهندس حکیم . عرب .
(۳۷۱) .
- ۱۳ — Ali
(امام علی حضرتلری)
(۴۸۵) .
- ۱۴ — Al Ma'moan
(المأمون . خلیفه عباسی .) عرب .
(۱۲) .

١٥ — Ammonius Saccas
(آدمونیوس ساقاس . نوافلونیہ
مؤسس .)

١٦ — Anaxagore
(فلازومنلی حکم . متقدمیندن .)
یونانی .

١٧ — Archésilas
(یکی آکادمیا مؤسسلرندن : یونانی)
(٣١٦) .

١٨ — Archimède
(مهندس شهر . سیراکوزالی .) یونانی
(٦٥) .

١٩ — Aristote
(فیلسوف شهر . ستایرلی .) یونانی
[١٨ — ٢٣ — ٢٩ — ٣١ — ٤٣]
— ٨٩ — ٧٦ — ٥١ — ٤٥ — ٤٤ —
١٢٦ — ١١٥ — ١١١ — ١٠٤ — ١٠٢ —
— ١٨١ — ١٤٧ — ١٤٥ — ١٣٩ —
٢٢٢ — ٣١٨ — ٢٢٥ — ٢١٢ — ١٨٨ —
— ٢٨٠ — ٢٧٩ — ٢٧٨ — ٢٧٧ — ٢٦٩ —
٢٨٧ — ٢٨٦ — ٢٨٥ — ٢٨٢ — ٢٨١ —
٤٠٧ — ٤٠٦ — ٤٠٠ — ٣٩٤ — ٣٨٩ —
— ٤٢٣ — ٤٢٢ — ٤١٢ — ٤٠٨ —
— ٤٢٩ — ٤٢٨ — ٤٢٥ — ٤٢٤ —
— ٤٣٨ — ٤٣٧ — ٤٣٠ — ٤٣٠ —
— ٤٣٩ — ٤٤٧ — ٤٤١ — ٤٣٩ —
٥٣٢ — ٥٤٧] .

٢٠ — Arnauld
(فیلسوف و منطق . متأخریندن .
فرانسز .)

[٢٥٦ — ٤٩٨]
٢١ — Avenarius
(فیلسوف . متأخریندن . آلمان .)
(١٢٥)

٢٢ — Avicenne
ابوعلی الحسین ابن سینا (فیلسوف وطیب
شهر) .
[٢٢ — ٢٥ — ١٠٢ — ٤٢٩]
[١٣٣ — ١٣٠ —
B.

١ — Bacon (François)
بهی قن (فرانسیس) مجدد مشهور .
انگلیز فیلسوف .

[٤٣ — ٨٤ — ٩٥ — ١١١]
— ١١٢ — ١١٩ — ١٤٧ — ٢٤١ —
— ٢٥١ — ٣٢٩ — ٣٣٠ — ٤٣٢ —
— ٤٣٤ — ٤٤٢ — ٤٤٣ — ٤٧٨ —
— ٤٨٩ — ٤٩٢ — ٥٠٨ — ٥٠١] .

٢ — Bacon (R.)
بهی قن (روجر) (فیلسوف و راهب .
قرون وسطی . انگلیز .)
(٥٥٩) .

٣ — Bain (Alexander)
بهین (آلکساندر) (معاصریندن فیلسوف
و منطقی . انگلیز .)

[٩٩ — ١٢١ — ٢٠٤ — ٢٦٠]
— ٢٦١ — ٥٠٥ — ٥٣٣ — ٥٥٨] .

٤ — Bayle
بهیل
(متأخریندن فیلسوف . فرانسز .)
(٤٩٣) .

٥ — Balfour (Arthur)
بالفور
(معاصریندن فیلسوف و سیاسی . انگلیز .)
(٢٤١) .

٦ — Barbier de Meynard
باربیه دومینار .
(معاصریندن مستشرق مشهور . فرانسز .)
(٤٠٤) .

٧ — Behor Israël
بجور
اسرائیل
(٤٧٩) .

۸ Bentham (Jeremie)

جهره می بن نام .
حکیم حقوق شناس . معاصریندن . انگلیز .
[۵۲۳] .

۹ — Bergson برغسون
معاصریندن . فیلسوف . فرانسز
[۷۱ — ۱۱۶ — ۱۱۷ — ۱۱۹]
[۱۶۹ — ۳۳۰ — ۴۱۴ — ۵۱۰ — ۵۲۹] .

۱۰ — Berkeley (George) بارکله
(متاخریندن فیلسوف . انگلیز .)
[۱۲۲ — ۲۰۴ — ۲۱۶ — ۲۲۹]
[۲۳۰ — ۳۱ — ۳۲ — ۲۳۵]
[۱۳۶ — ۲۲۸ — ۲۴۰ — ۲۶۸ — ۳۵۶]
[۳۵۷ — ۴۵۱ — ۴۰۴ — ۵۱۷]
[۵۲۰ — ۵۲۸ — ۵۳۴ — ۵۲۶ — ۵۳۷]
[۵۳۸ — ۵۳۹ — ۴۰ — ۵۴۱]
[۵۴۲ — ۵۵۶] .

۱۱ — Berthelot برتلولو
(کیمیا کر . معاصریندن . فرانسز)
[۱۰۳] .
۱۲ — Boscowitch بوسقوویچ
(متاخریندن . عالم .)
[۱۰۳] .

۱۳ — Bowen بوین
(معاصریندن . فیلسوف . امریکایی .)
[۱۵۱ — ۱۵۳] .

۱۴ — Bradley برادله
معاصریندن . فیلسوف . انگلیز .
[۱۱۶ — ۱۱۷ — ۱۱۸ — ۱۱۹]
[۱۲۱ — ۱۵۸ — ۲۲ — ۲۶۱]
[۵ — ۵۱۳] .

۱۵ — Brown بروون
(معاصریندن . فیلسوف . انگلیز .)
[۳۶ — ۲۰۴ — ۳۳۲ — ۳۳۴]
[۳۳۸] .

۱۶ — Prof. Brown بروفسور براون
(مستشرق شهره معاصریندن . انگلیز .)
[۴۰۴] .

۱۷ — Bruno (Geordano) بروو
(دورانتباه فیلسوفلرندن . ایتالیان .)
[۸۸ — ۸۹ — ۹۰ — ۴۸۰]
[۴۹۱] .

۱۸ — Büchner (Ludovic) بوخنر
(معاصریندن . فیلسوف . آلمان .)
[۹۹ — ۱۱۲ — ۵۳۵] .

۱۹ — Butler بطلر
(معاصریندن فلسفه معلمی . انگلیز .)
[۹۲ — ۱۲۴] .

۲۰ — Byron (Lord) لورد بایرن
معاصریندن انگلیز شاعر مشهوری .
[۱۳۷ — ۵۳۸] .

C

۱ — Campanella کامپانهلا
(دورانتباه فیلسوفلرندن . ایتالیان .)
[۸۸ — ۸۹]

۲ — Carnéade قارنه آد
(قدمادن فیلسوف . یونانی الاصل .)
[۶۷ — ۳۹۶ — ۴۹۷] .

۳ — Carveth Ried قاروت رید
(معاصریندن . فلسفه معلمی . انگلیز .)
[۲۲۱ — ۱۷۲ — ۲۷۴] .

۴ — Ciceron چیچرون
(رومالی خطیب مشهور . فیلسوف)
[۱۳ — ۱۷ — ۳۹۶] .

۵ — Charles II ایکنجی شارل
(انگلتره قرالی .)
[۴۳] .

۶ — Christine کریستین
(اسوه قرالیه سی وده قارنک حامیه سی .)
[۸۳] .

۷ — Chrysippe خریسپ
(قدمای فلاسفه دن . یونانی . افلاطونک
یکنی .)
[۱۹۴ — ۳۹۵] .

- تلاریک Clarek - ۹
(متأخریندن . فیلسوف . انگلیز)
[۳۵۶].
- تله آنتی Cléanthe - ۹
(قدمای روالیوندن . یونانی)
[۳۹۴].
- فلاویوس Clausius - ۱۰
(معاصریندن . حکمتشناس و ریاضی
مشهور . آلمان .)
[۴۱۳]
- فریستوف قولومبو Ch.Colombe - ۱۱
(آمریکا کاشف شهری)
[۹۵].
- اوغوست قونت Comte - ۱۲
(Augus.)
(متأخریندن . فیلسوف مشهور . فرانسز
[۲۶ - ۹۹ - ۱۰۴ - ۱۴۰ -]
[۵۲۸].
- کونت دونوآی Comte de Noailles - ۱۴
(اسکی فرانسز سیاستپونندن .)
[۸۸]
- کوندی یاقی Condillac - ۱۵
(متأخریندن . فیلسوف . فرانسز .)
[۳۱ - ۳۵۶ - ۵۳۵].
- گوردوموآ Cordemoy - ۱۶
(ده قارت پیرولرندن . فرانسز .)
[۴۱۷].
- کوپرنیکی Copernicus - ۱۷
(هیئت شناس شهر . لهلی .)
[۱۴۲ - ۴۴۲].
- ویکتورقوزهن Cousin (Victor) - ۱۷
(متأخریندن . فیلسوف فرانسز .)
[۲۵۳ - ۲۶۵ - ۵۵۳ - ۵۵۴].

- فروزاز Crousaz - ۱۹
(متأخریندن . فیلسوف .)
[۳۵۶].
- دالامبر d'Alambert - ۱
(ریاضی و حکمتشناس شهر . فرانسز .)
[۲۵ - ۱۴۸].
- چارلس داروینی Darwin(Charles) - ۲
(علامه شهر . انگلیز .) [۷۵].
- داوینچی Davinci (Léonardo) - ۳
(هوناردو داوینچی
(دور انتباه . هنرور دای و عالم .
ایتالیان .)
[۴۴۰].
- دموقریت Democrite - ۴
(قدمادن . فیلسوف مشهور . یونانی .)
[۱۱۱ - ۱۱۲ - ۲۲۱ - ۲۵۶ -]
[۲۷۲ - ۲۷۳ - ۲۸۳ - ۳۸۴ -]
[۲۸۷ - ۳۹۰ - ۴۰۸ - ۴۲۰].
- دمورغان Demorgan (Prof.) - ۵
(علامه ریاضی و منطق . متأخریندن .
انگلیز .)
[۲۷۱].
- دسکارت Deseartes (René) - ۶
(مجدد مشهور . فیلسوف و ریاضی .
فرانسز .)
[۲۱ - ۲۴ - ۴۳ - ۶۴ - ۸۳ -]
[۸۴ - ۸۶ - ۸۷ - ۸۸ - ۹۰ -]
[۹۱ - ۹۶ - ۱۱۰ - ۱۱۱ - ۱۱۳ -]
[۱۱۸ - ۱۲۲ - ۱۴۲ - ۱۴۷ -]
[۱۸۴ - ۲۱۲ - ۲۲۲ - ۲۲۳ - ۲۲۴ -]
[۲۲۵ - ۲۲۶ - ۲۳۴ - ۲۳۷ -]
[۳۲۴ - ۳۲۹ - ۳۳۰ - ۳۵۶ -]
[۴۱۱ - ۴۳۲ - ۴۳۴ - ۴۳۵ -]

۳ -- Ferdinand Hoefler

فردیناند هوفر
(معاصریندن . عالم . اصلاً المان بر
فرانسز .)
[۱۰۳] .

۴ -- Fichte

فیخته
(المان فلاسفه متأخریندن .)
[۱۲۲ -- ۱۲۹۳ -- ۱۴۸] .

۵ -- Fikrèt

توفیق فکرت
[۴۸۸] .

۶ -- Fraser

فره‌ی زهر
(معاصریندن . عالم . انگلیز)
[۷۹] .

۷ -- Frédéric le Grand

(بوبوک فره‌ده‌ریق) آلمان امپراطوری .
[۲۸۱] .

۸ -- Fuerbach

فوشرباخ
(متأخریندن . فیلسوف . المان)
[۵۹] .

G.

۹ -- Gallenus

جالینوس
(قدمای حکمدان طبیب شهیر . یونانی)
[۹۵] .

۱ -- Galiléo-Galilèi

گالیله
(دور انباء . علامه وکاشف شهیر .
ایتالیان .)

[۳] : ۸۸ -- ۹۰ -- ۹۵ -- ۱۴۳
[۴۴۲ -- ۵۱۳] .

۲ -- Gassendi

گاساندی
(متأخریندن . فیلسوف . فرانسز)
[۴۳] : ۹۶ -- ۱۴۸ -- ۴۷۸ -- ۴۹۲ .

۴ -- Gazzali

امام غزالی
(قرون وسطاده ینیشن الهیون اسلامک
امهری . ایرانی .)
[۱۸] .

۵ -- Geulinx

ژوله نیکس
(ده‌قارت پیرولرندن . فیلسوف . فرانسز .)
[۴۷۷] .

۶ -- Gibb

کیب
(معاصریندن . ادیب و موزخ ادبیات .
انگلیز .)

[۶۱ -- ۱۴۶ -- ۴۰۴] .

۷ -- Goethe

گوته
(متأخریندن . شاعر شهیر و حکیم عالم .
آلمان .)

[۲۵ -- ۶۲]

۸ -- Gorgias

گورجیاس
(قدمادن . حکیم سوفسطائی . یونانی .)
[۴۱۱] .

۹ -- Green

گرین
(معاصریندن . فیلسوف . انگلیز .)
[۱۱۶] .

II.

۱ -- Hâfiz

حافظ شیرازی
(شاعر شهیر . ایرانی .)
[۵۶۲] .

۲ -- Holdane(Lord)

لورد هولده‌ین
(معاصریندن . فیلسوف . معلم و سیاسی .
انگلیز .)

[۱۱۶ -- ۲۴۱ -- ۴۸۳] .

۳ -- Hâmid

عبدالحق حامد
[۲۱] : ۵۹ -- ۶۰ -- ۶۱ -- ۶۲ --

۶۴ -- ۶۵ -- ۶۶ -- ۶۷ -- ۷۰ -- ۷۱ -- ۷۴

[۲۱۱ -- ۲۲۹ -- ۸۲ -- ۷۶ -- ۷۵ --

[۲۳۵ -- ۳۹۷ -- ۴۸۴ -- ۴۸۵ -- ۵۵۵] .

۴ -- Hamilton (Sir will.)

سر ویلیام هاملتن
(متأخریندن . فیلسوف . سقوج .)
[۱۴] : ۱۵ -- ۲۹ -- ۳۶ -- ۳۷ --

[۴۳ -- ۴۸ -- ۴۹ -- ۱۲۲ -- ۱۲۵ -- ۱۲۶ -- ۱۴۳

[۱۴۴ -- ۱۴۵ -- ۱۵۴ -- ۱۴۷ -- ۱۷۵ --

[۲۱۲ -- ۲۲۰ -- ۲۲۲ -- ۲۴۹ -- ۲۵۰ -- ۲۵۱

[۲۵۳ -- ۲۵۴ -- ۲۵۶ -- ۲۵۷ -- ۲۵۸ --

۲۵۹ — ۲۲۰ — ۲۲۱ — ۲۲۲ — ۲۲۳ — ۲۲۴
 — ۲۲۸ — ۲۳۰ — ۲۳۱ — ۲۳۳ — ۲۳۴ —
 ۲۳۶ — ۲۳۸ — ۲۳۹ — ۲۴۱ — ۲۴۲ — ۲۴۵ —
 — ۳۴۷ — ۳۴۸ — ۳۴۹ — ۳۵۰ — ۳۵۲ —
 ۳۵۳ — ۳۵۶ — ۳۵۷ — ۳۵۸ — ۳۵۹ — ۳۶۷ —
 — ۳۸۳ — ۳۸۶ — ۳۸۷ — ۳۹۸ — ۴۰۹ —
 ۴۲۳ — ۵۱۳ — ۵۲۲ — ۵۲۸ — ۵۲۹ — ۵۵۱ —
 — ۵۵۲ — ۵۵۳ — ۵۵۴ — ۵۵۶ — ۵۵۸ .

• Hartman (E. Von)

فون هارتمان

معاصریندن. فیلهوف. المان [۴۹۵] .

Harwey — ۶

هاروی

(دور ابتباه کاشفیندن . عالم شهر .

انگلیز .)

[۴۳ — ۹۵ — ۱۴۳ — ۱۴۴] .

Hegel — ۷

هگل

(متأخریندن . فیلسوف . المان .)

[۱۱۲ — ۱۱۶ — ۱۲۸ — ۱۲۹ — ۳۱۵ —

۳۴۵ — ۴۸۳] .

اوچونجی هانری — ۸ — Henri III

(انگلیز قرالی .)

[۹۰] .

۹ — Héraclide (Ponticus)

هراقلید

(قدمادن . یونانی . محرر .)

[۱۳] .

Héraclite — ۱۰

هراقلیت

(قدمادن . مشهور فیلسوف . یونانی .)

[۶۷] .

۱۱ — Hermès (Trismégistos)

هرمس

(اسرار انگیز بر محرر قدیم . یونانی .

مصری .) [۱۵۳] .

Hermias — ۱۲

هرمیاس

(قدمادن . آتارنه توس قرالی . یونانی .)

[۴۵] .

۱۳ — Hérodote

هرودوت

(قدمادن . مشهور ابولورخین . یونانی .)

[۱۴] .

۱۵ — Héron (d'Alexandrie)

هرون

(قدمای علمادن . یونانی .)

[۹۵] .

۱۶ — Hershell (Sir J.)

سر جون هرشل

(متأخریندن . علامه ریاضی و هیئت

شناس . انگلیز .)

[۱۱۹ — ۱۲۱] .

۱۷ — Hirn

هیرن

(معاصریندن . عالم ریاضی . بلجیقایی .)

[۴۹۳] .

۱۸ — Hobbes (Thomas)

هو بس

(متأخریندن . مشهور فیلسوف . انگلیز .)

[۳۱ — ۴۳ — ۴۴ — ۹۶ — ۲۳۵ —

۲۳۷ — ۲۴۱ — ۲۵۱ — ۴۷۸ — ۴۹۲ —

۵۱۳]

۱۹ — Hoëffding

هو فدیئنگ

(معاصریندن . فلسفه مورخی . دانمارقلی .)

[۱۱۶ — ۱۲۵ — ۴۳۹ — ۴۷۷ — ۴۸۷] .

۲۰ — Hume (David)

هیوم

(متأخریندن . فیلسوف شهر . سقوج .)

[۱۰۲ — ۱۱۲ — ۱۲۱ — ۱۲۲ — ۱۵۱ —

۲۳۱ — ۲۳۳ — ۲۳۴ — ۲۳۵ — ۲۳۶ —

۲۳۸ — ۲۳۹ — ۲۴۱ — ۲۴۲ — ۲۵۱ —

۲۵۲ — ۳۱۹ — ۵۱۷ — ۵۲۸ — ۵۳۴ — ۵۴۰ —

۵۴۱ — ۵۴۲ — ۵۴۵ — ۵۴۶ — ۵۴۹ —

۵۵۶] .

۲۱ — Huxley (Thomas)

هکسلی

(معاصریندن علامه شهر . انگلیز .)

[۷۵ — ۱۸۷ — ۲۵۹ — ۲۶۰ — ۴۴۳] .

I.

۱ -- Ibn-i-Abi-Ossei'baq

ابن ابی اصیبعه

• (مشهور حرر. عرب .) [۲۷۱]

۷ Ibn-i- Roshd ابن الرشد

• (حکیم وطیب وقاضی * شهر اندلس .

• عرب .) [۴۳۲ -- ۴۷۸]

Ibrāhīm Haqqi ابراهیم حقّی

• (متفکرین عثمانیه دن. معرفتنامه صاحب)

• [۴۹۸ -- ۵۳]

۳ -- Ismail Haqqi اسماعیل حقّی بروسه لی.

• (متصوفین عثمانیه دن. روح البیان صاحب)

• [۴۵۷]

J.

۱ -- Jams (William) ویلیام جیمس

• (معاصریندن فیلسوف و مشهور سیکولوج.

آمریکالی .)

• [۱۳۶ -- ۱۹۷]

۷ -- Jésus Christ

حضرت عیسی علیه السلام

• [۴۰۱]

۳ -- Dr Jhonson

دوکتور جونسون

• (بارلله نك معاصری . باشقه سبب

• شهرتی یوقی .) [۵۲۷]

۴ -- Jouffroy ژوفر و آ

• (متأخریندن. فیلسوف و معلم. فرانسه.)

• [۲۹۱ -- ۳۲۲]

K.

۱ -- Khadji Khalifé

• حاجی خلیفه (کاتب چلبی)

• (علمای عثمانیه دن. فاضل و تخریر و مورخ

شهر .)

• [۴۹ -- ۵۰]

۷ -- Kant (Emmanuel)

کانت ایمانوئل

• (متأخریندن مجدد صاحب مسلك .
فیلسوف . آلمان .)

[۲۱ -- ۳۲ -- ۳۴ -- ۵۱ -- ۱۱۲ --

۱۱۳ -- ۱۱۷ -- ۱۱۸ -- ۱۱۹ -- ۱۲۰ -- ۱۲۱

-- ۱۲۸ -- ۱۲۹ -- ۱۴۰ -- ۱۴۸ -- ۱۵۱

-- ۱۵۹ -- ۱۸۱ -- ۲۳۵ -- ۳۳۶ -- ۳۳۹ -- ۴۴۰

-- ۲۴۱ -- ۲۴۲ -- ۲۴۴ -- ۳۴۵ -- ۴۴۶

-- ۲۴۷ -- ۲۴۹ -- ۲۵۱ -- ۲۵۲ -- ۳۲۹ -- ۳۳۰

-- ۳۵۶ -- ۳۸۷ -- ۳۹۱ -- ۴۳۸ -- ۴۴۰

-- ۴۴۱ -- ۴۴۴ -- ۴۴۸ -- ۴۵۳ -- ۴۵۶ -- ۴۶۹

-- ۵۱۰ -- ۵۲۱ -- ۵۲۲ -- ۵۲۸ -- ۵۳۱

-- ۵۳۴ -- ۵۴۴ -- ۵۴۵ -- ۵۴۶ -- ۵۴۸ -- ۵۴۹

-- ۵۵۱ -- ۵۵۲ -- ۵۵۳ -- ۵۵۷ -- ۵۵۸]

۳ -- kaygonssouz قیغوسز سلطان

• (عثمانی صوفی * شهرتی . شاعر خداد .)

• [۵۱۶]

۴ -- Kelvin (Lord) لورد کلون

• (معاصریندن علامه و پاضی و کاشف

شهر . انگلیز)

• [۲۷۵ -- ۲۸۰]

۵ -- Kepler کپلر

• (متأخریندن هیئت شناس شهرتی . آلمان.)

• [۴۰۲]

۶ -- Khayyām عمر خیام

• (شاعر و هیئت شناس و ریاضی *

شهرتی . ایرانی)

• [۲۰ -- ۶۲]

۷ -- Kinali Zadě

• قینالی زاده علی افندی

• (علمای عثمانیه دن و اخلاقیوندن .)

-- ۱۱۰ -- ۱۹ -- ۲۲ -- ۳۴ -- ۱۱۰ --

-- ۱۱۱ -- ۱۴۶ -- ۲۴۲ -- ۳۲۳]

A -- Kuno Fisher کونوفیشر

• (معاصریندن فلسفه مورخی و منتقدی .

آلمان .)

• [۱۲۱ -- ۱۲۲]

L.

- ۱ — Lamettrie لامه تری
(متأخریندن . فیلسوف . فرانسز .)
(۱۶۶ — ۱۶۹۲ — ۱۷۳۵) .
- ۲ — Lange (A.) لانگه
(معاصریندن . فیلسوف و منقد شهیر . آلمان)
(۱۱۸ — ۱۱۹ — ۱۲۶ — ۱۸۰ — ۲۰۵ — ۲۳۹ — ۲۴۰ — ۲۴۲) .
- ۳ — Lavoisier لاووازیه
(متأخریندن . کیمیا ک مؤسس اولان
علامه شهیر . فرانسز .)
(۱۷۸ — ۱۷۹۳ — ۱۸۰۳) .
- ۴ — Lefèvre (A.) آندره لوفه ور
(معاصریندن . فیلسوف . شاعر و سیاسی .
فرانسز .) (۱۸۳۵) .
- ۵ — Leibnitz لایبنیتس
(متأخریندن . فیلسوف داهی . علامه
ریاضی و کاشف و حقوق شناس . آلمان .)
(۲۱ — ۱۲۸ — ۱۷۱ — ۱۷۰۶ — ۳۵۶ — ۴۵۸ — ۴۶۰ — ۴۷۵ — ۴۷۸ — ۴۹۱ — ۴۹۳ — ۴۹۴ — ۴۹۵ — ۴۹۶ — ۴۹۷ — ۴۹۸ — ۴۹۹ — ۵۰۰ — ۵۰۱ — ۵۰۲ — ۵۰۳ — ۵۰۴ — ۵۰۵ — ۵۰۶ — ۵۰۸ — ۵۱۱ — ۵۱۲ — ۵۲۳ — ۵۲۶ — ۵۲۷ — ۵۲۹ — ۵۳۰) .
- ۶ — Léon لهئون
(اسکی یونانستاندا . بروقتلر موره حاکمی
یونانی .) (۱۳۳) .
- ۷ — Letourneau (Dr. Charles) دوکتور شارل لوتورنو .
(معاصریندن . عالم . طبیب و فیلسوف .
فرانسز .) (۱۸۳۵) .
- ۸ — Leucippe لوسیپ
(قدمای فلاسفه دن . یونانی .)
(۲۲۱ — ۳۷۲) .

لیوونهوک Lewenhoeck — ۹
(متأخریندن . عالم طبیعی و کاشف .)
(۱۶۵۰) .

لیپس Lips — ۱۰
(متأخریندن برمتفکر . آلمان .)
(۱۶۱۱) .

جون لوق Locke (John) — ۱۱
(متأخریندن فیلسوف و سیاسی شهیر .
انگلنیز .)

(۱۱۲ — ۱۱۹ — ۱۴۸ — ۱۵۱ — ۲۱۲ — ۲۳۷ — ۲۴۱ — ۲۴۹ — ۲۵۶ — ۴۴۴ — ۴۹۲ — ۴۹۴ — ۵۰۸ — ۵۰۹ — ۵۱۰ — ۵۱۱ — ۵۱۲ — ۵۱۳ — ۵۱۴ — ۵۱۶ — ۵۱۷ — ۵۱۸ — ۵۲۲ — ۵۲۳ — ۵۲۴ — ۵۲۵ — ۵۲۶ — ۵۲۷ — ۵۲۸ — ۵۳۱ — ۵۳۳ — ۵۳۴ — ۵۳۵ — ۵۳۶ — ۵۳۷ — ۵۳۸ — ۵۴۲ — ۵۴۶ — ۵۴۷ — ۵۴۹ — ۵۵۱ — ۵۵۲ — ۵۵۳ — ۵۵۸) .

Louis XIII — ۱۲

اون اوچونجی لوی
(فرانسه قرالی .)
(۸۹) .

M.

۱ — Maimonide (Moïse)

موسی بن عبدالله بن میمون
(قرون وسطا تک الذبولوک فیلسوفلریندن .
اندلسلی . موسوی .)
(۴۷۸) .

۲ — Malebranche مالبرانیش

(متأخریندن . فیلسوف . فرانسز .)
(۲۲۳ — ۲۲۵ — ۲۹۸ — ۳۵۶ — ۴۵۶ — ۴۵۷ — ۴۶۰ — ۴۶۷ — ۴۶۹ — ۴۷۰ — ۴۷۱ — ۴۷۲ — ۴۷۳ — ۴۷۴ — ۴۷۶ — ۴۷۷ — ۴۷۸ — ۴۷۹ — ۴۸۰ — ۴۸۱ — ۴۸۴ — ۵۳۲ — ۵۴۰) .

- ۳ — Mansel مه نسل
(معاصریندن . فیلسوف . انگلیز .)
(۱۲۴ — ۲۵۰ — ۲۵۷ — ۲۵۸ — ۲۳۲)
(۵۲۹ —)
- ۴ — Maupertius موپرچیوس
(یوئوک فرهدره رینی عجمیلرندی بر متفکر .)
(فرالسز .)
(۲۸۱)
- ۵ — Mc Taggart ماق تاگارت
(معاصریندن کیمرچده فلسفه معلی .)
(انگلیز .)
(۱۱۶)
- ۶ — Meh. Shirin محمد شیرین مفری
(شمراى صوفیه نك اعظمندن . ایرانی .)
(۴۸۱)
- ۷ — Métrodore de Sicile مه تروودور
(لدمادن بر فیاسوف . یونانی .)
(۳۱۱)
- ۸ — Mill (J.S.) جون ستوئت میل
(معاصرین فلاسفه نك اك بوئوکارندن)
(منطقی شهیر . انگلیز)
(۱۱۲ — ۱۱۶ — ۱۱۹ — ۱۲۱ — ۱۲۵)
(۱۴۰ — ۱۷۵ — ۱۸۲ — ۱۸۴ — ۲۰۲ —)
(۲۰۴ — ۲۰۵ — ۲۴۹ — ۲۵۰ — ۲۵۲ — ۲۵۴)
(۲۵۶ — ۲۵۷ — ۲۵۸ — ۲۶۰ — ۳۲۲ —)
(۳۴۴ — ۳۵۲ — ۳۵۹ — ۳۹۸ — ۴۳۳ — ۴۳۷)
(۴۹۶ — ۵۰۴ — ۵۱۳ — ۵۲۳ — ۵۲۸ —)
(۵۴۰ — ۵۴۲ — ۵۵۱ — ۵۵۶)
- ۹ — Mocenigo موجه نیفو
(دور انتباه زمانلرنده طوغمش بر)
(اخلافسز . ایتالیانی .)
(۹۰)
- ۱۰ — Moïse حضرت موسی علیه السلام
(۴۸۶ — ۴۸۷)

- ۱۱ — Moleschott (Jacob) یاقوب موله شوت
(اون طوقوزنجی عصر علما وفلاسفه .)
(سندن . هولاندالی .)
(۱۱۲ — ۵۳۵)
- ۱۲ — Molière مولیه
(شهور مضحک نویس . فرالسز .)
(۱۶۷)
- ۱۳ — Mouhieddîn محی الدین بن العربی
(صوفی شهیر . شیخ اکبر . عرب .)
(۵۶ — ۱۶۶ — ۴۵۷ — ۵۶۳)
(N.)
- ۱ — Nassiruddin خواجه نصیر الدین طوسی
(علامه ریاضی و اخلاق . فیلسوف)
(شهیر . ایرانی .)
(۱۸ — ۳۴ — ۱۱۰ — ۱۱۱ — ۱۴۶)
(۴۳۲)
- ۲ — Nazzâm نظام المعزلی
(معتزله قرقه سنك ائمه سندن فیلسوف)
(شهیر . عرب .)
(۲۶۰ — ۵۲۰)
- ۳ — Nefî نفی
(شاعر شهیر . ترک .)
(۴۸۳)
- ۴ — Newton (Sir Isaac) نیوتن
(علامه شهیر . جاذبه قانونلرنك کاشنی .)
(انگلیز .)
(۱۴۳ — ۲۱۲ — ۳۵۶ — ۴۹۶ — ۵۰۹)
- ۵ — Nicomachus نیکوماخوس
(ارسطونك پدری . یونانی .)
(۴۵)
- ۶ — Nietzsche (Fr.) فرهدره رینی نیچرجه

(معاشریندن. فیلسوف وادیب. آلمان)
(۱۷۵۰)

(۱)

۱ — Occam (William of)

ویلیام اوف اوق قام
(سقولاتیق فیلسوفلریلك اك مشهور.
لوندن . انگلیز .)
(۵۰۹)

P.

۱ — Pascal (Blaise) پاسكال

(متأخریندن . ریاضی و کاشف و محرر
شهر . فرانسز .)
(۴۰۱)

۲ — Paul (St.) پاولوس

(حواریوندن .)
(۴۰۱)

۳ — Paulsen پاولسن

(معاشریندن. فلسفه معلمی. آلمان.)
(۵۶ — ۵۸ — ۱۰۷ — ۱۰۹ — ۱۱۰ —
۱۱۱ — ۱۱۲ — ۱۱۳ — ۱۲۱ — ۱۲۴ — ۱۲۵ —
۱۲۶ — ۱۲۸ — ۱۲۹ — ۱۳۰ — ۱۵۴)

۴ — Péricle's پاریکلِس

آتنه حاکم مشهوری. سقراطك معاصری
یونانی .)
(۲۴۰ — ۳۱۱)

۵ — Pertév pasha پرتوپاشا

(عثمانل شاعری وادیب. تاناراصلندن.)
(۴۶۲)

۶ — Philippe فیلیپ

(مادونیاقرال و اسکندر کبیرك باباسی.
یونانی .)
(۴۵)

۷ — Philon فیلون

(مشهور اسکندریه لی فیلسوف .
موسوی .)
(۳۹۹ — ۴۰۰ — ۴۰۱)

۸ — Platon افلاطون

(فیلسوف شهر . یونانی .)

(۱۷ — ۱۹ — ۲۰ — ۲۱ — ۲۳ — ۲۵ —
— ۸۲ — ۷۵ — ۵۵ — ۵۲ — ۴۵ — ۳۱ —
۱۰۱ — ۱۴۷ — ۱۵۰ — ۱۷۲ — ۲۴۹ — ۳۰۶ —
— ۳۰۷ — ۳۱۷ — ۳۵۳ — ۳۷۴ — ۳۷۵ —
۳۷۶ — ۳۷۷ — ۴۰۰ — ۴۰۷ — ۴۲۰ — ۴۲۲ —
— ۴۲۳ — ۴۲۴ — ۴۴۱ — ۴۸۹ — ۵۰۹ —
— ۵۲۲ — ۵۴۲ — ۵۴۷)

۹ — Plotinus فلوپینوس

(نوفلاطونیه مذهبك اك بویوك فیلسوفی.
یونانی .)
(۷۱ — ۵۵۴)

۱۰ — Poincarre پوانکاره

(عصر مزك اك بویوك علامه ریاضی سی.
فرانسز .)
(۳۱ — ۱۱۹)

۱۱ — Porphyre پورفیر

(نوفلاطونیلردن . فیلسوف . ایساغوجی
مؤانی . یونانی)
(۴۰۵)

۱۲ — Prodicus پرودیكوس

(قدمای سوفسطائیهدن . یونانی .)
(۳۱۱)

۱۳ — Protagoras پروتاگوراس

(قدمای سوفسطائیهدن اك بویوك .
یونانی .)
(۲۴۰ — ۳۱۱ — ۳۱۵ — ۳۱۶ — ۳۰۸)

۱۴ — Proxénus پروکسنوس

(ارسطونك صربی سی. یونانی .)
(۴۵)

۱۵ — Ptoleméus بطلمیوس

(قدمادن. هیئت شناسی. حکیم. یونانی.)
(۸۹)

۱۶ — Pyrrhon پیررون
(قدمادن ریپون فرقه سنک رئیس)
یونانی (۰)
(۲۹۰) .

۱۷ — Pythagore پیتاغور
(قدمای فلاسفه نك اك مشهور لرندن)
یونانی (۰)
(۱۳ — ۱۷ — ۲۵ — ۹۵ — ۱۰۱ — ۳۶۹)
(۵۰۷) .

۱۸ — Pythias پیثیاس
(ارسطونك زوجته سی. یونانی (۰)
(۴۵) .

R.

۱ — Reid (Thomas) روماس ریید
(سفوجیامدرسه سنك اك مشهور فیلسوفی)
(۲۰۴ — ۲۲۲ — ۲۳۵ — ۲۳۶ — ۲۳۷ — ۲۳۸ — ۲۵۰ — ۲۵۱ — ۲۵۲ — ۲۲۱ — ۲۲۲ — ۲۳۳ — ۲۳۴ — ۲۳۶ — ۲۳۸ — ۲۴۰ — ۲۵۶ — ۴۶۰ — ۵۴۹ — ۵۵۰ — ۵۵۱ — ۵۵۲ — ۵۵۳ — ۵۵۴) .

۲ — Richelieu (Cardinal) ریشلیو
(متأخریندن. سیاسی مشهور. فرانسه)
(۸۹) .

۳ — Robinson (Very Rev. Ar.) آرمی تیج روبنسون
(معاصریندن برانکلیز پیستوپوسی)
(۵۶۱) .

۴ — Rousseau (J.J.) ژان ژاق روسو
(متأخریندن. فیلسوف، محرم، ادیب.
فرانسز (۰)
(۱۰۰ — ۵۳۶ — ۵۶۲ — ۵۶۳) .

S.

۱ — Saadi سعدی شیرازی
(شاعر و فاضل شهیر. ادیب ایرانی (۰)
(۱۹۹) .

۲ — Saül Levy Morteira سائول لدوی
(فیلسوف سپینوزا نك طالود خواجہ سی.
موسوی (۰) (۱۷۸) .

۳ — Schabasteri (Mahmoud) محمود شبستری
(کلش راز مؤلفی. مشهور شاعر صوفی.
ایرانی (۰)
(۴۸۶ — ۴۸۷ — ۴۸۸) .

۴ — Shaftesbury (Lord) لورد شافتسبری
(متأخریندن. محرم شهیر. انگلیز (۰)
(۵۰۹) .

۵ — Scelling شه لینگ
(متأخریندن. فیلسوف و محرم. آلمان)
(۱۶ — ۳۲ — ۱۱۲ — ۱۱۹ — ۱۲۹ — ۳۴۵) .

Sehopenhauer (Arthur) شوپنهاؤور
(متأخریندن. فیلسوف بدبین. آلمان)
(۲۰ — ۲۱ — ۵۹ — ۶۲ — ۷۱ — ۷۵ — ۱۷۰ — ۲۲۲ — ۲۲۳ — ۲۲۶ — ۲۴۶ — ۲۴۸ — ۲۴۹ — ۵۵۸) .

۷ — Seyyed Scherif سید شریف جرجانی
(فیلسوف مشهور (۰)
(۴۱۷ — ۴۲۲) .

۸ — Socrates سقراط
(قدمانك اشهر حکما سی. یونانی (۰)
(۱۴ — ۴۵ — ۶۴ — ۶۵ — ۱۹۴ — ۳۰۴ — ۳۱۱ — ۳۱۴ — ۳۱۵ — ۳۶۷ — ۳۶۸) .

۹ — Solon سولون
(قلمای حکامان مشهور واضع قانون.
یونانی.)
(۱۴).

۱۰ — Spencer (Herbert)
هربرت اسپنسر
(تکامل فلسفه سنک مؤسسی. معاصریندن.
انگلیز.)

۱۱۲ — ۱۰۴ — ۸۱ — ۷۵ — ۵۰ — ۲۶)
— ۱۱۶ — ۱۱۹ — ۱۲۴ — ۱۲۶ — ۱۲۸ —
۱۳۰ — ۱۴۰ — ۱۴۵ — ۱۷۷ — ۱۷۸ — ۲۲۰ —
۲۵۳ — ۲۵۹ — ۲۷۹ — ۳۳۰ — ۳۶۷ — ۴۹۸ —
— ۳۹۹ — ۵۱۸ — ۵۲۰ — ۵۲۳ — ۵۲۸ —
— ۵۵۹ — ۵۶۰ — ۵۶۱ — ۵۶۲).

۱۱ — Spinoza (Baruch)
متأخریندن. فیلسوف شپیر. موسوی.)
(۱۴۲) — ۱۵۱ — ۲۴۷ — ۲۹۷ — ۴۵۶ —
— ۴۵۷ — ۴۶۰ — ۴۷۷ — ۴۷۸ — ۴۷۹ —
۴۸۰ — ۴۸۱ — ۴۸۲ — ۴۸۴ — ۴۸۵ — ۴۸۶ —
— ۴۸۷ — ۴۸۸ — ۴۸۹ — ۴۹۰ — ۴۹۱ —
— ۴۹۲ — ۴۹۸ — ۴۹۹ — ۵۰۰ — ۵۰۱ — ۵۰۲).

۱۲ — Stallo ستالو
(معاصریندن. محررین و متقدین علمادان.
آمریکایی)
(۵۰۶).

۱۳ — Suleifman (Sultan)
سلطان سلیمان قانونی
(۷۲).

۱۴ — Swammerdam
سوامردام
(متأخریندن مدققین و کاشفین علمادان.
(۵۰۵).

T.

۱ — Tahsin (Kodja)
خواجه تحسین اندی
(معاصریندن. عثمانی علما و حکاماندن.
آرناوود.)

(۶۶ — ۳۰۱).
۲ — Tamarlan تیمورلنک
(مشهور، تاتار.)
(۴۲۹).

۳ — Teftāzāni
سمالدین تفتازانی
(علمای دیندن. تیمورلنک قاضی سی.)
(۴۲۹).

۴ — Thalès تالس
(حکمای مبعه نیک برنجیسی. یونانی.)
(۹۵ — ۱۲۸ — ۳۶۷ — ۵۶۲).
۵ — Tissot تیسو
(معاصرین محرریندن. فرانسی.)
(۱۲۰).

۶ — Tycho Brahe تیخو براهه
(متأخریندن. هیئت شناس مشهور.)
(۴۴۲).

۷ — Tylor طالپر
(معاصرین علمادان. انگلیز.)
(۵۹ — ۷۹).
۸ — Tyndall تیندول
(معاصریندن و علمای بنامدن. انگلیز.)
(۱۴۵).

U.

۱ — Ueberweg یوبروهغ
(معاصریندن. فلسفه مورخی. آلمان.)
(۱۳۶).

۲ — Urbain VIII (Pape) یوربن
(پاپا.)
(۸۸).

V

- ۱ — Vanini وانیفی
دوران‌بناه متفکر لرزیدن . ایتالیان .
(۹۰) .
- ۲ — Virgile ویرژیل
(لاتین شاعر شهرت‌شماری .)
(۷۱) .
- ۳ — Vogt (Karl) کارل فوخت
(متأخریندن . عالم طبیعی و فیلسوف .
آلمان .)
(۱۱۲ - ۵۳۵) .
- ۴ — Voltaire وولتهیر
(فرانسوی حکیمی و شاعر مشهوری .)
(۴۱۶ - ۵۳۵) .
- W
- ۱ — Whewell (Dr) دوکتور هیوول
(معاصریندن و آلمانیوندن . فیلسوف .
عالم . انگلیز .)
(۱۱۸ - ۱۱۹ - ۳۰۱ -)
(۳۹۱ - ۴۴۱ - ۴۴۲ - ۵۲۹ - ۵۳۸) .
- ۲ — Wilson (President) ویلسون
(آمریکا جواهر متفقه‌سی رئیس .)

۳ — Wolff وولف

(متأخریندن . فیلسوف . آلمان .)
(۱۲۸ - ۱۲۹) .

۴ — Wordsworth

وورزورث
(معاصریندن مشهور برانگلیز شاعری .)
(۷۰ - ۱) .

۵ — Wundt وونت
(معاصریندن و آلمان فلاسفه حاضره‌سندن .)
(۱۰۲) .

X.

۱ — Xénophane کسه‌نوفان
(قدمای یونانی‌دن بر مشهور فیلسوف .)
(۳۰۸) .

Y

۱ — Yénous Imré یونس ابره
(مشهور ترک شاعر صوفی‌سی . قدمادن .
(۴۸۱) .

Z

۱ — Zia Pasha ضیا پاشا
(عثمانی شاعر مشهوری . اصلی بوشناق .)
(۶۰ - ۶۱ - ۲۹۷) .

۲ — Zenon زنون
(قدمادن . فیلسوف شهر . روادئونک
پیری یونانی .)
(۳۱۸) .



متن کتابده مرتب خطالری وارسهده اهمیتلی شیلر دکلدرد . سیاق و سباق ایله
آکلاشیلیر . اونک ایچون آیریجه جدول یایمغه لزوم کورمدم .